

Prakrit Text Society Series No. 39

सिरिविजयसीहायरियविरइया

# सिरिभुयणसुंदरीकहा

(कथा खण्ड)

संपादक :  
विजयशीलचन्द्रसूरि

पं. दलसुख मालवणिया  
प्राकृत ग्रन्थ परिषद्  
अमदावाद

वि.सं. २०५६

ई. २०००



Prakrit Text Society Series No. 39  
(प्राकृत ग्रंथ परिषद् श्रेणी, क्रमांक ३९)

सिरिविजयसीहायरियविरड्या  
**सिरिभुयणसुंदरीकहा**  
(कथा खण्ड)

सम्पादक :  
विजयशीलचन्द्रसूरिः

पं. दलसुख मालवणिया  
प्राकृत ग्रन्थ परिषद्  
अमदावाद

वि.सं. २०५६

ई. २०००

# श्रीभुवनसुन्दरीकथा-प्राकृत पद्यबद्ध कथाग्रन्थ

कर्ता : विजयसिंहसूरि

सम्पादक : विजयशीलचन्द्रसूरि

प्रकाशक तथा प्राप्तिस्थान :

पं. दलसुख मालवणिया प्राकृत ग्रन्थ परिषद्  
(Prakrit Text Society)

C/o. आ. श्रीविजयनेमिसूरि जैन स्वाध्याय मन्दिर  
१२, भगतबाग, जैननगर, नवा शास्त्रामंदिर रोड,  
आणंदजी कल्याणजी पेढीनी बाजुमां,  
अमदावाद-३८०००७

प्रथम आवृत्ति : ५००

ई. २००० वि.सं. २०५६

मूल्य : रु. २५०-००

प्राप्तिस्थान : सरस्वती पुस्तक भण्डार

११२, हाथीखाना, रतनपोळ, अमदावाद-३८०००१

मुद्रक : क्रिश्ना प्रिन्टरी

हरजीभाई नाथालाल पटेल

९६६, नारणपुरा जूना गाम, अमदावाद-३८००१३

फोन : ७४९४३९३

जिन्होंने अनेक प्राकृत ग्रन्थों की रचना की  
जिन्होंने मुझे प्राकृत पढने की प्रेरणा दी,  
उन परमपूजनीय सिद्धान्तमहोदधि प्राकृत  
विशारद आचार्य भगवंत  
श्रीविजयकरतूरसूसुरीश्वरजी को  
उनकी जन्मशताब्दी के उपलक्ष्य में  
समर्पित

## General Editor's Foreword

We are grateful to Acharya Vijayshilchandraśūriji for making available for publication to the Prakrit Text Society the important, voluminous Prakrit narrative work *Bhuyāṇasundari-kahā* written by Vijayasimhaśūri in the tenth century A.C. and edited carefully by the Acharya on the basis of two manuscripts. Lovers of Prakrit kathā literature, we hope, will find it interesting and appreciate it.

**Nagindas J. Shah**

**H. C. Bhayani**

## सम्पादकीय

नाइलू (नागेन्द्र) कुलीन तप-संयम-शीलरत श्री समुद्रसूरिके स्वहस्तदीक्षित शिष्य आचार्य श्री विजयसिंहसूरि द्वारा विरचित, प्राकृत भाषामय एवं पद्यात्मक, 'श्री भुवनसुन्दरी कथा' का सम्पादन व प्रकाशन करते हुए अत्यधिक आनन्द का अनुभव हो रहा है ।

इस ग्रंथ की रचना का वर्ष ग्रन्थ में कहीं भी निर्दिष्ट नहीं है । फिर भी विद्वानों ने बृहट्टिप्पनिका के आधार पर इसका रचना-वर्ष सं. ९७५ होने का निर्देश दिया है । डॉ. मधुसूदन ढांकी के अनुसार यह वर्ष विक्रम संवत् का न होकर शक संवत् हो यह अधिक संभवित है । क्यों कि कर्ताने इस ग्रन्थ की प्रस्तावना में 'धनपाल' कवि का स्मरण (गाथा ११) किया है, और धनपाल का सत्ता समय वि.सं. की १०वीं-११वीं शती माना गया है । अतः धनपाल के बाद में ही यह ग्रन्थकार हुए होने चाहिए, और अतएव ९७५ को विक्रम वर्ष न मान कर शक वर्ष (ई. १०५३) मान लिया जाय, तो सभी सुसंगत हो सकता है ।

इस ग्रन्थ का रचना-स्थल सोमेश्वरनगर (प्रभास पत्तन) है, ऐसा प्रशस्ति से सिद्ध है । गाथा-प्रमाण ८९४४ है; प्रशस्ति अलग ।

यह कथा व कथानायिका भुवनसुन्दरी-दोनों का निर्देश या उल्लेख, जहाँ तक मेरी जानकारी है वहाँ तक, पूर्वकालीन कोई साहित्य में प्राप्य नहीं है । जैन आचार्यों की परंपरा रही है कि जिस बात या पात्र को शास्त्रों का या पूर्वाचार्यों का समर्थन मिला-मिलता हो, उसीको विषय बनाकर वे चरित्र या कथा लिखेंगे । जबकि प्रस्तुत रचना के बारे में ऐसा हुआ नहीं लगता है । अब होगा ऐसा कि कोई व्यक्ति ग्रंथकार पर आक्षेप करेगा कि 'आप तो अपनी मनगढ़ंत-निराधार या कल्पित-कथा बना रहे हैं । ऐसे संभवित आक्षेप को शायद लक्ष्य में रखकर ही ग्रंथकारने निम्नलिखित गाथाएं लिख दी लगती है :

तप्परिवालणमाहप्प-गलियनीसेसकम्मनिलयाण ।  
 पुब्बपुरिसाण चरियं जणइ विवेयं कहिज्जंतं ॥२७॥  
 परियप्पियचरियगयं दुविहं पि हु उवसमेइ जह जीये ।  
 ता अविकलकज्जपसाहणेण इह दोवि गरुयाइं ॥२८॥  
 तं नत्थि संविहाणं संसारे एत्थ जं न संभवइ ।  
 इय वयणाओ सव्वं चरियं चिय कप्पियं नत्थि ॥२९॥

यह निवेदन बड़ा मार्मिक-गूढार्थक मालूम होता है ।

इस भुवनसुन्दरी कथा को आधार बना कर, आगमिक श्रीचारित्रप्रभ-  
 सूरिशिष्य श्रीजयतिलकसूरिने 'हरिविक्रमचरित्र' नामक, संस्कृत श्लोकबद्ध व  
 द्वादश सर्गात्मक ग्रन्थ की रचना की प्रतीत होती है । यद्यपि कर्ताने कहीं  
 भी विजयसिंहाचार्य का या उनकी भुवनसुन्दरी कथा का उल्लेख नहि किया,  
 फिर भी उस ग्रन्थ का विषयानुक्रम देखते ही पता चलता है कि यह प्राकृत  
 कथा का ही संक्षिप्त व सरल संस्कृत रूपांतर है । इसमें ४७५२ पद्य है ।  
 यह प्रकाशित भी है ।

प्रस्तुत सम्पादन मुख्यतया खम्भात-स्थित श्रीशान्तिनाथ ताडपत्रीय  
 जैन ज्ञानभंडारसत्क ताडपत्रीय प्रति के आधार पर तैयार किया गया है ।  
 उक्त प्रति के २७१ पत्र है, व सम्भवतः बारहवें शतक में लिखी गई है, मुनि  
 पुण्यविजयजीने इस प्रति को तेरहवें शतक के पूर्वार्ध में लिखे जाने की  
 संभावना व्यक्त की है । प्रति के अन्तिम पृष्ठ में इस प्रति की संवत् १३६५  
 में साधु नयपाल की पत्नी स्यणादेवी द्वारा खरीद किया जानेका स्पष्ट उल्लेख  
 मिलता है । अतः १३६५ से पूर्व तो यह प्रति लिखी ही गई है ।

दूसरी कागद की प्रति अमदावाद के श्रीलालभाई दलपतभाई  
 भारतीय संस्कृति विद्यामन्दिर के संग्रह की मिली है । जो अनुमानतः सोलहवें  
 शतक की लगती है । उसके प्रान्त भाग में लेखक, समय, स्थल वगैरह का  
 कोई निर्देश नहीं है । फिर वह अशुद्धि प्रचुर भी है । बराबर जांच करने  
 से लगा कि यह प्रति, उक्त ताडपत्र-पोथी की ही नकल है । तथापि ताडपत्र-

प्रेथी में दो-चार ठेकाने त्रुटित पत्रवाले आये, वहां पाठ पूर्ति इसी प्रति के आधार पर वा गई है ।

उक्त दोनों प्रतियों का उपयोग करने की सम्मति देने के लिए उपर्युक्त दोनों संस्थाओं के कार्यवाहकों के प्रति मैं कृतज्ञता व्यक्त करता हूँ ।

ग्रन्थ की प्रतिलिपि करने में मुनि कल्याणकीर्तिविजयजीने काकी सहायता दी है ।

इस कथा का संक्षिप्त हिन्दी सार व परिशिष्ट दूसरे खण्ड में दिये हैं । जिज्ञासुओं को वह देख लेनेका अनुरोध है ।

ग्रन्थ का सम्पादन गुरुकृपा से यथामति किया गया है । कहीं कोई क्षति भी रह गई हो, इसका पूरा सम्भव है । मुद्रणमें भी दृष्टिदोष से या प्रेसदोष से कुछ क्षतियां हो गयी है । जितनी क्षतियां, छप जाने के बाद नजर में आई, उसका एक शुद्धिपत्र ग्रन्थ के अन्त में दिया जाता है । कृपया उसका उपयोग करें ।

इस ग्रन्थ का प्रकाशन सुविख्यात संस्था 'प्राकृत ग्रन्थ परिषद्' के नाम से हो ऐसी मेरी भावना थी । इसमें अनुमति देने के लिए मैं उक्त संस्था के पदाधिकारी गण का व विशेषतः डॉ. हरिवल्लभ भायाणी का ऋणी हूँ ।

क्रिष्णा प्रिन्टरी, अमदावाद के श्री हरजीभाई पटेल को उत्तम मुद्रण कर देने के लिए धन्यवाद ।

भाद्रपद शुदि ११, सं. २०५६  
भावनगर

-विजयशीलचन्द्रसूरि



## आर्थिक सहयोग

वलसाड जैन संघ के श्राविका-गणने  
इस ग्रन्थ के प्रकाशनार्थ अपने  
ज्ञानद्रव्य का सदुपयोग किया है,  
एतदर्थ उनको खूब खूब धन्यवाद ।

॥ ॐ ह्रीं अर्हं नमः ॥ ॐ ऐं नमः ॥

श्रीशङ्खेश्वरपार्थनाथाय नमोनमः ॥

नमो नमः श्रीगुरुनेमिसूरये ॥

## सिरिभुयणसुंदरीकहा ॥

॥ नमः सर्वज्ञाय ॥

पढमं चिय पढमजिणस्स नमह नहमणिमऊहरमणीयं ।  
अंकुरियमोक्खपायव-बीयनिहाणं व पयकमलं ॥१॥  
सो जयइ वद्धमाणो घणोव्व इह जस्स वयणवारिभरो ।  
नियभासाय रसेण व तरूण जीवाण परिणमइ ॥२॥  
अइनिम्मलाए नमिमो अवसेसजिणावलीए पयकमले ।  
जीए मुत्तावलीए व एक्को च्विय सुत्तसारत्थो ॥३॥  
पणमह पणमंतमहा-कइंदसंकंतनयणपडिबिंबं ।  
कयनीलुप्पलपूयं व भारईचरणनहनिवहं ॥४॥  
जाओ जाण पसाएण मज्झ मूयस्स वयणविन्नासो ।  
ताण अणंतगुणाणं गुरूण पणमामि पयकमलं ॥५॥  
ते कइणो हिययमहोयहिम्मि सुमहत्थरयणरमणीया ।  
उल्लसइ जाण वाणी उयरुयरि तरंगमालव्व ॥६॥  
सुकइत्तणावलेवं वहंति कह ते न जाण उभयंपि ।  
वयणम्मि वसा वाणी न मणम्मि सयत्थनिप्फत्ती ॥७॥  
पयपूरणमेत्तेणं अदिट्ठपरमत्थवत्थू(त्थु)नाणेणं ।  
कव्वेण कुवुरिसेण व कइकुलमज्झे परं हासो ॥८॥

पढमकइचकूवट्टीण नमह सिरिइंदभूइपमुहाण ।  
 सुयसायरम्मि जाणं इयरकई तणमिव तरंति ॥९॥  
 सिरिपालित्तय-कइबप्पहट्टि-हरिभइसूरिप्प(प)मुहाण ।  
 किं भणिमो जाणज्जवि न गुणेहिं समो जए सुकई ॥१०॥  
 वा(भा?)से विरयम्मि जए कालंतरिए य कालदासम्मि ।  
 धणवालो सुकइत्तण-भारुव्वहणम्मि जइ धवलो ॥११॥  
 सच्छंदपयपयारो निरभिप्पायप्पहासणपरो य ।  
 सुकइत्तणगहगहिओ बुहाण हासं गमिस्सामि ॥१२॥  
 ते कत्थ महाकइणो रविणोव्व जए पयासियपयत्था ।  
 कत्तो खज्जोया इव मारिसकइणो पयइतुच्छ ॥१३॥  
 जइ वेवं तहवि ससत्ति-सरिससत्तोवयारहियएण ।  
 अहमुज्जुत्तो न उणो सुकइत्तगुणाहिमाणेण ॥१४॥  
 उसहाइएहिं जइ किर अणुवमविरिएण साहिउ मोक्खो ।  
 ता संपइ इयरजणो मा तत्थ समुज्जमं कुणउ ? ॥१५॥  
 संतेसु वि पुव्वकइंद-विविहधम्मोवएससत्थेसु ।  
 जहसत्ति मारिसो वि हु उवयारं कुणइ, किमजुत्तं ? ॥१६॥  
 निययसहावसरिच्छं भुयणं परिणमइ सज्जण-खलाण ।  
 सिय-असियसहावाणं पक्खाण व सेय-किण्हाण ॥१७॥  
 परमत्थसज्जणाणं इयराण वि होंति न हु उवाहीओ ।  
 धवलिज्जइ केण ससी कसणिज्जइ केण राहू वि ॥१८॥  
 जे जाणिऊण दोसं सल्लं च समुद्धरंति ते सुयणा ।  
 जे उण गुणमवि दोसं भणंति ते दुज्जणा निययं ॥१९॥

- अम्हारिसेसु तम्हा धम्मुवएसत्थमुज्जमंतेसु ।  
 अणुजाणंतु य सुयणा इयरे वि य होतु मज्झत्था ॥२०॥
- पुरिसेणं बुद्धिमया लद्धूण सुमाणसत्तमइदुलहं ।  
 अप्पहियं कायव्वं तं च न धम्माउ परमत्थि ॥२१॥
- धम्मो संसारमहा-समुद्वपडियाण जाणवत्तं व्व ।  
 धम्मो च्चिय होइ सुमाणुसत्त-सुर-सिद्धिसुहमूलं ॥२२॥
- जइ वि हु दाणाईओ चउव्विहो मोक्खसाहओ धम्मो ।  
 भणिओ जिणेहिं तहवि हु मज्झ रुई नाणदाणम्मि ॥२३॥
- अमुणियपरमत्थाणं मिच्छत्तमहंधयारभूढाण ।  
 जो देइ नाणदाणं तेण न किं तिहुयणं दिन्नं ? ॥२४॥
- जम्मंधस्स व जह विमल-चक्खुदाणेण होइ उवयारो ।  
 जीवाण वि जाण तहा निम्मलनाणप्पयाणेण ॥२५॥
- तं पि हु नाणपयाणं जहत्थजिणधम्मतत्तवित्थारो ।  
 संमत्त-नाण-दंसण-चरणाणुगओ कहेयव्वो ॥२६॥
- तप्परिवालणमाहप्प-गलियनीसेसकम्मनियलाण ।  
 पुव्वपुरिसाण चरियं जणइ विवेयं कहिज्जंतं ॥२७॥
- परियप्पियचरियगयं दुविहं पि हु उवसमेइ जइ जीवे ।  
 ता अविकलकज्जपसाहणेण इह दोवि गरुयाइं ॥२८॥
- तं नत्थि संविहाणं संसारे एत्थ जं न संभवइ ।  
 इय वयणाओ सव्वं चरियं चिय कप्पियं नत्थि ॥२९॥
- न परोवयारओ इह अन्नो धम्मो जयम्मि संभवइ ।  
 उवयारो वि न विज्जइ सद्धम्मुवएसओ अवरो ॥३०॥

इय भाविऊण सम्मं धम्मवएसप्पयाणसुविसुद्धं ।  
सिरिभुयणसुंदरीए चरियाणुगयं कहं सुणह ॥३१॥

इह दाहिणद्धभारह-मज्झिमखंडस्स मंडणं अत्थि ।  
उवहसियसुरनिवासा अउज्झ नामा महानयरी ॥३२॥  
सुविभत्तितिय-चउक्का सुपवंचियचच्चरा विचित्तपहा ।  
सुविसालविपणिमग्गा फलिहुज्जलसालपरिकलिया ॥३३॥  
पायालोयरगंभीर-भीमपरिहाइ परिगया सहइ ।  
अमराउरिव्व रम्मा जलम्मि संकंतपडिबिंबा ॥३४॥  
निम्मलमणिमयपासाय-सिहरपसरंतकिरि(र)णहत्थेहिं ।  
जा पेल्लइव्व दूरं जोइसचक्कं अकिंचिकरं ॥३५॥  
विमलमणिभासियाए उदयत्थमणाइं जत्थ रविणो वि ।  
कमलाण वियास-निमीलणेहिं नज्जंति लोएहिं ॥३६॥

जत्थ य-

पुव्वाभासित्त-परोवयार-दक्खिन्न-सच्चकरुणद्धो ।  
सुकयन्नुत्तण-सद्धम्मकम्मजुत्तो पुरिसवग्गो ॥३७॥  
रुवविणिज्जियसुरसुंदरीओ मणहरसुवेसलडहाओ ।  
सोहग्गसंगयाओ सुसीलकलियाओ नारीओ ॥३८॥  
जा चक्कवट्टिमुत्तिव्व सुत्थिया तह अदिट्ठपरचक्का ।  
सज्जणगोट्टिव्व सया गुणुज्जला दोसरहिया य ॥३९॥  
जा समवसरणभूमिव्व भुवणअच्चड्ढुया सुरकया य ।  
कमलावासा नल(लि)णिव्व बहुगुणा पत्तकलिया य ॥४०॥

१. अत्थ ला.॥

२. प्रदोषः ॥

एकूो च्विय परदोसो अह तत्थ पुरीए गुणसमिद्धाए ।  
 जं होइ सव्वकालं परदुक्खे दुक्खिओ लोओ ॥४१॥  
 तत्थत्थि पसत्थगुणो दरियारिकरिंदकेसरिकिसोरो ।  
 आजलहिमहीनाहो राया अजियविक्रमो नाम ॥४२॥  
 जस्स पयावानलडज्झमाणहिययाण वेरिनारीण ।  
 परिसूसंतोड्डुडडा तेणुणहा होंति नीसासा ॥४३॥  
 विफु(फु)रइ कसिणकरवालभासुरो जस्स समरमज्झम्मि ।  
 हढकड्डियारिजयसिरि-वेणीदंडोव्व(व) भुयदंडो ॥४४॥  
 तुलियमहीहरभुयदंड—महियगुरुसमरसायरेणं व ।  
 हरिणेव्व जेण नियए लच्छी वच्छत्थले ठविया ॥४५॥  
 विणिवाइयवेरिसुया जस्स पयासंति भीमभुयविरियं ।  
 भडखंभचित्तकविक्रयचरित्तपमुहेहिं हेऊहिं ॥४६॥  
 जम्मि वसुहाहिनाहे वसुहं नयविक्रमेहिं पालंते ।  
 होइ पउसो रयणीपढमो जामो न गुणिलोओ ॥४७॥  
 निच्चत्थमणं रविणो दोसुदओ जइ ससिस्स न जणस्स ।  
 परवसणदंसणेणं संतोसो जइ नियत्थेणं ॥४८॥  
 हुंतेण जेण जो किर उप्पज्जइ सो न तस्स नासेण ।  
 पावइ तत्थ पसिद्धिं अहुणासदं पमोत्तूण ॥४९॥  
 तस्स महानरवइणो रविवंससमुब्भवस्स गुणकलिया ।  
 नामेणं कमलसिरी कुलुब्भवा अत्थि पियभज्जा ॥५०॥  
 तस्सायत्तं से जीवियंपि इय तप्पउत्तवावारा ।  
 ववहरइ जा असेसं दप्पणपडिबिबछायव्व ॥५१॥

सइ-गोरि-रई तीए हीणुवमा सक्र-हर-अणंगाण ।  
 परदारिय-कावालिय-अकम्मकारीण जा भज्जा ॥५२॥  
 मुख-नयन-कण्ठ-कुचयुग-रोमावलि-नाभि-जघन-जङ्घानाम् ।  
 तच्चरणयोर्यथाक्रम-मुपमानं विद्धि कमलादीन् ॥५३॥  
 नदीपक्षे पुनः कमलोत्पलादिभिरुपलक्षिता सरिदिति ॥  
 कमलुप्पल-कंबु-रहंग-दुव्व<sup>१</sup>-आवत्त-पुलिणर<sup>२</sup>भाहिं ।  
 कुम्मेहिं जा विरायइ निवस्स कीलाचलसरिव्व ॥५४॥  
 अन्नोन्नपेम्मरसपरवसाण चेयन्नविणिमएणं व्व ।  
 समसुहदुहत्तरुवं लक्खिज्जइ ताण फुडमेव ॥५५॥  
 अवरंतेउरजुवईसु न तस्स जह तीए हिययसंतोसो ।  
 न तहा अवरतिहीसुं जह सोहइ पुन्निमाए ससी ॥५६॥  
 [रू]व-कला-गुण-जोव्वण-रज्जंग-विलास-भूसण-सिरीओ ।  
 सुहयंति तस्स हियए अणुकूलकलत्तलाहेण ॥५७॥  
 एवं च पुन्नपरिस-संपाइयसयलसुहसमूहस्स ।  
 वच्चंति तस्स दियहा सुरज्जसुहमणुहवंतस्स ॥५८॥  
 अह कमलसिरीसुहगब्भसंभवो अत्थि तस्स पियपुत्तो ।  
 हरिविक्रमोत्ति नामं पच्चक्खो पुन्नरासिव्व ॥५९॥  
 अणवट्ठिओ पयाणं पीडायारी य अणभिगम्मो य ।  
 पडिहयगुरु-बुहतेओ कह तेण समो रवी होइ ॥६०॥  
 सूरहयतेयपसरो सुहेक्कपक्खो य खंडणासहिओ ।  
 संभावियदोसुदओ कह णु ससंको समो तेण ॥६१॥  
 वसुहाबाहिरभूओ महिओ बद्धो य जलमओ उयही ।  
 १. दुवां ॥ २. रंभाहिं ला. ॥

अवहरियकरितुरंगमलच्छी न हु तेण तुल्लुगुणो ॥६२॥  
 अपरोवयारिकणगो कुलमहिहरबाहिरो पयइथद्धो ।  
 कणयगिरी वि समाणो गुणेहिं न हु तस्स कुमरस्स ॥६३॥  
 इय निज्जियसयलुवमाण-विमलगुणगरुयलद्धजसपसरो ।  
 भुयणच्छेरयभूओ देवकुमारोव्व नररूवो ॥६४॥  
 अणुदियहमणन्नमणो पवित्तपिउचरणकमलकयसेवो ।  
 बहुविबुहसहाणुगओ आणंदियगुरुयणो वीरो ॥६५॥  
 सुकई कलासु कुसलो गंधत्थवियारलद्धमाहप्पो ।  
 सुयणो परोवयारी वाई सुकयन्नुओ रसिओ ॥६६॥  
 अह तस्स जहासुहमिच्छियत्थसंपत्तिसुहियहिययस्स ।  
 वच्चंति सव्वदियहा परोवयारं करंतस्स ॥६७॥  
 अह नरवइणा परभाविऊण सव्वत्थ तस्स सामत्थं ।  
 सुपसत्थतिहि-मुहुत्ते अहिसिन्तो जोवरज्जम्मि ॥६८॥  
 अत्थि य तस्साजियविक्रमस्स सिरिवैरसीहसामंतो ।  
 पियमित्त-मंति-सुसहाय-बीयहिययं व नरवइणो ॥६९॥  
 तस्सत्थि सुओ नामं रणवीरो वैरिरायदुद्धरिसो ।  
 हरिविक्रमस्य आबालभावसहवड्ढिओ मित्तो ॥७०॥  
 अन्ने वि राय-सामंत-मंति-ववहरय-इब्भ-बहुपुत्ता ।  
 विविहगुणा गुणिरायं हरिविक्रममेव सेवंति ॥७१॥  
 अन्नम्मि दिणे पच्चूस एव कयसयलगोसकरणीओ ।  
 उवविट्ठो महरिहआसणम्मि बहुसेवयसमेओ ॥७२॥  
 नीसेसमित्तमंडल-पणिवइयसलक्खणंककमकमलो ।  
 विहियजहारिहपडिवत्ति-दिन्नकप्पूरतंबोलो ॥७३॥



पसरंतपुराणमहाकविंदकयकव्वगुणवियारेण ।  
 नीसेससहाविबुहाण हिययतोसं जणेमाणो ॥७४॥  
 जावच्छइ ताव तहिं सेवावसरं निउत्तपुरिसेहिं ।  
 विन्नत्तो संभंतो जणयसमीवं तओ चलिओ ॥७५॥  
 आरूढो सुहयरवरकरेणुखंधंमि सहियरणवीरो ।  
 सर, ओसर, संभालहि, भणंतपाइक्कपरियरिओ ॥७६॥  
 अग्गे १धाणुक्क-णुमग्गकुंत-फारक्क-फारपरिवारो ।  
 तदंसणूसुयाणेयनयरिजणजणियसंतोसो ॥७७॥  
 पत्तो संभंतनमंतधंत-सेवयपयासियप्पणओ ।  
 निवमंदिरं कुमारो २पडिहारअभुद्धिओ अहसा ॥७८॥  
 पडिहारपदरिसियमग्गलग्गरणवीरबाहुआलगो ।  
 'जय देव ! कुणसु दिद्धिप्पसाय'मिइ निसुयहलबोलो ॥७९॥  
 अह विविहमहामहिवाल-मौडमणिकिरिणजालजडिलम्मि ।  
 अत्थाणम्मि पविट्ठो पहिट्ठनिवदूरसच्चविओ ॥८०॥  
 अइचंडदंडिहक्कासंखुद्धनरेंददिन्नपिहुमग्गो ।  
 पिउभत्तिभरनिरंतर-चलणग्गनिविट्ठनियदिट्ठी ॥८१॥  
 वसुहाविलुलियसियहारकिरणविच्चुरियपिहुलवच्छयलो ।  
 पिउणोव्व पयजुएसुं हिययविसुद्धिं पयासंतो ॥८२॥  
 पडिओ पाएसु तओ पुव्विं परिकप्पियम्मि पिउवयणा ।  
 उवविट्ठो महरिह-आसणाम्मि हरिविक्कमकुमारो ॥८३॥  
 सुयनिव्विसेसहिययं नरवइणा जणियगरुयसम्माणो ।  
 कुमरस्स पिट्ठभागे उवविट्ठो तयणु रणवीरो ॥८४॥

१. धणु० ला. ॥ २. पडिहा अ० ला. ॥ ३. मउड ॥

आपुच्छिओ य पिउणा सरीरसुहकुसलमवणउ(ओ)कुमरो ।  
 'तुम्ह पसाएण सया कुसलं'ति पयंपइ विणीओ ॥८५॥  
 तक्कालोच्चि(चि)यनाणा-विणोयखण-रज्जकज्जकयचित्ता ।  
 अच्छंति ते जहासुह-मत्थाणत्था जयसमत्था ॥८६॥  
 तत्थत्थि महामंती नरवइपुज्जो महोयही नाम ।  
 अइगरुयजराभरजज्जरंगपरिनीसहावयवो ॥८७॥  
 अइपंडुरोमसमूहकलियवच्छत्थलो य जो सहइ ।  
 हिययड्डियनिम्मलगुरु-विवेयससिकिरणकलिओव्व ॥८८॥  
 जरपंडुरभमुहापम्हमंडियं सहइ तस्स नयणजुयं ।  
 सुहुमत्थदंसिमंतिसु आवज्जियजयवडायं व्व ॥८९॥  
 नरवइकज्जेसु सया अणुबंधो तस्स न निययवेहेऽवि ।  
 इय सिढिलिओव्व कोवा सणियं सिढिलेहिं अंगेहिं ॥९०॥  
 सो दट्ठूण कुमारं सव्वंगावयवसोहियं भणइ ।  
 स(सु)विणीयं पि हु सविसेस-विणयपडिगाहणत्थं व ॥९१॥  
 हरिविक्कुम ! वच्छ ! भणामि किंपि मा अन्नहा वियप्पेसुं ।  
 तुह पिउणो वि हु सिक्खाकज्जे मह चेव अहिगारो ॥९२॥  
 जइ वि हु पुव्वज्जियपुन्नरासिसंपाइया गुणे(णा) तुज्ज ।  
 तह वि अइनेहनिब्भर-हियओ सिक्खेमि किंपि तुमं ॥९३॥  
 गुणबहुमाणं परिवज्जिऊण जो रूवगव्वमुव्वहइ ।  
 अविवेइत्तणभीयव्व तस्स दूरे गुणा होंति ॥९४॥  
 खलइ गई चलइ मणं जयमवि अजहत्थमेव परिणमइ ।  
 जोव्वणतिमिरुच्छाइयनयणस्स व एत्थ पुरिसस्स ॥९५॥

सयलकलासंपत्तो अमयमओ विमलगुणमहाघविओ ।  
 पढमउदयम्मि पावइ रायं पुरिसो नवससिच्च ॥९६॥  
 लद्धा खणेण विहडइ लच्छी चिरविहडिया वि संघडइ ।  
 सरए पवणपणोल्लिय-जलहरछायच्च चलरूवा ॥९७॥  
 अइगरुअमहीहरविसमदुग्गभूभागगोविया लच्छी ।  
 न विणा विक्रम-साहस-मेसा सीहिव्व सुहसज्झा ॥९८॥  
 दिट्ठा खणेण विहडइ रणंगणे सायरम्मि नावच्च ।  
 अन्नायवराहक्खडयताडिया कयपयत्ता वि ॥९९॥  
 एसा अणत्थसयसाहियावि बहुअणत्थसंजणणी ।  
 अइजत्तपालणीया मंतीहिं महाभुयंगिच्च ॥१००॥  
 उज्जलगुणकलियं पि हु मइलेइ सिरी नरं न संदेहो ।  
 वायालिव्व खणेणं दूरं वुड्ढिगया जइ वि ॥१०१॥  
 जह न च्छ(छ)लिज्जसि लच्छीए वच्छ ! तह कहवि वीर ! ववहरसु ।  
 उवहुत्तवारुणीओ अवस्स मोहिज्जए पुरिसो ॥१०२॥  
 जह न कसाया पसरंति हरिणनयणाओ जह य न हरंति ।  
 न वसे कुणंति विसया अप्पाणं तह परिडुवसु ॥१०३॥  
 इंदियचोरा तह कुणसु तुज्झ न हरंति जह विवेयवणं ।  
 तत्थेव यं वणबुद्धी अणवरयं वीर ! कायच्चा ॥१०४॥  
 इय भणिऊणं विरओ महोयही जाव ताव कुमरो वि ।  
 तव्वयणायन्नणअमयभरियहियओच्च संजाओ ॥१०५॥  
 मंतिस्स भाविउणं पसन्नगंभीरवयणविन्नासं ।  
 हरिविक्रमो वि मंतिं भणइ तओ सविणयं एयं ॥१०६॥

१. इन्द्रियाण्वेव यवनाः-म्लेच्छ इति बुद्धिः ॥

नियगरुयत्तणसरिसं सिक्खविओ सच्चमवितहं ताय ॥  
उज्जलयरोव्व विहिओ तुम्हेहिं मइप्पईवो मे ॥१०७॥  
एत्थंतरम्भि राया विसज्जियासेसमंति-सामंतो ।  
अत्थाणाओ हरिविक्कुमेण सह उट्ठिओ सहसा ॥१०८॥  
पत्तो निययावासं कयमज्जण-भोयणाइवावारो ।  
मणहरविणोयरम्मं अइवाहइ वासरं कुमरो ॥१०९॥  
अत्थंगयम्मि सूरे संज्ञासमयम्मि विहियकायव्वो ।  
वच्चइ पुणो वि पासं अत्थाणत्थस्स नरवइणो ॥११०॥  
तत्थ वियक्खण-मणहर-विणोयसयगमियजामिणिपओसो ।  
उट्ठइ अत्थाणाओ विसज्जिओ एइ नियगेहं ॥१११॥  
तत्थागओ कमेणं विसज्जियासेसमित्तपरिवारो ।  
कयसमुचियकरणीओ वच्चइ पासायसिहरम्मि ॥११२॥  
नवभूमियपासायगसिहरसेज्जाहरम्मि सेज्जाए ।  
कोमलतूलिसणाहाए ठाइ हरिविक्कुमकुमारो ॥११३॥  
अह अट्ठरत्तसमए पसुत्तनीसेसनयरिलोयम्मि ।  
<sup>१</sup>मूर्इहुए व भुयणे पसंतपहलोयसंचारे ॥११४॥  
निसिसंचरंतघणधूयमुक्कप्पुक्कारघोरबहुघोसं ।  
नणु घोरइव्व भुअणं निब्भरनिद्दाए पासुत्तं ॥११५॥  
जे रायपहा दियहे आसि अ गम्मंतलोयसंकिन्ना ।  
ते च्चेय निसीहे पाउणंति वियडत्तणं निययं ॥११६॥  
सुव्वइ नरिंदभवणे अन्नोन्नालावभरियदिसिविवरो ।  
पडिभग्गदुट्ठपसरो पाहरियभडाण ताररवो ॥११७॥

हिंडति जत्थ बाहिं समंतओ भीसणट्टहासेण ।  
 रक्खस-पिसाय-वेयाल-साइणी-भूयसंघाया ॥११८॥  
 एवंविहंमि घोरे संपत्ते अट्टरत्तसमयम्मि ।  
 सेज्जाए सुहनिसन्नो कुमरो दरमउलियच्छिजुओ ॥११९॥  
 आइन्नइ वीणा-वेणुमीसी(सि)यं पवणवसपयड्ढंतं ।  
 सवणिंदियरमणीयं अइमहुरं गीयझंकारं ॥१२०॥  
 सविसेसवंसकलरव-गीयंतर-मणहरंतरारम्मं ।  
 आयड्डइव्व हिययं सुरगेयगुणेहिं कुमरस्स ॥१२१॥  
 तो अउरुव्वसुगीया-यन्नणअक्खित्तमाणसो कुमरो ।  
 चितइ विसेसवड्ढंत-कोउहल्लो नियमणम्मि ॥१२२॥  
 अहह ! महच्छरियमिणं सवणिंदियहारि असुयपुव्वं च ।  
 गेयं न मच्चलोए पायं एवंविहं अत्थि ॥१२३॥  
 एत्थ बहूण वि गायण-गायणिलोयाण सुव्वए सद्धो ।  
 सो वीणाइ-उवस्सुइ-भिन्नो वि हु होइ एगोव्व ॥१२४॥  
 अच्छउ ता इयरजणो मएवि नेयारिसं सुयं गेयं ।  
 नरलोयसुप(प्प)सिद्धा जस्स घरे गायणा संति ॥१२५॥  
 ता निच्छियं न एयं मणुयाणं संभवेज्ज वरगीयं ।  
 अउरुव्वं च अवस्सं दड्ढव्वं होइ बुद्धिमया ॥१२६॥  
 अउरुव्वदंसणेणं अस्सुयपुव्वस्स हंत सवणेण ।  
 पावंतु कयत्थत्तं अज्जं मह नयण-सवणाइं ॥१२७॥  
 जं अज्ज मंतिणा सिक्खिओम्मि न हरंति जह विधेयवणं ।  
 इंदियचोरा तं पि हु इमेण गेएण अंतरियं ॥१२८॥

ता होउ किंपि जं होइ सव्वहा परमकोउहल्लेण ।  
 गेयस्स मूलसुद्धी-करणनिमित्तं जइस्सामि ॥१२९॥  
 तो उट्ठइ सेज्जाओ गाढीकयकेसनिवसणो वीरो ।  
 कडियडनिबद्धधुरिओ वच्छत्थललंबिवरहारो ॥१३०॥  
 करकलियमंडलग्गो विणिग्गओ निहुयकयपयक्खेवो ।  
 गेयाणुसारिचित्तो अलक्खिओ जामइल्लेहिं ॥१३१॥  
 ओयरियो रायपहे दिट्ठो सो पुव्वनिग्गएणेव ।  
 वीरचरियाविहारत्थ-मुज्जएणं नरिदेणं ॥१३२॥  
 दट्ठूण महाराओ कुमरं उ(ओ)लक्खिऊण निउणयरं ।  
 चिंतइ किमत्थमेसो विणिग्गओ अज्ज बाहिम्मि? ॥१३३॥  
 ता लट्ठयं व जायं किं काही वच्चिही कहिं एसो? ।  
 सत्तावट्ठंभोच्चिय केरिसरूवो इमस्स भवे ? ॥१३४॥  
 एयस्सणुमग्गेणं वच्चिस्समलक्खिओ अणेणाहं ।  
 जाणिस्सं सव्वमहं अज्ज सरूवं नियसुयस्स ॥१३५॥  
 परिभाविऊण एयं रायाऽजियविक्रमो नियसुयस्स ।  
 लग्गो अणुमग्गेणं संपत्ता दोवि पायारे ॥१३६॥  
 एत्थंतरे कुमारो सविम्हिरं पेच्छिरस्स जणयस्स ।  
 उड(डु)इ उट्ठं गयणे विज्जुखित्तेण करणेण ॥१३७॥  
 तो तं गयणविलगं पायारमगाहखाइयासहियं ।  
 अहिलंधिऊण पडिओ अउज्झनयरीए बाहिम्मि ॥१३८॥  
 तेण य करणकमेणं जणओ वि पुरीए निवडिओ बाहिं ।  
 ते दोवि अणुकमेणं तुरियपयं गंतुमारद्धा ॥१३९॥

अइसयकोऊहलतुरिय-हिययपसरंतवियडपयखेवो ।  
 पत्तो खणेण कुमरो रम्मुज्जाणं तहिं एगं ॥१४०॥  
 तस्स य मज्झपएसे उच्चत्तणनिहयरविरहपयारं ।  
 धुव्वंतधय-वडाया-मंडियबहुसिहरसंघायं ॥१४१॥  
 निययपहावेण व वियडरयण-मणिसघणकिरणनिवहेण ।  
 पावं पि व ओसारइ दूरं निसि तिमिरसंघायं ॥१४२॥  
 पेरंतसंठिण्हिं अच्चंतं नीलतरुयरगणेहिं ।  
 दूरमलद्धपवेसं पावेहिं व भव्वलोयस्स ॥१४३॥  
 अवसायसंदिरेहिं भवणफुरंतुद्धविविहकिरणेहिं ।  
 ससुरधणूहिं नमिज्जइ मेहकुमारेहिं व दुमेहिं ॥१४४॥  
 जं नियडतरुगणेणं मणिगणसंकंतकुसुमसंघायं ।  
 वेलवइ महुयरकुलं सव्वत्तो चूयससुयंबं ॥१४५॥  
 आवासो व सिरीए अलंघदुग्गं व धम्मरायस्स ।  
 उप्पत्तिं व निरंतर-सुद्धज्जवसायबीयाण ॥१४६॥  
 तोडइ कुतित्थसंगं विहडावइ कम्मनियलसंघायं ।  
 जं उच्छायइ लोए मिच्छत्तमहातमं घोरं ॥१४७॥  
 एवंविहं कुमरो दूरं वियसंतनयणतामरसो ।  
 सक्कावयारनामं पेच्छइ जिणमंदिरं रम्मं ॥१४८॥  
 दट्टूण हरिसनिब्भर-विसट्टरोमंचकंचुइज्जंतो ।  
 चिंतइ सविम्हयं बहु-वियप्पपज्जाउलो कुमरो ॥१४९॥  
 अहह ! गीएक्कुकोउय-रसेण इह आगओ ष्हि किर बाहिं ।  
 नवरं बहुकोऊहल-परंपरा मज्झ संपडिया ॥१५०॥

पढमं ताव भवंतर-विद्धंसियपावकसिणसंघायं ।  
 दिद्धं जिणिंदभवणं मणि-कंचण-रयणनिम्मवियं ॥१५१॥  
 तत्थ वि अउव्वरूवा एए विज्जाहरव्व देवव्व ।  
 विद्धा अदिद्धपुव्वा सेवंता देवपयकमलं ॥१५२॥  
 नियमाहप्पाओ च्चिय अविक्कलसिज्जंतवंछियसुहत्था ।  
 तो केण कारणेणं एए सेवंति जिणनाहं ? ॥१५३॥  
 इयरो वि हु न पयट्टइ निक्कज्जारंभजायववसाओ ।  
 किं पुण एए देवा जे सम्मन्नाणसंपन्ना ॥१५४॥  
 ता अणुमाणवसेणं जाणे अच्चब्भुयं फलं किंपि ।  
 जं देवाण वि दुलहं तं जिणनाहाओ वंछंति ॥१५५॥  
 ता सव्वहा वि एयं देवासुर-खयरपूइयं देवं ।  
 अइदुल्लहफलदायग-मणन्नहियओ नमंसांमि ॥१५६॥  
 इयमाइ चिंतिरुणं वियडपयक्खे व दलियमही(हि)वीढो ।  
 धरहरियधरणिभयवस-सुरासुरुप्पाइयासंको ॥१५७॥  
 जोइज्जंतो सुरसुंदरीहिं दूरं पसारियच्छीहिं ।  
 अउरुव्वसुरकुमारमकयबहुविहमयणचेट्ठाहिं ॥१५८॥  
 उव्वेल्लइ सुदिढं पि हु मणोहरं कावि केसपब्भारं ।  
 दरदीसमाणगुरुतर-पओहरुस्सेहरमणीया ॥१५९॥  
 अन्नोन्नं संघट्टण-वसपसरियझणझणारवकरालं ।  
 रि(रिं)खोलइ सवियारा पओट्टवलयावलं कावि ॥१६०॥  
 संठवइ सुट्टियं पि हु सुरंगणा कावि भूसणकलावं ।  
 हरिविक्कमाणुरायं अप्पम्मि दिढं समीहंती ॥१६१॥



इय हरिविक्रमदंसण-अणुरायपरव्वसाण नारीण ।  
 नियदइयनिरावेक्खा सोहंति वियारसरंभा ॥१६२॥  
 पत्तो गब्भहरंतर-मंडवदारं पहिड्डमुहकमलो ।  
 पेच्छइ पसंतरूवं पडिमं सिरिउसहनाहस्स ॥१६३॥  
 मोहंधयारसूरो कम्ममहाकाणणेक्कपरसुव्व ।  
 तिहुयणभवणपईवो तियसासुर-खइरपणिवइओ ॥१६४॥  
 जो धम्मचक्कवट्ठी असेसजयजीवबंधवो भयवं ।  
 पयडियसुरसिवमग्गो दिट्ठे कुमरेण पढमजिणो ॥१६५॥  
 सुपसंतरूवदंसण-विम्हयपसरंतनयणतामरसो ।  
 असरिसभत्तिसमुग्गय- पहरिसरोमंचियसरीरो ॥१६६॥  
 सियमोत्ताहलथूलंसुबिंदुदंतुरियनयणपम्हउडो ।  
 वसुहामिलंतसिरजाणु-करयलो थुणिउमाढत्तो ॥१६७॥  
 “पणमामि विसमसंसारसावरुत्तरणजाणवत्तं व ।  
 नीसेसदोसरहियं असेसगुणसंगयं उसहं ॥१६८॥  
 तुह दंसणमेत्तेण वि उत्तरइ नराण पावपब्भारो ।  
 कहमन्नहा मह पहु ! हवंति हलुयाइं अंगाइं? ॥१६९॥  
 पइ दिट्ठे हरिसवसुल्लसंतनयणंसुसलिलसित्तम्मि ।  
 पुलयच्छलेण अंगे अंकुरिओ मज्झ पुण्णदुमो ॥१७०॥  
 मयणमहागहगहियंमि नाह ! भुवणम्मि विरसववहारे ।  
 हरि-हर-विरिंचिमज्झे तद्धोसहरो तुमं चेव ॥१७१॥  
 ते वंचिया वराया अकयत्थं ताण नयणनिम्माणं ।  
 नीसेसभुवणमज्झे दडुव्व ! न जेहिं दिट्ठो सि ॥१७२॥

जाणामि । जाओ विवेयरयणं पि अज्ज मे जायं ।  
दिट्ठे तुमं । मह विणियत्ता अन्नदेवेच्छ ॥१७३॥  
इय पयइपसंतसहावसुहयसुद्धस्स निव्वियारस्स ।  
चइऊण विणियत्ता नमो नमो उसभसामिस्स” ॥१७४॥  
इय थाऊण विणियत्ता कयत्थमप्पाणयं च मन्नंतो ।  
सलत्थिपयसं । रो समागओ सुरगणसमीवे ॥१७५॥  
अण(णि?)मिसनयण-निमेसाइएहिं कयदेवनिच्छओ वीरो ।  
संभायइ तियसमणं विणयपगब्भं पसंसेइ ॥१७६॥  
भो भो देवां ! तुब्भे सकयत्था जे जिणिदचंदाण ।  
अणवरयं पयसेवाए सासयं पुन्नमज्जिणह ॥१७७॥  
तं विन्नाणं सो रिद्धिसंचओ ते गुणा कला सावि ।  
परमेसराण कज्जे जिणाण जे जंति उवओगं ॥१७८॥  
इय सो नियवयणेहिं सावट्ठंभेहिं सप्पगब्भेहिं ।  
सुरपरिसमभिभवंतो अमाणुसेणं व तेएण ॥१७९॥  
मयणोव्व सल्लयंतो नियनयणनिवायनिसियबाणेहिं ।  
हिययाइं सुंदरीणं भणिओ तियसेहिं सप्पणयं ॥१८०॥  
हरिविक्कम ! तुह सागय-मुवविस चिरकप्पियासणे एत्थ ।  
मणिमत्तवारणे जं सच्चस्सब्भागओ फुज्जो ॥१८१॥  
सीहोव्व दिन्नफालो उवविट्ठो मणिमयासणे कुमरो ।  
सोहइ पुरंदरो इव सविसेसं सुरसहाणुगओ ॥१८२॥  
अह अजियविक्कमो विय-असेससच्चवियपुत्तववहरणो ।  
चित्तइ मणम्मि असरिस-मणवट्ठियविम्हयाणंदो ॥१८३॥

अहह ! महावडुंभं पेच्छह सोवसमवयणवित्रासं ।  
 पढमाभासित्तं चिय गुणाणुरायं च पुत्तस्स ॥१८४॥  
 रूवेण पयावेण य विसडुंसिगार-लडहवेसेण ।  
 निज्जिणइ तियसलोयं का गणणा मणुयलोयम्मि ! ॥१८५॥  
 ता एत्थेव य बाहिं इमस्स मणिमत्तवारणस्साहं ।  
 एयसरीरे कुसलं चिंतंतो अच्छइस्सामि ॥१८६॥  
 इय चिंतिऊण राया खग्गसहाओ सुएकुमण-नयणो ।  
 अणुरत्तसेवओ इव थक्को सुयस्खणस्खणिओ ॥१८७॥  
 अह वित्ते पेच्छणाए सुराण 'कमलद्धसमयहिद्वेहिं ।  
 पारद्धं पेच्छणयं खयरेहिं पुरो जिणिंदस्स ॥१८८॥

(अपभ्रंश)

अविय- ब्रह्मब्रहंतदुंदुहिदुंदुदमद्वलद्रंगिनगिनपडह  
 टकूनकिट्टकूनकरडच्छफलच्छलतालेण ।  
 दिददेदटिविलंतत्रसियउल्लसियसुरासुरु  
 वट्टइ घट्टा सघणु उसह समहत्थु सवित्थरु ॥१८९॥  
 द्रफिनफफिनफडकयहुडुकुपुडपाडपरिट्ठिओ ।  
 ब्भुंगिनब्भि ब्भुंगिनब्भि डक्कुसुकुडुप्पकडप्पिउ ।  
 थु किट थु किट थुत्थुकिट थोंगिथिरपहपाडघण ।  
 छज्जइ जिण ! पेच्छणउं तुब्भ आणंदियतिहुयण ॥१९०॥  
 इय तय-वितयविमीसे घण-सुसिराओज्जसहगंभीरे ।  
 विज्जाहरामराणं मण-नयणाणंदसंजणणे ॥१९१॥  
 नच्चिरवरविज्जाहरिपयनेउरजायझणझणरवेण ।

१. क्रमलद्धसमयहृष्टैः ॥

भणिरेव्व खोजघणपाडखंडजाईओ फुडवियडं (?) ॥१९२॥

करणंगहारवसती सहंगवेक्खेवखुडियआहरणे ।

इय वड्ढंते मणहर-पेच्छणयमहाभरे तत्थ ॥१९३॥

तो सयलगायणेहिं वरवंससमप्पिउच्चयणेहिं ।

एसा महुरसरेणं वरदुपई गाइया तेहिं ॥१९४॥

“सरभससुरनिक्कायसंतानककुसुमसमूहसोभितं ।

निरवधिगुरुगंभीरभववारिविनिपतितजंतुतारकं ।

मदनमहेभकुंभनिर्भेदनपडुतरकेसिरिक्रियं ।

प्रथमजिनस्य नमत चरणाम्बुजमभिनवपल्लवारुणं ॥१९५॥”

तं सोरुण कुमारो अणुवमगुणवीयरायभत्तीए ।

वरगीयगुणक्खित्तो नियहारं देइ खयराण ॥१९६॥

अवि य- दिवसयरकरनिहित्तो नक्खत्तगणोव्व उज्जलाभोओ ।

जो खीरसायरो इव आवासो सयलरयणाण ॥१९७॥

गयणनईपवहो इव अगोयरो अन्नमहिहरिंदाण ।

सोहइ सहावरम्मो वंचणपासोव्व लच्छीए ॥१९८॥

जलहिमहणुगयाए सुरासुराणंपि पत्थणिज्जो जो ।

दीहरनयणकडक्ख-क्खेवसमूहो इव सिरीए ॥१९९॥

भूसियअसेसभुयणत्तणेण पयडियजहत्थनियनामो ।

सो भुयणभूसणो खेयराण दिन्नो महाहारो ॥२००॥

अच्चब्भुयचायगुणल्हसंतसविसेसविम्हयरसेहिं ।

देवाईहिं सनिहुयं अन्नोन्नं भणिउमाढत्तं ॥२०१॥

पेच्छह अच्छरियकरं इमस्स सव्वंपि चेड्डियसरूवं ।

सम्मं भाविज्जंतं न कस्स आणंदए हिययं ? ॥२०२॥

रूवममाणुससरिसं तंपि असामन्नललियलायन्नं ।  
 लडहवियड्ढो वेसो इस्सरियं विजियसुरलोयं ॥२०३॥  
 असमो गुणाणुराओ गुणन्नुया कावि एत्थ अउरुव्वा ।  
 असमा य चायसत्ती एमाइ अणंतगुणनिलओ ॥२०३॥  
 जाई अकारणं चिय असरिसमाहप्प-तेयवंताण ।  
 तिणसंभवो वि अग्गी न ड्हइ किं तरुसमुग्घायं ॥२०५॥  
 तेयस्सिणो वि अम्हे तियसा वि इमस्स मणुयजाइस्स ।  
 कुमरस्स पुरो सव्वे संजाया रोरसारिच्छ ॥२०६॥  
 एत्थंतरे सुरेणं सोहम्मनिवासिणा हरिसमेण ।  
 हरिविक्रमो पभणिओ अणंततेयाहिहाणेण ॥२०७॥  
 हरिविक्रम ! ओहामिय-तिलोय ! अच्चब्भुएण रूवेण ।  
 वरचक्कवट्टिलक्खण-निवहेहिं य निययनाणेण ॥२०८॥  
 मुणिओ सि नरिंद ! तुमं न होसि सामन्नमाणुसायारो ।  
 तुह दंसणेण इण्हि मन्नामि कयत्थमप्पाणं ॥२०९॥  
 सफलीहूया जत्ता पत्तं नयणेहिं अणिमिसत्तफलं ।  
 तुह खणगोड्डीए चिय मन्नामि पवित्तमप्पाणं ॥२१०॥  
 नणु सद्दहामि एण्हि नरिंद ! तुह दंसणेण निब्भंतं ।  
 जं किर “वसुह्वा एसा बहुरयणा” इय पसिद्धिं पि ॥२११॥  
 ता जइ न कज्जपीडा उवरोहं जइ न मन्नसि मणम्मि ।  
 ता उसहसामिपुरओ गच्छामो दोवि कज्जवसा ॥२१२॥  
 हरिविक्रमेण भणियं जं तुब्भे भणह तं चिय करेमि ।  
 इय दोवि देव-कुमरा गया समीवं जिणंदस्स ॥२१३॥

१. इन्द्रसामानिकेन ॥

तो भणियं देवेणं कस्स न सगुणेसु आयरो होइ ।  
ता कुणसु मज्झ वयणं अलंघणीया जओ देवा ॥२१४॥  
पुव्वभवुप्पन्नो च्चिय पणओ मणुयाण कुणइ संबंधं ।  
अहवा सुहकम्मदओ तइयं पुण कारणं नत्थि ॥२१५॥  
जइ वि तुह गुणगणावज्जियव्व नरनाह ! सेवया अम्हे ।  
उवइससु तहवि नरवर ! जं विसमं किंपि कायव्वं ॥२१६॥  
इय सोउं सुरवयणं 'हाह'त्ति करेहिं पिहियकन्नेण ।  
हरिविक्रमेण भणियं किमणुचियं देव ! आएसं ॥२१७॥  
देवा तुब्भे पूयारिहा य अम्हेहिं तुम्ह आएसो ।  
कायव्वो संपज्जइ सव्वमह तुह पसाएणं ॥२१८॥  
देवो भणइ अमोहं देवाणं दंसणं इय पवाओ ।  
मा होउ असच्चो नरवरिंद ! तेणग्गहो मज्झ ॥२१९॥  
हरिविक्रमेण भणियं एवंविहदेवयापणामेण ।  
संपन्नधम्मचिंतामणिस्स तुह दंसणममोहं ॥२२०॥  
देवो भणइ अजाणिय-पत्थणरूवस्स पत्थणा निंदा ।  
अम्हं तब्भंगे पुण अइगरुओ होइ मणखेओ ॥२२१॥  
ता अकयवियारेणं मह वयणं सव्वहा वि कायव्वं ।  
जइ अन्नहा वि कत्थसि ता तुह तित्थयरपयआणा ॥२२२॥  
उसहस्स पहावेणं वज्जो व्व कुमार ! अक्खयसरीरो ।  
होहित्ति सत्तवाराओ फंसिओ अणंततेएणं ॥२२३॥  
जल-जलण-महाउह-दुट्ठसत्त-संगाम-वाहि-उग्घाया ।  
सुर-असुर-मणुय-विज्जाहराओ तुह नत्थि भयसंका ॥२२४॥

भणियं कुमरेण तुहा-णुहावओ किंपि होइ तं होउ ।  
 मन्नामो तुह सुरवर ! महापसायं सिरेणम्हे ॥२२५॥  
 तो पुच्छिऊण कुमरं सहसा अदं(दं)सणीहू(हु)या देवा ।  
 कुमा(म)रोच्चिय एकुंगो थक्को जिणभवणमज्झम्मि ॥२२६॥  
 तो गंधव्वपुरं पिव भवस्सरूवं व इंदजालं व ।  
 तं खणदिदं नदं दट्ठणं चितई कुमरो ॥२२७॥  
 अहह सुराणं जह रूव-रिद्धिमाई गुणा असामन्ना ।  
 सोजन्नं पि हु ताणं नूणमसाहारणं होइ ॥२२८॥  
 इह पयइसज्जणाणं हिययाइं न अहिलसंति उवयारं ।  
 अणुकूलयमणुवित्तिं चाटुकयं वयणविन्नासं ॥२२९॥  
 पयईए निरवेक्खा पच्चुवयारम्मि हुंति सप्पुरिसा ।  
 कप्पदु(हु)मव्व दुत्थिय-जणदिन्नमणिच्छियफलोहा ॥२३०॥  
 इयमाइ बहु कुमारो देवाणुगयं मणम्मि चितेउं ।  
 सहसत्ति खिवइ दिदं पडिमाए उसहसामिस्स ॥२३१॥  
 चितइ य वंचिओ हं अदंसणेणं जिणस्स चिरकालं ।  
 नहि पुन्नवज्जियाणं जिणिदमुहदंसणं होइ ॥२३२॥  
 इय सुद्धज्जवसाओ काऊण पणाममुसहसामिस्स ।  
 जिणभवणाओ कुमरो नीहरिओ गंतुमारद्धो ॥२३३॥  
 तो अजियविक्रुमो विय लग्गो अणुमग्गओ कुमारस्स ।  
 चितइ देवेण समं अणेण किं मंतियं अंतो ? ॥२३४॥  
 अच्छुउ किं तेण महं एसो गुणपयरिसेक्कआवासो ।  
 देवेहिं मि(?पि) जो एवं मन्निज्जइ तस्स को सरिसो ? ॥२३५॥

एकूो च्विय परमगुणो पुत्तस्स न जाणिओ मए कहवि ।  
 नामस्स जो अभिधे[ओ] किंरुवो विक्रमो होही ? ॥२३६॥  
 पेच्छमि ता सयं चिय कोवुब्भडभिउडिभीसणं वयणं ।  
 केरिसमिव संजायइ इमस्स ता तं परिक्खेमि ॥२३७॥  
 ता वियडपयब्भरक्खेवदलियवसुहेण रायराएण ।  
 सहसत्ति हक्किओ सो सरुउदरवं च सो भणिओ ॥२३८॥  
 रे कस्स तुमं ? को वा ? कस्स बलेणं च भमसि एगागी ।  
 घोरंधयारभीसणरयणीए तक्करायारो ? ॥२३९॥  
 तं सोऊण कुम(मा)रो चिंतइ रणरहसजायरोमंचो ।  
 सगुणव्व मज्झ जाया अकालचरिया वि अज्जेसा ॥२४०॥  
 दीसंति वीरपुरिसा सगव्ववयणाइं ताण सुव्वंति ।  
 सेरालावसुहेणं अप्पा वि हु लहइ परितोसं ॥२४१॥  
 निव्वडइ पोरुसं पि य अच्छरियसयाइं एत्थ दीसंति ।  
 तम्हा रयणिविहारो उचिओ इव मज्झ पडिहाइ ॥२४२॥  
 इय चिंतिऊण तेणं अखुद्धहियएण सोवहासमिणं ।  
 हरिविक्रमेण वयणं भणियं हेलाए नरनाहो ॥२४३॥  
 जं भणियं 'कस्स तुमं ?' तं तुह वयणं असंगयं जम्हा ।  
 सव्वेसिं इह पढमं सत्ता नियजणणि-जणयाण ॥२४४॥  
 पच्चक्खो पुरिसो हं न होमि वघो(ग्घो) न रक्खसो वीर ! ।  
 पच्चक्खे वि पमाणे 'को सि तुमं' जंपसि अलीयं ॥२४५॥  
 'भमसि य कस्स बलेणं ?' जं भणियं तंपि तुज्झ साहेमि ।  
 पढमं रयणीए बलं बीयं पि इमं निसामेसु ॥२४६॥



इह दुब्बलाण जायइ बलं नरिंदो असेसवसुहाण ।  
 इय एत्थ अजियविक्रम-बलेण वि तओ परिभमः ॥२४७॥  
 सोउं वयणं राया सोल्लुंठं तस्स चिंतइ मणम्मि ।  
 अहह अखोब्भो हियाए वयणाइ वि ललियवक्काइं ॥२४८॥  
 ता कोवयामि इण्हि साहिक्खेवं तओ भणइ राया ।  
 किं भन्नइ जाणिज्जसि तुमं पहाणो नरिंदगिहे ॥२४९॥  
 निल्लज्ज ! किन्न लज्जसि निययाणं चेव पंचभूयाणं ।  
 जंपंतो मह पुरओ नरनाहबलं असद्धेयं ॥२५०॥  
 हरिविक्रमेण भणियं न मए अप्पा पहाणभावेण ।  
 भणिओ किं तु महायस ! पयासिओ दुब्बलत्तेण ॥२५१॥  
 किं जेतियाओ राया पयाओ पालेइ एत्थ वसुहाए ।  
 जाणेइ तत्तियाओ पच्चेयं नाम-थामेहिं? ॥२५२॥  
 जा जस्स होइ सत्ती सो तं सव्वायरेण पयडेइ ।  
 दुव्वयणभासणे च्चिय तुह सत्ती न उण अन्नस्स ॥२५३॥  
 राया चिंतइ पेच्छह अइगरुयपरक्कमे वि खंतिगुणो ।  
 निब्भच्छिओ वि एसो तहावि कोवं न उंव्वहइ ॥२५४॥  
 ता तह भणामि संपइ नीसंदिद्धं करेइ जह कोवं ।  
 इय भाविऊण राया सन्निट्ठूरं(सनिट्ठूरं) भणिउमाढत्तो ॥२५५॥  
 रे रे ! किं मह पुरओ कावुरिस ! पयंपसे असंबद्धं ? ।  
 धरिओसि मए रक्खउ जइ बलिओ तुज्झ नरनाहो ॥२५६॥  
 कुमरो भणइ धरिज्जसु सुदिढं मा कहवि तुह विच्छु(छु)ट्टेही ।  
 राया भणइ लहिस्सं तुह उवहासाण पज्जंतं ॥२५७॥

अन्नं सो तुह राया पायारभरंतरे परं अत्थि ।  
 नयरीए पुणो बाहिं अहमेव नराहिवो एत्थ ॥२५८॥  
 कुमरो चिंतइ को उण एस दुरायारचेट्ठिओ पावो ।  
 तायं अहिक्खवंतो पयासए पोरुसं निययं ॥२५९॥  
 ता होउ जो व सो वा एसो अच्चाहियं पयासंतो ।  
 होइ न उवेक्खणीओ अवहीलंतो महारायं ॥२६०॥  
 कुमरेण तओ भणियं अहो महावीर ! सच्चयं एयं ।  
 राया सि तुमं पायं कहं अन्नहा(कहमन्नह) भाससे एवं ॥२६१॥  
 ता जइ सच्चं एयं ता पयडसु अज्ज निययरायत्तं ।  
 एसो तुह सिक्खत्थं रणज्जुइं (?) कड्डसु क्किवाणं ॥२६२॥  
 रायाह न खग्गेण दुवे वि जुज्झाम मल्लजुज्झेणं ।  
 कुमरो भणइ तुहेच्छ जह जुज्झसि तहय जुज्झम्मि(जुज्झामो) ॥२६३॥  
 मुक्काइं क्किवाणाइं संजत्तियकेस-निवसणा दोवि ।  
 अन्नोन्नाभिमुहेणं परिट्ठिया मल्लजुज्झत्थं ॥२६४॥  
 एत्थंतरे कुमारो गयणयले दूरमुड्ढिओ सहसा ।  
 अप्फालियभुयदंडो दडत्ति धरणीयले पडिओ ॥२६५॥  
 दढयरभुयदंडअयंडताडणुत्तिसियसयलजियलयं ।  
 नीसहपयभरदालयं धरहरइ महीयलं सहसा ॥२६६॥  
 हरिविक्कुमकमतलविसमताडणाजायविउणभारं व ।  
 चंप्पि(पि)यफणासहस्सो कहकहवि फणी धरं वहइ ॥२६७॥  
 निवडंतदुमसहस्सं पडंतपासायसयदुरालोयं ।  
 नरवइणो भयजणणं कुमारपरिवग्गियं जायं ॥२६८॥

तत्थत्थि खेतवालो खंडकवालोत्ति नयरिसुपसिद्धो ।  
 खडहडियसिरह(सिहर)भायं देवउलं निवडियं तस्स ॥२६९॥  
 पासायवडणयपयडियकोवो सो तक्खणेण पलओव्व ।  
 भुयणस्स वि भयजणओ धाओ हरिविक्कुमाभिमुहं ॥२७०॥  
 जा अब्भिद्वइ पिउणो पउणीकयसव्वपरियराबंधो ।  
 ता हक्कंतो सहसा समागओ ताण पासम्मि ॥२७१॥  
 अवि य-निम्मंसदीहदेहो विसमनसाजालजडिलियावयवो ।  
 घणवेल्लिजालनद्धो संसुक्को तालरुक्खोव्व ॥२७२॥  
 अइकसिणदेहमंसल-मसिमसिणपहाहिं गयणधरणियलं ।  
 लिपंतो इव दिट्ठो करालमुहजालदुपे(प्पे)च्छो ॥२७३॥  
 दढ्ढीहअट्टिसंठणमेत्तजंघोरुदंडजुयभीमो ।  
 कडिवग्घम्मनिवसण-महाहिकयपट्टियाबंधो ॥२७४॥  
 निम्मंसउयर-कुहरंतरालझुल्लंतअंतहारलओ ।  
 हिययट्टिपंजरंतरनिन्नयभायभयजणओ ॥२७५॥  
 अइदीहकंधराकीलकोडिनिम्मंसठियकरोडिव्व ।  
 निच्छेल्लियगल्लुपलट्टिमेत्तमुहभायदुपे(प्पे)च्छो ॥२७६॥  
 गुरुकूवसलिलसंकेतरविसमायारकविलभीमच्छो ।  
 कन्नंतरालझुल्लंत-पुरिससिरकुंडलाहरणो ॥२७७॥  
 दरकुडिलकडारुव्वुद्धकेसअहकायकसिणमसिवन्नो ।  
 जालासयपज्जलिओ तलघणनूमोव्व हव्ववहो ॥२७८॥  
 अइरोसवसनिकरिसिय-दसणुब्भडकडयडारवकरालो ।  
 करकलियअट्टिखंडुग्गकत्तियानिहसणसयणहो ॥२७९॥

तं दट्ठूण कुमारो अइकसिणकरालकायवीभच्छं ।  
 उप्पन्नकोऊ(उ)हल्लो पभणइ नरनाहमुदिसिउं ॥२८०॥  
 किं एयं मह साहसु सत्तं का होज्ज जीवजोणी वा ।  
 किं तिरियजाइओ को वि कीडओ एस संभविही? ॥२८१॥  
 रयणीए कीडयाइं बाहिं नीणंति इय किर पसिद्धी ।  
 किं वा कोइ मणुस्सो अउज्जवीवंतरुप्पन्नो ? ॥२८२॥  
 ता कहसु सुहड ! मज्ज इगुरुयं कोउयं, भणइ राया ।  
 किं उच्छुक्को एसेव तुज्ज कहिही नियसरूवं ॥२८३॥  
 तो किडिकिडंतजंघट्टिवियडपयक्खेवपयडियामरिसो ।  
 कक्कुससदं कुमरं सनिट्ठं भणइ खेत्तवई ॥२८४॥  
 रे रे दुडु नराहम ! दुं विवय ! दुव्वियह ! अविणीय ! ।  
 किमहं तए न नाओ खंडकवालोत्ति खेत्तवई ? ॥२८५॥  
 इह नियडे देवउले वत्थव्वा इह पुरीए सुपसिद्धो ।  
 मं अभिभविउं पयडसि परक्कमं अत्तणो पाव ! ? ॥२८६॥  
 तव्वयणायन्नणजायनिच्छओ भणइ रायपुत्तो वि ।  
 मा खेत्तवाल ! एवं जंपसु अविणिच्छियं कज्जं ॥२८७॥  
 जइ मण-वइ-कायाणं एणेण वि तुज्ज परिभवो विहिओ ।  
 ता तुममेव पमाणं देवो खु तुमं विमलनाणो ॥२८८॥  
 तो भणइ खेत्तपालो दुन्नयमसं सयं करेऊण ।  
 एण्ह मह भयभीओ अलियं पडिउत्तरं देसि? ॥२८९॥  
 एण्ह चिय वीसरियं पयभरकंपंतदलियमहिवीढं ।  
 पाडियदिढसिलबंधं पासायनिवाडणं मज्झ ? ॥२९०॥

कुमरो भणइ न बुज्झसि एवं भणिओ वि सामवयणेहिं ।

ता भण किं तुह कीरइ ? तुह अहिलसियं करिस्सामि ॥२९१॥

तो भणइ खेत्तवालो पोरुसगव्युत्तुणो परिब्भमसि ।

ता तं तुह निम्मूलं रणम्मि दप्पं हणिस्सामि ॥२९२॥

तो कुमरेणक्खित्ता दुवे वि नरनाह-खेत्तवाला ते ।

एह समं चिय दुक्कह एगो वि हु दोवि निहणिस्सं ॥२९३॥

तो खेत्तवई जंपइ मए समं भिडसु ताव रे धिड्ड ।

पच्छा एएण समं जं रुच्चइ तं करेज्जासु ॥२९४॥

कुमरेण तओ भणियं वीर ! तुमं ताव अच्छ मज्झत्थो ।

जिणिऊण खेत्तवालं तए वि सह जुज्झइस्सामि ॥२९५॥

तो अप्फोडियभुयदंडघायनिरघायबहिरियदियंतो ।

अब्भिट्टइ हरिविक्कम-कुमरो किर खेत्तवालस्स ॥२९६॥

रणरहसपुलइयतणू कुमरो दुदंसणो य खेत्तवई ।

जुगवं समोत्थरंता रसव्व नं वीर-बीभत्सा(च्छ) ॥२९७॥

अब्भिट्टइ विच्छुट्टइ ओहट्टइ लोट्टइ(ई)य खणमेत्तं ।

पहरइ नीहरइ खणं कुमरो रक्खेण अक्खित्तो ॥२९८॥

अइनिट्ठरकुमरपहार-ताडिओ उव्वमेइ रुहिरोहं ।

तव्वेलुव्वेविरदेहदंडपरिनीसहो रक्खो ॥२९९॥

आसासिऊण य खणं जा कुमरो तस्स पहरइ खणद्धं ।

बहुवेयालाण तउ समंतओ सेन्नमोत्थरियं ॥३००॥

दट्ठूण रणरसुव्वूढबहलरोमंचकंचुउच्छइओ ।

सेन्नं पसरइ पसरंतहिययसंतोससुहिओ व्व ॥३०१॥

कह अवणिज्जइ एगेण मज्झ रक्खेण रणरसबुभुक्खा ।  
 निव्वडियपोरुसं सेत्रमेव मह पहरइ न जाव ॥३०२॥  
 इय चिंतिऊण कुमरो पहरइ पहरंतसव्ववेयाले ।  
 दढसंवड्वियरणरस-मच्छरसंजायउच्छओ ॥३०३॥  
 एक्को वि अणेगाणं रणंगणे अगणियन्नसामत्थो ।  
 पीडं जणेइ कत्तिय-मासे जरओव्व सत्ताणं ॥३०४॥  
 एक्को तलहत्थपहार-ताडियो पडइ पाडियसहस्सो ।  
 पडणपरंपरचमढ्ढणभीयं पिव भज्जए सेत्रं ॥३०५॥  
 पहरंतभुयादंडं अवरुंडिय संठिए य वेयाले ।  
 अच्छोडिऊण पाडइ कीडयनियरेव्व अकिलेसं ॥३०६॥  
 तो चिंतेइ कुमारो न किंपि एएहिं बहुतरेहिं पि ।  
 गहिऊण तओ चलणे उच्चल्लइ खेत्तवालं पि ॥३०७॥  
 तो भाविऊण गयणे तेणं चिय पहरणेण नीसेसं ।  
 जा ताडिउं पयट्ठो वेयालबलं विरसमाणं ॥३०८॥  
 ता अप्पाणं पेच्छइ पुरओ नरनाहमेव एकल्लं ।  
 तं पुण वेयालबलं न याणियं कत्थवि गयं ति ॥३०९॥  
 तं कत्थ गयं सेत्रं खंडकवालो वि कत्थ वि पलाणो ।  
 अहवा मायाबहुलो वेयालजणो सया होइ ॥३१०॥  
 एत्थंतरम्मि हसिऊण सहरिसं अल्लियंतभुयदंडो ।  
 वसुहाहिवस्स सहसा अभि(ब्धि)इइ जा किर कुमारो ॥३११॥  
 ता नरवइणा भणिओ मा मं बीभच्छ ! च्छिवसु अच्छेप्प ! ।  
 वस-मंस-रुहिरलित्तो वेयालसरीरसंगेण ॥३१२॥

इह नाइदूरदेसे सरोवरं अत्थि विमलजलभरियं ।  
 ण्हाऊण तत्थ तुरियं आगच्छसु तयणु जुज्झामो ॥३१३॥  
 एवं करेमि तुरियं खग्गं घेत्तूण निग्गओ कुमरो ।  
 चित्तेइ महाराओ अवलोइयपुत्तसामत्थो ॥३१४॥  
 लद्धा पुत्तपरिक्खा एयस्स वि जत्थ खेत्तवालस्स ।  
 सेन्नसहियस्स एवं का गणणा तस्स अम्हेहिं ? ॥३१५॥  
 सिद्धं सज्झं संपइ हरिविक्रमभुयबलं च पडिवन्नं ।  
 एयस्स रणे मल्लो पुरंदरो जइ परं होइ ॥३१६॥  
 सब(व्व)त्थ जयं वंछंति सपु(प्पु)रिसा जीवियव्वचाए वि ।  
 पुत्ताओ च्चिय सोहइ पराजओ इह परं एगो ॥३१७॥  
 जइ कहवि समागच्छइ तुरियं ण्हाऊण रणरससयण्हो ।  
 ता नत्थि तओ मोक्खो अदिन्नसमरस्स मह निययं ॥३१८॥  
 इय चिंतिऊण राया तुरियगई जाइ तप्पएसाओ ।  
 ल्हुक्कइ चंडीभवणा पडिमापुट्ठीए सुयभीओ ॥३१९॥  
 कुमरो वि सरवरे ण्हाऊण रणभूमिमागओ तुरियं ।  
 पेच्छइ न महारायं अह चिंतइ कत्थ सो सुहडो ? ॥३२०॥  
 कहमेत्थ सो न दीसइ ? तायमहिक्खिविय कत्थवि पलाणो ।  
 अहवा मं पडिवालइ इह कत्थवि सुन्नदेवउले ॥३२१॥  
 तो देवउल-विहारासम-मढाईसु सव्वत्थणेषु ।  
 परिभमइ गवेसंतो वाहरइ य गरुयसद्देण ॥३२२॥  
 भो भो पयंडविक्रम ! वीराहिव ! निसिविहारदुल्ललिय ! ।  
 भडचूडामणि ! अहयं समागओ किं न तुममेसि ? ॥३२३॥

भीरुं व अक्क(कख)मं वा जुज्झाकुसलं व सत्तिहीणं वा ।  
 मं गणिरुण अवन्नाए तेण दूरं परिच्चयसि ? ॥३२४॥  
 अपरिक्खयम्मि पुरिसे अदिद्धरणविक्रमम्मि न हु जुत्ता ।  
 काउमवन्ना, तम्हा आगच्छसु मं परिक्खेसु ॥३२५॥  
 इच्चाइ बहुपयारं कुमरो पुक्कारिरुण सव्वत्थ ।  
 तं चेव चंडियाभवण-मागओ चंडियं भणइ ॥३२६॥  
 भयवइ ! अहमेत्थ पहे गच्छंतो मग्गिओ रणं जेण ।  
 सो निउणं पि गविद्धो तहावि न मए इहं दिद्धो ॥३२७॥  
 ता सव्वहा वि तं मह दावसु मह जणयदिन्नदुव्वयणं ।  
 कह णु उवेक्खामि अहं एवं कयदुन्नयं वेरिं ॥३२८॥  
 जइ तं न मज्झ दंससि ता तुरियं चंडि ! मह पडिच्छेसु ।  
 पवरुत्तामंगमेयं अहवा तं दंस सुहडं मे ॥३२९॥  
 एत्थंतरम्मि राया विणिच्छियं तस्स तव्विहं सोउं ।  
 सुयमरणब्भउब्भंतो चिंताजलहिम्मि सो पडिओ ॥३३०॥  
 कह पेच्छ पाडिओ हं सुएण अइविसमसंकडे कज्जे ।  
 संदेहतुलाए द्वियं मह जीयं पुत्तजीयं च ॥३३१॥  
 गरुया रोसिज्जंता अप्पं व परं व संसए नेत्ति ।  
 ता किं करेमि संपइ मए अणत्थो सयं विहिओ ॥३३२॥  
 पज्जालिज्जइ अग्गी सुहेण अह सो उ पसरिओ दूरं ।  
 कहमिव ओल्हाविज्जइ गरुएहि वि बहुपयत्तेहिं ? ॥३३३॥  
 जाणंतस्स वि कम्मा-णुभावसंजणियबुद्धिपसरस्स ।  
 संपइइ तमिह कज्जं तत्थ न पसरंति बुद्धीओ ॥३३४॥



इयमाइ बहुं राया जा चिंतइ तत्थ ताव कुमरो वि ।  
 नियसिरछेयनिमित्तं आयड्डइ निसियकरवालं ॥३३५॥  
 तत्थुप्पन्नमईए राया संजायमणअवडुंभो ।  
 चंडीए पिट्टभाए चंडीववएणओ भणइ ॥३३६॥  
 मा कुणसु पुत्त ! साहस-मसमं विरमेसु ताव मरणाओ ।  
 तुज्झ महासत्तेणं आकिट्ठा चंडिया अहयं ॥३३७॥  
 कह तं दरिसेमि नरं जो तुज्झ भएण पुत्तय ! पलाणो ? ।  
 लग्गंति पलंताणं पुट्टिमि न जं महावीरा ॥३३८॥  
 हरिविक्रमेण भणियं जइ एवं ता कहं इमं भणइ ।  
 बाहिम्मि अहं राया पाथारब्भंतरे इयरो ? ॥३३९॥  
 तो चंडियाए भणियं दुक्कुह(?) साहिप्पए तुह निगब्भो ।  
 एमेव कोउगेणं मए तुमं विप्पलद्धोसि ॥३४०॥  
 तं सोऊण कुमारो जंपइ ता देवि ! देहि आएसं ।  
 गच्छिस्सं मज्झ गुरू मं अविणीयं कलिस्संति ॥३४१॥  
 इय भणिऊण कुमारो विणिग्गओ तयणुमग्गओ राया ।  
 दरिवियसियमुहकमलो दुवे वि पत्ता सगेहेसु ॥३४२॥  
 पडिसिद्धदुडुहिययं अंतोउवसंतसयलवावारं ।  
 मुणिमाणसं व भवणं विसइ कुमारो सुधम्मोव्व ॥३४३॥  
 अइकोमलं विसालं अच्चुज्जलममलकुसुमरयसुरहिं ।  
 हंसोव्व गंगपुलिणं कुमरो पल्लंकमल्लियइ ॥३४४॥  
 अइनिच्चियप[य?]रूवं निरुद्धथिरकाय-करणवावारं ।  
 असमसुहिं व समाहिं कुणइ कुमारो खणं निदं ॥३४५॥

अह वंससरसुमीसिय-सुगीयरसपूर-भरियसवणजुओ ।  
 बहुबंदिर्विंदकलयल-सद्वेण य जगिओ कुमरो ॥३४६॥  
 वियसियवयणसरोरुह-पयद्वघणसुरहिपरिमलूसासो ।  
 कुमरो पच्चूसो इव रयणिविरामम्मि पडिहाइ ॥३४७॥  
 सिरघडियपाणिसंपुड-मिलंतसरलंगुलीनहमऊहं ।  
 पढं 'उसहस्स नमो' भणिउं परिहरइ पल्लंके ॥३४८॥  
 कयसयलगोसकिच्चो मिलंतरणवीरपमुहबहुमित्तो ।  
 वच्चइ जणयसमीवं सेवासुहलंपडो तुरियं ॥३४९॥  
 हियपद्वियरयणिविहारवइयरारूढगरुयमाहप्पं ।  
 दिट्ठो नराहिवइणा इव चित्ते चिंतियं तेण ॥३५०॥  
 जे पुव्वपुन्नपब्भार-पत्तअइसइयगुणगणसमिद्धा ।  
 ते वि सुरा गयगव्वा एएण कया नियगुणेहिं ॥३५१॥  
 सा भत्ती तम्मि सुरा-सुरिंदमणिमौड(मउड) धिद्वचरणम्मि ।  
 एयस्स परमदेवे जा थोत्तगया मए निसुया ॥३५२॥  
 उववूहिया अणेणं सावट्टंभेण जेण सव्वसुरा ।  
 अद्विट्ठसुरसहेणं कह तं पागब्भमब्भसियं ! ॥३५३॥  
 सो गीयगुणाहिगमो रसन्नूया सा वि जा असामञ्जा ।  
 चाउ(ओ)वि भुवनभूसण-हारपयाणेण अइगरुओ ॥३५४॥  
 बालो होऊण अहं एइहमेत्तं पवट्ठिओ न उणो ।  
 केण वि रणम्मि सहिया मह हक्का एत्थ भुयणम्मि ॥३५५॥  
 एएण पुणो तणमिव कलिऊणं ताव ताव उवहसिओ ।  
 मज्झंपि जाव हियए विलक्खिमा कावि संजाया ॥३५६॥

जम्मि हणंतंमि रणे मुट्टिपहारेहिं रक्खसभडोहं ।  
 तालफलाइं तरूण व पडंति दंतट्टिखंडाइं ॥३५७॥  
 चंडीए पसाएणं सरणागयवच्छ्लाए च्छुट्टो हं ।  
 इहरा नियदुन्नयसरिस-मेव फलमणुहवेंतो म्हि ॥३५८॥  
 इय केत्तियं व भन्नउ एक्केक्कमिमस्स अणुवमं चरियं ।  
 चिंतिज्जंतं सहसा कस्स न हिययं चमक्केइ ! ॥३५९॥

अवि य-जं एरिसाण जणयत्तणेण अम्हारिसा वि जायंति ।  
 सो कम्म-धम्मजोगो अहवा वि घुणक्खरो नाओ ॥३६०॥  
 एवंविहाण जम्मो जणणी-जणयाण पयडणनिमित्तं ।  
 ससि-सूराणं उदओ रयणि-दिणाणं व भुयणम्मि ॥३६१॥  
 इय तणयगरुयगुणगण-चिंतावसविवसमाणसो राया ।  
 पुरओ द्वियंपि कुमरं न पेच्छए तग्गुणक्खित्तो ॥३६२॥  
 जा सावहाणहियओ अवलोयइ ताव आगओ कुमरो ।  
 दिट्ठो नराहिवइणा दिट्ठिपसायं विमग्गंतो ॥३६३॥  
 पणमइ पणामचलमौलि(मउलि)मालईद्वामचच्चिए चलणे ।  
 पिउभत्तिभरेण निए सिरम्मि संदाणयंतोव्व ॥३६४॥  
 उवविससुत्ति पलत्ते पसायमाभासिऊण उवविट्ठो ।  
 रणवीरपमुहबहुमित्त-मंतिपुत्तेहिं परियरिओ ॥३६५॥  
 सविणय-सप्पणय-समहुर-सरस-सोवसम-ससमयसयत्थं ।  
 खणरज्ज-कज्जहियओ मंतेइ समं सुमंतीहिं ॥३६६॥  
 खणकव्व-कहासत्तो खणभरहरहस्सरसियमइपसरो ।  
 खणवीरकहाओव्वूढबहलपुलयंकुरसरीरो ॥३६७॥

खणमेत्तमहामइविबुहतत्तसंदेहकहियसिद्धंतो ।  
 खणलोयदाणविणिउत्तपुरिसकयतुरियआवासो ॥३६८॥  
 खणदेसविसयकंटय-विसोहणो सावहाणमणकिरिओ ।  
 खणपरविसयनिवेसिय-नरवइसंपेसियपसाओ ॥३६९॥  
 इय पिउवयणअणुद्धिय-वावारपरंपराविणोएण ।  
 सव्वत्थ सावहाणो जा अच्छइ तत्थ अत्थाणे ॥३७०॥  
 ता नरवइणा भणियं किमेस नयरीए दीसए लोओ ।  
 सविसेसुज्जलभूसण-नेवत्थो बाहिरे जंतो ? ॥३७१॥  
 अह साहइ वरमंती महोयही परमसम्मदिट्ठी जो ।  
 इह देव ! जणो वच्चइ वंदणवडियाए सूरिस्स ॥३७२॥  
 जिन्नुज्जाणे बाहिं नरवर ! बहुसमणसंघपरियरिओ ।  
 रयणायरोत्ति नामं समागओ एत्थ आयरिओ ॥३७३॥  
 अइदुक्करतव-चरणेहिं सुसियदेहो वि ललियलायन्नो ।  
 कन्नन्तखलियलोयण-जुयलो वि अदिद्धइहलोओ ॥३७४॥  
 पढमवयत्थो वि सया जो पंचमहव्वयाइं उव्वहइ ।  
 अहिगयसामन्नो वि हु नीसामन्नत्तणं पत्तो ॥३७५॥  
 हद्धी रूवं मह जेण जुवइवग्गो असमंजसे इविओ ।  
 इय वेरग्गाइसया मयणोव्व जइत्तमावन्नो ॥३७६॥  
 बहुभवपरंपरासंगयाण जीवाण को परो एत्थ ।  
 इय परदुक्खेहिं स्या दुहिओ भुयणस्स बंधुव्व ॥३७७॥  
 रविकोडिअसज्झं पि हु परहिययगयं जणाण बहुभेयं ।  
 जो मोहमहातिमिरं अउव्वभाणुव्व अवणेइ ॥३७८॥

अच्चुज्जला वि अणुरायकारिणो दुल्लहा वि हु अणंता ।  
 जे केइ मोक्खहेऊ ते तम्मि गुणा परिवसंति ॥३७९॥  
 इय जस्स परं न य किंपि अत्थि सव्वं पि तस्स मज्झगयं ।  
 सो रयणरायहाणी सयंभुरमणो समुदोव्व ॥३८०॥  
 चउनाणजुओ सोहइ जिणहरसक्कावयारसन्निहिए ।  
 अइफासुए विसाले जिन्नुज्जाणे द्विओ सूरी ॥३८१॥  
 तेणागयमेत्तेणं अक्खित्तो इव गुणेहिं पुरिलोओ ।  
 कन्ने वयणे कंठे(ठे) हियए संदाणिऊण दिढं ॥३८२॥  
 ता पुत्तजुओ राया सुणिऊण समुज्जले गुणे तस्स ।  
 विम्हयकोऊहलभत्तिनिब्भरंगो गओ तत्थ ॥३८३॥  
 जा राया उज्जाणे पविसइ ता पढममेव मुणिवग्गो ।  
 तारायणोव्व गयणे दिट्ठो सव्वत्थ विक्खिरिओ ॥३८४॥  
 जा जाइ पुरो ता दिणयरोव्व दुद्धरिसतेयदिप्पंतो ।  
 नीसेससहाजणघडियपाणिकुमुओ मुणी दिट्ठो ॥३८५॥  
 तदंसणे निवस्स वि उल्लसियपमोयवाहसलिलम्मि ।  
 सा असरिसजणदंसण-कयमलव्व पक्खालिया दिट्ठी ॥३८६॥  
 तो सरहसवसुहातल-निहित्तिसिर-जाणु-करयलजुएण ।  
 बहुभत्तिनिब्भरेणं कओ पणामो मुणिंदस्स ॥३८७॥  
 तेण वि उन्नमियकरेण सायरं थिरनिहित्तनयणेण ।  
 अहिणंदिओ नरिंदो सुधम्मलाहेण गुणनिहिणा ॥३८८॥  
 नमिऊण साहुवग्गं उवविट्ठो तस्स पायमूलम्मि ।  
 संभासितुं नरिंदं धम्मं अह कहिउमाढत्तो ॥३८९॥

“जीवो अणाइनिहणो घडंत-विहडंतकम्मसंबद्धो ।  
 गयणविभाउच्च सया अन्नोन्नघणेहिं संजुत्तो ॥३९०॥  
 एयस्स कम्मजोगो अणाइसंताणभवपवाहिकओ ।  
 चंदस्स केण कहिओ कलंकसंकामणादि य सो ॥३९१॥  
 सामगियावसेणं कम्मगिअभिद्दुओ गइवसेण ।  
 पित्तलरसोच्च जीवो परिणमइ अणेगरूवेहिं ॥३९२॥  
 दप्पणसरिसे जीवे तक्कम(म्म?)निउत्तपुरिसविणिउत्ते ।  
 तन्नत्थि जं न भुयणे संकमइ नराइयं रूवं ॥३९३॥  
 तं किंपि कम्मवसओ सो जीवो दुट्टपावमज्जिणइ ।  
 जेण घणदुक्खपउरे उप्पज्जइ घोरनरयम्मि ॥३९४॥  
 अइदुब्बले अणाहे भयभीए सरणवज्जिए दीणे ।  
 जो हणइ निरवराहे जीवे सो जाइ नरयम्मि ॥३९५॥  
 जं परदुक्खुप्पायग-मच्चंतमसुद्धहिययवावारं ।  
 तमसच्चं भासंतो पडइ नरो घोरनरयम्मि ॥३९६॥  
 जे दोसा जीववहे हरिए वि हु परधणम्मि ते दोसा ।  
 तं निघिणो कुणंतो सुनिच्छियं जाइ नरयम्मि ॥३९७॥  
 जो परनारिपसंगं हियएण वि अहिलसेइ बहुपावं ।  
 सो आयसं जलंतं जुवइं अवरुंडए नरए ॥३९८॥  
 जे पावसमारंभा हियएण परिग्गहीयभुयणयला ।  
 बाढमसंतुट्टमणा ते पुरिसा जंति नरएसु ॥३९९॥  
 जो निसि निसायरुच्छिट्टमसइ अन्नायनर-पसुविसेसो ।  
 सो अविवेई पुरिसो नरयम्मि महातमे पडइ ॥४००॥

जो मंसमसइ पावो चडप्फडंतस्स करुणजीवस्स ।  
 सो तिलमेत्तसुहत्थी मेरुसमं दुक्खमज्जिणइ ॥४०१॥  
 मुच्छियमइचेयन्नं तक्खणमुज्झंतइंदियविवेयं ।  
 अजहत्थवत्थुनाणं पडइ पियंतो सुरं नरए ॥४०२॥  
 जे विसयविसविमूढा कोहाइकसायकलुसियप्पाणो ।  
 सव्वत्थ अविरयमणा ते मणुया जंति नरएसु ॥४०३॥  
 जे मिच्छत्तमहागहवसेण अजहत्थवत्थुवएसा ।  
 मोहंति मुद्धजीवे ते पावा जंति नरएसु ॥४०४॥  
 इच्चाइमहादोसा अनियत्तदुरंतरोदझाणपरा ।  
 दुक्कम्मगलत्थहया पडंति घोरे महानरए ॥४०५॥  
 तत्थ य सहंति दुक्खं सुतिक्खकरवत्तफालणं विसमं ।  
 कुंभीपायं संडासतोडणं खयरकुट्टणयं ॥४०६॥  
 असिपत्तवणपवेसं सुत्ततउपायणं विसिक्खवि(व)णं ।  
 वस-रुहिर-पूय-दुत्तरवेयरणीतरणमइघोरं ॥४०७॥  
 इय नाणाविहबहुदुक्ख-तावतवियाण नरयपडियाण ।  
 अच्छिनिमीलणमेत्तं पि नत्थि सोक्खं हयजियाण ॥४०८॥  
 तत्तो द्विइक्खएणं उव्वट्टाणं तु होइ उप्पत्ती ।  
 एंगिंदियाइसु तओ विगि(ग)लिंदियमाइसु जियाणं ॥४०९॥  
 पंचिंदियतिरिएसुं सीहोरगमाइएसु कूरेसु ।  
 तत्तो वि पुणो नरए नरयाओ पुणो तिरियवग्गे ॥४१०॥

१. अत्र प्रतिमध्ये “गुरुकम्मवसगयाण तिरिक्खजोणीसु जिवाण” इति पाठः दृश्यते, तत्र च। इति चिह्नं दत्त्वा प्रतिनिम्नप्रदेशे (मार्जिन मध्ये) ९ गाथाया उत्तरार्द्धः त्वरितगत्या लिखितो दृश्यते ॥

इय एवमाइबहुविह-परियत्तणपरिगयस्स जीवस्स ।  
 जइ कहवि तुडिवसेणं मणुयत्तं होइ संसारे ॥४११॥  
 जह गयणे बप्पीहो मेहविमुक्कंबुबिंदु मग्गंतो ।  
 कहकहवि लहइ एवं जीवो वि हु माणुसं जम्मं ॥४१२॥  
 जह एक्कवारफलिओ पुणो न रंभातरू फलं लहइ ।  
 इय मणुयत्तभवाओ पुण मणुयत्तं न जीवो वि ॥४१३॥  
 सुविणयरज्जाओ जहा भट्ठो पुरिसो न तं पुणो लहइ ।  
 एवं मणुयत्ताओ चुक्को जीवो वि मणुयत्तं ॥४१४॥  
 इय जोणिलक्खदुत्तर-संसारमहासमुदपडियस्स ।  
 जीवस्स नेह सुलहं मणुयत्तं कम्मवसगस्स ॥४१५॥  
 पुरिसेणं बुद्धिमया लद्धूण सुचंचलं मणुयजम्मं ।  
 एयस्स फलं गेज्झं विसुद्धधम्माणुसारेण ॥४१६॥  
 लद्धं पि कम्मपरिणइ-वसेण हारंति तं महामूढा ।  
 रयणं व जूयकारा तुच्छधणासाए मणुयत्तं ॥४१७॥  
 राग-दोसविमूढा अविवेयवसा अनायपरमत्था ।  
 ते अब्भसंति दोसे पडंति ते जेहिं नरएसु ॥४१८॥  
 एयं मज्झ कुटुंबं मए विणा असरणयं अणाहं च ।  
 इय वामोहियहियओ तस्स कए कुणइ पावाइं ॥४१९॥  
 एवं न मुणइ किं मह सकज्जनिरएक्कज्ज(ज)म्मबंधूहिं ।  
 बहुभवसुसहायमहं सुधम्मबंधुं गवेसामि ॥४२०॥  
 अन्ने पुण रागंधा पुरं विसं भोगसुहपरायत्ता ।  
 दूरे धम्मायरणं सुधम्मकहगं उवहसंति ॥४२१॥



धम्मविणिओयरहियं केइ पुणो अज्जिऊण बहु अत्थं ।  
 अह जंति अप्पण च्चिय अत्थो वा अन्नओ जाइ ॥४२२॥  
 इय एवमाइ सव्वं परमत्थविवेयवज्जिया पुरिसा ।  
 सयणित्थि-धणाईयं तमेव मन्नंति परमत्थं ॥४२३॥  
 खेल्लंति जहा डिंभा पुत्तलय-घरुल्लयाइमोहेण ।  
 तह मुज्झंति विमूढा अतत्त-तत्ताणुबंधेण ॥४२४॥  
 इय नाणाविहवामोहमोहिया वंचिऊण अप्पाणं ।  
 इहलोयसुहासत्ता हारंति मुहा मणुयजम्मं ॥४२५॥  
 अप्पाणं भो ! चिंतह लोयस्स कए किमेत्थ मुज्जेह ? ।  
 पज्जलियघरवसेणं नियदेहं मा उवक्खेह ॥४२६॥  
 तं किंपि सुवुरिसेणं कायव्वं जेण अकयविक्खेवं ।  
 भज्जइ गमागमो जोणिलक्खविसमम्मि संसारे ॥४२७॥  
 जह दीहपहपरिस्सम-खीणो उव्विज्जए परिब्भमिउं ।  
 इच्छइ बहुसुहअविचल-ठणम्मि अवड्डिइं कोइ ॥४२८॥  
 तह दीहमहाभवमग्ग-भव(म)णविखन्नेण एत्थ बुद्धिमया ।  
 सासयसुहम्मि मोक्खे कायव्वो सव्वहा वासो” ॥४२९॥  
 इय जाव सजलजलहर-गहीरसरसरिसमहुरनिग्घोसो ।  
 सिरिरयणायरसूरी धम्मकहं कहइ परिसाए ॥४३०॥  
 ताव सविसेसपसरिय-हरिसवसुव्वूढबहलरोमंचा ।  
 जाया घणसमयंकुरकलियव्व मही महापरिसा ॥४३१॥  
 एत्थंतरम्मि राया आणंदवसुल्लसंतरोमंचो ।  
 सिरि कलियकरयलंजलि-बंधो विन्नविउमाढत्तो ॥४३२॥

“तुह निम्मलमुहससिदंसणेण मह नाह ! सायरस्सेव ।  
 पक्खित्तो दूरेणं लहरीहिं व पावसेवालो ॥४३३॥  
 तुम्हारिसाण नूणं संसारसरूवमणुहवपसिद्धं ।  
 वन्नंताण न अलियं निव्वाणसुहं परोक्खं पि ॥४३४॥  
 जह य महामोहहया पयडंपि न सच्चवंति भवरूवं ।  
 निव्वाणपहं पि तहा पच्चक्खं नोवलक्खंति ॥४३५॥  
 ता करुणायर ! साहसु गिहत्थभावोचियं परमधम्मं ।  
 जेणाहमणन्नमणो सम्मत्तं संपवज्जाभि” ॥४३६॥  
 तो तव्वयणविरामे भयवं भवजलहिजाणवत्तं व ।  
 सासयसिवतरुमूलं धम्ममिमं कहइ संखित्तं ॥४३७॥  
 “धम्मो नरिंद ! पढ्मो जईण, सो दसविहो समक्खाओ ।  
 खंताईओ, बीओ गिहीण, सो बारसविभेओ ॥४३८॥  
 पंच य अणुव्वयाइं गुणव्वयाइं च हुंति तिन्नेव ।  
 सिक्खावयाइं चउरो गिहिधम्मो बारसविभेओ ॥४३९॥  
 एयस्स दुभेयस्सवि सम्मत्तं मूलकारणं होइ ।  
 जह अंकुरस्स बीयं जह य सरीरस्स जीवो वि ॥४४०॥  
 सव्वकिरियाजुओ वि हु नीसम(म्म)त्तो न सोहए धम्मो ।  
 संपुन्नसरीरो वि हु नयणविहीणो जहा पुरिसो ॥४४१॥  
 तं सम्मत्तं दुविहं निसग्गतो होइ अहिग्गमाओ वि ।  
 जं कम्मखओवसमा संपंज्जइ तं निसग्गकयं ॥४४२॥  
 जं पुण नाणाहिग्गमा अहिग्गमसम्मं च तं विणिद्धिं ।  
 तत्तत्थसदहाणं सम्मत्तसरूवमिह होइ ॥४४३॥

जीवाजीवासवसंवरे य तह निज्जरा य बंधो य ।  
 मोक्खो इमाइ सत्त वि तत्ताइं जिणेण भणियाइं ॥४४४॥  
 उवओगलक्खणा जे ते जीवा जिणवरेहिं पन्नत्ता ।  
 चित्तं चेयण-सन्ना-विन्नाणाई य उवओगो ॥४४५॥  
 विवरीया य अजीवा पावदुवाराइ आसवो होइ ।  
 तेसिं च जो निरोहो जिणेहिं सो संवरो भणिओ ॥४४६॥  
 तव-संजमाइएहिं कम्मावगमो हु निज्जरा भणिया ।  
 मिच्छाइकारणेहिं कम्मादाणं तु सो बंधो ॥४४७॥  
 गुरुकम्मइविमुक्को जीवो पयईए उद्धगइगमणो ।  
 जत्थच्छइ सो मोक्खो सासयसोक्खो जिणक्खाओ ॥४४८॥  
 एयाणं तत्ताणं सद्वहणं सम्मदंसणं होइ ।  
 तं उवसमाइएहिं लक्खिज्जइ इह उवाएहिं ॥४४९॥  
 पयईय व कम्माणं वियाणिउं वा विवागमसुहं पि ।  
 अवराहे वि न कुप्पइ उवसमओ सव्वकालं पि ॥४५०॥  
 नरविबुहेसरसोक्खं दुक्खं चिय भावओ उ मन्नंतो ।  
 संवेग्ग(ग)ओ न मोक्खं मोत्तूपं किंपि पत्थेइ ॥४५१॥  
 नारय-तिरिय-नरामर-भवेसु निव्वेदओ वसइ दुक्खं ।  
 अकयपरलोयमगो ममत्तविसवेयरहिओ वि ॥४५२॥  
 दट्ठुण पाणिनिवहं भीमे भवसागरम्मि दुक्खत्तं ।  
 अविसेसओ अणुकंपं दुहावि सामत्थओ कुणइ ॥४५३॥  
 मन्नइ “तमेव सच्चं नीसंकं जं जिणेहिं पन्नत्तं” ।  
 सुहपरिणामो सच्चं संकाइविसोत्ति[या]रहिओ ॥४५४॥

एवंविहरपरिणामो सम्मदि(दि)ट्टी जिणेहिं पन्नत्तो ।  
 एसो उ भवसमुदं लंघइ थेवेण कालेणं ॥४५५॥  
 सम(म्म)त्तमला नेया संका कंखा तहेव विचिगिंछा ।  
 परपासंडिपसंसा ताणं चिय संथवाई य ॥४५६॥  
 संसयकरणं संका कंखा अन्नोन्नदंसणा(ण)ग्गाहो ।  
 संतम्मि वि विचिगिंछा सिज्जेज्ज न मे अयं अत्थो ॥४५७॥  
 परपासंडिपसंसा सोगयमाईण वन्नणा जा उ ।  
 तेहि सह परिचओ जो स संथवो होइ नायव्वो ॥४५८॥  
 अत्रे वि य अइयारा आईसहेण सूइया एत्थ ।  
 साहम्मिअणणुवूहण-अथिरीकरणाइया नेया ॥४५९॥  
 इय सम्मत्तं नरवर ! पडिवज्जसु सव्वहा असढचित्तो ।  
 सिद्धे इम्मि इयरे धम्मरंभा पसीयंति ॥४६०॥  
 नियहिययसत्तिसरिसं तुच्छं पि नरिंद ! तुह अणुट्ठाणं ।  
 सव्वं जायइ सहलं सम्मत्तविसुद्धचित्तस्स ॥४६१॥  
 कम्मरन्नदवग्गि सिवतरुबीयं च होइ सम्मत्तं ।  
 भवचारगाओं पुरिसं मोयावइ नत्थि संदेहो ॥४६२॥  
 पडिवन्ने सम्मत्ते पडिवज्जसु देसविरइरूवाइं ।  
 थूलगपाणवहाइ-अणुव्वयाइं अणुक्कमसो ॥४६३॥  
 तिन्नि य गुणव्वयाइं विसिवयमाईणि निरइयाराणि ।  
 सिक्खावयाइं चउरो पडिवज्जसु सम्मभावेण ॥४६४॥  
 एयं बारसभेयं गिहिधम्मं नरवरिंद ! सेवंतो ।  
 पाविहसि परं मोक्खं अइरा इह नत्थि संदेहो” ॥४६५॥

इय सोउं नरनाहो धम्मं सम्मत्तसोहियं ससुओ ।  
 गिण्हइ गुरूसगासे सम्मं रंकोव्व रयणनिहिं ॥४६६॥  
 ते वंदिऊण सूरिं पविसंति पुरीए दोवि पिउ-पुत्ता ।  
 सेवंता जिणधम्मं चिट्ठंति जहासुहं तत्थ ॥४६७॥  
 अह अन्नदिणे राया अत्थाणत्थो महोयहिसमेओ ।  
 जावच्छइ हरिविक्कम-कुमारउच्छंगकयचलणो ॥४६८॥  
 ताव पणामाणंतर-सिरनिबिडघडंतसंपुडकरग्गो ।  
 विन्नवइ महारायं पडिहारो सविणयं एयं ॥४६९॥  
 इह देव ! वैरिसीहेण पेसिओ दूरदंडयत्ताओ ।  
 दारम्मि लेहवाहो चिट्ठइ, को तत्थ आएसो ? ॥४७०॥  
 तो भूसन्नाणुमउ(ओ) पडिहारपवेसिउ पवणनामो ।  
 दिट्ठो नराहिवइणा तक्खणमेत्तागओ तुरिओ ॥४७१॥  
 पहखेयखिन्नदेहो आजाणुवलग्गधूलिधूसरिओ ।  
 समसेयविंदुवहभालकलियरविकिरि(र)णसंतावो ॥४७२॥  
 अणवरयगमणसीउण्हवायपरिसुसियमंस-रुहिरतणू ।  
 चलणग्गमहावत्तो वाउविमाणे व्व आरूढो ॥४७३॥  
 वामंगखंधलंबिरपोत्तयपक्खित्तदक्खिणकरग्गो ।  
 लेहक्खेव-पणामे किमेत्थ पढ्मं ति चिंतंतो ॥४७४॥  
 पवणो पणमइ देवत्ति दंडिभणिएसु सावहाणेसु ।  
 पक्खित्ता नरवइणा लेहे पुण तम्मि नियदिट्ठी ॥४७५॥  
 तो तन्निउत्तपुरिसेण सिद्धिलिए तम्मि भुज्जलेहम्मि ।  
 अणुमन्निण य तओ पवाइयं तत्थिमं कज्जं ॥४७६॥

“सत्थि सिरिसंजुयाए अउज्झनयरीए असममाहप्पं ।  
 सिरिअजियविक्रमपहुं हरिविक्रमकुमरसंजुत्तं ॥४७७॥  
 सिरिविजयमहाकडया सेणाहिववैरसीहनरनाहो ।  
 नमिऊण विणयगब्भं विन्नवइ कयंजलीबंधो ॥४७८॥  
 असमत्थो वि समत्थो पहुपरमपयावपोसिओ होइ ।  
 रविकंतो किं न डहइ रवितेयगुणेण भुयणं पि? ॥४७९॥  
 जा आसि महीहरकोडिसंकडा तुह पयावभमणत्थं ।  
 (पूर्वमिन्द्रेण पर्वतपक्षच्छेदे कृते च्छिन्नपक्षा अयथाक्रमं भूमिपतिताः  
 गिरय पृउ(?)नाम्ना राज्ञा धनुरकोट्या उत्साहिता इति लौकिकी  
 प्रसिद्धिः ॥)

पहुणाव्व सचावेणं कया धरिस्ती मए वियडा ॥४८०॥  
 कइयावि सकोवेणं कयावि ससिसीयलेण अ कयावि ।  
 सम्माणदाणविहिणा दइयव्व पसाहिया पुहई ॥४८१॥  
 जे तुह निम्मलनहकिरणदीहसरियासहस्सदुल्लंघे ।  
 पयपंजरे निलीणा नरवइणो ते परं सुहिया ॥४८२॥  
 जे तुम्ह पायवीढं तरंडमिव सव्वहा न मेल्लंति ।  
 ते मह करवालजले नरिंद ! रिउणो न मज्जंति ॥४८३॥  
 जे वणवासे पासंडधारिणो जे समुहपरतीरे ।  
 मोत्तूण ते नराहिव ! अब्बे निहया मए रिउणो ॥४८४॥  
 जं पुरिसयार-ससरीर-बुद्धि-संपत्तिसज्झमिह किंपि ।  
 तं साहियं असेसं अपोरिसं तं मह असज्झं ॥४८५॥  
 इय नीसेसमहीयलनिक्कुंटीकरणवासणाए अहं ।  
 द्रविडनरिंदस्सुवरिं तव्विसयं पत्थिओ जाव ॥४८६॥

ता सोवि असहमाणो अम्ह बलं सयलनियबलसमेओ ।  
 कंचिनयरीओ तुरियं विसमयरं दुग्गमणुसरिओ ॥४८७॥  
 तत्थेव द्रविडविसयंतवासि-अइविसममलयगिरिनियडं ।  
 नामेण अलंघपुरं मणोरहाणं पि हु अगम्मं ॥४८८॥  
 चउदिसि बारसजोयण-निज्जलमइनिबिडविडविघणगुम्मं ।  
 गुम्मंततिकखकंटयपरंपरानिहयसंचारं ॥४८९॥  
 जइ खंडिज्जइ पल्लवमेत्तं पि हु तस्स बाहिरवणस्स ।  
 ता वाणवंतरो कोवि देव ! पीडेइ तुह सेत्रं ॥४९०॥  
 न विणय-पणाम-पूया-धूय-क्खय-कुसुम-गंध-दीवेहिं ।  
 उवयरिओ वि हु तूसइ जम्मंतरवेरिओव्व सुरो ॥४९१॥  
 ता देव ! वाणमंतरबलेण वणदुग्गगुरुबलेणं च ।  
 बहुभंडारपरिग्गहबलेण सव्वेण सो बलिओ ॥४९२॥  
 देवाणुहावओ सव्व वत्थु-संपत्तिसुत्थिओ सययं ।  
 जं जं हियए चिंतइ तं तं सव्वं पि संपडइ ॥४९३॥  
 अम्हं न बुद्धि-पोरिस-विसेसववसायगोयरो देव ! ।  
 न य सामाइचउव्विहनीई वि हु तत्थ मे फुरइ ॥४९४॥  
 ता सो महाबलो नाम खत्तिओ सुरबलेण बलवंतो ।  
 तप्पडियारो तुरियं कायव्वो केणइ नएण” ॥४९५॥  
 इय सव्वं लेहत्थं सोऊणं राइणा तओ पवणो ।  
 सम्माणिऊण बहुयं आवासं पेसिओ य गओ ॥४९६॥  
 सहसत्ति तओ दिट्ठी नराहिवइणो महोयहिम्मि गया ।  
 तेणावि निवो भणिओ अइगरुयं देव ! तं कज्जं ॥४९७॥

जुत्तं चिय विन्नवियं सेणाहिववैरसीहराएण ।  
 पहवामि पोरुसे जं देवायत्ते न उण कज्जे ॥४९८॥  
 इह पुरिसयारसज्जे कज्जे मंतीण पसरए मंतो ।  
 देवायत्ते उण ताण देव ! विहडंति बुद्धीओ ॥४९९॥  
 कज्जे ससत्तिसरिसे लहइ सलाहं नरो पयइंतो ।  
 नियसत्तिअसज्जे उण मरणमकित्तिं च पावेइ ॥५००॥  
 नियबलसज्जे वेरिम्मि विक्कमो फलइ देव नन्नत्थ ।  
 सीहस्स व घणवंद्रे उद्धाणं होइ मरणाय ॥५०१॥  
 ता देव ! जाव न सुरो अवयारं कुणइ किंपि तुह सेन्ने ।  
 ता एत्थ वैरसीहो आणिज्जउ नियसमीवम्मि ॥५०२॥  
 तो नरवइणा भणियं सच्चमिणं जंपियं तए मंति ! ।  
 एसो च्विय मह हियए विप्फुरिओ अविहडो मंतो ॥५०३॥  
 एत्थंतरे कुमारो पसन्न-गंभीर-महुरवयणेहिं ।  
 विन्नवइ महारायं मंतिं च पभासइ पहिद्धो ॥५०४॥  
 “अनिउत्तेहिं न जुज्जइ गरुयाण पुरो सिसूहिं वोत्तुं पि ।  
 जणयंति सिरे सूलं अइवियमहत्तरा जम्हा ॥५०५॥  
 तहवि नियचावलेणं तुह पायासंपि मा पभणिस्सं(?) ।  
 जं बालाओ गेज्जं सुहासियं बुद्धिमंतेहिं ॥५०६॥  
 मा ताय ! मज्झ रूससु पियं भणंतस्स कडुयवयणेहिं ।  
 अविमंसियकज्जरया पुरिसा पावंति हलुयत्तं ॥५०७॥  
 पुत्विं परिक्खिऊणं अहि-कंटगविरहियम्मि सुहमग्गे ।  
 मुक्को वि ठ्वइ पायं कयगम्मागम्मसंकप्पो ॥५०८॥



किं पुण नरिंद ! नियबुद्धिविभवअवगणियसुरगुरुविवेया ।  
 तुम्हारिसा न कज्जे कुणंति गुण-दोसप्रवियारं ? ॥५०९॥  
 इह देव ! संधि-विग्गह-जाणासणदुविहसंसया छ गुणा ।  
 जहजोगं कीरंता देंति सिरिं न उण विवरीया ॥५१०॥  
 ता देव ! संधिजोगे रिउम्मि तुह विग्गहो गुरुयनीई ।  
 नीइविउत्तो राया पयाव-विहवक्खयं कुणइ ॥५११॥  
 नियमंत-सत्तिपरिवज्जियाण सीहस्स कोवणं राय ! ।  
 संसयतुलाए द्वावइ नराण जीयं न संदेहो ॥५१२॥  
 गरुओ न विग्गहिज्जइ अनायतत्तेहिं अहव विग्गहिओ ।  
 ता न चइज्जइ, चत्तो होइ अणत्थाय नियमेण ॥५१३॥  
 दुयविहलारंभाणं उयरुयरिं जाण हुंति आरंभा ।  
 भीयव्व वैरिलच्छी ताण नरिंदाण संकमइ ॥५१४॥  
 साहस-मंतधणाणं सिज्जइ कज्जं नरिंद ! गरुयं पि ।  
 देवा वि तस्स भिच्चा जस्सत्थि ससाहसो मंतो ॥५१५॥  
 साहसरहियाण इहं दूरे परमंडलाण पच्चासा ।  
 नियमंडलं पि ताणं ओट्टुब्भइ राय ! वैरि(री)हिं ॥५१६॥  
 सो कह न परिभविज्जइ जो वैरिसु उवसमं पयासेइ ।  
 पसमो जईण भूसा न उणो विजिगीसुरायाण ॥५१७॥  
 गब्भट्ठिओ विलिज्जउ सो पुरिसो बुद्धि-साहसविहूणो !  
 जस्स न कोवपसाया जायंति जहाणुरूवेण ॥५१८॥  
 नित्तेयम्मि नरिंदे च्छारेव्व न को पयं परिट्ठवइ ।  
 जीवंतो वि मओ च्चिय जो न कुणइ विक्कुमं अहिए ॥५१९॥

ता देह ममाएसं ससुरं सपरिग्गहं सद्गुगं च ।  
 जइ तं न जिणेमि रणे महाबलं ता न तुह पुत्तो ॥५२०॥  
 तुह आएसपयट्ठो लहुओ वि अहं गुरु(रू) भविस्सामि ।  
 गरुएहिं ठविओ खलु देवत्तं लभइ उवलो वि ॥५२१॥  
 तुह पायरेणुसंगा(ग?) मणुहावओ जोगगया वि मह होही ।  
 'असुयंघंपि हु सुत्तं चडइ सिरे कुसुमसंगेण' ॥५२२॥  
 इय भणियम्मि कुमारे सावट्ठं च जुत्तिसारं च ।  
 चित्तइ राया रयणी-सच्चवियं पुत्तवुत्तंतं ॥५२३॥  
 को संदेहो जं भणइ एस तं कुणइ तारिसं चेव ।  
 तेलोक्के वि असज्झं न किंपि एयस्स मन्नामि ॥५२४॥  
 इह पढमजोव्वण च्चिय आरूढपयाव-विक्रमो राया ।  
 सुरो व्व दुरभिगम्मो उच्छायइ इयरतेयाइं ॥५२५॥  
 जइ कहवि नाय(एँ)सिस्सं ता चित्तमिमस्स विहडी(डि)ही निययं ।  
 कह घडइ विहडियं पुण हिययं नणु फलिहखंडं व ? ॥५२६॥  
 अणुकूलचेडिएहिं उवयारसएहिं जायइ सिणेहो ।  
 ब्भिज्जइ पुण एक्केणवि अवयाराभासमेत्तेण ॥५२७॥  
 तो नरवइणा भणिओ महोयही "संगयं भणइ पुत्तो ।  
 जइ तुह संमयमेयं ता कीरउ निच्छउ(ओ) कज्जे" ॥५२८॥  
 तो कन्ने ठऊणं राया मंतिस्स कहइ नीसेसं ।  
 वीरचरियागएणं जं दिट्ठं पुत्तववहरणं ॥५२९॥  
 अह मुणियकुमरविक्रममणपसरियहरिसवट्ठिउच्छहा ।  
 ते दोवि राय-मंती 'तह'त्ति मन्त्रंति तव्वयणं ॥५३०॥

ता सो पसत्थदियहे बहुसेन्नभरेण भरियमही(हि)वीढो ।  
 पिउ-माइकयपणामो लब्धासीसो समुच्चलिओ ॥५३१॥  
 बलभारसमक्कंता चलतुरयखुरगतिक्खघायहया ।  
 धाहाविउव्व धरणी वच्चइ सगं रयमिसेण ॥५३२॥  
 बहुयत्तणेण सेन्नं संच्छन्नासेसमहियलपएसं ।  
 भुयणं पिव संचलियं कुमारसेवाणुराएण ॥५३३॥  
 सूरुो वि अंतरिज्जइ सेन्नसमुत्थाए जस्स धूलीए ।  
 सेन्नं तु पुण न जाणे किं काही तस्स चउरंगं ॥५३४॥  
 चलियम्मि जम्मि पढमं तुरयखुरुक्खणियधरणिरयपडलं ।  
 पसरइ दिसासु पच्छा अक्कंतमहीयलं सेन्नं ॥५३५॥  
 चलिओत्ति जम्मि निसुए अण(णु)हूयभयाण वेरिविलयाण ।  
 पवसंति तक्खण च्चिय विलाससिंंगारवावारा ॥५३६॥  
 एवं च सो नरिंदो अणवरयपयाणएहिं मलयगिरिं ।  
 पत्तो मिलंतंरिवुबल-संगलियसमग्गलबलोहो ॥५३७॥  
 तत्थेक्कसमपएसे सुलहिंधण-तण-जलाइउवहारे ।  
 आवासिओ ससेन्नो आसं(स)न्नसमुद्धतीरम्मि ॥५३८॥  
 जत्थुच्चतालतरुसंडमंडली सहइ पवणकयकंपा ।  
 बहुबलनिवेसदंसण-विम्हयरसधुणियसीसव्व ॥५३९॥  
 सिरधरियमहाफललुंबिभारदरनमियनालिएरीओ ।  
 बहुदियसागयनरवइ-विणयं व नियं पयासंति ॥५४०॥  
 दढनागवल्लीपरिरंभ-निब्भरा कमुयतरुवणालीओ ।  
 हरिविक्कमदंसणजायहरिसपसरं व दावंति ॥५४१॥

एला-लवंग-कंकोल-सुरहिसिरखंडमंडियद्धंता ।  
 रमयंति व्व नरिंदं समुद्गगिरितीरपेरंता ॥५४२॥  
 जहठणनिवेसियसिविरलोय-गिरिगरुयगुड्डुरगहीरं ।  
 पेरंतपरिद्वियकायमाण गुणलयणिरमणीयं ॥५४३॥  
 अड्गरुयपडीमंडव-संछन्नहंतरालरविकिरणं ।  
 जणपडिसेहपरायण-पडिहारसहस्ससंकिन्नं ॥५४४॥  
 मणहरणनिवेससहस्सुल्लसंतसुद्धंतवसहिसंगीयं ।  
 सव(व्व)त्थ परिद्धावियद्धाणंतरवंडुनड्डुजणं ॥५४५॥  
 इय पिहुलमहीयलसनिविद्धसेणाविलोयणसयण्हो ।  
 आवासं संपत्तो कुमरो जणजयजयरवेण ॥५४६॥  
 कयकडयलोयचिंतो संपेसियसयलनरवइपसाओ ।  
 तदेस-कालसमुचिय-कयकज्जो अच्छइ सुहेण ॥५४७॥  
 कयण्हाण-भोयणविही सुहसेज्जाए अवरण्हसमयम्मि ।  
 जा अच्छइ ताव रवी अत्थैरिसिरं समल्लीणो ॥५४८॥  
 सोहइ संमीलियकमल-रोहभयभाणुमग्गलग्गेहिं ।  
 आवंदुरकिरणमिसा मयरंदेहिं व्व वरुणदिसा ॥५४९॥  
 तक्कालुमी(म्मी)लियमउलमालइगंधलुद्धभसलेहिं ।  
 उच्छाइयं व गयणं निरंतरं तिमिरखंडेहिं ॥५५०॥  
 संझाजिणच्चणुज्जय-विज्जाहरपरमभत्तिपक्खित्तो ।  
 कुसुमनियरो व्व गयणे सोहइ नक्खत्तनिउरंबो ॥५५१॥  
 एवंविहंमि समए कुमरो हरिविक्कमो महत्थाणे ।  
 उवविद्धो आरत्तिय-पमुहकयासेसउवयारो ॥५५२॥

उभयंसपासमणहर-विलासिणीपाणिकमलकलिएहिं ।  
 विंजिज्जंतो ससहर-करपंडुरचारुचमरेहिं ॥५५३॥  
 पणमंतमहासामंतविंद-सम्मदरखुडियमणिरयणं ।  
 समुचियनियठणडिय-नरवालसहस्ससंकिन्नो ॥५५४॥  
 उद्धडियनरसयकलिय-दीवियाकिरणजणियउज्जोयं ।  
 पडिहारसद्धवित्तथ-पत्थिवत्थिमियवावारं ॥५५५॥  
 फारक्कुफारपरिवेढ-गूढजणवारियं नरपवेसं ।  
 पविसंतविलासिणिचलण-नेउरारावरमणीयं ॥५५६॥  
 पयडियपयाववरकव्वपाढअक्खित्तबंदिजणनिवहं ।  
 थिरवंसमीससरमुल्लसंतवरगीयगंभीरं ॥५५७॥  
 इय नियसरीरदिप्पंतकंतिनिवहेहिं सयलमत्थाणं ।  
 राया भासंतो इव सीहासणसंड्ढिओ सहइ ॥५५८॥  
 तत्थच्छिऊण य खणं नाणाविहकयविणोयवासंगो ।  
 संमाण-दाणपुव्वं विसज्जियासेससामंतो ॥५५९॥  
 उद्धइ अत्थाणाओ पुरओ धावंतदीवियानियरो ।  
 कयकोलाहलबहुदंडिमंडलीसुहडपरिवारो ॥५६०॥  
 ठणट्ठाणपरिट्ठिय-ट्ठाणंतरनिबिडसुहडकयरक्खं ।  
 कीडियमेत्तस्स वि जत्थ नत्थि जंतुस्स अवयासो ॥५६१॥  
 पिहियासेसदुवारं दुवारपडिलग्गजोहपरिहारं ।  
 अइविसमवज्जपंजर-संजुत्तं वंककयदारं ॥५६२॥  
 इय विहियपओसविही पविसइ सेज्जाहरं सुपल्लंके ।  
 रमणीयवेसमणहर-परिवाराहिडियं कुमरो ॥५६३॥

कोमलतूलीसुहफंस-लद्धनिदाभरस्स कुमरस्स ।  
 बोलीणे रयणिभरे जं जायं तस्स तं सुणह ॥५६४॥  
 अंदोलियरयणायर-वणराईसुयंधकुसुमगंधेण ।  
 परिमंदमारुएणं फंसिज्जंतो सुसीएण ॥५६५॥  
 नाणाविहविहयविहायसमयसुयअसुयपुव्वसहेहिं ।  
 सद्दूलसद्धवित(त्त)त्थहत्थिसुंकाररावेहिं ॥५६६॥  
 सहसत्ति सीहभयसंपलाणहरि-हरिणदडवडरवेण ।  
 तरुतरलदलग्गालंतसिसिरअवसायफंसेण ॥५६७॥  
 पडिबुद्धो ज्झत्ति समुल्लसंतमणविम्हओ अह कुमारो ।  
 अप्पाणमेव पेच्छइ अरन्नपरिसंद्धियं एकं ॥५६८॥  
 अइकोमलयरपल्लव-पल्लकपरिद्धिओ विचिंतेइ ।  
 स(सु)विणंतरं नु अहविंदजालमह किं नु पच्चक्खं ? ॥५६९॥  
 सुसमाहियहिययविवेइएण पच्चक्खवणसरूवेण ।  
 कयनिच्छओ सुवीरो चिंतइ हरिविक्कमो एवं ॥५७०॥  
 अहह म[ह]च्छरियमिणं अदिद्धमसुयं असद्धहेयं च ।  
 वन्निज्जंतं पि न कस्स कुणइ हासाउलं हिययं ! ॥५७१॥  
 ता अवहरिओ केणइ, सुरेण असुरेण खेयरेणं च ।  
 कह अन्नहा जिओ इव विओइओ निययत्तोयाओ ॥५७२॥  
 तं वासभवणमसरिस-सुहडसहस्सोवगूढमइविसमं ।  
 बालकयधूलिखेल्लण-घरं व सहसच्चिय पणइं ॥५७३॥  
 करितुरय-नर-महारह-सेन्नसमूहो वि संपयं चेव ।  
 चउरंगफलहयाओ व देसंतरसंद्धिओ जाओ ॥५७४॥

अहवा न जुज्जइ च्विय आवइआवत्तनिवडियाणं पि ।  
 वीराण किलीबत्तं आलंबिय सोइउं एवं ॥५७५॥  
 नयमग्गसंठियस्स वि देववसा विविहकयपयत्तस्स ।  
 कस्स न जायइ भुयणे विसमदसाखुं टपकखुलणं ॥५७६॥  
 आवइवडियस्स जहा लक्खिज्जइ धीरिमा सुपुरिसस्स ।  
 संपयसुहियस्स तहा न लक्खिया केणइ कहं पि ॥५७७॥  
 एवं जाव नरिंदो चिंतइ हिययम्मि बहुविहवियप्पे ।  
 ता कुमरस्सावत्थं दट्ठं व समुग्गओ सूरु ॥५७८॥  
 केणेवं ववहरियं उत्तमपुरिसावहारदुक्कमं(म्मं) ।  
 विक्खिरइ रवी कोधं समग्गलं सोणकिरि(र)णमिसा ॥५७९॥  
 रत्तत्थलीए थलकमलिणीओ वियसंतकमलवयणेहिं ।  
 मइरारसारुणा दिणयरस्स किरणे पियंति व्व ॥५८०॥  
 वियसंतकमलकोसा उहं नीहरइ भमररिंछोली ।  
 सोहइ नलिणिविमुक्का गंडूसियतिमिरधारव्व ॥५८१॥  
 परिभावियनिन्नुरय-वसुहायलकलियसयलतरुनियरा ।  
 पयइपसन्नालोया से जाया काणणुद्देसा ॥५८२॥  
 एण्हि किमेत्थ कज्जं वियरामि वणम्मि चिंतइ कुमारो ।  
 पेच्छामि जहिच्छं वणसिरीए सोहं अविक्खलिओ ॥५८३॥  
 निच्चसुहे खणदुक्खं रमेइ पुरिसं रसंतराणुहवा ।  
 लिंबव्व महुरभोई वंछइ सीयं व्व अग्गिहओ ॥५८४॥  
 इय चिंतिऊण हियए समुट्ठिओ वियडपायनिक्खेवं ।  
 नाणाविहदुमदंसण-सकोउओ भमिउमाढत्तो ॥५८५॥

कत्थइ हरिविससियकुंभिकुंभमोत्ताहलाइं दट्टूण ।  
 केसरिसरसपएसुं परिलग्गइ विक्कमेक्करसो ॥५८६॥  
 करिकरडकंडुकंडूयणेण कडयडियवियडविडविरवं ।  
 आयन्निऊण धावइ करिकीलाकोऊ(उ)हल्लेण ॥५८७॥  
 हरिणीण सरसपसइप्पमाणनयणाणि कत्थइ नियंतो ।  
 सुयरइ तिभायपसरिय-विलासिणीपेच्छियव्वाण ॥५८८॥  
 कत्थइ पवणपहल्लिरवल्लीभमरग्गकुसुमकयपूओ ।  
 अणुसरइ पुरीपरिभमण-सुंदरीनयणबाणाण ॥५८९॥  
 इय विविहवणविणोयालोयणविम्हरियपुव्वववहारो ।  
 अउरुव्वपएसंतर-दंसणबहुकोउओ भमइ ॥५९०॥  
 जा थोवंतरभूमिं वच्चइ हरिविक्कमो तहिं रत्ते ।  
 ता दिडिवहे पडिओ गिरिगरुओ तस्स वणहत्थी ॥५९१॥  
 नियजम्मभूमिपेम्माणुबंधहणुयंतदिन्ननियवेगो ।  
 जो नीलतमालदलालिसामलो अंजणगिरिव्व ॥५९२॥  
 सुरवइकुलिसक्खयपक्खरो स(सु)संघडियवियडचउचरणो ।  
 खलहलगलंतदाणंबुनिज्जारो जंगमो सेलो ॥५९३॥  
 नीहरिओ वामपएसविसमगिरिकंदराउ वेगेण ।  
 धावंतो अणुमग्गं वरजुयइदुग्ग(ग)स्स रोसेणं ॥५९४॥  
 भयवेविरंगकुससूईभिन्नचरणग्गखलियवेगाण ।  
 मच्चुव्व ताण हत्थी जुयईण स स(सं)निहिं पत्तो ॥५९५॥  
 तो दीहरघोर महोरगाणुकारेण सोडदंडेण ।  
 सहसत्ति ताण एगा धा(ध)रिया तुरिएण वरजुवई ॥५९६॥



दिद्धा सा तेण गइंदगरुयकरगोयरा नरिंदेण ।  
 उव्वेल्लमाणकोमलबाहुमुणाला कमलिणिव्व ॥५९७॥  
 विलुलंतकेसपासा भयतरलनिहित्तसयलदिसिनयणा ।  
 नियरक्खमपेच्छंती सुयरियमरणंतकरणीया ॥५९८॥  
 हा माय माय! गहिया रक्खसु करिरक्खसाओ मं तुरियं ।  
 चिंतियमन्नं तुमए विहिणा अन्नं समाढत्तं ! ॥५९९॥  
 वणदेवयाउ ! रक्खह मारिज्जंतिं तुमंपि कुलदेवि ! ।  
 विविहमणोरहभरिया अकयत्था पाविया मरणं ॥६००॥  
 तं दट्ठुं कुमरेणं करुणारसपरवसंतकरणेण ।  
 अहिधाविऊण पुरओ 'सधीरमक्कोसिओ हत्थी ॥६०१॥  
 हा दुइ ! करिंदाहम ! कुजाइ ! भयभीयजुयइगहणेण ।  
 निक्खिव ! निययस्स वि किं न लज्जिओ थूलकायस्स ? ॥६०२॥  
 तं तुह विरियं तं तुज्ज गज्जियं थूलिमा वि तुह एसा ।  
 उवओगं जुवइवहे गच्छिस्सइ न उण सीहम्मि ॥६०३॥  
 अइदुब्बलाण निग्घिण ! सरणविहीणाण निरवराहाण ।  
 एयाण मारणेणं जहत्थनामासि मायंगो ॥६०४॥  
 सावडुंभत्तणवीरसद्वपडिसद्वभरियनहविवरं ।  
 सुणिऊण रायहक्कुं तस्साहिमुहं पलोएइ ॥६०५॥  
 तो तं नारिं धरिउं सरोसरत्तच्छिजुयलदुप्पेच्छो ।  
 धावइ रायाहिमुहं तव्वयणकोविओ हत्थी ॥६०६॥  
 तेदु(?डु)वियकन्नजुयलो रोसारुणनिवनिहित्तनयणजुओ ।  
 दीहपसारियहत्थो रायाणुवहेण सो लग्गो ॥६०७॥

१. सधैर्यम् ॥

राया वि तस्स पुरओ ईसीसि वं(व)लंतकंधरो धाइ ।  
 तस्स करगनिवेसिय-नियपाणिविदिन्नपच्चासो ॥६०८॥  
 कमजणियनिवसमगलगइवसपसरंतकोवबहुवेगो ।  
 एसेस पाविओ इय मईए तुरियं समोत्थरइ ॥६०९॥  
 तो जाणिरुण अइवेगमुक्कुं कायं नरिंदचंदेण ।  
 हत्थिं दक्खत्तणओ वलिओ तव्वामपासेण ॥६१०॥  
 जा परियत्तइ हत्थी वामंगं ताव दक्खिणं भायं ।  
 पत्तो ज्झत्ति नरिंदो हक्कुंतो कक्कुससरेण ॥६११॥  
 सोऊण रायसदं दक्खिणहुत्तं तओ करी चलिओ ।  
 परियत्तंतस्स तओ करिणो सा बालिया पडिया ॥६१२॥  
 दट्ठूण निराबाहं निच्छूढं बालियं भणइ कुमरो ।  
 नाससु वेगा बाले ! जाव करी मह निहित्तमणो ॥६१३॥  
 तो भणइ बालिया सा मज्झ कए तिणसमाणदेहाए ।  
 कलिकप्परुक्ख ! नाससु मा अप्पाणं अहन्नाए ॥६१४॥  
 अह निरवइणा हत्थी पच्छिमभायम्मि ताडिओ रोसा ।  
 वलिऊण निवपहेणं अणुलग्गो वारणो सहसा ॥६१५॥  
 अहिधावंतेण तओ पच्छहुत्तं दिसं नरिंदेण ।  
 सा परिहरिया बाला जोयणमेत्ताए भूमीए ॥६१६॥  
 सममागयं निएउं नरनाहो करिवरंव(ब?)रिल्लेणं ।  
 वेड्डिलियं काऊणं तस्स पुरो विखवइ अक्खेवं ॥६१७॥  
 अह सो वि वणकरिंदो नरिंदबुद्धीए अग्गदंतेहिं ।  
 परिणमइ जाव रोसा दसणग्गनिघिड्डमही(हि)वीढो ॥६१८॥

वीरत्तणेण दक्खत्तणेण दंतेसु नसियपयजुयलो ।  
 कुंभत्थलमारूढो कुमरो तो अग्गभाएण ॥६१९॥  
 जा उड्डइ करिनाहो सधीरपरिधुणियकंधरो तुरियं ।  
 ता उडि(डि)ऊण दूरं पहओ कुंभम्मि कुमरेण ॥६२०॥  
 अइनिट्ठुरचरणपहारताडिओ विरसमारसंतो य ।  
 मुह-करविणितरुहिरो नीहरिओ तप्पएसाओ ॥६२१॥  
 नाऊण समकिलंतं निप्फंदं गलियरोसदीणमुहं ।  
 वणहत्थि चइऊणं अन्नपहेणं गओ राया ॥६२२॥  
 एत्थंतरम्मि सूरुओ अइउन्नयनहसिरम्मि आरूढो ।  
 तक्खेउब्भवतावाओ लोयदुसहो व्व संजाओ ॥६२३॥  
 बहुभूमिधाविणं कढोररविकिरणदुसहतावेण ।  
 तण्हापरिसुसियमुहो उदयं अनि(न्नि)सिउमाढत्तो ॥६२४॥  
 जा थोवंतरभूमिं वच्चइ राया तिसासमक्कंतो ।  
 ता नाइदूरदेसे निसुणइ वीणाज्झणक्कारं ॥६२५॥  
 आणिं(णं)दियसवणिंदियसम(व)णंतरमणविइन्नसंतोसो ।  
 मणसंतोसासाइयसरीरसुहसंगयं गीयं ॥६२६॥  
 सुणिऊण परमपहरिसवसपसरियपुलयकलियदेहस्स ।  
 हरिविक्कमस्स जाओ मणम्मि एयारिसवियप्पो ॥६२७॥  
 निम्माणुसे अरन्ने कत्तो एवंविहं महुरगेयं ।  
 ता होही एत्थ फुडं तहाविहं किंपि सुरभवणं ॥६२८॥  
 इय चिंतिऊण राया तुरियपयक्खेवलंघिअद्धाणो ।  
 जा जाइ थोवदूरं ता पेच्छइ विविहतरुसंडं ॥६२९॥

पुत्राग-नाग-चंपय-पूयप्फलि-फलियकयलि-फणसघणं ।  
 सघणदल-नागवल्ली-लवंगि-कक्कोलिकमणीयं ॥६३०॥  
 खज्जूर-जरढफलरस-दक्खा-सहयारफलभरसमिद्धं ।  
 कपू(प्पू)रतरुनिरंतर-सुयंधकालायरुदुमोहं ॥६३१॥  
 इय विविहसरसदुमवण-मवणिवई तक्खणं निएऊण ।  
 अइसयकोऊहलकलियमाणसो तत्थ संपत्तो ॥६३२॥  
 जा पविसइ दुमसंडं सकोऊ(उ)ओ ताव तत्थ नरनाहो ।  
 पेच्छइ फलिहमयं सो अच्छसिलं देउलं एक्कं ॥६३३॥  
 थंभियमिव सरयब्भं चंदविमाणं व सावपब्भट्ठं ।  
 घणसारतरुसमुब्भवकप्पूरदलेहिं घडियं व्व ॥६३४॥  
 अइसच्छफलिहभित्तित्तणेण सव्वं पि बाहिरिठिएहिं ।  
 अंतट्टियं पि दीसइ बहिट्टियं मज्झसंठेहिं ॥६३५॥  
 न लहइ जत्थ निवासं सिहरम्मि तरूण कुसुमरयनिवहो ।  
 चंदुग्गमससहरकंतसलिलपक्खालिओ संतो ॥६३६॥  
 तो ससहरचरणक्खेवपत्तवियडंगणो पुरो नियइ ।  
 राया फलिहनिबद्धं अइसच्छज्जलं महाबिंबं ॥६३७॥  
 चउदारग्गनिवेशियगोयरपडिबिंबमिसपयासेहिं ।  
 भवणवइविमाणेहिं व जिणसेवाआगएहिं जुयं ॥६३८॥  
 अच्छुज्जलफलिहसिलासोवाणपरंपराहिं संजुत्तं ।  
 निन्नुन्नयबहुविहकय-विभागलहरीहिं व गहीरं ॥६३९॥  
 वियसियसियपंकेरुह-महुमत्तरुणुज्जुणंतभमरगणं ।  
 गायंतं पिव पुरओ जिणस्स बहुएहिं व मुहेहिं ॥६४०॥

इय तत्थ महावावीजलम्मि हरिविक्कमो कयसिणाणो ।  
 संताव-समपमुक्को संपत्तो तक्खणं चेय(व) ॥६४१॥  
 अह तं भवणमउव्वं दट्ठूणं हरिसपुलइओ राया ।  
 पविसइ मज्झे तुरियं करकलियविसट्टकंदोट्टो ॥६४२॥  
 जा नियइ मंडवत्थो गब्भहरं ताव तत्थ जिणपडिमं ।  
 वरपाडिहेरपरिगयमइसयरूवं पलोएइ ॥६४३॥  
 दट्ठूण फलिहनिम्मलमणिघडियं तं मणोहरच्छयं ।  
 जिणदेहकंतिपडिहयमोहतमोहो व्व पूएइ ॥६४४॥  
 संपूइऊण य जिणं पुरओ उवविसइ जायमणसुद्धी ।  
 सिरघडियपाणिसंपुडमह सुमहत्थं थुइं कुणइ ॥६४५॥  
 “तुह नमिमो पयइपसंतरूवसंसियअदोसभावस्स ।  
 निदोसभावसंगयगुणसुरयणरोहणगिरिस्स ॥६४६॥  
 उल्लसिओ तुह मुहचंददंसणा मणमहोयही मज्झ ।  
 कहमन्नहऽच्छिसरिया फुरंति हरिसंसुसलिलमिसा ॥६४७॥  
 तुह कन्नपालिकलियं भूसेवलममलनयणतामरसं ।  
 कंतिजलं वयणसरं संतावं हरइ दिट्ठं पि ॥६४८॥  
 तुह दंसणेण मुणिवइ ! होहिंति न जे विसेसपुलयंगा ।  
 ताण अजोगत्तणओ दंसणमवि तुज्झ अइदुलहं ॥६४९॥  
 दिट्ठो सि जेहिं पुच्चिं जिणेस ! नयणाइं ताइं जायाइं ।  
 पहरिसबाहपवाह-च्छलेण परिगलियपावाइं” ॥६५०॥  
 इय चंदप्पहनाहं असमपहापुंजपरिगयं राया ।  
 थोऊण थंभमूले उवविट्ठो निहियजिणदिट्ठी ॥६५१॥

एत्थंतरम्मि एगा पढमुब्भिज्जंतजोवणारंभा ।  
 बाला वीणावायणविणिउत्तकरंगुली दिट्ठा ॥६५२॥  
 बीयं पुण वरनारिं गब्भहरजिणच्चणेक्कुकयचित्तं ।  
 नीसेसभुवणसमहियरूवाइसयं पुलोएइ ॥६५३॥  
 धणकलसोवरि गंधुदय-भरियखणधरियकलसउत्त्रिविडी (?) ।  
 ण्हवइ जिणं ण्हवणुट्टिय-जलकणकब्बुरियअलयग्गा ॥६५४॥  
 पिहियकरंसुयवयणा मुहगंधघडंतभमरभीयव्व ।  
 परिफुसइ कोमलंचलकरेण जिणणाहतणुसलिलं ॥६५५॥  
 पडिबिंबिया विरायइ अइविमले वीयरायवच्छयले ।  
 जोग्गत्ति कयपसाए जिणेण हियए निहित्ति व्व ॥६५६॥  
 मयणाहिमसिणघणसार-सुरहिसिरिखंडकयसमालहणा ।  
 पंचप्पयारसुकुसुम-दामेहिं करेइ जिणपूयं ॥६५७॥  
 आपायतलविलंबिर-सिरमालंतरतिरिच्छमालाहिं ।  
 सोहइ ससिप्पहजिणो खीरसमुदो व्व लहरीहिं ॥६५८॥  
 सुसुयंधकुसुमपरिमल-मिलंतबहुभसलवारणुज्जुत्ता ।  
 निब्भच्छइ व्व बहुभव-समज्जियं कसिणमलपडलं ॥६५९॥  
 बहुकालायरुदलगंधगब्भिणं उक्खिवेइ वरधूयं ।  
 आरत्तियाइ सव्वं करेइ जिणमंगलीयं सा ॥६६०॥  
 पयडियहिययविसुद्धिं जहत्थजिणनाहगुणमहग्घवियं ।  
 काऊण थुइं पुरओ जिणस्स वाएइ अह वीणं ॥६६१॥  
 पढमं तारसरक्कमसंचलणसमुल्लसंतधीरसरं ।  
 तंतीवसवलियंगुलि-थरहरियसुथूलथणवडं ॥६६२॥

अइसुस्सरगीथरसाणुरत्तसंगलियहरिणविंद्रेहिं ।  
 संमीलियच्छिवत्तं सुव्वइ एगिंदिएहिं व ॥६६३॥  
 इय नाणाविहसरकरण-जाइ-लय-गाम-मुच्छणाणुगयं ।  
 काऊण सरसगीयं अह गायइ पुण इमं दुययं ॥६६४॥  
 “अतिसुकुमारसोणसरलांगुलिपंचकवक्त्रभीषणो  
 नखमणिकिरणजालघनकेसरविसरविशेषभासुरः ।  
 भवगुरुवनविहारिदुरितोद्धटकरटिविषाटनक्षमो  
 दिस(श)तु स वांछितानि चन्द्रप्रभचरणमृगाधिपः सताम्” ॥६६५॥  
 इय गाइऊण दुयइं पुणो पुणो कयमणप्पणीहाणो(णा) ।  
 चरणकमलेसु निवडइ चंदप्पहपरमदेवस्स ॥६६६॥  
 जिणणहाण-पूयणाइसु विणिवेसियतग्गएक्कमण-करणा ।  
 मोत्तुं जिणवावारं अन्नत्थ अचेयणव्व फुडं ॥६६७॥  
 बहुभत्तिब्भरपरवसहियया णहाणाइगीयपज्जंतं ।  
 काऊण जा पलोयइ ता पेच्छइ पिड्डओ रायं ॥६६८॥  
 दट्ठूण सा नरिंदं तह पहरिसपूरभरियसव्वंगा ।  
 जाया जह सेयमिसा नीहरिओ सो अमायंतो ॥६६९॥  
 अह भमरभरोणयपउमपत्तसंपत्तसयलसोहेहिं ।  
 पेच्छइ तिरिच्छवलियद्धकंद्धरद्धंतनयणेहिं ॥६७०॥  
 जो कत्थवि नब्भसिओ अण(णु)हूओ वि हु कहंपि जो नेय ।  
 सो तीए तया जाओ कोवि अउव्वो मणवियारो ॥६७१॥  
 सविलासपेच्छियच्छं पडिनयणनिवायपडिहयप्पसरं ।  
 हरिविक्कमस्स दुसहं तिस्सा अवलोइयं जायं ॥६७२॥

दिडेहिं वि दीहर-भल्लिभासुरुल्लेहिं तीए नयणेहिं ॥  
 तह सु(सू)रो वि कुमारो जह हयहियओ खणं जाओ ॥६७३॥  
 सा लज्जासाहीणा नरिंदमाभासियं(उं) अपारंती ।  
 गहिऊण करे बालं दुइयं सा विसइ गब्भहरं ॥६७४॥  
 सहि ! पडउ मज्झ दुक्खं लज्जावसवेविरा न सक्केमि ।  
 संभासिउं पि दूरे एयस्स विसेसकरणीयं ॥६७५॥  
 सो एस महासत्तो जेणाहं दुडुवारणग्गहिया ।  
 मोयाविया सजीयं तणं व गणिऊण करुणाए ॥६७६॥  
 ता जाहि तुमं बाहिं आसण-संभासणाइववहारं ।  
 कुणसु असेसं पच्छ तंबोल-विलेवणाइ(ई)यं ॥६७७॥  
 इय भणिए सा बाला गहिऊण वरासणं नरिंदस्स ।  
 घणसामलमरगयमत्तवारणे ठ्वइ सप्पणयं ॥६७८॥  
 इह उवविसह पसायं करेह मा अन्ह सामिणीए इहं ।  
 अवराहं गेण्हह देव ! कज्जसज्जेक्कहिययाए ॥६७९॥  
 तो भणइ महाराओ न होंति गुरु-देवकज्जनिरयाण ।  
 अवराहा संता वि हु दूरं दूरेण नासंति ॥६८०॥  
 इह चेव देवदंसण-पवित्तवसुहायलम्मि अच्छिस्सं ।  
 गुरु-देवाणं पुरओ न होइ पडिवत्तिपत्थावो ॥६८१॥  
 तीए परमग्गहेणं उवरोहपरव्वसो नराहिवई ।  
 सीहो व्व उड्डिऊणं उवविड्ढो आसणवरम्मि ॥६८२॥  
 वरफलहघडियतलिया-निहित्तकप्पूरमीसतंबोलं ।  
 सा बालिया पयच्छइ नरवइणो सुसियतालुस्स ॥६८३॥



एयं विलित्तजिणतणु-उव्वरियं देव!सयलदुहहरणं ।  
 अंतो-बाहिरसंताव-पावसमणं समालहणं ॥६८४॥  
 सुविलित्तसयलगत्तो उवओइयतव्विइन्नंतंबोलो ।  
 अणुव्व(व)त्तणाए ताणं नरवालो कुणइ संतोसं ॥६८५॥  
 तयणंतरं च राया दरहसियविणितदसणकिरणोहो ।  
 उद्विसिय लहुयबालं परिहासं काउमाढत्तो ॥६८६॥  
 किं देससमायारो अहवा अम्हे वि अणरिहा एत्थ?।  
 जं तुम्ह सामिणीए संभासणमेत्तकं न कयं ॥६८७॥  
 तो भणइ बालिया सा न याणिमो देव!केणइ गुणेण ।  
 परिवेविरंगलट्ठी सहसा संतोसमुव्वहइ (?) ॥६८८॥  
 परिव्व(व)त्तियव्व अन्ना पडिमव्व सुमंतजणियविप्फुरणा ।  
 आयवपुलट्टपत्ता लयव्व घणसंगसुसिणिद्धा ॥६८९॥  
 परितरलतारउज्जल-विप्फुरियलोयणेहिं क्कु(क)हइ व्व ।  
 पुव्वावत्थविरुद्धं अदिट्टपुव्वं मणवियारं ॥६९०॥  
 ता देव्व(व)च्चणसमए विम्हरियसरीररक्खमंताए ।  
 संकंतो कोवि महा-पयंडगुरुखेत्तवालो सो ॥६९१॥  
 तो भणइ नरवरिंदो उवसामो तस्स होही(हिइ) कहं ति ।  
 अह भणइ पुणो बाला नरवइणो उत्तरं एयं ॥६९२॥  
 एगम्मि पसत्थदिणे तस्स पयंडस्स खेत्तवालस्स ।  
 जाव न नियंगभोगो दिनो(न्नो) ता नत्थि उवसामो ॥६९३॥  
 सहि!एहिं(हि) तुह सरूवं पयासिमो नरवइस्स इय भणिरी ।  
 घेत्तूण अणिच्छंति(ती) उववेसइ सा तयंतियए ॥६९४॥

उवविद्धा निवपुरओ पिड्डडियबालियाए मुहसमुहं ।  
 कारिमकोवुब्भडभिउडि-भासुरं अह पलोयंती ॥६९५॥  
 तो नियइ नराहिवई आपायतलुत्तिमंगमइनिउणं ।  
 तिस्सा तंसडियआणणाए अइसुंदरं रूवं ॥६९६॥  
 अच्छिक्के परमाणुसुहा(?) पसहमीसिरुण जा विहिणा ।  
 निम्मविया सव्वायर-नियसिप्पपयासणत्थं व ॥६९७॥  
 मुहमच्छरं वहतो दलिओव्व पएहिं जीए हरिणंको ।  
 सरलंगुलीसु दीसइ नहत्थला खंडखंडकओ ॥६९८॥  
 दट्ठुं व्व रमणकरिणा जिस्सा जंघोरु-करजुयसमिद्धिं ।  
 इय मच्छरेण नूणं गहिया वणवारणेण तया ॥६९९॥  
 वणकरिणो निविडकरगहेण निप्पीलियं व्व अइत्तणुयं ।  
 मज्झं मज्झडियरोमराइंमि सदाणलेहं व ॥७००॥  
 सोहइ सहावमणहर-गंभीरावत्तसुंदरा नाही ।  
 नीसेसभुयणवेहय-सिंगाररसस्स कूविच्च ॥७०१॥  
 तिवलीमिसेण रेहंति तिन्नि रेहव्व विहिनिहिताओ ।  
 तेलोक्के वि न रूवं अओ परं इय विवेण्ण ॥७०२॥  
 पीणथणाणं उवरिं सोहइ वयणं सहावरमणीयं ।  
 कंचणकलसजुओवरि एक्कं व पिहाणपंकरुहं ॥७०३॥  
 बाहू कप्पलयाओ व कहंति नरकप्पसाहिपरिरंभं ।  
 जीए करपल्लवेसुं दीसइ नहकुसुमसंदोहो ॥७०४॥  
 वयणमिमीए विरायइ कसिणुज्जलकलियकुंतलकलावं ।  
 ससिमंडलं व उवरिं घडंतअइकसिणघणवडलं ॥७०५॥

नयणनईसु य जिस्सा वाहो इव पविसिऊण पंचसरो ।  
 मज्जइ मोत्तूण तडे भूजुवलमिसा वणलयं व ॥७०६॥  
 वयणस्स अलंकारव्व तीए दीसंति सुंदरा दसणा ।  
 सुसिलिङ्कंतिसमया सुसमाहियतेयगुणकलिया ॥७०७॥  
 जीसे सहावसुंदर-मुहम्मि अहरो निसग्गसोणपहो ।  
 कमलडिओव्व सोहइ रत्तुप्पलपत्तसंघाओ ॥७०८॥  
 सोहंति जीए सवणा नयणनइपवहपडिहयप्पसरा ।  
 भूडंडगठियां इव मयणमहावाहपासव्व ॥७०९॥  
 इय जं जं चिय दीसइ सरीरगयमेत्थ अवयवसरूवं ।  
 कप्पलयाए व सव्वं तं तं मणनिव्वुइं कुणइ ॥७१०॥  
 सव्वंगेसु वि अइमहुर-सरस-रमणीयगुणमहग्घविया ।  
 उवभोगसुहासायण-मणोहरा इक्खुलट्टिव्व ॥७११॥  
 उत्तमकुलप्पसूइं तत्थवि रूवं च तं पि गुणकलियं ।  
 आमरणंतो नेहो जुवईण सुदुल्लहं मिलियं ॥७१२॥  
 ता जुवइरयणमेयं संभवइ न जत्थ तत्थ इय रूवं ।  
 कहमिव वणम्मि निवसइ सपच्चवायम्मि, अच्छरियं ॥७१३॥  
 एत्थंतरम्मि एगा समागया तत्थ मज्झिमवयत्था ।  
 तावसवेसा जुवई परिवियडकमंडलुकरग्गा ॥७१४॥  
 अइमसिणवक्कलंसुय-नियंसणा वक्कलंगपंगुरणा ।  
 विविहतवसुसियदेहा पच्चक्खा तावससिरिव्व ॥७१५॥  
 पयपयनिविद्धदिट्ठी बहुतावसनिवहसिक्खणसयण्हा ।  
 अहिधावमाणवणयर-पयडियपडिवालणपसाया ॥७१६॥

सुविसुद्धसीलसाला अविकलकल्लाणकुलहरमुयारं ।  
 अखी(क्खी)णखमाखेत्तं आगारं गुरुगुणगणस्स ॥७१७॥  
 उवसमविलासवसही चड्डुल्लिदियचोरबंधणहडिच्च ।  
 करुणापवाहवहणी मणमक्कडबंधरज्जुच्च ॥७१८॥  
 आगतूण य पंगण-पएसभायम्मि जिणवरगिहस्स ।  
 पक्खालइ चलणजुयं जयणाए कमंडलुजलेण ॥७१९॥  
 अह जिणहरदारठियं तं दट्ठुं ताओ दौवि बालाओ ।  
 ओसरिउ(उं) तुरयपयं गब्भहरं अह पविट्ठाओ ॥७२०॥  
 तो भणिऊण निसीहिं पविसर अभिं(ब्भि)तरं ससंभंता ।  
 कयपंचगप(प्प)णामा थुणइ जिणं परमभत्तीए ॥७२१॥  
 “मोहान्धकारवस(श)वर्त्तिनि जीवलोके  
 दूरप्रलीनपरमार्थपथप्रचारे ।  
 तत्त्वप्रकाशनतया परमोपकारी  
 चन्द्रप्रभो जयति चन्द्रमरीचिगौरः ॥७२२॥  
 यस्मिन्नुदेति हृदि कल्पितमात्र एव  
 विज्ञानवारिधिरधीनसमस्तसम्पत् ।  
 तत्र प्रसा(शा)न्तमुनिमानसराजहंसे  
 चन्द्रप्रभे प्रतिदिनं मम भक्तिरस्तु” ॥७२३॥  
 जा थोऊण नियच्छइ ता पेच्छइ पिट्ठुओ ससंभंता ।  
 सविणयपणामकरणत्थ-मुज्जयं सा महीनाहं ॥७२४॥  
 नरवय(इ)णा वि ससंभम-पणामवसलुलियकेसपासेणं ।  
 बहुभक्तिभरनिरंतर-पुलइयदेहेण पणिवइया ॥७२५॥

'नीसेससुहसमिद्धो भवसु'त्ति विसेसजायहरिसाए ।  
 आसासिओ य तीए सागयवयणं च पुण पुट्ठो ॥७२६॥  
 गब्भहराओ सहसा निगं(गं)तूणं च दोहिं बालाहिं ।  
 आसणपयाणपुव्वं पणमिया तावसी ताहिं ॥७२७॥  
 पढमगहियासणाए नरवालो तीए अणुमओ पच्छ ।  
 उवविट्ठो सप्पणयं कयंजली आसणवरम्मि ॥७२८॥  
 अह भणइ तावसी सा असेसभुवणोवयारिणो तुम्ह ।  
 कुसलं तु सव्वकालं अविकलकल्लाणभागिस्स ॥७२९॥  
 तुम्हारिसाण जम्मो परोवयाराय होइ धन्नाण ।  
 कप्पतरूणं न निए कज्जे संकप्पणारंभो ॥७३०॥  
 परउवयारेक्करयाण जाण दुक्खं सुहं व परिणमइ ।  
 ते कत्थइ य मई मह तुमए पुण सा वि पम्हुसिया ॥७३१॥  
 भुयणेसरो वि संपइ एकुंगो सहसि जयसिरिसहाओ ।  
 दुद्धरिसतेयरासी असेसपरिवारकलिओव्व ॥७३२॥  
 भूसिज्जइ भुयणविहूसणेहिं पुरिसो गुणेहिं भुवणम्मि ।  
 नीसामन्नत्तणओ गुणा वि संभूसिय्क्क तुमए ॥७३३॥  
 उवयरणं पिव अप्पा परकज्जपसाहणेक्कओ जेहिं ।  
 सो पावइ गरुयत्तं तुमं व एयं महच्छरियं ॥७३४॥  
 एवं सा बहुरूवं जह जह सब्भूयगुणगणं थुणइ ।  
 नरवालो वि हु तह तह अहिययरं लज्जिओ होइ ॥७३५॥  
 अक्खिविऊण य वयणं तिस्सा हरिविक्कमो समुल्लवइ ।  
 भयवइ ! के मज्झ गुणा ? अहं च को ? का मम पसंसा ? ॥७३६॥

दोसेसु जा निव्वि(वि)त्ती न सो गुणो मह मणम्मि पडिहाइ ।  
 दोसाभावो जो किर उक्करिसो सो गुणो होइ ॥७३७॥  
 सो कह लहइ गुणित्तं जस्सुवरिं फुरइ अन्नगुणरिद्धी ।  
 तम्हा सो चेय गुणी भुयणे वि न समहिओ जस्स ॥७३८॥  
 इय निग्गुणे वि मारिस-जणम्मि जा तुह गुणित्तपडिवत्ती ।  
 सा पक्खवायबुद्धी अहवा नियसरिसविन्नाणं ॥७३९॥  
 सव्वं पि गुणमयं चिय पडिहाइ जयं विसुद्धहिययाण ।  
 मलिणहिययाण तं चिय सगुणं पि हु निग्गुणं होइ ॥७४०॥  
 इय जावन्नोन्नविसेस-वयणविन्नासरंजियमणाइं ।  
 चिद्धंति खणं, राया ता भणिओ भयवईए पुणो ॥७४१॥  
 इह नाइदूरदेसे तवोवणं अम्ह तत्थ वच्चाओ ।  
 समयंतरम्मि पुणरवि विसेसगोठिं करीहामो ॥७४२॥  
 तुम्ह वयणं पमाणं एवं होउत्ति राइणा भणिए ।  
 पुणरवि पभणइ राया वच्चह अहमागमिस्सामि ॥७४३॥  
 तावसकुमारजुयलं मोत्तुं नरनाहसन्निहाणम्मि ।  
 घेत्तूणं बालियाओ तवोवणं तावसी पत्ता ॥७४४॥  
 रायावि तदुवरोहा तावसजुयलेण परिवुडो चलिओ ।  
 खणमेत्तेण नियच्छइ तवोवणं तावसाइं ॥७४५॥  
 जत्थग्गिहोमसरंभ-सरभसुद्धामवियणपवणेण ।  
 संधुक्किज्जइ मज्झण्ह-होमसालासु हव्ववहो ॥७४६॥  
 गोमयविलित्तपंगण-पएसकुसुमोवयारनिरयाओ ।  
 दीसंति कुमारीओ गुरुसुस्सूसं करंतीओ ॥७४७॥

वणविणियत्ताण जहिं समिहा-कुस-कुसुम-फलभरनयाण ।  
 तावसमुणीण समुहं अहिधावइ कुलवहूसत्थो ॥७४८॥  
 उद्धट्टियदंडीनिहियपट्टिया खेत्तबलिपलोहेण ।  
 निवडियकायब्भ(ज्झ)डप्पण-कयचित्तो धाइ मज्जारो ॥७४९॥  
 मज्झणसमय-संज्ञावंदण-करकलियकुसबुभुक्खाए ।  
 जत्थ मुणीण समाहिं हरति हरिणा न हरिणच्छी ॥७५०॥  
 वानरकरग्गपरिकलिय-करयला अंधतावसा जत्थ ।  
 देवच्चणाइआवासएसु सणियं पयट्टंति ॥७५१॥  
 इय नाणाविहवइयर-संकिन्नतवोवणं नियच्छंतो ।  
 पत्तो तस्सासन्ने परिट्टियं वडतरुं एक्कुं ॥७५२॥  
 एकेण तओ भणियं तावसमुणिणा नरिंद ! खणमेत्तं ।  
 वीसमह खीरघणदुम-छायाए कहेमि जा पुरओ ॥७५३॥  
 गंतूण तेण मुणिणा कुलवइणो पयपणामपुव्वं च ।  
 कहियं जहा नरिंदो नग्गोहदुमं समणुपत्तो ॥७५४॥  
 तव्वयणायन्नणचलियसयलतावससहस्सपरिवारो ।  
 सो 'बब्भु' नामधेयो हरिविक्कमसंमुहं चलिओ ॥७५५॥  
 सा पुव्वतावसी वि हु बहुतावसकुलवहूहिं परियरिया ।  
 दहि-दुव्वंकुर-गोसेयणाईकयअग्घवत्ताहिं ॥७५६॥  
 गंतुं नरिंदपासे कयं च गुरुणावि सयलमग्घाइ ।  
 बहु वंदु(छंद?)घोसमंगल-गेयरवावूरियदियंतं ॥७५७॥  
 चउचरणमुणीसरमहुरमंतकमपाढदिन्नआसीसो ।  
 तावसवहूण विहिणा अणुहूयसुमंगलायारो ॥७५८॥

चलिओ चलंतमुणिवइ-पटुवयणनिवेइयगगसममग्गो ।  
 पत्तो कुलवइउडवगगसंठियं मंडवं गरुयं ॥७५९॥  
 पुव्वोवविट्टकुलवइ-समीववरविट्टरे अणुन्नाओ ।  
 नमिऊण कुलवई(इं) अह नरेसरो आसणम्मि ठिओ ॥७६०॥  
 तयणंतरं च सयलो-वविट्टतावसजणम्मि कुलवइणा ।  
 संभासिओ नरिंदो सरीरसुहकुसलवयणेहिं ॥७६१॥  
 तेणा वि समोणयसिरनिहित्तकरमउलिकयपणामेण ।  
 अज्जं चिय मह कुसलं तुम्ह पसाएण इय भणियं ॥७६२॥  
 परमत्थि किंपि भयवं ! भणियव्वं सव्वहा मह पसायं ।  
 काऊण सुणह एयं विन्नत्तिं अकयमणकोवा ॥७६३॥  
 गुरुणा समणुन्नाओ भणइ नरिंदो मुणिंद ! मह अज्ज ।  
 पढमं चंदप्पहदेव-दंसणे वियलियं पावं ॥७६४॥  
 तयणंतरं च भयवइ-पणामसंपत्तपुण्णअणुहावा ।  
 तुह दंसणं मुणीसर ! संजायं पावपडिहणणं ॥७६५॥  
 पच्छा नीसेसमुणिंद-विंदमुहकमलदंसणेण महं ।  
 भयभीयं पिव पावं सहसा अहंसणीहूयं ॥७६६॥  
 इय एवमाइबहुविह-सुहकारणकलियपुन्नरासिस्स ।  
 एयं चिय मह हियए अणुचियमिव कुणइ संतावं ॥७६७॥  
 नीसेसभुवणपुज्जा तुब्भे मह एत्तियं जया कुणह ।  
 गौरवमगौरवपए तुब्भेहिं तथा अहं खविओ ॥७६८॥  
 जो पूयाणं पूया-अइक्कमो होइ सो तथा तस्स ।  
 चिरसंचियमवि पुन्नं पहणइ आगामुयं दूरे ॥७६९॥



अम्हे कत्थ कुसीला ? तुम्हे पुण कत्थ सीलजलनिहिणो?।  
 मह कहह कत्थ पुज्जो दुस्सीलो सीलवंताण? ॥७७०॥  
 विणयारिहेसु साहसु जुत्ता लुहुडुक्खुडाडु(?) गिहत्थाण ।  
 न उणो जइ न (जईण?) उचिया गिहत्थलोयम्मि कइयावि ॥७७१॥  
 एत्तिमयेत्तेणं चिय लहइ विसुद्धिं गिही असच्चरिओ ।  
 जं कुणइ चरणसेवं सच्चरियमुणीण अणवरयं ॥७७२॥  
 उत्तमगुणाण सेवा गिहत्थलोयस्स कामधेणुव्व ।  
 विन्नाणफला इहइं परलोए सग्गसिवहेऊ ॥७७३॥  
 नीसेसदुक्खविगमो मणसंतोसो विसुद्धबुद्धी य ।  
 नाणाहिगमो तत्तत्थ-भावणा साहुसंगगुणा ॥७७४॥  
 मुणिचंददंसणेणं गिहत्थलोयस्स चंदकंतस्स ।  
 पज्झरइ अदिट्ठं पि हु अंतट्ठियं पावमुदयं व ॥७७५॥  
 उचियायरणेहिं मणागमेत्तियं अणुचियं समायरियं ।  
 तुब्भेहिं मज्झ जं अणु-चियस्स कयमुचियकरणीयं ॥७७६॥  
 इय भणिऊणं विरए नरेसरे सव्वतावसमुणीहिं ।  
 ससिरकं(क्कं)पं विम्हयवसेण दिन्ना नहच्छेडी ॥७७७॥  
 सयलभुवणाहिवत्तं उद्धत्तविवज्जियं न संभवइ ।  
 अह तं पि होइ कहमवि न उणो गुरु-देवपयभत्ती ॥७७८॥  
 एयम्मि पुणो सव्वे परोप्पराबाहविरहिया सुगुणा ।  
 किरि(र)णा हरिणंकस्स व अमयमया कं न सुहयंति ॥७७९॥  
 इय चिंतिऊण निउणं कुलवइणा गरुयपयडियप्पणयं ।  
 भणिउमुवक्कमियमिणं अणाउलं नरवइस्स पुरो ॥७८०॥

नरनाह! निययगरुयत्तणस्स अणुसरिसमभिहियं तुमए ।  
 गुरु-देवनयाण जओ नराण गरुयत्तणं होइ ॥७८१॥  
 परमिह न अम्ह दोसो दोसो तुह चेव एस सब्बो वि ।  
 जेण असाहारणगुण-गणेक्कूठणं कओ अप्पा ॥७८२॥  
 पूइज्जंति गुणा खलु पुरिसेसु परिड्डिया गुणिजणेहिं ।  
 गुणबहुमाणो वि कहं पयडिज्जइ इहरहा ताण ॥७८३॥  
 सामन्ने वि हु अब्भागयम्मि गौरवमवस्स कायव्वं ।  
 किं पुण नीसामन्ने तुमम्मि नरनाह ! न हु जुत्तं ? ॥७८४॥  
 राय त्ति गुरुगुणि त्ति य जयोवयारि त्ति सब्बगरुओ त्ति ।  
 अत्ति(ति)हि त्ति सब्बविहिणा नरिंद ! पुज्जो तुमं चेव ॥७८५॥  
 कमपरिवालियवसुहा-सुहसाहियसयलधम्मकम्माण ।  
 सब्वासमाण राया गुरुव्व परिपूयणिज्जो त्ति ॥७८६॥  
 इय भणिए कुलवइणा सहस त्ति नरेसरेण पुण भणियं ।  
 जुत्तमजुत्तं व इहं कज्जं गुरु(र)वो वियाणंति ॥७८७॥  
 एक्केण तओ सहसा तावसथेरेण कुलवई भणिओ ।  
 पेसिज्जउ नरनाहो वीसमउ सुहेण आवासं ॥७८८॥  
 एवं ति तओ गुरुणा हियए परिभाविऊण पुण भणियं ।  
 वच्छे चंदसिरि ! सयं कुणसु नरिंदस्स करणीयं ॥७८९॥  
 तयणंतरं च भावन्नु-बडुयसमुदायसंजुओ राया ।  
 आवासं कुलवइणा सप्पणयं पेसिओ य गओ ॥७९०॥  
 पत्तो चउक्कथिरचच्चि(वत्थि)यम्मि घणपुप्फपयरपवरम्मि ।  
 परियप्पियसेज्जसुहासणम्मि एक्कम्मि उडवय(उडय)म्मि ॥७९१॥

अह तत्थ सुहनिसन्नो संपाइयसयण-भोयणाइविही ।  
 वीसमइ सुहं सहरिसकयगोड्डी तावसीए समं ॥७९२॥  
 एत्थावसरे सहसा आयढियदीहकिरणरासिच्च ।  
 ओहट्टियगयणवसा ल्हसिओ व्व रवी गओ अत्थं ॥७९३॥  
 अत्थैरिअहिरणीए जलियायसगोलयस्स व रविस्स ।  
 तमघणहयस्स पसरइ फुलिंगनियरो व्व उडुनिवहो ॥९९४॥  
 मह पुत्तस्स न ससिणो जोण्हा विप्फुरइ जाव एस नहे ।  
 इय कलिऊणं सहसा गिलिओव्व रवी समुद्वेण ॥९९५॥  
 अरुणप्पहाहिरामा संझासमयम्मि सहइ वरुणदिसा ।  
 रयणायररयणुब्भव-सोणपहापुंजछुरियच्च ॥७९६॥  
 पसरियपयावपसरे भुयणुवयारिम्मि उवगए मित्ते ।  
 चक्काएहिं व सदुक्खं रुत्तं व सरोवरगएहिं ॥७९७॥  
 तयणंतरं तवोवण-संज्झापसरंतहोमधूममिसा ।  
 वित्थरइ पिहियवसुहा-नहवित्थारो तिमिरनियरो ॥७९८॥  
 एत्थंतरम्मि काणण-विणियत्तियसुरहिरिंभियरवेण ।  
 उच्चुक्कुथणंधयवच्छ-वावडो होइ मुणिनिवहो ॥७९९॥  
 जत्थ मुणिकन्नयाओ गइवसपगलंतकमलसलिलेणं ।  
 सित्तं तरालमग्गा तरुसेयवेहीओ विरमंति ॥८००॥  
 अणवरयसमग्गलसंगलंतवणहरिणरुद्धवित्थारा ।  
 दीसंति तावसाणं उडवगणभूमिपेरंता ॥८०१॥  
 जत्थ नईसु निव्वुड्डण-निरुद्धनीसास-सवण-मुणिकुमरा ।  
 करकलियकुसुद्धभुया जवंति आकंठजलमज्जे ॥८०२॥

सरितीरतावसाणं पक्खित्तकुसुमक्खयघ(घ)सलिलाण ।  
 तरलियपुच्छपरिच्छड-मीणउलं कुणइ दरहासं ॥८०३॥  
 इय नाणाविहनियनिय-वावारपरायणम्मि मुणिनिवहे ।  
 राया बडुगण-तावसि-परिवारो जिणहरम्मि गओ ॥८०४॥  
 जा जाइ पुरो ता तेहिं दोहिं बालाहिं पुव्वविहिणा य ।  
 कयसयलपूयकम्मं जिणनाहं नियइ नरवालो ॥८०५॥  
 तो पणमिऊण परमेसरस्स पाए तिरिच्छवलियच्छं ।  
 पेच्छइ लडहंगनिवेस-सुंदरं पुव्ववरतरुणिं ॥८०६॥  
 अह चिंतइ नरनाहो किमेस जिणपणमणपसाओ ? ।  
 किं वा जम्मंतरसुकय-कम्मफलपरिणई मज्झ ? ॥८०७॥  
 जमिमीए समुच्छुय-मणपसायपरिपेसियच्छिविच्छोहा ।  
 दूयव्व मज्झ हिययं नंदंति अभिद्वंति खणं ॥८०८॥  
 दंसणमेत्ते वि जया अउव्वसुहसंगयं मणं कुणइ ।  
 उवभुत्ता पुण एसा तं किं जं न समहियं काही ? ॥८०९॥  
 अहवा- न सुहाण अत्थि अंतो इमीए मह दंसणेण परिकहियं ।  
 उवभुत्तबहुसुहो वि हु जेण अउव्वं सुहं पत्तो ॥८१०॥  
 संते वि धरावलयम्मि मणहरे लडहरूवजुवइजणे ।  
 सा नत्थि तत्थ का वि हु अणुहरइ इमीए जा नारी ॥८११॥  
 तो तावसी वि सव्वं पूयाइ जहक्कमं करेऊण ।  
 सह बालियाहिं पउणा नरिंदपासं समणुपत्ता ॥८१२॥  
 जाइज्जइ वि तीए संलत्ते बडुयवंद(?द्र)परिवारो ।  
 पत्तो समत्तसंझा-विहिकम्मे आसमपयम्मि ॥८१३॥

गंतूण गुरुसमीवं कयप्पणामेहिं रायपमुहेहिं ।  
 दिन्नासणेहिं सविणय-मुवविट्ठं हिट्ठहियएहिं ॥८१४॥  
 पुट्ठो कुलवइणा वि हु 'राया! कुसलं?' ति, तुह पसाएण ।  
 मह कुसलं ति मुणीसर !, नरवइणा कुलवई भणिओ ॥८१५॥  
 अह सजलजलहरोरालिगहिरमहुरक्खराए वाणीए ।  
 उदिसिऊण नरिंदं कुलवइणा भणिउमाढत्तं ॥८१६॥  
 भुयणाहिवस्स नरवइ भुयणुवयारेकुदित्रहिययस्स ।  
 परदुहदुहियस्स न किंपि अत्थि जं ते अकहणीयं ॥८१७॥  
 कह तम्मि समप्पिज्जइ दुहभारो जो न होइ समहियओ? ।  
 दोलादंडो व्व न जो उभयस्स वि कुणइ समदुक्खं ॥८१८॥  
 कहियम्मि निययदुक्खे जइ वि दुही होइ सज्जणो तहवि ।  
 कहियव्वं जेण दुवे तदुवसमविहीए लग्गति ॥८१९॥  
 तम्हा तुह कहियव्वं जओ महादुक्खजलहिपडियाण ।  
 अम्हाण पुन्नघडिओ नरिंद ! तं जाणवत्तं व ॥८२०॥  
 जं दिट्ठं जं च सुयं जं नियनाणप्पहावओ नायं ।  
 तं चंदसिरीचरियं कहेमि अच्छरियसंजणणं ॥८२१॥  
 इह अत्थि भरहवासे नासिक्कुं नाम पुरवरं रम्मं ।  
 नीसेसनयरगुणगण-विहूसियं ऊसियपडायं ॥८२२॥  
 अइगहिरमहाफरिहा-जलबिंबियभुयणवियडपायारं ।  
 पायालपुरं नरलोय-दंसणत्थं व नीहरइ ॥८२३॥  
 जं बहुपासायसयग्ग-भूमियाकयगवक्खलक्खेहिं ।  
 नियइ व्व कोउहल्ला नियसोहं विमलनयणेहिं ॥८२४॥

सुरपासायनिरंतर-सिहरसियधवलधयपडायाहिं ।  
 रविरहहयाण वियरइ, नहंसरियालहरिसंमोहं ॥८२५॥  
 गोयावरी वि जस्स य पवणवसुवे(व्वे)ल्लुवीइसिहरेहिं ।  
 उव्वत्तमीणनयणा अब्भुद्धियनियइसोहं व ॥८२६॥  
 किं वन्निज्जइ किर तस्स जत्थ लोओ त्तिकालसंझासु ।  
 सिरिचंदप्पहदंसण-पक्खालियकलिमलो वसइ ॥८२७॥  
 तं पालइ परमपुरं नरनाहो निहयसयलपडिवक्खो ।  
 नामेण विचित्तजसो जसभरियदियंतराभोओ ॥८२८॥  
 चउसायर-चउरेहा-समलंकियपुहइमंडलगयाण ।  
 वैरीण नरिदेणं अवणीओ जेण दप्पजरो ॥८२९॥  
 आयासनिहित्तपया अणुरूवसया रिऊ अविस्संता ।  
 रविरहतुरयव्व भया जस्स पलायंति वणगहणे ॥८३०॥  
 जम्मि चलंतम्मि मही तुरयखुरक्खायधूलिवडलमिसा ।  
 काउं व अप्पसरिसे रिउणो समयं समुच्चलइ ॥८३१॥  
 जस्स पयावानलपसरमाण-घणधूमकलुसियाइं व ।  
 पगलंति गलियकज्जल-मच्छीणि महारिवुवहूण ॥८३२॥  
 इय जस्स जसपयावा समयं जोण्हायवव्व ससि-रविणो ।  
 पसरंति एक्कओ च्चिय किं भन्नइ तस्स नरवइणो ॥८३३॥  
 तस्सत्थि विजियतेल्लोक्क-जुवइरूवा पिया नरिंदस्स ।  
 नामेण विजयवई भज्जा नीसेसगुणगरुया ॥८३४॥  
 लावन्नसलिलसरिया पसइपमाणच्छिपत्तलइयव्व ।  
 सुपओहरनहवीही रमणसिलासेलभूमिव्व ॥८३५॥

जीए मुहस्स ससिस्स य न अंतरं किंतु एत्तियं भिन्नं ।  
 संकुइय(यं)कमलसंडं ससिणा नो तीए वयणेण ॥८३६॥  
 पीणुत्तुंगपओहर-पणोल्लिया जीए दोवि बाहुलया ।  
 मूलम्मि निबद्धफला फणसलयाओव्व सोहंति ॥८३७॥  
 गुरुवित्थारा सोहइ जीए नियंबत्थली मणभिरामा ।  
 जत्थ सया कयवासो मयणमउ निवसइ सुहेण ॥८३८॥  
 जिस्सोरुजंघियाओ सुकुमारतलग्गचरणकमलाओ ।  
 तलसंठ्ठियकुम्मघडंत-रंभखंभव्व सोहंति ॥८३९॥  
 आपायमूलसियथूल-मोत्तियाहरणकिरणकब्बुरिया ।  
 जा आणांदियभुवणा सरीरिणी मयणकित्तिव्व ॥८४०॥  
 कह सव्वंगालोयण-सोक्खं पावंति पेच्छ अच्छीणि ।  
 एक्कंगचंगिमाए वि बद्धाइं व जाइ न चलंति ॥८४१॥  
 इय सो सलाहणिज्जं तियसाण वि दुल्लहं विसयसोक्खं ।  
 तीए समं भुजंतो गमेइ कालं सुरवइव्व ॥८४२॥  
 पुव्वकुलक्कमजणिओ विचित्तजसरायसंगलद्धगुणो ।  
 सविवेयनिच्छियमई जिणधम्मे तीए अणुराओ ॥८४३॥  
 अह अन्नया कयाइं चंदप्पहदेवदंसणनिमित्तं ।  
 कुंतीविहारवसहिं विजयवई पत्थिया पव्वे ॥८४४॥  
 चउपुरिसवोज्झकंचण-जंपाणपरिठ्ठिया सह सहीहिं ।  
 बहुसेवयसयसंतय-निवारियासेसपहलोया ॥८४५॥  
 वारविलासिणिकरकलिय-चडुलचमरावलीविलासिल्ला ।  
 पिट्टपरिठ्ठियगायण-गीयरसायत्रणसयणहा ॥८४६॥

किंकरंकरगसंडिय-महरिहपूओवगरणपडलेहिं ।  
 'सर ओसर'त्ति जंपिर-पडिहारेहिं व्व परियरिया ॥८४७॥  
 जा जाइ पुरो तुरियं ता पेच्छइ जिणहरं परमरम्मं ।  
 गोउरदारपरिडिय-बहुमालायारसंकिन्नं ॥८४८॥  
 नीणंत-विसंताणं संघट्टघडंतथोरथणयाण ।  
 जुयईण हरलइया-गलंतमोत्ताहलाइन्नं ॥८४९॥  
 जालंतरविवरवसा बहुविहमिव जत्थ धूवघणवडलं ।  
 जिणदंसणखंडियभव्वलोयपावं व नीहरइ ॥८५०॥  
 अंतोपविट्टसावय-जिणवंदणजाय-अफुडयोसमिसा ।  
 हुंकारिऊण दूरा खिवइव्व कुतित्थगहमोहं ॥८५१॥  
 सहयारसोणपल्लव-तोरणसोहंतसुंदरदुवारं ।  
 नइं नियइ व्व पुणो कोवारुणलोयणेहिं तमं ॥८५२॥  
 पुफ(फ्फ)पगरच्छलेणं वणस्सइजोगिवासभीएहिं ।  
 लुढमाणेहिं व पुरओ जिणस्स कुसुमेहिं सोहंतं ॥८५३॥  
 पुरओ अखंडदीवय-परंपरापयडमंडवपएसं ।  
 बहुजोइगणेहिं व जं सेविज्जंतं फुरंतेहिं ॥८५४॥  
 एवंविहम्मि जिणवर-हरम्मि पविसिय पसंतवावारा ।  
 पूयइ चंदप्पहपाय-पंकयं परमभत्तीए ॥८५५॥  
 कयकुसुमपत्तपूओ मणिभूसणसोणकिरणकब्बुरिओ ।  
 घणकुसुमदुमंतरिओ सहइ जिणो अहिणवससिच्च ॥८५६॥  
 निगंथस्स वि परमेसरस्स पासे सुपरिनिहित्ताइं ।  
 वत्थाइं तीए बहुगुण-सुभत्तिपडलाइ व सहंति ॥८५७॥



एक्रेण चिय सुगुणेण लहइ मलिणो वि उत्तमासंगं ।  
 पेच्छह जिणतणुफंसो कालायरुणा कहं पत्तो ? ॥८५८॥  
 इय एवमाइ बहुविह-महरिहपूयाइ पूइऊण जिणं ।  
 पथुणइ हरिसुग्गयपुलयपडलपरिकरियसव्वंगा ॥८५९॥  
 “तुह नाह ! पयपणामु-ल्लसंतसंतोससुहियहिययाए ।  
 मह परिणयं जमेसा तुह सेवा सयलसुहहेऊ ॥८६०॥  
 न पडंति ते दुरुत्तर-संसारमहोयहिम्मि बहुदुक्खे ।  
 संपडइ जाणवत्तं व जाण पयपंकयं तुज्झ ॥८६१॥  
 तुज्झ नमोत्ति पलत्ते पलाइ दूरेण देव ! दुरियभरो ।  
 जवियम्मि सिद्धमंते भूयवियारा न नासंति ? ॥८६२॥  
 इय तित्थेसर ! नीसेस-भुयणपरमत्थबंधव ! नमो ते ।  
 मोत्तूण तुमं जम्मं-तरेवि मा होउ अन्नमई” ॥८६३॥  
 एवं बहुप्पयारं थोऊण जिणं पराए भत्तीए ।  
 धरंणिनिहिउत्तिमंगा पुणो पुणो पणमइ जिणस्स ॥८६४॥  
 पडिहारदरिसियपहा विविहसहापरिगयस्स सूरिस्स ।  
 निम्मलमइस्स पासं गंतूणं पणमइ पहिड्डा ॥८६५॥  
 गुरुणावि सायरेणं आसासिय धम्मलाहदाणेण ।  
 ‘उवविससु’त्ति सपणयं भणिया उवविसइ चरणंते ॥८६६॥  
 अह भणइ गुरु गंभीर-महुरनिघो(ग्घो)सपूरियदियंतो ।  
 उदिसिउं विजयवइं ललियपयं एरिसं वयणं ॥८६७॥  
 “धत्रा सि तुमं वच्छे ! जा सम्मं जिणवरिंदपयकमलं ।  
 अवहत्थियन्नकज्जा पूएसि पराए भत्तीए ॥८६८॥

इहइं दुरियविणासो परलोए परममोक्खसंपत्ती ।  
 परमेसराण पूया जिणाण तं किं न जं कुणइ ? ॥८६९॥  
 गुणरयणरायहाणी दूरोसारियअसेसमलपडला ।  
 इयरजणे दुद्धरिसा जिणपूया जलहिवेलव्व ॥८७०॥  
 नीसेसभुयणपरिगय-पयत्थसंपाडणेक्कुदुल्ललिया ।  
 संपडइ सपुन्नाणं जिणपूया कप्पवल्लिव्व ॥८७१॥  
 पसमइ पिसाय-साइणि-गह-रक्खस-भूयपभिइभयनिवहं ।  
 पूया जिणेसराणं अइसयविज्जव्व उवउत्ता ॥८७२॥  
 अप्पा न केवलं चिय जिणपूयं पेच्छऊण अन्नो वि ।  
 अणुमोयंतो मणसा सुज्झइ इह नत्थि संदेहो ॥८७३॥  
 उच्छहो मणसुद्धी पवित्तिया सव्वगतलहुयत्तं ।  
 मइपसरो सुहभावो दुरियविणासो य जसकित्ती ॥८७४॥  
 इस्सरियं सोहगं जणाणुराओ कुबुद्धिनासो य ।  
 जिणपूयानिरयाणं अणुहवसिद्धा गुणा एए ॥८७५॥  
 परलोए पुण पूया हिययनिहिता वि कुणइ कम्मखयं ।  
 पुफा(प्फा)इएहिं किं पुण बहुमाणकया सहत्थेणं ! ॥८७६॥  
 वरगंध-वास-कुसुमाई(इ)एहिं नेविज्ज-धूव-दीवेहिं ।  
 फल-जलपत्तेहिं तहा जिणपूया अइहा होइ ॥८७७॥  
 घणसार-हरिणनाही-सुयंधवर-वासखेवपूयमिसा ।  
 जिणपवणसंगमेण व पावरयं दूरमुद्धे(डे)इ ॥८७८॥  
 बहुकुसुमसोहियंगो विणिम्मिओ सुरतरुव्व जेहिं जिणो ।  
 ताण मणचित्तिएहिं विविहेहिं फलेहिं सो फलिही ॥८७९॥

नहकिरि(र)णजले जिणपयसरोवरे अक्खए खिवंताणं ।  
 आकर(रि)सियव्व ताणं मीणिव्व सिरी समल्लियइ ॥८८०॥  
 अइनिम्मलाइं मलिणा जिणंगसंगेण धूवधूमसिहा ।  
 कज्जाइं कुणइ इहयिं भवियाणं गवललेहव्व ॥८८१॥  
 जो देइ दीवयं जिणवरस्स पुरओ पराए भत्तीए ।  
 तेणेव तस्स डज्झइ पावपयंगो न संदेहो ॥८८२॥  
 खणतित्तिएण लब्भइ नेवेज्जेणं जमख(क्ख)या तित्ती ।  
 तं सासयम्भिवसुहत्तित्त-तित्थनाहस्स माहप्पं ॥८८३॥  
 एक्कं पि फलं पुरओ जो ठ्वइ जिणस्स परमभत्तीए ।  
 तस्स फलंति अवस्सं नरस्स सयलाओ वि दिसाओ ॥८८४॥  
 जलभरियपत्तमेत्तो संसारमहोयही फुडं तस्स ।  
 जो ठ्वइ जिणस्स पुरो सीयलजलपूरियं पत्तं ॥८८५॥  
 इय जिणनाहपयच्चण-सच्चरियविसुद्धपावपंकाण ।  
 धन्नाण जंति दियहा तक्कुज्जनिहित्तचित्ताण ॥८८६॥  
 जिणपूया मुणिं(णि)दाणं एत्तियमेत्तं गिहीण सच्चरियं ।  
 एएसु वि जइ भद्धो ता भद्धो सव्वकज्जेसु ॥८८७॥  
 उभयंपि जहासत्तीए कीरमाणं करेइ कम्मखयं ।  
 पावेइ पयट्टंतो विथक्कपहिओ वि नयत्तणं ॥८८८॥  
 तित्थेसराण अइभत्ति-कप्पियं कह वि पत्तखंडं पि ।  
 संसारजलहिपडियाण पोयपत्तं व तं होइ ॥८८९॥  
 इय सव्वपयत्तेणं अविकलसामग्गियं च लद्धूण ।  
 जण-मुणिकज्जेसु सया तदि(दि?)इफला समुज्जमसु ॥८९०॥

खत्तियकुलम्मि जम्मो जिणधम्मो अविचला य तुह भत्ती ।  
 निरवज्जा रज्जसिरी पुव्वज्जियधम्मफलमेयं ॥८९१॥  
 एयवयणावसाणे विजयवई सिरि निहित्तरकमला ।  
 भणइ गुरुं सविसेसं तुम्हाएसं करिस्सामि ॥८९२॥  
 परमेगमजाणंती पुच्छामि अहं कहेह मह एयं ।  
 जइ पुत्विं कयधम्मा कहं न मे पुत्तसंपत्ती ? ॥८९३॥  
 मोत्तुं जिणदंसण-पूयणं च गुरुचरणकमलसेवं च ।  
 सुयविरहियाए अन्नं सव्वं पि दुहावहं मज्झ ॥८९४॥  
 चित्तसमाहाणे सइ रज्जाइपरिग्गहो सुहं जणइ ।  
 उम्मत्तयरज्जं पिव तमन्नहा कुणइ जणहासं ॥८९५॥  
 असरिसजणेण दिन्नं दुव्वयणं पि हु तहा न मे तवइ ।  
 निरवच्चयाए जणिओ वंझासद्धो जहा निसुओ ॥८९६॥  
 अह भणइ गुरू वच्छे ! दुक्खं सवियप्पकप्पियं तुज्झ ।  
 न उणो परमत्थवियारणासु निरवच्चया दुक्खं ॥८९७॥  
 जाव न तुह होइ सुओ पसरइ मोहो न ताव हिययम्मि ।  
 जायम्मि सुए मोहा ममत्ति भावो परे(रो?) होइ ॥८९८॥  
 को तुह परमत्थगुणो उप्पज्जइ तेण किर प्सूएण ।  
 मोत्तुं बाहिरववहार-संगयं लोयवामोहं ॥८९९॥  
 सहलिज्जइ सुयजम्मो एत्तियमेत्तेण जं तओ एत्थ ।  
 अणवच्छिन्नं पसरइ पुत्त-पपुत्ताइसंताणं ॥९००॥  
 अह भणइ पुणो देवी भयवं ! इह मिच्छ(च्छ)दिट्ठिणो केवि ।  
 परलोयसूहो पुत्तो कहमेवं नाह ! पडिवन्ना ? ॥९०१॥

पुत्तो जाओ जम्हा तायइ नरयाओ तेण पुत्तो त्ति ।  
 तव्विरहियाण विफलो इहलोगो तह य परलोगो ॥९०२॥  
 अह भणइ पुणो सूरी सुंदरि ! एयं वि मोहमूढाण ।  
 वयणं जुत्तिविरुद्धं जह होइ तहा निसामेसु ॥९०३॥  
 सब्वन्नुणा पणीयं पमाणमिह जुत्तिसंगयं वयणं ।  
 मूढाण पुणो भण केत्तियाइं वयणाइं सुव्वंतु? ॥९०४॥  
 जीवो अणाइनिहणो पत्तेयमणाइकम्मसंजुत्तो ।  
 के के न तस्स जाया पिय-माइ-सुयाइणो भावा? ॥९०५॥  
 जो च्चेय सुओ संपइ तस्स पिया दुकयकम्मवसवत्ती ।  
 वच्चइ नरयमसरणो न परित्ताणं कुणइ पुत्तो ॥९०६॥  
 पिंडपयाणाईहिं वि न तस्स उव्वट्टणं तओ होइ ।  
 जाव न भुत्तमसेसं नरयाउं पुव्वभवबद्धं ॥९०७॥  
 वच्चउ पहास-कनखल-पयाग-भिगु-सुकुत्तित्थ-गंगासु ।  
 होइ न पियरुद्धरणं जाव न कम्मं समणुहूयं ॥९०८॥  
 उभयखुरी तिलधेणू संडविवाहाइसयलकिरियाओ ।  
 धणलुद्धविप्पयारण-मेयं न उणो तदुवयारो ॥९०९॥  
 अह कहवि सुकयकम्मो-दएण सगगं पयाइ जइ जणओ ।  
 तत्थ वि न पुत्तजणिओ उवयारो तस्स संपडइ ॥९१०॥  
 मणइच्छियसंपज्जंतसयलसोक्खस्स तियसलोयम्मि ।  
 कह अहिलसइ सुएणं निंदियमसणाई(इ)यं दिन्नं? ॥९११॥  
 तम्हा जं जेण कयं सुहमसुहं तव्विहेण चित्तेण ।  
 सो लहह तं तहच्चिय अकारणं पुत्तवामोहो ॥९१२॥

जइ पुत्तो च्चिय पालइ परलोए ता न जुत्तमिह काउं ।  
 देवच्चण-तव-संजम-सुपत्तदाणाइ किरियाओ ॥९१३॥  
 पुव्वभवेसु वि बहवे आसि सुआ कित्त(किंतु?)एत्थ लोयस्स ।  
 तहवि न जा पइदियहं भुत्तं तित्ती न ता वा(या?)ण(?) ॥९१४॥  
 ता सव्वे चिय एए सकामधम्मा अदिट्ठपरमत्था ।  
 एक्को च्चिय मोक्खफलो जिणधम्मो एत्थ संसारे ॥९१५॥  
 ता तत्थ धम्मसीले परमत्थमइं करेसु मा पुत्ते ।  
 ववहारसुहनिमित्तं सो वि तुहं होही(हिइ) अवस्सं ॥९१६॥  
 जम्हा तुहंगगयलक्खणाइं नो वभिचरंति सुयंभावं ।  
 सोऊण अवित्तहं मह वयणं धीरवसु अप्पाणं ॥९१७॥  
 कुणसु सविसेसभत्तिं चंदप्पहनाहचरणकमलेसु ।  
 पूयारिहेसु साहुसु पूयं पि करेहि भत्तीए ॥९१८॥  
 पसमइ वाहिवियारं सवत्तिदोसं च भूयदोसं च ।  
 तित्थयर-साहुपूया कीरंती निययसत्तीए ॥९१९॥  
 अन्नं पि तुज्झ सुंदरि ! साहिप्पइ सप्पहावगुणकलिया ।  
 नामेण वारवासिणि-कोहंडी अत्थि इह देवी ॥९२०॥  
 तं सम्ममणन्नमणो आराहंतो नरो व्व नारि व्व ।  
 पावइ हिययब्भहियं समीहियं नत्थि संदेहो ॥९२१॥  
 पयइउवरोहसीला सा देवी तुज्झविहियसेवाए ।  
 देइ समीहियसिद्धिं भवियाण पुणो विसेसेण ॥९२२॥  
 तं सूरिसमाएसं तह त्ति पडिवज्जिऊण विजयवई ।  
 सविणयकयप्पणाभा तद्विन्नमणा गया गेहं ॥९२३॥

गंतूण सा असेसं गुरूवइडं कहेइ नरवइणो ।  
 तेणावि तहा भणियं ब्र(न) अन्नहा गुरुसमाइडं ॥१२४॥  
 कुणसु पिए ! जिणभवणे अट्टाहियमाइपूयसक्कारं ।  
 देहि जहिच्छं मुणि-साहुणीसु वत्थाइयं दाणं ॥१२५॥  
 अंबादेवीए तहा साहमि(म्मि)यवच्छलाए अणुदियहं ।  
 महरिहपूया विहिणा करेसु भत्तीए पयसेवं ॥१२६॥  
 इयरो वि जणो तूसइ एक्कगमणेण सेविओ संतो ।  
 किं पुण नो दिन्नसुहा दक्खिन्नमहोयही देवी ? ॥१२७॥  
 इय लद्धपियाएसा विसेससंजायपहरिसा देवी ।  
 नियचित्त-वित्तसरिसं जिणपूयं काउमाढत्ता ॥१२८॥  
 जिण-मुणिपूयापयरिस-विसेसपुत्रुज्जलाए देवीए ।  
 दूरेणं चिय नट्टो दुट्टो इव पावपब्भारो ॥१२९॥  
 पंचामय-गंधोदय-विसिद्धद्वेहिं सा जिणं ण्हवइ ।  
 उस्सरइ पुणो तिस्सा कम्ममलो तं महच्छरियं ! ॥१३०॥  
 घणसारमिस्स-वरचंदणेण तित्थेसरं समालहइ ।  
 ओहरइ पुणो तिस्सा पुराकओ दक्खसंतावो ॥१३१॥  
 सियसुरहिकुसुमपरिमल-मिलंतबहुभमरदामपूयासु ।  
 पेच्छइ सुहासुहाणं तव्वेलं मल्लजुज्झं व ॥१३२॥  
 विजयवईनिद्धयं पावं पावत्तणस्स भीयं व्व ।  
 जाइ जिणं चिय सरणं वेविरधूमावलिमिसेण ॥१३३॥  
 इय नाणाविहपूया-मणहरपेच्छणय-नट्ट-गीएहिं ।  
 अणुदियहसमाराहण-विसुद्धहिययाए जंति दिणा ॥१३४॥

पंचमि-दसमितिहीसु य विसेसतवसंजुया य कोहंडि(डिं) ।  
 आराहइ एकूमणा पुव्वुत्तविसेसपूयाहिं ॥९३५॥  
 अत्रम्मि दिणे सियपंचमीए कयजागराए देवीए ।  
 निसि पच्छिमम्मि जामे अंबाए सा इमं भणिया ॥९३६॥  
 दढसम्मत्तगुणेणं जिण-गुरुपयपूयणेण तुह पुत्ति! ।  
 रंजियचित्ता अहयं तुद्ध म्हि वरं वरेसु त्ति ॥९३७॥  
 कारणमिह जिणभत्ती जिणभत्ताणुग्गहम्मि मह बुद्धी ।  
 जिणभत्तिवज्जियाणं मह भत्ताणं पि नो सिद्धी ॥९३८॥  
 जं चित्तिउं न तीरइ अच्छउ वोत्तुं तयं पि पत्थेहि ।  
 संपाडेमि अवस्सं वच्छे ! तेलोक्करज्जंपि ॥९३९॥  
 भासुरसरीरभूसण-पहापरिक्खेवरंजियदियंता ।  
 रायपत्तीए देवी पच्चक्खं तत्थ सच्चविया ॥९४०॥  
 दट्ठूण ससंब्भंता कुणइ पणामं पुणो इमं भणइ ।  
 कुलनहयलहरिणंकं देहि सुयं देवि ! धूयं च ॥९४१॥  
 उभयं पि तुज्झ होही असंसयं जिण-गुरुप्पंसाएण ।  
 इय भणिऊणं देवी तिरोहिया विज्जुलइय व्व ॥९४२॥  
 विजयवई वि य असरिस-संतोसविसेसजायघणपुलया ।  
 काऊण जिण-गुरूणं पूय-पणामं गया भवणं ॥९४३॥  
 नियभत्तुणो वि सव्वं जहट्ठियं साहियं च तेणावि ।  
 भणियं देवि ! असेसं जिण-गुरुपूयाफलं एयं ॥९४४॥  
 ता देवि ! अविसंता तदिद्धफला करेसु भत्तीए ।  
 पूयाइसु सविसेसं समुज्जमं सग्ग-सिवहेउं ॥९४५॥



एवं तिवग्गसुहसंगयाए बुहजणपसंसणिज्जाए ।  
 सफलीकयजियलोया दियहा देवीए वच्चंति ॥९४६॥  
 अह अन्नदिणे देवी रयणिविरामम्मि सुविणयं नियइ ।  
 संपुन्नससिं वयणे पविसंतं कुसुममालं च ॥९४७॥  
 तयणंतरं पबुद्धा पहरिसवसपसरमाणघणपुलइया(पुलया)।  
 विजयवई नरवइणो सविम्हया कहइ जहदिट्ठं ॥९४८॥  
 अह सो असेससत्थत्थ-पारगो भणइ देवि! सुहसुविणो।  
 ससिदंसणेण पुत्तो होही मालाए पुण दुहिया ॥९४९॥  
 तं नरवइणो वयणं तहत्ति पडिवज्जिरुण देवीए ।  
 वत्थंचलेण सहसा तुरियं बद्धो सउणगंढी ॥९५०॥  
 अह तम्मि चेव दिवसे पुव्वज्जियपुन्नरासिपरियरियं ।  
 संकंठं कुच्छीए सुय-धूयाजुयलयं तिस्सा ॥९५१॥  
 गब्भाण(णु)हावओ च्चिय आवंडुसरीरसुंदरा सहइ ।  
 गब्भट्टियपुत्तपयट्ट-सेयजसकिरणच्छुरिय व्व ॥९५२॥  
 अंगीकयभुयणुद्धरण-सत्तिअइगरुयसुयसमुव्वहणा ।  
 अब्भुट्टइ नरनाहं कहकहवि भरालससरीरा ॥९५३॥  
 रेहइ लुढंतहार-पीणुच्चपओहराण जुयलं से ।  
 बहुथन्नभारपसरिय-उट्ठाहो विविहधारं व्व ॥९५४॥  
 पडिभग्गतिवलिवलयं मज्झे दरदीसमाणरोमलयं ॥  
 सहइ व्व तीए उयरं चक्खुभया दिन्नमसिरेहं ॥९५५॥  
 इय पयडियपुन्नविसेस-विविहडोहलयसूइयविभूई ।  
 परिवट्ठिओ सुहेणं गब्भो नरनाहदइयाए ॥९५६॥

अह तीए दसममासे पसत्थतिहि-वार-रिक्ख-लग्गम्मि ।  
 विजयवडए सलक्खण-सुय-धूयाजुयलयं जायं ॥९५७॥  
 तक्खणमेत्तं देवी सुय-धूयाजुयलपरिगया सहइ ।  
 संझासंगयससहर-विहूसिया पुत्रिमनिसिच्च ॥९५८॥  
 परिमियजणप्पवेसं दुवारकयपुत्रकुंभ-बहुरक्खं ।  
 हल्लफलमाइजणणं संजायं सूइयागेहं ॥९५९॥  
 निक्कंपर्इवसिहा-पहापरिक्खेवपसरियालयं ।  
 सुयजम्मजायपहरिस-परवसमिव हसइ सुइभवनं ॥९६०॥  
 वद्धाविउ(ओ)नरिंदो अवरोप्परपरिगयाहिं चेडीहिं ।  
 सुय-धूयाज्ज्मेणं देइ तओ ताण बहुदाणं ॥९६१॥  
 तयणंतरं च राया वद्धावणयं करेइ हरिसवसा ।  
 आणंदियपौरजणं बहुतक्कुयदिन्नधणनिवहं ॥९६२॥  
 करणंगहारमणहर-विलासिणीयणपयट्टनवनट्टं ।  
 विविहसि(?वि?)डिंघिलोट्टिय-खोटीकलयकलयलग्गीरं ॥९६३॥  
 इय एवमाइबहुविह-पेच्छणयविणोयरंजियमणस्स ।  
 समइक्कंतो मासो अदेयच्छत्तस्स नरवइणो ॥९६४॥  
 अह सोहणम्मि दियहे कयपूयापयरिसो जिणिंदस्स ।  
 सम्माणियसयलजणो करेइ नामाइं दोण्हं पि ॥९६५॥  
 चंदप्पहपयपूया-पसायलद्धो त्ति तेण चंदजसो ।  
 पुत्तस्स कयं नामं चंदसिरी नाम धूयाए ॥९६६॥  
 बहुधाइपरिवुडाणं बहुरक्खाकंडकलियकंठणं ।  
 बहुलोयरक्खियाणं वच्चंति दिणाणि ताण सुहं ॥९६७॥

एवं कमेण दोण्ह वि पइसमयपवड्ढमाणदेहाण ।  
 विन्नाण-कलागहणे समओ समुवड्ढिओ ताण ॥९६८॥  
 अह सोहणम्मि दियहे दोवि समं विहियउचियपडिवत्तिं ।  
 जुगवं समप्पियाइं सयलकलाकुसलविबुहाण ॥९६९॥  
 पुव्वभवभत्थाइं व पयइपसन्नम्मि हिययआयरिसे ।  
 पडिबिंबिय व्व ताणं संकंता सयलसत्थत्था ॥९७०॥  
 दिवस-निसाजुयलं पिव लद्धुं रवि-ससहरव्व तं उभयं ।  
 विन्नाण-कलाइगुणो अहिययरं विप्फुरंति व्व ॥९७१॥  
 नीसेसकलापयरिस-विसेसविन्नाणगुणमहग्घवियं ।  
 उभयंपि विबुहमज्झे निदरिसणं जायमच्चत्थं ॥९७२॥  
 अइसयविन्नाण-कला-गुणभवा ताण भुवणमज्जम्मि ।  
 पसरइ अपरिक्खलिया ससहरकरपंडुरा कित्ती ॥९७३॥  
 तं किंपि ताण रूवं जस्स न सुरलोयमज्जयारम्मि ।  
 अणुहरइ सुरो कुमरं कुमरीए पुणो तियसनारी ॥९७४॥  
 पइदियसविसेसमुल्लसंतसव्वंगरूवरेहाण ।  
 चित्तगयपुत्तलाण व उब्भिन्नो जोवणारंभो ॥९७५॥  
 दट्ठूण जमुभयं चिय विलासपरिपेसियच्छिविच्छेहा ।  
 जुयइ-जुयाणा सहसा जायंति पिसायगहियव्व ॥९७६॥  
 सिढिलियसीलाहरणं विमुक्कलज्जंसुयं कयमणेहिं ।  
 आसंधियवयणीयं रूवाइं(इ)गुणेहिं भुयणं पि ॥९७७॥  
 एवं च ताण दोण्ह वि कुलक्कमेणं च पुव्वपुत्तेहिं ।  
 जिणधम्मे बहुभत्ती संजाया लहुयकम्माण ॥९७८॥

अणवरयमणन्नमणाइं दो वि चंदप्पहस्स पयकमलं ।  
 पूयंति संधुणंति य सुणंति जिणदेसियं धम्मं ॥९७९॥  
 अह अन्नया पहाए निव्वत्तियसयलगोसकरणीओ ।  
 अत्थाणे उवविट्ठो विचित्तजसनरवई जाव ॥९८०॥  
 ता सहस च्चिय गयणे गुरुवेयवियंभमाणपवणवसा ।  
 अइउद्धधय-वडायं अवयरमाणं धरणिवट्ठे ॥९८१॥  
 पवणपहल्लिरघंटा-गरुयटणक्कारबहिरियदियंतं ।  
 करकलियचारुचमरं ससिहरविज्जाहरिसणाहं ॥९८२॥  
 अइवेयवसनिवेसिय-चलनयणुव(व्व)त्तकंधराबंधं ।  
 उम्मुहनयरमहाजण-सच्चवियं कोऊ(उ)हल्लेण ॥९८३॥  
 सुव्वंतवेणु-वीणा-मीसियपसरंतगेयज्झं(झं)कारं ।  
 सहस त्ति पुरो दिट्ठं नरवइणा वरविमाणजुयं ॥९८४॥  
 नीहरइ हार-कुंडल-किरीड-कडयंगाई(इ)आहरणा ।  
 दिव्वंसुयनेव्व(व)त्था विज्जाहरकुमरसंघाडी ॥९८५॥  
 आगंतूण य खयरा पडिहारअहिट्ठिए दुवारम्मि ।  
 जाणावह नरवइणो अम्हागमणं पि(ति) पभणंति ॥९८६॥  
 नरवइणा अणुन्नाया पडिहारपवेसिया य ते खयरा ।  
 दिन्नासणा सहेलं कयववहारा उवविसंति ॥९८७॥  
 पणइजणवच्छलेणं विचित्तजसराइणा सपरिओसं ।  
 परिपुच्छिया असेसं कुसलोदंताइ ते खयरा ॥९८८॥  
 तेहिं पि तुम्ह दंसण-पहावओ अज्ज अम्ह कुसलं ति ।  
 भणियं मणागमोणय-वयणेहिं नरेसरस्स पुरो ॥९८९॥

अह नरवय(इ)णा भणियं विज्जाबलसिद्धसव्वकज्जाण ।  
 किं काहामो अम्हे तहावि भण किं करेमि?त्ति॥९९०॥  
 विज्जाहरेहिं भणियं नरवाल ! तए अणन्नहियएण ।  
 सोयव्वो सव्वो वि हु जहवित्तो वइयरो अम्ह ॥९९१॥  
 इह दाहिणह्णभारह-सीमासंभावणाए सुपसिद्धो ।  
 अत्थि गिरी वेयह्णो असेसविज्जाहरनिवासो ॥९९२॥  
 ततत्थि(तत्थत्थि) उत्तरेयर-सेढीसु जहक्कमं वरपुराणि ।  
 पंना(पन्ना)सा तह सट्ठी तेसु पहाणे पुरे दोन्नि ॥९९३॥  
 सिरिगयणसेहरपुरं रहनेउरचक्कुवालनामं च ।  
 तेसु दुवे रायाणो चित्तगई चित्तवेगो य ॥९९४॥  
 भाणुमई तेयमई ताण मणोवल्लहा उ दो भज्जा ।  
 ताणम्हे दोन्नि सुया नामेण असोय-सेहरया ॥९९५॥  
 अन्नदिणे अट्ठावय-सिहरग्गपरिट्ठियाण जत्तासु ।  
 चउवीसजिणाणम्हे दुवे वि सपरिग्गहा चलिया ॥९९६॥  
 पत्ता संपत्तसुरिंद-पारद्धपूयसक्कारं ।  
 नीसंक्कसक्कसरहस-पारंभियगीय-पेच्छणयं ॥९९७॥  
 निव्वत्तियम्मि सुरवइ-पेच्छणये परिगयम्मि सुरसंघे ।  
 जिणपुरओ अम्हेहिं वि पारद्धं तत्थ पेच्छणयं ॥९९८॥  
 उभएसिं पि परिग्गह-लोएहिं कयं जिणस्स पेच्छणयं ।  
 अम्हेहिं दोहिं वि तउ पारद्धं भगवओ गीयं ॥९९९॥  
 अह गाइउं पयत्तो पढमं अहमेव विविहकरणेहिं ।  
 एलेक्कतालिट्ठिकी कुंव(च?)णयनिबद्धसूडेहिं (?) ॥१०००॥

सेहरकुमरेण तओ मह गीयविसेसियं कयं गीयं ।  
 निसुएण जेण दूरं गीयमओ मज्झ वि पणड्ढो ॥१००१॥  
 विरए इमम्मि पुणरवि जिओ म्हि एएण इय मईए मए ।  
 तग्गीयविसेसगुणं जिणपुरओ गाइयं गीयं ॥१००२॥  
 इय अन्नोन्नविवट्टिय(ट्टिय) गुणमच्छरजायछलविवायाण ।  
 दोहिं पि अम्ह जाओ अइगरुओ कलयलो तत्थ ॥१००३॥  
 तयणंतरं च भणिओ सेहरकुमरो मए जहा एत्थ ।  
 किं कलयलेण जामो समहियगुण-सन्निहाणम्मि ॥१००४॥  
 तो सेहरेण भणिओ न मच्चलोयम्मि समहिओ को वि ।  
 इह अत्थि जो अव(जोऽव)णेही मह तुज्झ वि गुणविसंवायं ॥१००५॥  
 एत्थंतरम्मि एगो तव्वेलमुवागओ सुरो तत्थ ।  
 तेणम्हे पडिभणिया नरलोयं कीस निंदेह ? ॥१००६॥  
 इह अज्जवि नरलोए गुणिणो ते संति जाण गुणगरुओ ।  
 चरणरओ वि न सक्का वोढुं विज्जाहर-सुरा वि ॥१००७॥  
 तं सोऊण दुवेहिं वि पुरओ ळऊण तस्स तियसस्स ।  
 भणियं कहेहि को सो गुणाहिओ मच्चलोयम्मि ? ॥१००८॥  
 तियसेण तओ भणियं नासिक्कपुरे विचित्तजसराया ।  
 विजयवई से भज्जा अत्थि सुओ तीए दुहिया य ॥१००९॥  
 चंदजसो चंदसिरी नामाइं कमेण ताण इय होंति ।  
 न हु ताण गुणब्भहिओ पुरिसो जुयइ व्य भुयणम्मि ॥१०१०॥  
 ता दोण्हं पि हु निययं गुणजणिओ एस जो अहंकारो ॥  
 तुम्हं तीसे सो वि हु फिट्ठिहइ न एत्थ संदेहो ॥१०११॥

तं तियसवयणमम्हे सोऊण इहागया तुह समीवं ।  
 ता पत्थिवम(व!अ)म्हाणं दरिसेसु सुयं च धूयं च ॥१०१२॥  
 इय भणिऊण असोओ तुण्हक्को जा खणंतरं होइ ।  
 ता ज्झत्ति ताण सवणे संपत्तो दिव्वगेयझुणी ॥१०१३॥  
 सोऊण महुरमंधर-थिर सुस्सरवित्तेसरमणीयं ।  
 हुफिय-तरलिय-कुरुलिय-गुरु-गमयविभागगंभीरं ॥१०१४॥  
 संमीलियनयणजुया निच्चेद्धा चित्तभित्तिलिहिय व्व ।  
 घणविम्हयं वहंता दोण्हि वि ते भणिउमाढत्ता ॥१०१५॥  
 नूणं गयणंगणगोयराण गंधव्व-किन्नरगणाण ।  
 गीयमिणं न य एवं खेयर-मणुएसु संभवइ ॥१०१६॥  
 ईसि(सी)सि विहसिऊणं विचित्तजसनरवई पुणो भणइ ।  
 उवरिमभूमिए गया चंदसिरी गीयमब्भसइ ॥१०१७॥  
 जइ एसो अब्भासो नरिंद ! ता पयरिसो क्खु को होही!!  
 इय भणिओ पुण खेयर-कुमरेहिं नरेसरो वयणं ॥१०१८॥  
 दरिसेसु नरिंद ! नियं दुहियं तं अम्ह जेण पेच्छामो ।  
 सवणा न केवलं चिय सकयत्थीहोंतु नयणा वि ॥१०१९॥  
 अह नरवइणा तुरियं पडिहारं पेसिऊण चंदसिरी ।  
 सद्दाविया सहरिसं समागया परियणसमेया ॥१०२०॥  
 सव्वावयवसमुज्जल-मुत्ताहलभूसणंसुधवलंगी ।  
 खीरोव(य)हिनीहरिया सिरि व्व पुरिसोत्तिमासाए ॥१०२१॥  
 मागहविलयाविरइय-उद्दाममहाथुईहिं थुवं(व्वं)ता ।  
 सहियायणसंभासण-वसपसरियतरलतारच्छी ॥१०२२॥

नेउरसद्दाकरिसिय-चलणंतवलंतहंससोहिल्ला ।  
 लीलाकमलगकरा देविच्च सरस्सई पयडा ॥१०२३॥  
 संगोयंती सणियं उवरिल्लवरंचलेण सव्वंगं ।  
 मा होउ भुयणखोहो मं दट्ठुं इय मईए व्व ॥१०२४॥  
 पूइज्जंती सहरिस-विसेसविसयंत(वियसंत)नयणकमलेहिं ।  
 समकालनिवडिएहिं जणस्स पच्चूससंज्ज व्व ॥१०२५॥  
 संजीवियं व्व सहसा असोय-सेहरयनयणमीणेहिं ।  
 कुट्टाणताविएहिं व चंदसिरीसरिनिवाएण ॥१०२६॥  
 अह ताण रूव-जोव्वण-विज्जा-विन्नाण-गुण-अहंकारा ।  
 चंदसिरिदंसणेणं निमीलिया कमलसंडव्व ॥१०२७॥  
 पेच्छंताणं तिस्सा अच्चब्भुयमुत्तरोत्तरसरूवं ।  
 दोण्हं पि न तच्चिसया हिययवियप्पा समप्पंति ॥१०२८॥  
 तिस्सा रूवनिरूवण-पवरसहिययाण ताण दोण्हं पि ।  
 किं कज्जा ? कत्थ व ? के अम्हे ? एयं पि वीसरियं ॥१०२९॥  
 तयणंतरंब-पिउणो पणामपुव्वं पकप्पिए पुव्विं ।  
 सा नरवइआसन्ने उवविट्ठा आसणवरम्मि ॥१०३०॥  
 दट्ठूणं चंदसिरिं एवं ते चित्तिउं समाढत्ता ।  
 किं निफ(निप्फ)लेण इमिणा कज्जं किर गुणविवाएण ? ॥१०३१॥  
 गुणगरुयजणस्स पुरो लज्जिज्जइ निग्गुणेहिं वोत्तुं पि ।  
 लज्जायरेण किं पुण वियारअखमेण वाएण ॥१०३२॥  
 सो सयलगुणनिहाणं सफलो तिस्सेव एस संसारो ।  
 जो 'पिय' सहं लहिही इमीए तेलोक्कसाराए ॥१०३३॥



तयणंतरं असोओ चित्ते चित्तेइ जाव सेहरओ ।  
 इह चिहुइ ताव न मे निव्विग्घं होइ चंदसिरी ॥१०३४॥  
 ता कह वंचेमि इमं विज्जा-सारीरबलसमब्धि(ब्धि)हियं ।  
 सेहरयं समरंगण-लद्धजयं सयलजयसुहडं ॥१०३५॥  
 एत्थंतरम्मि सहसा गयणाओ विणितरुहिरपब्भारं ।  
 दट्ठोद्धभिउडिभीमं अत्थाणे निवडियं सीसं ॥१०३६॥  
 घोलंतकन्नकुंडल-किरीडमणिसोणकिरि(र)णविच्छू(च्छु)रियं ।  
 पडिवक्खकोवहुयवह-कवलियमिव वहइ अप्पाणं ॥१०३७॥  
 तलगयमउडनिवेसं उद्धट्टियवयणभासुरं सहइ ।  
 छिन्नं पि हु रोसवसा नियइ व्व नहम्मि पडिवक्खं ॥१०३८॥  
 तं सेहरेण सहसा हाहत्ति पजंपिरेण सच्चवियं ।  
 निउणयरनिहियनयणं ससंकमिव पभणियं एयं ॥१०३९॥  
 नहसेहरस्स एयं सीसमहो ! केण पावकम्मेण ।  
 मह लहुयभाउणो इह निवाडियं धरणिवट्ठम्मि ? ॥१०४०॥  
 तयणंतरं च तस्स य मणदइया पणइणी विणयलच्छी ।  
 नामेण समोइन्ना गंडंतलुलंतघणकेसा ॥१०४१॥  
 हा अज्जउत्त ! गयणे वच्चंताणम्ह चंडवेगेण ।  
 तुह समुहमागएणं भण कीस निवाडियं सीसं ? ॥१०४२॥  
 अह सेहरो रुयंती(तिं) भाउज्जायं नियच्छिउं तयणु ।  
 दढ्जायपच्चओ सो कोवारुणलोयणो भणइ ॥१०४३॥  
 मा रुयसु तुमं सुंदरि ! मगं मह कहसु जेण सो नट्ठो ।  
 इय सेहरेण भणिया रुयमाणी सा इमं भणइ ॥१०४४॥

हंतूण मज्झ दइयं उत्तरहुत्तं च सो गओ पावो ।  
 इ[इ]भणिए सेहरओ उप्पइओ गयणमग्गम्मि ॥१०४५॥  
 भज्जा वि तस्स सीसं घेत्तूण विमुक्ककरुणआक्कंदा ।  
 तस्साणुमग्गलग्गा उप्पइया गयणमग्गम्मि ॥१०४६॥  
 सव्वेहिं(हि)वि तं दट्ठुं नरिंदमाइ(ई)हिं वइयरमउव्वं ।  
 अणुसोइया सदुक्खं विणयवई तीए भत्ता वि ॥१०४७॥  
 एत्थंतरम्मि पुरओ चंदसिरी संतियं असोयस्स ।  
 दट्ठूण वरविमाणं कोऊहलतरलिया भणइ ॥१०४८॥  
 ताय ! किमेयं पुरओ मणिमयसिहरुच्छलंतकिरणेहिं ।  
 विणयरमयूहसमुहं किरइ व्व समच्छरं रोसं ॥१०४९॥  
 ईसीसि विहसिऊणं चंदसिरी राइणा इमं भणिया ।  
 पुत्त(त्ति)य ! विमाणमेयं एयस्स असोयखयरस्स ॥१०५०॥  
 हियइच्छियं पएसं पुत्त(त्ति)य ! पावंति एयमारूढा ।  
 अइसयपहावविज्जा-देवीण गुणाणुभावेण ॥१०५१॥  
 एत्थंतरम्मि भणिया चंदसिरी सहरिसं असोएण ।  
 जइ तुज्झ कोऊ(उ)हल्लुं ता सुंदरि ! गेणहसु विमाणं ॥१०५२॥  
 तयणंतरं सलज्जं ओणयवयणाए तीए सो भणिओ ।  
 अम्हाण निरुवओगं विमाणमेयं महाभाग ! ॥१०५३॥  
 तुम्हारिसाण सुंदर ! सैरविहारीण एयमुवउत्तं ।  
 कुलबालियाण न उणो सासो वि परव्वसो ताण ॥१०५४॥  
 किं पलविएण ? सुंदरि ! दिन्नमिणं तुज्झ गयणभमणत्थं ।  
 इय भणिऊण असोउ(ओ) सहसा अदं(दं)सणीहूओ ॥१०५५॥

तं तस्स उदारासय-ववहरणं पेच्छिऊण खयरस्स ।  
 नरवइपमुहाण मणे संजाओ गुरुचमक्कारो ॥१०५६॥  
 तो नरवइणा भणिया चंदसिरी पुत्त(त्ति)! गेण्हसु विमाणं ।  
 तुह पुन्नफलं एयं उवडियं किं वियारेण ? ॥१०५७॥  
 एवं ति पभणिऊणं चंदसिरी राइणा अणुन्नाया ।  
 नमिऊण गया जणणी-पासम्मि सहीहिं परियरिया ॥१०५८॥  
 तयणंतरं नरिंदो नमंतसामंतमौलिमालाहिं ।  
 कयचरणकमलपूओ विजयवईए गउ(ओ) पासं ॥१०५९॥  
 तत्थ वि असोय-सेहर-विज्जाहरवइयराणुवाएण ।  
 जावच्छइ खणमेत्तं पियाए ता सो इमं भणिओ ॥१०६०॥  
 नरनाह ! नियपरिग्गह-पउरजणेणं च परिगया धूया ।  
 वच्चउ पहायसमए कीलुज्जाणं विमाणेणं ॥१०६१॥  
 तो नरवइणा भणियं किं कोइ पिए!महोच्छवविसेसो ।  
 पच्चूसे जत्ता वा विसेसओ कस्स वि सुरस्स ? ॥१०६२॥  
 अहव विमाणारोहण-कोऊहलपरव्वसाए धूयाए ।  
 अब्भत्थिया सि सुंदरि ! तेण तए अहमिमं भणिओ ? ॥१०६३॥  
 तो भणइ रायपत्ती न घडइ पुव्वुत्तकारणवियप्पो ।  
 नरनाह ! अत्थि गरुयं अन्नं चिय कारणं किं पि ॥१०६४॥  
 ता कहसु त्ति पभणिए नरिंदचंदेण भणइ विजयवई ।  
 तुच्छे वि रयणलाहे महोच्छवो होइ कायव्वो ॥१०६५॥  
 किं पुण असेसभुयणं-तरालपरिभव(म)णपवणवेगस्स ।  
 अइसयविज्जादेवी-समहिडियगुरुपहावस्स ॥१०६६॥

एयस्स देव ! लाहे विमाणरयणस्स सो न कायव्वो ?  
 जस्साणुहावओ किर मह धूया खेयरी होही ॥१०६७॥  
 अब्रं च होइ पयडो निक्कारणवच्छले असोयम्मि ।  
 असरिसगुणबहुमाणो एयनिमित्तुच्छवमिसेण ॥१०६८॥  
 इय नाह ! सबुद्धिवियप्पिएण परिभावियं मए एयं ।  
 परमत्थनिच्छएणं तुम्हाएसो पमाणं मे ॥१०६९॥  
 तो नरवइणा भणियं साहु पिए ! साहु संगयं भणियं ।  
 परमत्थो च्चिय एसो किं कीरउ देहि आएसं ॥१०७०॥  
 तो पिययमाए भणियं पडिहारमुहेण नयरमज्झम्मि ।  
 उज्जाणे पयडिज्जउ चंदसिरीकीलणदिणोओ ॥१०७१॥  
 एवं ति तत्थ भणितं नरवइणा कारियं असेसं पि ।  
 तव्वावारपरस्स य तस्स दिणो ज्झत्ति बोलीणो ॥१०७२॥  
 पच्चूसे चंदसिरी कीलुज्जाणं विमाणमारूढा ।  
 जाहीयइ(?) नयरजणो हरिसेण समुच्छुओ जाओ ॥१०७३॥  
 अइसयकोऊहलहियय-तरलिमाविनडियाण लोयाण ।  
 कहकह वि अइक्कुंता रयणी संवच्छरसयं व ॥१०७४॥  
 रयणीए महातमभूइपडलपिहिओ किसाणुपिंडो व्व ।  
 संझाए कुलवहूए व पयडिज्जइ दिणयरो गोसे ॥१०७५॥  
 एत्थंतरम्मि उइए सहस्सकिरणम्मि पयडियपयावे ।  
 उववणगमणपओयण-तुरियपओ भमइ पुरलोओ ॥१०७६॥  
 उच्छक्कुदासि-दासं सविसेसपसाहणुज्जयजुवाणं ।  
 सज्जिज्जमाणकरि-तुरय-संदणं राउलं जायं ॥१०७७॥

१. इयं गाथा सायं प्रातःसन्ध्ययोर्वर्नको द्रष्टव्यः ॥ (टि. खंता. प्रतौ.)

अह विहियगोसकिच्चो राया सामंत-मंतिपरियरिओ ।  
 उच्छववावारनिरूवणेण पज्जाउलो जाओ ॥१०७८॥  
 संमुहनिहित्तलोयण-नियोयवग्गस्स दिन्नआएसो ।  
 जहजोग्गपुरपरिग्गह-बहुविहसंपेसियपसाओ ॥१०७९॥  
 अणुरुवनिरूवियहरि-करिंदसंदोह-संदणसमूहो ।  
 सरहसविलासिणीयण-विइन्नदिव्वंसुयाहरणो ॥१०८०॥  
 अवरोहचेडियायण-कन्नंतकहिज्जमाणनियकज्जो ।  
 तदि(दि?)न्नहिययनरवइ-पसंत विन्न चुय(पसंत चित्तभुय) समूहो ॥८१॥  
 इय नीसेसंतेउर-नियपरियणपौरपेसणसयणहो ।  
 जावच्छइ नरनाहो ता चंदसिरी तहिं पत्ता ॥१०८२॥  
 मयणाहिमीसघणसार-सुरहिसिर(रि)खंडकयसमाहलणा ।  
 फंसाणुमेयसुनियत्थ-दिव्ववरवत्थजुयलिल्ला ॥१०८३॥  
 पच्चंगघणपरिद्विय-सुसोह-सुमहग्घमणिमयाहरणा ।  
 उभयंतवरविलासिणि-करकलियचलंतसियचमरा ॥१०८४॥  
 तो पिउपणामपुव्वं पुव्वपरिद्विवियविद्वरे तयणु ।  
 उवविद्व चंदसिरी सिरि व्व सोहासमुदण ॥१०८५॥  
 परियणियमेत्तं चिय पुरओ पसरंतकिरणवित्थारं ।  
 परिसंद्वियं सहेलं विमाणरयणं नरवइस्स ॥१०८६॥  
 पुत्ति!मह गोत्तनहयल-बीयंदुकल व्व जणसमूहेण ।  
 वंदिज्जंती गयणे गच्छ तुमं वरविमाणेण ॥१०८७॥  
 एयाओ जणणीओ सविलासविलासिणीओ एयाओ ।  
 एसो वि मंति-सामंत-पभिइ सयलो परियणो वि ॥१०८८॥

एसो वि पुत्ति ! तुह गुण-गणाणुरायरसिउ असेसपुरलोओ ।  
 संचलिओ सह तुमए सविसेसपसाहणो तुरियं ॥१०८९॥  
 इय भणिया चंदसिरी पिउणा कयसयलमंगलविहाणा ।  
 लद्धाएसा सणियं विमाणसमुहं तओ चलिया ॥१०९०॥  
 एत्थावसरे पसरइ पडुपडहमउंद-मद(द्व)लगहीरो ।  
 पडिसद्वखुहियनहयल-वित्थारो बार<sup>१</sup>(?धीर?)तूररवो ॥१०९१॥  
 चलिओ चलंतपरिवियड-करडिसंघडियघणघडानिवडो ।  
 परितरलतुरयसंदण-संमद्वनिरुद्धजणपसरो ॥१०९२॥  
 संवगियवग्गावस-निरुद्धगुरुवेयबहुतुरंगबलो ।  
 धाणुकु-कुंत-फारकु-फारपाइकु-कयतुमुलो ॥१०९३॥  
 पडुरवपडिहारसमुल्लसंतहक्काण्हासंतघणलोओ ।  
 नीहरइ निरंतररुद्धनयरमग्गो बलसमूहो ॥१०९४॥  
 एत्थावसरे नीसेस-लोयलोयणविलासवसहि व्व ।  
 आरूढा चंदसिरी सविलासं वरविमाणम्मि ॥१०९५॥  
 अह तत्थ मणिविमाणे भित्तिथलसंकमंतपडिबिंबा ।  
 एक्का वि सा विरायइ बहुसरिससहीहिं सहिय व्व ॥१०९६॥  
 अह तीए हिययभूया विलासलच्छी य चमरधारिदुगं ।  
 तंबोलवाहिणी तह इयमेत्तो परियणो चडिओ ॥१०९७॥  
 संचलइ अचालियतणु-विभायमविकंपसीसकुसुमोहं ।  
 लोयाणुरोहओ बहु-जवं पि मंदं मणिविमाणं ॥१०९८॥  
 परिमंदमारुयंदोल-माणसिहरग्गधवलधयनिवहं ।  
 चंदसिरिसंगमुल्लसिय-हरिसपसरं व्व नच्चेइ ॥१०९९॥

अरुणमहामणिघणकिरण-नियरवित्थारंजियदियंतं ।  
 मञ्जुडियचंदसिरि-अणुरत्तमसोयहिययं व ॥११००॥  
 अह तत्थ नायरजणो विमाणनिक्खत्तनयण-मणपसरो ।  
 सुवियक्खणो वि जाओ उद्धमुहो पामरजणो व्व ॥११०१॥  
 इय तं विमाणरयणं अणुच्चनहगमणलद्धसोहग्गं ।  
 सव्वजणसमुदएणं सहागयं सुंदरुज्जाणे ॥११०२॥  
 जं सहइ सरसघणसोणपल्लुवुल्लसियविविहतरुरायं ।  
 चंदसिरीदुल्लहदंसणाणुरायं व पयडंतं ॥११०३॥  
 नाणाविहवियसियसेय-कुसुमदलगंधलुद्धभमरउलं ।  
 विउरुव्वियनयणेहिं च नियइ व्व सुरुव्वचंदसिरिं ॥११०४॥  
 वियसंतसरसतरुनियरमंजरीजालजडिलियाधययं(?) ।  
 चंदसिरीसंगमसंभवंत-पुलयं व जं सहइ ॥११०५॥  
 पवणुद्धुयपुप्फपराय-पडलपरिपिंजरंतरदियंतं ।  
 जं किरइ रायधूया-महंमि पिट्ठाय चुन्नं व ॥११०६॥  
 इय तम्मि विविहतरुसंड-मंडलीपुव्वसंठियजणम्मि ।  
 उज्जाणे पविसइ खुडिय-फुल्लपयरच्चिए बाला ॥११०७॥  
 अह पेच्छइ नाणाविह-वइयरपेच्छणय-रास-हासघणं ।  
 उज्जाणं चंदसिरी नहसंठियवरविमाणठिया ॥११०८॥  
 तो चंदसिरी भणिया विलासलच्छीए पेच्छ सहि ! एत्थ ।  
 साहीणपिययमजणो कह कीलइ तरुणजुयइजणो ॥११०९॥  
 घणकत्थूरीकसिणंगरायपरिवत्तियंगसड्भावो ।  
 वेलवइ अन्नपुरिस-त्तणेण इह कोइ नियदइयं ॥१११०॥

अन्नत्थ सहियणपुरो पेच्छ लयंतरियतरुणपुरिसेहिं ।  
 सुव्वइ नियनिसिकलहो पयडिज्जंतो पिययमाहिं ॥११११॥  
 मोग्गर-पहार-मालइकुंडल-सयवत्तसेहराइकयं ।  
 पुप्फाहरणं कत्थइ कोइ नरो कुणइ दइयाए ॥१११२॥  
 अन्नत्थ कोइ तरुणो परोप्परुन्नमियचिबुयघडियमुहं ।  
 दइयागंडूसकयं पियइ महुं पेच्छ रागंधो ॥१११३॥  
 इह भणइ कावि दइयं पउड्डपुलइएण लक्खिओ मुंच ।  
 किं नाह ! निप्फलेणं छलनयणपिहाणकोट्टेण(?) ॥१११४॥  
 आयासइ सेयजलोल्लिएसु दइयाथणेसु अप्पाणं ।  
 इह कोइ पुण लिहंतो कत्थूरियपत्तभंगविहिं ॥१११५॥  
 एवं तुज्झ महोच्छव-च्छलेण घणपत्तदुमलयंतरिओ ।  
 इह पेम्मपराहीणो कीलइ बहुमिहुणसंघाओ ॥१११६॥  
 इय जाव विविहवइयर-निरंतरं नियइ सा वरुज्जाणं ।  
 पत्तावसरं भणिया विलासलच्छीए ता एवं ॥१११७॥  
 तुह सहि! साहावियबुद्धिपसरविन्नायवत्थुत्ताए ।  
 अम्हारिसोवएसो परिहासो होइ ता होउ ॥१११८॥  
 तुह चेव पुन्नपरिणइ-पणाभियासेसगुणसमुग्घायं ।  
 मणुयत्तणं तिणीकय-सुरविलयं सहइ भुयणं पि ॥१११९॥  
 संसारजुन्नरन्नं निप्फलमच्छायमासयविहीणं ।  
 कप्पलइया व तुमए विहूसयं भुयणसाराए ॥११२०॥  
 न गुणेहिं विणा रूवं रेहइ हरिणच्छि! जइ वि सविसेसं ।  
 उभयं पि न सलहिज्जइ जं न जणइ जणचमक्कारं ॥११२१॥  
 तुह पुण सव्वंगविसेस-चंगिमानिरुवमाणभिह रूवं ।



सुमिणंतरदिट्ठाए जइ तुज्झ परं समं होइ ॥११२२॥  
 पियसहि! ते तुज्झ गुणा कह वन्नओ(उ) मारिसो जणो तुच्छे ।  
 जे तियस-खेयराण वि हणंति गुणगव्वमाहप्यं ॥११२३॥  
 इय तं सव्वं तुह सहि! मन्नामि न हिययवल्लहविहीणं ।  
 जं चित्तलिहियनारी-सरिसं संभोगसुहविमुहं ॥११२४॥  
 किं निप्फलेहिं सुंदरि! गुणेहिं अणुरत्तबहुजणेहिं पि ।  
 पइसमयं न निबज्झइ गुणन्नुओ जेहिं नियदइओ ॥११२५॥  
 एयं चिय मह दुक्खं जं तुह लायन्नगुणमहग्घवियं ।  
 रत्तलयाकुसुमं पिव विफलं सहि! जोवणं जाइ ॥११२६॥  
 जम्मो वि तस्स विफलो न जस्स गिहिणो हवंति जहसमयं ।  
 धम्मत्थ-काम-मोक्खा, परोप्पराबाहपरिहीणा ॥११२७॥  
 ता सहि! कुणसु पसायं अहिरमसु जहासुहं सह पिण्ण ।  
 पावउ को वि चिरज्जिय-त्तवोफलं तुज्झ लाहेण ॥११२८॥  
 सहि! किं न पेच्छसि इओ एयाउ समं समाणहियएहिं ।  
 कीलंति पिययमेहिं कयचाडुसएहिं तरुणीओ ॥११२९॥  
 एयाण तिहुयणं पि हु दुहियं पडिहाइ निययसोक्खेण ।  
 तम्हा सव्वसुहाणं होइ निहाणं पिओ एकूओ ॥११३०॥  
 किं तेण नवर! कज्जं रज्जेण वि पियपसंगरहिण्ण ।  
 रोरत्तं पि हु रज्जं अणुकूलपियाणुराण्ण ॥११३१॥  
 तम्हा रायकुमारो विज्जाहरदारओ व्व अन्नो व्व ।  
 जो तुज्झ हिययदइओ तं कहसु अवस्स आणेमि ॥११३२॥  
 इय भणिए ससिणेहं विलासलच्छीए भणइ चंदसिरी!  
 सहि! सव्वं पि कहिस्सं परिसविसुद्धीए हिययगयं ॥११३३॥

एत्थावसरे दोहिं वि उज्जाणे जाव पेसिया दिड्डी ।  
 समुहमवलयंती विजयवई ताव सच्चविया ॥११३४॥  
 जा अवयरणमणाओ अहो निरिक्खंति ता विमाणंति(पि) ।  
 सहस त्ति समोइत्रं विजयवईसन्निहाणम्मि ॥११३५॥  
 नीहरइ तओ बाला रणंतमणिमेहला विमाणाओ ।  
 पणमइ पणामघोलिर-हारलया निययजणणीण(ए) ॥११३६॥  
 अह भणइ रायमहिंसी चंदसिरि! इमाओ तुह वयंसीउ ।  
 एसो वि परियणो तुह अहं पि अंतेउरसमेया ॥११३७॥  
 एसो वि लडहवेसो सविलासविलासिणीयणो पुत्त(त्ति)! ।  
 अणुकड्ढयं व अंधो अणुसरइ तुमं समग्गो वि ॥११३८॥  
 तुह पुत्त! पुण असेसं वीसरियं वरविमाणचडियाए ।  
 भूगोयरेहिं अहवा का गणणा खेयरगणस्स? ॥११३९॥  
 इय भणिऊणं देवी वयणं परिहासपेसलं धूयं ।  
 उज्जाणकीलणत्थं अणुमन्नइ परियणसमेयं ॥११४०॥  
 परिपेसियपाडुयजण-परिओसपहरिसं जायं(?) ।  
 बहुखज्जपेज्जदिज्जंत-भोज्जसंतुड्ढमिह भुवणं ॥११४१॥  
 एत्थंतरम्मि पसरिय-हरिसवसुल्लसियकलयलगभीरं ।  
 उद्दामसहमदल-मउंद-पडुपडहघणरावं ॥११४२॥  
 उच्चिल्लिरबाहुलयं रसणामणिकिरिणकिंकिणिकलावं ।  
 झणझणिरचरणेउर-रवबहिरियदसदिसिविभायं ॥११४३॥  
 वरवेणु-वल्लईमीस-पेसलुल्लसियगमयगीयरवं ।  
 पारद्धं पेच्छणयं पेच्छयजणजणियअच्छरियं ॥११४४॥  
 अन्नत्थ जुन्नमइरा रसपाणमयारुणच्छिवत्ताणं ।

वल्लीण व विलयाणं विलासपरिवेल्लियं सहइ ॥११४५॥  
 कत्थइ विच्छन्ननियंबबिंबसंबाहतुट्टमणिद्वा(दा)मं ।  
 करतालवसविसंतुल-घडंतमणिकंकणरविल्लं ॥११४६॥  
 आबद्धनिबिडमंडलि-विलासिणीव(ध)रियधुवयवरगीयं ।  
 लडहंगचलणपरिभवण-मणहरं रासयं देति ॥११४७॥  
 अन्नत्थ सरसकुंकुम-मयणाहिविमीसचंदणरसद्धे ।  
 तरुणीउ कणयसिंगे गहिऊण करंति सिंचणयं ॥११४८॥  
 तक्रालबहलकुंकुम-रसारुणो सहइ तरुणसंघाओ ।  
 कीलाणुरायसायर-सव्वंगनिमग्गगतो व्व ॥११४९॥  
 इय नाणाविहमणहर-विणोयसयजायदेहखेयाए ।  
 तो चंदसिरीए सयं विलासलच्छी इमं भणिया ॥११५०॥  
 सहि!एहि परमरम्मं नाणाविहदुमसमूहसंकिन्नं ।  
 दरिसेहि मज्झ सव्वं पुरोड्डिया मणहरुज्जाणं ॥११५१॥  
 तो चंदसिरी परिमिय-परियणपरिवारिया सह सहीहिं ।  
 घणवल्लिलयागहणं उज्जाणं भमिउमाढत्ता ॥११५२॥  
 आयड्डियसाहावस-सरलियभुयवल्लि एयइ थणवढा(?) ।  
 उच्चिणइ का वि कुसुमे घणकुसुमतरुण वरतरुणी ॥११५३॥  
 उन्नामियग्गकमवस-विलुत्ततिवलीकओद्ध(उद्ध?) भुयजुयलं ।  
 पडिहयथणपरिहाणं अवयंसइ का वि तरुकुसुमं ॥११५४॥  
 कक्खीकयहेड्डलयं उवरिलयाहुत्तखित्तकरकमलं ।  
 आकुंचिएक्कभुयमियर-सरलमल्लियइ तरुमग्गा ॥११५५॥  
 पवणुवे(व्वे)ल्लिरकंकेल्लि-पल्लवे समनिहित्तकरनिवहो ।  
 अवरोप्परकरपीडण-सविलक्खो सहइ तरुणियणो ॥११५६॥

उक्खंडइ तिकखनहग्ग-कोडिसंपीडियंगुली का वि ।  
 नियनहमऊहनिवहं घणवियसियकुसुमसंकाए ॥११५७॥  
 अवहरियसुरहिपरिमल-कुसुमबहु जायमच्छरेहिं व ।  
 भमरेहिं अभिद्वविया अच्छोडइ करयलं का वि ॥११५८॥  
 इय विविहसहीपरियण-परिवारा तत्थ मणहरुज्जाणे ।  
 कीलइ विसेसलीला-विलासपरिपेसलं बाला ॥११५९॥  
 अह सच्चो सहिवग्गो परिग्गहो अप्पणप्पणपहेण ।  
 पुप्फावचयनिमित्तं चिक्खित्तो कत्थइ कहंपि ॥११६०॥  
 तो चंदसिरी एगा विलासलच्छीसमन्निया कमसो ।  
 परिभममाणा एगं संपत्ता निव(बि)डतरुगहणं ॥११६१॥  
 अह तत्थ निबिडतरुगहण-गब्भपरिसंठियं मणभिरामं ।  
 सिरिचक्केसरिदेवी-भवणं सा नियइ अपमाणं ॥११६२॥  
 तं पेच्छिऊण रम्मं चंदसिरी भणइ सहि ! न मे पुव्वि ।  
 दिट्ठमिणं सुरभवणं तो भणइ विलासलच्छी वि ॥११६३॥  
 सहि ! जइया किर एयं उज्जाणवणं निवेसियं एत्थ ।  
 तइयच्चिय पासाओ निवेसिओ एत्थ नरवइणा ॥११६४॥  
 एयस्स गब्भगेहे पइट्ठिया सयलसत्तसुहजणणी ।  
 सिरिचक्केसरिदेवी ता एहि नमंसिमो एयं ॥११६५॥  
 तयणंतरं च दोन्नि वि काऊण निसीहियं पहिट्ठाओ ।  
 संपूइऊण देविं काउसग्गेण पणमंति ॥११६६॥  
 तो जाव विलाससिरी तं भवणं सच्चओ पलोएइ ।  
 ता ज्झत्ति भित्तिलिहिया चंदसिरी तीए सच्चविया ॥११६७॥  
 अह पहरिसवियसिरवीहरच्छिवत्ता विलासलच्छी वि ।

अणुविद्धरूवदंसण-उप्पाइयमणचमक्कारा ॥११६८॥  
 भणइ सहि ! एहि पेच्छसु पच्चकखं ढुक्कुहे(?) नियं रूवं ।  
 पुव्विं न पत्तियायसि जहत्थभणिराण अम्हाण ॥११६९॥  
 सहि ! दोन्नि पयावइणो इह भुयणे मह मणम्मि निवसंति ।  
 घडिया सि जेण एवं एवं चिय जेण लिहिया सि ॥११७०॥  
 ता एवमहं जाणे न एस करलेहणीण वावारो ।  
 तुह रूवबिंबयस्स व अमयरसदस्स पडिबिंबं ॥११७१॥  
 अहवा मयणरसद्धे नियहियए ठवियासि तं जेण ।  
 तत्तो व्य विरहरूयवह-उव(व्व)ट्ठा(?) एत्थ संकंता ॥११७२॥  
 आगंतूण समीवं चंदसिरी जा निएइ निउणयरं ।  
 ता तत्थ तं तहत्थिय विलासलच्छीए जह भणियं ॥११७३॥  
 अहह ! महच्छरियमिणं रेहावित्रासवससमुब्भूवं(यं) ।  
 लडहत्तणमंगाणं कहं नु आराहियं तेण ? ॥११७४॥  
 अह तं पि होइ कहमवि अब्भासवसेण कहमिमो होइ ।  
 पच्चंगचंगिमागुण - संबद्धा सव्वतणुसोहा ? ॥११७५॥  
 जो उण इमीए भावो सो नणु कहमेत्थ तेण सच्चविओ ।  
 जस्स वसा अंगाइं निहित्तजीवाइं व फुरंति ? ॥११७६॥  
 जो मज्झ पुरा हुंतो विचित्तकमचित्तकम्मगुरुगव्वो ।  
 एएण सो पणद्धो दिट्ठेण वि भित्तिचित्तेण ॥११७७॥  
 ता केण इमं लिहियं लिहियं वा केण वा वि कज्जेण ? ।  
 सहि ! साहसु मह सव्वं अइसयबुद्धी तुमं जेण ॥११७८॥  
 एयवयणावसाणे विलासलच्छीए भणिउमाढत्तं ।  
 सहि ! जेण इमं लिहियं सो कोइ न होइ सामन्नो ॥११७९॥

तुह केण वि रुव्व(रुव-)-विलास-जोव्वणाइसयहरियहियएण ।  
 अणुरायपरवसेणं विरहविणोउ(ओ) कओ एस ॥११८०॥  
 सो उण सुणेहि सुंदरि ! तुज्झ समो समहिओव्व संभविही ।  
 लोयपसिद्धी वि इमा “सरिसा सरिसेसु रच्चंति” ॥११८१॥  
 उत्तमकुल-जाई(इ)जुओ विसेसगुणसंगओ य गरुयओ(गरुओ)य ।  
 जइ मह मई पमाणं ता तुह हिययम्मि सो वसिही ॥११८२॥  
 नियजोगयाणुरूवा मणोरहा होंति जेण गरुयाण ।  
 जा इच्छा नरवइणो सा कह रंकस्स संभवइ ? ॥११८३॥  
 एवंति पभणिऊणं रायसुया भणइ सहि ! सुहासणए ।  
 एत्थेव उवविसामो खणमेत्तं मत्तवारणए ॥११८४॥  
 एवं हवउत्ति तओ भणिऊण द्वियाओ तत्थ समयं पि ।  
 वीसंभपणयगब्भं विलासलच्छी पुणो भणइ ॥११८५॥  
 सहि ! पडिवन्नं तुमए परिसविसुद्धीए तुह कहिस्सामि ।  
 ता साहसु तं संपइ विमाणच्चडियाए जं भणियं ॥११८६॥  
 हिययब्भंतरपसरंत-सासथरहरियथूलथणवट्ठा ।  
 किंपि परिभाविऊणं हियए अह भणइ चंदसिरी ॥११८७॥  
 तं किंपि होइ कज्जं कहिज्जमाणं पि जं कुलीणेहिं ।  
 अप्पाणस्स वि लज्जं जणेइ दूरे च्विय परस्स ॥११८८॥  
 एक्कत्तो तुज्झ भयं अब्रत्तो मह मणम्मि सहि ! लज्जा ।  
 इय लज्जा-भयमीसा पसरंति वियप्पकल्लोला ॥११८९॥  
 जइ चेवं तहवि विलास-लच्छि ! नियहिययनिव्विसेसाए ।  
 तुह कहिए का लज्जा ? ता सुणसु भणामि हिययगयं ॥११९०॥

अहमन्नदिणे चंदप्पहस्स अभिवंदिऊण पयकमलं ।  
 नियभवणमागया तो उवविट्ठा उवरिमगवक्खे ॥११९१॥  
 सहियायणो वि सच्चो विसज्जिओ नियनियं गउ ड्ढाणं ।  
 मह परियणो वि कोइ वि कर्हिंपि संपेसिओ य गओ ॥११९२॥  
 तो धम्म-कम्मजोगा अहमेगा संडिया गवक्खम्मि ।  
 तंबोलवाहिणीए कुरंगिनामाए परियरिया ॥११९३॥  
 तो हं रायंगणसंचरंत-जणनिवहखित्तनयणजुया ।  
 नाणाविणोयवइयर-अक्खित्ता जाव चिट्ठामि ॥११९४॥  
 ता सहसा पविसंतो विसेसवेसुज्जलो मए दिट्ठो ।  
 नाणाउहवग्गकरो पुरओ पाइक्कुसंमद्धो ॥११९५॥  
 तयणंतरं च पच्छ करेणुपल्लाणियाए उवविट्ठो ।  
 सिरधरियधवलछत्तो उभयंसपडंतसियचमरो ॥११९६॥  
 पसइपमाणच्छिजुओ विसालवच्छत्थलो पलंबभुओ ।  
 अइतणुमज्झवएसो थोरोरू सुजंघसंद्धाणो ॥११९७॥  
 मणिकंकणकलियकरो पलंबवरकन्नकुंडलाहरणो ।  
 घोलंततारहारो नियत्थदेवंगसियवत्थो ॥११९८॥  
 किं बहुणा पियसहि ! पलविण ? नीसेसभुयणमज्झम्मि ।  
 तप्पडिरूवो पुरिसो सो च्विय जइ होइ, न हु अन्नो ॥११९९॥  
 दिट्ठेण तस्स मह सहि ! पणासिओ पुरिसदेसरेणुभरो ।  
 वाहारियबंधनिबद्ध - केसभारेण च असेसो ॥१२००॥  
 पसरंतसरललोयण-बाणेहिं व जज्जरीकयं हिययं ।  
 तवे(व्वे)लं विय (चिय?) गलिया गुरुवएसो जओ मज्झ ॥१२०१॥

तस्स मुहचंदनिब्भर-वंसणसंमीली(लि)ओव्व संकुइओ ।  
 माणसनिबद्धमूलो विवेयकमलायरो मज्झ ॥१२०२॥  
 लद्धूण तस्स मणहर-विसालवच्छत्थलं मणकुरंगो ।  
 सहि ! हारवल्लिनद्धो व्व मज्झन्नत्रत्थ संभरइ ॥१२०३॥  
 कोमलकरंगुली नह-मऊहपडलच्छलेण पयडेइ ।  
 भुयदंडबलसमुत्थं विमलजसं करयलत्थं वा ॥१२०४॥  
 वच्छत्थलाहि जस्स य कसिणुज्जलरोममंजरी सहइ ।  
 मह मणहरमज्झपएस-खुत्तनयणंजणछडव्व ॥१२०५॥  
 मन्ने अइगहिरो च्विय नाहिद्रहो तस्स जत्थ मह हिययं ।  
 निव्वोलं व्वि(च्चि)य नीयं तेण न अन्नत्थ अहिरमइ ॥१२०६॥  
 हेट्ठाहुत्तजहक्कुम-परितणुपरिणाहिऊरु-जंघजुओ ।  
 जत्थच्छइ मज्झ मइ(ई) खंभनिबद्धा करेणुव्व ॥१२०७॥  
 अच्चुन्नयसरलंगुलि-सुसोहियं सहइ तस्स चरणजुयं ।  
 पीणुन्नयथणविसमे वीसंतं कह णु मह हियए ॥१२०८॥  
 जो च्विय निव्वन्निज्जइ पियसहि ! तस्संगसंगयावयवो ।  
 सो च्विय अमयमओ वि हु मं मुच्छइ तं महच्छरियं ॥१२०९॥  
 जो निव्वियप्परूवो पुव्वि सुपसन्नहिययवावारो ।  
 परियत्तिओ व्व सो मह अप्पा अन्नारिसो जाओ ॥१२१०॥  
 पुव्वकंहासु वि न सुया जे पुव्वमहाकईहिं वि न दिट्ठा ।  
 तदंसणेण ते मह मयणवियारा समल्लीणा ॥१२११॥  
 मोत्तूण तं कुमारं जइ हिययं फुरइ अन्नपुरिसम्मि ।  
 ता एस च्विय पियसहि ! सासणदेवी पमाणं मे ॥१२१२॥



ठणंतरं न वच्चइ कल्लोलवसा समुल्लसंतं पि ।  
 नायरगुणसंबद्धं मज्झं मणं जाणवत्तं व ॥१२१३॥  
 इय सहि ! तएक्कचित्ता तएक्कसरणा तएक्कवावारा ।  
 तक्खणमेत्तैणं चिय सुहएण अहं कया तेण ॥१२१४॥  
 पच्छावसरे तेण वि जत्थाहं तत्थ पेसिया दिट्ठी ।  
 पुणर(रु?)त्तवलियकंठं न याणिमो केण कज्जेण ॥१२१५॥  
 एत्थंतरम्मि पियसहि ! कुमरं चिद्धामि जा निरिक्खंती ।  
 ता तेण अयंडे च्चिय उट्ठं दिट्ठी परिद्धविया ॥१२१६॥  
 सरलत्तणभग्गतिरेह-कंधरं लद्धकुंडलुल्लासं ।  
 तरलियभालग्गविलग्ग-मूलयं सहइ मुहमुट्ठं ॥१२१७॥  
 एत्थावसरे असिधेणु-पाणिणा तेण तक्खणा दिन्नं ।  
 सीहेण व अइवेगा विज्जुक्खित्तं महाकरणं ॥१२१८॥  
 आकुंचिय सव्वंगं निबद्धकरमुट्ठिलद्धबहुथामं ।  
 आवेसवसनिपीडिय-अहरोट्ठं तेण उप्पइयं ॥१२१९॥  
 अह तं समुप्पयंतं दट्ठूणं मह मणम्मि संजाओ ।  
 विम्हयविसायगब्भो हियए विज्जाहरवियप्पो ॥१२२०॥  
 उच्छलिओ तव्वेलं नरिंदभवणंगणम्मि जणसद्धो ।  
 अहह ! महच्छरियमिणं कहमुप्पइओ त्ति इय दूरं ? ॥१२२१॥  
 सो परियणो असेसो साणुभावेण तेण रविणेव्व ।  
 सहसत्ति विप्पउत्तो मिलाणमुहपंकओ जाओ ॥१२२२॥  
 घर-पह-पुर-सुरमंदिर-रायंगण-हट्ट-टिट्ट(?) चउहट्टे ।  
 नयरम्मि खेय-विम्हय-विमिस्सहियओ जणो जाओ ॥१२२३॥

तक्खणमेत्तेणं चिय तं नयरं मणहरं पि मह जायं ।  
 निज्जीवमिव कडेवर-मसरिससंतावसोयकरं ॥१२२४॥  
 हा ! किं दिट्ठो सि महा-णुभाव ! दिट्ठो सि जइ कहं नट्ठो ? ।  
 ता नूणं संतावाय मज्झ इह तुज्झ आगमणं ॥१२२५॥  
 जइ हरियं मह हिययं तुमए ता हरसु किंपि न भणामि ।  
 कहसु कह तन्निवासा पडिया मह दुक्खरिंछोली ? ॥१२२६॥  
 वच्चसु इच्छियदेसं पुज्जंतु मणोरहा तुह ममा वि ।  
 इह जम्मे च्विय न परं सरणं जम्मंतरे वि तुमं ॥१२२७॥  
 कोहंडि ! देवि चक्किणि ! जालिणि ! महक्कालि ! कालि ! पन्नत्ति ! ।  
 मह पत्थणाइ कुसलं तस्स सरीरम्मि कायव्वं ॥१२२८॥  
 दुक्खं न मए दिट्ठं निसुयाइं न दुक्खियाण वयणाइं ।  
 तहवि सहि ! निग्गया मे के वि अउव्व च्विय विलावा ॥१२२९॥  
 अह जणपरंपराए ताएण वि एस वइयरो निसुओ ।  
 अन्नेसणत्थमुवरिम-पासायतलम्मि तो चडिओ ॥१२३०॥  
 सुइसुंद्धु(?)पलोइरपरियण-परिवारिण ताएण ।  
 अवलोइओ न दिट्ठो रायसुओ गयणमग्गम्मि ॥१२३१॥  
 मा कहवि देवजोया निवडइ धरणीयलंमि इय मइए ।  
 दस जोयणाइं चउदिसि निरिक्खओ आसवारेहिं ॥१२३२॥  
 तो मज्झणहे ताओ समहियमत्तंडकिरिणसंतत्तो ।  
 अलं(ल)हंतो तस्सुद्धिं जणोवरोहेण उत्तरिओ ॥१२३३॥  
 अह भवणमज्झभाए ताओ सिंघासणम्मि उवविट्ठो ।  
 नीसेसमंतिवग्गं तो वोत्तुं एवमाढत्तो ॥१२३४॥

हे मंतिणो ! निरु(रु)वह अवहरिओ किं नु केणवि सुरेण ।  
 विज्जाहरेण अहवा अत्रेण व दुद्धहियेण ? ॥१२३५॥  
 अह मंतीहि वि नियनिय-बुद्धिपहावेण जं जहा दिट्ठं ।  
 तं तह तायस्स पुरो सव्वेहिं जहकम्मं(क्कमं) कहियं ॥१२३६॥  
 तो सयलमंतिमंडल-मंडलभूएण तायपुज्जेण ।  
 पन्नायरेण भणियं किमसंबद्धं पजंपेह ? ॥१२३७॥  
 जइ मह मइ (ई) पमाणं जइ सो वि हु 'वीर'सइमुव्वहइ ।  
 ता तं अक्खयदेहं लद्धजयं पेक्खह खणेण ॥१२३८॥  
 एत्थंतरम्मि सहसा नरिंदभवणंगणम्मि उच्छलिओ ।  
 परिच्छुट्टपट्टहत्थी-वड्यरकयकलयलो तत्थ ॥१२३९॥  
 अवरोप्परपरपीडण-पडंतजण-करिनिहित्तभयनयणं ।  
 हल्लोहलिहुयलोयं संजायं तक्खणे नयरं ॥१२४०॥  
 पक्खुहियखोणिवालं गहियाउहजोहजूहपरियरियं ।  
 संजायं रायउलं संभंतभमंतसामंतं ॥१२४१॥  
 अह नीसेसं नयरं कलयलसद्देण हत्थिभयभीयं ।  
 पायार-तरु-वरंडय-पासायसिरेसु आरूढं ॥१२४२॥  
 ताओ वि तक्खणच्चिय उवरिमपासायवलयभूमीए ।  
 आरूढो पज्जाउल्लहियउ(ओ) बहुलोयपरिवारो ॥१२४३॥  
 रे ! धाह धाह गिण्हह तुरियं ओडुवह करिणिसंघायं ।  
 परिकार-आसवारेहिं वेढियं कुणह करिरायं ॥१२४४॥  
 इय जाव सहि ! निरूवई ताओ नियपरियणं करिनिमित्तं ।  
 ता सहसच्चिय दिट्ठो निवाडयंतो जणं हत्थी ॥१२४५॥

सिरिभुयणसुंदरीकहा ॥

चउचलणायससंकल-वलयमिसा कुंडलीकयतणूहिं ।  
 सेविज्जंतो भूभंग-भीयभुयगोहिं व बहूहिं ॥१२४६॥  
 चलणंतपिहुलनहमंडलेहिं निद्वलियलोयसंघाओ ।  
 तक्कालखुत्तजणवय-कवालखंडेहिं व घणेहिं ॥१२४७॥  
 गुरुकायभारभयवस-सेसविमुक्कुं व मेइणीवीढं ।  
 धावइ विहडावंतो संठविय पयपएसेसु ॥१२४८॥  
 निज्जियधरागइंदो गयणे एरावणं पि जेउं व ।  
 तड्ढुवियकन्नपेहुण-जुयलो अहिलसइ उड्डेउं ॥१२४९॥  
 सहिही मह वेयभरं नवत्ति पढमं परिक्खणत्थं व ।  
 ताडंतो रोसवसेण महियलं थोरहत्थेण ॥१२५०॥  
 कडयडरवेण मोडिय-बहुविडविपडंतविविहजणरुसिओ ।  
 उवरिमभूमीसंठिय-वाडियबहुखंभनिज्जूहो ॥१२५१॥  
 इय सो महाकरिंदो अक्कुंदनिरंतरम्मि रायउलं ।  
 उपरिक्खलिओ पसरइ असुहविवाओ व्व लोयस्स ॥१२५२॥  
 एइहमेत्ते वि अणंत-सुहडसंघट्टसंकडिल्लम्मि ।  
 निवपरी(रि)यणे न दीसइ को वि भडो जो तमल्लियइ ॥१२५३॥  
 एत्थंतरम्मि पियसहि ! निसुणेसु विलासलच्छी(च्छि) ! एक्कमणा ।  
 नीसेसनयरनरवइ-पयडं जं जायमच्छरियं ॥१२५४॥  
 वरविज्जाहरपरिधुव्वमाणनाणापयारगुणनिवहो ।  
 पासायाइपरिड्डिय-पुरहरसियलोयसच्चविओ ॥१२५५॥  
 पवणपणच्चिरभुयसिहर-निहियवत्थंचलेण सोहंतो ।  
 तक्खणनिहयमहारिवु-विढत्तसियजयवडाओ व्व ॥१२५६॥

वामेयरकोमलकरयलग्ग-आसंधिएक्खयरंसो ।  
 अइचवलदीहलोयण-पहाहिं नयरं व धवलंतो ॥१२५७॥  
 अवमन्निय गुरुगयभय-भरेहिं पहरिसपयट्टपुलएहिं ।  
 सो नहयलाउ एंतो लोएहिं पलोइओ कुमरो ॥१२५८॥  
 कुमरालोयणपहरिस-वसकलयलकुवियकरडिकुंभयडे ।  
 ठविऊण पायकमलं उवविट्ठो कंठदेसम्मि ॥१२५९॥  
 सहसा आरूढे च्चिय सीहकिसोरे व तक्खणं कुमरे ।  
 निप्फंदावयवतणू गयगव्वो गयवरो जाउ(ओ) ॥१२६०॥  
 एत्थंतरम्मि दिट्ठो ताएण सपरियणेण गयखंधे ।  
 बहुपहरिसपरिपूरिय-हियएण य संथुओ एवं ॥१२६१॥  
 पन्नायर ! सच्चमिणं “तत्थ गुणा जत्थ आगिई होइ” ।  
 एयम्मि निच्चियप्पं वयणमिणं घडइ कुमरम्मि ॥१२६२॥  
 नीसेसदोसभरिए संसारे ठणमलहमाणेहिं ।  
 मन्ने सव्वगुणेहिं वि निट्ठोसो एस आयरिओ ॥१२६३॥  
 जाणे गुणाणुरत्तं हयदोसमिमं गुणेहिं लद्धूण ।  
 आसयवसहिट्ठेहिं बंधूहिं व दूरमुल्लसियं ॥१२६४॥  
 आसंधियदोसुदयं चंदस्स वि चेड्डियं न सलहामो ।  
 नित्रासियदोसुदयं सूरस्स परं जए फुरियं ॥१२६५॥  
 इय एवमाइ बहुविह- तग्गयगुणसंकहापसत्तमणो ।  
 पन्नायरेण ताओ पडिभणिओ देव ! एवमिणं ॥१२६६॥  
 तो हा हा भणिरेणं पुणरवि ताएण जंपियं एयं ।  
 एयं मणागमणुच्चि(चि)यमायरियं जं गए चडिओ ॥१२६७॥

पयईए विसमसीलं कढोररविकिरणजायबहुकोवं ।  
 मारियबहुपरिकारं निरंकुसं कह वसे काही ? ॥१२६८॥  
 इय जा चिंतइ ताओ ता तुरियं निउणबुद्धिणा तेण ।  
 तक्खणमेत्तेणं च्चिय वसीकओ वारणो विसमो ॥१२६९॥  
 उग्घुद्धुजयजयरवं असेसजणदिन्नविविहआसीसं ।  
 पसरंतनयरराउल-जणनिवहं राउलं जायं ॥१२७०॥  
 अह कुमरोवरि सहसा मुक्का विज्जाहरेहिं गयणाओ ।  
 रुद्धंतमहुरमहुयर- वरमुहलियकुसुमवरवुट्ठी ॥१२७१॥  
 तह कहवि तेण तइया सो हत्थी दुच्चिणीयपयई वि ।  
 भदत्तणम्मि ठविओ जह बालाणं पि सुहगेज्जो ॥१२७२॥  
 नियपरियणविज्जाहर-परियरिओ हत्थिखंभउणम्मि ।  
 गंतूण ठवइ हत्थि करिणिगओ एइ रायउलं ॥१२७३॥  
 तो भवणंतसुहासण-परिसंठियतायचरणकमलेसु ।  
 पणमइ भूतलविलुलिय-चलकुंडलहारसियदामो ॥१२७४॥  
 'उवविससु'त्ति सपणयं भणिओ ताएण पुव्वठवियम्मि ।  
 सो विट्ठरे बइट्ठो 'महापसाओ'त्ति भणिऊण ॥१२७५॥  
 विज्जाहरलोयस्स वि जहारुहं आसणाइपडिवत्ति ।  
 काऊण पुणो ताओ सप्पणयं भणइ रायसुयं ॥१२७६॥  
 किं एयमसद्धेयं अविट्ठपुव्वं असंभवसरूवं ।  
 तुह चरियं गरुयाण वि जं जणइ मणे चमक्कारं ! ॥१२७७॥  
 ता कहसु असमकोउय-तरलियहिययाण निययवुत्तंतं ।  
 अम्हाण जेण जायइ संतोसरसाहियं हिययं ॥१२७८॥

इय भणिओ नरवइणा खणमेत्तमहोमुहं करेरुण ।  
 लज्जासमहीणमणो रायसुओ भणिउमाढत्तो ॥१२७९॥  
 इह केत्तियाइं अम्हारिसाण अइतरलहिययजणियाइं ।  
 आयन्निहसि नरेसर ! असमंजसबालवरियाइं ॥१२८०॥  
 आणाभंगेण कयं मा मह संघडउ दुव्विणीयत्तं ।  
 ता चंदसेहर ! तुमं जहवित्तं कहसु नरवइणो ॥१२८१॥  
 तो भणइ चंदसेहर-खयरिंदो देव ! लज्जे एस ।  
 एयाणुमईए अहं कहेमि जं अज्ज संपन्नं ॥१२८२॥  
 इह दाहिणसेढीए लच्छिनिवासे पुरम्मि वत्थव्वो ।  
 नामेण कमलकेऊ विज्जाहरदारओ अत्थि ॥१२८३॥  
 सो पयईए सुरूवो जुयईजणवल्लहो पियालावो ।  
 मायावी विसयामिस-लुद्धो जणनिंदियायरणो ॥१२८४॥  
 गामायर-पुर-पट्टण-निवेसरमणीयभूमिवलयम्मि ।  
 सो जत्थ जत्थ पेच्छइ तरुणियणं तत्थ अवहरइ ॥१२८५॥  
 हरिरुण नेइ दूरं एगंते तत्थ भुंजए पसहं ।  
 अइसीलसंजुया वि हु न च्छुट्टए तस्स मणइट्ठा ॥१२८६॥  
 इय एवं तेण कयं असमंजसकारिणा धरावलयं ।  
 वरनारिरयणहरणेण दुत्थियं पावकम्मेण ॥१२८७॥  
 बहुविज्जाबलवंतो पयंडभुयंडंडखंडियविवक्खो ।  
 खोणीयलम्मि वियरइ केणावि अगंजियपहावो ॥१२८८॥  
 अह तेण अन्नदियहे महुरानयरीए चारणमुणिंदो ।  
 गयणाओ ओयरंतो दिट्ठो सुरनिम्मियसमीवे ॥१२८९॥

तो तेण अवहिन्ना(ना)णी बहुदुन्नयकरणभीयहियेण ।  
 पुड्डो साहसु भयवं ! मह मरणं कस्स हत्थेण ? ॥१२९०॥  
 तो मुणिवरेण भणिउ(ओ) तुह मरणं भूमिगोयराहितो ।  
 पुण भणइ कमलकेऊ सेवडय ! असंगयं भणियं ॥१२९१॥  
 इह अइसयप्पहावा होंति जए खेयरा सुरा असुरां ।  
 ताणं वि अहमसज्झो का गणणा भूमिभा(?चा)रेहिं ॥१२९२॥  
 अवमन्नियमुणिवयणो उप्पइओ नहयलं कमलकेऊ ।  
 तो कामरूवदेसे अत्थि पुराजोइसी नयरी ॥१२९३॥  
 तत्थत्थि परमइब्भो अत्थवई नाम सावओ तस्स ।  
 भज्जत्थि पउमदेवी अइसयरूवा सुसीला य ॥१२९४॥  
 अत्थवई(इं) मोत्तूणं महासई सा न अन्नमहिलसइ ।  
 तीए हिययम्मि अन्ने पुरिसा जुयईसमा होंति ॥१२९५॥  
 अह सो काममहागह-अभिभूओ परव्वसो व्व हियेण ।  
 अत्थवइभारियाए अणुरत्तो पउमदेवीए ॥१२९६॥  
 तो सो कयसिंगारो विसेसवरभूसणेहिं कयसोहो ।  
 ठाऊण तीए पुरओ अप्पसरूवं पयासेइ ॥१२९७॥  
 तं दट्ठूण सरूवं सा चिंतइ नियमणाम्मि 'को एस' ।  
 भाउव्व सिणेहजुओ अवलोवइ निद्धनयणेहिं ? ॥१२९८॥  
 कलिऊण कमलकेऊ अवियारं तीए सरलमणपसरं ।  
 एसा ममं न इच्छइ इय चित्ते आउलो जाओ ॥१२९९॥  
 हा ! किं मह रूवेणं, सोहगणेणं च लडहवेसेण ? ।  
 एयाए अभिभूओ तणं व मन्नामि अप्पाणं ॥१३००॥



सा का वि नत्थि नारी भुयणम्मि कुलग्गया वि मं दट्ठुं ।  
 जा तव्वेलं न मुयइ कुल-जाइ-सइत्तगुणगव्वं ॥१३०१॥  
 एयाए पुणो सेवडयवयणबहुगणियसीलसोहाए ।  
 अहमणुरत्तो वाम-त्तणेण चइओ असउणो व्व ॥१३०२॥  
 ता अहमिमं सरूवं पीणुन्नयगुरुपओहरं रमं(रम्मं) ।  
 सुविसालनियंबतडं तणुमज्झं चंदपहसोहं ॥१३०३॥  
 जइ भुंजामि न एण्हि ता विफलो होइ मज्झ नीसेसो ।  
 सोहग्ग-रूव-जोव्वण-लावन्नसमुब्भवो गव्वो ॥१३०४॥  
 इय एवं जा चितइ नियहियए खेयरो कमलकेऊ ।  
 ता ज्झत्ति पउमदेवी तुरियं केणावि कज्जेण ॥१३०५॥  
 गयणग्गलग्गनवभूमि-भवणासिहरम्मि सा समारूढा ।  
 एगागिणी त्ति काउं अवहरिया तेण पावेण ॥१३०६॥  
 जा नियइ ता न भवणं गयणं च्विय सव्वओ निरालंबं ।  
 पासट्टियं पि पेच्छइ तं खयरं कामगहगहियं ॥१३०७॥  
 सा भणइ वच्छ ! बंधव ! किमेवमायरियमसुहफलहेउं ।  
 मह कहसु किंनिमित्तं ताउ य भवणाओ अवहरिया ? ॥१३०८॥  
 तो सो रोसवसेणं भिउडीभंगेण भीमभालयलो ।  
 अग्गकेसेसु धरिउं महासई(इं) हणइ मुट्ठीहिं ॥१३०९॥  
 एएणं चिय पावे ! पाविहसि महावई(इं) सइत्तेण ।  
 अन्नायहिययकज्जा जं भणसि अणिट्टसद्देहिं ॥१३१०॥  
 वच्छे भन्नइ पुत्तो अहं पि तुह सव्वहाणुरत्तमणो ।  
 ता कहसु कत्थ भन्नइ भत्तारो वच्छसद्देण ? ॥१३११॥

तो भणइ पउमदेवी वच्छे च्विय वच्छ ! नन्नहा होसि ।  
 तिलमेत्तखंडखंडेहिं खंडिया तहवि नेच्छामि ॥१३१२॥  
 लद्धं अईव दुलहं मणुयत्तं तंपि जाइ-कुलसुद्धं ।  
 जिणधम्ममि पबोहो विसुद्धसम्मत्तलाहो य ॥१३१३॥  
 निसुयं पवयणसारं तब्भणियायरणपालणजलेण ।  
 पक्खालिओ असेसो पावमलो जम्मजम्मकओ ॥१३१४॥  
 तम्हा एयस्स कए असमंजसचेट्टियस्स तुच्छस्स ।  
 परिणइविरसस्स कहं सव्वमिणं वच्छ ! मेलेमि ? ॥१३१५॥  
 ता मा कुणसु अयाणुय ! तुमं पि नियगोत्तफंसणं जेण ।  
 भरणंते वि न जायइ गरुयाण विरुद्धमायरणं ॥१३१६॥  
 इय एवमाइबहुविह-अणुणयवयणेहिं सीलरक्खड्डं ।  
 जा भणइ कमलकेउं पउमसिरी ताव सो भणइ ॥१३१७॥  
 आ पावे ! बहु पलवसि ममं पि सिक्खवसि तुज्झ पंडिच्चं ।  
 जाणामि अज्ज जइ मह हत्थाओ तुमं विछुट्टेसि ॥१३१८॥  
 एत्तो उवरिं जइ मह वयणं न करेसि ता अहं तुज्झ ।  
 करकलियखग्गधाराए अज्ज सीसं लुणिस्सामि ॥१३१९॥  
 नाऊण पउमदेवी तस्स मणं सरइ जिण-नमोक्कारं ।  
 सागारं पि हु गेण्हइ पच्चक्खाणं नियमणम्मि ॥१३२०॥  
 नरनाह ! एत्थ समए इह तुज्झ पुरम्मि परमबंधु व्व ।  
 दट्ठूण इमं कुमरं करेणुयारूढमविसकं ॥१३२१॥  
 हा कुमर कुमरसौडीर ! वीर ! मं रक्ख सव्वहा रक्ख ।  
 मोत्तूण तुमं बंधव ! नन्नो रक्खाखमो मज्झ ॥१३२२॥

सा मरणभउव्विग्गा एवं जा भणइ गरुयसदेण ।  
 ता देव ! कमलकेऊ कुमरोवरि संठिओ भणइ ॥१३२३॥  
 एएण तुमं पावे ! भूमीभारे[ण] अहमकुमरेण ।  
 अप्पाणं रक्खावसि वियक्खणत्तं गयं तुज्झ ॥१३२४॥  
 मह कोवानलजालावलीए पडिकूलिमाए निययाए ।  
 अप्पा न केवलं च्चिय एसो वि तहिं पि पक्खित्तो ॥१३२५॥  
 तयणंतरं नराहिव ! बहुकोवो कड्डिऊण करवालं ।  
 रे कुमराहम ! रक्खसु तुह सरणगयं इमं नारिं ॥१३२६॥  
 एत्थंतरम्मि कुमरो अप्पोवरि नियडनहपएसम्मि ।  
 निसुणइ तस्सालावं तं नियइ सुतिक्खखग्गकरं ॥१३२७॥  
 तो पउमएविपलवियबंधवपडिवत्तिजायबहुकरुणो ।  
 सो कमलकेउदुव्वयण-सवणसंजायआमरिसो ॥१३२८॥  
 आयह्विय असिधेणू बहुसत्तं तोलिऊण सो कुमरो ।  
 सव्वंगनिहियथामो उप्पइओ उह्ठकरणेण ॥१३२९॥  
 तो उड्डिऊण कुमरो आरूद्धो(ढो) कमलकेउपिड्डम्मि ।  
 तग्गहियकेसपासो उक्खयछुरिओं इमं भणइ ॥१३३०॥  
 रे ! मुयसु मज्झ बहिणिं रक्खेमि तुमं अहं न मारेमि ।  
 एसा विसुद्धसीला निययघरं जाउ अकलंका ॥१३३१॥  
 जह “नो भज्जइ लउडी न भरइ ससओ” इमेण नाएण ।  
 दोणहं पि होउ रक्खा मा संदेहम्मि खिव उभयं ॥१३३२॥  
 अह सो निरुत्तरो च्चिय मन्नइ कुमरं तणं व नियहियए ।  
 कुमरो वि मणे चिंतइ मायावी होइ खयरजणो ॥१३३३॥

अन्नोन्नावेढियचरणजंघियासरलिओरुकयथामो ।  
 जा अच्छइ रायसुओ चक्केण व तेण ता भमियं ॥१३३४॥  
 जह जह सो मायावी गयणे विज्जाहरो परिभ(ब्भ)मइ ।  
 कुमरो वि तह तह च्चिय ढ्ढोक्खबंधेण पीडेइ ॥१३३५॥  
 अइनिबिडबंधपीडण-वियणावसजायकोवफुरिओढ्ढो ।  
 पक्खिवइ निययबाहुं कुमरोरुजुयंतरालम्मि ॥१३३६॥  
 दढभुयदंडावीडण-विहडावियकुमरठोक्करो खयरो ।  
 उप्पइय नहे दूरं उच्छल्लिय खिवइ कुमरं पि ॥१३३७॥  
 एत्थंतरे पडंतं निहणिस्सं इय मईए खयरेण ।  
 धरियं करे करालं करवालं तक्खणच्चेय ॥१३३८॥  
 तो गयणे सहसच्चिय उच्छलिओ गयणगोयरभडाण ।  
 हा ह त्ति संपलावो कुमारपरिपडणभयजणिओ ॥१३३९॥  
 हा निक्कारणवच्छल ! मह कज्जे तुज्झ एत्तियं जायं ।  
 मुक्ककं(क्कं)दाए(इ) इमं संलवियं पउमदेवीए ॥१३४०॥  
 गयणाओ पडंतेणं सो दुड्ढो कड्ढिऊण केसेसु ।  
 कुमरेण पुणो कंठे संजमिओ ऊरुबंधेण ॥१३४१॥  
 पडिरुद्धसासपसरो सो पावो तस्स चारणमुणिस्स ।  
 वयणं धरेइ हियए पीडिज्जंतो दढं कंढे ॥१३४२॥  
 नरनाह ! एत्थ समए विमुक्कमुहनासविवररुहिरोहो ।  
 उव्वमइ पउमदेवी-संभोगसुहाणुरायं व ॥१३४३॥  
 आयट्ठि(ट्ठि)ऊण छुरियं कुमरेण वि विरसमारसंतस्स ।  
 सीसं 'टस'त्ति छिन्नं तस्स महापावकम्मस्स ॥१३४४॥

एत्थंतरे नराहिव ! जयसहुम्मीसिओ सुरवहूण ।  
 अइमहुरगीयमंगल-सदो सहसा समुच्छलिओ ॥१३४५॥  
 अम्हेहिं तओ पोरुस-गुणपयरिसजायपक्खवाएहिं ।  
 पुव्वं तिरोहिएहिं पयडेहिं पडिच्छिओ कुमरो ॥१३४६॥  
 भणिओ य सबहुमाणं कुमरो अम्हेहिं हरियहियएहिं ।  
 तन्निकारिमविक्रम-दीणपरित्ताणमाईहिं ॥१३४७॥  
 कह पयडिज्जइ पुरओ परक्कमो मारिसेहिं सो तुज्झ ।  
 जो सिद्ध-सुरगणाणं हिययाओ खणं न ओसरइ ॥१३४८॥  
 भुयणस्स कमलकेऊ केउव्व उवट्ठिओ विणासाय ।  
 सो संपइ तुह भुयदंड-केउणा कह खयं नीओ ! ॥१३४९॥  
 साहंति असज्झं पि हु तुमं व्व जे होंति साहससहाया ।  
 नियसत्ततुलातुलियं जाण तिलोयं पि तिणतुल्लं ॥१३५०॥  
 को पडिवज्जइ पयडं पि तुज्झ भुयविक्रमं असामन्नं ।  
 नियजोग्गयाए जम्हा सज्झासज्झं जणो मुणइ ॥१३५१॥  
 नियजीयसंसएणं परोवयारम्मि जे पयट्ठंति ।  
 सुइगोयराण ताणं पच्चक्खो मह तुमं एक्को ॥१३५२॥  
 इह दुड्ढनिग्गहेणं सुसाहुपरिपालणेण रायत्तं ।  
 तं तुज्झ परं छज्जइ जहत्थनामस्स नरनाह ! ॥१३५३॥  
 इय एवमाइबहुविह-सब्भूयगुणथुईओ खयरण ।  
 निसुयाओ कुमारेण दुव्वयणपरंपराओ व्व ॥१३५४॥  
 एत्थंतरम्मि भणिया कुमारेण सिणेहनिब्भर(रं) भइणी(णी) ।  
 मह कहसु जमिह किच्चं संपइ सीलुज्जले ! कज्जं ॥१३५५॥

तो भणइ पउमएवी अहमेव परं न रक्खिया तुमए ।  
 खलखयररक्खसाओ बंधव ! परिरक्खियं भुवणं ॥१३५६॥  
 तं सामी तं बंधू तं जणणी तं पिया गुरू तं सि ।  
 तं पाणदायगो मह कुमार ! तं किन्न जं न होसि (?) ॥१३५७॥  
 नीसेसभुयणपालण-अच्चब्भुयत्रायपुन्नपब्भारो ।  
 आचंदक्कं नंदसु संपत्तसमीहिओ सययं ॥१३५८॥  
 एण्हं पि कामरूवे पुरिं पुराजोइसिं अविग्घेण ।  
 पावेमि मह पई विय पत्तियइ तहा तुमं कुणसु ॥१३५९॥  
 एत्थावसरे भणियं नरिंद ! मह भाउणा सुवेगेण ।  
 मह कहसु देव ! कज्जं जं सज्जं मारिसजणस्स ॥१३६०॥  
 अम्हे निक्कारिमपोरुसाइगुणवित्थरेण तुह बद्धा ।  
 आजम्मकम्मकारा भिच्चा ता देहि आएसं ॥१३६१॥  
 तो तं सुवेगवयणं पडिपूरंतेण पुण मए कुमरो ।  
 वीसंभट्ठा(ठ)णमेसो इमीए सह जाउ इय भणिओ ॥१३६२॥  
 जा तुम्ह देव ! भइणी सा जणणी होइ निच्छियमिमस्स ।  
 ता निव्विसंकहियओ पेससु मा कुणसु संदेहं ॥१३६३॥  
 कुमरेण तओ भणिया अत्थवइपिया पसन्नवयणेहिं ।  
 गच्छसु सुवेयसहिया नियगेहं भइणि ! नीसंका ॥१३६४॥  
 तो भणइ पउमएवी तुम्हाएसा घरम्मि वच्चंती ।  
 न करेमि मणे संकं विसेसओ सह सुवेगेण ॥१३६५॥  
 तह तुमए वत्तच्चो अत्थवई पउमएविकज्जम्मि ।  
 जह नीसंको जायइ सुवेयमिय भणइ कुमरो वि ॥१३६६॥

अह पेसिऊण भइणिं कुमरो विय अप्पणा इहं पत्तो ।  
 अम्हेहिं समं, सेसं अओ परं तुम्ह पच्चक्खं ॥१३६७॥  
 एत्थावसरे नरनाह-नियडनीसेसवीरपुरिसेहिं ।  
 खित्ता कुमारसमुहं पहरिसवसवियसिया दिट्ठी ॥१३६८॥  
 पुणरुत्तं वारविलासिणीहिं पहरिसवसट्टपुलयाहिं ।  
 मुक्का अलक्खरूवा कुमरे तरलच्छिविच्छोहा ॥१३६९॥  
 तो नरवइणा भणियं जं अच्छरियं जणेइ गरुयाण ।  
 एयस्स पुणो तं च्विय नियचरियं जणइ गुरुलज्जं ॥१३७०॥  
 संपइ तिणमोडणनीसहा वि गरुयत्तणं पयासेंति ।  
 एवंविहा उण पुणो संतंपि हु निण्हवंति तयं ॥१३७१॥  
 करुणा तप्पडियारो अप्पविणासे वि विक्कमो नयवं ।  
 कोसल्लं दक्खत्तं सत्तुजओ उवसमाइ(ई)या ॥१३७२॥  
 जे केइ एत्थ भुयणे गुणाणुबंधा गुणा बुहाणं पि ।  
 ते सव्वे ठाणंतर-मलहंता एत्थ लीण व्व ॥१३७३॥  
 अम्हारिसाण तुम्हारिसेसु सिक्खा-सहावगरुएसु ।  
 निव्विसया आयासं संकोयइ को समत्थो व्वि (?वि) ॥१३७४॥  
 जो विक्कमेण गयणे असज्झविज्जाहरं पि निज्जिणइ ।  
 कुमरस्स तस्स हासो मन्नो करिकीडसंजमणं ! ॥१३७५॥  
 ता तुज्झ जाव न समइ विज्जाहरसंगरुब्भवो खेओ ।  
 तक्खणमेत्तेणं चिय पुण जाओ वारणायासो ॥१३७६॥  
 वीसमसु ता सुहेणं गच्छसु आवासमिइ नरिंदेण ।  
 भणिया कुमार-खयरा समं गया पुव्वआवासं ॥१३७७॥

एवं च मज्झ सव्वं जं कहियं खेयरेण तायस्स ।  
 तं कुमरचेट्टियं बंधुत्ताए कहियं विसिद्धाए ॥१३७८॥  
 ता सो रायकुमारो पियसहि ! आरंभ(रब्भ) तं दिणं मज्झ ।  
 हिययाओ कीलिओ इव कामसरोहेहिं नो सरइ ॥१३७९॥  
 मह वइयरं पि न मुणइ सो सुहउ(ओ) मह मणम्मि पुण दुक्खं ।  
 तं किं पि जेण सव्वं उव्वेवयरं विमाणाइ ॥१३८०॥  
 का तव्विसया चिंता ? अणुराई मह न होइ, मा होउ ।  
 पेच्छेमि तहवि तं चिय को तिसिओ चयइ अमयरसं ? ॥१३८१॥  
 निवसंति तारिसाणं गरुयाण मणम्मि गरुयजुयईओ ।  
 पाउसलच्छि चिय गुरु-पओहरं महइ नहमग्गो ॥१३८२॥  
 ता जइ मणम्मि तुह फुरइ को वि सहि ! तारिसो सुहउवाओ ।  
 ता लक्खसु मह विसए पडिकूलो किमणुकूलो सो ? ॥१३८३॥  
 तो चंदसिरीवयणं विलासलच्छी भणेइ सोऊण ।  
 सहि ! रुट्ट म्हि तुहोवरि गोवसि जं मज्झ नियहिययं ॥१३८४॥  
 एयारिसाई पियसहि ! नियसरिसजणम्मि संविहत्ताई ।  
 न जणंति तहा दुक्खं कज्जाई हलुइयाई व ॥१३८५॥  
 गरुयारंभं गरुयाणुरायविसयं च कह तए धरियं ।  
 हिययम्मि तए? अहवा, अइगरुयं माणसं तुज्झ ॥१३८६॥  
 एत्तियदियहेहिं अज्ज साहियं तहवि किं पि न हु नडं ।  
 अप्पसमाणम्मि जणे अणुराओ तुज्झ सहि ! जाओ ॥१३८७॥  
 जो सहि ! तुमए कहिओ कुमारववहरणवइयरो एण्हि ।  
 सो मज्झ वि पच्चक्खो संजाओ लोयवाएण ॥१३४४॥



परमेयमहं पियसहि ! जाणामि न जमिह तुज्झ अणुराओ ।  
 अम्हाण पुणो हियए अन्नं चिय किंपि संठाइ ॥१३८९॥  
 तो भणइ रायधूया जं तुह हिययम्मि तं पि मह कहसु ।  
 पभणइ विलासलच्छी कहिएण वि किं अणिट्ठेण ?  
 निसुणसु तहावि पियसहि ! असोयविज्जाहरस्स तुह उयरिं ।  
 अणुरायं दट्ठूणं विमाणदाणाणुमाणेण ॥१३९१॥  
 जाओ मणे वियप्पो मह किर होही तहा तुह तहिं पि ।  
 अहिलासो जेण न सो वि होइ सामन्नपुरिससमो ॥१३९२॥  
 विज्जाहरकुलजाओ अच्चुत्तमरायवंससंभूओ ।  
 सयलकलाकुलभवणं चाई जिणवयणभावन्नू ॥१३९३॥  
 एत्थंतरम्मि तिस्सा वयणं अविखविय भणइ चंदसिरी ।  
 अप्पत्थुयाए पियसहि ! किं एत्थ असोयचिंताए ? ॥१३९४॥  
 एकम्मि तम्मि दिट्ठी अणुसंधाणं च तम्मि एकम्मि ।  
 धाणुकु-कुलवहूणं जत्थ मणं पसरइ सुलक्खे ॥१३९५॥  
 जम्मि निविट्ठं हिययं सुहं च्च दुक्खं च्च तस्स आयत्तं ।  
 नावारूढो हि जणो न कयाइ सयंवसो होइ ॥१३९६॥  
 जे सहि ! गुणा असोयस्स ते गुण च्चिय न मच्छरो मज्झ ।  
 अणुरायकारणं चिय ते मज्झ परं न संपत्ता ॥१३९७॥  
 सहि ! भिन्नरुई लोओ, इह कस्स वि को वि होइ मणइट्ठो ।  
 भोयणरसोव्व लोए कडुयंबिल-महुरभेएण ॥१३९८॥  
 इय ताओ जाव एवं परोप्परालावतग्गयमणाओ ।  
 चिट्ठंति ताव एगो समागओ बंभणो तत्थ ॥१३९९॥

मज्झिमवयपरिणामो महरिहपूओवगरणपडलकरो ।  
 तक्कालण्हाणपगलंत-दीहवालग्गजलबिंदू ॥१४००॥  
 सुनियत्थसेयवत्थो निम्मलजन्नोववीयकयखंधो ।  
 अब्भक्खंतो पुरओ धरायलं पाणिसलिलेण ॥१४०१॥  
 काऊण सो निसीहिं पविसइ अब्भितरम्मि उवउत्तो ।  
 मोत्तूण पडलयं पुण पमज्जए चक्किणीभवणं ॥१४०२॥  
 कुणइ सं(स) मज्जणकम्मो(म्मं) कुणइ तओ पुप्फपगरमइसुरहिं ।  
 आबद्धवयणवत्थो पूयइ चक्केसरि देविं ॥१४०३॥  
 पढमं ण्हाण-विलेवण-पूयण-धूयक्खयाइबहुभेयं ।  
 आरत्तियपज्जंतं काऊणं परमभत्तीए ॥१४०४॥  
 थोऊण तओ देविं पुरओ ठऊण रायधूयाण ।  
 उच्चारिऊण मंतं 'सत्थि'त्ति पजंपए हिट्ठो ॥१४०५॥  
 'उवविससु'त्ति सपणयं भणिओ उवविसइ रायधूयाए ।  
 को सि तुमं ? कत्थच्छसि ? देविं पि किमत्थमच्चेसि ? ॥१४०६॥  
 इय एवमाइ पुट्ठो विलासलच्छीए भणइ सो विप्पो ।  
 अहमेत्थ नयरवासी भट्ठो गोवद्धणो नाम ॥१४०७॥  
 इह अत्थि वीरराया कुमरो सिरिवीरसेणनामोत्ति ।  
 गयणंगणंमि जेणं वियारिओ कमलकेउरिऊ ॥१४०८॥  
 तस्सत्थि परममित्तो हिययसमो बंभदत्तनामोत्ति ।  
 तस्साएसेण अहं पइदियहं देविमच्चेमि ॥१४०९॥  
 सोऊण इमं वयणं पहरिसवसवियसियच्छिविच्छोहा ।  
 आणंदपुलइयतणू चंदसिरी तक्खणं जाया ॥१४१०॥

जो पुव्विमवन्नलहुयहिययसंभावणाए परिकलिओ ।  
 सोच्चेय तीइ विप्पो मेरुसमो कुमरनामेण ॥१४११॥  
 तंबोलदाणपुव्वं विलासलच्छीए सो पुणो पुडो ।  
 सो कस्स सुओ ? कम्हा समागओ ? किंगुणो कुमरो ? ॥१४१२॥  
 इय एवमाइ सव्वं साहसु चरियं सकीयकुमा(म)रस्स ।  
 पभणिय(णइ) विप्पो निसुणह तद्दे(दे)क्कुचित्ताओ पहुचरियं ॥१४१३॥  
 उप्पज्जंति पयाणं पुत्रेहिं जयम्मि केइ सपु(प्पु)रिसा ।  
 मेहव्व जेहिं भुयणं पत्हायइ निहयसंतावं ॥१४१४॥

इह भारहम्मि वासे चंपानामेण अत्थि वरनयरी ।  
 तत्थत्थि जियविवक्खो राया सिरिसूरसेणो त्ति ॥१४१५॥  
 जो वैरिनरिंदकरिदं-केसरी अइपयंडभुयदंडो ।  
 रिउकित्तिवल्लिवित्थर-निकुट्टण(णा)कट्ठि(ढि)णपरसुव्व ॥१४१६॥  
 जेण समरंगणेसुं दूरं विद्ववियवैरिवग्गेण ।  
 नियखग्गे संकंतो सरोसमिव जोइओ अप्पा ॥१४१७॥  
 जस्स जणे पयडिज्जइ बंदीकयविविहवेर(रि)नारीहिं ।  
 दुव्विसहगुरुपयावानलस्स विसमं परिप्फुरणं ॥१४१८॥  
 तस्सत्थि पुव्वजम्मा-णुसंगसंबद्धनिब्भरसिणेहा ।  
 सिंगारवईनामं भज्जा गुण-रूवसंपन्ना ॥१४१९॥  
 सयलंतेउरपमुहा रूवोहामियसुरंगणारूवा ।  
 गुण-सीलवराभरणा उत्तमकुलजाइसंपन्ना ॥१४२०॥  
 रज्जं विहवं रूयं सामित्तं गुरुगुणा य सोहग्गं ।  
 राया मन्नइ सफलं अणुकूलकलत्तलाहेण ॥१४२१॥

सो तीए समं भुंजइ सलाहणिज्जाइं सयललोयस्स ।  
 इंदोव्व देवलोए सुहाइं संतोससाराइं ॥१४२२॥  
 एक्कं चिय तस्स सुहं न अत्थि नीसेससुहसमिद्धस्स ।  
 जं पच्चूसे नियपुत्त-वयणअवलोयणुब्भूयं ॥१४२३॥  
 अह अन्नदिणे राया भणिओ मंतीहिं हियनिउत्तेहिं ।  
 सव्वेहिं वि मिलिऊणं परिणामसुहावहं वयणं ॥१४२४॥  
 इह देव ! महीवइणो सुसावहाणा वि इयरकज्जेसु ।  
 अवगयपरमत्था वि हु मुज्झंति पुणो सकज्जेसु ॥१४२५॥  
 भोयण-सयण-विहूसण-गमणा-गमणाइ-सयलकिरियाओ ।  
 कहकहवि गयंदा इव चोइज्जंताणुसेवंति ॥१४२६॥  
 एवंविहाण ताणं पयइपमाईण सव्वकज्जेसु ।  
 नीसेसकज्जकारित्तणेण किर मंतिणो हुंति ॥१४२७॥  
 जं होइ मंतिसज्झं तं मंतियणो अवस्स साहेइ ।  
 जं पुण तुम्हायत्तं तं तुमए देव ! कायव्वं ॥१४२८॥  
 उच्छइया विवक्खा एगच्छत्ता कया वसुमई य ।  
 ठविया पयाओ सुत्थे सूरुो वि जिओ पयावेण ॥१४२९॥  
 इय एवमाइ सव्वं विप्फुरियं तुज्झ अतुलसत्तिस्स ।  
 सुविणयरज्जसमाणं मन्नाओ पुत्तपरिहीणं ॥१४३०॥  
 पुत्तो हि नाम नरवर ! गुणवंतो होइ सव्वसुहमूलं ।  
 पुत्तफलेणं फलिओ पुरिसो सलहिज्जइ दुमोव्व ॥१४३१॥  
 एसा तुह रायसिरी एसो वि य परियणो असामन्नो ।  
 एयं च धरावलयं को धरिही तुज्झ वि वरोक्खे ॥१४३२॥

भवतरुवरुभवाणं पत्ताण व राय ! सव्वसत्ताणं ।  
 होही अवस्सपडणं दुप्पडियारं सुराणं पि ॥१४३३॥  
 ता देव ! मरणधम्मीण एत्थ पाणीण मज्झगा तुब्भे ।  
 तं तु कहां जाणिज्जइ किं कल्ले अहव अज्जेव ? ॥१४३४॥  
 सूरौत्ति नियं नामं तुमए च्चिय पयडियं सचेट्ठाए ।  
 निज्जियसुरासुराओ नच्चीहसे जमिह मच्चूओ ॥१४३५॥  
 ता तह किंपि अणुड्सु बुद्धीए परक्कमेण देहेण ।  
 जह भुवणतिलयभूओ पुत्तो संपज्जए तुज्झं ॥१४३६॥  
 इहरा उण नीसेसं नियबुद्धिपरक्कमज्जियं एयं ।  
 रज्जाईयमवस्सं विलुप्पिही वैरिवग्गेण ॥१४३७॥  
 सोऊण मंतिवयणं परिणामहियं नरेसरो भणइ ।  
 को तुब्भे मोत्तूणं सव्वंगं मज्झ हियकारी ? ॥१४३८॥  
 अणुकूलभासिणो जे तेहिं नरिंदाण होंति गूढरिऊ ।  
 वयणकढोरा हियकारिणो य तुम्हारिसा विरला ॥१४३९॥  
 ता तुम्ह वयणमेयं न अब्रहा होइ, अवितहं मंति ! ।  
 समए [प]बोहिओ हं मज्झ वि एयं मणे फुरियं ॥१४४०॥  
 मयमंडणं व एयं अंधारे य नच्चियं व्व पडिहाइ ।  
 पुत्तं विणा असेसं रज्जं मायंदजालं व ॥१४४१॥  
 निम्मूलो इव रुक्खो सुसियसिरासलिलसंगहो कूवो ।  
 पुत्तरहिउव्व वंसो एए न चिराउया होंति ॥१४४२॥  
 पुत्तेण पवित्तिज्जइ पिआ य माया य तह कुलं ज्जा(जा)ई ।  
 पुत्तपरिवज्जियाणं संतं पि हु सव्वमत्थमइ ॥१४४३॥

अइगरुयरिउकुलाई वि(?)विच्छिन्नाइं जहा ममाहितो ।  
 तह किं मज्झ कुलस्स वि वोच्छेओ संपयं होही ? ॥१४४४॥  
 सूरसेणाओ वंसो वोच्छिन्नो दूसहं इमं वयणं ।  
 असमत्थो हं सोउं पुत्तत्थं ता जइस्सामि ॥१४४५॥  
 इय भणिऊणं राया पसायदाणेण सुत्थिउं(यं) काउं ।  
 मंतियणं पुण पेसइ नियनियगेहेसु नीसेसं ॥१४४६॥  
 एत्थंतरम्मि सूरुो सूरस्स पयावसहमाणोव्व ।  
 बुडुइ अवरदिसोयहि-जलम्मि संतत्तसव्वंगो ॥१४४७॥  
 सूरपयावानलकढकढंतजलनिहिविलीणरविणो व्व ।  
 संज्झामिसेण दूरब्भुयंतराओ व्व वित्थरइ ॥१४४८॥  
 सूरुोच्चिय जयइ जए अल्लियइ ससंकिओ रिऊ जस्स ।  
 अंतरियजयं पि तमं ससंकमिव जाइ वरुणदिसिं ॥१४४९॥  
 कह सूरसेणभुत्ता अहिलसइ खगंपि पेच्छ वरुणदिसा ? ।  
 इय इयरदिसिवहूहिं कयाइं कलुसाइं वयणाइं ॥१४५०॥  
 कसिणंधयारसलिले अदिट्ठपारे सुताररयणम्मि ।  
 तमजलहिम्मि व सयत्तं मज्जइ भुयणं दुरुत्तारे ॥१४५१॥  
 एवंविहम्मि समए राया कयसयलसंज्झकरणीओ ।  
 उवविसइ महत्थाणे बहुविहसामंतसंकिन्ने ॥१४५२॥  
 तत्थच्छिऊण बहुगीय-वाय-पेच्छणय-नाडयाईहिं ।  
 विविहविणोएहिं तओ विसज्जए सेवयं लोयं ॥१४५३॥  
 वच्चइ सेज्जाहरयं विसज्जियासेसपाडुयसमूहो ।  
 ओल्लरइ महत्थरणे सुयचिंताब्बासियसरीरो ॥१४५४॥

इय जा सुयलाहत्थं उवायसयजायचित्तसंकम्पो ।  
 तत्थच्छइ ता पेच्छइ जालगवक्खेण उज्जोयं ॥१४५५॥  
 तं दट्ठूण वियप्पइ किं पुव्वदिसाए एरिसुज्जोओ ? ।  
 किं नु पहाया रयणी ? अहवा चंदुग्गमो होज्ज ? ॥१४५६॥  
 एण्हिं चेव निसन्नो सेज्जाए निसाए पढमदोपहरा ।  
 अज्ज य किण्ह चउदि(द्व?)सि-दियहो कह ससहरुग्गमणं ? ॥१४५७॥  
 ता किंपि महच्छरियं संभविही एत्थ जामि सयमेव ।  
 उज्जोयस्स सरूवं तत्थ गओ संपहारिस्सं ॥१४५८॥  
 इय चिंतिऊण राया संबग्गियकेस-निवसण-च्छुरिओ ।  
 करसंठियकरवालो विणिग्गओ रायभवणाओ ॥१४५९॥  
 विविहंगरक्ख-पडियार-जामइल्लाइ-सयलपरिवारं ।  
 सो वंचिऊण तुरियं विणिग्गओ चंपनयरीओ ॥१४६०॥  
 उज्जोयवसेण गओ भवणं सिरिवासुपुज्जनाहस्स ।  
 तत्थ नियच्छइ पुरओ नाणाविहदेवसंघायं ॥१४६१॥  
 वसुपुज्जदंसणत्थं समागओ सयलदेवपरियरिओ ।  
 सोहम्मपुराहिवई नाणाविहवरविमाणेहिं ॥१४६२॥  
 तो चिंतइ नरनाहो मन्ने एयाण चेव देवाण ।  
 विप्फुरइ एस तेओ बहुरवितेयाण अब्भहिओ ॥१४६३॥  
 ता पेच्छ सुंदरमिणं संजायं जमिह आगओ अहयं ।  
 वसुपुज्जदंसणेणं सव्वं मह सुंदरं होही ॥१४६४॥  
 इय चिंतिऊण राया जा वच्चइ तुरियकयपयक्खेवो ।  
 ता माणुसो त्ति कलिउं खलिओ तियसेहिं दारम्मि ॥१४६५॥

तो नरवइणा भणियं मुंचह पेच्छामि वासुपुज्जजिणं ।  
 नर-तिरिय-सुरा-सुर-खेयराण साहारणा भयवं ॥१४६६॥  
 दारवालेण भणियं अच्छ खणं जाव जाइ तियसिंदो ।  
 सद्वाणगए सक्के पच्छा वंदेज्ज वसुपुज्जं ॥१४६७॥  
 तो भणइ सूरसेणो जइ सक्को ता विसेसओ जामि ।  
 दट्ठूण वासुपुज्जं पच्छा सक्कं पि पेच्छामि ॥१४६८॥  
 देवेहिं तओ भणियं दीसइ पुत्रेहिं सुरवई राया ।  
 पुन्नविहीणाण कहां सुरिंदमुहदंसणं होइ ? ॥१४६९॥  
 तो नरवइणा भणियं मए वि सह ज्झंखिउं समारद्धं ? ।  
 वसुपुज्जदंसणं किन्न होइ पुन्नुभवनिमित्तं ? ॥१४७०॥  
 वसुपुज्जपायवंदण-समज्जियाणंतपुन्नपब्भारो ।  
 अपवग्गं पि हु पेच्छइ किमंग पुण तियसनाहं न ? ॥१४७१॥  
 इय एवमाइ विविहं समुल्लवंतो नरवई तेहिं ।  
 खलिओ कहवि न पावइ पवेसमंतोजिणहरस्स ॥१४७२॥  
 तो देवअवन्नावयणसवणसंजायअसरिसुक्कुरिसो ।  
 आयं चिर(?) छिखंतो पुण राया भणिउमाढत्तो ॥१४७३॥  
 तुब्भेहिं किलीबेहिं अहं खलिज्जामि निव्विवेईहिं ।  
 मज्जाय(या) चिय गरुयाण होइ पडिरुंभणसमत्था ॥१४७४॥  
 इय भणिऊण नरिंदो खग्गं आयद्धिऊ(ण) पुण भणइ ।  
 खलउ जो तुम्ह मज्जे खलणसमत्थो सुरो असुरो ॥१४७५॥  
 देवेहिं पुणो भणियं किं माणुस ! जंपसे असंबद्धं ? ।  
 ते हुंति कहां गरुया जे न ससत्तिं वियाणंति ? ॥१४७६॥



राया भणइ न सत्ती कारणमिह होइ गरुयभावस्स ।  
 हिययावडुंभकरं सत्तं चिय गरुयए पुरिसं ॥१४७७॥  
 जलबिंदुणा वि सित्तो उण्हायइ सुह(हु)महुयवहफुलिंगो ।  
 सो किं न होइ पलयस्स कारणं सयलभुयणम्मि ? ॥१४७८॥  
 जिप्पइ न जिप्पइ च्विय एयं पुत्राण होइ आयत्तं ।  
 अवमाणखंडणे सुउरिसाण पाणा तिणसमाणा ॥१४७९॥  
 तो अन्नसुरवरेहिं पडिहारसुरा बहुं अहिद्विया ।  
 किं एत्तियं पि न सुणह एसो क्खु महीवई गरुओ ? ॥१४८०॥  
 तो तं सुराण वयणं अवगणिऊणं च दारपालेहिं ।  
 नरवइणा सह जुद्धं पारद्धं अहिनिव(वि)डेहिं ॥१४८१॥  
 मज्झत्थसुरेहिं तओ अंतो गंतूण तियसणाहस्स ।  
 पडिहार-सूरसेणाण वइयरो साहिओ सव्वो ॥१४८२॥  
 तो सुरवइणा भणियं को वि असामन्नमाणुसायारो ।  
 जो नियपरक्कमेण वि देवाणं संमुहो होइ ! ॥१४८३॥  
 अहवा किमेत्थ चित्तं ! तेयस्स अकारणं भवे जाई ।  
 अन्नोन्नघंसणेण(णं) कट्ठाइं वि किं न पज्ज(ज)लंति ? ॥१४८४॥  
 ता तुरियं हक्कारह नरेसरं परमविक्रममहग्घं ।  
 रणरसियदंसणेणं मज्झ वि उक्कंठियं हिययं ॥१४८५॥  
 तो आएसाणंतर-मणंतधावंतसुरसमूहेहिं ।  
 राया सगौरवं चिय नीओ तियसिंदपासम्मि ॥१४८६॥  
 तो पणमिऊण पढमं परमेसरवासुपुज्जपयकमलं ।  
 पुण नमइ सुरवरस्स वि नरनाहो सविणयं भणइ ॥१४८७॥

सयलस्स तिहुयणस्स वि नाहो तुममेव जीवलोयम्मि ।  
 तह वि तुहाएसेण मज्झिमलोयाहिवो अहयं ॥१४८८॥  
 कह 'माणुसो' त्ति भणिउं सुरिंद ! तुह दुडुदारपालेहिं ।  
 खलिओ म्हि खलेहिं अहं, तणं व परितुलिउमाढत्तो ? ॥१४८९॥  
 तव्वयणाथन्नणजायहरिसवियसंतदससयच्छिउडो ।  
 सुरनाहो नरनाहस्स संमुहं भणिउमाढत्तो ॥१४९०॥  
 जा माणुसाण सत्ती सा कह तियसाहिवाण वि नरिंदा ? ।  
 विरइं कुणइ मणुस्सो सक्को उण तत्थ वि असक्को ॥१४९१॥  
 अम्हेहिं वि राय ! पुरा मणुयत्तं पाविऊण अइदुलहं ।  
 पालियजिणवयणेहिं इंदत्तं पावियं एण्हि ॥१४९२॥  
 इहिऊण कम्मरासिं मणुओ पावेइ सासयं सोक्खं ।  
 सुसमत्थस्स वि देवस्स कह णु एवंविहा सत्ती ? ॥१४९३॥  
 अम्हे वि राय ! मणुयाण पणमिमो नाण-दंसणधराणं ।  
 चारित्तपवित्ताणं जिणंदलिगं पवन्नाण ॥१४९४॥  
 ता सव्वहा न एए विवेइणो होति दारपडिहारा ।  
 एवंविहाण उवरिं कोवो वि न होइ कायव्वो ॥१४९५॥  
 तो भणइ नरवरिंदो सुरिंद ! तुह दंसणामयरसेण ।  
 वयणामयसवणेण य विज्झाओ मज्झ कोवग्गी ॥१४९६॥  
 तो सुरवइणा भणियं तुह राय ! निसग्गविक्कमगुणेण ।  
 विणयगरुयत्तणेण य तुड्ढो म्हि वरं वरेसु त्ति ॥१४९७॥  
 तो राइणा वि भणियं जं बहुपुन्नाणुभावओ होइ ।  
 तं तिहुयणे दुलंभं जायं तुह दंसणं मज्झ ॥१४९८॥

एएणं चिय तियसाहिराय ! तुह दंसणेण संपन्ना ।  
 सव्वे वि दुल्लहवरा करट्टिया संपयं मज्झ ॥१४९९॥  
 पुण सुरवइणा भणियं किं इमिणा ? भणसु जं मणे फुरइ ।  
 होइ अमोहं जम्हा देवाणं दंसणं राय ! ॥१५००॥  
 तो नरवइणा भणियं जइ एसो देव ! तुम्ह अणुबंधो ।  
 तो तुज्झ पसाएणं पुत्तो मम अणुवमो होउ ॥१५०१॥  
 तो सुरवइणा भणियं विन्नायं ओहिणा मए राय ! ।  
 तुह अच्चुयकप्पाओ चइऊण सुरो सुओ होही ॥१५०२॥  
 इय भणिऊणं सक्को नमिऊणं वासुपुज्जजिणनाहं ।  
 नीसेससुरसमेओ सहसा अदंसणीहूओ ॥१५०३॥  
 नरनाहो वि पविट्ठो पणामपुव्वं जिणिंदचंदस्स ।  
 केण वि अलक्खिओ च्विय नियरायउल्लम्मि संपत्तो ॥१५०४॥  
 सेज्जाए खणं सुत्तो खणमेत्तेणं च ववगया रयणी ।  
 चिंतव्व महीवइणो अंधारियसयलजियलोया ॥१५०५॥  
 उइओ य पयासंतो भुयणयलं तमरिउं च नासंतो ।  
 नरवइमणोरहो इव सूरु अंतरियतेयस्सी ॥१५०६॥  
 दरवलियं पिव परिसोसियं व विद्धंसियं व पीयं व ।  
 सूरस्स करेहिं जए दूरं निब्भच्छियं च तमं ॥१५०७॥  
 एत्थंतरम्मि राया निदाविरम्मि जग्गिओ सहसा ।  
 कयसयलगोसकिच्चो अत्थाणे डाइ संतुट्ठो ॥१५०८॥  
 सव्वे वि मंतिणो अह समागया ताण कहइ नरनाहो ।  
 निसि तियसनाहदंसण-सुयप्पयाणाइवुत्तंतं ॥१५०९॥

सव्वेहिं तओ मंतीहिं पभणियं तुज्झ चव परमेयं ।  
 सिज्झइ जं किर सुरराय-दंसणं पुत्तलाहो य ॥१५१०॥  
 उट्ठइ अत्थाणाओ विसज्जियासेसमंति-सामंतो ।  
 कयभोयणाइकिरिओ गमइ दिणं बुहविणोएहिं ॥१५११॥  
 तो अत्थमिए सूरे अत्थाणे झाइ उचियवेलाए ।  
 पट्टवइ सेवयजणं पच्छ सेज्जाहरे जाइ ॥१५१२॥  
 सिंगारवईसहिओ सेज्जाए तहिं नु वज्जए राया ।  
 तदिय(व)सं ण्हायाए संभोयं कुणइ सह तीए ॥१५१३॥  
 तो इंददत्तदेवो च्चविरुणं अच्चुयाउ कप्पाओ ।  
 पुत्तत्तेणुप्पन्नो सिंगारवईए कुच्छिमि ॥१५१४॥  
 निसिपच्छिममि जामे सुहसुत्ता सुविणयं निधइ देवी ।  
 सेविज्जंतं पेच्छइ नियगब्भं वीरपुरिसेहिं ॥१५१५॥  
 तं पासिऊण देवी जहाविहं कहइ निययदइयस्स ।  
 राया वि तमासासइ सुयजम्मब्भुदयकहणेण ॥१५१६॥  
 पइदियहपवह्तिरगरुय-गब्भपब्भारनीसहसरीरा ।  
 तग्गुणभारकं(क्कं)तव्व उच्छहइ नो पयं दाउं ॥१५१७॥  
 गब्भारंभपवुट्ठं थणभारं सामचुच्चुयं वहइ ।  
 वीरस्स व पाणत्थं जउमुद्दामुदियं देवी ॥१५१८॥  
 अंतो गब्भसमुब्भव-उज्जलतेयप्फुरंतपरिवेसा ।  
 सक्केण व रविखज्जइ कुंडलियसचावचक्केण ॥१५१९॥  
 सुरलोयअमयपाणोवत्तित्तगब्भाणुहावओ देवी ।  
 नो वंछइ आहारं कहमवि परिणामबीभच्छं ॥१५२०॥

संजाया डोहलया अच्चभुयभावसूयगा तीए ।  
 एक्रीकयचउसायर-जलेण ण्हायं(णं) करेमि त्ति ॥१५२१॥  
 संनिहियदप्पणे उज्झिऊण तिक्खग्गखग्गपट्टेसु ।  
 अवलोयइ मुहकमलं विसिद्धगब्भाणुहारे(वे)ण ॥१५२२॥  
 परिहरियमहुरगीयाए तीए सोक्खं जणंति सवणेसु ।  
 कढिणारोवियकोयंड-कढ(ह्)णुप्पत्तटंकारा ॥१५२३॥  
 सुहडनराण वि पायं निसुया वि हु जे जणंति उत्तासं ।  
 सीहेहिं तेहिं सह पंजरगएहिं सा कीलिउं महइ ॥१५२४॥  
 वहुंतम्मि पवहुय-भुवणाणंदम्मि वीरगब्भम्मि ।  
 पडिवक्खमंदिरेसु उप्पाया दीसिउं लग्गा ॥१५२५॥  
 अनिमित्ताइं अयंडे चलंति सीहासणाइं वेरीण ।  
 दिढवद्धा वि सिराओ पडंति वियडा महामउडा ॥१५२६॥  
 रायगिहोवरि बंधइ आवासं कोसिओ विवक्खाण ।  
 अइविरसमारसंती वैरिपुरं विसइ भल्लुंकी ॥१५२७॥  
 इयमाइ बहुप्पाए दट्टूणं ताण वैरिरायाण ।  
 सासंकाण पयट्टा मंता सह मंतिलोयम्मि ॥१५२८॥  
 एत्थंतरम्मि देवी सिंगारवई पवुहुगुरुगब्भा ।  
 सव्वंगनीसहंगी जाया वावारअसमत्था ॥१५२९॥  
 दाऊण उभयहत्थे जाणुसु आसंदियाओ उट्टेइ ।  
 मणिभित्तिपडिप्फलिए अप्पम्मि वि महइ आलंबं ॥१५३०॥  
 अणवरयं जणकीरंत-विविहकल्लाणसयसमिद्धाए ।  
 सिरदुव्वक्खयक्खेवो वि दुव्वहो कह न आभरणा ॥१५३१॥

अह सुपसत्थे दियहे पसत्थलग्गम्मि सोहणमुहुत्ते ।  
 देवी सुहंसुहेणं सुयं पसूया महातेयं ॥१५३२॥  
 एत्थंतरम्मि सहसा पसरंताणंदगरुयसंमद्धो ।  
 अंतेउरनारीणं समुट्ठिओ कलयलो तत्थ ॥१५३३॥  
 तो हिययनिव्विसेसा सिंगारवईए धाविदिक्कुरिया ।  
 वच्चइ नरिंदपासे कल्लाणसिरि त्ति नामेण ॥१५३४॥  
 नरनाह ! रिद्धिया वद्धसे त्ति देवीए पुत्तजम्मेण ।  
 राया वि निसुयमेत्ते वत्थाहरणाइं से देइ ॥१५३५॥  
 तो तम्मि चेव समए समागओ जोइसत्थपारगओ ।  
 अइरिंदियदिन्नाएस-सहसनियपयडियपहावो ॥१५३६॥  
 तीयाणागयसंपय-पयडत्थहत्थसुणियगंथत्थो ।  
 नामेण सिद्धचंदो दिन्नासीसो भणइ एवं ॥१५३७॥  
 देव ! सुणिज्जइ एवं पुराणसत्थेसु सगुणनिद्धोसो(से?) ।  
 एवंविहम्मि लग्गे सुभूमिचक्की पुरा जाओ ॥१५३८॥  
 पढमं तुच्छकिलेसं पुरओ परिणामसुंदरं एयं ।  
 लग्गं साहइ कज्जं जम्मि सुओ तुज्झ उप्पन्नो ॥१५३९॥  
 एत्थंतरम्मि सहसा अणाहया चेव तार-गंभीरा ।  
 वज्जंति दुंदुहीओ संखा वि य अकयमुहनाया ॥१५४०॥  
 पहयपडुपडह-मइल-मउंद-घण-तूरपडिरवमिसेण ।  
 दिसिवालेहिं वि मन्ने जम्ममहे कलयलो विहिओ ॥१५४१॥  
 मुत्तोव्व पुन्नरासी संतुदयकरो पुरोहिओ पत्तो ।  
 कुलवुट्ठाओ वि समयं पमोयगब्भाओ पविसंति ॥१५४२॥

बहलमलपंककलुसा मुक्का चिरबंधणेहिं खीणंगा ।  
 मुणिणो व्व गुत्तिपुरिसा निव्वुइसोक्खं अणुहवंति ॥१५४३॥  
 परिहरियरज्जनीई(इं?) निदोसंतेउरप्पवेसं च ।  
 दूरोसारियनीसेस-दारपडिहारसंरोहं ॥१५४४॥  
 समसामि-दासवग्गं समवुद्ध-सिसुं च समगुरु-लहुं च ।  
 समसिद्धा-सिद्धजणं सममत्ता-मत्तवग्गं च ॥१५४५॥  
 समकुलवहु-वेसजणं समपरियर-नयरपउरलोयं च ।  
 जायं वद्धावणयं नरिंदसुयजम्मदिवसम्मि ॥१५४६॥  
 कत्थवि गौरवियमहा-अमच्चनच्चणपवद्धियाणंदं ।  
 उम्मत्तथेरदासी-नट्टपयट्टंतजणहासं ॥१५४७॥  
 मइरापाणपरव्वसवेसापरिरंभमाणजरपुरिसं ।  
 नरवालअंखिसन्ना-नच्चाविज्जंतमंतियणं ॥१५४८॥  
 उब्भडघडदासीजण-पेल्लणरूसंतबहुपरि(री)वायं ।  
 विडवयणतो रचिज्जंत-कुट्टणीजणियजणहासं ॥१५४९॥  
 इय सव्वलोयलोयण-मणपरमाणंदकारच्चं तत्थ ।  
 वित्तं वद्धावणयं नरिंदगेहे महिद्धीए ॥१५५०॥  
 विरइज्जंति पहेसु कणयदिसमा सुवन्नरासीओ ।  
 उक्कुरुडिज्जंति तिएसु तहय मणिरयणरासीओ ॥१५५१॥  
 दिव्वाइं भूसणाइं सिंगाडपहेसु पुंजइज्जंति ।  
 तह चच्चरेसु मुच्चंति विविहवत्थाण संघाया ॥१५५२॥  
 तो(जो) जेणत्थी सो तं गहेउ सयमेव नत्थि से दोसो ।  
 इय चंपानयरीए घोसिज्जइ रायपुरिसेहिं ॥१५५३॥

इय सुयजम्मपवट्टिय-महोच्छवुप्पन्नपहरिसो राया ।  
 जा अच्छइ ताव तहिं जं जायं तं निसामेह ॥१५५४॥  
 गब्भत्थे च्चिय वीरा-हिवम्मि जे आसि वेरिराय(या)ण ।  
 नयरेसु महुप्पाया असरिससंजणियसंतासा ॥१५५५॥  
 सो पुव्व-दक्खिणावर-उत्तरराएहिं जाणिओ सव्वो ।  
 नियनियसिद्धाएसेहिं साहिओ कुमरवुत्तंतो ॥१५५६॥  
 जह सूरसेणरायस्स कयपसाएण देवराएण ।  
 सग्गाओ चुओ देवो दिन्नो पुत्तो समुप्पन्नो ॥१५५७॥  
 सो जइ कहवि लहेसइ अप्पाणं कम्मघम्मजोएण ।  
 तो तेण तुम्ह वंसाण मूलच्छेओ करेयव्वो ॥१५५८॥  
 एयनिमित्ता सव्वे उप्पाया तुम्ह नयर-भवणेषु ।  
 सो बालो तुम्हाणं उवट्ठिओ धूमकेउव्व ॥१५५९॥  
 इय नेमित्तिवयणाइं तेहिं सोऊण सव्वराईहिं ।  
 अन्नोन्नविरुद्धेहिं वि एक्कचओ(?) काउमारद्धो ॥१५६०॥  
 जावज्ज वि गब्भत्थो जाओ वा पावए न अप्पाणं ।  
 ताव तहिं गंतूणं जणयसमेयं वहामो तं ॥१५६१॥  
 इय मंतिऊण सव्वे दु(दू)यमुहेहिं वि जाव वीसासा ।  
 नियनियअणंतसेणा-संमद्देहिं व संचलिया ॥१५६२॥  
 एयं च पणिहिपुरिसेहिं तस्स सिरिसूरसेणरायस्स ।  
 पडिवक्खनरिंदाणं ववहरणं साहियं सव्वं ॥१५६३॥  
 अणवरयपयाणएहिं धत्ता चंपं महापुरिं सव्वे ।  
 संरोहं काऊण मुक्काइं सकीयसेन्नाइं ॥१५६४॥



तो सूरसेणराया नवभूमियभवणसिहरमारूढो ।  
पेच्छेइ नयणअपाविय-पेरंतं वैरिबलनिवहं ॥१५६५॥  
तो तइयच्चिय दियसे राया दट्टूण पुत्तमुहकमलं ।  
पुण तस्स नाम करणं करेइ रणरंगरसलुद्धो ॥१५६६॥  
सुविणयअणुहूयासेसवीरसेवो किरासि गब्भत्थो ।  
जाओ वि तइयदिवसे पवेढिओ वीरसेणाए ॥१५६७॥  
ता वीरसेणनामो होउ सुओ अज्ज अक्खलियपयावो ।  
गब्भत्थेण वि किर जेण दुत्थिया हुंति पडिवक्खा ॥१५६८॥  
तो निव्वत्तियकज्जो रक्खं काऊण पुत्त-पत्तीण ।  
ताडावइ रणमेरिं सत्तुसंतासजणणिं तो ॥१५६९॥  
भेरिस्वायन्नणसमररसुव्वूढहरिसरोमंचा ।  
निग्गच्छंति पुरीओ सपरियणा सूरसेण-भडा ॥१५७०॥  
करिनिबिडघणघडा-संदणोहघणतुरय-घट्टभडभीमं ।  
निग्गच्छइ नयरीओ सेत्रं सिरिसूरसेणस्स ॥१५७१॥  
कयकल्लाणसहस्सो राया जयवारणं समारूढो ।  
निग्गच्छइ नयरीओ पवेढिओ नियबलोहेण ॥१५७२॥  
परसेत्रं पि हु दट्टूणं सूरसेणं पुरीउ नीणंतं ।  
चिरदिट्ठभउभंतं संनद्धं सव्वओ सव्वं ॥१५७३॥  
पच्छागएहिं भणिओ असेसमंतीहिं सूरसेणो वि ।  
अरिसेत्रं अइबहुयं उच्छुक्को किं विनीहरिओ ? ॥१५७४॥  
दुग्गट्ठिया नरिंदा जिणंति छलदिन्नगुरुअवक्खंदा ।  
गरुयं पि सत्तुसेत्रं अइलहुयबला वि बुद्धिजुया ॥१५७५॥

तुह देव ! को न याणइ परक्कमं जं सुरिंदपच्चक्खं ? ।  
 एयाण पुणो बहुसो सिरिमि भगं तए खग्गं ॥१५७६॥  
 ता सव्वपयारेणं कुमरो च्चिय देव ! रक्खणीओ ते ।  
 कुमरावयारकज्जे एयाण वि एस पारंभो ॥१५७७॥  
 जइ अच्छसि कज्जवसा चंपामज्झमि कुमररक्खट्टं ।  
 ता एत्तिएण किं तुह परक्कमो अन्नहा होही ? ॥१५७८॥  
 तो भणइ सूरसेणो मा एवं भणह, देवया तस्स ।  
 काहंति देहरक्खं उवउत्ता वीरसेणस्स ॥१५७९॥  
 किं अलियं चिय संकह ? विग्घं चिय नत्थि वीरसेणस्स ।  
 मज्झवि न एत्थ मरणं जाणामि निमित्त-सउणेहिं ॥१५८०॥  
 संबोहिऊण राया मंतियणं एरिसेहिं वयणेहिं ।  
 तो रचियअग्गिबाणो अब्भिट्ठो सत्तुसेन्नस्स ॥१५८१॥  
 एत्थंतरमि गयणे किंनर-सुर-असुर-सिद्ध-गंधव्वा ।  
 विज्जाहरा य विविहा विज्जाहरिविंदपरियरिया ॥१५८२॥  
 पेच्छंति महासमरं सविम्हओब्भंतनयणतामरसा ।  
 वियडे वि गयणमग्गे ओवासं कहवि न लहंता ॥१५८३॥  
 नीसेसधरावलएसु केइ जे अत्थि वेरिनरवइणो ।  
 मित्ता वि अमित्ता वि य सव्वे चिय तत्थ ते मिलिया ॥१५८४॥  
 मित्ता वि सत्तुसंधड-पडिया सत्तुत्तणं पयासंति ।  
 सव्वेसिं रायाणं मिलिया किरं सोलस सहस्सा ॥१५८५॥  
 ताणं च सेन्नसंरवा पायं अक्खोहणीओ बत्तीसं ।  
 सव्वेसिं मिलियाणं इय माणं सत्तुसेन्नाणं ॥१५८६॥

सूरस्स सेन्नमाणं हवंति अक्खोहणीओ अडेव ।  
 रायाणं च सहस्सा अट्ट महामउडबद्धाणं ॥१५८७॥  
 ओच्छाइयं असेसं वियडं पि हु सूरसेणघणसेन्नं ।  
 अरिसेन्नेहिं घणेहिं व नहंगणे ओत्थरंतेहिं ॥१५८८॥  
 एत्थंतरे सुराणं जाओ कोलाहलो नहयलम्मि ।  
 किं पारद्धो एसो जयपलओ भूमिपालेहिं ? ॥१५८९॥  
 सयलसुरासुर-गंधव्व-सिद्ध-विज्जाहरेहिं मिलिऊण ।  
 उभयबलेसु वि दूओ पट्टविओ उभयरायाण ॥१५९०॥  
 पढमं समागओ सूरसेण-पासम्मि भणइ सुरदूओ ।  
 किं एस समाद्धो अणंतपाणिख(क्ख)ओ समरे ? ॥१६९१॥  
 जेहिं चिअ सह वेरं ते च्चिय जुज्झंतु नायगा कमसो ।  
 जिप्पइ ताण जएणं हारिज्जइ ताण हारीए ॥१५९२॥  
 तो भणइ सूरसेणो सम्मयमेयं ममावि सुरदूय ! ।  
 किंतु इमे बुज्झावसु समागया दुट्टरायाणो ॥१५९३॥  
 तो दूओ इयरेसिं रायाणं जाइ सन्निहाणम्मि ।  
 बुज्झाविऊण कमसो पहाणजुज्झे पयट्टेइ ॥१५९४॥  
 एत्थंतरम्मि सहसा सुरेहिं विज्जाहरेहिं मिलिऊण ।  
 बूहविभागट्ठि(ठि)याइं दूरं खे(खि)त्ताइं सेन्नाइं ॥१५९५॥  
 तो ओत्थरिओ सूरु दुकरो वि हु जायकरसहस्सो व्व ।  
 अन्नोन्नं तोलंतो आउहनिवहं करग्गेण ॥१५९६॥  
 उब्भियधयासहस्सं संट्ठावियछत्तचामराडोवं ।  
 बहुपहरणसंकिन्नं दिढसारहिणा समाउत्तं ॥१५९७॥

१. व्यूह ॥

सुसमत्थ-जियस्सम-अट्टतुरयजुत्तं महारहं सुदिट्ठं ।  
आरुहइ सूरसेणो निज्जियसत्ताससूररहं ॥१५९८॥  
तो पुब्बदेसराया बलवंतो गरुयविक्कमपयावो ।  
हरिसेणो नामेणं उवट्ठिओ सूरसेणस्स ॥१५९९॥  
जंपइ सगव्ववयणं एत्तो नरनाह ! देसु मह विट्ठिं ।  
किं अलियधीरिमाए मज्झ अवन्नं पयासेसि ? ॥१६००॥  
नणु मट्ठियामओ वि हु, पुरिसो परपरिभवग्गिडज्जंतो ।  
डहइ परं न हु भंती किमंग ! पुण मारिसो लोओ ? ॥१६०१॥  
तो भणइ सूरसेणो सच्चमिणं, को न मन्नए एयं ? ।  
नावत्रेउं पुरिसो भडेहिं किर होउ जो सो वि ॥१६०२॥  
किंतु ठियाओ कालेण जाओ तुम्हारिसे अवन्नाओ ।  
वयणेहिं न ताव तुहो-सरति नियफुरणहीणस्स ॥१६०३॥  
नियफुरणं चिय हरिसेणराय ! गरुयत्तणं पयासेइ ।  
सूरो समुग्गमंतो अप्पाणं कहइ कस्सावि ? ॥१६०४॥  
तो हरिसेणो सिरिसूरसेण-वयणेण कोविओ संतो ।  
आरोयइ कोदंडं संघेई मग्गणे पंच ॥१६०५॥  
पच्चारिऊण हरिणा मुक्का सूरो वि तस्स बिउणेहिं ।  
अद्धेहिं च्छिदइ सरे अद्धेहिं य छत्त-धयचिंधे ॥१६०६॥  
तो हरिसेणो वि परिफुरंतरोसारुणच्छिसयवत्तो ।  
पक्खिवइ संधिऊणं वीस सरे सूरसेणस्स ॥१६०७॥  
दक्खत्तेणं सूरो बिउणेहिं सरेहिं खंडइ सरोहं ।  
हरिणो सारहि-तुरया मउडं धणुयं च पाडेइ ॥१६०८॥

तो संधिऊण करणं हरिसेणो जाव एइ सूररहं ।  
 ता अद्धपहे अद्धिंदु-खंडिओ पडइ धरणीए ॥१६०९॥  
 पडिए हरिसेणनरा-हिवम्मि तो सूरसेणलोएहिं ।  
 निहओ निहओ त्ति समं कलयलसद्धो समुग्घुद्धो ॥१६१०॥  
 कलयलसद्धवियंभिय-अमरिसवसविप्फुरंतअहरोद्धो ।  
 उद्धेइ अहिनिविद्धो द्रविडनरिंदो दुराधरिसो ॥१६११॥  
 नामेण अमरतेओ जलहरगंभीरधीरसद्धेण ।  
 हक्कंतो सूरबलं वयणमिणं भणिउमाढत्तो ॥१६१२॥  
 किं एत्थ कोल्हुयाण व तुम्हाणं कलयलेण किर होइ ? ।  
 किं ओहद्धे चुलुए सायरसलिलाइं सूसंति ? ॥१६१३॥  
 तो भणइ सूरसेणो कुणसु करे अमरतेय ! कोयंडं ।  
 एयाण कलयलेणं किं कज्जं निप्फलेणम्ह ? ॥१६१४॥  
 नरनाह ! घडसहस्सं ज्झंपिज्जइ कहवि केणवि नएण ।  
 न उणो उच्छिखलजण-मुहाण इह ज्झंपणं अत्थि ॥१६१५॥  
 तो भणइ अमरतेओ एवमिणं किंतु झाहि मह समुहो ।  
 जेण तुह सूरनरवर ! नियसामत्थं पयासेमि ॥१६१६॥  
 तो भणइ सूरसेणो कइयावि परम्मुहो रणे नाहं ।  
 पयडसु नियसामत्थं किं बहुणा एत्थ भणिएण ? ॥१६१७॥  
 सहसारोवियधणुगुण-पकड्डणुल्लसियधोरघोसेण ।  
 एक्कमुडीए मुक्का तीस सरा अमरतेएण ॥१६१८॥  
 सूरेण वैरिबाणा तावंतसरेहिं खंडिया तुरियं ।  
 जा न कुणइ संधाणं ता पुण सूरेण दह मुक्का ॥१६१९॥

एगेण धणुं च्छिन्नं च्छिन्नं (?चिंधं?) एगेण मौडमेगेण ।  
 एगेण हओ सूओ छएहिं पुणो छत्त-रह-तुरया ॥१६२०॥  
 तो अमरतेयराया आरूढो दक्खयाए अन्नरहं ।  
 तह जुज्झिउमारद्धो पुणो वि सह सूरसेणेण ॥१६२१॥  
 मुणिऊण अमरतेओ दुद्धरिसधणुद्धरं निवं सूरं ।  
 तो कुणइ करे निसियं कुंतं दंडं व जमराओ ॥१६२२॥  
 तं भामिऊणं घल्लइ सूरु वि य गरुयमोग्गरत्थेण ।  
 अद्धवहे च्चिय कुंतं सयखंडं कुणइ अमरस्स ॥१६२३॥  
 तो खिवइ अमरतेओ करेण उब्भामिऊण लोहमयं ।  
 दसभारसहस्सकयं कणाउहं सूरसेणस्स ॥१६२४॥  
 तं गयणे दट्ठूणं सुदुन्निवारं जणस्स मच्चुव्व ।  
 घुडो सुरासुरेहिं हाहासद्धो सदुक्खेहिं ॥१६२५॥  
 तं एतं (एतं?) दट्ठूणं सूरु सूरुव्व गयणमुप्पइओ ।  
 कणयं करेण कि(गि?)णहइ पुण मेल्लइ अमरतेयस्स ॥१६२६॥  
 तो तेण अमरतेओ सरहो संचुन्निओ तहा तत्थ ।  
 जह राय-रहवराणं धूली वि न तेण सच्चविया ॥१६२७॥  
 एत्थंतरम्मि गयणे सुरेहिं असुरेहिं खेयरेहिं च ।  
 दिन्नो साहुक्कारो सविम्हयं सूरसेणस्स ॥१६२८॥  
 तो ओत्थरिओ सहसा उब्भडभिउडीए भीमभालयलो ।  
 नामेण इमरसीहो पच्छिमवसुहाहिवो राया ॥१६२९॥  
 जो निव्वडियपरक्कम-भुयबलनिद्वलियगरुयपडिवक्खो ।  
 नामेण जस्स दूरं नासंति रणंगणे रिउणो ॥१६३०॥

नीसेसाउहकुसलो जुद्ध-निजुद्धेसु तत्तविन्नाया ।  
 रणदक्खो करणविऊ च्छलघाई वंचियपहारो ॥१६३१॥  
 सो सावहाणलोयण-सुर-किन्नर-खेयरेहिं सच्चविओ ।  
 संतज्जंतो सूरं उवड्ढिओ भणिउमाढत्तो ॥१६३२॥  
 सूरौत्ति नाममेत्तेण उत्तुणो कीस भमसि रणमज्झे ? ।  
 मा मारावसु अप्पं एयाण सुराण वयणेण ॥१६३३॥  
 एयाण कोऊ(उ)हल्लं तुज्झ पुणो दोन्नि संसए ङ्गति ।  
 रज्जं च नियसरीरं मा चयसु इमाइं निक(क्क?)ज्जं ॥१६३४॥  
 जे तुमए किर निहया समरे हरिसेण-अमररायाणो ।  
 सो वि मए तुह खमिओ अवराहो कयपसाएण ॥१६३५॥  
 ता रक्ख पयत्तेणं अप्पाणं जीवियं च रज्जं च ।  
 अप्पसुयं दुज्जायं दुड्ढिवियारं म्हे नरनाह ! ॥१६३६॥  
 सो तुज्झ तुह कुलस्स य देसस्स पुरस्स विहवरज्जस्स ।  
 पुत्तमिसेणं जाओ जं(ज)भोव्व सव्वंकसो राय ! ॥१६३७॥  
 एत्थंतरम्मि सूरौ अप्पसुपुत्तं ति वयणसवणेण ।  
 द्ढोद्धभिउडीभीमो पडिवक्खं भणिउमाढत्तो ॥१६३८॥  
 रे डमरसीह ! तुह नत्थि कोइ दोसो इमं भणंतस्स ।  
 दोसो इमस्स अस्सच्च-भासिणो तुज्झ वयणस्स ॥१६३९॥  
 जं चेव दोसदुद्धं निग्गहणिज्जं तमेव रायाण ।  
 रक्खेज्ज पयत्तेणं निहणिस्सं तुह मुहं एयं ॥१६४०॥  
 इय भणिऊ णं सूरौ विज्जक्खित्तेण उड्ढिओ दूरं ।  
 तं वामपयपहारेण हणइ सत्तुं मुहपएसे ॥१६४१॥

हंतूण जाव तं जाइ नियरहं ताव डमरसीहेण ।  
 धरिओ पायंमि पसारिउद्धभुयडंडजुयलेण ॥१६४२॥  
 धरिओ धरिओ त्ति नहम्मि तक्खणच्चेय कलयलो जाओ ।  
 दुज्जणराएहिं पुणो सहत्थतालेहिं व उवहसियं ॥१६४३॥  
 एत्थंतरम्मि सूरु अमूढलक्खो तमियरपाएण ।  
 हंतूणं वत्थयले, पाडइ उव्वमिररुहिरोहं ॥१६४४॥  
 उम्मुक्कवामपाओ वच्चइ नियरहं पुणो सूरु ।  
 जा कुणइ करे चावं ता सहसा उट्ठिओ डमरो ॥१६४५॥  
 उत्तरइ रोसरज्जंतनयणजुयलो प्फुरंतअहरोट्ठो ।  
 उक्खिवइ रहं सहयं ससूरसेणं ससूयं च ॥१६४६॥  
 उच्चल्लिऊण गयणे भामइ जा ताव सूरसेणो वि ।  
 दाऊ ण महाफालं ससारही जाइ तस्स रहं ॥१६४७॥  
 ओसारिय चिरसारहिट्ठणो अह सूरसारही ट्ठाइ ।  
 उट्ठं भमाडिऊ णं अप्फालइ रहवरं डमरो ॥१६४८॥  
 जा जाइ सकीयरहं ता नियइ ससारहिं रहे सूरं ।  
 चिंतइ मए न एसो निवाडिओ किं सह रहेण ? ॥१६४९॥  
 मुट्ठीपहयं गयणं अलियं तुसखंडणं मए विहियं ।  
 कट्ठइं चिय संचुन्नियाइं न उणो महासत्तू ॥१६५०॥  
 अहवा किमेत्थ नट्ठं ? इय भमिउं रोसतंबिरनिडालो ।  
 निहणंतस्स वि सूरस्स चडइ सरहं महासुहडो ॥१६५१॥  
 उट्ठालिऊ ण सिरिसूरसेण-हत्थाओ सव्वसत्थाइं ।  
 बलिचंडाए(?) नरिंदं धरइ भुयादंडजुयलेसु ॥१६५२॥



धरिओ च्विय उभयभुएसु सूरसेणो सकीयचरणेण ।  
 तं वच्छयले ताडइ पुणो वि मुहनितरुहिरोहं ॥१६५३॥  
 तो सूरसेणदिढपाय-पह(हा)रवियणापरव्वसो सहसा ।  
 मुच्छानिमीलियच्छो रहोवरिं पडइ लुलियंगो ॥१६५४॥  
 तो सूरु निक्कारिम-तप्पोरुसरंजिओ सयं कुणइ ।  
 वत्थंचलेण पवणं सिसिरजलेणं च सिंचइ य ॥१६५५॥  
 भणइ समासत्थं तं इहेव सरहे द्विओ पुणो जुज्झं ।  
 अहयं पुण अन्नरहं पज्जुत्तं आरुहिस्सामि ॥१६५६॥  
 तो गरुयत्तणपिसुणं ववहरणं पेच्छिऊण सूरस्स ।  
 पुण भणइ डमरसीहो अहिमाणधणो महासुहडो ॥१६५७॥  
 हे सूरसेण ! दिन्ना कन्नच्चिय घेप्पए न जयलच्छी ।  
 तुह सेवियमग्गेणं हडेण सरहं गमिस्सामि ॥१६५८॥  
 ता होज्ज सावहाणो मा भणिहसि जं न साहियं मज्झ ।  
 इय भणिऊ णं सूरु पक्खित्तो तेण गयणम्मि ॥१६५९॥  
 तो लहु संधाणविसंधेएहिं अद्धेदु-सरसमूहेहिं ।  
 दो खंडिस्सइ सूरं निवडंतं जाव किर डमरो ॥१६६०॥  
 ता सूरुणेण वि गयणे दूरं खेत्तेण एकूखयराओ ।  
 हढहरियफरकिबाणेण आहओ डमरसीहो वि ॥१६६१॥  
 पडियम्मि डमरसीहे गरुयाइं वि ताइं सत्तुसेन्नाइं ।  
 घणवंद्राइं सुपयंडपवणफट्टाइं नट्टाइं ॥१६६२॥  
 एत्थंतरम्मि सहसा संधीरंतो असेससेन्नाइं ।  
 अइगरुयबलपरक्कम-माहप्पसमुत्तुणो सुहडो ॥१६६३॥

नीसेसकुलमहीहर-परिवाडिविराड्ओभयपएसो ।  
मेरुच्च पलयकाले संचलिओ भुयणभयहेऊ ॥१६६४॥  
अइगरुयनियपरक्कम-तिणलहुपरिकलियसयलजयसुहडो ।  
भुयणेक्कमहावीरो अप्पडिहयपयडियपय(या)वो ॥१६६५॥  
निस्सीमउत्तरावहनिक्किंतियबहुतुरुक्कवलनिवहो ।  
नरसीहो नामेणं समागओ समरभूमीए ॥१६६६॥  
सो पुच्च-दक्खिणावर-निहयनरिंदाण सच्चसेत्तेहिं ।  
नियसामिमारणुप्पन्नगरुयरोसेहिं परियरिओ ॥१६६७॥  
विरइयचक्कच्चूहो 'विसमो सत्तु' त्ति च्छडियववत्थो ।  
समकालमोत्थरंतो अभि(ब्भि)ट्टो सूरसेणस्स ॥१६६८॥  
तं एतं दट्ठूणं रणरसपसरंतपुलयपरिकलिओ ।  
पडिपेत्थिऊ ण सरहं नरसीहं जा पडिच्छेइ ॥१६६९॥  
ता तेहिं पुच्चसंकेयसेत्तेदिन्नावयासमग्गेण ।  
गंतूण तुंवमज्जे हक्कइ नरसीहरायाणं ॥१६७०॥  
जह जह अंतो पविसइ तह तह सेत्तेहिं निविडवंधेहिं ।  
वेट्टिज्जइ नरनाहो मेहेहिं व दिणयरो गयणे ॥१६७१॥  
तो समकालं नीसेस-दिसिवहुल्लसियकलयलरउदं ।  
लंघियखत्तायारं हम्मइ सूरु वलोहेहिं ॥१६७२॥  
सरब्भ-सर-सत्ति-सच्च(?)ल-तिसूल-पासासि-पट्टिस-घणेहिं ।  
चावल्ल-सेल्ल-भल्लय-भल्लीहिं निरुद्धदिसियक्कं ॥१६७३॥  
खग्गु-ग्गकुं गि-मोग्गर-मसुंढि-मग्गण-फुलिंगपज्ज(ज)लंतं ।  
घणकुंत-चक्क-कत्तरि-कणय-सयावत्तदुब्भारं ॥१६७४॥

इय एवमाइबहुविह-आउहनिवहेहिं सुहडमुक्केहिं ।  
 सो सूरसेणराया समकालं हंतुमारब्धो ॥१६७५॥  
 एत्थंतरम्मि गयणे असमंजससमरजायखेएहिं ।  
 मुक्को हाहाक्कारो विज्जाहर-सुरसमूहेहिं ॥१६७६॥  
 समयं पहरंताण वि ताण असेसाण परबलभडाण ।  
 अखुहियसत्तो सूरु नरसीहसमीवमणुपत्तो ॥१६७७॥  
 जह जह निवडइ देहे परबलसुहडाण आउहसमूहं(हो) ।  
 तह तह समहियसंजायरोसतंबिरच्छो पुरो धाइ ॥१६७८॥  
 अणवरयधणुविणिग्गय-वाणासणिनिहयसत्तुसंघट्टो ।  
 अरिवाहिणिं गसंतो जमो व्व सूरु समोत्थरइ ॥१९७९॥  
 तो नरसीहो जंपइ रे रे ! मह सेन्निया ! समोत्थरह ।  
 मारह सूरं तुरियं जाव न मह संमुहं एइ ॥१६८०॥  
 एत्थंतरे निरंतर-संघट(ट्ट)घडंतगयघडानिविडं ।  
 सरहो ससारहि च्विय आढत्तो चमढिउं सूरु ॥१६८१॥  
 निहयम्मि सारहिम्मि य खंडाखंडीकयम्मि य रहम्मि ।  
 विरहो वि सूरसेणो सीहोव्व करीसु विप्फुरइ ॥१६८२॥  
 एत्थंतरम्मि गयणे जाओ देवाण एरिसो मंतो ।  
 अवहरिऊ ण नरिंदं रक्खेमो वैरिमज्झाओ ॥१६८३॥  
 इय चिंतिऊ ण सव्वेहिं तत्थ देवेहिं खेयरेहिं च ।  
 जुज्झंतो अवहरिओ सूरनरिंदो हढेण तहिं ॥१६८४॥  
 तो वीररसपरव्वस-चित्तो ताणेव देव-खयराण ।  
 पहरंतो अइदक्खो सव्वेहिं वि भणिउमाढत्तो ॥१६८५॥

हे सूरसेण ! मा पहर अम्ह गुणजायपक्खवायाण ।  
 असमंजससमराओ अवहरिओ राय ! अम्हेहिं ॥१६८६॥  
 तो पच्चागयचेयन्नजायसत्थो पलोयए सूरौ ।  
 अप्पाणं गयणयले देवा-सुर-खयरपरियरियं ॥१६८७॥  
 सूरैण सुरा भणिया अवहरिओ किंनिमित्तमहमेत्थ ? ।  
 जीवंतो कह पेच्छामि नियसुयं वैरिहम्मंतं ? ॥१६८८॥  
 मज्झ मयस्स उ जं होइ किंपि तं होउ नत्थि मणखेओ ।  
 ता अज्जवि मं मुंचह निहणिस्सं वैरिसंघट्टं ॥१६८९॥  
 देवाइएहिं भणियं सच्चमिणं भणइ सूरनरनाहो ।  
 नियपुत्तरक्खणट्टं एयस्स इमो रणारंभो ॥१६९०॥  
 एयाण वि रायाणं पुत्तवहत्थं च एस पारंभो ।  
 ता सव्वहा वि रक्खह सूरसुयं सूरभज्जं च ॥१६७१॥  
 एत्थंतरम्मि सहसा सिंगारवई सवीरसेणा य ।  
 विज्जाहरेहिं नीया सूरनरिंदस्स पासम्मि ॥१६९२॥  
 तो सूरसेणसूडियइयरदिसारायजायनिकं(क्कं)ट्टं ।  
 नरसीहं चिय मन्नंति साभिभावेण सेत्राइं ॥१६९३॥  
 तो सूरसेणसेत्रं निहयं नाऊण संगरे सूरं ।  
 पुत्तं पि अपेच्छंत अनायगं दीणमणसं च ॥१६९४॥  
 किंकायव्वविमूढं चंपं विसिऊण परबलअसज्झं ।  
 तह कयवेढं अच्छइ नरसीहनरिंदसेत्रेण ॥१६९५॥  
 कालक्कमेण अंतो खीणे धण-धन्न-जवससंभारे ।  
 संबोहिऊण पविसइ पहाणलोयं पि नरसीहो ॥१६९६॥

सो च्विय असेसवसुहायलम्मि चंपाए रायहाणीए ।  
 नरनाहो संजाओ नरसीहो सूरविवरोकखे ॥१६९७॥  
 एवं च ताव एयं पत्तो सूरुो वि तेहिं देवेहिं ।  
 सकलत्तो य सपुत्तो अवहरिओ गयणमज्झम्मि ॥१६९८॥  
 चिंतंति कत्थ एयं पुव्वड्डिईसमहियप्पहावम्मि ।  
 रज्जम्मि निरूवेमो निक्कारिमविक्रमगुणहं ? ॥१६९९॥  
 तो मच्चलोयवइयर-कहणनिउत्तेहिं पणिहिदेवेहिं ।  
 सोहम्मतियसणाहस्स साहिओ सूरवुत्तंतो ॥१७००॥  
 तेणावि ओहिणा जाणिरुण इंदेण एवमाइहं ।  
 धाईसंडे दीवे भारहवासे अउज्जाए ॥१७०१॥  
 नामेण विमलचंदो उप्पन्नो तत्थ चक्कवड्डित्ति ।  
 सो य अपुत्तो संपइ कालगओ देवजोएण ॥१७०२॥  
 तस्स रज्जम्मि एयं नरनाहं सूरसेणमउलबलं ।  
 द्वावेह पयत्तेणं नेऊणं तत्थ दीवम्मि ॥१७०३॥  
 इय तं सक्काएसं लद्धूणं सुरवरा पहिड्डमणा ।  
 जा नेति धाइसंडे सूरं भज्जा-सुयसमेयं ॥१७०४॥  
 ता गयणे देवीए परियत्तंतीए तीए थणवहं ।  
 तो कहवि देवजोगा निच्छूढो निवडिओ पुत्तो ॥१७०५॥  
 'पडिओ पडिओ'त्ति 'धस'त्ति दो वि मुच्छानिम्मी(मी)लियच्छीणि ।  
 देवाण धरंताण वि पडियाइं महीयले सहसा ॥१७०६॥  
 सिसिरोवयारसंपत्तचेयणाइं च ताइं जायाइं ।  
 आसासिरुण देवा गवेसिउं तं समालग्गा ॥१७०७॥

पडिपव्वयं पडिगुहं पडिनिज्जरणं च पडिगिरिणइं च ।  
 पडिरुक्खं पडिवणमवि अन्निसिओ सो न दिट्ठो य ॥१७०८॥  
 तो नरवइणा भणियं किमहं रज्जेण साहइस्सामि ? ।  
 एत्थेव रन्नमज्जे पाणच्चायं करिस्सामि ॥१७०९॥  
 तो सरलद्धुम-सुरदारु-अगरुचंदणसुयंधकठे(ट्टे)हिं ।  
 विरयइ चियं नरिंदो पुण ण्हायइ सेलसरियाए ॥१७१०॥  
 जा सकलत्तो ण्हाऊण तत्थ पुण प(जा?)इ चीहं(इ)समीवम्मि !  
 ता गयणे जंतेणं चारणमुणिणा इमं भणियं ॥१७११॥  
 “जीवंतस्स नरेसर ! होही तुह संगमो नियसुएण ।  
 मा अप्पघायगत्तण-पावेणं लिप अप्पाणं ॥१७१२॥  
 जं परिणामे विरसं जं च न पच्चक्खदिट्ठफलसिद्धिं ।  
 जं आगमे विरुद्धं सेवंति न तं बुहा कज्जं” ॥१७१३॥  
 इय चारणमुणिवयणं सोउं सिरिसूरसेणणरणाहो ।  
 उज्जीविओव्व सहसा पणद्धुक्खोव्व संजाओ ॥१७१४॥  
 विरमइ मरणाओ तओ नीओ देवेहिं धाइसंडम्मि ।  
 ओज्जाए पुरवरीए पयट्ठिओ चक्कुवट्टिपए ॥१७१५॥  
 पालइ जहासुहेणं पयाओ सेवेइ रज्जकज्जाइं ।  
 सुयविप्पओयदुहिओ विसयसुयं(हं) नेय अहिलसइ ॥१७१६॥  
 रज्जं रज्जसिरिं चिय माहप्पं विक्कमं पयावं च ।  
 सूरो तणं व मन्नइ सुयविरहे जीवियव्वं च ॥१७१७॥  
 ज्झूरइ अहिमाणधणो हियए ज्झिज्जइ य नियसरीरेण ।  
 बाहिरअलक्खभावो चितइ नाणाविहवियप्पे ॥१७१८॥

अइतुच्छं चिय रज्जं इंदत्तं पि हु न देइ मह सोक्खं ।  
 जं वैरिपराहवदुत्थियस्स सुयविरहदुहियस्स ॥१७१९॥  
 दारिइं चिय सोहइ अहिमाणधणाण नवर परदेसे ।  
 रज्जं तु अदीसंतं सत्तु-मित्तेहिं तावेइ ॥१७२०॥  
 दूरीकयनियसेसस्स मज्झ सुयविरहियस्स दीणस्स ।  
 सत्तुपराभवियस्स य रज्जमिणं गोत्तिबंधो व्व ॥१७२१॥  
 निहओ नरसीहेणं सूरुो त्ति जयम्मि जो हुओ अजसो ।  
 तं मज्झ वीरसेणो पुत्तो च्विय जइ परिप्फुरइ ॥१७२२॥  
 दिद्धा एगभवम्मि दोन्नि भवा नवर सूरसेणेण ।  
 राया जंबूद्धीवे पुण जाओ धाइसंडम्मि ॥१७२३॥  
 एयाइं ताइं विसरिसहयविहिणो विलसियाइं विरसाइं ।  
 तीरंति जाइं न मणे वि चिंतिउं निउणबुद्धीहिं ॥१७२४॥  
 जं न कयाइ वि सुव्वइ साहिप्पंतं व जणइ जं अलियं ।  
 हेलाए विही तं चिय अकज्जनिरओ कुणइ कज्जं ॥१७२५॥  
 विहिपरवसाण पुरिसाण एत्थ सव्वंपि होइ विवरीयं ।  
 पच्चक्खं मह जायं अप्पाणुहवेण नीसेसं ॥१७२६॥  
 चिंतिज्जंतो वि मणे उतासं जणइ जो नरिंदाण ।  
 सो वि मह विक्कमो इह रणम्मि विहिणा कओ विहलो ॥१७२७॥  
 एगागी जेण रणे तणं व मन्नामि सत्तुसंघायं ।  
 तं पि मह साहसं विहिवसेण हासं जणे जायं ॥१७२८॥  
 पयडो जो वैरिवहेण सव्वदेवाण खेयराणं च ।  
 सो ववसाओ विहिणा विसायभावेण मह जणिओ ॥१७२९॥

सो अवटुंभो मह अग्गिणेव्व कट्ठाइं बहुरिउबलाइं ।  
 आसंधियाइं जेणं सो विहुओ निप्फुरो एत्थ ॥१७३०॥  
 इय जेहिं चिय पुरिसो विक्कममाईहिं माणमुद्धरइ ।  
 ताणि चिय माणभंसकारणं मह पवन्नाइं ॥१७३१॥  
 इय एवमाइ बहुविह-वियप्पसंकप्पदुत्थिओ राया ।  
 अच्छइ परदेसागम-सुयविरहदुहेहिं संतत्तो ॥१७३२॥  
 देवी वि पुत्तनिवडणसमहियसंजायसोयसंहारा ।  
 कुररिक्क करुणसद्दा रोयंती चिद्धइ दुहेण ॥१७३३॥  
 दोहिं पि ताण चारण-मुणिवयणालंबणेक्कजीयाण ।  
 सिरिवीरसेणदंसण-पच्चासाए दिणा जंति ॥१७३४॥  
 एत्तो य वीरसेणो परिवत्तंतीए तीए थणवटुं ।  
 सिंगारवईहत्थाओ निवडिओ देवजोएण ॥१७३५॥  
 भवियव्वयानिओएण नियइ दट्ट(ढ)रज्जकरिसिओ वीरो ।  
 वणदेवयाहिं गहिओ अद्धवहे चेव निवडंतो ॥१७३६॥  
 गहिऊण विडयगिरियडविउरुव्वियतुंगभवणसिहरम्मि ।  
 मेल्लंति पयत्तेणं कोमलतूलीमयत्थुरणे ॥१७३७॥  
 तो अण(णि)मिसनयणाओ विम्हयरसजायगरुयहरिसाओ ।  
 जोयंति वीरसेणं सव्वंगावयवरमणीयं ॥१७३८॥  
 स(सु)कुमारपाणिपायं पसत्थबहुलक्खणंकियसरीरं ।  
 अणुवमरूवविणिज्जिय-ससुरासुरमणुयलोयं च ॥१७३९॥  
 दट्टूण तं तहाविह-सुपसत्थपवित्तलक्खणसरीरं ।  
 जंपंति देवयाओ परोप्परं जायहरिसाओ ॥१७४०॥



सहि ! पेच्छ एत्थ अज्ज वि जयम्मि दीसंति पुरिसरयणाइं ।  
 दिट्ठेहिं जेहिं दूरं देवाण वि णासए गव्वो ॥१७४१॥  
 जेण हरी गुरुगव्वो अप्पडिहयवीरिएण वज्जेण ।  
 तं चिय इमस्स दीसइ चरणतलेसुं परिलुलंतं ॥१७४२॥  
 कुलमहिहरसिरितिलओ पयसंठियमीण-कमल-संखउलो ।  
 पउमो दहोव्व एसो सोहइ संपुत्रसिरितिलओ ॥१७४३॥  
 अंगाइं चिय साहंति जस्स सुपसत्थलक्खणधराइं ।  
 उत्तमकुलसंभूइं तिसमुद्धमहीवईतं(इत्तं) च ॥१७४४॥  
 ता एस कोइ अइगरुय-वंससंभूयभूमिपालस्स ।  
 होही पुत्तो रिउणा अवहरिओ, तेण इह खित्तो ॥१७४५॥  
 तो ताहिं वि नाणेणं सम्मं विन्नायसव्वभावाहिं ।  
 अइगरुयपयत्तेणं आढत्तो पालिउं वीरो ॥१७४६॥  
 मणचिंतियसंपज्जंतसुलहनीसेसवत्थुजाईण ।  
 देवीण तं न भुयणे जं किर संपज्जइ न ताण ॥१७४७॥  
 अंतोगरुयपवड्ढंत-पुत्रवित्थारियंगसोहव्व ।  
 अणवरयं वड्ढंतो कुमारभावं च सो पत्तो ॥१७४८॥  
 अह तत्थ ताहिं सुयनिव्विसेसबुद्धीहिं गरुयरिद्धीए ।  
 चूलोवणयणमाईणि सव्वकज्जाइं विहियाइं ॥१७४९॥  
 तो अवहिणा वियाणिय-विन्नाणागमकलारहस्साहिं ।  
 देवीहिं कओ कुमारो विन्नाण-कलाकुसलबुद्धी ॥१७५०॥  
 गयणे किंकररहियं तेण चलंतेण चलइ सियच्छत्तं ।  
 उभयंसेसु सयं चिय पडंति सियचामरुग्घाया ॥१७५१॥

टि. १. चूला-शिखा, उपनयनं इत्यादीनि ॥

परियड्ड गिरियडेसुं गिरिनइपुलिणेषु काणणवणेषु ।  
वणसरवरेसु वीरो उज्जाण-वणेषु रम्मेसु ॥१७५२॥  
अन्नायकुलववत्थो अमुणियपिउ-माइ-सयणसंबंधो ।  
देवकुमारो व्व मणोहरागिई पयइदुद्धरिसो ॥१७५३॥  
अह अन्नया भवं(मं)तो संपत्तो गिरनईए पुलिणम्मि ।  
पेच्छइ तावसलोयं देवच्चण-ण्हाण-जवनिरयं ॥१७५४॥  
सो तेहिं तावसेहिं सविम्हउब्भंतनयणवत्तेहिं ।  
दिट्ठो अदिट्ठुप्पो परोप्परं कयवियप्पेहिं ॥१७५५॥  
किं एस कोइ विज्जाहरिंदपुत्तो व्व भमइ भयरहिओ ।  
नमि-विनमिवंसजाओ पंचसिहासोहियसिरग्गो ? ॥१७५६॥  
अहवा वि भूमिगोयर-नरिंदपुत्तो व्व एस संभविही ।  
कारणवसेण केणवि समागओ एत्थ रन्नम्मि ॥१७५७॥  
पेच्छइ अदिट्ठुप्पुवं माहप्पमिमस्स रायपुत्तस्स ।  
जं च्छत्तमणालंबं पडंति चमरा य निरवेक्खा ॥१७५८॥  
एसो य परियणो से अमाणुसायारसरिसववहरणो ।  
ता किं देवकुमारो कहन्नहा देवपरिवारो ? ॥१७५९॥  
इय एवमाइबहुविह-वियप्प-संकप्पसंकुलमईण ।  
तावसमुणीण पासं समागओ वीरंणेणो वि ॥१७६०॥  
तो परियणेण भणियं देव ! इमे तावसा, कुण पणामं ।  
तो सव्वतावसाणं जहक्कमं पणमइ कुमारो ॥१७६१॥  
तो तावसेहिं जुगवं सायरवयणाहिं उन्नयकरेहिं ।  
अहिणंदिओ कुमारो अवितहआसीसदाणेण ॥१७६२॥

पुट्टो कुसलोदंतं कुमरो वि य ताण कहइ नियकुसलं ।  
 पुच्छइ कत्थ पएसे भयवं ! तुम्हासमो एत्थ ? ॥१७६३॥  
 तो तावसेहिं कहिओ एत्तो जजमाण ! नाइदूरम्मि ।  
 अम्हाण आसमपओ तत्थच्छइ कुलवई अम्ह ॥१७६४॥  
 तो तावसजणपयडिय-मग्गेणं जाइ आसमपयम्मि ।  
 पणमइ गंतूण तओ कुलवइणो परमविणएण ॥१७६५॥  
 कुलवइणा वि ससंभम-सप्पणय-सगौरवेहिं वयणेहिं ।  
 आणंदिओ कुमारो जहत्थआसीसदाणेण ॥१७६६॥  
 दिन्नासणोवविट्ठो परिपुट्टो कुसलवट्टमाणं वि ।  
 सो भणइ तुह पसाएण कुसलमेवम्ह सयकालं ॥१७६७॥  
 असरिससरीर-सोहग्ग-रूव-लावन्नलडहसव्वंगो ।  
 दिट्ठो तावस-तावसि-जणेहिं संजणियअच्छरिओ ॥१७६८॥  
 तं अच्चब्भुयभुवणेक्क-भूसणब्भुयभव्वयाकलियं ।  
 दट्ठूण पुलइयंगो अह चिंतइ कुलवई एवं ॥१७६९॥  
 दंसणमेत्तेणं मह इमस्स विप्फुरइ दाहिणं चक्खुं ।  
 रोमंचिज्जइ अंगं नीणइ अच्छीसु बाहोहो ॥१७७०॥  
 ता किं कारणमिह संभवेज्ज ? न य पुव्वपरिचओ ताव ।  
 एयाणि य पायं अवितहाणि मह तणुनिमित्ताणि ॥१७७१॥  
 तो कुलवइणा भणियं पुत्तोव्व पिओ सिणिद्धबंधुव्व ।  
 निक्कारिमो व्व मित्तो आणंदसि कुमर ! दिट्ठो वि ॥१७७२॥  
 ता कहसु को तुमं ? कत्थ वससि ? के तुज्झ जणणि-जणया

य ? ।

किं च कुलं ? किं नामं ? असेसनियवइयरं मज्झ ॥१७७३॥  
 तो भणइ वीरसेणो नाहं परमत्थओ वियाणामि ।  
 मह जणणीओ असेसं भयवं ! जाणंति परमत्थं ॥१७७४॥  
 तो भणइ कुलवई पुण तुह काओ कुमर ! एत्थ जणणीओ ? ।  
 कुमरपरिग्गहमज्झे(ज्झा?) ता भणियं एगदेवेण ॥१७७५॥  
 भयवं ! किं तुह देवाण वइयरेणं वियाणिण्णावि ? ।  
 न कयाइ वि देवाणं अंतोसुद्धी करेयव्वा ॥१७७६॥  
 तो कुमरेणं भणियं भयवं ! तुह मज्झदंसणुब्भूओ ।  
 जो पसरइ आणंदो तत्थ इमं कारणं होही ॥१७७७॥  
 जम्मंतरसंगयगरुयपेम्मसंभारभावियमईणं ।  
 दिट्ठमि भवंतरसज्ज(ज?)णम्मि आणंदए हिययं ॥१७७८॥  
 अहवा जइणो तुब्भे मेत्ती सव्वेसु तुम्ह सत्तेसु ।  
 नियपयईए वियंभइ सव्वत्थ वि सकरुणं चित्तं ॥१७७९॥  
 एवं साहारणमाणसाण समसत्तु-मित्तचित्ताण ।  
 मह विसए कह जायं साहसु करुणापरं हिययं ? ॥१७८०॥  
 ता कहह नियसरूवं जइ उचियं होइ कहणजोग्गा वा ।  
 अम्हे, ता काऊणं पसायमइकोउयपराण ॥१७८१॥  
 तो अब्भंतरपसरंतमन्नुभरभरियगलसिराजालो ।  
 गुरुदुक्खं पयडंतो सगग्गयं कुलवई भणइ ॥१७८२॥  
 किं पुत्त ! तुह कहिज्जइ लज्जिज्जइ जं सयं कहंतेहिं ।  
 निम्मज्जायसकज्जावहं च चरियं मह निसंसं ॥१७८३॥  
 जइ वि हु लज्जावणयं जइ वि हु जणनिंदणीयमच्चत्थं ।

तुमए अलंघवयणेण पुच्छियं तहवि साहिसं ॥१७८४॥  
 इह पुत्त ! चंपनयरी सूरसेणो त्ति आसि नरनाहो ।  
 तस्स घरे हं मंती बिहप्फई नाम किर आसि ॥१७८५॥  
 सो मह वयणं पिउणो व्व सासणं नो कयाइ लंघेइ ।  
 सो अपुत्तो पुत्तत्थं विन्नत्तो किर मए बहुयं ॥१७८६॥  
 तो तेण तं तहच्चिय मह वयणं मन्निऊण तियसिंदो ।  
 उवरुद्धो तुड्डेणं तेण वि पुत्तो वि से दिन्नो ॥१७८७॥  
 जाओ कालकमेणं तइयदिणे तम्मि जायमेत्तम्मि ।  
 नीसेसदिसाराएहिं वेढिया चंपवरनयरी ॥१७८८॥  
 सिरिवीरसेणनामं काउं पुत्तस्स कुणइ संगामं ।  
 विजिए वि हु संगामे अक्खत्तेणं हओ सूरु ॥१७८९॥  
 तो सूरेण सयं चिय निक्कंटीकयधरायलुच्छंगे ।  
 नरसीहो संजाओ राया चंपाए नयरीए ॥१७९०॥  
 निहयम्मि सूरसेणे पुत्तं परिगेण्हिमोत्ति बुद्धीए ।  
 जा जोएमो ता सो वि नत्थि जणणी य से नत्थि ॥१७९१॥  
 एत्थंतरम्मि अम्हे कुमार ! अइदीणमाणसा सव्वे ।  
 किंकायव्वविमूढा धरिया नरसीहराएण ॥१७९२॥  
 धरिरुण केइ संवग्गिया पुणो केइ मारिया मौला ।  
 अन्ने उण केइ पुणो निच्छूढा देसविसयाओ ॥१७९३॥  
 तो तेण अहं पावो धरिओ सयलत्त-पुत्तपरिवारो ।  
 अइसयबुद्धित्ति वियाणिरुण वज्झो समाइड्डो ॥१७९४॥  
 तो उत्तुंगमहागिरि-सिहरग्गे विसमसंकडतडम्मि ।

पुरिसेहिं लोढिऊणं पक्खित्तो च्छिन्नटंकम्मि ॥१७९५॥  
 तो कम्म-धम्मजोया आउयसेसत्तणेण लग्गोहं ।  
 निवडंतो गिरितडतरु-साहग्गे देवजोएण ॥१७९६॥  
 तो सणियं उत्तरिओ भयभीओ तत्थ गिरिनिगुंजम्मि ।  
 गमिऊण सव्वदिवसं विणिग्गओ निसि पओसम्मि ॥१७९७॥  
 तो पुत्तसिणेहेणं पुणो वि चंपं समागओ तत्थ ।  
 दिट्ठो कहवि न पुत्तो बहुरक्खणरक्खिओ जम्हा ॥१७९८॥  
 तो तम्मि चेव एगम्मि जुन्नदेवउलउवरिमतलम्मि ।  
 संगहियसंबलो तत्थ संठिओ गममि सव्वदिणं ॥१७९९॥  
 रयणीए पुणो तम्हा उत्तरिऊणं भमामि चंपाए ।  
 काऊण पुत्तसुद्धिं देवउलं जामि पच्चूसे ॥१८००॥  
 एवमहं अणुदियहं कलत्त-पुत्ताण मोयणनिमित्तं ।  
 चिंतेमि बहुउपाए न य मोउं ताइं सक्केमि ॥१८०१॥  
 एवं च अन्नदियहे आरूढो देउलम्मि जा तत्थ ।  
 ता पहरमेत्तदियसे समागओ तलवरो रोद्धो ॥१८०२॥  
 सो मत्तवारणोवरि उवविट्ठो जाव अच्छइ खणद्धं ।  
 ता तस्स गया दिट्ठी देउलथंभंतरालम्मि ॥१८०३॥  
 दिट्ठा य तेण घयगुल-मीसियबहुमडंयाण खंडाइं ।  
 उव्वहमाणा ओल्ली उत्तरंती पिवीलीण ॥१८०४॥  
 दट्ठूण तेण हियए विमंसियं कत्थ मंडया उवरिं ।  
 जेणेयाओ एवं उवरिमभायाओ इह एंति ॥१८०५॥  
 ता नूण किंपि होही कारणमिह ता निएमि उवरितलं ।

इय चिंतिऊण तुरियं आइड्ड तेण नियपुरिसा ॥१८०६॥  
 रे रे ! तुरियं तुरियं इहइं आरुहह देउलस्सुवरिं ।  
 किं कोवि एत्थ अच्छइ नो वा ? मह कहह नाऊण ॥१८०७॥  
 तो तव्वयणाणंतर-मारूढा तत्थ दारुणा पुरिसा ।  
 दिट्ठो हं तेहिं तओ बद्धो कयपच्छिमभुएहिं ॥१८०८॥  
 'लद्धो लद्धो'त्ति तओ तेहिं कओ कलयलो मणुस्सेहिं ।  
 खित्तो 'दड'त्ति धरणीए दूरभायाओ पावेहिं ॥१८०९॥  
 नीओ नरिंदपासं तेण वि कुविएण पभणियं एवं ।  
 कह पव्वयाओ खित्तो वि एस पुण जीविओ पावो ? ॥१८१०॥  
 तो नरवइणा भणियं तुरियं रे दंडवासिय ! समप्प ।  
 चंडालमणुस्साण निग्घिणचित्ताण पयईए ॥१८११॥  
 तो तेहिं रायवयणं तहेव संपाडियं तलारेहिं ।  
 ताण अहं दुट्ठाणं समप्पिओ चोरपुरिसोव्व ॥१८१२॥  
 भणियं च तेहिं "एसो मंती सिरिसूरसेणरायस्स ।  
 एयम्मि जीवमाणे न मुओ सूरौत्ति जाणेह ॥१८१३॥  
 ता सव्वहा पयत्तेण एस जह कोवि न मुणइ जणेसु ।  
 तह मारह जह एसो न रक्खणीओ महासत्तू" ॥१८१४॥  
 ते एवं भणिऊणं वलिऊण गया पुरीए इयरेहिं ।  
 चंडालेहिं य अहयं नीओ किर वज्झयणम्मि ॥१८१५॥  
 तो तेहि कट्ठिऊणं निसियासिं पभणिओ अहं "मंति ! ।  
 सुमरसु अभिद्धदेवं कुद्धो तुह रायनरसीहो" ॥१८१६॥  
 एत्थंतरम्मि एगेण डुंबपुरिसेण जायकरुणेण ।

ओलक्खिऊण भणियं “रे ! अप्पह अम्ह नरमेयं ॥१८१७॥  
 देवीए मए पुब्बिं पुरिस-बली सूइओ तओ एयं ।  
 चामुंडापयमूले नेऊणं मारइस्सामि” ॥१८१८॥  
 पडिवन्नं तेहिं पि य गहिओ हं तेण डुंबपुरिसेण ।  
 इयरे य पडिनियत्ता नीओ हं तेण चंडीए ॥१८१९॥  
 काऊण मह पणामं मुक्को हं तेण पभणियं एयं ।  
 “जह अम्ह कुलच्छेओ न होइ तह तं करेज्जासु” ॥१८२०॥  
 तो हं तेण विमुक्को नीहरिओ धाविओ निसं सव्वं ।  
 चइऊण वसिमदेसं समागओ एत्थ रन्नम्मि ॥१८२१॥  
 पत्तो य तावसासम-मेयं दिट्ठो य कुलवई एत्थ ।  
 तेणावि पभणिओ हं “किं सोयं वहसि वरमंति !? ॥१८२२॥  
 दुक्खाइं अधम्माओ हवंति सोक्खाइं तह य धम्माओ ।  
 जइ सच्चं दुहभीओ सुहमिच्छसि कुणसु ता धम्मं” ॥१८२३॥  
 तव्वयणं सोऊणं मए वि परिभावियं सचित्तम्मि ।  
 जं भणियं कुलवइणा तं सच्चं नत्थि संदेहो ॥१८२४॥  
 नियसाम्बि(मि)मरणदुक्खं पुत्त-कलत्ताइविरहदुक्खं च ।  
 एयाइं चिरुवज्जिय-अधम्मओ मज्झ जायाइं ॥१८२५॥  
 एमाइ भाविऊणं निव्विन्नो तस्स चेव कुलवइणो ।  
 पासम्मि मए गहिया तावसदिक्खा विरत्तेण ॥१८२६॥  
 विन्नायतावसोचियमग्गो जोगोत्ति तेण कुलवइणा ।  
 इविओ म्हि कुलवइत्ते सो वि य पंचत्तमावन्नो ॥१८२७॥  
 ता तुज्झ मए एयं सरूवमावेइयं नियं पुत्त ! ।”



इय एवं भणिऊणं कुलवइणा मोणमायरियं ॥१८२८॥  
 एत्थंतरम्मि सहसा जय जय सद्दुल्लसंतपडिरावो ।  
 सुरकिंकरकरपहओ उच्छलिओ विविहतूररवो ॥१८२९॥  
 वरवंस-वल्लईमीस-मास(?नास?)लुल्ललियगीयसहेण ।  
 आणंदिओ कुमारो तावसलोओ य नीसेसो ॥१८३०॥  
 तो कुमरसमीवागयसुरेहिं भणियं कयप्पणामेहिं ।  
 “तुम्हाहवणनिमित्तं कुमार ! देवीहिं पडुविया” ॥१८३१॥  
 तो कुमरेणं भणियं “अंबाओ कत्थ ?” जंपए देवो ।  
 “उप्पन्नकेवलस्स य मुणिंदपासम्मि चिडंति ॥१८३२॥  
 अन्ने वि तत्थ देवा समागया कप्पवासिमाईया ।  
 सव्वे वि तस्स मुणिणो केवलिमहिमं अणुडंति” ॥१८३३॥  
 तो भणियं कुमरेणं “भयवं ! तुब्भे वि एह वच्चामो ।  
 पेच्छामो तं साहुं केवलवरनाणसंपन्नं” ॥१८३४॥  
 तो कुलवइणा भणियं “करेम्ह एवं” ति उड्डिया सव्वे ।  
 पत्ता केवलिपासं नमंति परमाए भत्तीए ॥१८३५॥  
 वणदेवयाहिं भणियं “पुत्त ! इमो परमदेवयारूवो ।  
 सव्वन्नू सव्वगुरू सव्वड्डिओ सव्वउवयारी ॥१८३६॥  
 ता पणमसु पुण एयं पुरओ गंतूण परमभत्तीए ।  
 जेण तुह अज्जदिवसाओ चेव पुन्नूब्भवो होइ” ॥१८३७॥  
 “एवं करेमि” भणिऊण उड्डिओ जाइ साहुपासम्मि ।  
 वसुहालुलंतचूलो पणमइ रोमंचकंचुइओ ॥१८३८॥  
 मुणिणा वि सायरेणं सगोरवं उन्नयग्गहत्थेणं ।

“उवविससु”त्ति पभणिओ विसुद्धवसुहाए उवविद्धो ॥१८३९॥  
 तो तत्थ मुणिवरेणं केवलनाणोवलद्धतत्तेण ।  
 कहिओ दयापहाणो धम्मो सव्वन्नपन्नत्तो ॥१८४०॥  
 तो कुलवई धरंतो पणामवसविहडियं जडाजूडं ।  
 लद्धावसरो पुच्छइ मुणिनाहं पंजलिकरग्गो ॥१८४१॥  
 “भयवं ! इमस्स नीसेसं वइयरं कहह मह कुमारस्स ।  
 को एस ? कस्स पुत्तो ? कहमिह रत्तम्मि परिवसइ ?” ॥१८४२॥  
 तो केवलिणा भणियं “कुलवइ ! अइसुंदरं तए पुट्टं ।  
 आयन्नसु एगमणो वइयरमेयस्स कुमरस्स” ॥१८४३॥  
 तो भयवया असेसं सम्मं नाऊण केवलबलेण ।  
 जहवित्तो परिकहिओ वुत्तंतो कुमरपडणंतो ॥१८४४॥  
 तो कुलवइस्स एयं सोऊणं वइयरं कुमारस्स ।  
 कालंतरिओ वि पुण नवीहुओ सोयपब्भारो ॥१८४५॥  
 तव्वेलं चिय परिसागएण अब्भुट्टिऊण कुलवइणा ।  
 आलिंगिओ कुमारो सिरम्मि परिचुंबिओ तह य ॥१८४६॥  
 नियउच्छंगे ठ्वई पुणो पुणो उल्लसंतसंतोसो ।  
 आलिंगइ परिचुंबइ अवलोयइ तह विसूरई य ॥१८४७॥  
 वणदेवयाहिं पुट्टं “इमस्स किं होइ कुलवई भयवं !? ।  
 तो भयवया वि कहिओ वुत्तंतो कुलवइस्सावि ॥१८४८॥  
 पच्चक्खनिसुयनियचरियजायदढपच्चाएण कुलवइणा ।  
 वसुहालुलंतजडभारभासुरं पणमिओ साहू ॥१८४९॥  
 “सव्वन्नू होसि तुमं सुनिच्छियं मह चरित्तकहणेण ।

नाणं हि जओ मुणिवर ! पच्चयसारं जए भणियं ॥१८५०॥  
 ता भयवं ! जह एयं पच्चक्खं पयडियं तए मज्झ ।  
 तह नाह ! कहसु संपइ परलोयसुहं परमधम्मं ॥१८५१॥  
 तो कहइ केवली कुलवइस्स पुव्वावरेण अविरुद्धं ।  
 धम्मं सिवतरुमूलं कल्लाणपरंपरानिलयं ॥१८५२॥  
 “सो धम्मो कायव्वो जो किर सव्वन्नुणा समक्खाओ ।  
 नहि अइरिदियनाणं सव्वन्नुविवज्जियं होइ ॥१८५३॥  
 सासयसिवसुहहेऊ धम्मो च्चिय होइ नत्थि संदेहो ।  
 सो उण सव्वन्नुविणिच्छिओ परं होइ आदेसो(ओ) ॥१८५४॥  
 गयरागदोसमोहो निदह्हुकम्मिंधणो धुयकिलेसो ।  
 केवलनाणालोओ इय जीवो होइ सव्वन्नू ॥१८५५॥  
 सो साहेइ जहत्थं पिउ व्व वेसो व्व नत्थि से को वि ।  
 संसारच्छेयकरं परलोयसुहावहं धम्मं ॥१८५६॥  
 जह उइए विणनाहे वियसंति असेसकमलसंडाइं ।  
 एवं सहावभणिरे जिणंमि बुज्झंति भुयणाइं ॥१८५७॥  
 तं सव्वन्नुपणीयं सिवसुहसंपत्तिकरणमुवयारं ।  
 अवित्तहमभव्वदुलहं धम्ममिणं निसुण ! साहेमि ॥१८५८॥  
 खंती य मद्दवज्जव-मुत्ती तव-संजमे य बोधव्वे ।  
 सच्चं सोयं आकिंचणं च बंभं च जइधम्मो ॥१८५९॥  
 कारण-अकारणेहिं य कुद्धे दुव्वयणभासए भणिरे ।  
 उवसंतमणेण परे जइणा खंती करेयव्वा ॥१८६०॥  
 धम्मो दयापहाणो दया वि कह होइ खंतिरहियस्स ? ।

दयधम्मरक्खणद्धं तम्हा खंती करेयव्व ॥१८६१॥  
 माणस्स विघायकरं तं भन्नइ मद्दवं अगव्वत्तं ।  
 विणयस्स मूलजोणिं तं जइणा अवस्स कायव्वं ॥१८६२॥  
 माया कुडिलसहावो तप्पडिवक्खं च अज्जवं नेयं ।  
 रिजुभावो हि मुणिंदो विसुद्धधम्मं समज्जिणइ ॥१८६३॥  
 सयण-धण-विसय-उवगरण-देहमाईसु निम्ममत्तं जं ।  
 सा मुत्ती मंतव्वा अप्पडिबंधत्तणसरूवा ॥१८६४॥  
 होइ तवो पुण दुविहो बाहिर-अब्भितरो य तह कमसो ।  
 एक्केक्को च्छब्भेओ बारसभेओ तवो मिलिओ ॥१८६५॥  
 “अणसणमूणोयरिया वित्तीसंखेवओ रसच्चाओ ।  
 कायकिलेसो संलीणया य बज्झो तवो होइ ॥१८६६॥  
 पायच्छित्तं विणओ वेयावच्चं तहेव सज्जाओ ।  
 ज्झाणं उसग्गो वि य अब्भितरओ तवो होइ ॥१८६७॥  
 पंचासवा विरमणं पंचेदियनिग्गहो कसायजओ ।  
 दंडत्तयस्स विरई य संजमो सत्तरसविभेओ ॥१८६८॥  
 अविसंवायगवयणं काय-मणो-वयणसुद्धिसंजुत्तं ।  
 एयं चउप्पयारं मुणिणा सच्चं भणेयव्वं ॥१८६९॥  
 सोयं च होइ दुविहं दव्वसोयं च भावसोयं च ।  
 दव्वमुवगरणमाई तग्गयसोयं करेयव्वं ॥१८७०॥  
 इह वत्थ-पत्त-कंबल-सेज्जा-संधारमाइदव्वेसु ।  
 जं उग्गमाइसुद्धं दव्वसोयं तयं भणियं ॥१८७१॥  
 भावसोयं च भणियं कसायदोसेहिं वज्जियं चित्तं ।

परमत्थसोयमेयं पण्णत्तं वीयरागेहिं ॥१८७२॥  
 कीरइ कायगयस्स हि मलस्स पक्खालणं सुहेणेव ।  
 अइचिक्कणमललित्तं दुप्पक्खालं भवे च्चि(चि)त्तं ॥१८७३॥  
 संतेसु असंतेसु य वत्थुसु मुच्छा परिग्गहो भणिओ ।  
 तत्थ निरीहत्तमई आकिंचिन्नं विणिद्धिं ॥१८७४॥  
 दिव्वत्थिपरिच्चाओ तिविहं तिविहेण होइ नवभेयं ।  
 ओरालियविरई वि य नवभेया सा विनिद्धिडा ॥१८७५॥  
 इय अट्टारसभेयं बंभं सव्वन्नुणा समक्खायं ।  
 तं पालंतो विहिणा साहू कम्मक्खयं कुणइ ॥१८७६॥  
 इय एसो दसभेओ धम्मो सव्वण्णुणा समुद्धो ।  
 एयं पालंताणं मोक्खसुहं करयले वसइ ॥१८७७॥  
 जह धाणुक्को धणुगुणनिवेसियं एगभावमणचक्खू ।  
 लक्खम्मि ठ्वइ बाणं जइ वि हु सो दूरववहाणे ॥१८७८॥  
 तह एयधम्मसुहगुण-पणोल्लिओ जइवि दूरववहाणो ।  
 मोक्खलक्खम्मि पविसइ जीवो सुपयत्तजोगेण ॥१८७९॥  
 इय एस मए कहिओ परलोयसुहावहो निहयदोसो ।  
 जइधम्मो सपवंचो जुत्ती-नय-हेउपरिसुद्धो” ॥१८८०॥  
 तं केवलिपन्नत्तं धम्मं सोऊण कुलवइप्पमुहा ।  
 जंपंति तावसा ते सम्मं संजायवेरग्गा ॥१८८१॥  
 “जइ एवं ता मुणिवर ! अरन्नरडियं व बहिरमंतोव्व ।  
 मयमंडणं व जायं अफलं चिय अम्ह अणुद्धाणं” ॥१८८२॥  
 तो सव्वे पडिबुद्धा लोयं काऊण तोडियजडोहा ।

पडिवज्जंति जिणेसरदिक्खं संजायवेरग्गा ॥१८८३॥  
 कुमरो वि सूरवइयर-निसुणणसंजायगरुयआमरिसो ।  
 केवलधम्मवएसं न सुणइ आण्यबुद्धीए ॥१८८४॥  
 अंतोहुत्तवियंभिय-निब्भररिउरोसरत्तनयणजुओ ।  
 दीहुण्हमुक्कनीसासनीसहंगो किलम्मेइ ॥१८८५॥  
 तो देवयाहिं दट्ठूण तस्स बालस्स चेड्डियं विसमं ।  
 पुट्ठो पुणो वि भयवं वीरसेणस्स संबंधं ॥१८८६॥  
 “किं देव ! अम्ह पुत्तो नियवैरिविणिग्गहम्मि सुसमत्थो ।  
 जणणि-जणएहिं य सम्मं(मं) दंसणमेयस्स वा होही ?” ॥१८८७॥  
 तो केवलिणा भणियं “होही रिउनिग्गहे पयंडबलो ।  
 भरहद्धपहू होही आणेही जणणि-जणया य ॥१८८८॥  
 होहिंति पच्चवाया बहवे एयस्स वीरसेणस्स ।  
 पुण्णाणुभावओ च्चिय सव्वे वि य ते टलिस्संति” ॥१८८९॥  
 तो गरुयामरिसविसेसपसरिओदामभीमहुंकारो ।  
 नीहरइ परिसमज्झाओ नमियमुणिनाहपयकमलो ॥१८९०॥  
 गंतूण तओ सगिहं आपुच्छइ देवयाओ सव्वाओ ।  
 “तुम्हाणुमइए अहं नियाहिमाणं पइ जइस्से” ॥१८९१॥  
 ताहि वि जोगोत्ति वियाणिऊण अवणीयचूलिओ वीरो ।  
 देवीहिं अणुन्नाओ कयप्पणामो वि नीहरइ ॥१८९२॥  
 निगं(गं)तूण य तुरियं दक्खिणदिसिस(सं)मुहं स संचलिओ ।  
 पुन्नाहिड्डियनियविक्रमेक्कपरिवारिओ वीरो ॥१८९३॥  
 एक्कंगो असहाओ लक्खिज्जइ बहुसहायकलिओव्व ।

वच्चइ अरन्नमज्झे सहूल-करिंद-हरिपौरे(पउरे) ॥१८९४॥  
 सुकुमारसरीरो वि हु सत्तावट्टंभसंजुओ वीरो ।  
 तण्हा-छुहा-पहस्समदुहेहिं न य जिप्पइ महप्पा ॥१८९५॥  
 अणवरयपयाणेहिं वच्चंतो अजल-पत्त-फल-पुफं(फं) ।  
 संपत्तो कंतारं घणकंटय-विडविसंकिन्नं ॥१८९६॥  
 सो तत्थ संत्तरत्तं पाणेसणविरहिओ महासत्तो ।  
 परिसुसियतालुजीहोड्डनिट्ठुरंगो वणे जाइ ॥१८९७॥  
 अह अण्णादिणे मज्झण्ह-समयपरिसंठियम्मि दिवसयरे ।  
 तण्हाए पीडियतणू कंठागयजीविओ जाओ ॥१८९८॥  
 अणवरयदीहरद्धाण-समखित्तसिन्नसव्वंगो ।  
 पयमेगंपि न दाउं सो सक्कइ सत्तवंतो वि ॥१८९९॥  
 कंतारदुल्लहासणपवट्टिउद्दामबहुबुभुक्खत्तो ।  
 बहुदिवसपीयजलजायगुरुतिसासुसियअमयकलो<sup>१</sup> ॥१९००॥  
 उवरिं निट्ठुररविकिरण-तावपज्जलियजलणक्खित्तोव्व ।  
 अंतो गरुयपरिस्सम-च्छुहा-तिसा-दाहसंतत्तो ॥१९०१॥  
 रविकिरणफंससविसेसतत्तवसुहाचुलुट्टपयकमलो ।  
 संमीलियदीहच्छे पडिओ धरणीए निच्चेट्ठो ॥१९०२॥  
 एत्थंतरम्मि सहसा विज्जाहरराइणा घणबलेण ।  
 दिट्ठो सविम्हयच्छेण वीरसेणो तहिं पडिओ ॥१९०३॥  
 दूराओ तं दट्ठुं निज्जियतेलोकुरुयरुइरंगं ।  
 संजायकोउओ सो समागओ तस्स पासम्मि ॥१९०४॥  
 दट्ठुं तहासरुवं "हा हा ! निच्चेट्ठमिव निरक्खेमि ।"

टि. १. ०शुषित्त-अमृतकलः ॥

इय चिंतावसपरवसचित्तो परियप्पइ मणम्मि ॥१९०५॥  
 तो तेण परामुद्धो उम्मूलियदीहनयणवित्थारो ।  
 अवलोइउं पयत्तो तं खयरं जायचेयन्नो ॥१९०६॥  
 खयरेण चित्तिं पुण “जीवइ एसोत्ति पीडिओ नवरं ।  
 दूरपरपहपरिस्सम-च्छुहा-पिवासाहि(इ)पीडाहिं ॥१९०७॥  
 ता एयं तुरियं चिय नेमि महंतं जलासयं किंपि ।  
 नेऊण तत्थ पच्छ व[व]गयपीडं करिस्सामि” ॥१९०८॥  
 तो घणबलेण तुरियं अवहरिओ पाविओ य गिरिसरियं ।  
 निच्चेद्धतणू सलिलेण सिंचिओ लहइ चेयन्नं ॥१९०९॥  
 संपत्तचेयणो सो पेच्छइ विज्जाहरं समीवत्थं ।  
 “जीवाविओम्हि तुमए आणीओ जमिह नइतीरं” ॥१९१०॥  
 तो पविसइ गरुयनइदहम्मि अइसिसिरसरससलिलम्मि ।  
 चिरकालविहियजलकेलिजायसोक्खो समुत्तरइ ॥१९११॥  
 विज्जाहरेण तेण य संपाडियमहुरभोयणरसेण ।  
 जाओ सुसत्थचित्तो अह एयं भणिउमाढत्तो ॥१९१२॥  
 तुम्हारिसाण खेयर ! परोवयारेक्कुदिन्नचित्ताण ।  
 मन्ने सयले च्चिय तिहुयणम्मि उवमा न संपडइ ॥१९१३॥  
 दीसंति भोगभूमिसु कप्पतरू जे जणे असामन्ना ।  
 सव्वोवयारिणो खेयरिंद ! तुम्हारिसा विरला ॥१९१४॥  
 निप्पत्ते निकु(क्कु)सुमे निवाणिए निफ(प्फ)ले अरन्नम्मि ।  
 पडियस्स मज्झ पुन्नोदण्ण तं आगओ एत्थ ॥१९१५॥  
 जइ कह व तत्थ न तुमं हुंतो विज्जाहरिंद ! रन्नम्मि ।



ता मह एसा वेला मुयस्स हुंती न संदेहो ॥१९१६॥  
 तो भणइ(ई) खयरिंदो सव्वं संपडइ पुन्नपुरिसाण ।  
 पुन्नाणुहावसंपज्जमाणनीसेसवत्थूण ॥१९१७॥  
 असणं बुभुक्खियस्स य पाणं तिसियस्स पुन्नपुरिसस्स ।  
 जाणं च पहपरिस्समदुहियस्स कुओ वि संपडइ ॥१९१८॥  
 तुह कुमर ! अंगभूया अव्वभिचारी य लक्खणसमूहा ।  
 कल्लाणकारिणो बंधव व्व दुक्खाइं नासंति ॥१९१९॥  
 कह तस्स होइ दुक्खं दुग्गमकंतारनिवडियस्सावि ।  
 जस्स निहाणाइं व लक्खणाइं अंगेसु निवसंति ॥१९२०॥  
 आयन्नसु तुज्ज निरंतरंगभागेसु परिनिविट्ठाइं ।  
 सुपसत्थलक्खणाइं सामुद्दयसत्थकहियाइं ॥१९२१॥  
 अस्सेयकोमलतले कमलोदराभे  
 लीणंगुलीरुइरतंबनहेसु पण्ही ।  
 उण्हे सिराविरहिए य निगूढगुप्फे  
 कुम्मुन्नए य चरणे वसुहाहिवस्स ॥१९२२॥  
 परिविरलसण्हरोमाहिं वट्टजंघाहिं हुंति नरनाहा ।  
 करिकरसमाणऊरू मंसलसमजाणुणो पुरिसा ॥१९२३॥  
 रोमेगेगं कूवए पत्थिवाणं दो दो नेए बंधणाणं बुहेहिं ।  
 ते नायव्वे दुत्थियाणं बहूणि रोमा एवं पूइया निंदिया य ॥१९२४॥  
 तुच्छे होइ धणी अवच्चरहिओ जो त्थूललिंगो नरो  
 वामं वंकगए सुयत्थरहिओ अन्नत्थ पुत्तेसरो ।  
 वारिदी अइलंबलिंगकहिओ लिंगे सिरासंगए  
 तुच्छवच्च-धणो हवेज्ज सुहिओ गंठिम्मि थूले नरो ॥१९२५॥

कुसुमसमसुकुगंधा विन्नेया पत्थिवा न संदेहो ।  
 महुगंधा य धणङ्गा मच्छदुगंधा य बहुदुक्खा ॥१९२६॥  
 तणुसुकुओ बहुधूओ बहुसुकुओ बहुसुओ नरो होइ ।  
 बहुसुरओ दीहाऊ इयरो तुच्छउओ होइ ॥१९२७॥  
 निस्सोअइ थूलफिओ मंडूयफिओ य होइ धणवंतो ।  
 सिंहकडी नरनाहो <sup>१</sup>करहकडी य [स]दारिद्धो ॥१९२८॥  
 जे विसमकुच्छिपुरिसा ते किर मायाविणो विणिद्धिद्धा ।  
 सप्पोदरा दरिद्धा हवंति बहुभक्खगा तह य ॥१९३०॥  
 परिमंडलुन्नएणं गंभीरेणं च सुत्थिया होंति ।  
 तुच्छ-अदिस्स-अणुन्नयनाहीवलएण पुण दुहिया ॥१९३१॥  
 विसमबलिणो मणुस्सा अगम्मगामी य हुंति पावा य ।  
 समबलिणो पुण सुहिणो परदारपरम्महा होंति ॥१९३२॥  
 पासेहिं मउयमंसलपयक्खिणावत्तरोमजुत्तेहिं ।  
 हुंति नरामरवइणो विवरीएहिं च बहुदुक्खा ॥१९३३॥  
 आपीयउवचिएहिं मज्झनिमग्गेहिं हुंति नरनाहा ।  
 दीहेहिं चुच्चुएहिं विसमेहिं य हुंति धणहीणा ॥१९३४॥  
 हिययं समुन्नयं मंसलं च पिहुलं च होइ रायाण ।  
 विसमहियया दरिद्धा सत्थनिवाएहिं य मरंति ॥१९३५॥  
 कंबुग्गीवा(वो) राया महिसग्गीवो य होइ रणसुहडो ।  
 लंबग्गीवो य नरो बहुभक्खी होइ पयईए ॥१९३६॥  
 पिट्टमभग्गमरोमं पुहईनाहाण होइ विन्नेयं ।  
 अस्सेयणपीणुन्नयसुयंधकक्खा य धन्नाण ॥१९३७॥

टि. १. "करहकडी होइ य दरिद्धो" एवमत्र स्यात् ॥

विउले अव्वुच्छिन्ने सुसिलिट्ठे अंसए नरिंदस्स ।  
 निम्मंसरोमनिघिए विसमे उण इयरलोयस्स ॥१९३८॥  
 करिकरसरिसे वट्टे आजाणुपलंबिरे य पीणे य ।  
 रायाणं चिय बाहू इयराणं रोमसे हस्से ॥१९३९॥  
 गूढमणिबंधसुदिढा सम्मं सुसिलट्ठसंधिसंजुत्ता ।  
 हत्था नरनाहाणं विवरीया होंति इयराण ॥१९४०॥  
 हत्थंगुलिणो सरला चिराउसाणं हवंति स(सु)कुमारा ।  
 सण्हा मेहावीणं थूला परक्कम्मकारीण ॥१९४१॥  
 हुंति नहा दरसोणा अपुप्फिया अवणयग्गभागा य ।  
 रायाणं इयरेसिं विवरीया होंति विन्नेया ॥१९४२॥  
 अइकिसदीहं चिबुयं अधणाणं मंसलं च सुपमाणं ।  
 रायाणं विन्नेयं अणुब्भडं संगयावयवं ॥१९४३॥  
 अहरेहिं अवक्केहिं बिंबाकारेहिं हुंति रायाणो ।  
 फुडिय-विवन्न-विखांडिय-रुंक्खेहिं य हुंति धणहीणा ॥१९४४॥  
 निब्धा पमाणदीहा तिक्खग्गा हुंति सुंदरा दसणा ।  
 जीहा रत्ता दीहा लण्हा सरिसा य रायाण ॥१९४५॥  
 सोमं समुज्जलं अमलिणं च चंदोवमं नरिंदाणं ।  
 विवरीयमधन्नाणं होइ मुहं लक्खणविहीणं ॥१९४६॥  
 निम्मंस-आयएहिं या रोमस-विउलेहिं हुंति कन्नेहिं ।  
 रायाणो ससिरेहिं हस्सेहिं य हुंति पावनरा ॥१९४७॥  
 संपुन्न-समंसल-कूचरहियगंडेहिं नरवई हुंति ।  
 सरला य सण्हविवरा समुन्नया नासिया धन्ना ॥१९४८॥

पउमदलदीहरेहिं रत्तंतेहिं च हुंति रायाणो ।  
 नयणेहिं पिंगलेहिं मज्जारसमेहिं कूरमणा ॥१९४९॥  
 अद्धिंदुसमनिडाला रायाणो हुंति सयलमहिवलए ।  
 धणहीणा विन्नेया पुरिसा जे विसमभालयला ॥१९५०॥  
 च्छत्तागारसिरा जे रायाणो हुंति नत्थि संदेहो ।  
 आकुंचिय-घण-निद्धा अप्फुडिया सुंदरा केसा ॥१९५१॥  
 एयं संखेवेणं सामुइयसत्थलक्खणाणुगयं ।  
 कहियं कुमार ! तुह कोउएण, अन्नंपि निसुणेसु ॥१९५२॥  
 तिन्नि गहीराणि सया विउलाइ य हुंति तिन्नि वत्ताइं ।  
 चत्तारि य रहस्साइं पंच य सुहुमाइं दीहाइं ॥१९५३॥  
 छच्चुन्नयाइं सत्त य आरत्ताइं च संपयमिमस्स ।  
 गाहादुम्मस्स (दुगस्स?, जुम्मस्स?) कमसो विवरणमेयं निसामेह ॥१९५४॥  
 नाभी-सर-सत्ताइं य गंभीराइं च तिन्नि धन्नाइं ।  
 वयणं उरं निडालं तिन्नि य विउलाइं संसंति ॥१९५५॥  
 पिट्ठं लिंगं जंघं गीवा चत्तारि होंति ह्रस्साइं ।  
 केस-दसणंगुली-पव्व-नहं तथा पंच सुहुमाणि ॥१९५६॥  
 हणु-नयण-थणंतर-बाहू-नासिया होंति पंच दीहाइं ।  
 रायाणं चिय बहुसो न उणो सामन्नपुरिसाण ॥१९५७॥  
 हिययं कक्खा-नह-नासिया य वयणं च कंधराबंधो ।  
 इय हुंति उन्नयाइं कुमार ! पसत्थाइं छच्चेव ॥१९८॥  
 नयणंत-पाय-कर-जीह-नहा-हरोद्धा  
 तालू य हुंति सुहया इह सत्त रत्ता ।

टि. १. नैत्तंत० इति स्यात्, तर्हि छन्दोहानिर्न स्यात् ॥

एयाणि जस्स नरनाह ! हवंति अंगे  
 सल्लक्खणाणि पुरिसस्स स चक्कवट्ठी ॥१९५९॥  
 अट्टसयं छन्नउई चउरासीइ(ई) य अंगुलपमाणं ।  
 उत्तम-मज्झिम-हीणाण देहपमाणं मणुस्साण ॥१९६०॥  
 ता सव्वलक्खणधरो न होसि सामन्नमाणसो वीर ! ।”  
 इय भणिए पुण वीरो वयणमिणं भणिउमाढत्तो ॥१९६१॥  
 “उच्छुक्कोहं गुरुकज्जवावडत्तेण तत्थ वच्चिस्सं ।  
 चंपनयरीए खेयर ! अणुमन्नसु भुयणकप्पतरु !” ॥१९६२॥  
 विज्जाहरेण कुमरो कह कहवि य पयत्थणासयमहग्घं ।  
 अणुमन्निओ दुहेणं विणिग्गओ गंतुमारद्धो ॥१९६३॥  
 अणवरयपयाणेहिं पत्तो चंपाए वीरसेणो वि ।  
 पविसइ पुरीए मज्झे विम्हइयजणेहिं दीसंतो ॥१९६४॥  
 अवसेरिवसविसंढुल-हिययाहिं य ताहिं वणयरीसुरीहिं ।  
 कुमारस्स रक्खणइं दोन्नि सुरा पेसिया तत्थ ॥१९६५॥  
 तो चंपं पविसंतो अहिट्ठिओ तेहिं वीरसेणो वि ।  
 सव्वंगं कयरक्खो राया जह अंगरक्खेहिं ॥१९६६॥  
 मंधरगईए वीरो वच्चइ चउहट्टमज्झयारम्मि ।  
 कहगेण पढिज्जंतं गाहाजुयलं सुणइ तत्थ ॥१९६७॥  
 “कज्जत्थिणा नरेणं कालविलंबो अवस्स सोढव्वो ।  
 कालम्मि निजुज्जंतो परक्कमो फलइ नाकाले ॥१९६८॥  
 कज्जं फलं व सरिसं जायइ नियकालपरिणईपडियं ।  
 तमकाले घेप्पंतं दुहावहं होइ विरसं च” ॥१९६९॥

टि. १. पत्थणासय०(?) ॥

सोऊण इमं कुमरो परिभावइ नियमणम्मि थिरचित्तो ।  
 कालंतरेण होही पुरओ मह कज्जसंसिद्धी ॥१९७०॥  
 सव्वबलाणं बलियं सउणबलं चैव एत्थ भुयणम्मि ।  
 एसो य वयणसउणो न अन्नहा मन्नणीओ मे ॥१९७१॥  
 तो होउ एवमेयं बालक्कीलाए ताव अच्छिस्सं ।  
 मह कुलकमागयाए चंपाए अहं दिणे कइवि” ॥१९७२॥  
 चिंतंतो जा एवं अच्छइ तत्थेव हइमज्झम्मि ।  
 ता एगो सामंतो पविसइ संज्झाए रायगिहं ॥१९७३॥  
 कोयंड-कुंत-फारक्क एक्क(चक्क?)पायिक्कलोयपरियरिओ ।  
 बंदीहिं य थुवंतो अइतुरियकरेणुयारूढो ॥१९७४॥  
 गच्छंतस्स य वीरो सीहकिसोरो व्व दूरकयफालो ।  
 आरुहइ करिणिपुट्ठिं उवविसइ य तस्स पासम्मि ॥१९७५॥  
 ‘को एस’ ? त्ति ससंकं तप्परियणविहियकलयलरवेण ।  
 अच्छुद्धमणो वीरो मंभीसइ तंपि सामंतं ॥१९७६॥  
 सामंतेणं भणियं ‘को सि तुमं ? किंनिमित्तमिह चडिओ ? ।’  
 वीरेणं सो भणिओ ‘किं काहिसि मज्झ तत्तीए ? ।’ ॥१९७७॥  
 सामंतेणं भणियं ‘उत्तरसु, न जामि तुज्झ वीसासं’ ।  
 उत्तरइ वीरसेणो पुच्छम्मि करेणुयं धरइ ॥१९७८॥  
 न चलइ पयं पि करिणी जाव तओ ताव तस्स भिच्च्वेहिं ।  
 आढत्तो सो हंतुं वीरो सर-सत्ति-सल्लेहिं ॥१९७९॥  
 तो ताण दक्खयाए सामंतभडाण वीरसेणेण ।  
 गहियाइं आउहाइं मोडेऊणं पक्खि(खि)त्ताइं ॥१९८०॥

मुक्को सो सामंतो गओ य नरसीहरायपासम्मि ।  
 साहइ सामलवइणो नीसेसं कुमरवुत्तंतं ॥१९८१॥  
 तो नरसीहो जंपइ 'को होइ ? कस्स संतिओ अहवा ।  
 बालो अबालचरिओ नियविक्रमगव्विओ वीरो ॥१९८२॥  
 तो सव्वेहिं वि भणियं 'देव ! न जाणिज्जइ(ई) कुमारस्स ।  
 अंतोसुद्धी नन्नरं होही अच्चब्भुओ कोइ' ॥१९८३॥  
 अह अन्नदिणे राया नरसीहो भवणियाए नीहरइ ।  
 बहुसेन्नसंपरिवुडो वियडुब्भडवेंडवहलक्खो ॥१९८४॥  
 उत्तमजच्चतुरंगम-साहणपन्नासलक्खपरियरिओ ।  
 विविहरहोहनिहंसण-पडिरवपडिरुद्धदिसिनिघहो ॥१९८५॥  
 नाणापहरणपाइक्कोडिसंकडियवियडमहिवीद्धो ।  
 वारुयकरिणीपल्लाणियाए सुहसंठिओ राया ॥१९८६॥  
 वियडायवत्तकलिओ बहुचमरधरीहिं भूसियदुपासो ।  
 जय जय सदसमुब्भड-बहुभट्टभडेहिं थुव्वंतो ॥१९८७॥  
 पत्तो रायपहेणं चउहट्टं सयलनयरनारीहिं ।  
 जोइज्जंतो पायार-भवण-तरु-देउलट्टियाहिं ॥१९८८॥  
 पुरओ वज्जिरअणवज्जविविहआउज्जसयसहस्सेहिं ।  
 ओसारियदुट्टजणो तयणंतरआसवारेहिं ॥१९८९॥  
 तत्तो य दंगिएहिं खिलिहिलेहिं च घोरसदेहिं ।  
 अंतोपडिहारेहिं विविहेहि य अंगरक्खेहिं ॥१९९०॥  
 एवंविहियपयत्तो नरसीहो जाव एइ चउहट्टे ।  
 नरसीहनाममाला ता पढिया बंदिणा तत्थ ॥१९९१॥

“जय तैलोकूमहाभडभंजण ! रायाहिराय ! नरसीह ! ।  
 तिव्वपयावदवानल-पज्जालियवेरिवणगहण ! ॥१९९२॥  
 अइनिम्मलजलपूरिय-खग्गद्रहबुडुसयलरिउनिवह ! ।  
 तिव्वपयाबुब्भडसूरसेणपरिकवलणविडप्प !” ॥१९९३॥  
 तं सोऊण कुमारो पिउपरिभवसूयगं बिरुदखंडं ।  
 पज्जालियरोसहुयवह-समहिद्वियमाणसो जाओ ॥१९९४॥  
 भिउडीसंकडियनिडालवट्टसंअवियच्छिविच्छेहो ।  
 निदयनिदद्धाहरभासुरमुहकुहरदुप्पेच्छो ॥१९९५॥  
 वैरिवियंभियअमरिस-वसेण अच्छोडिऊण वसुहाए !  
 करवीडयं नियंसणमवि निवसइ दिव्यरं वीरो १९९६॥  
 आमलयथूलमोत्तिय-हारं पि य बंभसुत्ताए कुमरो !  
 भूमीनिहसियहत्थो पुण मेल्लइ सीहनायं पि ॥१९९७॥  
 गुरुसीहसद्वितत्थहत्थिमुसिमूरिउब्भडभडोहं ।  
 नरसीहरायसेत्रं जायं असमंजसं सहसा ॥१९९८॥  
 सप्फालियभुयदंडो तो पविसइ सेत्रमज्झयारम्मि ।  
 विहडावियइयरबलो पुण दुक्को वारणबलाण ॥१९९९॥  
 घेत्तूण करयलेणं रहमेगं तेण गयघडाडोवं ।  
 ओसारिऊण वीरो पत्तो नरसीहकरिणिं पि ॥२०००॥  
 तो उड्डिऊण दूरं सीहकिसोरोव्व वारुयं चडइ ।  
 निद्वलिऊणं मौडं नरसीहं धरइ केसेसु ॥२००१॥  
 वामेण करयलेणं ओडांवंइ मत्थयं नरिंदस्स ।  
 जंघंतरालभाए खिवइ सिरं तस्स अक्खुद्धो ॥२००२॥



जंघाओद्वद्धसिरो पच्छकयरायबाहुदंडो य ।  
 पुण वेवइ नरसीहो निट्ठुरबंधेण चोरं(रो) व ॥२००३॥  
 तो उज्झऊण दक्खिणभुयदंडं भणइ वीरसदेण ।  
 “रे रे ! निसुणह सव्वे सामंता मौडबद्धा य ॥२००४॥  
 एसेस मए बद्धो पुत्तेणं तस्स सूरसेणस्स ।  
 जो सूरसेणकवलणराहुं अप्पाणयं भणइ ॥२००५॥  
 अक्खित्ता सव्वे वि य जो सुहडो एत्तियाण मज्झम्मि ।  
 सो च्छोडावउ सामिं मा भणिहह जं न किर कहियं” ॥२००६॥  
 एत्थतरम्मि सव्वे सामंता मौडबद्धरायाणो ।  
 मंडलिया बहुसुहडा परोप्परं भणिउमादत्ता ॥२००७॥  
 “सो एस वीरसेणो पुत्तो सिरिसूरसेणरायस्स ।  
 कुलदेवयाइ सुमिणे जो कहिओ अज्ज देवस्स ॥२००८॥  
 वट्ठंति वीसवरिसाइं तस्स जायस्स सूरपुत्तस्स ।  
 एसो वि वीसवरिसप्पमाणदेहोव्व पडिहाइ ॥२००९॥  
 सो एस निच्छियं न उण अत्थि अन्नस्स एरिसा सत्ती ।  
 नेमित्तियाण वयणं संवइही जं पुरा भणियं ॥२०१०॥  
 किं कुणिमो किं भणिमो किं हणिमो किं ववसिमो एत्थ ? ।  
 दैवोव्व अदिद्धोच्चिय जो दुक्को अम्ह सामिस्स ॥२०११॥  
 अन्नोन्नमीसियाणं दोणहवि एयाण वारुयाउवरिं ।  
 को रक्खिज्जइ मारिज्जए व्व अम्हेहिं रुट्ठेहिं ?” ॥२०१२॥  
 एत्थंतरम्मि सहसा सोउं नरसीहबंधणं तत्थ ।  
 उम्मुक्कदीहबाहं विलवंतं करुणसदेहिं ॥२०१३॥

विलुलंतकेसपासं भयपरवसथरहरंतथणवड्डं ।  
 तुट्टंतवियडहारं अणुचियकयचरणचंकमणं ॥२०१४॥  
 सिरिकणयरेहपमुहं अंतेउरमागयं जहिं राया ।  
 दट्ठूण तहावत्थं दइयं पुण भणिउमाढत्तं ॥२०१५॥  
 “भो कुमर ! कुमरविक्रम ! कुणसु पसायं पसीय रक्खेसु ।  
 मा मारसु नरसीहं अवयारपरं पि वैरिं पि ॥२०१६॥  
 तुम्हारिसेसु जइ रायपुत्त ! अब्भत्थणाओ न फलंति ।  
 ता कहसु भुयणमेयं सुदुत्थियं कह णु नित्थरिही ? ॥२०१७॥  
 निब्बंधवाण तं चेव बंधवो अम्ह पत्थमाणाण ।  
 भत्तारभिकखदाणेण देव ! कारुन्नयं कुणसु” ॥२०१८॥  
 तो ताण सकरुणालावसुणणसंजायहिययकारुन्नो ।  
 सो भणइ कणयरेहं ‘सच्चमिणं बंधवो तुम्ह ॥२०१९॥  
 ता एस कणयरेहे ! पत्थावे एत्थ ताव मुक्को मे ।  
 भइणीण तुम्ह वयणेण जइवि बहुदोसदुट्ठप्पा ॥२०२०॥  
 किंतु न वीसरइ महं जं खुअखत्तेण मज्झ जणयस्स ।  
 अवयरियं तं समयंतरम्मि कायव्वमेव मए ॥२०२१॥  
 देव(व्व)वसेणं सीहस्स कहवि हरिणाण जं खु अवयरियं ।  
 तं तस्स भइणि ! वीसरइ कह णु जा सयगुणं न कयं” ॥२०२२॥  
 इय भणिऊण(णं) मुक्को पुणो वि पच्चारिओ कुमारेण ।  
 “रे नरसीह ! निसम्मसु मह वयणं सावहाणमणो ॥२०२३॥  
 जइ अज्जपभिइ निसुणेमि ‘सूरकवलणविडप्प’ मिइ ।  
 वयणं तो जं होही कालंतरम्मि तं अज्ज तुह काहं” ॥२०२४॥

वेविरवारविलासिणीण हत्थाओ लेइ चमराइं ।  
 घेत्तूण तस्स च्छत्तं उत्तरिओ रायकरिणीओ ॥२०२५॥  
 तो तव्विहगरुयपहावदंसणुप्पन्नकुमरपच्चासा ।  
 सूरनरेसरलोया अल्लीणा वीरसेणस्स ॥२०२६॥  
 'जय सूरसेणसुय ! वीरसेण ! जय गरुयलद्धमाहप्प ! ।  
 अरिजलणदद्धनियवंसमूलपल्लुयणजलवाह ! ॥२०२७॥  
 जय सूरुगगमउदइ(गि)रिसरिस ! जय वैरिकाणणकुब्बर ! ।  
 नियपरियणकमलायरआणंदवियासदिणनाह ! ॥२०२८॥  
 तिसिएहिं अमयपूरो च्छुहिएहिं व निद्धमहुरमसणं व ।  
 पोओव्व तुमं आवइसमुद्वपडिएहिं लद्धो सि ॥२०२९॥  
 ता देव ! तुज्झ जणयस्स एस सव्वो वि पुव्वपरिवारो ।  
 निप्पच्चासो दीणो पहुं विणा एयमल्लीणो ॥२०३०॥  
 जह य ससप्पं तरंडं अवरुंडइ कोवि अन्नमलहंतो ।  
 अइगरुआवइजलनिहिगएहिं तह एस अम्हेहिं ॥२०३१॥  
 इय एवं जंपंता आससिया सायरं कुमारेण ।  
 "मा भाह न तुम्ह मणागमत्थि इह चित्तगयदोसो ॥२०३२॥  
 ता पडिवन्ना सव्वे अच्छइ मह संनिहम्मि संतुट्ठा ।  
 सुणओ वि नियपरिग्गहमज्झगओ अम्ह गोरविओ ।" ॥२०३३॥  
 एवं नियपरियणपरिगएण सिरधरियधवलछत्तेण ।  
 सियचामरवीजिज्जंतेण तेण पुट्ठो निओ लोओ ॥२०३४॥  
 "कत्थच्छइ इह धरिओ गोत्तीए बिहप्फइस्स पियपुत्तो ।  
 नामेण बंधुयत्तो ? मोयामो जेण तं धरियं" ॥२०३५॥

पुरओ द्विएहिं तेहिं वि सो वि पएसो पयासिओ तस्स ।  
 गंतुण जणगिसहिओ सो वि मोयाविओ मित्तो ॥२०३६॥  
 तो कइवयनियपरियणपरियरिओ निग्गओ य नयरीओ ।  
 अणवरयपयाणेहिं नासिकूपुरं समणुपत्तो ॥२०३७॥  
 जोएइ तत्थ ता तं नासिकुं सब्बओ बलोहेहिं ।  
 आवेढं काऊणं परिवेढियं वैरिराएहिं ॥२०३८॥  
 पुच्छइ य वीरसेणो “कस्स पुरं ? कस्स वा इमं सेत्रं ? ।  
 केण य किर कज्जेणं पवेढियं वैरिसेत्रेहिं ?” ॥२०३९॥  
 एगेण तओ कहियं नरेण ‘एयं विचित्तजसनयरं ।  
 सेत्राई य एयाई नरसीहनरिंदत्तणयाई ॥२०४०॥  
 ता एस विचित्तजसो परमो बंधुव्व सूरसेणस्स ।  
 नो मन्नइ नरसीहं असेसवसुहाहिवं रायं ॥२०४१॥  
 एएण कारणेणं हडेण परिवेढियं पुरं तस्स ।  
 बारसवरिसाई इमस्स वेढियस्सावि वड्ढंति ॥२०४२॥  
 परिखीणसव्वलोयं अंतोदुब्बिक्खपीडियं नयरं ।  
 पक्खीणिंघण-धण-धन्न-जवस-जलमाइववहारं ॥२०४३॥  
 अज्जं व अहव कल्ले नयरं भज्जिही नत्थि संदेहो ।  
 इय एसो तुह कहिओ नीसेसो नयरवुत्तंतो’ ॥२०४४॥  
 सोऊण इमं वयणं वीरो अइविसमरोसरत्तच्छो ।  
 पड्डवइ बंधुयत्तं विचित्तजसरायपासम्मि ॥२०४५॥  
 सिक्खवइ “भणसु रायं होसु थिरो मा मणे भयं कुणसु ।  
 मा जंपसु दीणाई मा मुयसु नियाभिमाणं च ॥२०४६॥

जइ हं कोवि मणुस्सो जइ जाओ सूरसेणराएण ।  
ता अज्ज चैव इह तुह पुरम्मि उव्वेढ्यं काहं” ॥२०४७॥  
अट्टालयपुरिसेहिं रायाणुमओ पवेसिओ मित्तो ।  
एत्तो य वीरसेणो संपत्तो कडयमज्झम्मि ॥२०४८॥  
हरिधम्मनामधेयस्स जाइ सेणाहिवस्स पासम्मि ।  
गंतूणं तं बंधइ पच्छाहुत्तेहिं बाहूहिं ॥२०४९॥  
तं पुरओ काऊणं वच्चइ सव्वेसु रायगेहेसु ।  
ते वि तहच्चिय बद्धा रायाणं बारससहस्सा ॥२०५०॥  
पेच्छंतस्स य लोयस्स सयलसेन्नाण चाउरंगाण ।  
कुमरेण कयंतेण व अप्पडियारेण ते धरिया ॥२०५१॥  
धरिऊण य तव्वेलं विचित्तजसराइणो समप्पेइ ।  
सव्वाइं य सेन्नाइं अनायगाइं पणट्टाइं ॥२०५२॥  
तो जाओ उव्वेढो संजाओ सुत्थिओ जणो सव्वो ।  
पविसंति सव्वओ च्चिय जवसिंधण-धन्नमाईण ॥२०५३॥  
तो बंधुयत्तकहियं सोउं सिरिसूरसेणवुत्तंतं ।  
तद्दुक्खदुक्खियप्पा मणागमासासिओ राया ॥२०५४॥  
वणदेवीपरिवालियकुमारवुत्तंतसवणपुलयंगो ।  
समहियसंपत्तसुहो संजाओ हरिसपडहच्छो ॥२०५५॥  
सोउं नरसीहस्स य माणभंसं कयं कुमारेण ।  
अउरुव्वविम्हउप्फुल्लुलोयणो वहइ आणंदं ॥२०५६॥  
एत्थागओत्ति निसुए तिहुयणरज्जाहिसेयतुट्ठो व्व ।  
अंगम्मि अमायंतो हरिसरोमंचमुव्वहइ ॥२०५७॥

नयरुव्वेढपइन्ना-निसुणणसंजायपहरिस-विसाओ ।  
 मा कहवि होज्ज कुमरस्स पच्चवाओ रिऊहिंतो ॥२०५८॥  
 इय जावच्छइ समहिय-सच्चरियायन्नणुच्चरोमंचो ।  
 वीरेण पेसियं ता नियई राया नरिंदोहं ॥२०५९॥  
 तो वीरसेणपेसिय-पहाणपुरिसेहिं रक्खियं दिट्ठं ।  
 नरवइणा अच्चब्भुय-विम्हयरसधुयसिरत्तेण ॥२०६०॥  
 कहियं पहाणपुरिसेण 'देव ! एए असेसनरवइणो ।  
 हरिधम्मरायपमुहा तुह रिउणो ! आणिया एत्थ ॥२०६१॥  
 एक्कुंणेण वि सिरिवीरसेणकुमरेण नियभुयबलेण ।  
 चोरव्व बंधिऊणं तुज्झ सयासम्मि पड्डविया ॥२०६२॥  
 ता एयाण सयं चिय जं जोग्गं होइ तं तुमं कुणसु ।  
 इय मज्झ मुहेण इमं विन्नत्तं तुज्झ कुमरेण' ॥२०६३॥  
 तो भणइ विचित्तजसो 'अच्छंतु इहेव ताव नरनाहा ।'  
 आइस्सइ पहिड्डुमणो पडिहारभडाण कायव्वं ॥२०६४॥  
 'रे ! वीरसेणकुमरागमम्मि कारेह उच्छवं नयरे ।  
 विहिउज्जलनेवच्छे चलउ जणो कुमरपच्चोणिं ॥२०६५॥  
 अहयं पि एस चलिओ सपरियणो वीरसेणपासम्मि ।'  
 पडिहारेहिं असेसं अणुट्ठियं रायवयणं पि ॥२०६६॥  
 महया सम्महेणं नियपरियण-पौरजणवयसमेओ ।  
 राया कुमारपासं सह पत्तो बंधुयत्तेण ॥२०६७॥  
 उत्तरइ करिंदाओ कुमारमुहकमलखित्तथिरनयणे(णो)।  
 दूरपसारियबाहू आलिंणइ परमनेहेण ॥२०६८॥

चुंबइ सिरम्मि कुमरं कुमरो पिउनिव्विसेसबुद्धीए ।  
 पणमइ रायं सिरसा सिरविरइयपंजलीबंधो ॥२०६९॥  
 भणइ नरिंदो 'तुह कुसलवट्टमाणि(णिं?) कहन्नु पुच्छामि ? ।  
 जो भुयणस्स वि कुसलं करेइ कह अकुसलयं तस्स ? ॥२०७०॥  
 नणु संठियो सुहेणं ? वयणमिणं वीर ! पडइ ववहारे ।  
 दुक्खासंका कह तस्स जस्स आणाकरा देवा ? ॥२०७१॥  
 पुत्तेहिं तुज्झ दंसणमिमंपि उवयारतप्परं वयणं ।  
 पयडाइं चिय अरिबंधणेण मह जेण पुत्ताइं ॥२०७२॥  
 जोग्गो सि गरुयरिउनिग्गहेत्ति वयणस्स नत्थि अवयासो ।  
 नरसीहनिग्गहेण वि सजोग(ग्ग)या पयडिया तुमए ॥२०७३॥  
 जमहं किर पुच्छिस्सं चरियाइं चिय कहंति तं तुज्झ ।  
 इय निरवयासवयणस्स मज्झ न फुरंति वयणाइं ॥२०७४॥  
 वयणेहिं कहिज्जंतो केत्तियदूरं गुणा सुणिज्जंति ।  
 ते च्विय सच्चरिएहिं पयडिज्जंता पवड्ढंति ॥२०७५॥  
 सामन्नगुणाणं चिय सामन्नमई गुणा पसंसंति ।  
 नीसामन्नाण पुणो नीसामन्ना जइ मुणंति ॥२०७६॥  
 नियमइसरिसं चिय फुरइ माणसं वरकईण विसएसु ।  
 ताणं पि हु निव्विसयाइं चित्तचरियाइं वीराण' ॥२०७७॥  
 इय निब्भरगरुयगुणाणुरायवियडुल्लसंतवयणस्स ।  
 रायस्स वयणमक्खिविय भणइ पुण वीरसेणो वि ॥२०७८॥  
 "गरुयाण नियगुरुत्तण-सरिसा संभावणा मणे फुरइ ।  
 अमयमयस्स व ससिणो किरिणा अमयं चिय मुयंति" ॥२०७९॥

तो भणइ विचित्तजसो 'आरुह जयवारुणम्मि वच्चामो ।'  
 रायवयणावसाणो वीरो आरुहइ हत्थिम्मि ॥२०८०॥  
 तो गरुयरिद्धिसमुदय-संपाइयलोयलोयणाणंदो ।  
 पविसइ नासिक्कपुरं वीरो नरनाहपरियरिओ ॥२०८१॥  
 अइगरुयलोयसम्मद्वभरियपुर-पह-चउक्क-तिय-रच्छे ।  
 वित्थरइ थिमियपसरंतवियडसेन्नो महीनाहो ॥२०८२॥  
 पिहुलीकओ व्व वित्थारिओ व्व दीहीकओ व्व तणुओ वि ।  
 चच्चर-चउक्क-तिय-रायमग्ग-रच्छासु पुरलोओ ॥२०८३॥  
 तरलायंति अदिट्ठे मुणियपएसम्मि ईसि तरलाइं ।  
 दिट्ठे थिराइं जायंति नवर कुमारे जणच्छीणि ॥२०८४॥  
 कत्थागओ म्हि ? कह संठिओ म्हि ? कोहं ? च एत्थ किंकज्जो ? ।  
 कुमरालोयणविवसो न मुणइ अप्पं पि पुरलोओ ॥२०८५॥  
 अवहीरइ अवमन्नइ परिनिंदइ तह दुगुंछए जणोहो ।  
 अन्नं दंसिज्जंतं कुमरनिहित्तेक्कमण-नयणो ॥२०८६॥  
 सिरिवीरसेणदंसण-असरिसपसरंतविम्हयरसाण ।  
 लोयाणं बहुपयारा अन्नोन्नं आसि आलावा ॥२०८७॥  
 "सो एस जेण सुपयंडनियभुयदंडखंडियपयावो ।  
 एक्कंणेण वि बद्धो नरसीहनरिंदसंदोहो ॥२०८८॥  
 नंदउ एसो सुचिरं कुमरो संसारसारयाभूओ ।  
 मोयावियाइं जेणं गब्भदुहाओ व्व रोहाओ ॥२०८९॥  
 रूवे वि न लावन्नं तम्मि य न वियड्ढमणहरो वेसो ।  
 तत्थ वि न विक्कमो उवसमो य एयम्मि पुण सव्वं ॥२०९०॥



नयणाइ दंसणेणं तग्गुणगहणेण वयणकमलाइं ।  
 चित्ताइं चिंतणेणं जणस्स जायाइं सफलाइं ॥२०९१॥  
 नरलोयअसंभवरूवदंसणुप्पन्नविम्हयरसाण ।  
 लोयाण मच्चलोयंमि आसि सारत्तपडिवत्ती” ॥२०९२॥  
 इय एवमाइबहुविहवियप्पमयगोयरं नरवरिंदो ।  
 पइसावइ नियभवणे कुमरं अइगरुयरिद्धीए ॥२०९३॥  
 पढंमं परियप्पियमणिमयम्मि सीहासणम्मि उवविसइ ।  
 उवविद्धम्मि नरिंदे कुमरो बहुगोरवमहग्घं ॥२०९४॥  
 कयसमुचियपडिवत्ती विचित्तजसराइणा इमं भणिओ ।  
 ‘इह कुमर ! तुमं राया अम्हे उण सेवया तुज्झ ॥२०९५॥  
 जं जह काले उचियं तं तह अम्हाण देज्ज आएसं ।  
 मा वच्छ ! सकीयम्मि परबुद्धिं इह करेज्जासु ॥२०९६॥  
 तो नियमंदिरसरिसं पासायं देइ वीरसेणस्स ।  
 तयणु विसज्जइ राया सावासं उचियकयकज्जो ॥२०९७॥  
 अच्छइ निए व गेहे कुमरो संतुट्टमाणसो एत्थ ।  
 मणचिंतियसंपज्जंतसयलवत्थू सपरिवारो ॥२०९८॥  
 इय तुम्ह मए कहियं चरियं संखेवओ कुमारस्स ।  
 निसुएण जेण जायइ विम्हयरसपरवसं हिययं ॥२०९९॥  
 तो भणइ विलाससिरी ‘सहि ! अज्ज वि इह जयम्मि दीसंति ।  
 उप्पाइयअच्छरिया सुकप्पतरुणोव्व सप्पुरिसा’ ॥२१००॥  
 तो चंदसिरी पभणइ ‘गोवद्धण ! को तुमं कुमारगिहे ? ।’  
 सो भणइ ‘तस्स पिउण्णे पुरोहिओ आसि मज्झ पिया’ ॥२१०१॥

पुण भणइ विलाससिरी 'पुरओ साहर कुमारवुत्तंतं ।'  
 चंदसिरीए भणियं 'गोवद्धण ! कहसु मह पुरओ ॥२१०२॥  
 निसुएण वि तस्स महाणुभावचरियस्स वीरसेणस्स ।  
 नामेण वि पल्हायइ मह अंगं पुलयमुव्वहइ' ॥२१०३॥  
 तो बंभणेण भणियं 'विचित्तजसरायवल्लहा धूया ।  
 इह कावि अत्थि नयरे चंदसिरी विजियरइरूवा ॥२१०४॥  
 विन्नाणगुणनिहणं नीसेसकलाकलावपरिकलिया ।  
 सा दिट्ठा अब्बदिणे ससिणेहं वीरसेणेण ॥२१०५॥  
 तदंसणदियसाओ पभिइं सो तारिसो महासुहडो ।  
 मयणसरजज्जरंगो कायरपुरिओ व्व संजाओ ॥२१०६॥  
 चिंतावसपरियप्पियदइयापरिरंभजायरोमंचो ।  
 सच्चवियनियवियारो पुणरवि[स] विलक्खिमं वहइ ॥२१०७॥  
 दइयानिमित्तबहुविहवियप्पजालाणुरूवकयचेट्ठो ।  
 तब्भावरसो वियरइ नडोव्व नाणाविहवियारो ॥२१०८॥  
 विरयनिमेसुम्मेसो निच्चलपम्हउडदीहप(पि)हुलच्छो ।  
 सो जणइ सुरकुमारभमेण लोयाण आसंकं ॥२१०९॥  
 जे हियए वि न सम्मति जे न वोत्तुं पि जंति वयणेहिं ।  
 ते तारिसा वियारा तयलाहे तस्स संजाया ॥२११०॥  
 दट्ठूण बंधुयत्तो चंदसिरिअलाहदुत्थियं कुमरं ।  
 संकंततट्ठुहो इव ससंकचित्तो विचित्तेइ ॥२१११॥  
 'अहह ! अइविसममेयं समुवट्ठियमविसयं मह मईए ।  
 कज्जं गरुयत्तणदुग्गहं व हियए न संखइ ॥२११२॥

एयस्स संपयं चिय संजाया एरिसी महावत्था ।  
 चंदसिरी पुण अज्ज वि इमस्स नामं पि न मुणेइ ॥२११३॥  
 को जाणइ नियधूयं कस्स वि दाही विचित्तजसराओ ? ।  
 अमुणियतयभिप्पाओ तं कह पत्थेमि कुमरत्थे ? ॥२०१४॥  
 जत्थ न पसरइ बुद्धी न विक्रमो तं दुसज्झमिह कज्जं ।  
 सिज्झइ जइ पर तुरियं चक्केसरिपयपसाएण ॥२११५॥  
 ता एसच्चिय देवी अइदुत्थियलोयकप्पवल्लिव्व ।  
 चक्केसरी करेही करुणाए इमस्स स(सं)नेज्झं ॥२११६॥  
 काऊण निच्छयमिणं अहमिह चक्केसरीए पूयत्थं ।  
 पइदियहं विणिउत्तो बंधुयत्तेण मित्तेण ॥२११७॥  
 पढमं आगंतूणं देविं पूएमि सव्वविहिपुव्वं ।  
 पच्छा एइ कुमारो सबंधुयत्तो पणामत्थं ॥२११८॥  
 पइदियहं जाव न चक्किणीए परमेसरीए पयकमलं ।  
 पणमइ न ताव भुंजइ सो वीरवई महासुहडो ॥२११९॥  
 तो तव्वयणं सोउं चंदसिरी हरिसवियसियकवोला ।  
 आणंदबाहनीसंदसुंदरं वहइ मुहकमलं ॥२१२०॥  
 मन्नइ स(सु)कयत्थं चिय अप्पाणं पिययमाणुराएण ।  
 तेलोक्काहिवइत्तण-लाभेण व वहइ आणंदं ॥२१२१॥  
 'जायंमिह अज्ज संजीवियंमिह अज्जेव जम्मसाफल्लं ।  
 अज्जं चिय फलियं मह गुरुण आसीपयाणेहिं ॥२१२२॥  
 एत्तियमेत्तेणं चिय सलहिज्जइ इह असारसंसारो ।  
 अवरोप्परपेम्मपरव्वसाणं जं होइ रमणीओ ॥२१२३॥

अइविसमो पेम्मरसो जम्हा जं वीरसेणवेयल्लं ।  
 बंधुयणसोयणिज्जं तं चिय मह पहरिसनिमित्तं' ॥२१२४॥  
 इय एवमाइ चित्ते चिंतंती जायतग्गयवियप्पा ।  
 चंदसिरी नियएसु वि अंगेसु न माइ हरिसेण ॥२१२५॥  
 सिरिवीरसेणअणुराय-सवणसंजायपहरिसुक्कुरिसा ।  
 सीयलपवणमिसेणं पुलयं निणहवइ रायसुया ॥२१२६॥  
 तो भणइ विलाससिरी 'निहुयं समओ वि तस्स आगमणे ।  
 आसण-तंबोलाइ कीरइ सव्वंपि सन्निहियं ॥२१२७॥  
 पुव्वागयाओ अम्हे सागयमम्हेहिं तस्स कायव्वं ।  
 कारुण अवडुंभं हियए परिहरह मुद्धत्तं' ॥२१२८॥  
 चंदसिरीए भणियं 'पियसहि ! जं किंपि होइ तं होउ ।  
 मह नत्थि वसे हिययं कुणसु तुमं सव्वमुचियत्थं' ॥२१२९॥  
 तो भणइ विलाससिरी 'सव्वं जं भणसि तं करिस्सामि ।  
 परमेगं पत्थिस्सं तं तुमए अवस्स कायव्वं' ॥२१३०॥  
 'भणसु'त्ति रायधूयाए जंपिए भणइ पुण विलाससिरी ।  
 'अणुकूलिमाए पियसहि ! आराहसु पिययमं अज्ज ॥२१३१॥  
 'अणुकूलत्तणदिढगुणसंजमियं चंचलं पि पयईए ।  
 न चलइ मणं जणस्स वि विसेसओ हिययदइयस्स ॥२१३२॥  
 एयं चिय वसियरणं एयं चिय दुव्वियप्पसंवरणं ।  
 एयं चिय चउरत्तं पियम्मि जं आणुकूलत्तं' ॥२१३३॥  
 तो भणइ रायधूया 'सहि ! मह हिययाणुकूलिमाए वि ।  
 रंजिस्सइ सो सुहओ जइ सच्चं सो च्विय कुमारो ॥२१३४॥

रंजिज्जइ मुद्धजणो पियसहि ! इयराणुकूलिमगुणेण ।  
 हिययाणुकूलिमं चिय च्छइल्लपुरिसा पसंसंति' ॥२१३५॥  
 एत्थंतरम्मि सहसा पुरोहिओ उट्ठिओ ससंभंतो ।  
 'आओत्ति वीरसेणो' जंपंतो तरलतारच्छे ॥२१३६॥  
 'आओ'त्ति इय पलत्ते हियउक्कलियाहिं बहुवियप्पाहिं ।  
 तह नडिया चंदसिरी विम्हरिया सा जहप्पाणं ॥२१३७॥  
 अइवल्लहपढमसमागमम्मि तरलत्तणं गुरूणं पि ।  
 अंतरइ मणस्स फुडं उचियाणुचियत्तणविवेयं ॥२३८॥  
 तो चंदसिरी काऊण कारिमं माणसे अवट्ठंभं ।  
 अन्नववएसवावारवावडं कुणइ अप्पाणं ॥२१३९॥  
 सिरीवीरसेणदंसणसमुच्छुयं कट्ठियं हडे(ढे)णेव ।  
 दाहिणकरयललीलाकमले च्विय ट्ठुवइ नयणजुयं ॥२१४०॥  
 भरखित्तनीसहंगी बिउणीकयबाहुनिहियगंडयला ।  
 मणिमत्तवारणगया तलगयदासीण संदिसइ ॥२१४१॥  
 एत्थंतरे कुमारो संबंधुयत्तो समागओ तत्थ ।  
 मोत्तूण दूरओ च्विय परिवारमुवद्दवभएण ॥२१४२॥  
 सो उज्जुयं नियंतो देवीमुहकमलमेव गब्भहरं ।  
 पविसइ अणन्नदिट्ठी अमुणियचंदसिरिआगमणो ॥२१४३॥  
 तस्साणुमग्गओ च्विय जा पविसइ पियवयंस[ओ?] पुरओ ।  
 तो पेच्छइ चंदसिरिं विलासलच्छीए परियरियं ॥२१४४॥  
 दट्ठूण बंधुयत्तो रायसुयं मत्तवारणनिसिन्नं ।  
 'चक्केसरिदेवीए एस पसाओ'त्ति चिंतेइ ॥२१४५॥

'कहमन्नह प्पडु(डू?)या इह चिट्टइ निप्पओयणा एसा ।  
 जा खणमवि दासीजणसहीसहस्सेहिं अविरहिया ?' ॥२१४६॥  
 ता पहरिसवसपसरियगयवेयविसंठुलंसुयनिवेसो ।  
 विसिऊण गब्भहरयं अक्खिवइ कुमारउत्तरियं ॥२१४७॥  
 'किं बंधुयत्त ! एयं ?' इय भणिए वीरसेणकुमरेण ।  
 'मह देसु पारिओसिय'मिय भणियं बंधुयत्तेण ॥२१४८॥  
 कुमरो भणइ 'किमिहइं चंदसिरी आगया परमइड्डा ? ।  
 मं पारिओसियं जेण मग्गसे जायसंतोसो' ॥२१४९॥  
 'एवं' ति भणइ मित्तो कुमरो पुण भणइ दीहमूससिउं ।  
 'कहमम्ह एत्तियाइं पुत्राइं वयंस ! होहिंति ?' ॥२१५०॥  
 तो भणइ बंधुयत्तो 'असज्झमिह नत्थि तुज्ज पुत्राणं ।  
 सिरिचक्केसरिदेवीपसायसंपत्तिगरुयाण ॥२१५१॥  
 सा वीरसेण ! इहइं समागया निच्छियं तुह सवामि ।  
 चिट्टइ पच्चक्खं चिय पेच्छसु बाहिं महावीर !' ॥२१५२॥  
 'चिट्टइ जाणामि अहं लिहिया भित्तिम्मि जा मए पुव्वि ।'  
 इय भणइ वीरसेणो अपत्तियंतो वयंसस्स ॥२१५३॥  
 पुण भणइ बंधुयत्तो निव्वत्तसु चक्किणीए पयपूयं ।  
 पच्छ तुह दाविस्सं इह वेव विचित्तजसधूयं' ॥२१५४॥  
 'एवं होउ'त्ति तओ कुमरो निव्वत्तिऊण देवीए ।  
 पूयाविहिं महंतं संथुणइ तओ पहिट्टमणो ॥२१५५॥  
 "पणमह अप्पडिचक्कुं करालकरचक्कुंकंतिकब्बुरियं ।  
 अरितिमिरपहायकालुग्गमंतबहुसूरसंज्जव्व ॥२१५६॥

बहुकरसहस्रपरिवियडचक्रुधारासु सहसि संकंता ।  
 पडिपाणिरक्खणडं विउरुव्वियबहुसरीरव्व ।  
 हिययम्मि पईवसिहव्व जाण निवससि निरंतरं देवि ! ।  
 ताण पयासइ सयलं तिलोयमवि पयडपरमत्थं ॥२१५८॥  
 दुद्धरिसतेयभरभासुरा वि विज्जुव्व देवि ! खणदिद्धा ।  
 संमोहकारणं चिय रिऊण तं कालरत्तिव्व” ॥२१५९॥  
 इय देवीए गुणत्थू(धु)ई-महत्थपरिभावणापुलइयंगो ।  
 आणंदबाहपच्चा (व्त्खा?)लियाणणो पणवइ पुणो वि ॥२१६०॥  
 तो भणइ वीरसेणो ‘दावसु मह बंधुयत्त ! चंदसिरिं ।  
 अइदुक्खिओ त्ति काउं मुहाए किं मित्त ! वेलवसि ?’ ॥२१६१॥  
 एत्थंतरम्मि सहसा विलासलच्छी पसन्नमुहकमला ।  
 चंदसिरीआइद्धा समागया कुमरपासम्मि ॥२१६२॥  
 आंगंतूणं करयलरइयंजलिसंपुडाए सप्पणयं ।  
 भणियं ‘कुणसु पसायं उवविस वरमत्तवारणए ॥२१६३॥  
 एसा असेसनरवालमउलिसंचलियपायकमलस्स ।  
 चंदसिरी इह चिड्डइ विचित्तजसराइणो धूया ॥२१६४॥  
 कीरइ तिस्सा एसो महापसाओ’त्ति वियसियकवोलो ।  
 दरहसियदसणकिरिणोहनिहयगब्भहरघणतिमिरो ॥२१६५॥  
 ‘सच्चं चिय मित्त ! तए भणियं’ इय जंपिऊण तस्स भुए ।  
 आसंधियनियपाणी उवविद्धो मत्तवारणए ॥२१६६॥  
 तो भणइ विलाससिरी ‘कुमार ! मा सामिणीए अवराहं ।  
 गेण्हेज्जसु उज्जाणे कीलाए दढं परिस्संता ॥२१६७॥

तुज्झोवरिपरिवद्धिय-गरुयसिणेहाणुरायविवसाए ।  
 एयाए कुमार ! अहं विणिउत्ता उचियकज्जेसु ॥२१६८॥  
 गरुयाणुरायरसियं हिययं कुलबालियाण लज्जाए ।  
 कयअप्पगब्भभावं खललोओ अन्नहा मुणइ' ॥२१६९॥  
 घेत्तूण कणयतलियं विलासलच्छीए बीडयसणाहं ।  
 घणसारहरिणनाहीसुयंधसिरिखंडकच्चोलं ॥२१७०॥  
 अइसुरहिकुसुमसंभवसहत्थघणगुच्छमालियं पुरओ ।  
 काऊण सव्वमेयं समप्पियं वीरसेणस्स ॥२१७१॥  
 तेण वि नरिदधूया-बहुमाणगुणेण अप्पणा गहियं ।  
 जहजोगयाए सव्वं विणिउत्तं अप्पणच्चेय ॥२१७२॥  
 तो भणइ वीरसेणो "विलाससिरि ! तुम्ह सामिणी एसा ।  
 किं किं कमलब्भंतरनिविद्धदिद्धी पलोएइ ?" ॥२१७३॥  
 सा भणइ "कुमारी एत्थ वंच्छए रायहंससंबंधं ।  
 माणंसकमलनिवासो किमस्स इद्धो अणिद्धो वा ? ॥२१७४॥  
 इय वासणाए एसा पुणो पुणो कमलगब्भभिक्खेइ ।'  
 तो भणइ वीरसेणो "सच्चमिणं पभणियं तुमए ॥२१७५॥  
 जइ सुद्धोभयपक्खो जइ विमलमई य गुणविभागन्नू ।  
 ता जम्मपभिइ एसो वस(सि)ही एत्थेवमणुलग्गो ॥२१७६॥  
 मोत्तूण सिरि-सरस्सइनिवासमेयं समुज्जलगुणहं ।  
 अहिणववियासमेसो किं वसही लिंबकुसुमम्मि ?" ॥२१७७॥  
 पभणइ विलासलच्छी 'एएणं चिय कुमार ! कज्जेणं ।  
 वररायहंसवासं अहिलसइ निरंतरं एसा' ॥२१७८॥



एत्थंतरम्मि सोउं चंदसिरी वीरसेणवयणमिणं ।  
 पच्छायइ रोमंचं वरिल्लवत्थेण अंगम्मि ॥२१७९॥  
 जोयइ तिरिच्छचलियच्छियतारयं विसमवलियभूभंगं ।  
 कुमरच्छिनिवायभया संकुइयं कहवि चंदसिरी ॥२१८०॥  
 एथा(त्था)वसरे जणणीए पेसिया तत्थ निययपडिहारी ।  
 नमिऊण भणइ कुमरिं 'देवी वारहइ(वाहरइ?) संचलह' ॥२१८१॥  
 पियविप्पओगजणणं तव्वयणं वज्जवडणदुव्विसहं ।  
 सा रायसुया सोउं परियप्पइ किंपि हिययम्मि ॥२१८२॥  
 अप्पत्थावम्मि कओ आएसो वि हु गुरुण दुल्लंघो ।  
 उव्वेवयरो जायइ पियविरहविसेसदुक्खेण ॥२१८३॥  
 भूसन्नाए निउत्ता कुमरीए तओ विलासलच्छी वि ।  
 पुच्छइ 'कुमार ! देविं अणुमन्नसु जणणिपासम्मि' ॥२१८४॥  
 'एवं करेह' भणिए कुमरेण तओ सरीरमेत्तेण ।  
 झणझणिरनेउररवा सहीए जंती इमं भणिया ॥२१८५॥  
 'तेण तुह देवि ! अप्पा समप्पिओ जम्मपभिइ चउरेण ।  
 तुमए उण तं न कयं तस्स मणो जेण पत्तियइ' ॥२१८६॥  
 तो भणइ रायधूया जइ सच्चं सो वियक्खणो चउरो ।  
 ता मज्झ मणं मुणिही अहवा कालंतरेणावि' ॥२१८७॥  
 एसो य असोएण विज्जाबलच्छन्ननियसरूवेण ।  
 चंदसिरि-वीरसेणाण लक्खिओ नेहसंबंधो ॥२१८८॥  
 तो ताण तेण दोहिं वि परोप्परं परमनेहनिबिडाण ।  
 विहडावणत्थमेवं वियप्पियं निययहिययम्मि ॥२१८९॥

'किं एत्थेव समप्पउ संग्गामो सह इमेण कुमरेण ? ।  
 अहवा न होइ एवं सुदुज्जओ एस जं समरे ॥२१९०॥  
 किं वा पत्थेमि इमं विचित्तजसरायमप्पकज्जम्मि ? ।  
 नेवं सो वि न सक्कइ पडिकूलं भणिउमेयाए ॥२१९१॥  
 अहवा वि पुव्वपक्खा सप्पडिवक्खा न होति कज्जखमा ।  
 ता एसो च्चियं पक्खो विणिच्छिओ जो मए पुव्वि ॥२१९२॥  
 पढमं च पीढबंधो इमस्स कज्जस्स चिंतिओ एस ।  
 जं सामपुव्वयं चियं विमाणदाणं कयमिमीए ॥२१९३॥  
 जइ ता विमाणदाणोवरुद्धतज्जणणि-जणयवयणेण ।  
 एसा मं परिणेही ता सिद्धं मज्झं जं सज्झं ॥२१९४॥  
 अह अन्नहा करेही एसा एएण ता विमाणेण ।  
 गच्छंती गयणयले सुनिच्छियं अवहरिस्सामि ॥२१९५॥  
 ता एसो च्चियं मंतो हरियव्वा संपयं' इय असोओ ।  
 तिस्सा विमाणमज्झे पच्छन्नो था(ठ?-जा?)इ कवडेण ॥२१९६॥  
 अह चंदसिरी वि गया जणणिसयासं सहीहिं परियरिया ।  
 गंतूण नमइ जणणिं उवविसइ तओ समीवम्मि ॥२१९७॥  
 जणणीए पुच्छिया सा 'पुत्ति ! कहिं एत्तिया ठिया वेलं ? ।'  
 सा भणइ 'चक्किणीए भवणम्मि गया पणमत्थं' ॥२१९८॥  
 'साहु कयं'ति सतोसं भणियं 'जणणीए 'पुत्ति ! किं एण्हिं ।  
 कायव्वमत्थि अन्नं ? ता वच्चामो नियं गेहं' ॥२१९९॥  
 एत्थंतरम्मि वज्जिरअणवज्जाओज्जसदगंभीरं ।  
 अप्फालियं सहेलं पत्थाणसमुब्भवं तूरं ॥२२००॥

आयत्रिऊण सद्धं तूरस्स तुरंतहिययवावारो ।  
 उज्जाणाओ सव्वो संचलिओ तक्खणे लोओ ॥२२०१॥  
 पुत्विं परिकप्पियअप्पमाणकरि-तुरय-संदणाईसु ।  
 अइगउरविओ लोओ सव्वो वि जहारुहं चलिओ ॥२२०२॥  
 तो जणणीए भणिया चंदसिरी 'पुत्त(त्ति) ! नियविमाणम्मि ।  
 आरुहसु जेणम्हे(जेण अम्हे) वच्चामो निययजाणेण' ॥२२०३॥  
 आएसाणंतरमेव जाव आरुहइ सा विमाणम्मि ।  
 ता तीए अहिमुहं चिय च्छीयं केणावि तव्वेलं ॥२२०४॥  
 सोउं तं विजयवई 'पडिवालसु ता खणंतरं पुत्ति ! ।  
 सउणो माणिज्जंतो सुहावहो होइ' इय भणइ ॥२२०५॥  
 पडिवालिकुण य खणं रणंतमणिमेहला समारुहइ ।  
 जा चंदसिरी एगा ता सहसा तं समुप्पइयं ॥२२०६॥  
 तो पभणइ विजयवई विलासलच्छिं च चमरधारीओ ।  
 तंबोलवाहिणी विय 'पुत्तय ! घेत्तूण वच्चाहि' ॥२२०७॥  
 तो भणइ रायधूया 'किं मज्झ वसेण एयमुप्पइयं ? ।  
 नो जाणामि भविस्सइ किमेत्थ ? संकइ व मे हिययं' ॥२२०८॥  
 तो भणइ तीए जणणी 'न पुत्ति ! एयाइं दिव्वजाणाइं ।  
 भूगोयरपयफंसं सहंति ता गच्छ नीसंका' ॥२२०९॥  
 अह विजयवई नियजाणमुत्तमं आरुहेइ सवियप्पा ।  
 'एगागिणी विमाणे धूय'त्ति ससंकमुच्चलिया ॥२२१०॥  
 नाणाविहगीय-विणोय-नट्ट-पेच्छणयसयसमिद्धम्मि ।  
 नयरम्मि सा पविट्ठा उट्ठं अवलोयए जाव ॥२२११॥

ता पेच्छइ उच्चयरं वच्चंतं तं विमाणमइवेगं ।  
 सहस त्ति भूमिगोयर-जणसंगभएण नट्टं व ॥२२१२॥  
 दिट्ठं नयरजणेणं वेयवसा कमतिरोहियसरूवं ।  
 गयणे दिव्वविमाणं भयतरलियनयणपसरेण ॥२२१३॥  
 तो ताण समुच्छलिओ नयरे उताणियाणणच्छीण ।  
 'कत्थ गयं कत्थ गयं विमाणमेयं हहा !' सद्धो ॥२२१४॥  
 विलयाहि निरंतरतरलनयणवसविसमवयणे(णा)हिं ।  
 उभयंसेसु लुलंतो उवेक्खिओ च्छुट्ठधम्मेल्लो ॥२२१५॥  
 'अवहरिया केणइ पावकम्मनिरएण एस पिहुलच्छी ।  
 विज्जाहराहमेणं चंदसिरी पुत्रचंदमुही ॥२२१६॥  
 परिभावियं न एयं नियचित्ते तेण जं नियसुहत्थी ।  
 कह भुयणं पि असेसं ठ्वामि दुक्खे अहं एक्को ? ॥२२१७॥  
 हा जणणि-जणयभत्ते ! हा देव-गुरूण पूयणक्खणिए ! ।  
 हा विविहविणोयविलासवल्लहे ! कत्थ दीसिहसि ? ॥२२१८॥  
 तुह रहियं एयं पि य सुन्नं नयरं न केवलं जायं ।  
 दिट्ठ-निसुया सि जेहिं वि हिययाइं वि ताण लोयाण' ॥२२१९॥  
 इय हाहारवबहिरियदियंतराभोयभीसणं नयरं ।  
 तक्खणमेत्तेणं चिय संजायं पिउवणसरिच्छं ॥२२२०॥  
 तो विजयवई धूया अहंसणभयपकंपियसरीरा ।  
 'परितायह'त्ति भणिरी नरवालसमीवमल्लीणा ॥२२२१॥  
 तो भणइ महाराओ 'कहसु पिए ! वइयरं मह असेसं ।'  
 तो जहवित्तं कहियं नीसेसं रायपत्तीए ॥२२२२॥  
 तो नरवइणा भणियं 'पन्नायर ! कारणं वियप्पेसु ।

मह बुद्धीए न खयरो तहाविहो कोवि मह सत्तु ॥२२२३॥  
 अणुमाणवसेण इमं पन्नायर ! मह मणम्मि विप्फुरइ ।  
 च्छीयं विमाणआरोहणम्मि जं तत्थ तं एयं ॥२२२४॥  
 तमसोयस्स विमाणं विज्जादेवीपहावदुप्पेच्छं ।  
 सामन्नेहिं न तीरइ अवहरिउं इयरखयरेहिं ॥२२२५॥  
 ता निच्छियमेयं तेण माइणा कूडकवडबहुलेण ।  
 मह धूया अवहरिया असोयखयरेण पावेण ॥२२२६॥  
 छलिओ म्हि कहं पेच्छसु विमाणदाणब्भमेण अइसरलो ।  
 इय तस्स मई नूणं सुहसज्झा मह विमाणगया' ॥२२२७॥  
 पन्नायरेण भणियं 'देव ! जहा निच्छ(च्छि)यं तए एयं ।  
 कज्जं तहेव जायं मए वि परिसंकियं पुट्ठिं ॥२२२८॥  
 पन्नायरवयणाओ संजायविणिच्छओ महाराओ ।  
 सह विजयवईय(ए) तओ मुच्छाए महीयत्ते पडिओ ॥२२२९॥  
 संमीलियनयणदलो मिलाणसव्वंगसंगयावयवो ।  
 चंदसिरिविरहिओ सो संकुइओ कुमुयसंडोव्व ॥२२३०॥  
 हिययनिवेसियनियपाणिपल्लवो सहइ कह महाराओ ।  
 'हिययट्ठियं पि धूयं मा हरिही' इय भएणं व ॥२२३१॥  
 दूरपसारियबाहू देसंतरसंठियं नियधूयं ।  
 वाहरइ 'एहि पुत्तय ! आलिंगसु' इय मईए व्व ॥२२३२॥  
 तो सीयलचंदण-सेयतालियंटानिलेण आससिओ ।  
 पच्चागयचेयन्नो पलावमह काउमाढत्तो ॥२२३३॥  
 'हा ! निक्कारणसत्तोवयारजयकप्पवल्ली ! कत्थ पुणो ।  
 दीसिहसि सरससिंगारसंगया मज्झ नयणेहिं ? ॥२२३४॥

- नीसेसकलानिलया भूसियभुयणा य अमयनिम्माया ।  
चंदसिरी अंतरिया विडप्परूवेण सा केण ? ॥२२३५॥
- परदेसेः कं दट्ठुं अप्पाणं धीरिही निरेकल्ला ? ।  
कल्लाणभाइणी सा हा हा ! कह दुत्थिया जाया ? ॥२२३६॥
- को एण्हि तीए विणा विलाससिरिपमुहनिद्धसहियाहिं ।  
कीलिहइ सम्मं मणहरविणोयकीलाहिं अणवरयं ? ॥२२३७॥
- परिमुसियरयणसारो व्व अज्ज जाओअम्हि(ऽम्हि) उक्खयच्छिय(च्छिव्व)व्व ।  
चंदसिरि ! तुह विओए हाहा हं भट्टरज्जोव्व ॥२२३८॥
- कं दट्ठुं संतोसो मह होही विरहियस्स नणु तुमए ? ।  
को निच्छयं करेही तए विणा सव्वसत्थेसु ? ॥२२३९॥
- कन्नेहिं परं निसुयं बहुदुक्खो जमिह होइ संसारो ।  
तुह दुक्खेणं संपइ सो च्चिय पच्चक्खयं नीओ' ॥२२४०॥
- एवं चिय विजयवई कवोलतललंबमाणघणकेसा ।  
कुररिव्व करुणसद्दा सविलावं रुयइ दुक्खत्ता ॥२२४१॥
- हाहा ! हयं म्हि निहि(ह)यं म्हि मंदपुत्रा अपुन्नपच्चासा ।  
छारं दाऊण मुहे अवहरिया जेण मह धूया ॥२२४२॥
- हा वच्छे ! पेच्छिस्सं पुणोवि कइया इहेव नियगेहे ।  
सुय-सारियासमूहं पाढंती दढमविस्संता ? ॥२२४३॥
- इह जाओ आसि पुत्थिं सुगीयझंकारमुहलमज्झाओ ।  
सालाओ ताओ संपइ अक्कुंदरवो सुणेयव्वो ॥२२४४॥
- हा पुत्ति ! तुज्झ जम्मेण मज्झ भुयणम्मि पसरिया कित्ती ।  
सच्चिय 'अपुत्तकलिय'त्ति लोयवाएण पम्हुसिया ॥२२४५॥

- दट्टूण तुमं नयणाइं मज्झ आणंदबाहभरियाइं ।  
ताइं चिय तुह विरहे गलंति सोयंसुबिंदूणि ॥२२४६॥
- हा हा निरास ! रे रे हयास ! बहु सोयभायण ! असोय ! ।  
किं अवयरियं अम्हेहिं तुज्झ ? जं मह सुया हरिया ! ॥२२४७॥
- कं पेच्छिस्सं संपइ ? निसुणिस्सं कस्स समयवयणाइं ? ।  
आलिंगिस्सं किं वा ? तुमं विणा पुत्त-चंदसिरि ! ॥२२४८॥
- तं हसियं तं रमियं तं भमियं तं पयंपियं तुज्झ ।  
संभरिऊण न फुट्टइ जं हिययं तं महच्छरियं ! ॥२२४९॥
- इय एवमाइबहुविहतग्गयगुणसुमरणापबंधेण ।  
मुच्छानिमीलियच्छी पुणो पुणो निवडइ महीए ॥२२५०॥
- एत्थंतरम्मि अइधीरहियय-पन्नायरेण सकलत्तो ।  
नरनाहो जुत्तिविसेससंगयं भणिउमाढत्तो ॥२२५१॥
- ‘किं देव ! तुमं कायरनरो व्व अवलंबिऊण दीणत्तं ।  
रुयसि विमुक्कक्कंदं एत्तियमेत्तं च विलवेसि ? ॥२२५२॥
- किर को न जाणइ इमं ? सगुणमवच्चं न होइ कस्स पियं ? ।  
धीरेहिं तहवि अविरुद्धसोयनिरएहिं होयव्वं ॥२२५३॥
- सव्वन्नवयणपरिभावणाए तुह देव ! एयमवसाणं ।  
अच्चुज्जलपयइविवेयपरिणई किंतु तुह एसा ॥२२५४॥
- ते च्चिय मुज्झंति परं आवइकाले न जाण हिययम्मि ।  
विफुरइ गुरुवएसो सुविसुद्धविवेयउज्जोओ ॥२२५५॥
- गंभीरगुरुगुणाणं फुरंति कह पुत्त-भंडदुक्खाइं ।  
संसारसरूवं चिय जाण फुडं कुणइ पडिबोहं ? ॥२२५६॥

- अइविविहजत्तपरिवालियासु संपुन्नगुणसहस्सासु ।  
 वेसासु व धूयासु परोवयारासु को नेहो ? ॥२२५७॥  
 भवियव्वयावसेणं जं जह भव्वं तहेव तं होइ ।  
 एएण विलविएणं जइ वलइ सुया न किं वलिया ? ॥२२५८॥  
 जं न निव ! सु(सू)वउत्तं हासट्ठाणं च जं बुहाणं पि ।  
 कह तं कज्जं गंभीर-धीरहियया अणुट्ठंति ? ॥२२५९॥  
 अवहरिया सा तुह दुक्खकारणं खेयरस्स तु सुहत्थं ।  
 परिपप्पणाए दोणह वि सुह-दुक्खे न उण तत्तेण ॥२२६०॥  
 जइ ताव वियप्पकयं होइ सुहं अह दुहं च लोयम्मि ।  
 अप्पायत्तम्मि सुहे ता किं दुहवियप्पेहिं ? ॥२२६१॥  
 इय देव ! तुज्झ पच्चक्खंसव्वसुहुमयरभवसरूवस्स ।  
 अम्हारिसोवएसो पयडइ धिडुत्तणं नवरं ॥२२६२॥  
 इय देव ! विसमसंसारपंजरे विविहदुहसलायम्मि ।  
 जा निवसिज्जइ ता दुक्खमेव सव्वं न किं पि सुहं' ॥२२६३॥  
 इय एवमाइ पन्नायरेण बहुयं नराहिवो भणिओ ।  
 तहवि न धूयाअवहरणसोओ हिययाओ उत्तरिओ ॥२२६४॥  
 लोउवरोह-लज्जाइएहिं कयभोयणाइववहारो ।  
 उव्विगगमाणसो चिय अणुदियहं अच्छए राया ॥२२६५॥  
 अह सव्वं परिकहियं विलासलच्छीए अवसरावडियं ।  
 चंदसिरि-वीरसेणाण वइयरं रायपत्तीए ॥२२६६॥  
 तो, चंदसिरीपियविप्पओयंदुक्खेण पीडिया देवी ।  
 'विलवइ अणिट्ठसंगमदुहम्मि कह निवडिया धूया ?' ॥२२६७॥



मरणं पि हु सलहिज्जइ पविसिज्जइ हुयवहम्मि पज्जलिए ।  
 सहिउं न तीरइ च्चिय अणिड्डजणसंगमो एक्को ॥२२६८॥  
 इय एवमाइ सव्वं हियए बहु सोइऊण विजयवई ।  
 पभणइ विलासलच्छि सगगयं वयणवित्रासं ॥२२६९॥  
 'वच्छे ! न केवलं चिय मह आसि तहेव अज्जउत्तस्स ।  
 दायव्वा चंदसिरी कुमरस्स मणोरहो एवं ॥२२७०॥  
 ता पुत्त ! तुच्छपुत्राण होइ कहं वंच्छियत्थसंसिद्धी ? ।'  
 इय भणिऊणं देवी सदुक्खमह रोयए बहुयं ॥२२७१॥  
 तो सा विलासलच्छीए कहवि पडिबोहिया महादेवी ।  
 हिययट्ठियचंदसिरीविसूरियव्वेहिं परिसुसइ ॥२२७२॥  
 अह जणपरंपराए मुणियं सिरिवीरसेणकुमरेण ।  
 जं हरिया चंदसिरी अणिच्छमाणा असोएण ॥२२७३॥  
 तो विरहदुक्खसंतावनीसहंगो वि पयइगंभीरो ।  
 अणुसयवसेण बहुविहवियप्पसयसंकुलो जाओ ॥२२७४॥  
 'मह अणुरत्त'त्ति वियाणिऊण विज्जाबलेण अबलाए ।  
 अवहरणे तुह सत्ती न उणो मह मूलच्छेयम्मि ॥२२७५॥  
 अन्नासत्तम्मि पसत्तपाव ! का तुह विवेयसामग्गी ? ।  
 नामेण परमसोओ चरिएण य सोयणिज्जो सि ॥२२७६॥  
 जइ जीवइ चंदसिरी जंबुदीवम्मि वसइ जइ कहवि ।  
 ता गंतूण दुमज्जं(गं?) द्वाणं आणेमि नियमेण ॥२२७७॥  
 को इह जुत्ताजुत्तम्मि वियारए मयणपरवसो पुरिसो ? ।  
 वल्लहजणाण लग्गाण किं पि जं होइ तं होउ ॥२२७८॥

ता हं जइ एत्थ निएहिं जण्णि-जणएहिं कोइ उप्पन्नो ।  
 ता जेऊण असोयं हडेण आणेमि चंदसिरिं ॥२२७९॥  
 जाणामि तीए हिययस्स निच्छयं मरणसमयगयावि ।  
 नाहिलसइ तमसोयं महासई जं कुलुप्पन्ना ॥२२८०॥  
 इय चिंतिऊण हियए काऊण विणिच्छयं सयं चेव ।  
 सो वीरसेणकुमरो काउं गुरु-देवपयपूयं ॥२२८१॥  
 तो अकहंतो मित्तस्स परियणस्स वि य 'पत्थू(त्थु)यविघायं ।  
 मा काही' एक्कंगो विणिग्गओ सो महावीरो ॥२२८२॥  
 तो चउसुं वि दिसासुं सउणं अवलोइऊण उवउत्तो ।  
 अणुकूलसउणसूइयदाहिणदिसिसंमुहो चलिओ ॥२२८३॥  
 तो वियडपयक्खेववक्कमियधरावीढ-वड्ढिउच्छाहो ।  
 अगणियमग्गपरिस्समपमुहदुहो वच्चइ तुरंतो ॥२२८४॥  
 'गोपयमेत्तं वसुहा सारणिमित्तो य सायरो होइ ।  
 लहुगंडसेलमेत्ता धरणिहरा वीरपुरिसाण ॥२२८५॥  
 तणमेत्तं पि हु कज्जं मेरुसमं होइ हीणहिययस्स ।  
 मेरुगरुयं पि तणमिव अज्झवसइ साहससहाओ ॥२२८६॥  
 स(सु)कुमारसरीरा वि हु हियए जे वज्जसारघडियव्व ।  
 न हु ताण सरीरकयं दुक्खं हिययम्मि बाहेइ' ॥२२८७॥  
 इय एवमाइ कुमरो गरुयावट्ठंभसंगयं हियए ।  
 चिंतंतो संपत्तो कमेण एगं महा[अ]डविं ॥२२८८॥  
 जा सरलताल-हिंताल-सल्लई-सायसाहिसंकिन्ना ।  
 वल्लीवियाण-दढगुच्छ-रुक्खहयपहियसंचारा ॥२२८९॥

दुमखडियपत्तसंछन्नमेइणीमुणियजणअसंचरणा ।  
 गयणग्गलग्गघणपत्तसाहिसंछन्नरविकिरिणा ॥२२९०॥  
 जा होइ वसंतसिरिव्व विविहतरुकुसुमपरिमलसमिद्धा ।  
 अंतेउरवसुहा इव निरुद्धजणनिग्गम-पवेसा ॥२२९१॥  
 पासंडियधम्मकह व्व निहयअन्नोन्नसत्तसंघाया ।  
 कौरवसेणव्व निरंतरद्धणुल्लसियघणबाणा ॥२२९२॥  
 धणवालमहाकइभारइ व्व कयतिलयमंजरिविलासा ।  
 वेसव्व विडविलोला कइबाणकहव्व हरिसहिया(?) ॥२२९३॥  
 इय सो तत्थेक्कुंगो वियडपयक्खेवदलियमहिवीढो ।  
 वामेयरदिसितरुग्गणकोऊहलखित्तरलच्छे ॥२२९४॥  
 कत्थइ दरियमहाकरिकुंभत्थलकलियकेसरिझडप्पो ।  
 अह उट्टिऊण तत्तो हरिणा सह कुणइ रणकीलं ॥२२९५॥  
 कत्थइ सुदीहनंगूलधरियकेसरिकिसोरमक्खिवइ ।  
 उद्धं भमाडिऊणं मुच्छविहलंघलं (?) कुणइ ॥२२९६॥  
 कत्थइ अउव्वसरहावलोयणणु(ण्णु)न्नकोऊहल्लेण ।  
 कीलिज्जइ तेण समं विचित्तकीलाहिं कुमरेण ॥२२९७॥  
 एवं सो अणुदियहं लंघंतो तं महाडविं भीमं ।  
 तण्हापरिसुसिओद्धो उदयं अनि(न्नि)सिउमाढत्तो ॥२२९८॥  
 सच्चवियं सारस-रायहंसका(भा?)रंड-चक्कवायाण ।  
 सद्देहिं सुहसरूवं सरोवरं वीरसेणेण ॥२२९९॥  
 दूराओ च्विय दिट्ठं वियडमहापालिवेढियदियंतं ।  
 भुयवल्लिमंडलेण व वसुहाए व गाढमवगूढं ॥२३००॥

नीलतरुसंडमंडलपरिकलियविसालपालिपेरंतं ।  
 घणपमहंभूलयावज्जियं च नयणं वसुमईए ॥२३०१॥  
 जं पलयकालसूसंतसयलजलहीण पूरणत्थं च ।  
 अव्वयभंडारं पिव सलिलमयं ठवियमवणीए ॥२३०२॥  
 अंतोफुरंततारं निसासु पडिबिंबएंदुबिंबं व ।  
 जोण्हाधवलियसलिलं अमहियमिव खीरवारिनिहिं ॥२३०३॥  
 तस्स परिसंदमाणंबुपूरवसपूरियव्व जलनिहिणो ।  
 वेलामिसेण तेणं भरिओ हरियं व्व दावन्ति ॥२३०४॥  
 दिट्ठेण जेण जायइ निरंतरं जलमओ नहमओव्व ।  
 जियलोओ विबुहाणं मणम्मि एवविहा बुद्धी ॥२३०५॥  
 वियसियसयवत्तसुदीहपत्तनयणेहिं बहुप्पयारेहिं ।  
 नियतीरं व नियंतं न पेच्छए कहवि अज्जवि य ॥२३०६॥  
 मयरंदसुरहिसीयलसुहारसब्भहियसलिलतण्हाए ।  
 अप्पाणमप्पणच्चिय कुलीरविवरेहिं पियइ व्व ॥२३०७॥  
 तडतरुणो जललंबिर-विणिंतसाहग्गपत्तजीहाहिं ।  
 अणवच्छिन्नपिवासा जस्स जलोहं लिहन्ति व्व ॥२३०८॥  
 जं मंदपवणतरलियतणुसलिलतरंगसंगयावयवं ।  
 नं वीरसेणदंसणहरिसवसा कप्पमुव्वहइ ॥२३०९॥  
 जं वियडतडफालणवसपसरियजलकणच्छलेणं व ।  
 कुमरस्स कमलदलउडविमीसियं अग्घमुक्खिवइ ॥२३१०॥  
 इय दट्ठूण कुमारो सरोवरं पढममच्छिवत्तेहिं ।  
 पियइ व्व पिपासायास-पहपरिस्समदुहत्तो ॥२३११॥

अह तत्थ पविसिऊणं मज्जइ संतावतावियसरीरो ।  
 कोमलमुणालियाविहियपाणवित्ती जलं पियइ ॥२३१२॥  
 तत्तो निग्गतूणं घणनीलतमालकोमलदलेहिं ।  
 अत्थू(त्थु)रणं काऊणं उल्लरइ खणं परिस्संतो ॥२३१३॥  
 जावच्छइ सरसोहं पेच्छंतो ताव तक्खण च्चेय ।  
 निसुणइ वीणारववेणुमीसियं गीयज्झंकारं ॥२३१४॥  
 सोऊण तं कुमारो गीयरवं उट्ठिऊण कत्थ इमं ? ।  
 जा जोयंइ ता पेच्छइ सरमज्झे वित्थयं(डं?) दीवं ॥२३१५॥  
 चउसुं पि दिसासु अलंघगहिरसरसलिलवेडियं सहइ ।  
 जंबुदीवं व सुमेरुसरिसपासायकयसोहं ॥२३१६॥  
 कोऊहलेण पत्थू(त्थु)यगमणं पि उवेक्खिऊण रायसुओ ।  
 कहमेयं दट्ठव्वं गीयं व्व कह सुणेयव्वं ? ॥२३१७॥  
 को वा देवविसेसो इहइं च परिट्ठिओ ? इमे के वा ।  
 गायंति तस्स पुरओ पराए भत्तीए कयपुत्रा ? ॥२३१८॥  
 इय चिंतिऊण हियए गमणोवायं अपेच्छमाणो सो ।  
 अच्छइ उच्छूक्कमणो कोऊहलपरवसो कुमरो ॥२३१९॥  
 एत्थंतरम्मि एणो समागओ तत्थ उदयपाणत्थं ।  
 वणवारणो महंतो गंडत्थलभमिरभमरउलो ॥२३२०॥  
 तं दट्ठूण कुमारो चिंतइ एयं समारुहेऊण ।  
 वच्चांमि थेवदूरं तत्तो करणेण गच्छिस्सं ॥२३२१॥  
 तो दूरमुड्डिऊणं आरूढो तस्स खंधदेसम्मि ।  
 तो तज्जिओ तुरंतो सरमज्झे गंतुमारद्धो ॥२३२३॥

जा जाइ थेवदूरं रायसुओ ताव विविहआवत्ते ।  
पेच्छइ पायालंतरनिहित्तसलिले व सो कूवे ॥२३२४॥  
दट्ठूण महावत्ते तत्तो अणू(णु)संधिऊण गुरुकरणं ।  
गंतूण दीवमज्जे पडिओ देवंगणपएसे ॥२३२५॥  
अणुसंधियकरणवसा पयथामपहावपेल्लिओ दूरं ।  
पत्तो दुवारदेसं सतोरणं देवभवणस्स ॥२३२७॥  
पेच्छइ पुरओ अणवज्जदिविहविज्जाहरीण सम्मइं ।  
पडिसिद्धेयरकज्जं अणुलग्गं देवकज्जेसु ॥२३२८॥  
कावि करकलियकुंकुमरसच्छडापूरपिहियरबपसरा ।  
संमज्जणेण पुत्रं आवज्जइ बालहरिणच्छी ॥२३२९॥  
तवे(व्वे?)लुक्कंटिय-नड्डवेट-सुसुयंधकुसुमपब्भारं ।  
विक्खिरइ कावि भवणे भमंतभमंर(भमरी?)गणाइन्नं ॥२३३०॥  
इह कावि मज्जणुज्जुय-हल्लफलगइपरिस्समदुहत्ता ।  
निंदइ सथूलथणहर-नियंबभरमप्पणच्चेव ॥२३३१॥  
पल्हत्थियमज्जणकलससलिलउच्छलियत्थूलबिंदूहिं ।  
हारब्भमं पयासइ पओहरे कावि खयरवहू ॥२३३२॥  
तह कावि सुरहिसिरिखंडभरियकच्चोलयाओ उच्चिणइ ।  
कुंकुमसंकाए सयं दारारुणे नियनहमऊहे ॥२३३३॥  
वरसुरहिकुसुमपरिमलमितंतमहुमत्तमहुयरसमूहं ।  
परमेसरपूयत्थं उच्छल्लइ कावि सियमालं ॥२३३४॥  
डज्जंतागरु-घणसारसुरहिघणधूमधूवमुक्खिवइ ।  
जय जय सदसणाहं विज्जाहरदारिया कावि ॥२३३५॥  
समचालियचामरवसरणंतकरकंकणावली अन्ना ।

वामकरेण निबंधइ पल्हत्थं केसपब्भारं ॥२३३६॥

अन्नाउ पुणो परमेसरस्स करधरियविविहआउज्जा ।

पुरओ पेच्छणयविहिं कुणांति परमाए भत्तीए ॥२३३७॥

इय विज्जाहरिविंदं नाणाविहदेवकज्जउज्जुत्तं ।

दट्ठूण वीरसेणो पासायब्भंतरं विसइ ॥२३३८॥

अह ताहिं सो वि दिट्ठो वलंतकंठद्ध-चलियनयणाहिं ।

नलिणीहिं व पवणवसा तरलियकमलंतरदलाहिं ॥२३३९॥

‘को एस ?’ ति‘कहं वा एत्तियभूमिं समागओ इहइं ?’ ।

‘अइग्गहिरसायरायारसरवरं कह णु उत्तिन्नो ?’ ॥२३४०॥

‘तो सामन्नमणुस्सो न हवइ विज्जाहरो भवे को वि ।

विज्जाहरामराणं गोयरमेयं जओ दीवं ॥२३४१॥

देवो न ताव एसो नयणनिमेसाइएहिं विन्नाओ ।

विज्जाहरो वि न हवइ वियाणिमो जेण नियवग्गं’ ॥२३४२॥

इय एवमाइ तग्गयवियप्पसयसंकुलाण सो ताण ।

पेच्छंतीण कुमारो पडिओ पाएसु देवस्स ॥२३४३॥

पेच्छइ सव्वंगपसंतभावसंभाविउत्तमगुणोहं ।

अइजच्चकंचणमयं पडिमं सिरिसंतिनाहस्स ॥२३४४॥

दट्ठूण बहलरोमंचकंचुयब्भहियमुणियआणंदो ।

संधुणइ थूलनिवडियनयणंसुकणो जिणं संतिं ॥२३४५॥

“लब्धं जन्म यदि प्रकाशिनि कुले लब्धो यदि प्रौढिमा

सम्यक् शास्त्रविचारवर्त्मनि यदि स्थूराश्च लब्धा श्रियः ॥

लब्धं सर्वमिदं तथापि विबुधैः किञ्चिन्न लब्धं यदि

स्फूर्ज्जन्मांसलमोहकन्दभिदुरा भक्तिर्न लब्धा त्वयि” ॥२३४६॥

इय थोऊण सहरिसं काऊण पुणो पुणो पणामं च ।  
 भवणेक्कदेसभाए उवविसइ य सोअसंभंतो ॥२३४७॥  
 तो ताहिं साणुरायं सव्वाहिं समं निहित्तयणाहिं ।  
 विरइयवियारचेट्टं पुलोइओ सो महावीरो ॥२३४८॥  
 आयट्टिऊण पहिरइ पुणो वि कन्नेसु कुंडलं कावि ।  
 बंधइ दिढं पि अन्ना धम्मेल्लं पयडियघणंता ॥२३४९॥  
 थरहरियथूलथणवट्टमंडला का वि कन्नकंडुयणं ।  
 काऊण तिरिच्छद्धच्छि-पेच्छिरी नियइ रायसुयं ॥२३५०॥  
 जहठाणठियं अन्ना वरिल्लवत्थं पुणो वि संवरइ ।  
 पयडइ नाहिपएसं अइमयणपरव्वसा का वि ॥२३५१॥  
 इय दट्ठूण कुमारं मयणवियाराउराण नारीण ।  
 नाणाविहा विलासा उल्लसिया ताण तव्वेलं ॥२३५२॥  
 अह ताण पहाणयरा एगा विज्जाहरी अइसुरूवा ।  
 संपुन्नमियंकमुही विसालनीलुप्पलदलच्छी ॥२३५३॥  
 अइपीणपओहरभारनामिया गुरुनियंबतणुमज्झा ।  
 रंभोरू सुहजंघा कुसु(म्मु)न्नयचारुचरणजुया ॥२३५४॥  
 नामेण अणंगसिरी सा दट्ठुं वीरसेणमइविवसा ।  
 मयणसरसल्लियंगी संजाया तक्खणच्चेय ॥२३५५॥  
 परिहरियसयलकज्जा कुमरेक्कनिहित्तनयणमणपसरा ।  
 लेप्पमइयव्व जाया निरुद्धनीसेसतणुचेट्टा ॥२३५६॥  
 इय तं तहासरूवं कुमरो दट्ठूण निव्वियारमणो ।  
 चिंतइ परजुयईओ एयाओ हवंति हेयाओ ॥२३५७॥



तो इत्ति उट्टिऊणं विणिग्गओ षणमिऊण जिणनाहं ।  
 देवभवणाओ बाहिं सकोउओ नियइ पासायं ॥२३५८॥  
 पडिहयरविरहमग्गो बहुसिहरनिहित्तिसियपडायाहिं ।  
 पेल्लइ व अमायंतो विसियक्कं बहुभुएहिं व ॥२३५९॥  
 पडिबिंबिओ व्व मन्ने सुरसेलो एत्थ सरवरजलंमि ।  
 एयपमाणो पायं पासाओ जं न वसुहाए ॥२३६०॥  
 इय जाव सो विहावइ विसालपासायरम्मयं परमं ।  
 ता चारणमुणिजुयलं अवयरियं तत्थ गयणाओ ॥२३६१॥  
 नमिऊण वीयरायं संतिजिणं कयपयाहिणं पच्छ ।  
 बहुफासुए पएसे उवविसइ असोयतरुमूले ॥२३६२॥  
 परिहरियपावपंका अइदुल्ल(ल)हा पावसंगयमईण ।  
 अणुवमसुहसंपन्ना दुवे वि सग्गापवग्ग व्व ॥२३६३॥  
 दुद्धरिसमहातवतेयरासिपसरंतपिहुपहावलया ।  
 पयडियभुयणपयत्था सपारिवा(वे)सा ससि-रविच्च ॥२३६४॥  
 तो ते महामुणिंदे दट्टूणं परमभत्तिसंजुत्तो ।  
 पणमइ वसुहातलसंघडंतभालत्थलो कुमरो ॥२३६५॥  
 तेहिं पि विसमसंसारसायरुत्तरणदिढतरंडसमो ।  
 दिन्नो सायरवयणेहिं धम्मलाहो कुमारस्स ॥२३६६॥  
 'उवविससु'त्ति पलत्ते उवविट्ठो ताण पायमूलंमि ।  
 अणुसासिओ य तेहिं वि समओचियधम्मकहणेण ॥२३६७॥  
 लद्धावसरो कुमरो पभणइ 'भयवं ! कहेहं मह एयं ।  
 केण कयं आययणं नाणामणि-कणयरयणमयं ? ॥२३६८॥

एसो य महामोहंधयारविद्धंसणे दिणमणि व्व ।  
 अइजच्चकंचणमओ पइडिओ केण जिणनाहो ? ॥२३६९॥  
 एयंपि परमरम्मं अदिद्धपारं सरोवरं एत्थ ।  
 केण खणावियपुव्वं ? सव्वं मह कहह संखेवा' ॥२३७०॥  
 इय एवं ते पुट्ठा मुणिणो कुमरस्स कहिउमाढत्ता ।  
 मणपज्जवनिम्मलनाणनयणविन्नायपरमत्था ॥२३७१॥  
 'आयन्नसु एकूमणो सावय ! संखेवओ कहिज्जंतं ।  
 जिणभवणसमुप्पत्तिं जणमणआणंदयं परमं' ॥२३७२॥  
 इह अत्थि भुयणपयडा अडई विंझाडइत्ति नामेणं ।  
 'बहुसावयसंकिन्ना चेइयवसहि व्व जा सहइ ॥२३७३॥  
 गुणिणो व्व जत्थ तरुणो विसहियसीयायवा सुपत्ता य ।  
 सच्छा य सुहसरूवा परिणइसुहफलभरसमिद्धा ॥२३७४॥  
 वड्ढियपओहराए अइलंधियगुरुमहीहरसयाए ।  
 उच्छंगियाए खिज्जइ सुयाए जणणि व्व रेवाए ॥२३७५॥  
 अइदीहरसालभुओ विसालवच्छे सुवित्थयनियंबो ।  
 अणुरत्तो व्व न मेल्लइ विंझगिरी जीए सत्रेज्झं ॥२३७६॥  
 एवंविहाडवीए नग्गोहदुमो विसालघणसाहो ।  
 अत्थि नियवित्थरेणं अंतरियदियंतराभोओ ॥२३७७॥  
 निवसंति तत्थ बहुविहकोडरविवरेसु सुयसमुग्घाया ।  
 नियभज्जाहिं समेया पुत्त-पपुत्तेहिं परियरिया ॥२३७८॥  
 भमिरुण अडविमज्झे चुणंति जं किंचि वंछियाहारं ।  
 पुणरवि संझासमए तहेव रुक्खं अणुसरंति ॥२३७९॥

१. बहुश्रावकसंकीर्णा चैत्यवसतिरथ च बहुश्रावकसंकीर्णाऽटवी खंता. टि. ॥

अह ताण सुयकुलाणं पहाणभूओ विसेसगुणकलिओ ।  
 जरजज्जरियसरीरो रायसुओ वसइ तत्थेगो ॥२३८०॥  
 अह तस्स दोत्रि पुत्ता रायसुया संति कोमलसरीरा ।  
 कोमलचंचुनिवेसा अइकोमलनीलपक्खउडा ॥२३८१॥  
 जणणि-जणपाण दूरंगयाण ते उड्डिऊण अन्नदिणे ।  
 धेवंतरेण पडिया पुलिंदघणसालिछेत्तंमि ॥२३८२॥  
 तो पुव्विं परियप्पिय-पासयबंधंमि निवडिए कहवि ।  
 दट्ठूण ते पुलिंदो तुरियगई तत्थ संपत्तो ॥२३८३॥  
 तो छोड्डिऊण पासं धरिया ते तेण दोवि बालसुया ।  
 दट्ठूण हरिसिएणं पंजरयब्भंतरं छूढा ॥२३८४॥  
 अह तत्थ सत्थवाहो बहुसत्थसमन्निओ विविहभंडो ।  
 नामेण भइसेणो समागओ तेण मग्गेण ॥२३८५॥  
 तो घेत्तूण पुलिंदो रायसुए भइसत्थवाहस्स ।  
 ढोयइ भइएण तओ निरविखया दो वि ते पक्खी ॥२३८६॥  
 नाऊण सत्थवाहो विसेसगुणसंगए य ते दो वि ।  
 संगहइ तस्स य पुणो देइ पुलिंदस्स उचियत्थं ॥२३८७॥  
 सो भदो रायसुए पाढइ कोऊहलेण जं किं पि ।  
 तं ताण एकूवाराए पुव्वपढियं व संठाइ ॥२३८८॥  
 एवं ते रायसुया सुय व्व भइस्स वल्लहा जाया ।  
 पालइ परमसिणेहा संपाइयसयलतक्कज्जो ॥२३८९॥  
 अह सो वि भइसेणो अणवरयपयाणएहिं संपत्तो ।  
 नामेणं रयणउरं नयरं नीसेसगुणकलियं ॥२३९०॥

तत्थ वि गुरुप्पयावो राया सिरिरयणसेहरो नाम ।  
 भज्जा से रयणवई गुणरयणविहूसियसरीरा ॥२३९१॥  
 अह रायदंसणत्थं नाणामणि-रयण-वत्थसंजुत्तं ।  
 द्दोयणियं घेत्तूणं रायगिहं आगओ भद्दो ॥२३९२॥  
 दिद्धो तेण नरिंदो परमपसाएण तस्स नरवइणा ।  
 परिहरियं नीसेसं सत्थस्स वि सुंक्माईयं ॥२३९३॥  
 अन्नदिणे नरवइणा भद्दस्स गिहे पओयणवसेण ।  
 संपेसिएण दिद्धं सुयजुयलं रायपुरिसेण ॥२३९४॥  
 सुव्वत्त(न्त?)वन्नकमफुडपाढं दट्ठूण तमुभयं सो वि ।  
 नरवइणो नीसेसं कीरसरूवं परिकहेइ ॥२३९५॥  
 तो रायिणा वि तुरियं भदं सद्दाविऊण सप्पणयं ।  
 मगियमुभयं तेण वि भणियं बाहोल्लनयणेण ॥२३९६॥  
 'तुज्झ अलंघं वयणं सुयजुयलं पि हु अईव मह इट्ठं ।  
 सो अज्ज महं जाओ इह केसरि-दोत्तडीनाओ !' ॥२३९७॥  
 तो नाउं अणुबंधं नरवइणो तेण भद्दसेणेण ।  
 आणाविऊण लहुओ दिन्नो कीरो नरिंदस्स ॥२३९८॥  
 आगयमेत्तेणं चिय सुएण जयकारिओ महाराओ ।  
 पच्छा फुडवियडक्खरचाडुसरूवं पढइ गाहं ॥२३९९॥  
 'अणवरयं चिय निसुणसु नरिंद ! बंदीकयाण अत्थाणे ।  
 अम्हाण चाडुयसए रायसुयाणं अभद्दाण' ॥२४००॥  
 तं सोऊण नरिंदो हरिसवसुप्फुल्ललोयणो सहसा ।  
 कोऊहलेण पुच्छइ 'कुसलं तुह कीर ! सव्वदिणं ?' ॥२४०१॥ -

'नरनाह ! अकुसलाणं संबंधो कह णु होइ भद्देण ।  
 भद्दाणुहावओ च्विय जायइ गुणरयणसेहरओ' ॥२४०२॥  
 इय कीरेणं भणिए भणइ नरिंदो 'न एस इयरोव्व ।  
 होइ अवण्णाठाणं ता अप्पह मज्झ दइयाए' ॥२४०३॥  
 भदो वि पूइऊणं विसज्जिओ राइणा सपरिओसं ।  
 निययावासंमि गओ सुयविरहविसेसदुक्खत्तो ॥२४०४॥  
 अणवरयं रयणवई तं रायसुयं सुहासियसयाइं ।  
 पाढइ सुयसविसेसं पालइ अइपरमजत्तेण ॥२४०५॥  
 अह तस्स रयणसेहर-रयणवइपाणिपंजरगयस्स ।  
 कीरस्स अइक्कंतो सुहेण संवच्छरो एक्को ॥२४०६॥  
 अह अन्नया कमेणं विहरंतो भव्वकमलभाणु व्व ।  
 करुणानिज्झरणगिरी पसमामयपुन्नकलसो व्व ॥२४०७॥  
 संसारकेरवरवी विसयमहाविसहराण गरुडो व्व ।  
 मोहंधयारमिहिरो कसायसंताववारिहरो ॥२४०८॥  
 बहुसीससंपरिवुडो विसेसगुणरयणरोहणगिरि व्व ।  
 नामेण मोहमल्लो आयरिओ तत्थ संपत्तो ॥२४०९॥  
 आवासिओ ससीसो लद्धाणुमई य बाहिरज्जाणे ।  
 सज्झायज्जाणनिरओ जा अच्छइ तत्थ सो सूरी ॥२४१०॥  
 ता तस्स विमलवाणीसवणसमुल्लसियहरिसरोमंचा ।  
 नायरया अन्नोन्नं तग्गुणगहणं पइ पयट्ठा ॥२४११॥  
 अह रयणउरनिवासी लोओ सव्वो वि तग्गुणक्खित्तो ।  
 वच्चइ सबाल-वुद्धो वंदणवडियाए सूरिस्स ॥२४१२॥

तो सो वि रयणसेहरनरनाहो परियणाओ सोऊण ।  
 कोऊहल-भत्तिरसेण पत्थिओ गुरुसमीवंमि ॥२४१३॥  
 तो भणइ रायकीरो 'तुब्भेहिं समं अहं पि गच्छामि ।  
 दडुव्वदंसणेणं पावेमि फलं नियच्छीणं ॥२४१४॥  
 दंसणमेत्तेण वि जाण देव ! विहडइ भवंतरकओ वि ।  
 पावमलो दडुव्वा कहन्न ते होंति मुणिचंदा ? ॥२४१५॥  
 तव्वयणामयसवणेण देव ! जं होइ तं पि पेच्छिहिसि ।  
 अणुहवसिद्धं सोक्खं कह तं वायाए तुह कहिमो' ॥२४१६॥  
 तो भणियं नरवइणा 'गच्छामो एहि आरुह करिंमि' ।  
 आरूढो सो चलिया समयं ते गुरुसमीवंमि ॥२४१७॥  
 तो नरवइणा भणिओ रायसुओ 'तुज्झ तिरियजायस्स ।  
 जो निम्मलो विवेओ अम्हाण न सो मणुस्साण' ॥२४१८॥  
 तो भणइ रायकीरो 'विप्फुरियं तुज्झ पयपसायस्स ।  
 जं तिरिओ वि हु तुमए विवेइगणणाए गहिओ म्हि' ॥२४१९॥  
 पुण भणियं नरवइणा 'जम्मंतरसुकयकम्मअब्भासा ।  
 तुह एरिसो विवेओ न उणो अम्हारिसनिमित्तो' ॥२४२०॥  
 इय राया जंपंतो पत्तो उज्जाणदारदेसंमि ।  
 उत्तरिऊण गयाओ चलिओ पायप्पयारेण ॥२४२१॥  
 पेच्छइ राया सूरिं भासुरत्तवतेयवलयमज्झगयं ।  
 परंतलुलियपुच्छं भववारणविजयसीहं व ॥२४२२॥  
 जो धम्मदेसणादसणसेयकिरि(र)णोहवारिधाराहिं ।  
 थलजलहरो व्व पसमइ जणाण भवदुक्खसंतावं ॥२४२३॥

दट्ठूण मोहमल्लं हरिसवसुब्भिन्नपुलयपडहत्थो ।  
 वंदइ वसुहाविलुलियकिरीडकोडी महीनाहो ॥२४२४॥  
 अवसेसे य मुणिवरे नमिऊण जहारिहं गुणसमिद्धे ।  
 संपत्तधम्मलाभो उवविसइ विसुद्धवसुहाए ॥२४२५॥  
 आणाविओ सहरिसं नरवइणा सो सुओ जणसमक्खं ।  
 षणमइ भूनिहियसिरो सूरिस्स इमं च जंपेइ ॥२४२६॥  
 'तुह दंसणेण मुणिवइ ! जं पुन्नं पावियं मए अज्ज ।  
 तेण मह होउ मोक्खो इमामो भवपंजरदुहाओ' ॥२४२७॥  
 इय भणिऊणं विरए कीरे नीसेसजणसमूहेण ।  
 कोऊहलेणक्खित्ता तंमि समं नयणनिक्खेवा ॥२४२८॥  
 तो भणइ सुओ 'भयवं ! तिरियत्तं जमिह मज्झ संपत्तं ।  
 जाणेमि तं उवड्डियफलमेयं दुक्कयकम्मस्स ॥२४२९॥  
 एयस्स अवगमो जेण होइ धम्मेण तं महं कहसु ।  
 निव्विन्नो म्हि इमाओ सुयत्तजम्माओ मुणिनाह !' ॥२४३०॥  
 तो कहइ सजलजलधरगंभीरसरो सुयस्स परिसाए ।  
 सूरी अपारसंसारजलहिपोयं व जिणधम्मं ॥२४३१॥  
 संसारनयरमज्झे चउगइचउहट्टमज्झयारंमि ।  
 नियकम्मवसेण जिओ अणंतवारा परिब्भमिओ ॥२४३२॥  
 नाणाजोणीबहुदुमनिरंतरे एत्थ भीमभवरत्ते ।  
 चंचलपयई जीवो परियत्तइ इह यवंगो (पयंगो?) व्व ॥२४३३॥  
 एगिंदिएसु जायइ पुढवी-जल-जलण-अनिलभेएसु ।  
 वणसइ-तसेसु तत्तो किमि-कीड-पयंगमाईसु ॥२४३४॥

पंचिंदिएसु तत्तो जल-थल-गयणयलचारिसु बहूसु ।  
 उप्पज्जइ कम्मवसो जीवो सद्धम्मपरिहीणो ॥२४३५॥  
 ता पंचिंदियजाई तिरिओ सि तुमं भवंतरकयाण ।  
 कम्माण अणुहवंतो चिद्धिसि अइदूसहविवागं ॥२४३६॥  
 एत्तो तुज्झ विमोक्खो न केवलं कीर ! तिरियभावाओ ।  
 जिणधम्मनिच्छयवओ होही संसारमोक्खो वि ॥२४३७॥  
 जिणधम्मो कीर ! दुरंतदुक्खसंसारजलहिपडियाण ।  
 जीवाण मोक्खपरतडगमणंमि तरंडमिव होइ ॥२४३८॥  
 तं नत्थि जं न सिज्जइ जीवाण जिणिंदधम्मनिरयाण ।  
 हीणुवमा कप्पहुम-चिंतामणिमाइणो तस्स ॥२४३९॥  
 कह ते पडंति अइविसमघोरनरयंधकूवमज्झंमि ।  
 संपडइ जाण एसो हत्थालंबोव्व जिणधम्मो ॥२४४०॥  
 तो तत्थ तएऽवस्सं निव्विन्नेणं सुयत्तभावाओ ।  
 परमायरो विहेओ जिणिंदधम्मंमि सुयराय ! ॥२४४१॥  
 सो उण धम्मो दुविहो जइ-सावयभेयओ समक्खाओ ।  
 पढमो दसप्पथारो इयरो उण बारसवियप्पो ॥२४४२॥  
 खंती य महवज्जव-मुत्ती-तव-संजमे य बोधव्वे ।  
 सच्चं सोयं आकिंचणं च बंभं च जइधम्मो ॥२४४३॥  
 पंच य अणुव्वयाइं गुणव्वयाइं च होंति तिन्नेव ।  
 सिक्खावयाइं(इ) चउरो गिहिधम्मो बारसविभेओ ॥२४४४॥  
 एयस्स दुभेयस्स उ सम्मतं परमकारणं होइ ।  
 संकाइदोसरहियं सुहायपरिणामरूवं च ॥२४४५॥



इय एवमाइ गुरुणा वित्थरओ जइ-गिहत्थभेएण ।  
 पयडियसुहुमपयत्थो कहिओ जिणदेसिओ धम्मो ॥२४४६॥  
 आयन्निऊण एयं नरवइपमुहाण नयरलोयाण ।  
 कीरस्स वि संजाओ तइया जिणधम्मपरिणामो ॥२४४७॥  
 'इच्छामो'त्ति भणित्ता सव्वेहिं वि मन्निओ गुरुवएसो ।  
 वयदाणेण वि गुरुणा अणुग्गिहीया जहाजोगं ॥२४४८॥  
 एत्थंतरंमि पुरओ ठाऊण सुओ गुरुस्स नमिऊण ।  
 बाहोल्लनयणजुयलो विन्नवइ भवन्नवुवि(त्वि)ग्गो ॥२४४९॥  
 'भयवं ! परव्वसाणं उव्विग्गाणं पि भवनिवासाओ ।  
 चित्ताबाहाए सुहं नित्थरइ न एस जिणधम्मो' ॥२४५०॥  
 तो गुरुणा भणिएणं नरवइणा सायरं अणुजाओ ।  
 कीरो गुरुवइइं गेण्हइ नवकारमिह पढमं ॥२४५१॥  
 तत्तो य जहाभिहियं सावयधम्मं च भवभउव्विग्गो ।  
 स कयत्थं मन्नंतो अप्पाणं गेण्हइ कीरो ॥२४५२॥  
 तो भणइ सो च्चिय पुणो 'भयवं ! तुह दंसणेण जाणेमि ।  
 जह पंजराओ मुक्को मुच्चिस्सं तह भवाओ वि' ॥२४५३॥  
 नमिऊण मोहमल्लं नरनाहं पुच्छिऊण रायसुओ ।  
 पेच्छंताणं ताणं उट्ठीणो गयणमग्गंमि ॥२४५४॥  
 तो वीरसेण ! कीरो सो इहइं आगओ षएसंमि ।  
 चिइइ जिणोवइइं पालंतो अविकलं धम्मं ॥२४५५॥  
 अह जो वि भइपासे आसि सुओ सो अपुन्नजोएण ।  
 पंजरगओ वि खद्धो कहमवि मज्जारपोएण ॥२४५६॥

मरिऊण एत्थ रत्ते संजाओ विहिवसेण ओलावो ।  
 वुड्ढिं पत्तो वियरइ बहुपक्खिगणे विणासंतो ॥२४५७॥  
 अह अन्नया अरत्ते कहवि भमंतेण तेण सेणेण ।  
 अइसयबुभुक्खिणं सच्चविओ सो महाकीरो ॥२४५८॥  
 तो धाविऊण तुरियं झड्ढिओ तेण निरवराहो वि ।  
 तेण वि 'नमो जिणाणं' ति भणिय भणिओ य ओलावो ॥२४५९॥  
 'पडिवालसु सेण ! खणं जाव अहं नियमणे नियमपुव्वं ।  
 काऊण अणसणाविहिं खामेवि असेससत्ताणं' ॥२४६०॥  
 तो तेण तस्स तइया वयणं सोऊण सेणविहणेण ।  
 ओसरियं सहसच्चिय-विम्हयरसपरवसमणेण ॥२४६१॥  
 तो भणइ कीरराया 'हा ! हा ! मह भाउणा न जिट्ठेण ।  
 लद्धो जिणिंदधम्मो एयं चिय बाहए मज्झ ॥२४६२॥  
 पेच्छह विंझाडइवडुमाओ कह सालिछेत्तमज्झंमि ।  
 लद्धा पुलिंदगेणं दिन्ना पुण भद्दसेणस्स ॥२४६३॥  
 भद्देण पुणो अहयं दिन्ना सिरिरयणसेहरनिवस्स ।  
 सो वि न जाणामि अहं भद्देण कहं पि उवणीओ ॥२४६४॥  
 एक्कोयरजायाण वि पायं पाणीण होइ हुं विभिन्ना ।  
 सुह-असुहकम्मबंधो जह मज्झं तस्स य सुयस्स ॥२४६५॥  
 तह किंपि मए पुव्विं समज्जियं सुहयरं महापुत्रं ।  
 जह मोहमल्लुओ च्विय संजाया जिणमए बोही ॥२४६६॥  
 तस्स य न तहा जाया जाणामि अओ न तस्स सुहपुत्रं ।  
 आसि समज्जियपुव्वं न पाविओ तेण जिणधम्मो' ॥२४६७॥

इय एवमाइ सव्वं अणुसोयंतस्स तस्स ओलावो ।  
 तव्वयणं सोऊणं मुच्छाए महियले पडिओ ॥२४६८॥  
 तं दट्ठूण सुएणं करुणारसपरवसेण निच्चेडुं ।  
 किं किं ति तेण एयं पयंपियं चिंतियमिमं च ॥२४६९॥  
 'हा ! नूण बुभुक्खाए जाओ विहलंघलो तओ पडिओ ।  
 'मिच्छामि दुक्कडं' जं कयत्थिओ एत्तियं वेलं' ॥२४७०॥  
 एत्थंतरे सुएणं सीयलपक्खानिलेण सो सेणो ।  
 आसासिओ य सत्थो संजाओ लद्धवेयन्नो ॥२४७१॥  
 एत्थंतरमि सेणं विसिउं वणदेवयाए परिकहिओ ।  
 जाइसरणेण सव्वो वियाणिओ सेणपुव्वभवो ॥२४७२॥  
 'सोहं जो पुव्वभवे आसि सुओ तुज्झ जेडुओ भाया ।  
 मज्जारेणं निहओ संजाओ सेणओ एण्हि' ॥२४७३॥  
 तो कीरेण वि तइया तस्स कया धम्मदेसणा विमला ।  
 एक्कगमणो निसुणइ सेणो वि हु कीरवयणाइं ॥२४७४॥  
 हंतूण पाणिनिवहं जो भक्खइ तस्स मंसमइलुद्धो ।  
 सो तिलमेत्तसुहत्थी मेरुसमं दुक्खमज्जिणइ ॥२४७५॥  
 एक्कस्स खणं तित्ती अन्नस्स य तिहुयणं पि अत्थमइ ।  
 एवं कह मारिज्जइ खणसोक्खकएण पाणिगणो ? ॥२४७६॥  
 ते वंचिया वराया परलोयसुहस्स, ताण जम्मो वि ।  
 विहलो च्चिय संपन्नो, जाण मई मंसअसर्णमि ॥२४७७॥  
 एक्कसरीरस्स कए सभयस्स असासयस्स तुच्छस्स ।  
 जे मारयंति जीवे ताणं किं सासओ अप्पा? ॥२४७८॥

तो भणइ पुणो सेणो 'विवज्जियं भाय ! मंसमज्जदिणा ।  
 अन्नं पि कहसु मज्झं धम्मविसेसक्खरं किं पि ॥२४७९॥  
 तो जह गुरुणा कहिओ धम्मो सम्मत्तभूसिओ अणहो ।  
 तेण वि तहेव कहिओ सुएण सेणोवयारत्थं ॥२४८०॥  
 सोऊण तओ सेणो धम्मं सब्वन्नभासियं तइया ।  
 पडिवज्जइ भावेण विसुद्धहियओ तयं सेणो ॥२४८१॥  
 परिवालिऊण धम्मं सुय-सेणा अणसणाइविहिणा य ।  
 कयपंचनमोक्कारा मरिउं वेमाणिया जाया ॥२४८२॥  
 सोहम्मे उववन्ना दो वि समं सागराउसो देवा ।  
 सुहसागरावगाढा ससिसेहरवरविमाणंमि ॥२४८३॥  
 दट्टूण सुरसमूहं 'जय जय नंद'ति जंपिरं, एयं ।  
 'मायंदजालमहवा पच्चक्खं वा ?' वियप्पंति ॥२४८४॥  
 नाऊण ओहिणा ते देवत्तं 'किं कयं पुरा पुत्रं ।  
 जेणेसा संपत्ता सुररिद्धी' इय विचिंतंति ॥२४८५॥  
 नाउं सुय-सेणभवंतरंमि जिणधम्मरयणसंजोगं ।  
 आणंदनिब्भरेहिं कयमणहं देवकरणिज्जं ॥२४८६॥  
 'नमिमो जिणेसराणं विजियकसायाण निहयदोसाण ।  
 भवजलहिपोयभूओ पयासिओ जेहिं वरधम्मो ॥२४८७॥  
 पेच्छ अउव्वा सत्ती तिरिया वि हु फासिऊण जं धम्मं ।  
 पावेंति देवलोए अइदुल्लहसुरसमिद्धीओ' ॥२४८८॥  
 इय थोऊणं सरहससिरमिलियकरंजली दुवे धम्मं ।  
 निययविमाणारूढा चलिया नियपरियणसमेया ॥२४८९॥

गच्छामो तत्थ जहिं सुय-सेणकडेवराइं चिद्धंति ।  
 जाण पा(प)साएण इमो संपत्तो दुल्लहो धम्मो ॥२४९०॥  
 'किमणंतभवंतरमित्थ मूढसुर-णरसरीरलाहेहिं ? ।  
 एसो च्चिय सलहिज्जइ तिरियभवो धम्मजोएण !' ॥२४९१॥  
 इय जंपंता पत्ता एत्थ पएसंमि सेण-सुयपासे ।  
 विहिणा य पूइऊणं कराविओ तेहिं संक्कारो ॥२४९२॥  
 अह तेहिं पुणो भणियं 'संसारगयाण दुल्लहो एस ।  
 जिणधम्मो जीवाणं कम्मपरायत्तचेट्ठाणं ॥२४९३॥  
 सुरलोयचुयाण जहा जायइ जिणधम्मत्तवित्राणं ।  
 तह चिंतिमो उवायं जाइस्सरणाइहेउगयं ॥२४९४॥  
 जेण कएणं जायइ कम्मखओ जाइसरणमम्हाण ।  
 अन्नेसिं पि बहूणं उवयारो कुसलमग्गंमि ॥२४९५॥  
 तो कुणिमो जिणभवनं नीसेसदुरंतदुक्खनिद्वलणं ।  
 सपरोवयारहेउं बोहिफलं अन्नजम्मंमि' ॥२४९६॥  
 इय चिंतिऊण एयं तेहिं कयं कणय-रयण-मणिघडियं ।  
 सिरिसंतिनाहभवनं भुवणोयरभूसणं रम्मं ॥२४९७॥  
 एसो असारसंसारसायरुत्तरणजाणवत्त व्व ।  
 तेहिं चेव जिणिंदो पइट्ठिओ परमभत्तीए ॥२४९८॥  
 कहमेयं उव्वरिही पहीणलोयाण दुसमकालंमि ? ।  
 इय पेरंते महिरं करावियं सरवरं एयं ॥२४९९॥  
 अइवित्थरेण विसुहं गं(ग)भीरभावेण दूरपायालं ।  
 कल्लोलेहि य गयणं तिलोयमवि जेण अक्कमियं ॥२५००॥

तेहिं चिय विणिउत्तो सम्मदि(दि)ट्टी महाबलो जक्खो ।  
 सो पडिणीयविघायं अणवरयं कुणइ जिणभवणे ॥२५०१॥  
 अणवरयं कल्लाणय-चाउम्मासाइ पव्वदिव्व(व)सेसु ।  
 अन्नेवि सुरा असुरा खयरा इह एति जत्ताए ॥२५०२॥  
 इय काउं चेइयहरं आसंसारं च तस्स निव्वाहं ।  
 कयसंतिपायपूया पुणो गया देवलयंमि ॥२५०३॥  
 तत्थ वि पयइमणोहरविसयसुहासत्तमाणसा दो वि ।  
 भुंजंता पुव्वकयं पुन्नफलं तत्थ अच्छंति ॥२५०४॥  
 तत्तो कालक्क(क)मेणं चविया वेयह्वपव्वयवरंमि ।  
 सिद्धत्थपुरे राया अमियबलो खेयरो अत्थि ॥२५०५॥  
 भज्जा से सीलवई सीलनिहाणं च तीय गब्भंमि ।  
 उप्पन्ना दो वि समं जुवलगभावेण पुत्त त्ति ॥२५०६॥  
 उचियसमएण जाया कयाइ नामाइं ताण जणएण ।  
 अकलंक-निम्मल त्ति य कुमारभावं दुवे पत्ता ॥२५०७॥  
 कयदारसंगहा ते भुंजंति जहासुहं विसयसोक्खं ।  
 संसिद्धविविहविज्जा समहियलावन्न-रूवगुणा ॥२५०८॥  
 आबालओ य तेहिं सुधम्मसामिस्स पायमूलंमि ।  
 लद्धो संसारमहासमुद्धजाणं व जिणधम्मो ॥२५०९॥  
 भावियजिणवयणत्था अप्पकसाया प्प(प)मायपरिहीणा ।  
 पुव्वभवजायनेहा दो वि सुहं तत्थ चे(चि)ट्टंति ॥२५१०॥  
 अह अन्नया गया ते अट्ठावयसिहरजिणहरट्टि(ठि)याण ।  
 चउवीसाण जिणाणं वंदणवडियाए पव्वंमि ॥२५११॥

दिट्ठो तत्थ गएहिं सोहम्मसुराहिवो विमाणेहिं ।  
 झंपंतो इव वियडं नहंगणं पंचवन्नेहिं ॥२५१२॥  
 तो पुव्वगया पूएंति जाव विज्जाहरा जिणवरिंदे ।  
 बहुभत्तिनिब्भरुल्लसियपुलयपडला समं दो वि ॥१३॥  
 ता सक्केणं दिट्ठा जिणेक्कगयनयण-हिययवावारा ।  
 समकालखित्तदससयपसारियच्छेण परिओसा ॥१४॥  
 तो भणिया इंदाणी सुरवइणा 'दो वि लक्खिया एए ।  
 जे परमभत्तिजुत्ता तुह पुरओ देवमच्चंति ? ॥२५१५॥  
 एए सोहम्मविमाणवासिणो आसि जे सुओलावा ।  
 ते संपइ विज्जाहरजुयलत्तेणं समुप्पन्ना' ॥२५१६॥  
 देवीए तओ भणियं 'जाणामि विसेसओ दुवे जेहिं ।  
 वसुहाए परिट्ठवियं जिणभवणं सरपरिक्खित्तं' ॥२५१७॥  
 तो सुरवइणा अभिवाइरुण संभासिया दुवे जुगवं ।  
 'किं परमजोइ-महाजोइ ! तुम्ह कुसलं ?' ति ते पुट्ठा ॥२५१८॥  
 तेहिं पि अलक्खियदेवजम्मनामेहिं पभणियं 'देव ! ।  
 तुम्ह पसाएण सया कुसलं चिय अम्ह सुरनाह ! ॥२५१९॥  
 कह नाह ! परमनाणी वि अन्ननामेहिं अम्ह वाहरसि ? ।  
 अन्नाइं चिय सुरवइ ! नामाइं न अम्ह एयाइं' ॥२५२०॥  
 तो सव्वं सुरवइणा विंझाडइ-वडनिवास-सुयभाई(इ) ।  
 अट्ठावयपज्जंतं चरियं परिकहियमेएसिं ॥२५२१॥  
 सोरुण पुव्वजम्मं सविम्हयं ताण तक्खण च्चेय ।  
 जाइस्सरणं जायं अणुहूयभवेसु पच्चक्खं ॥२५२२॥

तो दोहिं वि खयरेहिं भणियं 'सुरनाह ! सुरभवपसिद्धं ।  
 नामजुयलं तह च्विय जह पुव्विं वन्नियं तुमए' ॥२५२३॥  
 तो सुरवइणा सव्वं चउवीसजिणेसराण पूयाइं ।  
 निव्वत्तिऊण भणियं 'जामो अकलंक ! तुह भवणं' ॥२५२४॥  
 'एवं' ति तेण भणिए चलिओ इंदो समं सुरगणेहिं ।  
 अकलंक-निम्मला वि य चलिया नियपरियणसमेया ॥२५२५॥  
 पत्ता खणंतरेणं सुरवइपमुहा सुरासुरा एत्थ ।  
 अकलंक-निम्मलजुया ओयरिया भवणपंगणए ॥२५२६॥  
 आगयमेत्तेहिं तओ पारब्बा संतिनाहसामिस्स ।  
 नियभत्ति-विहवसरिसा पुरंदराईहिं वरपूया ॥२५२७॥  
 पक्खुहियखोणिवीढं संचल्लियसयलतुंगकुलसेलं ।  
 ज्झलज्झलियजलहिसलिलं पणच्चियं तत्थ सुरवइणा ॥२५२८॥  
 इय काउं पेच्छणयं पुरओ परमेसरस्स सुरराया ।  
 अकलंक-निम्मलाणं कुणइ पसंसं सुरसमक्खं ॥२५२९॥  
 'धन्ना तुम्हे सहलं सुरत्तणं तुम्ह चेव संपत्तं ।  
 जेहिं तं पाविऊणं करावियं एरिसं भवणं ॥२५३०॥  
 ते चेव बुद्धिमंता जे रिद्धिं पाविऊण अइचवलं ।  
 एवंविहोवओगेहिं अक्खयं पुन्नमज्जंति ॥२५३१॥  
 को ताण मुणइ संखं नराण लच्छीए जे च्छलिज्जंति ।  
 संता वि जेहिं च्छलिया लच्छी ती एत्थ दोनित्तिन्नि  
 (ते एत्थ दो तिन्नि) ॥२५३२॥  
 परिणामभंगुराए खणसंगमदिन्नतुच्छसोक्खाए ।  
 वेसाए संपयाए व बुहाण न हु जायइ थिरासा ॥२५३३॥



इय एवं नाऊणं नियसत्तिसमं समुज्जमो जेहिं ।  
 न कओ धम्मगुणेसुं सव्वं पि हु निफ(प्फ)लं ताण' ॥२५३४॥  
 तो सुरवइणा भणियं 'तुम्हेहिं वि भव्वमेव कयमित्थ ।  
 जिणभवण-सराणं पुण अहं करिस्सामि नामाइं ॥२५३५॥  
 तो पुणरवि जिणपूयापुव्वं नीसेससुरयणसमक्खं ।  
 अइहरिस्सिण्ण हरिणा जहत्थनामाइं रइयाइं ॥२५३६॥  
 अकलंकं जिणभवणं सरोवरं निम्मलं ति दोण्हं पि ।  
 नामेण ताण कमसो कयाइं नामाइं सक्केण ॥२५३७॥  
 इय एवं बहुमाणं काऊणं ताण खयरकुमराण ।  
 नीसेससुरसमेओ निययावासं गओ सक्को ॥२५३८॥  
 अकलंक-निम्मला वि य सिद्धत्थपुरं गया सुहं तत्थ ।  
 अच्छंति धम्मनिरया विसयसुहेसुं निरहिलासा ॥२५३९॥  
 अह अन्नदिणे दिट्ठं जालगवक्खट्टिण्हिं दोहिं पि ।  
 सेडियरेहासरिसं नहंमि ईसीसि सरयब्भं ॥२५४०॥  
 पुव्विं सूलसमो कमेण य ठिओ गंगातरंगोवमो ।  
 पच्छा तुंगतुसारसेलसरिसो च्छन्नंबरो वित्थओ ।  
 पेच्छंताण खणं स एव जलओ दुव्वारवाओक्खओ ।  
 दोखंडो तिदलो बहूकयदलो नडो गओ कत्थ वि ॥२५४१॥  
 तं दट्ठूणं पभणइ अकलंको 'पेच्छ निम्मल ! खणेण ।  
 कह पच्छाइयगयणो खणेण कह विहडिओ मोहो ॥२५४२॥  
 एसो च्चिय पच्चक्खो दिट्ठंतो हणइ मोहतिमिरोहं ।  
 पयडंतो विबुहाणं खणभंगुरयं पयत्थाण ॥२५४३॥

कह कीरउ संसारे उवरिद्वियकालदंडभीमंमि ।  
 सिरि-सयण-विसयमाइसु वामोहफलेसु पच्चासो ॥२५४४॥  
 कह लच्छीए (च्छिए) तिथरासा कीरइ जा विज्जुलव्व खणदिट्ठा ।  
 उज्जोओ वि य जिस्सा होइ निमित्तं पमोहस्स ॥२५४५॥  
 नेहक्खयं कुणंती पज्जलइ य सगुणवट्टिसंगेण ।  
 दीवयसिहव्व लच्छी अत्थि(थि)र च्चिय बहुअवाएहिं ॥२५४६॥  
 संता वि घरे लच्छी वाहि-जरा-पियविओय-मरणाइं ।  
 न हरइ न य अणुयत्तइ एसा जम्मंतरगयं पि ॥२५४७॥  
 को पडिबंधो सयणाइएसु परमत्थओ परजणेसु ।  
 धम्मंतरायहेउसु संसारनिवायबंधूसु ॥२५४८॥  
 जइ ता रोगाभिहयं नाणाविहवेयणाअभिहवियं ।  
 मरमाणं पि न रक्खइ ता किं सयणस्स सयणत्तं ॥२५४९॥  
 रच्चिज्जइ तुच्छसुहे बहुदुक्खफले वि विसयसोक्खंमि ।  
 जइ न हवंति सुदुस्सहपियविरहदुहाइं कइया वि ॥२५५०॥  
 अणुहूयं सुरलोए विसयसुहं तेण नागया तित्ती ।  
 ता कह संपइ होही रंकसुहेणं व एएण ॥२५५१॥  
 ता सव्वहा विणिज्जियसुरासुरो जाव पसरइ न मच्चू ।  
 ता वयगहणेणम्हे पावेमो जम्मसाफल्लं ॥२५५२॥  
 तो निम्मलेण भणियं 'एवं एयं न अन्नहा भाय ! ।  
 गुरुयणलद्धाएसा तुरियं कज्जे पयट्टम्ह' ॥२५५३॥  
 आपुच्छिऊण जणणिं जणयं च सुधम्मसामिपासंमि ।  
 अकलंकजिणाययणे इहेव ते दो वि निक्खंता ॥२५५४॥

ता सावय ! अम्हे ते अहं सुओ एस भायरो सेणो ।  
 इय कहियं संखेवा तुमए पुट्टं असेसं पि' ॥२५५५॥  
 सोऊण वीरसेणो भणइ पुणो 'विम्हयावहं तुम्ह ।  
 चरियं न कस्स निसुयं जणेइ गरुयं चमक्कारं ! ॥२५५६॥  
 अच्छरियमिणं जं किर कीरो पडिबोहिऊण ओलावं ।  
 धम्मपहावेण गओ सुरलोयं सेणयसमेओ' ॥२५५७॥  
 तो भणइ पुणो साहू 'सावय ! एयं न किंपि अच्छरियं ।  
 नत्थि असज्झं भुयणे धम्मस्स जओऽणुचिन्नस्स ॥२५५८॥  
 मेहो व्व अरुहधम्मो असेससत्ताण हणइ संतावं ।  
 नर-तिरियाइ अकारणमिह वत्थुसरूवमेवेहं(दं?) ॥२५५९॥  
 एसो जिणिंदधम्मो निप्फन्नरसोव्व सव्वलाहाण ।  
 जीवाण परिणमंतो पयडइ परमत्थवित्राणं ॥२५६०॥  
 एसो कालंतरसंचियं पि संजणियविविहदोसं पि ।  
 तणुसुद्धिओसहं पिव विरेयए सव्वपावमलं ॥२५६१॥  
 चिद्धउ ता दूरे च्चिय एयस्स विसेसओ अणुद्धानं ।  
 सद्वहमाणो वि इमं पावविसुद्धिं नरो लहइ ॥२५६२॥  
 चिंतामणी पयासइ चितियमेत्तं न समहियं अत्थं ।  
 जत्थ न पसरइ चिंता सिवसोक्खं देइ तंमि इमो ॥२५६३॥  
 एसो न होइ सुलहो जीवाणं पावपडलपिहियाण ।  
 जेणेह कारणेणं समासओ तं पि निसुणेसु ॥२५६४॥  
 इह चउरासीदुहजोणिलक्खविसमंमि भवसमुद्धंमि ।  
 थावर-जंगमभेयाऽड्ढविहा जीवा समक्खाया ॥२५६५॥

पुढवाईसु असंखा ओसप्पिणि-सप्पिणीओ चउसुं पि ।  
 ताओ चेव अणंता वणसइकाए वसइ जीवो ॥२५६६॥  
 तत्तो वि जंगमत्तं किमि-कीड-पयंगमाइ अइदुलहं ।  
 पंचिंदियत्तजम्मो तत्तो वि हु दुल्लहो होइ ॥२५६७॥  
 खर-सरभ-वसह-महिसुट्ट-मेस-पसु-ससय-सूयराईसु ।  
 पंचिंदियतिरिएसुं धम्मअजोगेसु संभवइ ॥२५६८॥  
 तत्थ वि य सबर-बब्बर-तुरुक्क-भिल्लाइबहुपयारेसु ।  
 पावइ पाववसेणं अणज्जखेत्तेसु मणुयत्तं ॥२५६९॥  
 अह कह वि मणुयजम्मं आरियक्खेत्तेसु पावए जीवो ।  
 चंडाल-डोंब-धीवर-पारद्धियजाइओ होइ ॥२५७०॥  
 अह पावइ जाइ-कुलं तत्थ वि बहिरंध-पंगु-कुज्जतणू ।  
 वियलंग-काण-कुंटो रूवविहूणो नरो होइ ॥२५७१॥  
 सव्वंगसुंदरो वि हु जायइ बहुवाहिवेयणाभिहओ ।  
 जर-खास-सास-हरिसा-गुलुम्म-खयरोगविह्विओ ॥२५७२॥  
 आरोगे वि हु लद्धे तत्थ वि अप्पाउओ नरो होइ ।  
 सूलाहि-विस-विसूइए(अ-) सत्थाभिहओ खणे मरइ ॥२५७४३॥  
 वीहाउए वि लद्धे तत्थ वि बहुकोह-माण-मायाओ ।  
 अइलोह-राग-दोसा कस्स वि पयईए जायंति ॥२५७४॥  
 पयइविसुद्धमणु(ण)स्स वि न होइ धम्मंमि कह णु उंल्लासो ।  
 अह होइ सो वि तत्थ वि भाविज्जइ बहुकुधम्महिं ॥२५७५॥  
 अह पुव्वपुत्रपरिणइवसेण जिणधम्मवासणा होइ ।  
 तत्थ वि धम्मवएसं जो देइ स दुल्लहो सूरी ॥२५७६॥

अह लहइ धम्मसूरिं सुणइ य तस्संतिए परमधम्मं ।  
 तत्थ वि न कुणइ सद्धं मुज्झइ पत्ते वि तत्तंमि ॥२५७७॥  
 इय सावय ! जिणधम्मो अवायसयसंकुलंमि संसारे ।  
 भणियपयारेण इमो अइदुल्ल(ल)हो होइ जीवाण ॥२५७८॥  
 ता लद्धे मणुयत्ते असेसगुणसंजुए महाभाय ! ।  
 तत्थेव अणन्नमणो जिणधम्मे आयरं कुणसु' ॥२५७९॥  
 इय भणिए मुणिवइणा पडिहयगुरुनिबिडमोहपिहुपडलो ।  
 निम्महियमिच्छभावो समुइयसम्मत्तपरिणामो ॥२५८०॥  
 संकाइदोसरहिओ अब्भुवगयसावओइयवओ य ।  
 सिरधरियपाणिकमलो भणइ इमं वीरसेणो वि ॥२५८१॥  
 'भयवं ! न मज्झ सत्ती अज्ज वि संपडइ साहुधम्मंमि ।  
 [तो]कुणसु मह प(प्प)सायं संपइ गिहिधम्मदाणेण' ॥२५८२॥  
 तो 'एवं'ति भणित्ता अकलंकमुणीसरेण कुमरस्स ।  
 पंचनमोक्कारकमा गिहिधम्मवयाइं दिन्नाइं ॥२५८३॥  
 अणुसासिओ य मुणिणा विसेसवयणेहिं बहुविहं कुमरो ।  
 धम्मज्जमत्थमेवं कयंजली सो वि पडिभणइ ॥२५८४॥  
 'भयवं ! अणुगि(गि)हीओ गिहिधम्मपयाणओ विसेसेण ।  
 एयस्स पालणेणं तुम्हाएसं करिस्सामि ॥२५८५॥  
 भयवं ! वच्चामि अहं विसेसकज्जेण दाहिणदिसाए ।  
 उच्छू(च्छु)क्कस्स न विसहइ कालविलंबो खणं काउं' ॥२५८६॥  
 तो भणिओ मुणिवय(इ)णा रायसुओ 'सरवरं कह गंभीरं ।  
 उत्तरिहिसि निरुवाओ जेण इमं भणसि 'गच्छामि' ? ॥२५८७॥

ता एत्थं नवकारं विहिणा एएण ज्ञायसु मणंमि ।  
 थंभियसरजलहिजलो वच्चसु जहइच्छयं ठणं ॥२५८८॥  
 पाविह(हि)सि वंछियत्थं सावय ! अविसाय(इ)णा य होयच्चं ।  
 जं अविसाइयपुरिसो तं नत्थि न जं पसाहेइ' ॥२५८९॥  
 भणिउं 'महापसाओ'त्ति ताण नमिऊण वीरसेणो वि ।  
 जवियनमोक्कारपओ सरस्स पत्तो परं तीरं ॥२५९०॥  
 ता वच्चइ चिंतंतो पहंमि लद्धं जमेत्थ अइदुलहं ।  
 जिणवयणं रत्तंमि वि पाविज्जइ जं पुरा विहियं ॥२५९१॥  
 कहमेत्थ ममागमणं ? जिणिंदभवणं व कह णु रत्तंमि ? ।  
 अकलंक-निम्मलाणं च दंसणं कह व अइदुलहं ? ॥२५९२॥  
 ता जह एयं मह पुव्वपुन्नपरिणइवसेण संजायं ।  
 चंदसिरिदंसणं चिय तहेव होही न संदेहो ॥२५९३॥  
 वच्चइ विसमपयाणयनिहयबुभुक्खा-तिसो महावीरो ।  
 हिययट्टियजायामुहमियंकपीऊसत्तित्तो व्व ॥२५९४॥  
 दंसणपलाणहरिणीदरवलियविसाललोयणविलासे ।  
 दट्ठूण सरइ सरसे चंदसिरीनयणनिकखेवे ॥२५९५॥  
 तो तुरियपयं परंपरपरिवाडी-लंघियाडविपएसो ।  
 पत्तो कमेण कुमरो वणपेरंत(ते?)पुरं एगं ॥२५९६॥  
 अत्थंगयमि सूरे पुरस्स जा जाइ नियडभूभागे ।  
 अभिमुहमागच्छंतं ता पुरलोयं पुरो नियइ ॥२५९७॥  
 भयतरलतारयच्छं पच्छाहुत्तं पलोयमाणं च ।  
 कडि-खंध-पुट्टिसंठियरुयंतबहुबालयसमूहं ॥२५९८॥

भयवेविरोरुयाओ थरहरियथणंतरालहाराओ ।  
 विसमपयक्खेवविहडियमंथरगइगमणलीलाओ ॥२५९९॥  
 परिच्छु(छु)डियकेसपासाओ पडियसियकुसुमसुरहिदामाओ ।  
 तरलच्छित्तारयाओ पेच्छइ सो वारनारीओ ॥२६००॥  
 चत्ताओ(उ) पलंबिरभुयजुयलं मुक्कविक्कमुक्करिसं ।  
 अवलंबिय दीणत्तं नियइ पलंतं सुहडसेन्नं ॥२६०१॥  
 अइतिक्खखुरुक्खयखोणिवीढरयपसरपूरियदियंतो ।  
 अगणियखत्तायारो ससाहणो पलइ नरवालो ॥२६०२॥  
 'परित्ता(ता)यहि'त्ति भणिरिं पियभज्जं पिड्डओ परिच(च्च)यइ ।  
 नियपाणरक्खणट्ठं पलइ नरो को वि गयलज्जो ॥२६०३॥  
 चइऊण पियं पुत्तं रिंक्खंतं पिड्डओ भउब्भंतं ।  
 आसंधियवयणीया पलाइ कुलबालिया कां वि ॥२६०४॥  
 चइऊण अवयणिज्जं अइसयजरजज्जरंगबहिरंधे ।  
 जणणि-जणए वि सभए पलायि पुत्तो तुरियतुरियं ॥२६०५॥  
 अनो(न्नो)न्नावीडणसंघडंतजणरुद्धवियडमग्गंमि ।  
 ओयारमलहमाणो पलायए उप्पहं लोओ ॥२६०६॥  
 इय पुरओ पुरलोओ पलायमाणो वि पेक्खिय कुमारं ।  
 निब्भयसरूवदंसणसविम्हओ तक्खणे जाओ ॥२६०७॥  
 अवलोइओ भडेहिं पडिहयसुहडत्तदीणवयणेहिं ।  
 नियविक्कमओहावियतेलोक्कभडो महावीरो ॥२६०८॥  
 ईसि ईसि(ईसीसि) विहसिऊणं दरदक्खिणबाहुक्खि(खि)त्तनयणेण ।  
 पुट्ठो पलायमाणो 'किंकि'न्ति जणो कुमारेण ॥२६०९॥

तदंसणेण पसरियबहुमाणं पुरजणेण सो भणिओ ।  
 'मा वच्च पुरो सुंदर ! मग्गाहुत्तं अवक्कमसु' ॥२६१०॥  
 तो भणइ वीरसेणो 'मग्गाहुत्तं न किंपि मह कज्जं ।  
 पुरओ च्चिय वच्चिस्सं विसेसकज्जेण उच्छुक्को' ॥२६११॥  
 तो लोएणं भणिओ 'इहइं गमिऊण रत्तिमडवीए ।  
 गोसे गच्छेज्ज पुणो' इय भणिए भणइ कुमरो वि ॥२६१२॥  
 'मा भाह कहह मज्झं उब्भा ठाऊण किं भयं तुम्ह ? ।  
 मोक्कलकेसा एवं गयलज्जा जेण नासेह ? ॥२६१३॥  
 अवहेरिऊण बाले जुवइयणं छडि(डि)ऊण विलवंतं ।  
 नियपाणरक्खणपरा पलाह को तुम्ह पुरिसगुणो? ॥२६१४॥  
 इहरा वि हु मरियव्वं कइवयदियहेहिं मरणधम्मीहिं ।  
 तं जइ परोवयारंमि होइ ता किन्न पज्जत्तं ? ॥२६१५॥  
 भीयपरित्ताणकए मरणं पि महूसवो सुवीराण ।  
 अकयपरित्ताणाणं जीयं पि हु ताण मरणसमं' ॥२६१६॥  
 इय सोउमसुयपुव्वं सावट्टंभं कुमारवयणमिणं ।  
 आससिएण व सो च्चिय जणेहि बहुएहि परियरिओ ॥२६१७॥  
 अह बाल-तरुण-परिणयवयसेहिं नर(रि)त्थि-पौरलोएहिं ।  
 'हा रक्ख रक्ख सामिय !' इय भणिओ दीणवयणेहिं ॥२६१८॥  
 'मा बीहह ! जाव अहं पाणे धारेमि ताव को तुम्ह ।  
 जोयइ मुहं पि ?' भणिओ कुमरेणं सव्वपुरलोओ ॥२६१९॥  
 एत्थंतरंमि दट्ठुं नाणाविहलोयवेदियं कुमरं ।  
 तं नयरनरवई चिय तुरयारूढो तहिं पत्तो ॥२६२०॥



दिड्डो सो भयवेविरजणेहिं परिवेढिओ नरिंदेण ।  
 पवणपहल्लिरवणराई(इ)परिग(ग्ग)ओ सेलराओ व्व ॥२६२१॥  
 दट्ठूणं नरनाहो उदारसत्तं अखुद्धहिययं च ।  
 संधीरंतं पेसलकरुणवयणेहिं पुरलोयं ॥२६२२॥  
 उत्तरइ तरलतुरयाओ तुरयपयक्खेवमुणियबहुमाणो ।  
 संभासइ रायसुयं सिणेहसारेहिं वयणेहिं ॥२६२३॥  
 'कुसलं तुह वीर ! कुओ भवं ?' ति पुड्डो भणेइ 'अज्जेव ।  
 तुह दंसणेण कुसलं नासिक्कपुराओ(उ) पहिओ म्हि' ॥२६२४॥  
 पुणो(ण) भणेइ वीरसेणो 'इहेव नग्गोहरुक्खमूलंमि ।  
 उवविसिय कहह मज्झं नरिंद ! भयवइयरमसेसं' ॥२६२५॥  
 'एवं'ति पभणिऊणं राय-कुमारा य पौरलोओ य ।  
 उवविसइ तओ राया कहेइ कुमरस्स भयहेउं ॥२६२६॥  
 'वीराहिराय ! निसुणसु जं वित्तमिहासि पुव्वकालंमि ।  
 अच्चब्भुयवुत्तंतं वन्निज्जंतं समासेण ॥२६२७॥  
 एत्थेव वीर ! नयरे आसि पुरा पयडविक्रमपयावो ।  
 नामेण समरसीहो राया विद्ववियपडिवक्खो ॥२६२८॥  
 तस्स सुवंसुप्पन्ना वच्छत्थलकंठघोलिरा अत्थि ।  
 नामेण विजयसेणा पियभज्जा हारलट्ठि व्व ॥२६२९॥  
 ताणमहं धन्नाणं पुत्तो नामेण विस्ससेणो त्ति ।  
 नियवंसविणासयरो फलं व वंसस्स संपत्तो ॥२६३०॥  
 पत्तो कुमारभावं कलाकलावं च गाहिओ तेहिं ।  
 एवं तत्थ ठियाणं वच्चंति दिणा सुहं अम्ह ॥२६३१॥

अह तत्थ वीरनयरे पुज्जो तायस्स अत्थि परमगुरू ।  
 वेउत्तधम्मनिरओ भट्ठो महसूयणो नाम ॥२६३२॥  
 अहिगयचउवेयत्थो वेयत्थेणं च कुणइ जन्नाई(इं) ।  
 पसुमेहमाइयाइं अणवरयं सम्मगमणत्थं ॥२६३३॥  
 बलि-वैसदेव-संज्झा-गोपूया-विप्प-फियरपूयाओ ।  
 सो कुणइ अविस्संतो तिकालणहायी असुइत्री ॥२६३४॥  
 तो तेण अम्ह जणणी-जणओ सपरिग्गहो पुरजणो य ।  
 नियवेयविहाणेणं पवत्तिओ निययदिक्खाए ॥२६३५॥  
 नारायणचरणच्चण-निरयाण निरंतरं जणवयाण ।  
 समइक्कंता बहुया दिवसा तद्धम्मनिरयाण ॥२६३६॥  
 अत्थि य सुकुलुप्पन्ना सोमा नामेण बंधणी तस्स ।  
 तिस्सा उयरुप्पन्नो अत्थि सुओ नाम अनिरुद्धो ॥२६३७॥  
 सो सयलकलानिलओ अहीयनियधम्मसत्थसारो य ।  
 चउवेई पिउभत्तो लोईववहारकुसलो य ॥२६३८॥  
 जोग्गो त्ति जाणिऊणं नियाहियारंमि ठाविओ तेण ।  
 महसूयणेण नरवइनयरसमक्खं पिओ पुत्तो ॥२६३९॥  
 महसूयणो य जाओ वेउत्तविहीए भगववयधारी ।  
 परिहरियसव्वसंगो जइधम्मविसेसकम्मरओ ॥२६४०॥  
 चइऊण नयरमेयं विणिग्गओ तित्थदंसणनिमित्तं ।  
 भमिऊण सयलवसुहं पत्तो वाणारसिं नयरिं ॥२६४१॥  
 गंगातीरे कोमलपुलिणत्थगंमि(त्थोऽगम्म?)ज्झाणमारूढो ।  
 अवहूय-भिकखमोई अच्छइ सो तत्थ बहुदियहे ॥२६४२॥

अह तस्स कम्मपरिणइवसेण जाओ अईव दुव्विसहो ।  
 निहयसुहज्जवसाओ खयवाही अकयपडियारो ॥२६४३॥  
 तो तेण महापीडा विहलंघलमाणसेण नियचित्ते ।  
 चिंतियमिणं जहा मे सिद्धं सव्वं पि जं सज्झं ॥२६४४॥  
 उत्तमंबंभणजाई अहीयवेओ य विविहकयजत्तो ।  
 नीसेसबम्हकिरियापरिपालणपत्तब(प)हुधम्मो ॥२६४५॥  
 नियधम्माणुद्वण्णे लोओ वि मए पयट्ठिओ बहुओ ।  
 न कयाइ मए भुत्तं सुद्वन्नं पूइओ विण्हू ॥२६४६॥  
 जणिओ य अप्पसरिसो पुत्तो जो किर मयं पि मं पच्छ ।  
 नेही उट्ठगईए पिंडपयाणाइकिरियाहिं ॥२६४७॥  
 तित्थेसु अहं ण्हाओ लद्धचउत्थासमो जई जाओ ।  
 वाणारसी वि पत्ता गंगातीरं च अइदुलहं ॥२६४८॥  
 एक्केक्केण वि कम्मेण मज्झ सग्गो करट्ठिओ होइ ।  
 किं पुण सग्गनिमित्तेहिं तेहिं बहुएहिं वि न होही ॥२६४९॥  
 ता संपइ गंगाए सग्गारोहाहिरोहणिसमाए ।  
 पक्खिविऊणं देहं वच्चापि सुहेण सग्गमहं ॥२६५०॥  
 इय चिंतियुण तेणं तहेव संपाडियं सुरसरिमि ।  
 उब्बुड्डु-निबुड्डुणए काऊणं सो मओ बहुए ॥२६५१॥  
 एवं सो मरिऊणं गंगासलिलंमि नियइवसवत्ती ।  
 एत्थेव वीरनयरे संजाओ रक्खसो रोहो ॥२६५२॥  
 आलोइओ य सव्वो विहंगनाणेण तेण पुव्वभवो ।  
 नियजाइपच्चएणं अईव कूरत्तणं पत्तो ॥२६५३॥

कीलाविणोयहेउं घायइ सो विविहपाणिसंघायं ।

बहुमज्ज-मंस-रुहिरा कीला वि मणोहरा तस्स ॥२६५४॥

अह अन्नया ठिओ सो गयणयले भणइ क्क(क)क्कससरेण ।

‘रे समरसीह ! निसुणसु सोऽहं जो आसि तुज्झ गुरु ॥२६५५॥

महसूयणोत्ति नाम(मो) संजाओ बम्हरक्खसो एण्हि ।

मह नरबलिं पयच्छसु निच्चं चिय पुरपरिब्भमणं’ ॥२६५६॥

तव्वयणं सोऊणं जाओ पुर-जणवओ य भयभीओ ।

किंकायव्वविमूढो चिंताजलहिंभि व निमग्गो ॥२६५७॥

हा ! हा ! सो बहुजत्री पालियकिरिओ अहीयचउवेओ ।

भगवजई वाणारसि-गंगाए मओ समाहीए ॥२६५८॥

कयउब्बदेहकिरिओ अनिरुद्धेणं न किं गओ सग्गं ।

गयणंमि बंभरक्खसभावं जं पयडए एस ? ॥२६५९॥

जइ नाम रक्खसो च्विय संजाओ पुव्वकम्मदोसेण ।

ता कह अवयाररओ संजाओ निययसीसाण ? ॥२६६०॥

सा भत्ती सो पणओ सो बहुमाणो य तं महादाणं ।

अम्हेहि जं कयं किर वीसरियं तं पि एयस्स ? ॥२६६१॥

इय जा चिंतइ राया ता सो पुण भणइ कडिणवयणेहिं ।

‘रे! रे! किं न पयच्छह पडिवयणं मह भणंतस्स?’ ॥२६६२॥

तो ताएणं आलोच्चिऊण पुण रक्खसो इमं भणिओ ।

‘पुव्वावत्थाओ तुमं अहिययरं संपयं पुज्जो ॥२६६३॥

भणसु किं तुज्झ कीरउ ?’ इय भणिए रक्खसो पुणो भणइ ।

‘निच्चं नरबलिदाणं निसि नयरविहारमविं देह’ ॥२६६४॥

तो ताएणं भणिओ 'मा एवं भणसु पुरिसबलिनामं ।  
 अन्नं चिय मग्ग तुमं बलि-बक्कल-पोलियाईयं ॥२६६५॥  
 नयरविहारे बीहइ घोरं तुह दंसणं निएऊण ।  
 बाल(लि)त्थिभीरुलोओ ता चयसु इमं पि कुग्गाहं' ॥२६६६॥  
 पुण भणइ रक्खसो सो'नाहं बलि-बक्कलेहिं तूसामि ।  
 सीहस्स व आहारो मंसं चिय रक्खसजणस्स ॥२६६७॥  
 आबालभावओ च्चिय एयं मह राय ! वल्लहं नयरं ।  
 मग्गेमि तेण नरवर ! नयरविहारं पयत्तेण' ॥२६६८॥  
 पुण ताएणं भणिओ 'मा एवं अम्ह देहि आएसं ।  
 नाऽहं तुह दाऊणं लोयं रक्खेमि अघ्पाणं ॥२६६९॥  
 अजहत्थमेव जायइ नामं मह खत्तिय त्ति जं रूढं ।  
 जं खत्तिओ स भन्नइ "खयाओ जो तायए लोयं" ॥२६७०॥  
 एत्थंतरंमि सोउं वयणं तायस्स रक्खसो भणइ ।  
 'जइ एवं ता रक्खसु नियलोयं को निवारेइ ? ॥२६७१॥  
 रयणीए पुरपवेसं न पयच्छसि मा पयच्छ को दोसो ?।  
 अम्हे रक्खसजायी च्छलेण कज्जाइं साहेमो' ॥२६७२॥  
 सोऊणं साणुसयं वयणं ताओ भणेइ मंतियणं ।  
 'जं इह समए जुत्तं कहेह तं मज्झ कायव्वं' ॥२६७३॥  
 तो भणइ मंतिवग्गो 'न देवकज्जेसु अम्ह मंतगई ।  
 पुरिसायत्ते कज्जे अम्हं पसरंति बुद्धीओ ॥२६७४॥  
 पुण ताएणं भणिया ते मंती निच्छिओ मए मंतो ।  
 नियदेहपयाणेणं रक्खामि जणं पिसायाओ ॥२६७५॥

कत्रे ठइऊण तओ मंतियणो भणइ‘देव ! न हु एयं ।  
 अप्परिरक्खणेणं जं होइ तयं पसाहेह ॥२६७६॥  
 देसेण परियणेण य पुरेण लोएण अत्थनिवहेण ।  
 अप्पेव रक्खियव्वो नरवइणा सव्वजत्तेण ॥२६७७॥  
 परिरक्खियनियदेहो कालं लहिऊण लहइ सव्वंपि ।  
 इय देव ! अम्ह मंतो अओ परं मुणसि तुममेव’ ॥२६७८॥  
 पुण ताएणं भणियं ‘किं न सुयं पुव्वमेव मह वयणं ।  
 ‘परपाणपयाणेणं नाऽहं रक्खामि अप्पाणं’ ? ॥२६७९॥  
 किं बहुणा भणिएणं ? सधिया मह दोहयाए जइ कुणह(?) ।  
 परउवयारत्थं मे पयट्टमाणस्स उवघायं’ ॥२६८०॥  
 एत्थंतरंमि भणिओ ताएणं रक्खसो इमं वयणं ।  
 ‘नीसेसलोयठाणे रक्खस ! मं चेव भक्खेसु’ ॥२६८१॥  
 तो रक्खसेण भणियं ‘एक्को वि न सो नरिंद ! तुह अत्थि ।  
 पुरिसो जं पइदियहं मह देसि जमप्पणा कुक्को ?’ ॥२६८२॥  
 तो भणइ पुणो ताओ ‘असेसपुरिसाहिवो अहं एत्थ ।  
 अप्पंमि मए दित्रे सव्वंपि हु जाण तुह दित्रं’ ॥२६८३॥  
 ‘एवं होउ’त्ति तओ भणियं रक्खेण ‘होसु सुइभूओ ।  
 उच्चल्लिऊण जेणं भक्खेमि बुभुक्खिओ अहयं’ ॥२६८४॥  
 तो अहिसित्तो पुव्विं अहयं नियनयणबाहसलिलोहिं ।  
 रज्जाहिसेयसमए पच्छा ताएण कलसेहिं ॥२६८५॥  
 तो ताएणं भणिओ मंतियणो परियणो पुरजणो य ।  
 ‘नियजोग्गयाणुरूवं ववहरियव्वं च तुम्हेहिं’ ॥२६८६॥

मंतिपमुहेहिं तइया विन्नं पडिउत्तरं न वयणेण ।  
 मुत्ताथूलंसु→फुडक्खरेहिं नयणेहि पुण भणियं ॥२६८७॥  
 तो ण्हाओ←'सव्वंगं' रत्तंदणकयविलेवणो राया ।  
 कणवीरमुंडमालो रत्तंसुयनिवसणो वीरो ॥२६८८॥  
 जोइज्जंतो हाह त्ति भणिरपुरजणवएण भीएण ।  
 निन्नाहं वीरउरं संपइ इयमाइ भणिरेण ॥२६८९॥  
 'नियनयररक्खणडुं अप्पाणं तिणतुलाए जो तुलइ ।  
 एवंविहो नरिंदो पुणो वि हा ! कत्थ दीसिहही ? ॥२६९०॥  
 इय विलवइ पुरलोओ सबाल-वुड्ढो महापलावेहिं ।  
 पुण रायसुहडवग्गो बहुदुक्खो भणिउमाढत्तो ॥२६९१॥  
 किं कुणउ पौरुसं भो ! देवो व्व उवड्ढिओ महापावो ।  
 अप्पडिविहेह(य?)सत्ती एसो इह रक्खसो अम्ह ? ॥२६९२॥  
 जे दप्पुद्धुररिवुगंधसिंधुराणं रणांमि सीहव्व ।  
 अवलेम्मो मयमिहइं ते अम्हे कोल्हुया जाया ॥२६९३॥  
 अंतेउरं पि सयलं विलाससिरिपमुहमागयं तत्थ ।  
 अणुचियवसुहासंचरणरणिरमणिनेउरारावं ॥२६९४॥  
 दट्ठूण समरसीहं अप्पाणं रक्खसस्स अप्पंतं ।  
 'अम्हे भक्खसु रक्खस ! रक्खसु रायं' इय भणंतं ॥२६९५॥  
 विलुलंतविसंटुलदीहकेसपब्भारपिहियसव्वंगं ।  
 अप्पडियारनिरंतरदुक्खमहाजालनद्धं व ॥२६९६॥  
 संताडंतं हिययं अइनिद्वयविसमकरपहारेहिं ।  
 अंतडियनिवभक्खयरक्खसरोसेण व सदुक्खं ॥२६९७॥

१. →← एतदन्तर्गतः पाठः ताडपत्रे नृटितः, ला.प्रतौ मिलति ॥ २. रक्तचन्दनकृतविलेपनः॥

पगलंति उरत्थलताडणेण सियकिरणसोहियसरीरा ।  
 तुट्ठंति हारमुत्तामिसेण चिरपुन्नबंध व्व ॥२६९८॥  
 इय तेसिं सव्वेसिं विलवंताणं जमो व्व निक्कुरुणो ।  
 ओयरिऊणं रक्खो उक्खिवइ अदीणनरनाहं ॥२६९९॥  
 रक्खसकढोरकरफंसजायरोमंचकंचुओ राया ।  
 विहसियमुहतामरसो न याणिओ कत्थ सो नीओ ॥२७००॥  
 आमुक्कुकुंदरवं निप्फंदपडंतमंति-सामंतं ।  
 मुच्छनिमीलियच्छं वीरउरं तक्खणे जायं ॥२७०१॥  
 तदियहाओ निच्चं नयरंमि परिब्भमेइ सो रक्खो ।  
 रयणीए घोररक्खससहस्सपरिवेढिओ पावो ॥२७०२॥  
 पइदियहं नयराओ नीहरइ जणो भएण संझाए ।  
 गोसंमि पुणो पविसइ ता अच्छइ जाव संझत्ति ॥२७०३॥  
 इय एवं अणवरयं नीणंत-विसंतयाण अम्हाण ।  
 वोलीणा कइदियहा तायमहादुक्खदह्हाण ॥२७०४॥  
 अह अन्नदिणे पुणरवि समागओ संठिओ गयणमग्गे ।  
 मग्गइ पइदियहं चिय नरमेगं चित्तमज्जाओ ॥२७०५॥  
 तो दीणमाणसेहिं चंडालविचेट्टिएहिं अम्हेहिं ।  
 पइदियहं एक्केक्को पडिवन्नो तस्स पुरपुरिसो ॥२७०६॥  
 इय वीरराय ! एवं अणवरयं तस्स पावकम्मस्स ।  
 समइक्कंतो वरिसो जणसंहारं कुणंतस्स ॥२७०७॥  
 संझासमयंमि पुणो अज्ज जहा वीर ! तुज्झ पच्चक्खं ।  
 तह पइदियहं लोओ भयसंभंतो पलइ एवं ॥२७०८॥



जइ कहवि कोइ थक्कइ पमायओ लुक्किऊण नयरंमि ।  
 रयणीए कड्ढिऊणं दिन्नेण नरेण सह असइ ॥२७०९॥  
 इय चत्तपुरिसयारा अपरित्ताणा अईवदीणमणा ।  
 किंकायव्वविमूढा चिद्धामो वीर ! एवं ति ॥२७१०॥  
 इय वुत्तंतं सोउं भणइ कुमारो 'हहा ! महाकड्डं ।  
 संपज्जइ संसारे अन्नाणंधाण जीवाण ॥२७११॥  
 करुणागुणपरिहीणो किरियासहिओ वि निप्फलो धम्मो ।  
 सुसुयंधाइगुणहो नरिंद ! इह चंदणदुमो व्व' ॥२७१२॥  
 एत्थंतरंमि एगा कडिसंठियबालया परुयमाणी ।  
 अणुकड्डियंधथेरी समागया कुलवहू तत्थ ॥२७१३॥  
 'हा ! रक्ख रक्खसाओ अणन्नसरणाए अइदरिद्दाए ।  
 नित्थारयं नरेसर ! थेरिसुयं मज्झ भत्तारं' ॥२७१४॥  
 तो कुमरेणं पुट्ठो राया 'किं किं ति विलवए एसा ?' ।  
 भणइ नरिंदो 'होही अज्जं नणु वारओ तस्स' ॥२७१५॥  
 तो भणइ वीरसेणो थेरिं कुलबालियं च दट्ठूण ।  
 तदु(द्दु)क्खदूमियप्पा ओ(उ)वयारमईए नरनाहं ॥२७१६॥  
 'गरुओ धम्मवियारो अच्छउ ता राय ! जामि पुरमज्झे ।  
 पच्छ जहाणुरूवं जं होही तं करिस्सामि' ॥२७१७॥  
 'हा ! पुरिसरयणमेयं धारेह रक्खेह ही ! निरुंभेह' ।  
 निसुणंतो तरुणीयणकोलाहलमकयतच्चित्तो ॥२७१८॥  
 वारिज्जंतो वि दड्डं(ढं) कुमरो पुर-जणवएण राएण ।  
 अकयपडिवयणदाणो तुरियगई नयरमुच्चलिओ ॥२७१९॥

पत्तो अपेयरक्खससहस्सपहरुद्धनिग्गम-पवेसं ।  
 पेयाहिवइपुरं पिव पुरं कुमारो महाघोरं ॥२७२०॥  
 पविसइ सहावदुद्धरिसतेयपुंज्जो(जो) व्व रक्खसभडेहिं ।  
 जोइज्जंतो सभयं पुरं कुमारो सुवीसत्थो ॥२७२१॥  
 विप्फुरियफाररक्खसफेक्कारफुरंतपडिरवरउहं ।  
 पेच्छइ पिसायसेत्रं रत्थामुह-चच्चर-तिएसु ॥२७२२॥  
 नीसेसनयरगुणसंगयं पि अणुहरइ जं सुरपुरस्स ।  
 तं तेहिं सम्भुत्तं संजायं पिउवणसरिच्छं ॥२७२३॥  
 अस्सच्चरवविगंधे(?) वस-मंसाहारभीसणायारे ।  
 सव्विंदियअमणोत्रे कट्ठिणट्ठी रक्खसे नियइ ॥२७२४॥  
 भीसणपसारियमुहे ललंतजीहाकरालदुप्पेच्छे ।  
 कत्तियकवालहत्थे इओ तओ धावमाणा(णे)य ॥२७२५॥  
 पेच्छइ पिसायमेगं कुओ वि लद्धामिसं पिसाएहिं ।  
 परिवेढियं रुयंतं अक्खवणभया पलंतं च ॥२७२६॥  
 उव्वेल्लइ कोवि दुहं परिउंचियरक्खसीमुहा समुहं ।  
 अइपविरलदसणंतरपविट्ठदसणो पिसायभडो ॥२७२७॥  
 आलिंणइ अवरोप्परतणुपीडणकडयडंतपासुलियं ।  
 कत्थ वि रक्खसमिहुणं उयरंतरइल्लिरथणगं ॥२७२८॥  
 रुहिरासवभरियकरालघोरसंकंतनियमुहभएण ।  
 का वि निसायरनारी अवरुंडइ पिययमं भीया ॥२७२९॥  
 इय नाणाविहरक्खसजणवइयरसंकुलं महानयरं ।  
 पेच्छंतो संपत्तो एगं पुरचच्चरं कुमरो ॥२७३०॥

जा जाइ तत्थ वीरो ता पेच्छइ रक्खसाहिवं पुरओ ।  
 नाणापिसायपरिसापरियरियं भीसणाधारं ॥२७३१॥  
 उव्वत्तणेण रेहइ अत्तित्तमिव माणुसामिसरसेण ।  
 उहं च विवहंतं तारायणभक्खणासाए ॥२७३२॥  
 चम्मट्टिसेसमेत्तं मुक्कं वस-देह-मंसनिवहेहिं ।  
 अइमंसलंपडत्तणभीएहिं व सव्वगत्तेसु ॥२७३३॥  
 अइगहिरजठरखाणीसंढियकिण्हाहिभीसणसरूवं ।  
 परिसडियसयलसाहं सकोडरं सुक्करुक्खं व ॥२७३४॥  
 सहूलचम्मनिवसणमइधोरभुयंगभीसणाभरणं ।  
 परिवत्तियन्नरूवं जम्मं(मं) व भुवणस्स भयजणयं ॥२७३५॥  
 नरवइदिन्नं पुरिसं घेत्तुं केसेसु वेविरसरीरं ।  
 भयतरलदीणवयणं खिवंतमवणीए रोसेण ॥२७३६॥  
 तं दट्ठूण कुमारो पिसायरायं दयाए तुरियगई ।  
 वेणेण समणुपन्नो तस्स समीवं इमं भणइ ॥२७३७॥  
 'हा!रक्ख रक्खसाहिव ! मा मारसु तुह भएण मयमेयं ।  
 भीयपरित्ताणेणं गरुयत्तं होइ गरुयाण ॥२७३८॥  
 जं दिज्जए एत्थ भवे परलोए तं लहेइ सविसेसं ।  
 दुक्खं देंतो दुक्खी सुहं च देंतो सुही होइ ॥२७३९॥  
 अइदुब्बलंमि भीए सरणविहीणंमि निरवराहंमि ।  
 करुणाठाणे जायइ न निग्घणत्तं विसिद्धाण ॥२७४०॥  
 एत्थंतरंमि सोउं अक्खुहियकुमारथिर-पसन्नगिरं ।  
 'को एस'त्ति सकोवं कुमारसमुहं पलोवेइ ॥२७४१॥

पेच्छइ दुद्धरिसपहापहावविहडंतरक्खसतमोहं ।  
 निसियरनाहो पुरओ कुमरं पच्चूससूरं व्व ॥२७४२॥  
 तो भणइ रक्खसो सो 'कोऽसि तुमं ? केण वाऽवि कज्जेण ।  
 घोरपिसायनिरंतरपुरं पविट्ठोऽसि रयणीए ? ॥२७४३॥  
 ता पलसु, जाहि तुरियं, जाव न भक्खिज्जसे पिसाएहिं ।  
 अप्पुव्वोऽसि सरूवं न जाणसे अम्ह नयरस्स' ॥२७४४॥  
 तो भणइ रायपुत्तो तस्सास्स(स)यजाणणत्थि(त्थ)मिय वयणं ।  
 'सच्चमउव्वो एण्हि अन्नायपुरवइयरो पत्तो ॥२७४५॥  
 तो कहसु नियसरूवं नयरसरूवं च' पभणिए एवं ।  
 भणइ निसायरराया वयणमिणं जायदररोसो ॥२७४६॥  
 'चइऊण निययकालं अइदुलहं रयणिपुरपरिब्भणं ।  
 निप्फलपयासमेत्तं को तुह पडिउत्तरं देउ' ? ॥२७४७॥  
 तो भणइ वीरसेणो 'जइ एवं कत्थ जामि रयणीए ? ।  
 अन्नत्थ गओ नियमा उवइविस्सं पिसाएहिं ॥२७४८॥  
 जह मं दट्ठुं करुणा तुह जाया रक्खसिंद ! तह नन्ने ।  
 अणुकंपिस्संति ममं निसायरा निग्घिणसहावा' ॥२७४९॥  
 पुण भणइ पिसायवई 'ता अच्छसु पहिय ! जा अहं एयं ।  
 नरवइदिन्नं पुरिसं सपरियणो खामि हंतूण ॥२७५०॥  
 तो भणइ पुणो कुमरो 'किमणेणं भक्खिएण तुह होही ? ।'  
 भणइ निसायरराया 'तित्ती' कुमरो तओ भणइ ॥२७५१॥  
 'किं सव्वकालिया तुह होही तित्ती इमस्स मंसेण ? ।  
 तक्केमि तेण इह ते महग्गहो एयअसणंमि' ॥२७५२॥

भणइ पिसायाहिवई 'नेवं जायइ खणंतरं एगं ।  
 तित्ती तओ पवड्डइ पलयानलसन्निहबुभुक्खा' ॥२७५३॥  
 तो भणइ वीरसेणो 'हा हा ! तुम्हारिसा वि जत्थेवं ।  
 खणतित्तिनिमित्तमहो ! कुणंति असमंजससयाइं ॥२७५४॥  
 को तत्थ नरवर ! (नखर!?) दोसो अन्नाणंधाण मूढजीवाण ।  
 जाणं नत्थिवेओ हेओवाएयकज्जेसु ? ॥२७५५॥  
 तुममेत्थ देवजाई जहत्थनाणेण नायपरमत्थो ॥  
 कह होसि सिक्खणीओ नाणविहीणाण अम्हाण ? ॥२७५६॥  
 जाणामि एत्तियं पुण पत्तो जेणेव तं कुदेवत्तं ।  
 तेणेव पुणो लहिहसि 'नरत्तं अ(त्तम)न्नाणदोसेण' ॥२७५७॥  
 तो वीरसेणवयणं सोउं पुण रक्खसो इमं भणइ ।  
 'किं कीरउ देवत्तं संजायं एरिसं अम्ह ? ॥२७५८॥  
 भक्खिज्जइ नरमंसं पिज्जइ रुहिरं च पिउवणे वासो ।  
 जं बीभत्सं भुवणे सो च्चिय अम्हाण सिंगारो ॥२७५९॥  
 नियजाइपच्चएणं ववहरणं होइ सच्चलोयस्स ।  
 तम्हा न अम्ह दोसो नियजाइठियं(इं) कुणंताण' ॥२७६०॥  
 तो भणइ वीरसेणो 'जं भणसि न तं सुसंगयं वयणं ।  
 जं जायइ पच्चएणं किर होइ जणस्स ववहरणं ॥२७६१॥  
 अप्पा पयइविसुद्धो अच्चुज्जलफलिहनिम्मलसख्वो ।  
 जायइ उवाहिभेया नाणाविहभेयसब्भावं ॥२७६२॥  
 कम्मं होइ उवाही तं पुण दुविहं सुहासुहं नेयं ।  
 जीवो सुहो सुहेणं असुहेणं होइ असुहमई ॥२७६३॥

टि. १. 'नरयत्तमनाणदोसेण' इति स्यात् ॥

एएण कारणेणं भणामि मा उवचिणेहि अइघोरं ।  
 जीववह-मंसभक्खण-परावयारेहिं दुक्कमं(म्मं) ॥२७६४॥  
 एएण रक्खसेसर ! असंगयं बहुविहाई(इ) दुक्खाईं ।  
 पाविह(हि)सि महानरए 'अइनिंदियकूरकम्मेण ॥२७६५॥  
 पुण भणइ रक्खसिंदो सकोवमिव विसमफुरियदसणोद्धो ।  
 'जइ धम्मिद्धोसि तुमं ता पंथिय ! चयसु पावाइं ॥२७६६॥  
 तुह वयणेण न अम्हे पच्चक्खं हियंयनिव्वुइकरं वि ।  
 एयं नियमायारं परोक्खधम्मत्थमुज्झामो' ॥२७६७॥  
 एयं भणिरुण तओ 'रक्खसु मं वीर ! इय पयंपंतो ।  
 खित्तो 'दड'त्ति पुरिसो वसुहाए पिसायराएण ॥२७६८॥  
 तो कट्ठिरुण तुरियं निसायरो निसइ हड्डुखंडम्मि ।  
 नियकत्तियं नरामिसविसेसभुक्खाए 'व जलंतं ॥२७६९॥  
 एत्थंतरंमि कुमरो करुणारसपरवसो निएउणं ।  
 तं निग्घणं पवित्तिं पभणइ 'मा मारसु इमं ताव(ता) ॥२७७०॥  
 जइ तुज्ज पिसायाहिव ! अणुबंधो पुरिसमंस-रुहिरेसु ।  
 ता नरमेयं रक्खसु मं भक्खसु कुणसु मह वयणं' ॥२७७१॥  
 तो भणइ रक्खसिंदो 'न तुमं मह राइणा वि दिओ सि ।  
 ता कह पहियमउव्वं जायालावं च भक्खामि ?' ॥२७७२॥  
 पुण भणइ वीरसेणो 'किं मह जीएण जस्स पच्चक्खं ।  
 करुणं विलवंतो च्चिय एसो मारिज्जए पुरिसो ? ॥२७७३॥  
 अत्राय-पत्थणाभंगदुसहदुक्खो म्हि पत्थिओ सि मए ।  
 एयं रक्खसु पुरिसं मं भक्खसु, एस ते पणओ' ॥२७७४॥

तो रक्खसेण भणियं 'जइ एवं ता इमो मए मुक्को ।  
आगच्छ तुमं तुरियं भक्खामि अहं बुभुक्खत्तो' ॥२७७५॥  
मुक्को त्ति पढमनिसुए आणंदुव्वूढबहलरोमंचो ।  
संपत्तसयलतिहुयणरज्जो इंव तक्खणे जाओ ॥२७७६॥  
ओसारिऊण पुरिसं अल्लियइ पिसायमप्पणा कुमरो ।  
पुण भणइ 'भक्खसु बहं कयत्थिओ एत्तियं कालं' ॥२७७७॥  
तो रक्खसेण भणियं 'नाहं पहरेमि ते, तुमं देसु ।  
अप्पाणमप्पण च्चिय विखंडिउं मंसखंडाइं' ॥२७७८॥  
'उचिओ तुज्झ विवेओ सज्जणचरिओ सि किं परं भणिमो ?' ।  
इय भणिरुण कुमारो कहुइ नियमेव करवालं ॥२७७९॥  
उक्कत्तिऊण मंसं रक्खसनाहस्स देइ ता कुमारो ।  
तो तेण सखग्गो च्चिय भुयदंडो थंभिओ सहसा ॥२७८०॥  
तो भणइ रक्खसिंदो 'किं न तुमं देसि मंसखंडाइं ? ।  
भक्खामि बुभुक्खत्तो सपरियणो किं नु भीओ सि ?' ॥२७८१॥  
तो भणइ वीरसेणो 'जं भणसि तमेव मज्झ संघडइ ।  
अहवा तुमं पमाणं मह विसए किमिह भणिण ?' ॥२७८२॥  
तो सुमरिऊण कुमरो नवक्का(का)रं नियमणंमि महसत्तिं ।  
उत्थंभियभुयदंडो जा वाहइ खग्गमंगंमि ॥२७८३॥  
ता धाविऊण तुरियं संभंतो रक्खसो करे धरइ ।  
कुमरं पुण भणइ 'इमं परिहासो मे कओ एस ॥२७८५४॥  
ता रक्खसु अप्पाणं अणेयकल्लाणभायणं वीर ! ।  
तुह पुव्वभणियवयणामएण तित्तो म्हि आजम्मं ॥२७८५॥

नद्धा मज्झ बुभुक्खा उवसंता सत्तसंहरणबुद्धी ।  
 रविणो व्व तए सुंदर ! पणासियं मोहतिमिरं पि ॥२७८६॥  
 ता उवरम मरणाओ संपइ जं भणसि तं करिस्सामि ।  
 तुह असरिसचरिएणं रंजियचित्तो अहं तुद्धो' ॥२७८७॥  
 तो भणइ वीरसेणो 'अभयं ता देसु संपइ इमस्स ।  
 पच्छा जं कालोचियमिह होही तं भणिस्सामि' ॥२७८८॥  
 पुण भणइ रक्खसिंदो 'उज्जुय ! न परं इमस्स पुरिसस्स ।  
 अज्जपभिइं जयस्स वि अभयदाणं मए दिव्वं' ॥२७८९॥  
 एत्थंतरंमि कुमरो चिंतइ हिययंमि 'एरिसे समए ।  
 अकलंक-निम्मला जइ एंति तथा सुंदरं होइ ॥२७९०॥  
 इय जा कुमार-निसयरनाहाण हवंति एरिसालावा ।  
 ता सहसा वोलीणा नयरस्स महावय(इ)व्व निसा ॥२७९१॥  
 पडिहयदंसणपसरो अन्नायजहत्थवत्थुवित्थारो ।  
 नद्धो निवायहेऊ रक्खसमोहो व्व तिमिरोहो ॥२७९२॥  
 उवसंतो गयणयले तारानिवहो फुलिंगनिवहो व्व ।  
 मित्तागमे पसामियरक्खसमणकोवजलणस्स ॥२७९३॥  
 उइयं तिलोयनेत्तं अत्तारयं अण(णि)मिसं पयडियत्थं ।  
 रविमंडलं निसायर-विवेयरयणं व लोयहियं ॥२७९४॥  
 तो भणइ रक्खसिंदो 'समं(म्मं) पडिबोहिओ तए अहयं ।  
 जं मोहमहानिद्धापरव्वसो हं पुरा हुंतो ॥२७९५॥  
 उद्धरिओऽहं तुमए पावमहापंकखुत्तसव्वंगो ।  
 हत्थालंबोऽसि तुमं नरयमहाकूवपडियस्स' ॥२७९६॥



सोऊण तस्स वयणं संवेगोवसमसंगयं कुमरो ।  
 भणइ 'धन्नो-निसायर ! तुमं ति जस्सेरिसा बुद्धी' ॥२७९७॥  
 इय जाव ते परोप्परमालावं संगयं कुणांति इमं ।  
 ता पेच्छंति सविम्हयचारणमुणिजुयलयं गयणे ॥२७९८॥  
 थुवं(व्वं)तं नाणाविहविज्जाहर-असुर-सुरसमूहेहिं ।  
 गयणाओ ओयरंतं ससि-सूरजुयं व दिप्पंतं ॥२७९९॥  
 नियतेयतिरोहियतरणितरुणकिरि(र)णोहपूरियदियंतं ।  
 परिवियडभवमहाडविदवग्गिजालाकरालं च ॥२८००॥  
 तं निसयर-कुमराणं पेच्छंताणं पुरस्स बाहिंमि ।  
 आणंदुज्जाणवणे ओयरियं खयर-सुरमहियं ॥२८०१॥  
 तो भणइ वीरसेणो 'एहि महासत्त ! वंदिमो एयं ।  
 मुणिजुयलं कयबहुभवपावमहापंकसलिलं व ॥२८०२॥  
 एयाण दंसणेणं विहडइ मोहं(हो) पणासए पावं ।  
 होइ विवेउज्जोओ विसेसगुणपयरिसनिमित्तं' ॥२८०३॥  
 तो भणइ रक्खसिंदो 'जइ एवं ता किमज्ज वि विलंबो ? ।'  
 इय भणिउं ते तिन्नि वि साहुसमीवं गया तुरियं ॥२८०४॥  
 कुमरेण पेसिओ सो पुरिसो पुर-जणवयस्स नरवइणो ।  
 आहवणत्थं तुरिओ सयं च पत्तो मुणिसमीवं ॥२८०५॥  
 जा जाइ तत्थ पुरओ ता तुरियं नियइ सयलदेवेहिं ।  
 तण-सक्कराइ सव्वं अवणीयं तप्पएसाओ ॥२८०६॥  
 गंधोदयवरिसेणं अवणीओ तत्थ धरणिरयपसरो ।  
 तव्वेलुक्कंटियसुरहिकुसुमपयरो वि विक्खिरिओ ॥२८०७॥

ठवियं च जच्चकंचणनिम्मवियं कमलजुयलमकलंको ।  
 निम्मलमुणी जहक्कममुवविट्ठा तेसु ते दो वि ॥२८०८॥  
 देवेहिं ताण उवरिं कंचणदंडं सियायवत्तदुगं ।  
 धरियं निम्मलमोत्तिय-मणि-रयणपलंबिरोऊलं ॥२८०९॥  
 इय एवं नीसेसं सुरनिम्मवियं विसेससक्कारं ।  
 दट्ठूण वीरसेणो परियप्पइ नियमणे एवं ॥२८१०॥  
 अकलंक-निम्मलमुणी एए ते चिंतिया य पत्ता य ।  
 उप्पन्नं एएसिं केवलनाणं ति मन्नामि ॥२८११॥  
 कहमन्नहा सुरासुर-विज्जाहरनियरचलणकयसेवा ।  
 केवलनाणपहावा कंचणकमलंमि चिद्धंति ? ॥२८१२॥  
 ता कयपुत्रा एए सकयत्थं कयमिमेहिं मणुयत्तं ।  
 सुविसुद्धचरणलाहो एएसिं चेव संजाओ ॥२८१३॥  
 उम्मूलियं असेसं कम्मवणं नित्थओ भवसमुद्धो ।  
 तीयाणागयविसयं उप्पन्नं केवलं जेसिं ॥२८१४॥  
 इय चिंतंतो कुमरो संपत्तो ताण पायमूलंमि ।  
 रक्खससंपाडियपुफ(प्फ)माईओ कुणइ वरपूयं ॥२८१५॥  
 संपूइऊण य तओ काऊण पयाहिणं च तिकखुत्तो ।  
 रक्खससहिओ पणमइ संथुणइ य परमभत्तीए ॥२८१६॥  
 'नमिमो पयडियतिहुयणकेवलवरनाणलद्धरयणाण ।  
 उव्वरियभुयणमंदिरधारणखंभाण व तिकालं' ॥२८१७॥  
 इय थोऊण कुमारो सरक्खसो परमभत्तिसंजुत्तो ।  
 पुणरुत्तवराविलुलियसिरमउली(?) पणमइ मुणीण ॥२८१८॥

टि. १९. 'पुणरुवराविलुलियसिर० ॥ ला. प्रतौ ॥

पयईए सुह-पवित्ते उवविद्धो ताण पायमूलंमि ।  
 समणुत्राओ पुत्विं मुणीहिं संभासिओ तयणु ॥२८१९॥  
 एत्थंतरंमि सयलो समागओ पुरजणो नरवई वि ।  
 उवसामियरक्खसनिसुणणेण आणंदपुलियंगो ॥२८२०॥  
 'अहह ! महच्छरियमिणं आणंदाओ विऽम्ह(अम्ह)संजाओ ।  
 परमाणंदो एसो जं दिद्धा साहुणो एए ॥२८२१॥  
 एयाए कारणं किर कल्लाणपरंपराए रायसुओ ।  
 कहमन्नहा निसायरउवसामो परममुणिलाहो ?' ॥२८२२॥  
 इह एवं चिंतता संपत्ता साहुसंनिहाणंमि ।  
 पहरिसपुलिइयगत्ता कुणंति तिपयाहिणपणामं ॥२८२३॥  
 नमिऊण केवलीणं पयकमलं नरवई जणवओ य ।  
 उवविसइ रुद्धवसुहा-वित्थारो थिरपसन्नमणो ॥२८२४॥  
 तो कहइ मुणी धम्मं जलहरगंभीर-धीरसदेण ।  
 रक्खस-कुमर-नरवइ-पुरजण-देवासुराईण ॥२८२५॥  
 आयन्नह एक्कमणा हियए आयन्निऊण धारेह ।  
 तह चिंतह अप्पाणं जह सुहिया होह सयकालं ॥२८२६॥  
 इह होइ महाकट्टं अन्नाणं नरयपडणफलमेयं ।  
 अन्नाणहया जीवा जुत्ताजुत्तं न याणंति ॥२८२७॥  
 अइसंकिलिद्धकम्माण कारणं संकिलिद्धकम्मकयं ।  
 कयसंकिलिद्धचेट्टं अन्नाणं होइ जीवाण ॥२८२८॥  
 अन्नाणमेय(व) जायइ अवयारपरो जणस्स इह सत्तु ।  
 तं नत्थि जं न दुक्खं अन्नाणं कुणइ जीवाण ॥२८२९॥

उइयससि-सूरलक्खं अन्नाणंधाण जायइ जयं पि ।  
 पयडपयत्थं पि सया तमं व दूरं निरालोयं ॥२८३०॥  
 लद्धेसु वि धम्मदिवायरेसु पयडियविसेसतत्तेसु ।  
 कोसियपक्खि व्व जिओ उज्जोओ जस्स तिमिरं व्व ॥२८३१॥  
 जं किंपि एत्थ दुक्खं सारीरं माणसं च संभवइ ।  
 नर-तिरिय-नारएसुं तं जीवो लहइ अन्नाणी ॥२८३२॥  
 अन्नाणं मिच्छत्तं पावमधम्मो नियाणमेगद्धा ।  
 एएण होइ जीवो दुही, सुही होइ नाणेण ॥२८३३॥  
 अन्नाणमोहमूढो जीवो सव्वं पि मुणइ विवरीयं ।  
 धम्मे वि अधम्मत्तं देवे वि अदेवपडिवत्ती ॥२८३४॥  
 पावाणुद्वाणं पि हु धम्माणुद्वाणमेव मन्नेइ ।  
 पेयमपेयं च तहा भक्खमभक्खं च जाणेइ ॥२८३५॥  
 इय विविहभवब्भासियदुरंतअन्नाणमोहिओ जीवो ।  
 कम्माणुहावओ सो निवडइ पासंडिधम्मेसु ॥२८३६॥  
 अन्नाणमोहियच्छा कुधम्मसत्थोवएसमूढमणां ।  
 चइऊ ण मोक्खमग्गं पडंति संसारमग्गंमि ॥२८३७॥  
 वेया परमो देवो वेया परमागमो य सिद्धंतो ।  
 वेया चेव पमाणं इह-परलोएसु कज्जेसु ॥२८३८॥  
 वेयाण फलं जन्ना जन्नाण फलं वयंति सग्गो त्ति ।  
 अज-तुरयमेहपमुहा जन्ना विनिवेइया वेए ॥२८३९॥  
 अइअन्नाणविमूढो अहिलसमाणो मणंमि सग्गसुहं ।  
 पसुमारणपावेणं निवडइ घोरंधनरएसु ॥२८४०॥

टि. १. "०सत्थोवएसमूढाण" ला. ॥

पंच पविताणि इहं सव्वेसिं चव धम्मकामीण ।  
 दय-सच्च-मचोरिक्कं बंधं च परिग्गहचा(च्चा)यं ॥२८४१॥  
 अभु(ब्भु)वगयं च पढमं एयं पच्छा य जन्नकिरियाओ ।  
 उवइसमाणो वेओ कहं न सो होइ अन्नाणं ? ॥२८४२॥  
 जइ हिंस च्चिय धम्मो ता मन्ने वाह-धीवराईण ।  
 होही सग्गनिवासो सुनिच्छियं वेयवयणेण ॥२८४३॥  
 जं काऊण पमाणं तदुत्तकिरियाहि साहिमो सग्गं ।  
 सो च्चेय पुव्व-पच्छिमविरोहओ विहडए वेओ ॥२८४४॥  
 जइ ताव दयाधम्मो वेउत्तो ता कहं पुणो एत्थ ।  
 काऊण जन्नकिरियं जीववहो अणुमओ तेण ? ॥२८४५॥  
 ता जन्नाइविहाणं अन्नाणं तयणुमाणओ अवरं ।  
 जं किं पि वेयभणियं तं सव्वं होइ मोहफलं ॥२८४६॥  
 अवभिज्झं ण्हाणाणि तहिं वेए भणियाणि होंति अन्नाणं ।  
 न हि बाहिरण्हाणेणं कम्ममलो जाइ जीवस्स ॥२८४७॥  
 खणमेत्तबाहिरमलं जं नासइ तं कहं मणनिबद्धं ।  
 गंगाइत्तिथण्हाणं पावमलं हणइ जीवस्स ? ॥२८४८॥  
 जइ ताव पावजोगो होइ सरीरस्स ता इमं उचियं ।  
 अह जीवस्स स जायइ ता कह ण्हाणेण तस्सुद्धी ? ॥२८४९॥  
 इय त्तिथण्हाणधम्मो वेए भणिओ य होइ अन्नाणं ।  
 मोहपयासणमेत्तं जीवाणं वहफलं नेयं ॥२८५०॥  
 जम्हा एए जीवा भू-वाऊ-सलिल-वण्हणो समए ।  
 वणसइकायसमेया निदिद्धा परमनाणीहिं ॥२८५१॥

भूमिं(मी?)आऊ तेऊ वाऊ य वणस्सई य वेयंमि ।  
 देवत्ति संपणीया देवा उण कह णु निज्जीवा ? ॥२८५२॥  
 ता तव्वयणपमाणा सिद्धं भूमाइयाणं जीवत्तं ।  
 जिणवयणमएण पुणो पच्चक्खमिमिसि जीवत्तं ॥२८५३॥  
 तम्हा भूमीदाणं गोदाणं तुरय-गय-रहाईणं ।  
 सावज्जदाणभावा विवज्जियं परमनाणीहिं ॥२८५४॥  
 जइ ताव देवय च्चिय भूमी गावी य ता कहं ताओ ।  
 दिज्जंति बंभणाणं दासीउ व धम्मसद्धाए? ॥२८५५॥  
 लद्धूण भूमिदाणं आरंभं कुणइ गरुयकयपावं ।  
 गाहगसहिओ दाया जेण दुवे जंति नरएसु ॥२८५६॥  
 अणवज्जमेव दिज्जइ अणवज्जविसेसधम्मकामेहिं ।  
 अणवज्जारंभाणं मुणीण कम्मक्खयनिमित्तं ॥२८५७॥  
 रयणत्तओववी(वे?)या विसुद्धवरबंभचारिणो मुणिणो ।  
 दंतिंदिया पसन्ना खंतिपरा बंभणा जइणो ॥२८५८॥  
 सावज्जजोग्ग(ग)विरया निरया अणवज्जसयलकज्जेसु ।  
 ते होंति दाणजोग्गा(ग्गा) गिहीण मुणिणो महाजइणो ॥२८५९॥  
 गिहिणो पावारंभा कुडुंबिणो विसयलंपडा खुद्दा ।  
 दायगसमाणदोसा न दाणपत्तं दिया होंति ॥२८६०॥  
 इय एवमाइ सव्वं समं(म्मं)नाऊण आगमबलेण ।  
 देयादेयविभागो पत्तापत्तं च नायव्वं ॥२८६१॥  
 अन्नं च तत्थ वेए भणिया किर अगियारिया समं(म्मं) ।  
 गहसंति-संपयाणं वुद्धिनिमित्तं दियाईहिं ॥२८६२॥

तिल-वीहि-समिहमाइं वणस्सईदेवयाओ डहिऊण ।  
 जा तुम्ह होइ संती तेणं वेयागमविरोहो ॥२८६३॥  
 डहिऊण अप्पमाणे जीवे एगिंदिए तडयडंते ।  
 पावइ बहुपाणिवहा पावं, पावेण कहं संती ? ॥२८६४॥  
 कह काऊण असंतिं बहूण जीवाण अप्पणो संतिं ।  
 अहिलसइ? परस्स जओ संतिकरो पावए संतिं ॥२८६५॥  
 तम्हा अन्नाणं चिय भणिया इह अगिग्यारिया समए ।  
 पावाणुड्डाणं पिव पडिसिद्धा परमनाणीहिं ॥२८६६॥  
 तो जे भणंति एवं मुहमग्गी होइ सव्वदेवाण ।  
 तेणेव पूइएणं सव्वसुरा पूइया होंति ॥२८६७॥  
 ता चइऊणं हरि-हर-विरिंचिमाई सुरा अदिड्डफला ।  
 तं सव्वदेवमइयं पूयह निच्चं चिय हुयासं ॥२८६८॥  
 इय सम्मनाणरहिया अन्नाणंधा अदिड्डपरम्त्था ।  
 एगिंदियगिक्कायं पि देवबुद्धीए पूयंति ॥२८६९॥  
 देवो स एव भन्नइ जो रहिओ राग-दोस-मोहेहिं ।  
 सुर-असुरपूयणिज्जो पयडियपरमत्थविन्नाणो ॥२८७०॥  
 अच्चंतं भुयणहिओ अर्चितमाहप्प-सत्तिसंजुत्तो ।  
 कयकिच्चो य महप्पा रहिओ जर-जम्म-मरणेहिं ॥२८७१॥  
 जो निम्मूलुम्मूलियखुहाइअद्वारदोसदुमगहणो ।  
 सो होइ सयलतिहुयणजीवाण विलक्खणो देवो ॥२८७२॥  
 जो उण जियसाहारणजीवसरूवेहिं संजुओ होइ ।  
 सो कह नीसाहारणदेवसरूवत्तणं लहइ ? ॥२८७३॥

अहिलसइ जहा पुरिसो विसए तह चव तिरियजीवो वि ।  
 ता नायं पसुधम्मा विसया कह सेवए देवो ? ॥२८७४॥  
 जुज्झंति कोहवसगा आउहहत्था नरा तहा तिरिया ।  
 इय पसुधम्मो कोहो कह सो देवस्स संभवइ ? ॥२८७५॥  
 अह होति राग-दोसा देवस्स वि ता न याणिमो अम्हे ।  
 देवाणं पसूणं पि य सुहुमं पि तयंतरं एत्थ ॥२८७६॥  
 तम्हा गय-चक्क-तिसूल-धणुहहत्थाण कह णु देवत्तं ? ।  
 आउहचिण्हपयासियकोहाण भवाभिनेदीण ? ॥२८७७॥  
 ता सव्वन्नू देवो पसत्तकिरिओ पसंतरूवो य ।  
 आराहिज्जइ सययं असेसकम्मक्खयनिमित्तं ॥२८७८॥  
 आराहणाउवाओ तस्स ससत्तीए वन्निओ समए ।  
 अच्चंतभावसारं तस्साणासेवणं जमिह ॥२८७९॥  
 तं नत्थि भुयणमज्जे पूयाकम्मं न जं कयं तस्स ।  
 जेणेह परमआणा न खंडिया परमदेवस्स ॥२८८०॥  
 आणाखंडणकारी जइ वि तिकालं महाविभूर्इए ।  
 तं पूयइ गयरायं सव्वं पि निरत्थयं तस्स ॥२८८१॥  
 जह कीरंती आणा होइ सुवेज्जस्स वाहिखयहेऊ ।  
 आरोग(ग्ग)सुहफलो तह जिणाण आणा वि एमेव ॥२८८२॥  
 गुरुकम्मवाहिनासं अच्चंताबाहसुहमहारोगं ।  
 तित्थयराणं आणा कीरंती कुणइ भवियाणं ॥२८८३॥  
 आणा जिणाण एसा जम्म(म्)णुद्धाणं विसुद्धधम्मस्स ।  
 सो वि जिणेहिं भणिओ चउप्पयारो जहाकमसो ॥२८८४॥



षडमो दाणसरूवो बीओ उण विमलसीलनिम्माओ ।  
 तइओ(य)तवोमइओ भावणमइओ चउत्थो य ॥२८८५॥  
 एसो असेससुहमयविसेससुहुमत्थसंगओ धम्मो ।  
 तित्थयराणं आणा विसेसओ पालणीया य ॥२८८६॥  
 तस्साणापरिवालाणफलमेयं तेहिं चेव परिकहियं ।  
 वरदेवलोयगमणं तत्थ य नाणाविहा भोया ॥२८८७॥  
 दिव्वच्छरपरिवारो दिव्वविमाणाइं दिव्वरिद्धीओ ।  
 सुहसागरावगाढो अच्छइ बहुसागराऊसो ॥२८८८॥  
 चइऊण देवलोया उप्पज्जइ जाइ-रूव-कुलकलिओ ।  
 दीहाऊ रिद्धिजुओ सुपुन्नफलभायणं पुरिसो ॥२८८९॥  
 उवभुंजइ वरभोए वियक्खणो लद्धपरमधम्मो य ।  
 चारित्तधम्मजुत्तो अइरा सिद्धिं पि पावेइ ॥२८९०॥  
 इय तस्स समाराहाण-फलमिह भणियं मए समासेण ।  
 अणुसेविऊण एयं पावह तुम्हे वि परमपयं ॥२८९१॥  
 आयन्निऊण एयं रक्खस-नरनाह-नयरलोएहिं ।  
 तक्खणमेत्तविहाडियदुरंतगुरुमोहपडलेहिं ॥२८९२॥  
 निहयअकज्जासेवण-अन्नाणमहंधयारनिवहेहिं ।  
 आविब्भूयनिरंतरविसुद्धसमत्त(सम्मत्त)भावेहिं ॥२८९३॥  
 सिरिधरियकरयलंजलि-वुडोहिं नमिऊण परमभत्तीए ।  
 सव्वेहिं मुणी भणिओ 'इच्छामो तुम्ह अणुसडिं' ॥२८९४॥  
 तो रक्खसेण भणिओ अकलंको केवली इमं वयणं ।  
 'भयवं ! नाणदिवायर ! संदेहं मज्झ अवणेषु ॥२८९५॥

तं किन्न जन्न थाणसि असेससत्ताणचेट्टियं देव ! ।  
 परिकलियकेवलालोयतिहुयणो तह वि साहिस्सं ॥२८९६॥  
 अहमासि दिओ पुव्वि अन्नाणवसेण जन्नकिरियासु ।  
 विणिवाइयपसुनिवहो पयट्टियानाणधम्मो य ॥२८९७॥  
 तं मज्झ पुव्वदुकयं संपइ अहियं खुडुकुए हियए ।  
 सोऊण तुम्ह वयणं अंतोगयनइसल्लं व ॥२८९८॥  
 मुणिनाह ! तेत्तियस्स वि दाणस्स तवस्स जन(त्र)धम्मस्स ।  
 सग्गो किर जत्थ फलं संदेहो तत्थ मणुयत्ते ॥२८९९॥  
 ता नाह ! तुज्झ वयणं न अन्नहा सव्वमेव अन्नाणं ।  
 पुव्वुद्धिद्धो धम्मो अणुहवसिद्धो जओ मज्झ ॥२९००॥  
 पुण रक्खसेण व मए मुणिंद ! नरयावहाइं कूराइं ।  
 पावाइं सेविथाइं नाणाविहदुक्खहेऊणि ॥२९०१॥  
 सो समरसीहराया भुयणुवयारी मए गुणनिहाणं ।  
 विम्हरियपुव्वसुकएण मारिओ पावकम्मेण ॥२९०२॥  
 भयमेगस्स वि दिंतो लहइ भयं नरयमाइसु अणंतं ।  
 अन्नाणहएण मए तं दिन्नमणंतलोयाण ॥२९०३॥  
 पइदियहं चिय एसो पुरलोओ मह भएण संझासु ।  
 परिचत्तपुत्तमाई पलाइ असमंजसायारो ॥२९०४॥  
 हीणो हीणायारो हीणमई हीणदेवजाइत्ति ।  
 निवदिन्नपुरिसमारणकम्मेण कहं गओ रूढिं ? ॥२९०५॥  
 अज्ज पुणो परमेसर ! कुओ वि मह पुव्वपुन्नघडिएण ।  
 एएण कुमारेणं विबोहिओ विविहवयणेहिं ॥२९०६॥

संपइ पुण परिचत्तो पुरिसवहो निसि पुरे परिभ(ब्भ)व(म)णं ।

परपीडाइ असेसं कल्लाणसुमित्तवयणेण ॥२९०७॥

तुह दंसणेण मुणिवइ ! एन्हि पुण जायनिच्छओ धम्मे ।

इह पुव्वभवसमज्जियगुरुपावभएण भीओ म्हि ॥२९०८॥

ता एयाण निरंतर-नरयमहादुक्खकारणगुरूण ।

कह णु करिस्सामि अहं पज्जंतं पावकम्माण' ॥२९०९॥

तो तव्वयणविरामे भणइ मुणी सयलकेवलालोओ ।

'निसियरनरिंद ! निसुणसु सुसावहाणो तुह कहेमि ॥२९१०॥

चइऊण तमत्राणं अत्राणनिबंधणं च मिच्छतं ।

सम्मत्राणाहिगयं सेवसु जिणदेसियं धम्मं ॥२९११॥

गरहसु सम्मं मणसा इह-परलोएसु जायिं विहियाइं ।

पुव्वबहुदुक्कडाइं नरयनिवासेक्कहेऊणि ॥२९१२॥

सुविसुद्धभावमारुयपसरियअणुतावजलणजालाहिं ।

पज्जालिज्जइ सयलो बहुभवपाविंधणसमूहो ॥२९१३॥

एसो पच्छायावो दुक्कडकम्माण बहुभवकयाण ।

ओच्छयणं हि परमं अणवरयं तेण कायव्वो' ॥२९१४॥

तो भणइ रक्खसिंदो 'भयवं ! जं नरयकारणं पावं ।

तं कह निज्जरइ महं पच्छायावेण एक्केण ॥२९१५॥

जाव न तं अणुहूयं नरएसु गयागएहिं बहुएहिं ।

कह तस्स ताव अंतो होही मह दुकयकम्मस्स ?' ॥२९१६॥

पुण भणइ मुणिवरिंदो 'एवं न पिसायराय ! निसुणेसु ।

कम्माण जं विचित्तो परिणामो जिणमए भणिओ ॥२९१७॥

जं निम्मवियं कम्मं कूरज्झवसायसंगयमणेण ।  
अणवच्छिन्नदुरज्झवसाएणं पोसियं निविडं ॥२९१८॥  
तं जाव नाणुभूयं नरए बहुदिन्नदुक्खसंघायं ।  
कह तस्स ताव अंतो उवायलक्खेहिं वि हविज्ज ? ॥२९१९॥  
जं पुण अत्राणवसा असुहज्झवसायविरहियं होइ ।  
तं पावं न तहाविहदुक्खाणं कारणं होइ ॥२९२०॥  
तं सुगुरुसंगयोगा ववगयमोहंधयारभावेण ।  
पावमिइ जाणिऊणं पच्छायावाइसज्झंति ॥२९२१॥  
पच्छायावो एक्को न होइ दुक्कम्मनिज्जराहेऊ ।  
जाव न नाणसमेया संजाया चरणपडिवत्ती ॥२९२२॥  
जिणधम्मतत्तनाणं दुक्कडगरहा य सुक्क(क)डसेवा य ।  
गुणबहुमाणो सुहभावणाओ निहणंति दुक्कम्मं ॥२९२३॥  
ता रक्खसिंद ! एसो जिणधम्मो सयलसुहनिहाणं व ।  
कम्मविसपरममंतो भवविडविच्छेयणकुद्धरो ॥२९२४॥  
सग्गापवग्गउन्नयभवणारोहाहिरोहिणीदंडो ।  
केवलरविउदयगिरी तं किं जं नेस संभवइ ? ॥२९२५॥  
ता एत्थ चेव तुमए जिणधम्मे सव्वहा थिरमणेण ।  
समहियगुणजोगेणं महायरो होइ कायव्वो' ॥२९२६॥  
तो रक्खसेण भणियं 'भयवं ! अम्हारिसो अविरयप्पा ।  
भवउव्विग्गमणो वि य किं पालउ परमधम्मत्थं ?' ॥२९२७॥  
पुण भणइ मुणी 'निसियर!मा एवं भणसु अविरओ जमहं ।  
न चएमि चरित्तमयं धम्मं किर सेविउं सुद्धं ॥२९२८॥

पढमं पालसु सम्मं सम्मत्तं मोक्खविडविवरियं(?) व्व ।  
 करुणापहाणधम्मं पुण मन्नसु साहवो सुगुरू ॥२९२९॥  
 परिहर तिविहेण तुमं पासंडिपयासिए कुधम्मपहे ।  
 अन्नाणफला एए तुह अणुहवओ वि पच्चक्खा ॥२९३०॥  
 जे कूरज्झवसाया कम्माइं य जाइं तुज्झ कूराइं ।  
 वयणाइं कढोराइं परिहरसु तुमं असेसाइं ॥२९३१॥  
 होऊण पसंतप्पा कुणसु दयं सव्वभूयगामेसु ।  
 नियरिद्धि-सत्तिसरिसं पवयणउब्भावनं कुणसु ॥२९३२॥  
 इह साहु-साहुणीणं पुण सावय-सावियाण सत्तीए ।  
 कुरु पडणीयविघायं एसो संघो जओ पुज्जो ॥२९३३॥  
 कुणसु जिणाणं महिमं गरुयगुणमुणीण पक्खवायं च ।  
 एएण उवाएणं नित्थरिह(हि)सि भवसमुद्धमिणं' ॥२९३४॥  
 इय केवलिभणियमिणं वयणं सोऊण रक्खसो भणइ ।  
 'जं भणसि मुणिंद ! तुमं तह त्ति तमहं करिस्सामि ॥२९३५॥  
 तुह वयणं निसुयं चिय चउगइभवजलहितारयं होइ ।  
 किं पुणमजहत्थभणियाणुट्ठाणकयं न तं होइ ?' ॥२९३६॥  
 इय भणिउ(ऊ)णं विरए निसायरे भणइ नरवई एवं ।  
 'भयवं ! इह संसारे अम्हं उवयारिणो दोन्नि ॥२९३७॥  
 पढमं तुममुवयारी संसारमहाडवीनिवडियाण ।  
 पयडियसुधम्ममग्गो जाओ परलोयपक्खंमि ॥२९३८॥  
 इहलोइयंमि पक्खे संबोहियरक्खसो महासत्तो ।  
 भुयणस्स भयंतकरो पच्छ एसो महावीरो ॥२९३९॥

एयस्स दंसणेणं एयं सव्वं पि अम्ह संजायं ।  
 पुर-जणवयाण संती मुणिंद ! तुह दंसणं परमं ॥२९४०॥  
 परमत्थेणं भयवं ! एसेस असेसगुणगणनिहाणं ।  
 इह-परलोए अम्हं कुमरो कल्लाणमित्तो त्ति ॥२९४१॥  
 ता सुत्थिओ म्हि जाओ इहलोए कुमरदंसणेणेव ।  
 परलोयसुत्थिओ उण तुम्ह पसाएण होइस्सं ॥२९४२॥  
 पढमं चिय आइडुं नीसेसं भयवया जहाकिच्चं ।  
 ता देहि मे मुणीसर ! गिहि(ह)त्थधम्मोच्चियवयाइं ॥२९४३॥  
 तो गुरुणा सविसेसं पुणो वि आचि(च)क्खिऊण वित्थरओ ।  
 निव-परियण-पउराणं गिहिधम्मवयाई(इं) दिन्नाइं ॥२९४४॥  
 सकयत्थं अप्पाणं मन्नंतेहिं व्व तेहिं सव्वेहिं ।  
 पंचनमोक्कारसमं गहियाणि अणुव्वयाईणि ॥२९४५॥  
 अणुसासिया य गुरुणा नरिंदमाई बहुप्पयारं च ।  
 एत्थंतरंमि भणिओ निसायरो पुण कुमारेण ॥२९४६॥  
 'तुह अणुमईए संपइ पविसउ राया सपरियणो नयरं ।  
 पुरलोओ वि निसायरकयत्थिओ निसि पवासेण' ॥२९४७॥  
 तो रक्खसेण भणियं 'अज्जपभिइं गुरूण पच्चक्खं ।  
 निरुवइवं नरिंदो निवसउ नयरे पयासहिओ ॥२९४८॥  
 परिहरिया अत्रेसु वि भूएसु मए कुमार ! परपीडा ।  
 साहम्मिएसु किं पुण नरिंदमाईसु न चइस्सं ?' ॥२९४९॥  
 तो राइणा कुमरो परमायरपत्थणाए उवर(रु)द्धो ।  
 दक्खिन्नभंगभीरू चलिओ सह तेण निवभवणं ॥२९५०॥

तो वंदिऊण भयवं राया पुर-जणवओ कुमारो य ।  
 कयभवणहट्टसोहं निबद्धबहुतोरणसमूहं ॥२९५१॥  
 ऊसियधयासहस्सं गंधोदयसमियमग्गरयपसरं ।  
 रंगावलीविराइय-सुंदरभवणंगणदुवारं ॥२९५२॥  
 आणंदियसयलजणं पारंभियतिय-चउक्कपेच्छणयं ।  
 पयपयलोयवियप्पियकुमारसुव्वंतआसीसं ॥२९५३॥  
 एवंविहं निरंतरपहरिसवसजायपुलयलोयघणं ।  
 पविसइ पुरं सुणंतो विलयाण परोप्परालावे ॥२९५४॥  
 'एसो सो रायसुओ जो दिट्ठो तत्थ रत्तमज्झंमि ।  
 खग्गसहाओ धीरो' इय एगा भणइ मुद्धमुही ॥२९५५॥  
 दट्ठूण कुमरमेगा उट्ठं आमीलियंगुलि-करग्गा ।  
 आमोडिऊण अंगं पयडइ कुमरंमि अणुरायं ॥२९५६॥  
 पच्चंगपलोइयवीरसेणअणुरायपरवसा एगा ।  
 'हत्थी हत्थि'त्ति सहीए का वि पडिबोहिया तरुणी ॥२९५७॥  
 'एसेस वीरसेणो'त्ति का वि सुणिऊण तरलमण-नयणा ।  
 कज्जल-सलाय-दप्पणहत्था धावेइ पहहुत्तं ॥२९५८॥  
 'जो चिंतिओ मणेण वि रक्खो धीराण कुणइ संतासं ।  
 अच्छरियमिणं कह सो वि बोहिओ किर कुमारेण ॥२९५९॥  
 अच्छब्भुवो पहावो इमस्स सहि ! पेच्छ जेण लोयाण ।  
 रक्खसभयमेव न तं संसारभयं पि निम्महियं' ॥२९६०॥  
 इय नाणाविहवइयरनिरंतरं तं पुरं विलोयंतो ।  
 पत्तो कमेण कुमरो सनरवई रायभवणांमि ॥२९६१॥

सयमेव विस्ससेणो पाययपुरिसो य संभमाइसया ।  
 लुहुदुक्खुडं(?)पयासइ सिणेहसारं कुमारंमि ॥२९६२॥  
 तो ण्हाण-देवयच्चण-भोयणमाईणि सव्वकम्माणि ।  
 काऊणं अवरणहे गया दुवे गुरुसमीवंमि ॥२९६३॥  
 अकलंकमुणिवरेण वि समओच्चि(चि)यधम्मदेसणापुव्वं ।  
 अणुसासिया पविट्ठा पुणो वि ते नयरमज्झंमि ॥२९६४॥  
 इय एवं अणवरयं पहाय-अवरणहसमयमासज्झ ।  
 सेवंताण मुणिंदं कई वि दियहा अइक्कंता ॥२९६५॥  
 थिरियरणं संजायं जिणिंदधम्मंमि वीरसेणस्स ।  
 सम्मं नाणाहिगमो जहत्थसंसारवित्राणं ॥२९६६॥  
 तो नाऊण कुमारो परिणयधम्मं नरिंदमुच्छुक्को ।  
 अकहंतो अन्नदिणे विणिग्गओ विस्ससेणस्स ॥२९६७॥  
 नाणाविहनयरविसेस-गाम-पुर-दोण-दुग्ग-गहणेसु ।  
 चंदसिरिमन्निसंतो परियडइ धरायलं वीरो ॥२९६८॥  
 अणवरयपयाणयसयल-लंघियासेसपुहइवित्थारो ।  
 पत्तो समुद्धतीरं वणराइविराइयं कुमरो ॥२९६९॥  
 पेच्छइ पसारियच्छो अगोयरं जमिह लोयण-मणाण ।  
 परमपयं व्व जलनिहिं निच्चानिच्चं अगम्मं च ॥२९७०॥  
 खेयरहियचंदसिरी-दिन्नवयासत्तणेण लज्जाए ।  
 उयहिमिसेण अणंतं मन्ने गयणं पिव विलीणं ॥२९७१॥  
 गुरुकल्लोलदुगंतर-दूरसमुच्छलियमीणसंघाओ ।  
 अहरोइंतरनिग्गयजीहानिच्च(व)हो व्व लिहइ नहं ॥२९७२॥



जाओ न निच्छओ मे वित्थरियनहंतराल-जलहीण ।  
 गयणं व जलहिणा किं गसिओ जलहि व्व गयणेण ? ॥२९७३॥  
 एयाहिंतो वि परं तिहुयणमवि दुत्थियं ति मह बुद्धी ।  
 रयणाभिलासओ जं दरिद्वतियसेहिं निम्महिओ ॥२९७४॥  
 किं तस्स अवहडं किर सुरेहिं विफु(प्फु)रइ जस्स भुयणंमि ।  
 अज्ज वि ससहरजोण्हामिसेण सयकित्तिवित्थारो ॥२९७५॥  
 सायर-निसायराणं सलहिज्जइ सव्वहा पिइ-सुयत्तं ।  
 एक्को जोण्हाए जयं भरेइ अन्नो जलोहेण ॥२९७६॥  
 जो च्विय नीयपएसो सो च्वेय खणेण उन्नओ होइ ।  
 संसारे व्व इमंमि वि अथिरो निन्नयविभागो ॥२९७७॥  
 कह नाम वियारिज्जइ माहप्पं तस्स जं असामन्नं ।  
 जस्सत्थेहिं घणेहि वि होइ जयं सुत्थियमसेसं ॥२९७८॥  
 भीरुपरित्ताणगुणो अणेण आरोविओ निओ दूरं ।  
 दलियकुलसेलकुलिसा मेणायं रक्खयंतेण ॥२९७९॥  
 अन्नगरुयाण एसो उवमाठाणं जए गुरुत्तेण ।  
 एयस्स पुणो भुयणे उवमा एसो च्विय, न अन्ने ! ॥२९८०॥  
 सकुलीर-मीण-मयरे तारायण-रयणपूरिए एसो ।  
 नीलमणिदप्पणनहे संकंतं निअइ अप्पाणं ॥२९८१॥  
 एयस्स पुव्व-दाहिण-अवरु-त्तरदिसिविभायभमियस्स ।  
 मेरुगिरिकूवखंभा(भो) पुहई नाव व्व पडिहाइ ॥२९८२॥  
 इय दट्ठूण समुद्धं चित्तइ 'जह मज्झ तह इमस्सावि ।  
 अंतो कल्लोलाणं हियचंदसिरिस्स नो अत्थि ॥२९८३॥

किं संपद् कायव्वं ? एत्तियमेत्तं समागओ मग्गं ।  
 नो दिद्वा चंदसिरी समीहियं मह न संपन्नं ॥२९८४॥  
 हा ! निष्फलो पयासो कइया वि न जं मए सुयमउव्वं ।  
 दइयाअदंसणेणं तमागयं मज्झ हलुयत्तं ॥२९८५॥  
 पुव्विं सउणबलेणं पच्छअ अकलंककेवलिबलेणं ।  
 एत्थागओ न सिद्धं समीहियं, अवितहा ते वि ॥२९८६॥  
 विहडंति कह वि सउणा देसाइविवज्जएण दुल्लक्खा ।  
 पाहाणरेहसरिसं केवलिवयणं न विहडेइ' ॥२९८७॥  
 इय एवं जा कुमरो जा चिंतइ रयणायरस्स तीरंमि ।  
 ता तत्थ चेव समए जं जायं तं निसामेह ॥२९८८॥  
 नासिकूपुरे पुव्विं गयणे विज्जाहरो कमलकेऊ ।  
 कुमरेण मारिओ तो तस्सत्थि सहोयरो भाया ॥२९८९॥  
 नामेण पवणकेऊ बहुविहविज्जासमिद्धिसंपन्नो ।  
 मायावी नाणाविहमायासंगामविन्नाया ॥२९९०॥  
 सोऊण सो असेसं वइयरमह भाउमारणाईयं ।  
 पलयानलोव्व सहसा कुविओ सिरिवीरसेणस्स ॥२९९१॥  
 'जइ कह वि तुडिवसेणं लहेमि तं बंधुघायणं सत्तुं ।  
 ता विज्जवेमि एयं कोहगिं तस्स रुहिरेण' ॥२९९२॥  
 इय चिंतिऊण चलिओ गवेसिउं खेयरो पवणकेऊ ।  
 सिरिवीरसेणकुमरं कमेण नासिकूमणुपत्तो ॥२९९३॥  
 नाऊण तत्थ सुद्धिं चंदसिरी-वीरसेणपडिबद्धं ।  
 दिद्दो न तत्थ पावो मज्झ भएणं व्व सो नड्डो ॥२९९४॥

ता तं कह पेच्छिस्सं विसालवसुहायले परिभमंतं ? ।  
 इय चिंतावसवत्ती अहियं सो दुक्खिओ जाओ ॥२९९५॥  
 मुणिरुण तक्खणं च्चिय विज्जासामत्थओ पवणकेऊ ।  
 पत्तो समुद्धतीरं कोवारुणलोयणो रोद्धो ॥२९९६॥  
 तो तेण तत्थ दिट्ठो दुद्धरिसो पवणकेउणा कुमरो ।  
 असरिसपहावहुयवहसहस्सजालाहिं व जलंतो ॥२९९७॥  
 एगो वि अणेगेहिं व सुहडसहस्सेहिं परिगओ सहइ ।  
 दुद्धरिसतेयभासुरसरीरबंधो महावीरो ॥२९९८॥  
 पेच्छइ विम्हयवियसंतनयणभालाहिरूढभूजुयलो ।  
 सो कुमरं रणसंकाघडियायसपट्टबंधो व्व ॥२९९९॥  
 दट्ठुण गिम्हदूसहमज्झण्हजलंततेयभाणु व्व ।  
 सो खेयरो सखेयं तं दट्ठुं इय विचितेइ ॥३०००॥  
 'लहइ च्चिय माहप्पं लहुओ वि रिऊ गुरुहिं सह भिडिओ ।  
 असरिससत्तिनिहाणं वज्जो व्व महामहिहरेहिं ॥३००१॥  
 निज्जीवो वि हु पज्जलइ तेयंसिपयावसंकमवसेण ।  
 तरणिकिरणाणुसंगी सुनिच्छियं सूरकंतो व्व ॥३००२॥  
 भुयणाहियवीरियकमलकेउविणिवायलद्धमाहप्पो ।  
 अज्ज वि तक्कोवानलसंगजलंतो व्व पडिहाइ ॥३००३॥  
 पोढंगणापसंगे सत्तुविणासे य भिन्नसंधाणे ।  
 विसमट्टिए य कज्जे हवंति गरुया थिरारंभा ॥३००४॥  
 ता संपइ सत्तुवहो कायव्वो सो य अप्परक्खाए ।  
 कीरंतो विबुहाणं पसंसणीओ जओ होइ ॥३००५॥

इहरा अप्पविणासो अप्पविणासे य सत्तुजयसिद्धी ।  
 ता अणुवायपयट्ठो पुरिसो नासेइ अप्पाणं ॥३००६॥  
 अप्पजओ रिउनासो एत्तियमेत्ता जयंमि किर नीई ।  
 एयस्सु(स्स उ)भयकरणे नीई(इ)सत्थाइं पसरंति ॥३००७॥  
 एसो वि महासत्तू दिट्ठाणत्थो य बंधुनासे य ।  
 ता हक्किओ डुवेही संदेहतुलाए मह जीयं ॥३००८॥  
 जो भूमिगोयरो वि य विज्जुखित्तेण तेत्तियं दूरं ।  
 उट्ठइ मारइ सत्तुं सो किं वसुहाए असमत्थो? ॥३००९॥  
 ता एत्थ चिंतियव्वो सो उ उवाओ य जेण नियरक्खा ।  
 एयस्स वहो जायइ न अन्नहा एस परमत्थो ॥३०१०॥  
 अप्पा न दंसियव्वो इमस्स जं होइ एस सासंको ।  
 संकियचित्तो जम्हा काओ वि हु दुव्वहो होइ ॥३०११॥  
 सासंको न छलिज्जइ अवायरक्खानिरुविओवाओ ।  
 नीसंको निरुवाओ रिऊ सुवज्झो जिगीसूण ॥३०१२॥  
 कालन्नुणो अवस्सं माया माया व कुणइ उवयारं ।  
 वैरिवहविरहिया उण न घडइ एसा वि अन्नत्थ ॥३०१३॥  
 पयडइ लाह(हं) धम्मे सा माया सुहडाणं व सुपउत्ता ।  
 अहिएसु जइ न कीरइ ता एसा हंति त्रि(नि)व्विसया ॥३०१४॥  
 ता जाव निव्विसंको एसो रयणायरेक्कमण-नयणो ।  
 ता विज्जासत्तीए करेमि एयस्स अवयारं ॥३०१५॥  
 एसो वि मह करेही पज्जंतो सायरो वि सत्तेज्झं ।  
 इय चिंतितुं अलक्खो खेयरो अवयरइ कुमरंमि ॥३०१६॥

कुमरो वि जाव पेच्छइ रयणायरमायरेण नीसंको ।  
 ता झत्ति समुच्छलिओ पयंडपवणो दुरहियासो ॥३०१७॥  
 उम्भूलंतो दूरं वेलावणसंडमंडलिं गयणे ।  
 उड्डं समुक्खणंतो खोणीहरसिहरसंघायं ॥३०१८॥  
 घणरेणुपिहियगयणो मन्नइ उवरिड्डियं वि दुमनिवहो? ।  
 कुमरो रयपिहियच्छे पायालगयं व अप्पाणं(?) ॥३०१९॥  
 नियइ व्व धरावलथं गयणग्गविलग्गवीइवित्थारो ।  
 उव्वत्तमीणनयणो पलयभएणं व मयरहरो ॥३०२०॥  
 एत्थंतरंमि कुमरो चिंतइ हियए अजायरिउसंक्को(को) ।  
 'अउरूवं व सरूवं पेच्छमि किमेयमच्छरियं? ॥३०२१॥  
 अहवा किं चिंताए ? सायरतीरं समासयं होइ ।  
 नीसेसभयंतकरं झाएमि अहं नमोक्कारं' ॥३०२२॥  
 जा चिंतइ परमत्थं परमक्खरसंगयं परममंतं ।  
 ता झत्ति नियसमीवे निवडंतं नियइ तरु-सेले ॥३०२३॥  
 पवणुच्छलियघणसाहिकुसुमवरिसो नहाउ कुमरंमि ।  
 निवडइ विहलीकयवैरिविजयसंसी सुरधओ व्व ॥३०२४॥  
 निव्व(व)डंति निरंतरपूरियंबरा गुरुरएण जे गिरिणो ।  
 ते पाविऊण कुमरं कुलिसं व खणेण विहडंति ॥३०२५॥  
 इय पवणकेउणा विरइयंमि विज्जाबलेण अवयारे ।  
 अक्खुहियहिययधीरो चिंतइ कुमरो वि अविसाई ॥३०२६॥  
 'एए गिरिणो गयणे तरुणो य निरंतरं न पयइत्था ।  
 खयकालसंसिणो वा मह दुक्कयकम्मजणिया वा ॥३०२७॥

खयकालसंभवो न हि दूसमदुसमाए जेण सो कहिओ ।  
 नियकम्मपरिणई उण संसारत्थाण संभवइ ॥३०२८॥  
 इह पुव्वभवसमज्जियअइनिविडदुकम्मजालवडियाण ।  
 न हि कम्मविवररहिओ मोक्खो मीणाण व जियाण ॥३०२९॥  
 इहलोए दुक(क्कु)म्मं तमेव मह जं हओ कमलकेऊ ।  
 नरसीहस्स उ एवं सामत्थो कह णु संभविही (?) ॥३०३०॥  
 'मं रक्खसु'त्ति भयविहलपरवहूसीलपाणरक्खद्धा ।  
 तत्थासि निमित्तमहं सो उण निहओ दुकम्मेण ॥३०३१॥  
 केत्तियमेत्तं च इमं परनारिपसंगओ बहं होइ ।  
 नरयंमि जलंतायसनारीआलिंणणाइ दुहं ॥३०३२॥  
 ता इहलोए पावं तमेव मह केवलं न उण अन्नं ।  
 परलोइयपावाइं सव्वन्नू जइ परं मुणइ ॥३०३३॥  
 ता एवमहं जाणे, बंधू तस्सेव कमलकेउस्स ।  
 को वि भविस्सइ नूणं तव्वेरमणुसरंतो मे ॥३०३४॥  
 कुणइ विणिवायणत्थं गुरुगिरि-तरुनियरपाडणं अहवा ।  
 अविद्याणियपरमत्थो नाहमिणं चिंतइस्सामि ॥३०३५॥  
 अविणिच्छियं न कज्जं चित्ते वि धरंति उत्तमा पुरिसा ।  
 निच्छइए वि हु कज्जे पसरंति न ताण वाणीओ' ॥३०३६॥  
 इय जाव वीरसेणो चिंतइ ता गिरिवरं महाकायं ।  
 नीसेसपिहियमहियलमेक्कुं आलोवए उवरिं ॥३०३७॥  
 सिहरंतज्जरंतोज्जरनिविडयरपडंतवारिधाराहिं ।  
 उच्छाइयगयणयलं खयकालघणं व्व अइघोरं ॥३०३८॥

तलनिग्गयविवरदरीपडंतदीसंतसत्तसंघायं ।  
 रयवडण-विसममारुयनिवाडिओ<sup>१</sup>वंततरुगहणं ॥३०३९॥  
 दट्ठूण तं गिरिंदं निरुद्धनीसेसतरणकिरि(र)णोहं ।  
 वेएण निवडमाणं किमेयमिइ चिंतइ अखुद्धो ॥३०४०॥  
 निवडंतो चिय दीसइ एसो मह उवरि पव्वओ गरुओ ।  
 ता को एत्थ उवाओ हणेमि किं मुट्ठिपहरेण? ॥३०४१॥  
 नो मुट्ठिपहारेणं एदहमेत्तो धराहरो अहवा ।  
 पुहइदियंत-[वि]निग्गयसिहरसओ ज्झंपियनहंतो ॥३०४२॥  
 ता एस भुयणसाहारणो व्व मच्चूऽ(च्चू अ)सक्कपडियारो ।  
 मज्झ विणिवायणत्थं उवट्ठिओ निच्छियं सेलो' ॥३०४३॥  
 इय चित्तिऊण कुमरो उद्धच्छो जाव पेच्छइ गिरिंदं ।  
 ता तस्स सिराओ तलंतनिग्गयं नियइ दरिविवरं ॥३०४४॥  
 भवियव्वयावसेणं दीहाउत्तेण वीरसेणस्स ।  
 अविचित्तीयकम्माणुहावओ पुत्रजोएण ॥३०४५॥  
 तह संठिओ कुमारो उज्जुयमारोहिऊण दरिविवरं ।  
 जह मणयं पि न च्छित्तो निवडंतेणावि सेलेण ॥३०४६॥  
 गुरुसेलवडणवसुहानिहायनिग्घोसभयसभुब्भंता ।  
 पलयंतविरसरसिया संजाया जलहिजलजीवा ॥३०४७॥  
 तेदहमेत्तो वि गिरी मडहो व्व महीयलंमि तलखुत्तो ।  
 कुमरावयारसंभवलज्जाए व लाहवं पत्तो ॥३०४८॥  
 तत्थंतरे कुमारो अक्खयदेहो दरीमुहेणेव ।  
 उड्ढं गंतूण ठि(ठि)ओ गिरिंदसिहरग्गचूलाए ॥३०४९॥

१. उपांतर, खंता. टि. ।

अह चिंतइ पुण हियए कुमरो 'जम्मंतरं व मह जायं ।  
 अहह ! महामाहप्यं पंचनमोक्कारमंतस्स ! ॥३०५०॥  
 किं चोज्जं जं परमेद्धिमंतसुमरणअचित्तमाहप्पा ।  
 विहडंति आवयाओ गिरिंदगरुयाओ वि नराण ! ॥३०५१॥  
 तं जयइ भुयणगरुयं सासणमणहं जिणिंदवदाण ।  
 लद्धूण जस्स सत्तामेत्तं पि नरा न सीयंति ॥३०५२॥  
 ता गाढमभिनिविद्धो कोइ रिऊ गरुयसत्तिमंतो य ।  
 छलमारणंमि सत्ती अहवा भण केरिसी तस्स ? ॥३०५३॥  
 साणो वि पेड्डओ धाविऊण भक्खेइ तस्स का सत्ती ?  
 ता नायं नेस रिऊ निक्कारिमविक्रमो सुहडो ॥३०५४॥  
 जाणामि सत्तिमंतो जइ पयडं देइ दंसणं मज्झ ।'  
 इय चित्तिऊण कुमरो गंभीरसरं समुल्लवइ ॥३०५५॥  
 'भो! भो! तुमं भणिस्सं जो वा सो वा भवेसु अप्पाणं ।  
 जयपयडसत्तिणा पयडियं पि कह तं तिरोहेसि ॥३०५६॥  
 एयाए असमसत्तीए तुज्झ एयं असंगयं एक्कं ।  
 जं नासि रणे समुहो ता किं नु तुमं अदडुव्वो? ॥३०५७॥  
 ता ठाहि सवडहुत्तो पयडसु अप्पं खणंतरं एत्थ ।  
 एण्हि चेव पयडुओ(उ), तुह मह वा जयजसपयारो ॥३०५८॥  
 मंतीण परं मंतो अदिद्धसमराण होइ बहुमाओ ।  
 आयट्ठंति हढेणं लच्छिं पुण संगरे सुहडा' ॥३०५९॥  
 इय जा कुमरो सायरपडिसद्वनिहेण भणइ सद्देण ।  
 ता पवणकेउणा वि य नियचित्ते संकियं सभयं ॥३०६०॥



दीवोव्व पयंगेणं गरुडो व्व भुयंगमेण सीहो व्व ।  
 हरिणेण खेयरेणं भयतरलच्छेण सो दिट्ठो ॥३०६१॥  
 'हा! हा! कहं विवन्नो न एस एवंविहेहिं वि बहूहिं ।  
 तियसासुर-सिद्धाणं भयहेउमहोवसग्गेहिं ? ॥३०६२॥  
 नो भूमिगोयराणं नराण एवंविहाओ सत्तीओ ।  
 अच्चुं(च्य)ब्भुयप्पहावो अइसयसत्ती इमो को वि ॥३०६३॥  
 ता जुत्तमेव मायाजुज्झं अणुचिद्धियं मए पुव्विं ।  
 इहरा इमस्स समुहो होंतो म्हि तणं व जलणंमि ॥३०६४॥  
 तो बुद्धिमं च्छलिज्जइ बुद्धी पुरिसस्स आउहमखीणं ।  
 वज्जं पि नणु विलिज्जइ सुबुद्धिसन्नाहसहियस्स ॥३०६५॥  
 ता एस पेच्छइ न मं मएणुमाणेण निच्छियं एयं ।  
 इहरा वाहरइ कहं 'इट्ठुक्केइ न सम्मुहो मज्झ' ? ॥३०६६॥  
 इय तुडिगए वि कज्जे विसेसओ पोरुसं न मोत्तव्वं ।  
 जं मंदसाहिया किर किच्चा सवडमु(म्मु?)ही होइ ॥३०६७॥  
 ता पक्खिवामि एयं घणतिमि-सुसुमार-मयरपउरंमि ।  
 रयणायरंमि पावं अप्पडियारे रउदंमि ॥३०६८॥  
 तत्थाऽवस्सं मरिही खंडाखंडीकओ जलयरेहिं ।  
 अहयं पुण वेयह्णं वच्चामि इओ पएसाओ' ॥३०६९॥  
 इय जाव पवणकेऊ चिंतइ ता वीरसेणकुमरो वि ।  
 असुयपडिउत्तरवसा विलक्खचित्तो विचिंतइ ॥३०७०॥  
 'किं कुणउ पोरुसं मह अदिट्ठसत्तुंमि अवयरंतंमि ।  
 एवं भणिओ वि न जो निल्लज्जो पयडए अप्पा? ॥३०७१॥

चिंततो(न्तो) च्विय एवं पयंडपवणुच्छलंतगुंजाहिं ।  
 उक्खित्तो खग्गकरो कुमरो खयरो व्व गयणंमि ॥३०७२॥  
 'एए दीसंति तरू एण्हि वणराइमेत्तमच्छरियं ।  
 तीरं च्विय सव्वत्तो अपाररयणायरो नवरं ॥३०७३॥  
 ता अवहरिओ संपइ तेणेव दुरासएण रिउणाऽहं ।  
 नूणं महासमुद्धे खिविही' इय चिंतइ कुमरो ॥३०७४॥  
 'को नाम तस्स दोसो निययच्चिय कम्मपरिणई एसा ।  
 अविवेय(यि)णो हि पुरिसा, परस्स रूसंति मूढप्पा ॥३०७५॥  
 अन्नो न एत्थ सत्तू न य मित्तो होइ किंतु अप्पेव ।  
 तब्भावभाविओ खलु अप्पंमि रिऊ य मित्तो य ॥३०७६॥  
 तेलोकुमेव सत्तुत्तणेण परिणवइ दुडुहिययस्स ।  
 तं चेव सुद्धहिययस्स होइ नियबंधवसरिच्छं ॥३०७७॥  
 एयंमि मएऽवस्सं अवयरियं तेण अम्ह एसो वि ।  
 अवयरइ जेण सत्तू न होइ निक्कारणो कोइ ॥३०७८॥  
 ता सहियव्वं संपइ सव्वं अविसाइणा जहोवणयं ।  
 नाऊणं च गुरूहिं(हि)वि 'अविसाई होज्ज' इय भणिओ ॥३०७९॥  
 अलमन्नचित्तिएणं चिंतामि तमेव जं असामन्नं ।  
 भवजलहिपोयभूयं तिलोयबंधुं नमोक्कारं' ॥३०८०॥  
 इय एवं चिंततो अदीणहियओ समुक्खओ दूरं ।  
 अविभावियवसुहा-जलहिवित्थारो खयरविज्जाए ॥३०८१॥  
 पेच्छइ अप्परिफुडजीवलोयधूमंधयारियं गयणं ।  
 पणत्ती(ती)सजोयणुच्चं अक्खुहियमणो महासत्तो ॥३०८२॥

अच्छेडिरुण मुक्को कयवहुत्थामाए खयरविज्जाए ।  
 जह खणमेत्तेणं चिय रएण पडिओ समुद्धंमि ॥३०८३॥  
 रयवडण-समुच्छालिय-गयणग्गविलग्गउड्डवारिमिसा ।  
 दुड्डविज्जाए तुरिओ जलहि व्वऽणुमग्गओ लग्गो ॥३०८४॥  
 अइवेगवसेण गओ कुमरो रयणायरस्स दूरतले ।  
 अद्धक्कोसपमाणे अणाउलो जलहिहेद्धंमि ॥३०८५॥  
 अह कम्म-धम्मजोगा अचिंतसामत्थकम्ममाहप्पा ।  
 कुमरो नियइवसेणं अफंसिओ जलहिसलिलेण ॥३०८६॥  
 पेच्छइ अछिक्कुमुयएण जलहिणो फलिहनिम्मयं तत्थ ।  
 सव्वंगसुंदरं भवणमेगमसुरिंदभवणं व ॥३०८७॥  
 रम्मत्त-सुयंधत्तणं-सिसिरत्तगुणेहिं जं कहेइ व्व ।  
 सिरि-पारियाय-ससहरविलासवसहित्तणं निययं ॥३०८८॥  
 तं पेच्छिरुण कुमरो विम्हयवियसंतलोयणो चित्ते ।  
 चिंतइ 'किं किं नु इमं अच्छरियमइड्डुपुव्वं मे ? ॥३०८९॥  
 रयणायरस्स गद्धे भवणमच्छिक्कुं च जलहिसलिलेण ।  
 किं संभवइ असंभवमहवा गच्छामि ता पुरओ' ॥३०९०॥  
 जा जाइ तत्थ पुरओ ता पेच्छइ दारसंठियं एगं ।  
 जरजज्जरंगजुवई वरखेडय-खग्गकयपाणि ॥३०९१॥  
 दट्ठूण तं कुमारो हिट्ठो हियएण चिंतए एवं ।  
 'एयं चिय पुच्छिस्सं वइयरमेयस्स भवणस्स' ॥३०९२॥  
 तो फुरियदाहिणच्छो अनिमित्ताणंदपुलइयसरीरो ।  
 अणुकूलसउणपेरियहियओ तन्नियडमणुपत्तो ॥३०९३॥

गंतूण तेण भणियं 'नमामि ते अम्ब ! कुसलणी तं सि?।

को एस तुज्झ कालो खग्गगहणस्स वुड्ढत्ते ? ॥३०९४॥

निहणसु दुक्कम्मरिऊ गहिऊणंगे सुधम्मसन्नाहं ।

खमखग्गपहारेणं संवरफरणण पिहियतणू' ॥३०९५॥

सोऊण इमं वयणं कुमरस्सासीसदाणपुव्वं च ।

सा भणइ 'पुत्त ! एवं न अब्रहा जं तए भणियं ॥३०९६॥

काउं तीरइ धम्मो न पराहीणेहिं(हि) मारिसज्जणोहें ।'

तो भणइ पुणो कुमरो 'कहेहि मह कस्स भवणमिणं?' ॥३०९७॥

किं वा समुद्धमज्जे को निवसइ एत्थ ? किं तुमं दारे ।

कस्स व भएण चिद्धसि खग्गकरा सावहाणा य ?' ॥३०९८॥

तो भणइ बंधुजीवा 'किं तुज्झ कहेमि पुत्त!?' न हु अंतो ।

विहिविलसियाण बहुविहघडंत-विहडंतरूवाण' ॥३०९९॥

नयणंतपधोलिरवाहसलिलपिसुणियविसेसदुक्खाए ।

भणियं सग्ग(ग)ग्गयक्खरमिमीए दीहयरमूससिउं ॥३१००॥

'पुच्छसि तुमं ति भणिउं साहिप्पइ अकहणिज्जमवि कज्जं ।

जम्हा कल्लाणागिई(इ)निवेसओ दिव्वपुरिसो सि' ॥३१०१॥

तो भणइ वीरसेणो 'अंब ! मए ठाविया सि गुरुदुक्खे ।

पुच्छंतेण असेसं भवणाई-निउणवुत्तंतं' ॥३१०२॥

तो भणइ पुणो वुड्ढा 'पुत्तय ! तुह दंसणेण मह जाओ ।

नीसेसबंधुसंगमउइओ व्व विसेसपरिओसो ॥३१०३॥

ता निसुणसु वेयड्ढे उत्तरसेढीए गयणसेहरए ।

नयरे खेयरराया चित्तगई नाम त्तभज्जा(तब्भज्जा) ॥३१०४॥

भाणुमई नामेणं ताण असोउ ति अत्थि पियपुत्तो ।  
 नीसेसकलाकुसलो चाई सूरु गुणवू य ॥३१०५॥  
 सो अन्नया भमंतो नासिकूपुरं गओ विवाएण ।  
 दिट्ठा य तत्थ तेणं विचित्तजसराइणो धूया ॥३१०६॥  
 चंदसिरी नामेणं तिस्सा अणुरायपरवसमणेण ।  
 अन्नासत्ता तेणं उज्जाणवणाओ अवहरिया ॥३१०७॥  
 गच्छंतेण य गयणे पुट्ठो विज्जाहरो मुणी तेण ।  
 'भयवं ! कि(किं) मह एसा पाविही(हिइ) थिरत्तणं नारी?' ॥३१०८॥  
 मुणिणा पडिभणिओ सो 'असोय ! समरंमि वीरसेणेण ।  
 गहियच्चा वरतरुणी तुज्झ सयासाओ अचिरेण' ॥३१०९॥  
 तो सो भयसंभंतो 'नत्थि असज्झं ति वीरसेणस्स' ।  
 चिंतंतो परिभमिओ असेसवसुहं विमाणगओ ॥३११०॥  
 'नत्थि अइगूढथाणं एद्वहमेत्ताए हंत वसुहाए ।  
 जत्थ किर गोविऊणं चंदसिरिं तस्स रक्खेमि' ॥३१११॥  
 इय चिंतिऊण तेणं विज्जासामत्थओ इह समुदे ।  
 एयं अलक्खभवणं विणिम्मियं सलिलमज्झंमि ॥३११२॥  
 अच्चुच्चसत्तभूमियमच्चुज्जलफलिहनिम्मियं विमलं ।  
 जमगम्मं देवाण वि किम्मंग(किमंग)पुण मणुयमेत्ताण? ॥३११३॥  
 सा चंदसिरी इहइं चिट्ठइ तं वीरसेणमेव पियं ।  
 ज्झायंती एगमणा परिचत्तअसेसवावारा ॥३११४॥  
 दुक्खं च मज्झ एयं सो कुमरो वीरसेणो नामो जे ।  
 सो मज्झ पुत्तमित्तो अहवा सुय-सामिसालो य ॥३११५॥

मह संति दोन्नि पुत्ता पुत्तय ! सिरिचंदसेहर-सुवेगा ।  
ते कमलकेउखेयरवहंमि मित्त त्ति संजाया ॥३११६॥  
चित्तगइमहाराओ अम्हं पुण होइ सामिसालोत्ति ।  
तस्स सुओ य असोओ विसेसओ होइ अम्ह पहू ॥३११७॥  
दोण्हं मज्झे एगस्स कह वि जइ होइ पच्चवाओ ता ।  
न सुयाण अत्थि कुसलं अहमेवं दुक्खिया पुत्त ! ॥३११८॥  
बहुविहअवायगब्भं मज्झं रयणायरस्स चिंतंती ।  
चेद्धामि खग्ग-खेडयपउणकरा सावहाणा य ॥३११९॥  
‘विस्सासठाणमेस’त्ति तेण कलिऊण किर असोएण ।  
दारंमि अहं ठविया नाणाविहपत्थणापुव्वं ॥३१२०॥  
ता पुत्त ! दुक्खकारणमेयं मह वीरसेणकुमरो जं ।  
सुयमित्तो सामी वा होइ असोओ य सामिसुओ ॥३१२१॥  
दो वि समाणसरूवा दो वि पिया मज्झ दो वि पियपुत्ता ।  
पेच्छ कह देवजोगा ताणं पि उवड्डियं वेरं ? ॥३१२२॥  
इय एसो नीसेसो कहिओ भवणाइवइयरो तुज्झ ।  
नियसोयकारणं पि य कहियं जं गुविलमच्चत्थं’ ॥३१२३॥  
सोऊण इमं कुमरो अपारखारोयहं(हिं)मि जो पडिओ ।  
इह चंदसिरि त्ति सुए अमयसमुद्दे वि सो खित्तो ॥३१२४॥  
चंदसिरिदंसणूसुयहियउक्कलियाहिं बहुवियप्पाहिं ।  
रयणायरपवेसासंकंताहिं व्व सो गहिओ ॥३१२५॥  
‘मह आवया वि एसा संजाया संपय व्व देववसा ।  
मणवल्लहचंदसिरीपउत्तिसवणेण अच्चत्थं ॥३१२६॥

जं जह लिहियं विहिणा तं तह परिणमइ किं वियप्पेण ? ।

इय भाविऊण वीरा विहुरे वि न कायरा हॉति' ॥३१२७॥

दट्टूण परमपहरिसपुलइयसव्वंगसंगयावयव्वं(वं) ।

सिसिरोवहिसंगेण व पुण कुमरं भणइ सा नारी ॥३१२८॥

'पुत्त! तुमं पि कुओ इह? को सि तुमं ? किं सुरोव्व(व)असुरोव्व(व) ।

विज्जाहरो? कहां वा वियाणियं भवणमिह तुमए?' ॥३१२९॥

तो भणइ वीरसेणो 'मणुओ हं सायरस्स तीराओ ।

भवियव्वयाए इहइं पवेसिओ देवजोएण' ॥३१३०॥

पुण भणइ बंधुजीवा 'न पुत्त ! मणुयाण एरिसा सत्ती ।

पोयाईएहिं जओ न खमा रयणायरं तरिउं ॥३१३१॥

तुमए पुण पुत्त ! इमो पोयविहीणेण लंधियो जलही ।

अह कह वि होइ एयं इह प्पवेसो न संभवइ ॥३१३२॥

ता पुत्त ! न होसि तुमं मणुओ अणुमाणओवगच्छामि ।

कहसु मह नियसरूवं जइ कहणिज्जं महावीर !' ॥३१३३॥

इय भणिए पुण कुमरो चिंतइ 'किं मज्झ बहुवियप्पेहिं ? ।

विसमदसावडिओ हं खेयरलोओ य मायावी ॥३१३४॥

ता न जहत्थावेयणमिह कायव्वं जओ मणूसेण ।

परिभाविऊण देसं कालं पत्तं च जइयव्वं' ॥३१३५॥

कुमरो भणइ 'असेसं नियसरूवं तुहं पसाहिस्सं ।

समयंतरंमि संपइ मह साहसु कत्थ सो असोओ (सोऽसोओ)?' ॥३१३६॥

पुण भणइ बंधुजीवा 'एवं होउत्ति जं तुमं भणसि ।

निसुणसु असोयवइयरमिह संपइ जं तए पुट्टं ॥३१३७॥

सिरिवीरसेणविणिउत्तखयराओ सुयमसोएण ।

जह पवणकेउणा सो वियारिओ बंधुवेरेण ॥३१३८॥

आयन्निरुण एयं वयणं पणिहिस्स जायपरिओसो ।

सयमेव गओ असोओ तस्स पउत्तिं गवेसंतो' ॥३१३९॥

पुण भणइ वीरसेणो 'परिणीया किं न सा असोएण ?' ।

बुद्धा भणइ 'न मन्नइ अन्नं परियं वीरसेणाओ ॥३१४०॥

सो को वि इह तिलोए नत्थि उवाओ न जो असोएण ।

तिस्साराहणहेऊ विचिंतिओ तयणुरत्तेण ॥३१४१॥

सा उण एकुग्गमणा पिय-माई-बंधु-सहियणं चइय ।

'मह वीरसेण ! सरणं हवेज्ज जम्मंतरे वि तुमं' ॥३१४२॥

इय भणभाणी चिट्ठइ आससइ खणं ममं समासज्ज ।

पुच्छइ कं सुएहिं तुह कहिओ कमलकेउवहो ? ॥३१४३॥

जह जह पुण सारुत्तं (सा पुणरुत्तं ?) पुच्छेइ तहा तहा कहेमि अहं ।

मह विरहिया सदुक्खं रोयइ तं चेव सुमरंती' ॥३१४४॥

पुण भणइ वीरसेणो 'न बलामोडेण परिणइ असोओ ।

कत्रा खु सा अवस्सं सयदिन्ना होइ एगस्स' ॥३१४५॥

सा भणइ 'पुत्तमेवं नासोओ भुंजए अणिच्छंती(तिं) ।

परनारिं आजम्माओ निच्छओ तस्स किर एसो ॥३१४६॥

अविवेई सो पुत्तय ! एत्तियमेत्तं पि जो न जाणेइ ।

अप्पा परं विगुप्पइ अनेहनेहाणुबंधेण ॥३१४७॥

सो चंदसिरिविओए खिज्जइ सा वीरसेणविरहेण ।

ता पुत्त ! लज्जणिज्जो बुहाण एसो खु वुत्तंतो ॥३१४८॥



बहुयं पि हु सिख(क्ख)विओ सो भणइ 'न अम्ब ! मह इमाहिंतो ।  
 अन्ना निवसइ हियए सुरूवतियसंगणा जइ वि ॥३१४९॥  
 जं होइ किं पि तं होउ अम्ब ! मरणंपि जाव मह इहं ।  
 चंदसिरिरायरसियस्स नवर(रं) जइ कह वि संपडइ' ॥३१५०॥  
 इय पुत्त ! तस्स एसो महग्गहो तारिसो पुण इमीए ।  
 ता पज्जंतो इह केरिसो व होही न जाणेभि' ॥३१५१॥  
 इय सोऊणं कुमरो चिंतइ 'कह पेच्छ कामिहिययाइं ।  
 होंति अज्ज(ज)हत्थपेच्छीणि? न उण पेच्छंति परमत्थं ॥३१५२॥  
 ता कह होही संपइ चंदसिरीदंसणं?' ति चिंतंतो ।  
 निसुणइ बहुदुक्खसरं रुइयरवं अफुडवन्नकमं ॥३१५३॥  
 तो सो पयडियकारुन्नभावतहुक्खदुक्खियमणो व्व ।  
 पुच्छइ का अम्ब ! इहं रोवइ बहुदुक्खजुयइ व्व ?' ॥३१५४॥  
 तो भणइ बंधुजीवा 'पुत्तय ! सच्चवेव रुयइ चंदसिरी ।  
 बहुदुक्खा सोऊणं मरणं सिरिवीरसेणस्स ॥३१५५॥  
 केत्तियमेत्तं एयं ? पढमं सोउं असोयपच्चक्खं ।  
 मुच्छं गया तहा सा जह चत्ता जीवियासा वि ॥३१५६॥  
 पुत्त ! न कीय वि दिट्ठो नारीए एरिसो मए नेहो ।  
 सिरिवीरसेणउवरिं जारिसओ नवर एयाए ॥३१५७॥  
 ता पुत्त! चिट्ठसु तुमं इहइं मणिमत्तवारणे विमले ।  
 अहयं पुण गंतूणं रुयमाणिं संठवेभि तयं' ॥३१५८॥  
 तो भणइ वीरसेणो 'एवं कुणसु'त्ति सा गया उवरिं ।  
 कुमरो वि अलक्खपओ अन्नदुवारेण आरूढो ॥३१५९॥

पत्तो सत्तमभूमिं ठिओ विचित्ते अलक्खनिज्जूहे ।  
 पेच्छंतो चंदसिरिं विसमावयनिवडियं दीणं ॥३१६०॥  
 तं दट्ठूण कुमारो चिंतइ 'हा ! पेच्छ मह विओएण ।  
 पावेण असोएणं कह एसा ठाविया दुक्खे'? ॥३१६१॥  
 सोएण व अवऊढा दुक्खेहिं व संद्धि(धि)या बहुविहेहिं ।  
 मरणेण व अहिलसिया मोहगहेणं व संगहिया ॥३१६२॥  
 पसरंतेहिं व अंतो सासेहिं पणोल्लिओ सुहलवो से ।  
 तेण खणं पि न पावइ मणंमि बाला सुहलवं पि ॥३१६३॥  
 नूणं एस समुद्धो इमीए विरहानलेण सुसइ व्व ।  
 पूरिज्जइ सोयभरं सुसलिलपूरेहिं पुणरुत्तं ॥३१६४॥  
 अणवरयथूलमोत्तियगलंतबाहंबुबिंदुदंतुरियं ।  
 आणणमिमीए रेहइ तुसारकणकलियकमलं व ॥३१६५॥  
 सव्वंगेसु विकलिया किसत्तणेणं विसाल-धवलच्छी ।  
 अंगीकयधरभारं हियए कुमरं पिव वहंती ॥३१६६॥  
 चिंतावससंकुइया अंतोपसरंतलद्धवित्थारा ।  
 मुच्चंति तीए सासा थरहरियथणं समूहेण ॥३१६७॥  
 बिउणीकयनियभुयवल्लिवामकरकमलकलियगंडयला ।  
 विकिरंती पुणरुत्तं नयणंसुकणे नहग्गेहिं ॥३१६८॥  
 'हा सामि ! हिययवल्लह ! हा जीवियनाह ! हा महासत्त ! ।  
 हा मज्झ अवन्नाए कएण कह पाविओ दुक्खं ? ॥३१६९॥  
 तुह विरहासंधियमच्चुमेयमासासियं मुणिदेण ।  
 तं सोउमावयं तुह मह जीयं महइ मरिउं पि ॥३१७०॥

ते तुह मणोरहा वीरसेण ! परमाणुरायसंपन्ना ।  
 हा पवणकेउणा किं नि(नी)या विहलत्तणं एण्हि' ? ॥३१७१॥  
 इय एवमाइबहुविहपलावसयदुक्खिया य जा रुयइ ।  
 ता तीए थेरिनारीए ज्झत्ति च्छीयं समीवंमि ॥३१७२॥  
 'जीवसु तुमं'ति भणितं सा भणइ 'मणोरहा कुमारस्स ।  
 होहिंति न ते विहला इय कहियं मज्झ च्छी(छी)एण' ॥३१७३॥  
 सोऊणं चंदसिरी दुव्वयणविघायकारयं छीयं ।  
 ईसीसि आससंती थेरिं पइ भणइ वयणमिणं ॥३१७४॥  
 'अंब!न छीयं अलियं लोओ पुण भणइ जं असोयव्वं ।  
 ता कीइसो भविस्सइ परिणामो एत्थ नो जाणे ॥३१७५॥  
 कोहंडि करेज्ज सया कुसलं चिय अज्जउत्तदेहंमि ।  
 जइ पूइया सि भयवइ अम्बाए मए वि भत्तीए' ॥३१७६॥  
 इय एवं जा चिद्धइ चंदसिरी सबंधुजीवाए (?) ।  
 सह जंपंती सहसा समागओ तो असोओ वि ॥३१७७॥  
 वियसियमुहतामरसो तुरियपयक्खेवदलियभवणंतो ।  
 दिन्नासणोवविट्ठो वुट्ठाए समीवदेसंमि ॥३१७८॥  
 एत्थंतरंमि कुमरो समागयं जाणिऊण खयररिउं ।  
 खगंमि खिवइ दिट्ठिं रणरसरोमंचियसरीरो ॥३१७९॥  
 'निसुणेमि ताव एसो किं जंपइ किं करेइ खयरिंदो ।  
 लद्धूण तओऽवसरं जं उचियं तं करिस्सामि' ॥३१८०॥  
 इय सो अलक्खरूवो निगूढनिज्जूहएण अंतरिओ ।  
 तव्वयणसवणविणिहियमणपसरो अच्छइ कुमारो ॥३१८१॥

तो भणइ खंयरिंदो वुड्ढं उदिसिय 'अम्ब!सो सत्तू ।  
निहओ निच्छियमेयं सुयं मए पवणनामेण ॥३१८२॥  
ओसहरहिओ वाही तवोकिलेसं विणा य दुक्कम्मं ।  
एमेव कह णु पेच्छह रणं विणा पडिहओ सत्तू ॥३१८३॥  
पावोदएण पावो नियएण विणासमेइ न हु चोज्जं ।  
ता अम्ब ! सुत्थिओ हं संजाओ एत्तियदिणेहिं ॥३१८४॥  
तेणं चिय एक्केणं हिययंततिरिच्छसल्लतुल्लेण ।  
संसयतुलाए ठवियं मह जीयं वीरसेणेण ॥३१८५॥  
जेण जियंतेण इमं सयलं भुयणं पि मज्झ अत्थमियं ।  
विणिवाइएण तं चिय संपइ पयडीहुयं रिऊ(उ)णा ॥३१८६॥  
ता हं निरंकुसो इव एण्हिं विहरामि विणिहयासंको ।  
वसुहायलं विसालं को संपइ मज्झ पडिवक्खो? ॥३१८७॥  
ता किं कज्जं संपइ जलनिहिसलिलंमि जलयराणं व ।  
अम्हं इह वसिएण?ता जामो अम्ब ! वेयड्ढं' ॥३१८८॥  
ता भणइ बंधुजीवा 'पुत्त!तुमं जाणसि त्ति' तो तेण ।  
पुण भणिया चंदसिरी परंमुही वियसियच्छेण ॥३१८९॥  
'चंदसिरि ! चयसु संपइ अणुबंधं वीरसेणकुमरंमि ।  
जइवि तुहाणिड्ढेहं तहावि मं मन्नसु पयिं ति ॥३१९०॥  
अणुरत्ते रचि(च्चि)ज्जइ अणिट्ठदइए वि कारणवसेण ।  
पुत्तेहिं होइ जोगो अन्नोन्नणुरत्तहिययाण ॥३१९२॥  
ता अंब ! भणसु एयं जामो वेयड्ढुपव्वयवरंमि ।  
तत्थ गयस्स भविस्सइ चंदसिरी मज्झ सुपसन्ना' ॥३१९२॥

तो भणइ बंधुजीवा 'पुत्त!तुमं चेव भणसु सव्वं पि ।  
 नाऽहं एरिसकज्जे वियक्खणा जेण बुद्ध म्हि' ॥३१९३॥  
 भणइ असोओ 'निसुणसु अम्ब ! तुमं मह इमीए कइया वि ।  
 उत्तरमवि नो दिन्नं दूरे मह वयणकरणं तु ॥३१९४॥  
 जइ तुह पच्चक्खं चिय भणिया एसा न मे जया करिही ।  
 वयणं तया भविस्सइ मह हिययं कोवपज्जलियं' ॥३१९५॥  
 इय भणिरुण असोओ चंदसिरिं भणइ 'वच्च उट्ठेहि ।  
 पाविही तुह न संपइ विणिच्छओ अज्ज निव्वाहं ॥३१९६॥  
 एत्तियकालं भणिया अणुणयवयणेहिं बहुवियप्पेहिं ।  
 संपइ पुण पडिकूलं भणामि जं होइ तं होउ ॥३१९७॥  
 ता चलसु ठासु पुरओ, न चलसि ता संपयं पि पाविह(हि)सि ।  
 मह मणकोवहुयासणजलंतजालासु सलहत्तं ॥३१९८॥  
 को पडियारं काही कुद्धंमि मए असेसभुयणंमि ? ।  
 सो वि हओ तुह इट्ठो जस्स कुणंती तुमं आसं ॥३१९९॥  
 ता एस निच्छओ मे जं तुह इट्ठं तमेव आयरसु ।  
 जइ इच्छसि मं, जीवसि, अह निच्छसि, तो धुवं मरसि ॥३२००॥  
 इय एवं भणिया वि हु खयरस्स न देइ उत्तरं जाम्ब(जाव)।  
 ता सो विलक्खिमाए कोवारुणलोयणो भणइ ॥३२०१॥  
 'पेच्छ इह मह वयणेसुं अहो ! अवन्ना इमीए पावाए ।  
 एवं पि बहुं भणिया तहा वि नो उत्तरं देइ ॥३२०२॥  
 अवहेरी वि विरायइ लज्जा-संभम-भयाइरेगेहिं ।  
 नारीण न उण निट्ठुर-हिययावन्नाए गरएसु ॥३२०३॥

तुज्झ अवन्ना विसहसि एत्थ हिययंमि मह तुमाहिंतो ।  
 संकंता धिद्धत्तण-निल्लज्जिम-निग्घणत्तगुणा ॥३२०४॥  
 अइविरसं चिय भुंजसु फलं अवन्नावहेरिविसतरुणो' ।  
 इय भणिकुण असोओ खग्गकरो उट्ठिओ सहसा ॥३२०५॥  
 एत्थंतरंमि सहसा 'मा मा साहसमसोय ! कुणसु तुमं ।  
 जुवई होइ अवज्झा' भणियमिणं बंधुजीवाए ॥३२०६॥  
 पसरंताअमरिस(तामरिस)महं-धयारविणिहयविवेयउज्जोओ ।  
 अविगणियथेरिवयणो पहाविओ चंदसिरिहुत्तं ॥३२०७॥  
 आयन्निऊण एयं, कुमरो अइविसमकोवफुरिओट्ठो ।  
 दिट्ठवीरगंठिनिवसणबंधुरबंधुद्धसिरजूडो ॥३२०८॥  
 पडिवन्नविसमभासुरभावो भूभंगभीमभालयलो ।  
 पुणरुत्तपरामरिसिय-निसियासिं पयडीकयामरिसो ॥३२०९॥  
 अंतग्गयरोसहुयाससोणजालाकयप्पवेसेहिं ।  
 डहइ व्व दीहरेहिं रोसारुणलोयणेहि रिउं ॥३२१०॥  
 रणरसरहससमुब्भवरोमंचविसेसपुलइयसरीरो ।  
 रिउविसयरोसपसरियवियप्पसयसंकुलो हियए ॥३२११॥  
 इय एवं संजत्तियसरीरसंठाणसंगयावयवो ।  
 संब्रद्धपरियरायारबंधुरो होइ जा कुमरो ॥३२१२॥  
 ता तेण असोएणं खग्गं आयद्धिऊण चंदसिरी ।  
 भणिया 'न होसि संपइ संभरसु तमिद्धेवं पि' ॥३२१३॥  
 तो दट्ठूण असोयं करालकरवाल-भासुरं नियडे ।  
 भयवेविरंगजड्डी चंदसिरी भणइ सावन्नं ॥३२१४॥

'किं जंपसि ? मह जम्मंतरे वि चंदप्पहो जिणो सरणं ।  
 बीओ य वीरसेणो सरणागयवच्छलो वीरो' ॥३२१५॥  
 इय कुविओ सोऊणं सो खयरो जाव खग्गमुग्गिरइ ।  
 ता हक्कंतो पत्तो तस्संते वीरसेणो वि ॥३२१६॥  
 'रे पावकम्म! निग्घिण! अलज्ज! विज्जाहराहम! कहन्नु ।  
 पसरइ भयवेविरनारिमारेणे माणसं तुज्झ? ॥३२१७॥  
 एए वि तुज्झ हत्था अपसत्था अखंडसीलसाराए ।  
 सयखंडा किन्न गया पहरंता बालनारीए ? ॥३२१८॥  
 वरमसिलया तुहेसा न तुमं जा तेयमसहमाणिव्व ।  
 विप्फुरियनीलकिरि(र)णच्छलेण धाराहिं व विलीणा ॥३२१९॥  
 करुणाठाणेसु ण जाण होइ करुणा सुनिधि(ग्घि)णमणाण ।  
 पावाण ताण तुम्हारिसाण नामं पि हु अगेज्झं ॥३२२०॥  
 एसा नीई जं निग्गुणेसु अवहीरि(र)णा विहेयव्वा ।  
 मूढस्स तुज्झ तत्थ वि तोसठाणे कहं रोसो ? ॥३२२१॥  
 अहवा पावमईणं पावाणुट्ठाणतग्गयमणेण ।  
 परिणमइ दोसभावत्तणेण गुणिणो गुणसमूहो' ॥३२२२॥  
 इय एवमुदारासयवसगरुयालावपयडियपहावं ।  
 दट्ठूण वीरसेणं खयरो इय चिंतइ मणांमि ॥३२२३॥  
 'तं अलियं चिय जायं जं किर पवणेण मारिओ एसो ।  
 एत्थ वि कहं पविट्ठो गंभीरसमुद्भवणंमि? ॥३२२४॥  
 को एत्थ विम्हओ किर अहवा एयारिसस्स वीरस्स? ।  
 गम्माग्गम्मविभागो वज्जस्स व कह णु संभवइ ? ॥३२२५॥

इहरा वि हु मरियव्वं केत्तियदियहेहिं ता वरं एण्हि ।  
 अमलियमाणस्स रणे अणेण सह मज्झ तं होउ' ॥३२२६॥  
 इय जा चिंतइ खयरौ ता भणिओ वीरसेणकुमरेण ।  
 किं चिंतसि? मा बीहसु न हणेमि असोय ! वच्चेसु ॥३२२७॥  
 मुक्काउहाण लज्जावसाण भीरूण मुच्छियाणं च ।  
 पहरइ न मज्झ हत्थो समरे पहरंतनारीण ॥३२२८॥  
 ता जइ वि मज्झ तुमए अवयरियं पिययमावहारेण ।  
 मुक्को सि तह वि वच्चसु न होसि निक्कारिमो सुहडो' ॥३२२९॥  
 ईसीसि विहसिऊण भणइ असोओ 'कुमार ! एवमिणं ।  
 पेच्छामि तुह वि सत्ती तुहोचियं तयणु काहिस्सं ॥३२३०॥  
 विज्जाहरो भिह बहुविहविज्जासामत्थ-सत्तिसंजुत्तो ।  
 जइ तुज्झ वि असमत्थो ता सव्वं निप्फलं मज्झ ॥३२३१॥  
 तुह कमलकेउविणिवायणेण दप्पो सुदूरमारूढो ।  
 निहए तुमंमि संपइ निरासओ सो कहिं जाही? ॥३२३२॥  
 अज्जेसा चंदसिरी कित्ति व्व जए पयइउ रणंमि ।  
 मह तुज्झ वाऽणुबद्धा आजम्मं किन्नरुग्गीया ॥३२३३॥  
 जेण तुमं भूगोयर ! कयत्थिओ पवणकेउणा तइया ।  
 सो किं ते वीसरिओ एण्हि खयराण सामत्थो? ॥३२३४॥  
 अमुणियविक्रमसारो सबुद्धिपरियप्पियप्पगव्वो य ।  
 कह भणसि मज्झ समुहं न होसि निक्कारिमो सुहडो? ॥३२३५॥  
 पसरंति जे वि संखलगज्जिरवा एत्थ जुवइपासंमि ।  
 जइ निव्वहंति ते च्चिय रणंमि ता किं न पज्जत्तं? ॥३२३६॥



ता ठाहि सबडहुत्तो किं बहुणा जंपिण्ण? समरंमि ।  
 धीराण कायराणं च अंतरं लब्भए पयडं' ॥३२३७॥  
 तो भणइ वीरसेणो 'सच्चमिणं खेयरिंद ! जं भणसि ।  
 निव्वाहो च्चिय दुलहो नराण नियभणियवयणेसु ॥३२३८॥  
 ता मा बहुं पयंपसु संभालसु आउहं थिरो होहि ।  
 तुह पुव्वजंपियाणं मह खग्गं उत्तरं दाही' ॥३२३९॥  
 एत्थंतरंभि दोन्नि वि अन्नोत्राभिमुहसन्निवेशेण ।  
 द्दोद्धभिउडिभीमा पहारसज्जाविया कुमरा ॥३२४०॥  
 अह खेयरेण सहसा खग्गं मोत्तूण मोग्गरो ग्गहिओ ।  
 उद्धं भमाडिऊणं पक्खित्तो वीरसेणस्स ॥३२४१॥  
 कुमरेण वि नियखग्गं मोत्तु तेणेव मोग्गरेण सयं ।  
 तह निहओ खयरिंदो जह मुच्छापरवसो जाओ ॥३२४२॥  
 पहारानिलसंधुक्कियकोवेण वि तेण तक्खणे च्चय ।  
 दो रूवे निम्मविए अट्टभुए खेयरिंदेण ॥३२४३॥  
 दट्ठूण दोन्नि रूवे विविहाउहभीसणे पडिहणंते ।  
 करमोग्गरेण कुमरो ते जुगवं निप्फुरे कुणइ ॥३२४४॥  
 निट्ठुरपहारमोग्गरमोडियलंबंतबहुभुयनिवेशे ।  
 ते रूवे संजाए आखंडियसाहतरुत्तुल्ले ॥३२४५॥  
 इय चउर-द्वय-सोलस-बत्तीसगुणे य जाव चउसट्ठी ।  
 सव्वे वि तेण निहया कारिमपुरिस व्य कुमरेण ॥३२४६॥  
 इय जेत्तियाइं विरइय(विरयइ) मायारूवाइं खेयरो समरे ।  
 कुमरो वि तेत्तियाइं मोग्गरपहरेण पाडेइ ॥३२४७॥

एवमसोओ असरिसकुमारसामत्थदंसणुत(त्त)त्थो ।  
 सव्वप्पणा ससत्तिं पउंजिउं अह समाढत्तो ॥३२४८॥  
 अइविसमकोवनिद्वयनिद्वद्वाहरकरालमुहभीमो ।  
 कुमरभयनीहरंतं जीयं व नियं निरुंभेइ ॥३२४९॥  
 चउभारसहस्सायसजलंतजालाकरालदुपे(प्पे)च्छं ।  
 उक्खिवइ खेयरिंदो कुमरवहत्थं महासत्तिं ॥३२५०॥  
 तो अमर-सिद्ध-किन्नरहाहारवबहिरियंबर-समुद्धो ।  
 सहसत्तिं पेच्छयाणं हा कट्टरवो समुच्छलिओ ॥३२५१॥  
 'हा ! पुरिसरयणमेयं असेससंसारसारमेएण ।  
 मायाविखेयरेणं कह निहणं नीये वीरं ?' ॥३२५२॥  
 इय सोयवसवियंभियपेच्छयसुरनारिसकरुणालावं ।  
 निसुणंतो संधीरइ चंदसिरिं वीरसेणो वि ॥३२५३॥  
 भणइ असोयं कुद्धो 'कायर ! रे खयर ! मुंचसु ससत्तिं ।  
 किं चिंतसि ? पेच्छामो सामत्थं ता इमीए वि' ॥३२५४॥  
 तो तव्वयणारोसियहियओ पक्खिवइ खेयरो सत्तिं ।  
 कुमराणुहावसिसिरं तमेव कुमरो समारुहइ ॥३२५५॥  
 सिरिवीरसेणनिट्टुरचरणपहाराहया खडहडंती ।  
 पडिया धराए सत्ती असोयसत्तिं व्व निफु(प्फु)रणो(णा) ॥३२५६॥  
 तो सहसा उच्छलिओ जयसद्धुम्मीसिओ सुरवहूणं ।  
 गयणंमि साहुवाओ कुमारगुणरंजियमणेण ॥३२५७॥  
 इय जं जं च्चिय पेसेइ खयरो कुमरस्स आउहं घोरं ।  
 तं तं कुमरो निहणइ तणं व जलणो समीवगयं ॥३२५८॥

तो भणइ खेरिंदो 'गिण्हसु खग्गं न होसि रे दुइ ॥  
 पेच्छसु पाव ! अयंडे जमनयरं मज्झ हत्थेण' ॥३२५९॥  
 अह तेण वीरसेणो सावडुंभेण खयरवयणेण ।  
 आणंदिओ व्व समुहो संपत्तो पाणिकयखग्गो ॥३२६०॥  
 अन्नोन्नं पुलइज्जइ पुलओ सुहडेहिं दोहिं वि सदेहे ।  
 मणवंच्छियजयलच्छीपरिरंभवसेण व पयट्ठे ॥३२६१॥  
 तो भणइ वीरसेणो 'पहरसु खग्गेण खयर! अखु(क्खु)द्धो ।  
 इय भणिणं मुक्को निद्वयपहरो असोएण ॥३२६२॥  
 तेण वि दक्खत्तेणं अणोसरंतेण वंचिऊण सयं ।  
 खित्तो खग्गपहारो सो वि असोएण तह दिट्ठो ॥३२६३॥  
 इय अन्नोन्नं ताणं दक्खत्तणवंचियासिघायाण ।  
 पयडियविन्नाणगुणं जायं जुज्झं महाघोरं ॥३२६४॥  
 अब्भिडुंति खणेणं, खणेण विहडंति, संघडंति खणं ।  
 खणमुडुंति सुदूरं, कयनिग्घाया पडंति खणं ॥३२६५॥  
 खणमुवहसंति घायं खणं च निहसंति निट्ठुरं निहया ।  
 उब्भडभिउडीभंगा खणमन्नोन्नं व हक्कंति ॥३२६६॥  
 खणमप्पंति सरीरं पहरस्स परोप्परं खणं निहया ।  
 मुच्छानिमीलियच्छा पडंति वसुहाए निच्चेद्धा ॥३२६७॥  
 खणमुट्ठिऊण एक्को आसासइ सीयलोवयारेण ।  
 खणमागयचेयन्नो जुज्झंति पुणो तह च्वेय ॥३२६८॥  
 इय ताण परोप्परमच्छेरण समरे अभग्गपसराण ।  
 जुज्झंताणं भग्गो असिधारंगो असोयस्स ॥३२६९॥

तो दटूण य कुमरो खयरं गलियाउहं असंभंतो ।  
 परिहरइ नियं पि असिं पयडंतो खत्तधम्मगुणं ॥३२७०॥  
 तयणंतरं च दोन्नि वि वीरा मुक्काउहा समच्छरिया ।  
 जुज्झंति निजुज्झेणं नाणाविहकरणबंधेहिं ॥३२७१॥  
 पढमभुयप्फालणगहिरसद्धवित्तत्थजलयरसमूहा ।  
 अब्भिद्वा अन्नोन्नं जुज्झविऊ बाहुजुज्झेण ॥३२७२॥  
 तलहत्थबंध-कत्तरि-ढोक्कर-करघायविविहविन्नाणा ।  
 पडिविन्नाणनियत्तिथबंधुवबंधाङ्गो वीरा ॥३२७३॥  
 ते दोन्नि वि दुद्धरिसा दोन्नि वि दप्पुद्धरा निजुज्झविऊ ।  
 दोन्नि वि सुदुन्निवारा परोप्परं दोन्नि वि सकोवा ॥३२७४॥  
 दोन्नि वि उडुंति समं दोन्नि वि निवडंति, दोन्नि विघडंति ।  
 दोन्नि वि बंधनिबद्धा दोन्नि वि अप्पं विमोयंति ॥३२७५॥  
 इय एवं जुज्झंता विसमाहिनिवेसमुक्कुहुंकारा ।  
 जाव खणमेत्तमच्छंति ताव कुमरो असोएण ॥३२७६॥  
 उप्पाडिऊण उहं प्पक्खित्तो तक्खणे निवडमाणो ।  
 परिवियडउरयडेणं परिरद्धो निद्धबंधु व्व ॥३२७७॥  
 'नियभुयदंडावीडणविसमद्धिनिवेसकडयडरवेण ।  
 मोडेमि वीरसेणं'ति जाव अज्झवसइ असोओ ॥३२७८॥  
 ता तुरियं कुमरेणं हेद्धाहुत्तं कहं वि हसिऊण ।  
 चरणेसुं गहिऊणं भमाडिओ खेयरो उहं ॥३२७९॥  
 विलुलंतथूलमोत्तियहारुज्जलकिरिणसेयघणकेसो ।  
 जयसंसी तणुदंडो चमरो इव रेहइ असोओ ॥३२८०॥

दइयाहरणाजसधूलिमलियभुयणं व तस्स भमिरेण ।  
 घणछुट्टकेसवोहारएण उ(ओ)सारइ कुमारे ॥३२८१॥  
 मुह-सवण-नासियानीहरंतरुहिरोहथूलधाराहिं ।  
 रेहइ नहे भमंतो पयलमहावारिवाहा व्व ॥३२८२॥  
 जा भामिऊण कुमरो अच्छोडइ महियलंमि तो तेण ।  
 मरणंतो त्ति मुणेउं 'नमो जिणाणं' च उल्लुवियं ॥३२८३॥  
 तं सुणिऊण कुमारे 'हा! हा! निहओ म्हि पावकम्ममई ।  
 साहम्मिओ असोओ कह णु मए वहिउमाढत्तो ?' ॥३२८४॥  
 तो कुमरेणं मुक्को सणियं वसुहाए सायरमसोओ ।  
 आसासिओ य सीयलहरियंदण-वत्थपवणेहिं ॥३२८५॥  
 पच्चागयचेयन्नो खयरो जा नियइ ता पुरो कुमरं ।  
 पेच्छइ कम्मयरं पिव तच्चावारंमि उज्जुत्तं ॥३२८६॥  
 दट्ठुं भणइ असोओ 'कुमार ! किं रक्खिओ तए अहयं ।  
 कुब्धो पडिपहरंतो अभणियदीणक्खरो सत्तू?' ॥३२८७॥  
 तो भणइ वीरसेणो 'न होसि सत्तू तुमेव मह मित्तो ।  
 मरणंते जस्स न ते 'नमो जिणाणं' ति पम्हुसियं ॥३२८८॥  
 दूरे हिययब्भंतरपसरंतविसेसभत्तिसंजुत्तं ।  
 एवं चिय जिणनामं समुच्चरंतो वि मे मित्तो ॥३२८९॥  
 नो मारिसाण सत्ती मरणंमि उवड्डियंमि रक्खेउं ।  
 रक्खइ बहुभवमरणं जिणाण नामक्खरं एयं ॥३२९०॥  
 जं किं पि मए तुह कोहमूढहियएण खयर ! अवयरियं ।  
 तं सव्वं खमियव्वं अविवेओ एत्थ अवराही ॥३२९१॥

अइनिम(म्म)ला वि मलिणीहवंति पुरिसा उवाहिदोसेण ।  
 फालिहमणि व्व तम्हा हेउ च्चिय सकलुसोवाही' ॥३२९२॥  
 इय सोऊण असोओ वयणं कुमरस्स जायबहुलज्जो ।  
 अनिरिक्खंतो समुहं अहोमुहो चिंतई एवं ॥३२९३॥  
 'पच्चक्खं च्चिय दीसइ अंतरमहमुत्तिमाण पुरिसाण ।  
 जह अहयं पि य अहमो जह एसो उत्तमो कुमरो ॥३२९४॥  
 जं जं परिभाविज्जइ तं तं चिय अहममेव मह कम्मं ।  
 अहमाणुद्धानेणं अहमत्तं होइ पुरिसस्स ॥३२९५॥  
 एयस्स पुणो सव्वं अच्चुत्तममेव सुहसमायरणं ।  
 एएण उत्तमो च्चिय कुमरो पडिहाइ मह हियए ॥३२९६॥  
 उत्तमकुल-जाई वि य अहमायरणेण होंति जं अहमा ।  
 उत्तमकम्मायरणा इयरे वि य उत्तमा होंति ॥३२९७॥  
 परमरिऊ अवयारी रणंगणे मारण(णु)ज्जुओ बलवं ।  
 विणिवाइओ वि इमिणा अहमेवं रक्खिओ तह वि ॥३२९८॥  
 कुंभुब्भवचुलुयपमाणजलहिणो पयडमेव गहिरत्तं ।  
 सुयणाण पुणो हिययं अलद्धथाहाण अपमाणं ॥३२९९॥  
 ता सव्वहा निएणं चरिणं लज्जिओ न पारेमि ।  
 दिट्ठिं इमस्स धरिउं दूरे पच्चुत्तरपयाणं ॥३३००॥  
 अहिमाणमेव जीयं तं पि कुमारेण अवहडं मज्झ ।  
 ता निज्जीवो म्हि सवो सवो वि कह उत्तरं देइ ?' ॥३३०१॥  
 इय चिंतिउं असोओ अदिन्नपडिउत्तरो य सहस ति ।  
 जाओ अदिस्सरूवो सुविणयपुरिसो व्व खणमेत्तो ॥३३०२॥

कुमरो वि अपेच्छंतो तमसोयं तत्थ भवणमज्झंमि ।  
 उद्दिसिय बंधुजीवं सविसायं भणिउमाढत्तो ॥३३०३॥  
 'अम्हारिसाण वच्चओ(उ) खयमम्ब ! परिक्रमो पहावो य ।  
 जो एरिसाण जायइ सुसावयाणं पि खेयो य' ॥३३०४॥  
 तो भणइ बंधुजीवा 'कुमार ! खेओ न कोइ तस्सत्थि ।  
 तुह चरियविम्हएणं ससरूवे लज्जिओ एसो ॥३३०५॥  
 ते सुयणा जेसिं दुज्जणा वि हिययट्ठिएहिं व गुणेहिं ।  
 ह्यदोसा लज्जाए सुयणत्तं अब्भसंति व्व ॥३३०६॥  
 तेसिं चेव गुणाणं समुज्जलत्तं मणंमि तिमिरं व ।  
 अवणेइ दुज्जणाणं दोजन्नं जं परूढं पि ॥३३०७॥  
 ता तुह असरिससोजन्नभावसंभावियाणुरायस्स ।  
 अणुमीइज्जइ लज्जा निययसरूवे असोयस्स ॥३३०८॥  
 एण्हिं मह संतोसो कुमार ! जं तुज्ज रायधूयाए ।  
 सह जाओ संजोगो जं च अविग्घं असोयस्स ॥३३०९॥  
 नाओ सि पुत्त ! तं चेव वीरसेणो सि विक्रमाईहिं ।  
 अण्णस्स कस्स भुयणे मणुयस्स हवेज्ज इय सत्ती ? ॥३३१०॥  
 जे तुज्ज गुणा कहिया सुएहिं मह ते तुमंमि दिट्ठंमि ।  
 कह सव्वे वि तुहुत्तरचरिएहिं व सयगुणा जाया ॥३३११॥  
 ता पुत्त ! चिरं जीवसु होसु परई चउसमुद्वसुहाए ।  
 अणुरूवपणइणीसंगमेण उवभुंजसु सुहाइं ॥३३१२॥  
 तो कुमरो सोऊणं वयणं वुट्ठाए भणइ तुह पुत्ता ।  
 अम्ब ! उवयारिणो मे वेरिवहाणंतरं जाया ॥३३१३॥

जइ ते तत्थ न हुंता ता हं सह पउमएविभइणीए ।  
 निरवडुंभो सयसिक्करो व्व गयणाओ निवडंतो' ॥३३१४॥  
 इय एवमाइ बहुयं तग्गयगुणगहणपयडियप्पणयं ।  
 जंपइ वुह्वाए समं सोवसमं सविणयं कुमरो ॥३३१५॥  
 तो चंदसिरीसमुहं गओ कुमारो अणुब्भडसरूवो ।  
 पयडियबहुमाणाए तीअ वि अब्भुद्धिओ सहसा ॥३३१६॥  
 जे तीए पुरा कुमरे जुज्जंते भयविमिस्सकुवियप्पा ।  
 पियदंसणेण ते च्चिय सिंगारमयव्व संजाया ॥३३१७॥  
 तिस्सा मुहं विरायइ आवंडुरगंडकंतिकमणीयं ।  
 तव्वेलुग्गयससहरकरकलियं फुल्लकुमुयं व ॥३३१८॥  
 दट्ठूण वीरसेणो चंदसिरिं विरहदुब्बलं भणइ ।  
 'अदिडुबंधुविरहा बहुदुक्खं पाविया देवि ! ॥३३१९॥  
 जह उवणमंति तव्विहकम्मपहावेण देवि ! सोक्खाइं ।  
 दुक्खाइं तहा तत्थ वि हरस-विसाया विमूढाण ॥३३२०॥  
 जइ विसमदसावडणे न होइ वीरत्तणस्स उवओगो ।  
 ता तं निव्विसयं च्चिय उवजुज्जइ कंमि समयंमि ॥३३२१॥  
 ता मा मयच्छि ! नारीसुलहं खेयं मणंमि उव्वहसु ।  
 जइ अणुकूलो देव्वो ता बंधुयणस्स मेलेमि' ॥३३२२॥  
 सोऊणं चंदसिरी वयणमिणं हरिसवियसियकवोला ।  
 हिययब्भंतरपसरंतपणयगब्भं पियं भणइ ॥३३२३॥  
 मा अज्जउत्त ! संकसु जमहं किर बंधुविरहदुक्खत्ता ।  
 तुह विप्पओयगुरुदुक्खभारपिहियं पिव गयं तं ॥३३२४॥



बालत्तणं मि पिय-माई-बंधुसहियायणो पिओ होइ ।  
 आरूढजोव्वणाणं जुवईण पिओ पिओ एक्को ॥३३२५॥  
 पियसंगमाओ न परं सुहमिह विरसंमि जीवलोयंमि ।  
 तव्विरहाओ न दुक्खं पि किं पि अन्नं जए गरुयं ॥३३२६॥  
 ता अलमेत्तेण पयंपिण्ण चिंतेसु पिययम ! तुरंतो ।  
 संसारघोरसायरनिवासदुक्खाओ उत्तारं' ॥३३२७॥  
 एवं जाव परोप्परमालावपराइं ताइं चिड्ढंति ।  
 ता भवणस्सुवरितले संजाओ गरुयनिग्घाओ ॥३३२८॥  
 'मा बीहसु'त्ति आसासिऊण पियपणयणिं कुमारो सो।  
 उवरिमतलमारूढो तक्कारणजाणणत्थं च ॥३३२९॥  
 जा जाइ असंभंतो ता पेच्छइ नंगरं गुरुपमाणं ।  
 अइदीहररज्जुनिबद्धमायसं जाणवत्तस्स ॥३३३०॥  
 तस्साणुलग्गबब्बरजुवाणजुयलं[य] पेच्छइ कुमारो ।  
 खारोयहिजलसंगमदड्ढसरीरं च अइकसिणं ॥३३३१॥  
 अइथूल-कालकायत्तणेण पिहुलोहपिंडघडियं व ।  
 तेण अहोरत्तं चिय गुरुभरकज्जेसु अकिलंतं ॥३३३२॥  
 तो चिंतइ रायसुओ 'जाण गुरुजाणवत्तमिह देसे ।  
 नंगरियमागयं पुण कुओ पएसा न जाणामि ॥३३३३॥  
 ता पुच्छामि इमे च्विय बब्बरए' चिंतिऊण कुमरेण ।  
 ते पुच्छिया अभासा-भएण उड्ढं चिय पलाणा ॥३३३४॥  
 गंतूण बब्बरेहिं कहिओ नियजाणवत्तसामिस्स ।  
 फालिहभवणकुमाराइवइयो जो जहा दिड्ढो ॥३३३५॥

सोऊण सत्थवाहो तं वुत्तंतं असद्धंतो य ।  
 पेसइ थिरपच्चइए पुरिसे निज्जामयप्पमुहे ॥३३३६॥  
 दिट्ठो तेहिं कुमरो देवकुमारो व्व खग्गकयपाणी ।  
 पणिवइओ सव्वेहिं वि सविम्हउब्भंतनयणेहिं ॥३३३७॥  
 पढमाभासणपुव्वं कुमरेणं जाणवत्तवुत्तंतं ।  
 ते पुच्छिया समाणा कहंति तव्वइयरमसेसं ॥३३३८॥  
 'चंदउरपुरनिवासी पज्जुन्नो नाम जाणवत्तपई ।  
 दव्वज्जणबुद्धीए महाकडाहं गओ दीवं ॥३३३९॥  
 आवज्जियं च तत्थ य मणवंच्छियमत्थमप्पमाणं च ।  
 एण्हिं च पडिनियत्तो चंदउरिं(रं) पत्थिओ नयरं ॥३३४०॥  
 अज्ज म्हा दोण्हि मासा एत्थ वहंताण जलहिमज्जंमि ।  
 अइमंदमारुयवसा न पयट्टइ पव्वहणं(पवहणं)तुरियं ॥३३४१॥  
 अज्ज उण पहाए च्चिय उच्छलियं वद्धलं असामन्नं ।  
 तेणेत्थ जाणवत्तं पडिखलियं नंगरो खित्तो ॥३३४२॥  
 नंगरनिग्घायरवं इह सोउं बब्बरा तओ पहिया ।  
 तेहिं पि तुम्ह दंसणवुत्तंतो साहिओ सव्वो ॥३३४३॥  
 सोउं पज्जुन्नेणं अप्पत्तियंतेण पेसिया अम्हे ।  
 निज्जामउ(ओ)म्हि एए सव्वे वि य तस्स कम्मयरा' ॥३३४४॥  
 आयन्निऊण कुमरो वइयरमेयं च जाणवत्तस्स ।  
 चिंतइ सुंदरमेयं पोयं परतीरगमणंमि ॥३३४५॥  
 तो भणइ वीरसेणो 'मणुओऽहं कह वि देवजोएण ।  
 एत्थागमो अप्प(गओऽप्प)दुइओ गंतुमणो उत्तरं तीरं' ॥३३४६॥

निज्जामएण भणियं 'वच्चह तुरियं किमेत्थ भणियव्वं ? ।  
 पावेमि परं तीरं जइ अणुयत्तंति विहि-पवणा' ॥३३४७॥  
 तो ते सह कुमरेणं गया समीवंमि रायधूयाए ।  
 कुमरेणं सा भणिया 'सुंदरि ! गच्छ्ह पोएण' ॥३३४८॥  
 'तुह वयणं चिय पिययम ! मज्झ पमाणं'ति उट्टिया भणितं ।  
 चंदसिरी, तो पभणइ कुमरं निज्जामओ एयं ॥३३४९॥  
 'एएणं जह नयणे नासा-सवणाइं ज्झंपह इमेण ।  
 पच्छा दुवे वि तुब्भे नीसंका जाह जलहिंमि' ॥३३५०॥  
 तव्वयणमणुट्ठेउं बंधुजीवाए कयपणामाइं ।  
 तीए अहिणांदियाइं वोत्ति वि पोयं पहुत्ताइं ॥३३५१॥  
 तो नियइ सत्थवाहो तं मिहुणं जाणवत्तपडिलग्गं ।  
 महणविणिग्गयमंदर-तडसंगयससहरसिरिं व्व ॥३३५२॥  
 पीणुत्तुंगपओहरवित्थारपणोल्लिओयहितरंगा ।  
 कंचणकुंभजुएणं तरइ व्व सकोउयं बाला ॥३३५३॥  
 तव्वेलुवे(व्वे)ल्लिरतुंगलहरिसिहरग्गसंठिओ कुमरो ।  
 ससिरि व्व हरी रेहइ वासुइसयणे समुद्धंमि ॥३३५४॥  
 'पेच्छह अउव्वरूवं पुरिसं नारिं च विजियतैलोकुं ।  
 कह जलहिंमि पवेसो इमाण ? कहमेत्थमच्छरियं ? ॥३३५५॥  
 किं उयहिकुमारो एस होज्ज नियपणइणीए परियरिओ ? ।  
 नारायणो व्व किं वा लच्छिजुओ वसइ जलहिंमि ? ॥३३५६॥  
 किं वा गयणपरिस्समसंतावायासिओ समुद्धंमि ।  
 विज्जाहरो सदइओ जलकेलीसोक्खमणुहवइ?' ॥३३५७॥

इय तदंसणपसरिय-वियप्पसयसंकुलो जणसमूहो ।  
 अविणिच्छियसम्भावो संजाओ जाणवत्तस्स ॥३३५८॥  
 तदंसणरसधावियलोयसमोणमियबीयपासुं व्व ।  
 कुमरारोहणविणयोनमियं पिव सहइ बोहित्थं ॥३३५९॥  
 तो नियपुरिसायन्नियसरूवपच्चक्खदिट्ठकुमरो य ।  
 अब्भुड्डइ पज्जुन्नो संभमसंजत्तियवरिल्लो ॥३३६०॥  
 तो कुमरसमुक्खित्तं पडिच्छियं सत्थवाहपुत्तेण ।  
 आरोवइ चंदसिरिं पोयं कुमरो तओ चडइ ॥३३६१॥  
 तो पज्जुन्नो सहरिससंपाइयआसणाइउवयारो ।  
 परियप्पइ सप्पणयं कुमार-कुमरीण आवासं ॥३३६२॥  
 सुहसेज्जापरिसंठियकुमारसेवाहिलाससुहियप्पा ।  
 पुच्छइ पज्जुन्नो तं समुदपरिपडणवुत्तंतं ॥३३६३॥  
 तह साहइ सोवसमं अप्पसंसाविवज्जियं वीरो ।  
 आरोविओ सुदूरं जह गुणगव्वो निओ तेण ॥३३६४॥  
 अमुणियगव्वसरूवा वि गुरुगुणा ववहरंति तह कह वि ।  
 जह गुरुगुणगव्वाणं गव्वो दूरं समोसरइ ॥३३६५॥  
 सोऊण सत्थवाहो वुत्तंतं तस्स चिंतइ मणंमि ।  
 'एवंविहाण नूणं नत्थि असज्झं जए किं पि' ॥३३६६॥  
 इय एवमाइ सव्वं पज्जुन्नो कुमरगुणगयं जाव ।  
 चिंतइ ता अणुकूलो वहणस्स पवाइओ पवणो ॥३३६७॥  
 तो उट्ठिऊण पभणइ पज्जुन्नो सव्वकम्मयरलोयं ।  
 'उक्खिवह नंगरं रे ! उच्चल(ल्ल)ह कूयखंभंमि ॥३३६८॥

पूरह य असंभंता सियवडमक्खिवह तणियसंघायं ।  
 निययावल्लयठाणेसु बब्बरे ठावह समत्थे ॥३३६९॥  
 निज्जामय ! उवउत्तो उत्तरहुत्तं चरेसु रे ! पोयं ।  
 एक्कदरे मा थक्कह इयरदरं तुरियमक्कमह ॥३३७०॥  
 दुग्गिलय ! जाणवत्तं पूयसु वरपुफ(फ्फ)-गंध-धूवेहिं ।  
 मंजरय ! पंजरोवरि आरुहसु नियच्छसु दिसाओ ॥३३७१॥  
 कच्छवय ! पेच्छ पुरओ सुदीहवंसेण सलिलपरिमाणं ।  
 मुखविल्ल ! वच्चसु तले केत्तियवांमं जलं हेट्ठे ॥३३७२॥  
 छड्डयय ! जलं छड्डसु गंमत्तपएससंचियं तुरियं (?) ।  
 अफा(फ्फा)लह रे ! तूरं वच्चइ पुरओ महामच्छे' ॥३३७३॥  
 इय एवमाइ सव्वं पज्जुन्नो जाव परियणं भणइ ।  
 ता विजियपवणवेयं संचलियं जाणवत्तं पि ॥३३७४॥  
 जं चित्तियं मणेणं पट्ठिमि परिट्ठियं तयं वेगा ।  
 कह संघडइ खणं पि हु मणोवमाणं पवहणस्स ॥३३७५॥  
 जं पड्डपवणवसुग्गयवेयवियंभमाणगइपसरं ।  
 खे खेयरेहिं(हि) तुरियं वाउविमाणं व सच्चवियं ॥३३७६॥  
 दोपासंतनिरंतरनिवडत्तारित्तबहुकरेहिं व ।  
 गहिरत्तणकुवियं पिव उल्लिंचइ जलहिणो सलिलं ॥३३७७॥  
 निविडावल्लयपिहुपक्खवायसंखोहिओयहिजलोहं ।  
 पसरइ अभग्गपसरं तं पोयं गरुडपोयं व्व ॥३३७८॥  
 गुरुकल्लोलारोहणदूरसमुल्लासियग्गिमपएसं ।  
 जेउं व नियरणं सुरजाणे गयणमुप्पयइ ॥३३७९॥

१. आवल्लक, खंता. टि. ॥

इय एवं बहुवेए पयट्टमाणे वि जाणवत्तमि ।  
 न चलइ ठणाओ पयं इय अणभिन्नाणपडिवत्ती ॥३३८०॥  
 लोएहिं वेयपसरंतपोयवसजायसंभवे(मे)हिं नहे ।  
 दीसइ तारानिवहो पच्छहुत्तं (व) धावंतो ॥३३८१॥  
 इय तं पोयं पडुपवणपेल्लिरुद्धामवेयपसरंतं ।  
 पत्तं पंचदिणेहिं समुद्धमज्झंमि गिरिमेगं ॥३३८२॥  
 जलहिमहणावसाणे सुरेहिं जो महणसमकिलंतंहेहिं ।  
 असमत्थेहिं व वोढुं मंदरसेलो व्व परिचत्तो ॥३३८३॥  
 उव्विग्गो इव बाढं खारोयहिगब्भवासवसहीओ ।  
 उवसंतकुलिसतासो मेणायगिरि व्व नीहरिओ ॥३३८४॥  
 जो महणबंध-मुणिचुलयपाण-सिरिहरणमाइदुक्खाण ।  
 सहणसमत्थो गरुओ हिययपएसो व्व जलहिस्स ॥३३८५॥  
 दट्ठुण गिरिवरं तं पज्जुन्नो भणइ कुमरमुद्धिसिउं ।  
 'पेच्छसि देव! गिरिंदं पुरओ गयणग्गपडिलगं ? ॥३३८६॥  
 एयाओ गिरिवराओ उत्तरतीरं दुजोयणसएहिं ।  
 जइ एसो च्चिय पवणो ता जाणसु देव ! संपत्ता ॥३३८७॥  
 एयस्स देव! नामं विसालसिंगो त्ति गिरिवरिंदस्स ।  
 बहुपुफ(फ्फ)फलभरोणयविविहुज्जाणेहिं जुत्तस्स ॥३३८८॥  
 पक्खीणिंघण-जल-जवससंगहं देव ! बहुयदियहेहिं ।  
 इहइं च पडिखलिज्जइ पोयं उत्तरह तुब्भे वि ॥३३८९॥  
 वीसमह सह पियाए इहयिं नरनाह ! तयणु संपुन्नं ।  
 कारुण पवहणमिओ उत्तरतीरंमि वच्चांमि' ॥३३९०॥

'एवं'ति कुमारेणं भणिए पोयं खणेण तं पत्तं ।  
 उत्तरिओ पज्जुन्नो कुमरो तह रायधूया य ॥३३९१॥  
 तं नियइ वीरसेणो सेलं गयणंतराललग्गेहिं ।  
 जो फलियदुभग्गेहिं हणइ बुभुक्खं नहयराण ॥३३९२॥  
 जो दीहनिरंतरनालिएर-खज्जूरतरुवरेहिं व ।  
 गयणंमि अमायंतो उद्धं व नहं समुक्खिवइ ॥३३९३॥  
 जो महुरसिसिरनिज्जरजलपूरियरुंदकंदरनिवेसो ।  
 तियसभाएण तिरोहियअमयस्स अलंघदुग्गं व ॥३३९४॥  
 जो वेलावसचउदिसिपसरियजलभरियगहिरकुहुरंतो ।  
 चिरकुलिसतावतत्तो जलकेलिसुहं व अणुहवइ ॥३३९५॥  
 मडहाययतुंगो वि हु जो वेलाजलनिरुद्धपेरंतो ।  
 ओहरियजलसमूहो सो च्चिय तुंगत्तणं लहइ ॥३३९६॥  
 जो पवणुद्धयडिंडीरपिंडपरिपंडुरोरुतडभाओ ।  
 रेहइ दूरंसा(समा?)गय-परिरुद्धतुसारसेलो व्व ॥३३९७॥  
 अणुम्मीय(इ)ज्जंति जहिं पज्जलियमहोयहीउ दियहेहिं ।  
 पइदियहं पेरंते निसि निवडियसलहनिवहेहिं ॥३३९८॥  
 रविकरफंसपयट्ठो जत्थ दिणे रवि-मणीण जो जलणो ।  
 सो निसिकरचंदाहयचंदुवलजलेहिं उण्हाइ ॥३३९९॥  
 इय तत्थ वीरसेणो विज्जाहरमिहुणसेवियदरिंमि ।  
 परियडइ अप्पिरुणं चंदसिरिं सत्थवाहस्स ॥३४००॥  
 निज्जरणेसु गुहासु य कुमरो सिरिखंडदुमवणेसुं च ।  
 गिरितुंगसिंसिहरे सीहो व्व अणाउलो भमइ ॥३४०१॥

१. मडहा पयइतुंगो० ला. ॥ २. दूरमागय० ला. ॥

अन्नोन्नं पेक्खंतो रमणीययरं पएसमहिस्स ।  
 कुमरो गओ दुजोयणववहाणपहं पवहणस्स ॥३४०२॥  
 जा जाइ थोवदूरं पुरओ ता नियइ निबिडतरुगहणं ।  
 वसुहालुलंतसाहासहस्सहयदिणयरालोयं ॥३४०३॥  
 कोऊहलेण कुमरो अंतोनिक्खित्तनयणवावारो ।  
 जा जोयइ ता निसुणइ बहुजणकोलाहलं तत्थ ॥३४०४॥  
 पविसइ पुरओ सनियं पेच्छइ सिरिखंडपायवंतरिओ ।  
 बहुविज्जाहरसेन्नं पारंभियसमरवावारं ॥३४०५॥  
 पसरंति रणरसुब्भडब्भ(भ)डाण पहुलद्धतक्खणाएसा ।  
 नाणाकिरियाणुगया तव्वेलं रणसमारंभा ॥३४०६॥  
 इह को वि महासुहडो सिरि निबिडनिबद्धजूडओ रहसा ।  
 पहुकज्जमहाभारं व वहइ सीसंमि सीसक्कं ॥३४०७॥  
 वच्छत्थलघोलिरहारवल्लिमिह बंभसुत्तए अन्नो ।  
 समरे चलंति बंधइ को वि भडो निययहिययं व ॥३४०८॥  
 अंसत्थलेसु घोलिरमुत्तारइ कन्नकुंडलं को वि ।  
 झणझणिरकंकणावलिमालोयइ को वि करवालं ॥३४०९॥  
 इय सन्निहियमहारणवावारं जे कहंति अभणंता ।  
 खयरण तेण दिट्ठ तव्वेलं ते समारंभा ॥३४१०॥  
 तं खयरबलं दट्ठुं कुमरो सन्नद्धपरियराय(या)रं ।  
 वित्तइ 'एए कत्थ वि संगामत्थं व संचलिया ॥३४११॥  
 ता होउ ताव एए पेच्छिस्सं एत्थ पायवंतरिओ ।  
 कत्थ पयइंति ? कुणंति कह व विज्जाहरा समरं?' ॥३४१२॥



एवं जा पेच्छंतो सो अच्छइ ताव तत्थ संजमियं ।  
 पेच्छइ मित्तं खेयरपडिरुद्धं बंधुयत्तं पि ॥३४१३॥  
 ओलक्खिऊण मित्तं चिंतइ चित्तंमि वीरसेणो वि ।  
 'हा एस मज्झ मित्तो कह पत्तो एरिसावत्थं? ॥३४१४॥  
 अहवा न सा अवत्था इह अत्थि नरस्स जा न संभवइ ।  
 विगुणविहिविलसिएणं विसमदसाकूवपडियस्स ॥३४१५॥  
 ता पेच्छामि किमेए कुणंति एयस्स खेयरा कुद्धा ? ।  
 पच्छ जमेत्थ उचियं तमहं सयमेव काहिस्सं' ॥३४१६॥  
 तो तेहिं बंधुयत्तो नीओ नियसामिसन्निहाणंमि ।  
 जोक्कारिऊण भणिओ खयेरेहिं प्हू इमं वयणं ॥३४१७॥  
 'तुम्हेहिं देव ! पुत्वि बहुमाया(?य?) असोयसुद्धिलहणत्थं ।  
 वेयद्दाओ तुरियं नासिक्कुं पेसिया अम्हे ॥३४१८॥  
 तत्थागएहिं नायं हरिय असोएणं देव ! चंदसिरी ।  
 दाहिणदिसाए नीया उज्जाणाओ विमाणेण ॥३४१९॥  
 इह को वि वीरसेणो सुव्वइ सो तीए मग्गओ लग्गो ।  
 सो देव! महासुहडो नियविक्कमविजियतेल्लोक्को ॥३४२०॥  
 रूवेण निरुवमाणो संपुण्णकलाहि हसियसियकिरणो ।  
 केत्तियमेत्तं व धणं? विमग्गिओ देइ जीयं पि ॥३४२१॥  
 एवंविहगुणजुत्ते तंमि कुमरंमि तयणुरत्तंमि ।  
 सा चंदसिरी निब्भरघणपिम्मपरव्वसा रत्ता ॥३४२२॥  
 तिस्सा सरीरमेत्तं विज्जासत्तीए हरउ सोऽसोओ ।  
 सा उण न तस्स सत्ती तिस्सा हिययं जहा हरइ ॥३४२३॥

एसा देव ! पउत्ती निसुया नासिक्कपुरजणाहितो ।  
 इह कहणत्थं तुरिओ पडुविओ तुह सुदाढो वि ॥३४२४॥  
 दाहिणदिसा वि निउणं अम्हेहिं गवेसिया असेसा वि ।  
 न देव ! तहा वि जाया मूलसुद्धी असोयस्स ॥३४२५॥  
 अह अण्णया अरण्णे परिब्भमंतेहिं देव ! अम्हेहिं ।  
 दिट्ठं लोहियकरयलपरिमंडियचंडियाभवणं ॥२४२६॥  
 अइरोदरण्णवासं अइभीसणपरियणेण संकिण्णं ।  
 अइभीमसमायारं अइभासुरभैरवीगब्भं ॥३४२७॥  
 कच्चायणिआकरिसियजीवेहिं व सुक्कुरुक्खनिवहेहिं ।  
 जं भेसइ व्व कोडरपडिसंठियकक्कडेहिं जणं ॥३४२८॥  
 जालासहस्सभीसणजालामुहनिवहवेढियसवंतं ।  
 सहइ व्व जं निसासुं चियाहिं भीमं मसाणं व ॥३४२९॥  
 विससियपसुमहिसामिसनहलुद्धभमंतगिद्धसंघायं ।  
 अणवरयजीववहकयपावमहापडलपिहियं व ॥३४३०॥  
 उवहारत्थं खंडियकर-नासा-सवणजोइणीकलियं ।  
 विक्कृतनियामिसवीरवग्गबहुहट्टसंघट्टं ॥३४३१॥  
 दीसंतभूय-रक्खस-पिसायपरिसानिबद्धआवाणं ।  
 डमडमिरपाणिडमरुयवसन्न(न)च्चिरजोइणिसहस्सं ॥३४३२॥  
 मारिज्जमाणपूयानरमुक्कक्कंदभीसणपएसं ।  
 हयमहिसबहललोहियपंगणपहदिन्नघणछडयं ॥३४३३॥  
 विससिज्जमाणबहुविहजल-थल-नहजंतुनिवहसंकित्रं ।  
 जं भीसणं विरायइ जमस्स कमं(म्मं)तगेहं व ॥३४३४॥

बहलारुणलोहियभित्तिलोहियघणसूलसयसमाइण्णं ।  
 वस-मंसवल्लहत्तणपसारियासंखजीहं व ॥३४३५॥  
 दारदुवासपरिद्वियवेयालुक्खित्तमडयतोरणयं ।  
 वज्जिरहुडुक्क-ड(ढ)क्का-डमरुअरवगहिरगब्भहरं ॥३४३६॥  
 चक्कासि-सूल-खेडयकरालकरभासुराए चंडीए ।  
 नररुंडमुंडमंडियमुंडाए अहिद्वियं गब्भे ॥३४३७॥  
 नरयस्स व पडिच्छंदं खेतं पिव जं दुकम्मबीयस्स ।  
 भवरक्खसहासं पिव बीभत्सरसस्स कुंडं व ॥३४३८॥  
 इय देव ! तमेवंविहसरूवमम्हेहिं दूरओ गयणे ।  
 परिसंठिएहिं दिट्ठं भैरविभवणं पओसमि ॥३४३९॥  
 तं पेच्छिऊण भवणं अवइत्ता तत्थ कोऊ(उ)हल्लेण ।  
 आढत्ता परिभमिउं अलक्खरूवा महाराय ! ॥३४४०॥  
 अह तत्थ भमंतेहिं दक्खायणिभवणसन्निहाणंमि ।  
 नामेण अघोरगणो दिट्ठो जोईसरो एगो ॥३४४१॥  
 दट्ठूण विविहजोइणि-जोईसरविदवेदियं जोयिं ।  
 अदि(द)स्सतणू अम्हे उवविट्ठा तस्स पासमि ॥३४४२॥  
 एत्थंतरंमि एसो कुओ वि खयरिंद ! आगओ पुरिसो ।  
 आगंतूण अणेणं कओ पणामो अघोरस्स ॥३४४३॥  
 तेण वि सायरमेसो दाऊणासीसमेत्थ उवविससु ।  
 इय]भणिओ उवविट्ठो भणिऊण 'महापसायं'ति ॥३४४४॥  
 तो तेण पसंतसरूवदंसणुप(प्प)न्नपक्खवाएण ।  
 जोईसरेण पुट्ठो 'कुओ भवं ? किमिह आगमणं?' ॥३४४५॥

एएण वि पडिभणियं 'भयवंत ! जहाकहिंचि कहियव्वं ।  
 अइगुविलं गरुययरं एगंतुवओगि कज्जमिणं' ॥३४४६॥  
 तो तेण तक्खण च्चिय पच्चासन्नो विसज्जिओ लोओ ।  
 एगंते उवविट्ठा दोन्नि वि अम्हे वि तस्संते ॥३४४७॥  
 तो देव ! निरवसेसं अट्ठावयसेलदेवजत्ताए ।  
 जह तुम्ह असोयस्स य गीयविवाउ(ओ) समुप्पण्णो ॥३४४८॥  
 देवोवएसओ जह नासिक्कपुरं समागया तुब्भे ।  
 तत्थागएहिं दिट्ठा चंदसिरी तिहुयणअब्भ(णब्भ)हिया ॥३४४९॥  
 जह तुम्ह असो[य]स्स वि जुगवं अणुरायनिब्भरमणाण ।  
 चंदसिरीहरणविसया संज(जा)या विविहकुवियप्पा ॥३४५०॥  
 जह वंचिओ सि भाउय ! नहसेहरनिवडिउत्तमंगेण ।  
 दिन्नं निययविमाणं जह चंदसिरीए कवडेण ॥३४५१॥  
 जह उज्जाणपरिट्ठियचक्केसरिभवणमज्झयारंमि ।  
 अन्नोन्नणुरायभरे दोहिं वि हिययाइं मिलियाइं ॥३४५२॥  
 जह सा उज्जाणाओ अवहरिया तेण हय-असोएण ।  
 तिस्साणुमग्गओ जह पडिलग्गो वीरसेणो वि ॥३४५३॥  
 सिरिवीरसेणविरहग्गिदुसहजालासएहिं(हि) डज्जंतो ।  
 तप्पडिवहे प्पयट्ठो अहमवि किर दंसणासाए ॥३४५४॥  
 इय एवमाइ सव्वं वित्थरओ तस्स जोइणो जमिह ।  
 एएण देव ! कहियं तं निसुयं सव्वमम्हेहिं ॥३४५५॥  
 पुण देव ! जोइएणं एस नरो पुच्छिओ विसेसेण ।  
 किं निब्भराणुरत्ता चंदसिरी वीरसेणंमि ॥३४५६॥

एएण तओ भणियं 'भयवं ! सो सेहरओ असोओ वि ।  
 चित्तलिहियंगणाए व तीए मुहा परिकिलिस्संति ॥३४५७॥  
 'हा ! हा ! नरा वराया अन्नासत्ते वि कह णु रज्जंति?' ।  
 इय करुणाए पयड्डइ नरंतरे तीए जइ चित्तं ॥३४५८॥  
 सिरिवीरसेणबाहुगुणसंदाणियमिव न वच्चए तिस्सा ।  
 पुरिसंतरंमि हिययं जोईसर ! निच्छओ एसो ॥३४५९॥  
 भयवं ! सो मह मित्तो न सेहरासोयसमविवेयगुणो ।  
 वत्थुसु पडिबद्धमणो विरुद्धकज्जायरणभीरू ॥३४६०॥  
 ता भयवं ! नाऽसज्झं तुह किं पि असेसभुयणमज्झंमि ।  
 तह कुणसु जहा मित्तं तुज्झ पसाएण पेच्छामि ॥३४६१॥  
 परदुक्खदुक्खिओ च्चिय जइलोओ होइ एत्थ किं चोज्जं ? ।  
 ता दुक्खियाण जोगं करेसु दुण्हं पि अम्हाण' ॥३४६२॥  
 इय भणित्तं(ऊणं)एसो पडिओ पाएसु तस्स जोइस्स ।  
 तेणावि एस भणिओ 'आयण्णसु भद ! मह वयणं ॥३४६३॥  
 सुरवइउच्छंगाउ(ओ) इंदाणिं जइ न तस्स आणेमि ।  
 ता मह सामत्थं चिय मामं न तुमं महासत्त ! ॥३४६४॥  
 अहवा कह पत्तिज्जउ कज्जगुरूणं पि वयणमेत्ताण ।  
 जाव न पेच्छइ लोओ पच्चक्खं ताण विप्फुरणं ? ॥३४६५॥  
 ता केत्तियं ममेयं तुह वयणुवरोहपीडियमणस्स ? ।  
 नणु सव्वहा घडिस्सं तुह मित्तं चंदसिरिसहियं ॥३४६६॥  
 जाणामि तुज्झ मित्तं अहं पि जयपायडं महासुहडं ।  
 सिरिकामरु(रू)यदेसे निसुयं गुणकित्तणं जस्स ॥३४६७॥

हंतूण कमलकेउं सीलं जीयं च रक्खियं जीए ।  
 सा चेव पउमएवी जसढक्का जस्स भुयणंमि ॥३४६८॥  
 ता अत्थि मह विसेसाणुद्धाणं अज्ज अद्धमिनिसाए ।  
 तं कायव्वमविग्घं अज्जेव य मंतसंसिद्धी ॥३४६९॥  
 ता साहेज्जमवस्सं तुमए मह सव्वहा वि कायव्वं ।  
 मह पुत्तेहिं अरत्ते घडिओ सि तुमं न संदेहे ॥३४७०॥  
 तयणंतरं च पुण तुह सकलत्तं संघडेमि वरमित्तं ।  
 इय जोइएण भणिए भणियं पुणो देव ! एएण ॥३४७१॥  
 'भयवं ! महापसाओ संपज्जउ तुज्झ कज्जसंसिद्धी ।  
 मह उण सुमित्तजोगो तुहाणुभावेण संभविही' ॥३४७२॥  
 तो जोइएण भणियं 'वच्चामो वच्छ ! कज्जसिद्धीए ।  
 जाव न रयणी वच्चइ दुजाममेत्ता महासत्त !' ॥३४७३॥  
 कयचंडीचलणच्चण-वावारा दो वि गहियउवगरणा ।  
 संपत्ता अइभीसणमसाणभूमि(मि) असंभंता ॥३४७४॥  
 तत्थागंतूण तओ मंडलपूयाविहिं च काऊण ।  
 उवविद्धे तस्सुवरिं सो जोई भणिसुमाढत्तो ॥३४७५॥  
 'भो ! बंधुयत्त ! एयं जोइणिखेत्तं सपच्चवायं च ।  
 वेयाल-भूय-रक्खस-पिसायसयसंकुलं घोरं ॥३४७६॥  
 ता सावहाणहियओ चउसुं पि दिसासु खित्तचक्खू य ।  
 जह कस्स वि अवयासो न होइ तह तं करेज्जासु' ॥३४७७॥  
 एएण तओ भणियं 'भयवं ! मा किं पि कुणसु आसंकं ।  
 जाव अहमेत्थ ता तुह को किर वंकं पलोएइ ? ॥३४७८॥

तम्हा एकृग्गमणो उज्झियसंको समाहिसंपन्नो ।  
 साहस-सत्तसमेओ जोईसर ! साहसु सकज्जं ॥३४७९॥  
 तो सो सधीर-निब्भयवयणेहिं इमस्स विणिहयासंको ।  
 जोईसरो पसाहियनियकम्मो झाणमासीणो ॥३४८०॥  
 एसो वि देव ! पुरिसो खग्गकरो तस्स जोइणो वीरो ।  
 पासेसु परिभमंतो चिद्धइ रक्ख(क्खु)ज्जुओ दक्खो ॥३४८१॥  
 एयस्स पहावेणं पुरिसस्स न खुद्ददेवयानिवहो ।  
 पहवइ निरंतरायं झाणज्जोओ वि नित्थरइ ॥३४८२॥  
 इय जाव परमपरिससमरसभावंमि वट्टए झाणं ।  
 'बहुविहविहीसियाहि विं(हिं वि)न खुब्भए जाव जोइंदो ॥३४८३॥  
 ता दाहिणदिसिहुत्तं उच्छलिओ मेहडंबरविहीणो ।  
 गिरिसिहरसेलनिवडणरवोवमो क्खडखडासद्धो ॥३४८४॥  
 तो देव ! एस पुरिसो सद्धं सोऊण धाविओ सहसा ।  
 'मा बीहसु जोईसर !' इय भणिरो दाहिणाहिमुहं ॥३४८५॥  
 जा जाइ ताव पुरओ नह-वसुहंतरपमाणदंडो व्व ।  
 नियकायकालिमाए व व(म?)इलित्तो(?)नहयलाहोयं ॥३४८६॥  
 पजलंतनयणजुयलो मुहु(ह)कुहरंतरविणित्तसियदसणो ।  
 लोयण-वयणेहिं नहे गहोडुनिवहं पिव गिलंतो ॥३४८७॥  
 घणकसिणकेसभासुरसरीसिवावेढवच्चरिकरालो ।  
 दट्ठुद्धवल्लिबंधणघणतणपूलं पिव वहंतो ॥३४८८॥  
 दूरपसारियमुहविवरदीहनीहरियजीहविकरालो ।  
 गहिरगुहंतरनिग्गयपारिंदो विज्झसेलो व्व ॥३४८९॥

१. बहुविधबिभीषिकाभिः ॥ २. अजगर खंता. टि. ॥

सिरिकन्न-कंठ-बाहु-सुपउट्ट-कडि-चरणमाइअंगेसु ।  
 अहिसंगओ विरायइ चिरदहो चंदणदुमोव्व ॥३४९०॥  
 जो दाहिणेण रेहइ निसियायसकत्तियाकरालेण ।  
 जोइंदरुहिरतण्हानिग्गयजीहेण व करेण ॥३४९१॥  
 सोणियपरिपुत्तेयरकरकलियकवालघडियपडिबिंबो ।  
 इयरामिसमलहंतो अप्पाणं असिउकामो व्व ॥३४९२॥  
 फुक्कारफारमारुयमिसेण किर जस्स भूसणभुयंगा ।  
 जोइयविसयपयट्टं कोहगिं दीवयंति व्व ॥३४९३॥  
 इय सघणचरणघघरिरवबहिरियसथलदिसिवहाहोओ ।  
 दारुणदाढो नामं दिट्ठो एएण खेत्तवइ(ई) ॥३४९४॥  
 'रे ! रे ! दुट्ट ! दुसिक्खिय ! पावदुक्क(क)म्मेक्ककरणतल्लिच्छो ।  
 अवमन्निऊण मं कह अहिलससि विसेससिद्धीओ?' ॥३४९५॥  
 इय पयइकक्कसेण सरेण बहुकोवमुक्कमुहजालो ।  
 निब्भच्छंतो पत्तो इमस्स पासंमि खेत्तवई ॥३४९६॥  
 तो देव ! असंभंतो एस नरो तस्स खेत्तवालस्स ।  
 गंभीरधीरवयणं पुरओ ठाऊण उल्लवइ ॥३४९७॥  
 'उवसंहर कोवमिणं खेत्ताहिव ! भव पसंतवावारो ।  
 देवाण कहां रोसो पसवइ आराहयजणेसु ? ॥३४९८॥  
 जइ एस दुव्विणीओ ता तस्स 'फलं इमो सयं लहिही ।  
 पक्खिसि कह तुमं पुण अप्पाणं अजसपंकंमि ? ॥३४९९॥  
 नियदोसेहि विनिहयं हणंति कह निग्गुणं जणं गरुया ? ।  
 उवभुत्तविसे पुरिसे नणु विहला आउहारंभा ॥३५००॥



मणभत्तिमेत्तसज्झा, हवंति देवा करेमि तं तुज्झ ।  
 मा कुणसु किं पि विग्घं खेत्ताहिव ! जोइणो एण्हिं' ॥३५०१॥  
 तो देव ! खेत्तवालो सविणयमेयस्स वयणवित्राणं ।  
 सोऊण दरपसंतो सोवसमं भणिउमाढत्तो ॥३५०२॥  
 'जो जारिसं अणुद्धइ सो पावइ तारिसं फलं एत्थ ।  
 नियदुव्विणएण इमो अजाइयं सक्खभावन्नो ॥३५०३॥  
 अप्पिट्ठियाप्पहीणा अम्हे नणु खुद्ददेवया तुच्छ ।  
 छलमेव गवेसामो नो उवउत्तेसु पहवामो ॥३५०४॥  
 ता एस मए जोई लद्धो नणु सव्वहा च्छले पडिओ ।  
 दुव्विणएणं दिन्नो मंडलथालट्ठियनिवेज्जो ॥३५०५॥  
 जइ ताव दुव्विणीओ तुमए वि हु लक्खिओ इमो जोई ।  
 ता कहमिमस्स उज्जुय ! पडिवण्णं विसमसाहेज्जं ?' ॥३५०६॥  
 तो तव्वयणविरामे भणियं एएण देव ! पुरिसेण ।  
 जं होइ किं पि संपइ तं होउ तहा वि न चएमि ॥३५०७॥  
 सगुणंमि निग्गुणंमि य पडिवन्ने जाण होइ निव्वाहो ।  
 ताणं चिय सोजन्नं मन्नामि अहं मणुस्साण ॥३५०८॥  
 गुणिणो नियगुणगरुयत्तणेण संपत्तभुयणसाहेज्जा ।  
 सव्वस्स वेक्खणीया इयरे पुण कत्थ वचं(च्चं)तु? ॥३५०९॥  
 आवइवडिए नणु निग्गुणे वि विवरंमुहा जे हवंति ।  
 निक्कुरुणयाए ताणं न होंति इहलोय-परलोया' ॥३५१०॥  
 तो भणइ खेत्तवालो 'जइ तुह नणु निगु(ग्गु)णे वि साहेज्जं ।  
 ता कुणसु, चोरभिलिओ साहू वि हु पावए मरणं ॥३५११॥

ता लड्डयं च जायं किं मह एएण होइ एक्केण ? ।  
 दोहिं वि जणेहिं होही मज्झ बुभुक्खाए उवसामो' ॥३५१२॥  
 तो देव ! खेत्तवइणो वयणं सोऊण तक्खणेणोसो ।  
 कोवानलपज्जलिओ करवालकरो समुल्लवइ ॥३५१३॥  
 'जह जह सुरो त्ति सविणयवयणेहिं भणामि पत्थणापुव्वं ।  
 तह तह अहिययरं चिय किं कज्जं कोवमुव्वहसि? ॥३५१४॥  
 जे होंति खुद्दजाई सुर व्व पुरिस व्व वामसब्भावा ।  
 एए न सामसज्जा दंडेण परं उवसमंति' ॥३५१५॥  
 इय भणिऊणं एसो उक्खयकरवालभासुरो पुरिसो ।  
 सहस त्ति खेत्तवालस्स अभिमुहं धाविओ देव ! ॥३५१६॥  
 तो सो दारुणदाढो एयं दट्ठूण संगरसयण्हं ।  
 उक्खिवइ उभयकरयलकयसंपुडसंठियं भणइ ॥३५१७॥  
 'किं तुह असिणा सिद्धं ? किं वा वयणेहिं पुव्वभणिएहिं ? ।  
 को एण्हिं तुह काही रक्खं करसंपुडगयस्स ? ॥३५१८॥  
 तो कह वि पाणिसंपुडपरिड्डिण्णेव देव ! एएण ।  
 छिदंतरेण छिन्ना दारुणदाढस्स मुहजीहा ॥३५१९॥  
 जा देव ! खेत्तवालो पीसइ कोवेण कणिसमिव एयं ।  
 ता कहमवि नीहरिओ आरुहइ सिरंमि तस्सेसो ॥३५२०॥  
 जाव पसारइ पाणिं उह्वं ता देव ! जाइ खंधंमि ।  
 खंधाओ सिरं वच्चइ पहणंतो खग्गपहरेहिं ॥३५२१॥  
 जा समयं च्चिय दोण्हिं(हि) वि करेहिं किर धरइ खेत्तवालो वि ।  
 ता एस पुण पविट्ठो पिहुलयरे सवणविवरंमि ॥३५२२॥

तो खरखग्गपरिक्खयमुहसवणविणीहरंतु(त)रुहिरोहो ।  
 कुणइ व्व खेत्तवालो संजायविसूइओ छड्ढिं ॥३५२३॥  
 तो देव ! एस पुरिसो किमिव्व विवरंतरेसु पसरंतो ।  
 धुणिकुण सिरं कहमवि विणिवडिओ धरणिवट्ठमि ॥३५२४॥  
 एत्थंतरंमि सहसा सो जोई सिद्धसयलमंतत्थो ।  
 समयमुट्ठिकुण धावइ बहुकोवो खेत्तवालस्स ॥३५२५॥  
 दट्ठूण सिद्धमंतं जोइंदं तस्स तेयमसहंतो ।  
 दारुणदाढो सहसा न जाणिओ कत्थ वि पणडो ॥३५२६॥  
 तो तं अपेच्छमाणो सो जोई भणइ 'सुयण ! न हु भंती ।  
 तुज्झ पसाएण महं संजाया मंतंसंसिद्धी ॥३५२७॥  
 जइ इह तुमं न हुंतो ताऽहं एयस्स करकवालंमि।  
 अत्ति(ति)हित्तं वच्चंतो अपरित्ताणो महासत्त ! ॥३५२८॥  
 ता किं बहु पलविज्जइ ? बाहिरवत्थूसु का किर थिरासा ? ।  
 नियजीविण कियं मह जीयं तुज्झ आयत्तं' ॥३५२९॥  
 एएण तओ भणियं 'भयवं ! भुयणोवयारिणो तुज्झ ।  
 बड्ढउ जीयं मह वुण मित्तेण समं हवउ जोगो' ॥३५३०॥  
 तो देव ! भणइ जोई 'तुह अज्ज वि बंधुयत्त ! संदेहो ? ।  
 पज्जालसु इह जलणं तो हुणिमो सेहरासोए ॥३५३१॥  
 हुणिएहिं तेहिं दोहि वि अपच्चवायं करेमि तुह कज्जं ।  
 जम्हा ते वि समत्था बहुविज्जा सिद्ध-मंता य ॥३५३२॥  
 ता आणसु समिहाओ अहं पि आणेमि पुण चियाजलणं' ।  
 एवं भणिकुण दुवे नियकज्जं काउमाढत्ता ॥३५३३॥

तो देव ! अम्ह जायं महाभयं जोइवयणसवणेण ।  
 पच्चक्खदिड्डफुरणा जोइस्स इमं विचिंतेमो ॥३५३४॥  
 'जइ केवलो हुणिज्जइ एत्थासोओ हवेज्ज ता लद्धं ।  
 जं अम्ह सामिसालो पहुणिज्जइ तं परमभदं' ॥३५३५॥  
 तो अम्हेहिं वि तुरियं चियग्गिणो पाणिण एण विज्झविया ।  
 षवणंजएण जोई पक्खित्तो जलनिहिजलंमि ॥३५३६॥  
 एसो वि देव ! पुरिसो जा भमइ अरन्नमज्झयारंमि ।  
 समिहाओ गवेसंतो ता दिट्ठो तत्थ अम्हेहिं ॥३५३७॥  
 सो अम्ह नत्थि खयरो इमस्स सवड(डं)मुहो[य] जो हवइ ।  
 तो एण सखगं रुक्खे ओलंबियं सहसा ॥३५३८॥  
 तो अवसरं मुणेउं मिल्लिऊणं देव ! एस सच्चेहिं ।  
 अम्हेहिं सुदिढदोरयसंदाणियविग्गहो बद्धो ॥३५३९॥  
 दट्ठूण देव ! एसो अम्हे इसीसि वियसियकवोलो ।  
 कयपच्छामुह-बाहू उवट्ठिओ अम्ह पासंमि ॥३५४०॥  
 इय देव ! एस पुरिसो तुहावयारि ति आणिओ एत्थ ।  
 संपइ तुमं पमाणं भणिउं तुन्हिक(क्क)या जाया ॥३५४१॥  
 इय एवं सोऊणं वुत्तंतं बंधुयत्तसंबद्धं ।  
 हिययंमि वीरसेणो विसूरिउं अह समाढत्तो ॥३५४२॥  
 'हा हा ! मज्झ विओए एगागी कह सपच्चवायंमि ।  
 नियजीवियनिरवेक्खो मह मित्तो भमइ रन्नंमि ? ॥३५४३॥  
 एयारिसाण पायं भुवणुवयारीण पुरिसरयणाण ।  
 चिंतामणीण व जए उप्पत्ती होइ पुत्रेहिं ॥३५४४॥

ता सव्वहा मए कयमसुंदरं जं इमस्स अकहंतो ।  
 नीहरिओ हं पुत्विं चंदिसिरिगवेसणासाए ॥३५४५॥  
 किं चिंतिएण ? अहवा जं जह भव्वं तहेव तं होइ ।  
 निसुणेमि ताव संपइ पडिवयणं सेहरस्सावि' ॥३५४६॥  
 तो कुविउब्भडसुहडेहि रोसिओ सेहरो अइथिरो वि ।  
 संजाओ 'बहुरविवसदुसहो(?) खयकालदिवसो व्व ॥३५४७॥  
 अच्च्युब्भडभिउडीभंगभीसणं सहइ तस्स भालयलं ।  
 बद्धपराभवसेयंबुचडणसोवाणपंतिव्व ॥३५४८॥  
 अमरिसवसदद्वाहरभासुरमुहमंडलो निरुंभेइ ।  
 दुव्वयणुच्चरणपरं परंमि नियव[य]णकमलं व्व ॥३५४९॥  
 कोववसारुणलोयणदुपे(प्पे)च्छे नयणपसइनिवहेहिं ।  
 चंदसिरीअणुरायं हिययटियं खिवइ बाहिं व ॥३५५०॥  
 इय सो खयराहिवई सेहरो ताण वयणपवणेण ।  
 पज्जलियकोवहुयवहदुदंसणो भणिउमाढत्तो ॥३५५१॥  
 'रे पावकम्म ! संपइ जो रक्खं कुणइ तं न पेच्छामि ।  
 नियदुसहकोवहुयवहजालासु तुमं चिय हुणेमि ॥३५५२॥  
 जायंति मरणकाले मणुयाण सुनिच्छियं कुबुद्धीओ ।  
 को तुज्झ दुट्ठ ! दोसो पक्खाओ पिपीलियाणं व ?' ॥३५५३॥  
 इय सेहरदुव्वयणं सोउं तो भणइ बंधुयत्तो वि ।  
 'रक्खाखमो सुमित्तो अहवा मह दो वि भुयदंडा' ॥३५५४॥  
 तो सेहरेण भणियं 'ता किं न भुएहिं रक्खिओ पुत्विं ।  
 जं बंधिरुण इहइं आणीओ चोरपुरिसो व्व ?' ॥३५५५॥

१. बहुरविवस० ला. ॥

तो भणइ बंधुयत्तो 'नरेण कज्जत्थिणा सहेयव्वं ।  
वह-बंधणाइ सव्वं निसुणसु कप्पडियनाएण' ॥३५५६॥  
इह अत्थि दक्खिणावहदेसे पच्चंतभूमिभायंमि ।  
**सालिग्गामो** नामं गामो धण-धन्नसंपुत्रो ॥३५५७॥  
तत्थेगो वाणियओ निवसइ बहुविहव-संपयसमेओ ।  
धणवालनामधेओ तस्स सुओ कत्तिओ नाम ॥३५५८॥  
ते दोन्नि वि पिय-पुत्ता चिट्ठंति सुहं सकम्मकरणपरा ।  
घय-लवण-तेल्ल-तंदुल-वत्थाई विक्किणंता य ॥३५५९॥  
अह अन्नया समीवो गामो उल्लूडिऊण भिल्लेहिं ।  
धण-धन्न-वत्थ-परियण-बहुगोहणसंजुओ नीओ ॥३५६०॥  
तो तं संनिहिगामं दट्ठुं भिल्लेहिं लूडियं सहसा ।  
**सालिग्गामजणो** वि य सासंको आसि भिल्लभया ॥३५६१॥  
तो सेट्ठिणा पभणिओ नियपुत्तो 'पुत्त ! कत्थ गोवेमो ।  
एयं पभूयदव्वं ? ता गुविलं ठणमन्निससु ॥३५६२॥  
इय लूडियंमि गामे दूरनिहित्तो वि गेहमज्झंमि ।  
खणिऊण सयं नीओ अत्थो भिल्लेहिं पल्लीए ॥३५६३॥  
ता पुत्त ! नियगेहाओ कत्थ वि अण्णत्थ गोविमो अत्थं' ।  
इय भणिए जणएणं पडिवयणं भणइ पुत्तो वि ॥३५६४॥  
'ताय ! इह गामवाहिं सुन्नं देवउलमत्थि वित्थिण्णं ।  
तत्थत्थं ठवेमो रयणीए अलक्खिया दौवे' ॥३५६५॥  
'एवं'ति मन्निऊणं अत्थं घेत्तूण दो वि पिय-पुत्ता ।  
रयणीए गया तुरियं अलक्खिया सुन्नदेवउलं ॥३५६६॥

गंतूण तेहिं(हि) खणियं गब्भहरं तत्थ ञविओ अत्थो ।  
 काउमलक्खपएसं विणिग्गया गब्भवणाओ ॥३५६७॥  
 तो जणएणं भणिओ पुत्तो 'जोएसु देउलं सयलं ।  
 मा को वि इत्थ होही कप्पडिओ इत्थ पहिओ वा' ॥३५६८॥  
 तो पुत्तेण य सयलं गवेसमाणेण देउलं दिट्ठो ।  
 एगो कोणे पडिओ कप्पडिओ मडयनिच्चेट्ठो ॥३५६९॥  
 हक्कारिऊण पियरं तं दंसइ तो पिया पुणो भणइ ।  
 'उट्ठवसु' कत्तिएणं उट्ठविओ जाव निच्चेट्ठो ॥३५७०॥  
 जोयइ सासूसासे न लक्खए ते वि कत्तिओ तस्स ।  
 'मडयमिणं वच्चामो निज्जीवं ताय !' इय भणइ ॥३५७१॥  
 सो भणिओ जणएणं 'पुत्तय ! जइ मडयमेव ता किं न ।  
 ओसूणं गंधो वा होइ न एयस्स अइदुस्स(स)हो ॥३५७२॥  
 ता कुणसु मज्झ बुद्धिं छिन्नसु एयस्स नासियं ताव' ।  
 पुत्तेण निव्वियप्पं निच्छिन्ना नासिया तस्स ॥३५७३॥  
 तह वि न जंपइ न चलइ पुणो वि पिउणा सुओ इमं भणिओ ।  
 'एण्हि छिन्नसु कत्रे' सुएण ते दो वि तह च्छिन्ना(छिन्ना) ॥३५७४॥  
 तो जायपच्चाएहिं मडयमिणं निच्छियं कहं इहरा ।  
 नासा-कन्नच्छेए थोवं पि तणुं न चालेइ ? ॥३५७५॥  
 इय दो वि निव्वियप्पा पिय-पुत्ता सगिहमागया सुत्ता ।  
 सो देवउलपसुत्तो कप्पडिओ उट्ठिओ सहसा ॥३५७६॥  
 अह उट्ठिऊण खणियं गब्भहरं कट्ठियं च तं दव्वं ।  
 थोवं कयं सहत्थे सेसं अण्णत्थ निक्खणियं ॥३५७७॥

तो सो पहायसमए कप्पडिओ तस्स चव सेट्टिस्स ।  
कय-विक्रयत्थमप्पइ दसटंके कंचणुकि(क्कि)त्रे ॥३५७८॥  
तो दट्ठुणं सेट्ठी ते टंके मुणइ मह इमे निययं ।  
तो निव्वियारचित्तो कप्पडियं भणइ दढ्हियओ ॥३५७९॥  
‘कप्पडिय ! तए सरिसो साहसिओ नत्थि एत्थ पुहईए ।  
कह सहियमविचलेणं नियनासा-कन्नकप्परणं ?’ ॥३५८०॥  
कप्पडिएणं भणियं ‘सच्चमिणं सेट्ठी ! दूसहं एयं ।  
किं तु नरो कज्जत्थी तं नत्थिन जं इह सहेइ’ ॥३५८१॥  
‘ता निब्भगि(गि)यसेहर ! रे सेहर ! मा, इमं वियप्पेहि ।  
कज्जत्थिणा मए च्चिय अप्पा बंधाविओ एवं’ ॥३५८२॥  
एत्थंतरंमि सोउं पहुदिन्नं तेण दुसहदुव्वयणं ।  
सविलक्खमिव असेसं पक्खुहियं सेहरत्थाणं ॥३५८३॥  
सव्वेहिं(हि)वि समकालं सेहरसुहडेहिं बंधुयत्तंमि ।  
कोवानलजालाओ व पक्खित्ता सोणदिट्ठीओ ॥३५८४॥  
जालामुहेण पजलियकोवमहाजलणभीसणमुहेण ।  
सहस त्ति करो खत्तो सखग्गमुट्ठीए तव्वेलं ॥३५८५॥  
पुण दुद्धरेण संगरदुद्धरधुरभारधरणधवलेण ।  
दुव्वयणदूसिएणं सहसा संभालिया च्छुरिया ॥३५८६॥  
विसमत्थेण वि उहं जा रोसपरव्वसेण उक्खित्ता ।  
सा पहुभएण पुणरवि संवरिया नियकरचवेडा ॥३५८७॥  
रणहरिसभडेण पुणो पडिसदु(दु)त्तत्थखयरनिवहेण ।  
गुंजिरगिरिकुहरंतो मुक्का कुविएण हुंकारा ॥३५८८॥



अरिकेसरी वि सहसा रोसावेसेण परव्वसो मुयइ ।  
 निययासणं सहेलं संमुहमरिणो सरइ सणियं ॥३५८९॥  
 अफा(प्फा)लइ धरणियलं करेण कोवुब्भडो सुभीमो वि ।  
 पहुणा पडिसिद्धो वि हडेण निसढो समुद्धाइ ॥३५९०॥  
 पुण रोसनिब्भरंगो भणइ महाभैरवो फुरंतोद्धो ।  
 'रे बंधुयत्त ! एवं किर कस्स बलेण पलवेसि ? ॥३५९१॥  
 एत्तियमेत्तेणं चिय मत्तो सि न चेयसे अरे ! किंपि ।  
 जं कह वि देवजोगा छुट्ठे तं खेत्तवालस्स ॥३५९२॥  
 जइ कर-कन्न-चवेडानिबिडनिवाथाण कह वि उव्वरिओ ।  
 ता किन्न मसयमारणसत्ती नणु नारणिंदस्स ?' ॥३५९३॥  
 भैरववयणं सोउं सावडुंभं च सावलेवं च ।  
 उवहसिऊणं सुहडे भणइ पुणो बंधुयत्तो वि ॥३५९४॥  
 'रे जालामुहपमुहा ! सुहडा ! सव्वे वि सुणह मह वयणं ।  
 किं फरडवरीए ममं(म) बीहवह रणमहाविट्ठं ? ॥३५९५॥  
 इह खग्ग-खग्गधेणूमुट्ठिगहेण करचवेडाहिं ।  
 हुंकारमेत्तकेणं बाला बीहंति न य सुहडा ॥३५९६॥  
 जाव न तिक्खसमुक्खयक्ख(ख)ग्गपहारा उरेण घेप्पंति ।  
 ताव न बहुरणविद्धा हवंति विवरंमुहा रिउणो ॥३५९७॥  
 'कस्स बलेणं पलवसि ?' इय भणियमिहासि भैरव ! तए जं ।  
 तं निसुणसु तुह कहिमो जंपामि बलेण जस्साइहं ॥३५९८॥  
 इय अत्थि जयपसिद्धो दुत्थियज्जणकप्पपायवो वीरो ।  
 मेइणिकन्नवयंसो लच्छिलयामूलकंदो य ॥३५९९॥

अरि करडिघडाविहडणकंठीरो वीरचक्कवट्टी य ।  
 जो कमलकेउकंतावेहव्वपयाणविकखाओ ॥३६००॥  
 नामेण वीरसेणो जंपामि बलेण तस्स चेवाहं ।  
 जं खेत्तवालवयणं भणियं तं सुणसु रे मूढ ! ॥३६०१॥  
 सूराण परपओयणतिणसमपरिगणियनिययजीयाण ।  
 ते खेत्तवालमाई मरणुवगरणाणि व हवंति ॥३६०२॥  
 एस रिऊ बलवंतो अवलोयंताण होंति न वियप्पा ।  
 सत्तगुणद्वियनियतणुतुलाए तोलंति नियजीयं' ॥३६०३॥  
 तो सेहरेण भणियं 'जालामुह ! सव्वमेव नणु लद्धं ।  
 एएण पाविणं चंदसिरी वीरसेणो वि ॥३६०४॥  
 पेच्छ महाधिद्वत्तणमिमस्स नीसंकमेव मह पुरओ ।  
 जं चुल्लभाउणो वेरियस्स नामं समुच्चरइ ॥३६०५॥  
 आघट्टइ व्व हिययं नामं पि हु तस्स वीरसेणस्स ।  
 जं पुण तग्गुणसवणं तं मन्ने मरणमिव मज्झ ॥३६०६॥  
 अन्नं च न होंति इमे सामन्नमणुस्सजाइणो रिउणो ।  
 आलावेहिं वि न मुणह इमस्स गरुयत्तणं हियए' ॥३६०७॥  
 एत्थंतरंमि सहसा पच्छयंतो नहंतरालोयं ।  
 नियसेन्नसमुदएणं संपत्तो पवणकेऊ वि ॥३६०८॥  
 तो चरपुरिसायन्नियससेन्नभरचुल्लभाउआगमणं ।  
 सहरिसमूससिओ इव सेहरओ हिययमज्झंमि ॥३६०९॥  
 तो पवणकेउ-सेहरबलाइं बहुमच्छराइं सहसत्ति ।  
 खयकाले पुव्वावरजलहिजलाइं व मिलियाइं ॥३६१०॥

अन्नोन्नदंसणुल्लसियहरिसवसजायबहलपुलयंगा ।  
 जहजेडुकयपणामा उवविट्ठा पवण-सेहरया ॥३६११॥  
 एत्थंतरमि चिंतइ विज्जाहरबलभरं निएऊण ।  
 घणचंदणदुमपल्लवतिरोहिओ वीरसेणो वि ॥३६१२॥  
 'एएहिं किर बहूहिं वि किं सिज्जइ निफु(प्फु)रेहिं खयरेहिं ? ।  
 हरिणेहिं सुरुट्टेहिं वि किं किज्जइ हरिणरायस्स ? ॥३६१३॥  
 ता एत्थ संट्टिओ च्विय निएमि किं कीरणे बहूहिं पि ।  
 एएहिं पवण-सेहरभडेहिं किर बंधुयत्तस्स ?' ॥३६१४॥  
 इव जाव वीरसेणो चिंतइ ता तत्थ गयणमग्गाओ ।  
 हंसिं व बंधुजीवा(वं) पेच्छइ दूरा अवयरतिं ॥३६१५॥  
 दट्ठण बंधुजीवं ससंभमो सविणयं नमोक्करइ ।  
 कुमरो 'कुओ' त्ति पुच्छइ कुसलाई सयलवुत्तंतं ॥३६१६॥  
 तो सा पभणइ 'पुत्तय ! वेयड्डं पत्थिया समुद्दाओ ।  
 जा जामि ताव दिट्ठं गयणं विज्जाहराइन्नं ॥३६१७॥  
 जाणेहिं विमाणेहिं य विसरिसचिंधेहिं तूरसहेहिं ।  
 पच्चभिनायमिणं जह सेन्नमिणं पवणकेउस्स ॥३६१८॥  
 मुणिउं च समाढत्तं विज्जासामत्थेओ अलक्खाए ।  
 कत्थेयं संचलियं कस्सुवरिं रणरसुकं(क्कं)ठं ॥३६१९॥  
 तो अन्नोन्नाभासणपरखेयरनिसुयकज्जगब्भाए ।  
 परिनिच्छियं मए जह चलियमिणं वीरसेणुवरिं ॥३६२०॥  
 ता पुत्त ! पवणकेऊ भाउयवेरेण वैरिओ होइ ।  
 एक्कगणाहिलासेण सेहरो सो वि तुह वेरी ॥३६२१॥

इय दो वि तुज्झ उवरिं सव्वारंभेण आगया एए ।  
 वहिरुण वीरसेणं हढेण बालं गहिस्सामि ॥३६२२॥  
 एगागिणो(णा)वि जेणं जलहिनिहित्ता वि वीरचरिएण ।  
 हंतुमसोयं गहिया चंदसिरी वीरसेणेण ॥३६२३॥  
 सो एक्केण न जिप्पइ सेहरकुमरेण अहव पवणेण ।  
 एएण कारणेणं मिलिया ते दो वि एक्कत्थ ॥३६२४॥  
 एवं मुणिरुण अहं गवेसमाणा तुमं इहं पत्ता ।  
 ता पुत्त ! सावहाणो संपइ कज्जाइं चित्तसु ॥३६२५॥  
 अत्रं च मए पुत्तय ! नियपुत्ताणं पि सुद्धिकम्पुत्थं ।  
 वज्जगइनामधेओ वेय्हं पेसिओ खयरो' ॥३६२६॥  
 तो भणइ वीरसेणो 'पयईए हवंति जणणिहिययाइं ।  
 नेहाउराइं तम्हा साहु कयं आगया जमिह ॥३६२७॥  
 एय(यं)मणागमणुच्चि(चि)यमायरियं चंदसेहर-सुवेगा ।  
 जमिहागमणेण इमे मह मणपीडं करिस्संति ॥३६२८॥  
 किं अम्ब ! पलविएणं ? तुह पुत्तो वि हु न होमि, किं बहुणा ? ।  
 जेऊणं दो वि बले जयसदं जइ न गेण्हामि ॥३६२९॥  
 जह न च्छ(छ)लिज्जसि केण वि तहा तुमं अंब ! जलहितीरंमि ।  
 गंतूण रक्ख देविं जिणामि जा खेयरे सव्वे' ॥३६३०॥  
 तो भणइ बंधुजीवा 'मा मुणसु असारथेरिमेत्तं मं ।  
 मह भुयणे वि असज्झं न किं पि चके(के)सरिबलेण ॥३६३१॥  
 ता पुत्त ! तुमं दूरे अहमेव इमाण खेयरबलाण ।  
 जलणसिह व्व तणाणं सुबहूण वि किं न पवहामि(पहवामि) ? ॥३६३२॥

ता पुत्त ! मह बलेणं नीसंको जिणसु सत्तुसंघायं ।  
 को संमुहं पि जोयइ विचित्तजसरायधूयाए ? ॥३६३३॥  
 इय एवं सावहंभवयणे संजायपच्चयं कुमरं ।  
 काऊण बंधुजीवा संपत्ता चंदसिरिपासं ॥३६३४॥  
 अइ तइया वीरउरे कुमरेणं जो पबोहिओ पुत्विं ।  
 सो अवसरो त्ति मुणिउं संपत्तो रक्खसो तुरियं ॥३६३५॥  
 तो तेण सबहुमाणं सविणयमहिणंदिऊण सप्पणयं ।  
 कुमरो सहावपेसलसललियवायाए इय भणिओ ॥३६३६॥  
 'उप्पन्नो सि जयस्स वि कओवयारो न केवलं मज्झ ।  
 अप्पडिहयपयावो रवि च्च हयवेरितिमिरोहो ॥३६३७॥  
 कह तुज्झ पडिहणिज्जइ तेओ तेयंसिएहिं इयरेहिं ? ।  
 जाव न विफु(प्फु)रइ रवी ताव च्चिय तारयापसरो ॥३६३८॥  
 इह तिहुयणे तुमं चिय साहेज्जं कुणसि नीसहायाण ।  
 सो उण हुओ न होही जो तुह साहेज्जयं काही ॥३६३९॥  
 अम्हारिसा नरेसर ! तुह तिच्चपयावजलणधूमं च्च ।  
 घणवेरिंधणनिवहं निद्वहिउं होंति न समत्था ॥३६४०॥  
 तो तुज्झ अहं दासो तुमए करुणाधणेण परिकिणिओ ।  
 मह विज्जाहरपुंजयअवहरणे देहिं आएसं' ॥३६४१॥  
 तो तच्चयणं सोउं सप्पणयं भणइ वीरसेणो वि ।  
 गरुयत्तणस्स उचियं जं किर तं जंपियं तुमए ॥३६४२॥  
 ताव च्चिय गुणनिवहो दूरं विफु(प्फु)रइ निम्मलगुणाण ।  
 जाव न अप्पपसंसापंकेणं सकलुसिओ होइ ॥३६४३॥

जह जह गुरुयगुणा वि हु अप्पाणं निग्गुणं व पयडंति ।  
 जायाहिनिवेसा इव तह तह गरुया गुणा होंति ॥३६४४॥  
 ता किं भन्नइ तुह किर सोजन्नं तमिह जं असामन्नं ।  
 तुह जायअवट्ठंभो धूलिं व गणेमि खयरबलं' ॥३६४५॥  
 कुमरस्स रक्खसस्स य इय एवं जाव होंति आलावा ।  
 ता पवणकेउणा वि य सेहरओ पुच्छिओ एवं ॥३६४६॥  
 'को एस नरो बद्धो ? केण व कज्जेण ? कस्स संबंधो?'  
 तो सेहरेण कहिओ वुत्तंतो बंधुयत्तस्स ॥३६४७॥  
 तो भणइ पवणकेऊ 'जइ ता एयस्स एरिसो गब्बो ।  
 ता किं न संपयं चिय पयडइ सुहडत्तणं एसो ?' ॥३६४८॥  
 एत्थंतरंमि सहसा रणरसपसरंतबहलपुलयंगो ।  
 सो बंधुयत्तसुहडो तोडइ भुयबंधणं ज्जत्ति ॥३६४९॥  
 अह विहडावियभुयदंडबंधणो खयरकयचमक्कारो ।  
 अफा(प्फा)लइ भुयदंडं रवबहिर(रि)यगिरिदरीविवरं ॥३६५०॥  
 अह निबिडभुयप्फालणपडिसद्धुम्मीससद्धरणतूरो ।  
 वट्ठियसमरुच्छाहो आवडिओ पवणकेउस्स ॥३६५१॥  
 गंतूण पवेगेण व पडिपेल्लियमग्गभडसहस्सेण ।  
 तस्स सिरग्गनिबद्धो निद्वलिओ विमलमणिमउडो ॥३६५२॥  
 तो भणइ बंधुयत्तो 'रे रे हयपवणकेउ ! तुह पढमो ।  
 नियगव्वतरुसमुग्गयनवंकुरो दंसिओ एस ॥३६५३॥  
 तुह भुयसाहा-सिरकुसुमच्छेयरुहिरोहदिन्नडोहलओ ।  
 पच्छ मज्झा समीहियफलेहिं दप्पहुमो फलिही' ॥३६५४॥

१. पवंगेण ला. ॥

तो दप्प(प्पु)द्धुरबहुविहविज्जाहरकोडिनिबिडकयवेढे ।  
 कुमरेण पेसिऊणं रक्खसमाणाविओ मित्तो ॥३६५५॥  
 दट्ठूण बंधुयत्तो कुमरं हरिसुल्लसंतरोमंचो ।  
 बाहपवाहकणारियकमकमलं नमइ संतुद्धो ॥३६५६॥  
 दूरपसारियबाहू कुमरो वच्छयलपीडियं धरइ ।  
 अइनेहेण सहियए पवेसयंतो व्व वरमित्तं ॥३६५७॥  
 तो भणइ बंधुयत्तो 'दिद्धा देवी कहिं पि ?' सो कहइ ।  
 संखेवेण असेसं चंदसिरीलाहवुत्तंतं ॥३६५८॥  
 संजायपरमसंतोससुहियहिययस्स बंधुयत्तस्स ।  
 संपत्तभुयणरज्जाहिसेयसोक्खं व संजायं ॥३६५९॥  
 तो भणइ वीरसेणो 'निवसंतो तुज्झ हिययमज्झंमि ।  
 किं दिद्धो म्हि न जेणं गवेसमाणो ममं भमसि ?' ॥३६६०॥  
 एवं जा किर कुमरो जंपइ ता बंधुयत्तमनियंता ।  
 विज्जाहरा सकोवा गवेसिउं तं समाढत्ता ॥३६६१॥  
 'काउ व्व कह पणद्धो ज्झडप्पिऊणं सिरि महारायं ।  
 तह वेढिओ वि नूणं बहुविज्जालद्धिसंपन्नो ॥३६६२॥  
 ता जइ तं पावेमो संपइ पावं पदंसियवियारं ।  
 ता तस्स चेव जोग्गं काहामो किं वियप्पेण ?' ॥३६६३॥  
 इय जंपंते सोउं खयरे तो भणइ बंधुयत्तो वि ।  
 'देव ! इह चेव चिद्धह तुब्भे जुज्झामि ताव अहं' ॥३६६४॥  
 तो कुमरेणं भणिओ रक्खसराया 'करेहि साहेज्जं ।  
 मित्तस्स जाहि समयं संगरभूमीए तूरंतो' ॥३६६५॥

तो रक्खसेण भणियं 'करालजंघो त्ति रक्खसो अत्थि ।  
मह रक्खसबलसेणाणाहो बलविरियसंपन्नो ॥३६६६॥  
सो जाउ अणेण समं अहं पि न चएमि देव ! तुह पासं ।  
जेणेस खयरलोओ बहुमाओ होइ बहुसत्ती' ॥३६६७॥  
तो रक्खससंपाडियमणचिंतियविविहपहरणसमेओ ।  
रणभूमिं संपत्तो हक्कंतो बंधुयत्तो वि ॥३६६८॥  
'अरे अरे अरे'त्ति सरहसहक्कारवबहिरियंबरो होउं ।  
पडियाहुयिच्च जलणो पज्जलिओ बंधुयत्तभडो ॥३६६९॥  
'रे विज्जाहरसुहडा! निसुणह मा भणह जं न किर कहियं ।  
सव्वे वि य समकालं पहरह मह एक्कुवेहस्स' ॥३६७०॥  
एक्के(क्कं)गेण वि सिरिबंधुयत्तसुहडेण खयरबलाइं ।  
आसंधियाइं हियाए दवग्गिणा काणणाइं व ॥३६७१॥  
अह खयरबलं बहलुल्लसंतरणरहसपुलयपब्भारं ।  
चलियं चलंतभडथडवियडयरनिबद्धपहदेसं ॥३६७२॥  
आकन्नंतायट्ठियविसालकोयंडदीहनयणेहिं ।  
'कत्थ रिउ'त्ति सकोवं दूराओ(उ) नियंति व बलाइं ॥३६७३॥  
कोसायट्ठियसुनिसियकरालकरवालकयकरग्गाइं ।  
दीसंति भीसणाइं निग्गयजीहाइं व बलाइं ॥३६७४॥  
धणु-कणय-कुंत-तोमर-नारायद्धिद-खर-खुरुप्पेहिं ।  
धावल्ल-सेल्ल-सव्वलभ्भ(?)-समोग्गर-खग्गमूलेहिं ॥३६७५॥  
इय एयमाइ बहुविहपहरणसयभीसणेहिं सेन्नेहिं ।  
घणवंद्रेहिं व विंज्झो संछन्नो बंधुयत्तभडो ॥३६७६॥



थिरहियएण असेसं पडिच्छियं तं बलं सुवीरेण ।  
 समकालमुक्कबहुविहपहरणमणकिरणदुप्पेच्छं ॥३६७७॥  
 तह तेहिं चउदिसासुवि समंतओ वेढिऊण सो निहओ ।  
 आपायसिराओ जहा(ह) पहरणपुंजेण संछन्नो ॥३६७८॥  
 तो मुहनिहित्तकरयल-कयकलयलराववड्डियाणंदं ।  
 विज्जाहराण सेत्रं उच्छलियं तक्खणं च्चेय ॥३६७९॥  
 तो निसुयखयरकलयलविवड्डियामरिसवसफुरंतोड्डो ।  
 सीहो व्व धुणियदेहो विणिग्गओ सत्थपुंजाओ ॥३६८०॥  
 तं निसियविविहपहरणअदिड्डवण-रुहिरनिग्गमं वीरं ।  
 दट्ठूण खयरसेत्रं समुड्डियं सभयमिव जायं ॥३६८१॥  
 तो सो धणुहनिवेसियनारायनिवायनिहयखयररोहो ।  
 सिसिरो व्व पाडयंतो उत्थरिओ खयरसिरकमले ॥३६८२॥  
 एक्केण वि तेण रणे असंखसरनियरमेक्कमुट्ठीए ।  
 मेल्लंतेण ससल्लो सो नत्थि न जो कओ सुहडो ॥३६८३॥  
 दोखंडियधणुदंडो धाणुक्को कोइ च्छु(छु)रियमुक्खणइ ।  
 छिन्नोभयभुयसिहरो वियरइ दंडो व्व रणमज्झे ॥३६८४॥  
 अन्नेको(क्को)पुण सुहडो निरंतरं सरसमूहभिन्नंगो ।  
 संगहियपुंखपवणो गिद्धेहिं समं नहे भमइ ॥३६८५॥  
 अणवरयमुक्कघणसरछिन्नभुयापडियपहरणगणेहिं ।  
 नियएहिं चिय खयरा जंति खयं नं अपुन्नेहिं ॥३६८६॥

अन्नेकू पुण अद्धिदबाणच्छि(छि)न्नेण निययसीसेण ।  
 नियत्तणठिएणं चिय जुञ्जइ रोसुब्भडो सुहडो ॥३६८७॥  
 इय तेण सरनिरंतरसंछाइयनहि(ह)यलेण वीरेण ।  
 खयराण चउत्थंसो निवाडिओ बंधुयत्तेण ॥३६८८॥  
 अह तस्स विसमसरघायजज्जरं खेयराण तं सेन्नं ।  
 ओहट्टं चलिओयहिसलिलं पिव चत्तमज्जायं ॥३६८९॥  
 दट्ठण तं बलं तं विमुक्कनियविक्कमं भउब्भंतं ।  
 अह थक्कइ तथे(त्थे)क्को सेणवई पवणकेउस्स ॥३६९०॥  
 नामेण वज्जवाहू बहुविज्जो वज्जनिट्ठुरसरीरो ।  
 सो बंधुयत्तवीरं सक्क(क)क्कसं भणिउमाढत्तो ॥३६९१॥  
 'रे ! थिरचित्तो होउं मह पुरओ ठहि ठहि खणमेत्तं ।  
 एण्हि चिय नीसेसं तुह दप्पं जेण अवणेमि' ॥३६९२॥  
 एवं भणिउं चउरो कन्नंतायट्ठिएण दढधणुणा ।  
 मुक्का सेणावइणा निसियसरा बंधुयत्तस्स ॥३६९३॥  
 तेणावि विहसिऊर्णं अट्ट सरा पेसिया तयद्धेहिं ।  
 कप्परिया तस्स सरा इयरेहिं हओ उरे वज्जो ॥३६९४॥  
 वज्जेण तेओ सोलस सिलीमुहा पेसिया सकोवेणं ।  
 बिउणेहिं बंधुयत्तो दोखंडइ तस्स धणुदंडं ॥३६९५॥  
 तो खंडियं निएउं नियकोदंडं पयंडकयकोवो ।  
 गेण्हइ गयं सरोसो पुण मेल्लइ बंधुयत्तस्स ॥३६९६॥

तो निट्ठुरमुक्कगयापहारदिढमुडियधणुहरो वीरो ।  
 तह उरयडंमि निहओ जह जाओ मीलियच्छिउडो ॥३६९७॥  
 पुण लद्धचेयणेणं कयरोसं रक्खसाणुहावेण ।  
 संचरइ करे गरुओ मोगगरओ बंधुयत्तस्स ॥३६९८॥  
 तो उभयभुयापर(रि)मुक्कगरुयमोगगरपहारनिद्वलिओ ।  
 सहस त्ति अडधडंतो पडिओ धरणीए सेणवई ॥३६९९॥  
 पडियंमि तंमि सुहडे खयरसेत्राण जायदुक्खाण ।  
 समकालमोत्थरंतो 'हा हा' सद्धो समुच्छलिओ ॥३७००॥  
 एत्थंतरंमि निहए सेणाहिवक्ज्जबाहुवीरंमि ।  
 'गरुओ रिउ'त्ति ताणं जाओ चित्ते चमक्कारो ॥३७०१॥  
 एत्थावसरो सेहरनरवइसंपत्तगरुयआएसो ।  
 जालामुहो त्ति बीओ सेणानाहो समुच्छलिओ ॥३७०२॥  
 पजलंतजलणजालाभासुरसव्वाउहाण तेएण ।  
 दट्ठुं पि बंधुयत्तो तं न खमो जुज्झिउं दूरे ॥३७०३॥  
 तो भणइ बंधुयत्तो करालजंघं 'किमेयमच्छरियं ? ।  
 पलयानलो व्व एसो पसरइ सवडंमुहो मज्झ?' ॥३७०४॥  
 तो रक्खसेण भणियं 'होहि थिरो वीर ! किं पि मा भाहि ।  
 तुह तेए च्चिय पडिही सलहो व्व इमो न संदेहो' ॥३७०५॥  
 एत्थंतरंमि पत्तो कोवं व मुहेण उव्वमंतो सो ।  
 तुइंतविविहजालानिवहं वयणेण मेल्लंतो ॥३७०६॥

तो तेण तक्खण च्विय तुरियपयं धाविऊण खयरेण ।  
 अवरुंडिऊण धरिओ सकोवमिव बंधुयत्तभडो ॥३७०७॥  
 धरियंमि बंधुयत्ते सहसा तालं खलेहिं दाऊण ।  
 बद्धो त्ति वासणाए हसियं नीसेसखयरेहिं ॥३७०८॥  
 बहुधवणिधवियहुयवहतत्तायसनरकयंगदेहो व्व ।  
 जालामुहो पमेल्लइ धरियं पि हु बंधुयत्तभडं ॥३७०९॥  
 मुक्कंमि बंधुयत्ते रक्खसनाहाणुहावजा(जो)एण ।  
 जालामुहो वि गहिओ पलयमहाहुयवहेणं व ॥३७१०॥  
 तो पजलंतहुयासणजालासयमज्झसंठिओ सुहडो ।  
 नियसामि(?)लज्जिओ इव पुंजो च्छारस्स संजाओ ॥३७११॥  
 छारावसेसमेत्ते जाए जालामुहंमि खयरबले ।  
 सहस त्ति खेयराणं अक्कंदरवो समुच्छलिओ ॥३७१२॥  
 इय पवणकेउ-सेहरपरिवाडिनिवाडिउब्भडभडोहो ।  
 जाओ खयरभडाणं भयावहो बंधुयत्तभडो ॥३७१३॥  
 तो विच्छायभडोहं खयरबलं पेच्छिऊण आरुद्धो ।  
 उद्धइ पहिद्धवयणो जमदाढो नाम नरवालो ॥३७१४॥  
 जो देव-दाणवाणं दिन्नभयो सयलसत्तखयकालो ।  
 हरि-हर-पियामहाणं जमो व्व परिखंडियपहावो ॥३७१५॥  
 सो नियविक्कुमगरुयावलेवतिणगणियतिहुयणभडोहो ।  
 विविहाउहो सरोसं अब्भिद्धो बंधुयत्तस्स ॥३७१६॥  
 जमदाढेण सरोसं भणिओ सिरिबंधुयत्तनरनाहो(मंतिवरो?) ।  
 'जइ भूगोयर ! सहिओ मह घाओ ता तुमं सुहडो' ॥३७१७॥

खय मणिऊण तओ पहओ दंडेण सिरपएसंमि ।  
 सहस ति मीलियच्छे सरक्खसो निवडिओ भिच्चो ॥३७१८॥  
 पुण लद्धवेयणेणं भिच्चेण सरक्खसेण सहस ति ।  
 नियदंडेणं पहओ जमदाढो तह वि निमिलाणो ॥३७१९॥  
 उद्दालिऊण दंडं हढेण पुण खेयरेण दोखंडे ।  
 काऊण तस्स दंडो पक्खित्तो गयणमग्गंमि ॥३७२०॥  
 तो धाविऊण धरिओ जमदाढमहाभडेण रोसेण ।  
 पाएसु बंधुयत्तो भमाडिओ पुण नहद्धंमि ॥३७२१॥  
 उद्धं भमाडिऊणं अच्छेडइ जाव महियले भिच्चं ।  
 ता हक्किओ सरोसं जमदाढो वीरसेणेण ॥३७२२॥  
 तो वीरसेणदंसणसविब्भमुब्भंतनेत्तपत्तेहिं ।  
 जमदाढजीवियासा प(पा)मुक्का खयरलोएहिं ॥३७२३॥  
 तो सो दूराओ च्चिय भिच्चं मोत्तूण वीरसेणस्स ।  
 अहिधावंतो समुहं भिन्नो तिक्खग्गकुंतेण ॥३७२४॥  
 नियकायबलेण तओ कुंतं दोखंडिऊण ओसुरिओ ।  
 कयखग्ग-खेडयकरो उप्पइओ गयणमग्गंमि ॥३७२५॥  
 उप्पयमाणस्स तओ तुरियं आरोविऊण कोदंडं ।  
 संधियअद्धंदुसरो जमस्स सीसं नीवाडेइ ॥३७२६॥  
 तो वीरसेणपाडियजमदाढभडंमि जायकोवाइं ।  
 खेयरबलाइं अहिणवरोसाइं व तस्स धावति ॥३७२७॥  
 दिट्ठंमि वीरसेणे दोहिं वि नियकज्जबद्धचित्तेहिं ।  
 सेहर-पवणेहिं समं गहिओ अंगंमि सन्नाहो ॥३७२८॥

'नियबंधुलहुसहोयरवहवैरिरिणं अवस्स अवणेमि ।  
 हंतूण वीरसेणं करंमि गेण्हामि जयवत्तं' ॥३७२९॥  
 इय पवणकेउराया काऊण विणिच्छियं मणे एयं ।  
 तुरियं पधावमाणो धरिउ(ओ) नियसेन्नसुहडेहिं ॥३७३०॥  
 सेहरनरेसरो वि य चंदसिरीलाहजायपच्चासो ।  
 चिंतइ 'हणेमि एयं पच्छा परिणेमि चंदसिरिं' ॥३७३१॥  
 इय जाव ते परोप्परनियबुद्धिवियप्पिएहिं चिद्धंति ।  
 ता कुमरेणं भणिओ रक्खसराया इमं वयणं ॥३७३२॥  
 'किं बहुएहिं वि निसयर ! खेयरपुरिसेहिं मारिएहिं पि ? ।  
 मह पवण-सेहराणं अत्थि विवाओ न खयरारणं ॥३७३३॥  
 ता कहसु महं तुरियं को पवणो? सेहरो व्व को एत्थ ? ।  
 एण्हि च्चिय निज्जोडं करेमि किं बहुवियप्पेहिं?' ॥३७३४॥  
 तो भणइ रक्खसिंदो 'वच्छत्थलघोलमाणहारलओ ।  
 जो धरियधवलच्छत्तो उभयंसचलंतसियचमरो ॥३७३५॥  
 पारद्धखेयरवहूरणरंगपवेसमंगलायारो ।  
 बहुबंदिविंदकलयलसंमडुग्घुज्जयसद्धो ॥३७३६॥  
 सो देव ! पवणकेऊ एसो उण दाहिणाण सेहरओ ।  
 हरियंदणंगराओ मणिमउडविहूसियसिरग्गो ॥३७३७॥  
 घोलंतकन्नकुंडल-गंडत्थलसंघडंतपडिबिंबो ।  
 बिउणीकयभुयदंडो ओडुंघो वारनारीए ॥३७३८॥  
 सिद्धत्थय-दोव्वंकुर-गोरोयणभूसिओत्तिमंगो य ।  
 गंधव्वगेयरसवसदरमउलियल्लोयणद्धंतो' ॥३७३९॥

इय पच्चेयं कहिए खयरिंदे पवण-सेहरे दो वि ।  
 दट्टूण वीरसेणो रणरसपुलयंकुरं वहइ ॥३७४०॥  
 परिवियडपहामंडलसरीरदुद्धरिसतेयदिप्यंतो ।  
 चंदो व्व वीरसेणो सपारिवासो परिफु(फ्फु)रइ ॥३७४१॥  
 ते खेयरा तहाविहविभूइसंभारविहियफरडमरा ।  
 रेहंति न तस्स पुरो तारा इव पुत्रचंदस्स ॥३७४२॥  
 तो रहसवसफ्फालियघणरवगंभीरतूरसद्देण ।  
 संजायरणुच्छहं विज्जाहरसेत्रमुल्लसइ ॥३७४३॥  
 सो हेमपीढविणिहियनाणामणिकिरिणजालकब्बुरियं ।  
 सोहइ पुरंदरो इव समुव्वहंतो करे धणुहं ॥३७४४॥  
 तो भुयदंडारोवियहढकड्हियकढिणचंडकोयंडो ।  
 पड्डवइ वीरसेणो सरद्धयं खयररायाण ॥३७४५॥  
 तो कणयरसनिवेसियवियडसरपंतिपिंजरद्धंतं ।  
 सेहर-पवणा दट्टुं नारायं अह निरूवेति ॥३७४६॥  
 'हे पवणकेउ-सेहरनरेसरा ! किं इमेहिं निहएहिं ? ।  
 मह तुम्हाण वि वेरं ता एह मए समं भिडह' ॥३७४७॥  
 इह गाहत्थं लिहियं सम्मं अवस(सा?)रिऊण हिययंमि ।  
 अन्नोन्नसमुहमेए पलोइउं अह समाढत्ता ॥३७४८॥  
 तो सेहरेण भणियं 'किं चिंतसि?सोहणं भणइ सत्तू ।  
 खयरिंहिं मारिएहिं वि बहुएहिं न कज्जसंसिद्धी' ॥३७४९॥  
 तो भणइ पवणकेऊ 'सेहर ! एयं न रायनीईए ।  
 जं बंधिऊण अप्पा अपि(प्पि)ज्जइ सत्तुलोयस्स ॥३७५०॥

नियदेहरक्खण्डं परिग्गहो विहवसंगहो देसो ।  
 नद्धंमि निए देहे विहडइ सव्वं खणद्धेण ॥३७५१॥  
 ता एस रिऊ गरुओ सुबुद्धिमंतो य विक्कमी धीरो ।  
 जुज्ज(ज्झ)न्नू रणदक्खो समहियसंपत्तपुन्नबलो' ॥३७५२॥  
 तो सेहरेण भणियं 'सव्वं अज्ज(ज)हत्थमेव तुह वयणं ।  
 जइ एवं तुह बुद्धी ता किं संगामपारंभो? ॥३७५३॥  
 अह मन्नसि नियबंधववैरं उक्खालयामि ता तुज्झ ।  
 समुवट्ठियंमि समरे को कालो मंतियव्वस्स ?' ॥३७५४॥  
 इय जाव ते परोप्परमेवं मंतंति ताव कुमरो वि ।  
 अदि(दि)ट्ठो च्चिय सहसा संपत्तो ताण पासंमि ॥३७५५॥  
 तो सेहरेण भणियं 'किं काहिसि संपयं पवणराय ! ? ।  
 चइऊण सव्वसुहडे उवट्ठिओ अम्ह चेवेसो' ॥३७५६॥  
 तो भणइ पवणकेऊ 'किं सेहर ! अहमिमस्स वि न सक्को? ।  
 तो पेच्छ संपयं चिय जं विच्चइ वीरसेणस्स' ॥३७५७॥  
 तो सेहरेण भणियं 'अच्छ तुमं ताव होहि वीसत्थो ।  
 अहमेव अणेण समं जुज्झिस्सं वीरसेणेण' ॥३७५८॥  
 तो पवण-सेहराणं सोउं अन्नोन्नजंपियं कुमरो ।  
 भणइ 'किमेवं मंतह समकालं दो वि ढुक्केह' ॥३७५९॥  
 तो पवणकेउणा विय भणिओ कुमरो सगव्ववयणेण ।  
 'भो वीरसेण ! सुव्वउ मह वयणं एकुचित्तेण ॥३७६०॥  
 सव्वं चिय वयणमिणं गुणेषु को मच्छरं किर वहेइ ।  
 वज्जइ तुह चेव परं भइ ! ढक्का न उण अन्नस्स ॥३७६१॥



अन्ने लज्जंति भडा तुह पुरओ सुहडसदमुव्वहिउं ।  
 ता कुणसु मह परिकखं खणमेत्तं समरमज्जंमि' ॥३७६२॥  
 अहियाहिणिवेसुब्भवपसरियघणरोसतंबिरनिडाला ।  
 दड्ढोद्धभिउडिभीमा दुपे(प्पे)च्छा तं कयंतं व्व ॥३७६३॥  
 'हण-हण-हण'त्ति भणिरा दप्पुभ(ब्भ)डदिढपयंडभुयदंडा ।  
 बहुविज्जाबलजुत्ता विज्जाहरिगब्भसंभूया ॥३७६४॥  
 ते पवणकेउ-सेहरनरेसरा दो वि वड्ढियामरिसा ।  
 अह वरिसिउं पयत्ता सरवरिसं वीरसेणंमि ॥३७६५॥  
 एत्थंतरे सुरासुर-किन्नर-सिद्धेहिं पभणियं गथणे ।  
 'खयरिंद-कुमाराणं जाणिज्जइ अंतरं एण्हि' ॥३७६६॥  
 तो खयरेहिं समं चिय जुगवं विद्वियवैरिनिवहेहिं ।  
 संधेवि सरसहस्सं पच्चेयं पेसियं कुमरे ॥३७६७॥  
 ते खयरिंदबाणा समोत्थरंता नहंतरालंमि ।  
 विफु(प्फु)रियसिहिफुलिंगा भयावहा तिहुयणस्सावि ॥३७६८॥  
 कुमरेण सरसहस्सा ते दोन्नि वि एक्कनिययबाणेण ।  
 दोखंडिय(या) खणेणं अलद्धलक्खा गया धरणिं ॥३७६९॥  
 अह एक्केण सरेणं दोन्नि सहस्से सराण सो कुमरो ।  
 दोखंडिऊण पूरइ धरायलं बाणखंडेहिं ॥३७७०॥  
 तो पवण-सेहरेहिं रोसुब्भडभिउडिभीमभालेहिं ।  
 उच(च्च)ल्लिउ(ओ)महंतो दसजोयणवित्थरो सेलो ॥३७७१॥  
 विज्जाबलनिम्मविओ ओसारियगयणसिद्ध-सुर-जक्खो ।  
 बहुसिहर-गुहा-कंदर-निज्जरणसहस्सरमणीओ ॥३७७२॥

'रे पवणकेउ ! छड्सु चिरंतणो सेलसंगरारंभो ।  
 कि(किं) मज्झ कयं तइया बहुएहिं वि तुज्झ सेलेहिं?' ॥३७७३॥  
 तो सेलो दट्ठणं गयणे हाहारवो समुच्छलिओ ।  
 तियसाण, तओ खित्तो खयरेहिं गिरी कुमारस्स ॥३७७४॥  
 कुमरेण वि सो सेलो मुट्ठिपहारेण ताडिओ एंतो ।  
 वलिरुण पडिवहेणं पुण विज्जाचोइओ पत्तो ॥३७७५॥  
 तो हढकद्धियधणुगुणविमुक्कसरनियरपहरनिद्वलिओ ।  
 तह ताडिओ गिरिंदो जह जाओ धूलिपुंज्जो(जो) व्व ॥३७७६॥  
 विहडावियंमि सेले विलक्खवयणेहिं तेहिं पुण गहियं ।  
 सिहिगलकज्जलसामं तामसनामं महासत्थं ॥३७७७॥  
 अह तामसपहरणगुरुपहावविफु(फ्फु)रियतिमिरदुल्लक्खं ।  
 गिलियं व्व तेण भुयणं जायं अपरिप्फुडपयत्थं ॥३७७८॥  
 तो तक्खणेण रक्खसविउच्चियं धगधगंतसूरत्थं ।  
 मोत्तुण वीरसेणो तं तामसपहरणं हणइ ॥३७७९॥  
 पुण पवण-सेहरेणं विसहरसत्थं पु(प)णोलि(ल्लि)यं कुमरे ।  
 कुमरेण तं पि निहयं गारुडनारायघाएण ॥३७८०॥  
 इय जं जं खयरिंदा दिव्वाउहमाहवे पणोल्लंति ।  
 पडिपहरणेण कुमरो तं तं चिय हणइ वीसत्थो ॥३७८१॥  
 तो पवणकेउणा पुण सविलक्खमणेण तक्खण(णं) च्वेय ।  
 गरुयामरिसवसेण विउच्चिया वीस भुयदंडा ॥३७८२॥  
 दससु वि दस धणुदंडा तेसु वि दस ठाविया महाबाणा ।  
 पडिवक्खपक्खदलणा ते विज्जापहरणा विसमा ॥३७८३॥

मंतपहावसमिद्धा असेसजगजगडणे वि हु समत्था ।  
 आलीढं रइऊणं विसंधिया पवणराएण ॥३७८४॥  
 नामाइं हुंति ताणं नग्गोह-गिरिंद-सलिल-जण(ल)णो(णा) य ।  
 हरि-विसहर-मायंगा रक्खस-तम-सायरा दस वि ॥३७८५॥  
 दट्ठूण रक्खसिंदो विज्जाहररायसंधिए सहसा ।  
 दिव्वाउहे ससंको कुमरं अह भणिउमाढत्तो ॥३७८६॥  
 'देव ! नियच्छसु पुरओ अच्छरियं पवणकेउणा जेण ।  
 दोबाहू वि हयासो वीसभुओ संपयं जाओ ॥३७८७॥  
 एयाइं पुण नरेसर ! अच्चंभुयपहरणाइं दिव्वाइं ।  
 भुयणस्स मोहणाइं किमंग पुण तुज्झ एक्कुस्स ? ॥३७८८॥  
 एयाण पहारेणं न तुमं नाऽहं न बंधुयत्तो वि ।  
 संपइ जमेत्थ उचियं तं देवो कुणसु सयमेव' ॥३७८९॥  
 तो भणइ वीरसेणो 'मा बीहसु रक्खसिंद ! एयाण ।  
 दिव्वाउहाण जम्हा पहीणसत्तेण धरियाण ॥३७९०॥  
 जायइ तयं पि वज्जं सत्ताहियपुरिसकरयले चडियं ।  
 वज्जं पि अकिंचिकरं करद्वियं हीणसत्तस्स ॥३७९१॥  
 तो पेच्छ संपयं चिय पवणो सह आउहेहिं एएहिं ।  
 नीसंधिबंधणो च्चिय अवस्सनिहणं नइस्सामि' ॥३७९२॥  
 एत्थंतरंमि तुरियं ठाणं चइऊण दस वि पवणेण ।  
 दिव्वाउहाइं कुमरे मुक्काइं समं सकोवेण ॥३७९३॥  
 एक्केक्कं पि हु दुसहं पुरंदरेणावि किं पुण नरेण ? ।  
 ते दस वि समं खित्ता सहेज्ज को एत्थ भुयणंमि? ॥३७९४॥

ज्झंपिय नहंतरालं समोत्थरंतं महाउहसमूहं ।  
 दट्ठूण रक्खसिंदो भएण विहलंघलो जाओ ॥३७९५॥  
 मं भीसिऊण रक्खं अक्खुहियहियएण वीरसेणेण ।  
 पडिवक्खपहरणेहिं दस वि समं दसहिं निहयाइं ॥३७९६॥  
 अगोयसरेण हओ नग्गोहो पव्वओउ कुलिसेण ।  
 पवणेण जलं निहयं जलणो उण वारुणत्थेण ॥३७९७॥  
 सीहो सरहेण हओ गरुडेण अही करी मइं देण ।  
 रक्खो धम्मत्थेणं तामसबाणं रविसरेण ॥३७९८॥  
 वडवानलेण जलही निवारिओ तक्खणं कुमारेण ।  
 सरधोरणी पणड्डा हरिचंदसे(सि?)रिव्व खणदिट्ठा ॥३७९९॥  
 तो वीरसेणविणिहयदिव्वाउहजायमच्छरुच्छणहो ।  
 सुमरइ विज्जं पवणो आंगतूणं च सा भणइ ॥३८००॥  
 'किं पुत्त ! सुमरियाऽहं ? कज्जं मह कहसु जं तुह असज्जं ।'  
 भणियंमि भणइ पवणो 'मारसु एयं महासत्तु' ॥३८०१॥  
 तो तव्वयणायन्नणफुरंतकोवारुणाए दिट्ठीए ।  
 कुमरं विज्जा दट्ठुं रक्खसिरूवं विउव्वेइ ॥३८०२॥  
 जा नियइ वीरसेणो ता पेच्छइ नहयले अमंतिव्व ।  
 पिहुलत्तणेण दूरं च्छयंती दिसिवहाहोयं ॥३८०३॥  
 कह सम्माइयसेसं संकडजढरे जयंति वुट्ठीए(?) ।  
 दीहत्त-पिहुत्तेणं वित्थरियं तीए गयणंमि ॥३८०४॥  
 'हा अज्जउत्त ! रक्खसु' इय विलवंति हडेण कइंती ।  
 चंदसिरी(रिं) भालत्थललुलंतकेसेसु घेतूण ॥३८०५॥

टि. १. बुट्ठीए ला. ॥

तं दट्ठूण कुमारो ससंकमिव धणुहरं पमोत्तूण ।  
 असि-वसु-गंदयहत्थो उप्पइओ तीए(इ) हणणत्थं ॥३८०६॥  
 उप्पयमाणो तीए अइदूरपसारिएण वयणेण ।  
 गिलिओ सपहरणो च्चिय वंजणसहिओ व्व गुरुकवलो ॥३८०७॥  
 गिलियंमि वीरसेणे गयणे सुर-सिद्ध-जक्खपमुहाणं ।  
 पक्खुहियमाणसाणं 'हा कट्ठ'रवो समुच्छलिओ ॥३८०८॥  
 किलिगिलियं तव्वेलं खयरबले खेयरेहिं सव्वेहिं ।  
 अफा(प्फा)लियं व्व सहसा आणंदसमुब्भवं तूरं ॥३८०९॥  
 रक्खसिनिसाए गिलिए कुमरे सुरेव्व पयडियतमोहो ।  
 उद्धाइ बंधुयत्तो 'हा हा ! पाव' ति भणमाणो ॥३८१०॥  
 तो नासियाए कुमरो निगच्छइ नासियं पि छेत्तूण ।  
 आसासेतो गयणे किन्नर-सुर-सिद्धसंघायं ॥३८११॥  
 पुण दीहरजीहावेल्लिवेढियं गिलइ रक्खसी कुमरं ।  
 गिलिएण तेण अंतो वियंभिउं अह समाढत्तं ॥३८१२॥  
 छिन्नइ अंतसमूहं असिणा तह लुलणइ(लुलइ) मंसखंडाइं ।  
 हड्डसमूहं अंतो दोखंडइ मंडलग्गेण ॥३८१३॥  
 इय सो सरीरमज्जे पसरित्तो तीए कयमहापीडो ।  
 लूयावाहि व्व निरंतरुब्भवो साडइ सरीरं ॥३८१४॥  
 अह विहडावियनिविडिडिबंधकरवालघायमसहंती ।  
 दिट्ठा वि तक्खणं सा पुणो वि अदंसणीहूया ॥३८१५॥  
 तो भणइ पलायंती सा विज्जा पवणकेउमिह नाऽहं ।  
 पहवामि महासत्ते बहुपुत्रपहावदुल्लंघे' ॥३८१६॥

एत्थंतरंमि कुमरो तं पुरओ रक्खसिं अपेच्छंतो ।  
 कयखग्ग-खेडयकरो अब्भिट्ठो पवणकेउस्स ॥३८१७॥  
 पच्चारिओ सरोसं 'रे रे ! निल्लज्ज ! भाउओ तुज्झ ।  
 निहओ मए इयाणिं जं सक्कसि तं मह करेसु' ॥३८१८॥  
 इय भणिए कुमरेणं रोसानलदीहधूमदंडसमं ।  
 आयद्धियं करालं करवालं पवणराएण ॥३८१९॥  
 तो तेण धाविऊणं कुमारसीसंमि वाहियं खग्गं ।  
 कुमरेण सदक्खेणं असिघाओ वंचिओ तस्स ॥३८२०॥  
 ओसरिऊण सवेगं कुमरो आयद्धिऊण नियखग्गं ।  
 छिन्नइ 'च्छ(छ)ण'त्ति सहसा सीसं सिरिपवणकेउस्स ॥३८२१॥  
 पुण सेहरो सरोसं पडिए पवणंमि तक्खणं चेव ।  
 असि-वसु-णंदयहत्थो पधाविओ वीरसेणस्स ॥३८२२॥  
 तो सोवहासवयणं भणिओ कुमरेण सेहरणरिंदो ।  
 'मा धावसु एसु त्थि(थि)रं अक्खुलिय कहं पि निवडिह(हि)सि ॥३८२३॥  
 जा मुट्ठिगेज्झमज्झा सुपओहरसालिणी य सामंगी ।  
 तुह उरयडंमि निवडइ मह खग्गलया न चंदसिरी' ॥३८२४॥  
 तो तव्वयणवियंभियसमहियकोहग्गिवसफुरंतोड्ढो ।  
 पक्खिवइ खग्गघायं सेहरराया कुमारस्स ॥३८२५॥  
 जा वंचिऊण कुमरो असिणा किर सेहरं सिरे हणइ ।  
 ता सो उप्पइऊणं परिट्ठिओ कुमरखग्गग्गे ॥३८२६॥  
 खणमेत्तं खग्गंते खणंतरं खग्गउभयधारासु ।  
 वियरइ सेहरराया रओ व्व पवणाभिओगेण ॥३८२७॥

तो जाव खग्गविसयं न जाइ सो ताव वीरसेणेण ।  
भिच्चो व्व अकिंचिकरो परिहरिओ तक्खणे खग्गो ॥३८२८॥  
तो सेहरो वि तुरियं खग्गं मोत्तूण धरइ चरणेसु ।  
कुमरं भमाडयंतो उप्पइओ गयणमग्गंमि ॥३८२९॥  
तो निसुणंतो कुमरो 'हा हा' सद्धं समक्खममराण ।  
तस्स भुयंतो पविसइ निच्छुट्टइ धरइ तं चरणे ॥३८३०॥  
धरिऊण एगचरणे बीयकरेणं च जा किर कुमरो ।  
च्छुरियाए हणइ ता सो 'नमो जिणाणं' ति उच्चरइ ॥३८३१॥  
तो तं अदीणहिययं सेहरयं सरियजिणनमोक्कारं ।  
साहम्मियं ति नाउं सो 'मिच्छा दुक्कडं' भणइ ॥३८३२॥  
तो समयं धरणियले अवयरिओ सेहरेण सह कुमरो ।  
आसासेंतो सदयं खयरगणं बंधुयत्तं च ॥३८३३॥  
तो तक्खणेण गयणे सुरकिंकरताडिओ समुच्छलिओ ।  
'जय जय'सद्धुमी(म्मी)सो अइगहिरो दुंदुहीसद्धो ॥३८३४॥  
नवपारियायमंजरिसुयंधरयपडलपूरियदियंता ।  
तियसेहिं कुसुमवुट्ठी पामुक्का वीरसेणंमि ॥३८३५॥  
अह निक्कारिमपोरुसगुणरंजियमाणसेहिं तियसेहिं ।  
सव्वेहिं वीरसेणो पसंसिओ पुलइअंगेहिं ॥३८३६॥  
एत्थंतरे निरंतरतिरोहियासेसनहयलुद्धेसं ।  
तव्वेलमेव पत्तं सयलं पि बलं असोयस्स ॥३८३७॥  
दट्टूण वीरसेणो सेत्रं विज्जाहराण गयणंमि ।  
वैरिबलं ति मुणंतो कोदंडं करयले कुणइ ॥३८३८॥

तो तव्वेलारोवियहड्ड(ढ)कड्डियधणुविमुक्कसरनियरो ।  
थलजलहरो व्व कुमरो उड्डं धाराहिं वरिसेइ ॥३८३९॥  
अह एकमुट्टिपेसियसहस्स-दुसहस्स-अजुय-लक्खसरो ।  
तग्घायज्जरंगं ओहट्टइ अग्गिबाणबलं ॥३८४०॥  
अह सभयमसोओ विय नियसेत्रं पेच्छऊण नासंतं ।  
पुच्छइ 'किं तुम्ह भयं? जेणेवं पलह भयभीया?' ॥३८४१॥  
तो तेहिं भणियमेवं 'देव ! पुरो भूमिगोयरो को वि ।  
करधरियचावदंडो पहरइ अत्थक्कबाणेहिं' ॥३८४२॥  
तो भणियमसोएणं 'न अन्नपुरिसस्स एरिसी सत्ती ।  
सो चेव वीरसेणो संभविही निच्छियं एत्थ ॥३८४३॥  
ता जाहि चंदसेहर ! सुवेय ! गंतूण कहह कुमरस्स ।  
तुह पडिबले असोओ आगच्छइ न उण कोइ रिऊ' ॥३८४४॥  
खयरिंदपेसिया ते दो वि समं चंदसेहर-सुवेया ।  
पत्ता कुमारपासं दूराओ(उ) नमंति सप्पणयं ॥३८४५॥  
दूराओ च्विय कुमरो पच्चभिनाऊण भणइ ससिणेहं ।  
ए एहिं(हि) चंदसेहर ! सुवेय ! आलिंसु ममं'ति ॥३८४६॥  
तो तदंसणपसरियहरिसंसुपवाहपयडियसेणाहो(सिणेहो) ।  
आलिंसिऊण कुमरो खयरे तत्थेव उवविसइ ॥३८४७॥  
अह चंदसेहरो वि य सिरिधरियकरंजली भणइ ।  
"देव ! असोएण अहं तुम्ह सयासंमि पड्डविओ ॥३८४८॥  
भणइ असोओ 'भुयणे वि तुह पयावानलस्स किमसज्झं ?  
बहुविहअच्चभु(ब्भु)यपुत्रपवणपरिपोसियस्सेह?' ॥३८४९॥



अत्रं किं पि सरूवं तुज्झ पयावानलस्स जं देव ॥  
 निदहमाणो वि रिऊ अम्हं पुण हिमकणसरिच्छो ॥३८५०॥  
 तुज्झ अणंता वि रिऊ संमुहमवलोइउं पि न तरंति ।  
 करकरवालपरिद्वियजमरायमहाभएणं व ॥३८५१॥  
 तुह तेयमसहमाणा पडंति तत्थेव ते पयंग व्व  
 वल्लुहगुणेण तं चिय मच्छरतिमिरं पणासेइ ॥३८५२॥  
 पावंति पसंसं इह जयंमि ते च्विय गुणा गुरुगुणाण ।  
 रिउणो वि भिच्चभावं गुणन्नया जेहिं निज्जंति ॥३८५३॥  
 नणु मच्छरो वि अग्घइ सरिसगुणे न उण समहियगुणंमि ।  
 पहसिज्जइ खज्जोओ पयडंतो मच्छरं रविणा ॥३८५४॥  
 मन्नामि निग्गुणं पि हु अप्पाणं एत्तिएण सगुणं च ।  
 जं इच्छामि तए सह गुणगुरुणा नेहसंबंधं ॥३८५५॥  
 जाणामि देव ! दोसा न ठंति मह संतिया तुह मणे वि।  
 ता कुणसु मह पसायं करेमि सह दंसणं तुमए ॥३८५६॥  
 ता सो नमंतखयरिंदमउडमणिकोडिमसिणपयवीढो ।  
 बहुविज्जाहरसेणासंभारनिरुद्धगयणवहो ॥३८५७॥  
 जो निज्जिओ वि तुमए पुव्वि रयणायरंतभवणंमि ।  
 सो तुह गुणाणुराई विन्नवइ इमं असोओत्ति ॥३८५८॥  
 इय खयरचंदसेहरवयणं सोऊण वीरसेणो वि ।  
 भणइ 'किमेयं सेन्नं पडिबद्धमसोयरायस्स ?' ॥३८५९॥  
 'एवं' ति चंदसेहरभणिए पुण भणइ वीरसेणो वि ।  
 'हा हा ! अन्नाणहओ मन्नामि इमं पि सत्तुबलं ॥३८६०॥

नियरज्ज-देस-परियण-जीविय-विहवाइकयपरिच्चाओ ।  
 आवइवडियं मं किर सच्चारंभेण उद्धरिही ॥३८६१॥  
 तस्स वि पावेण मए दुज्जणरूवेण कहमसोयस्स ।  
 हा अग्गिबाणसेत्रे अवयरियं कयपहारेण ? ॥३८६२॥  
 न हु हुंति दुज्जणाणं खाणीउ जओ परोवयारंमि ।  
 पुरिसंमि अवयरंतो सच्चो वि हु लहइ दुज्जत्रं ॥३८६३॥  
 ता चंदसेहर ! तए कालक्खेवो न होइ कायच्चो ।  
 जं मह जहा सरूवं तं साहसु खयररायस्स ॥३८६४॥  
 मा कह वि उवाहिवसा अन्नह संभावणीं(णं) मणे काही ।  
 तस्स परिग्गहलोओ विचित्तरूवो जणो जेण' ॥३८६५॥  
 तो वीरसेणवयणं सोउं पुण चंदसेहरो भणइ ।  
 'मा भणसु देव ! एयं अमयं न विसत्तणमुवेइ ॥३८६६॥  
 अमयसरूवो सि तुमं न संति कुवियप्पविसवियारा ते ।  
 न य देव ! असोओ वि हु तुह विसए अन्नहाचित्तो ॥३८६७॥  
 जइ वेवं तहवि कुमार ! तुज्झ वयणं पमाण'मिइं(इ) भणिउं ।  
 ससिसेहरो सवेगं असोयपासं समणुपत्तो ॥३८६८॥  
 गंतूण तेण सच्चो कहिओऽसोयस्स कुमारवुत्तंतो ।  
 भणियमसोएण 'अहो ! सोजत्रं वीरसेणस्म ॥३८६९॥  
 किं भन्नइ तस्स असेससुयणचूडामणिसस कुमारस्स ।  
 जस्सेक्केक्को वि गुणो वित्थरिओऽणंतरूवेण' ॥३८७०॥  
 इय वीरसेणबहुविहगुणकित्तणजायहरिसरोमंचो ।  
 सह बलभरेण पत्तो कुमारसमीवं खयरनाहो ॥३८७१॥

सममोयरंतखेयरगणेहिं गयणंगणं मुयंतेहिं ।  
 पूरिज्जइ नीसेसं निरंतरं पि हु धरावलयं ॥३८७२॥  
 तो वीरसेणदंसणलज्जावसमउलियाणणच्छिजुओ ।  
 अहिधाविऊण कुमरं आलिंणइ खेयराहिवई ॥३८७३॥  
 नियगरुयत्तणसरिसं कुमरेण वि समुचिएण मग्गेण ।  
 संभासिओ असोओ ससंभमुब्भंतनयणेण ॥३८७४॥  
 तह कह वि तेण तइया ववहरियं सुद्धभावहियएण ।  
 कुमरेण जहाऽसोओ बंधुव्व सहोयरो जाओ ॥३८७५॥  
 तो भणइ वीरसेणो 'असोय ! परमत्थकयवियाराण ।  
 कहमवि न ठंति हियए अविवेयसमुब्भवालावा ॥३८७६॥  
 अविवेय एव जायइ नरस्स परिणामदारुणो सत्तू ।  
 सत्ताण न उण अन्नो अवयारी एरिसो अत्थि ॥३८७७॥  
 अजहत्थवत्थुनाणं अविवेओ एत्थ होइ नायव्वो ।  
 अहिए वि हियत्तमइ हिए वि अहियत्तपडिवत्ती ॥३८७८॥  
 मह होसि तुमं सत्तू अहं पि तुह इय परोप्परवियप्पा ।  
 अजहत्थवत्थुविसया कुवियप्पा एस अविवेओ ॥३८७९॥  
 तम्हा अविवेयवसुल्लसंतपसरंतहिययकुवियप्पो ।  
 जावच्छसि ताव न तुह विवेयजणिया सुहा भावा ॥३८८०॥  
 पुव्वकयदुकयकम्मवखएण अविवेयकारणाभावो ।  
 परमत्थभावणाओ विवेयरयणस्स उप्पत्ती ॥३८८१॥  
 परमत्थभावणाए न को वि अन्नो रिऊ जए अत्थि ।  
 अहमेव अप्पण च्विय सत्तुत्तं जग्गि अप्पाणा(णं) ॥३८८२॥

जं जह जीवो वियरइ सुहमसुहं वा परंमि तब्भावो ।  
तं तह पावेइ फलं तव्विहनियकम्मनिम्मवियं ॥३८८३॥  
ता जइ होइ पमाणं सुहासुहं पुव्वनिम्मियं कम्मं ।  
तं चेय मित्त-सत्तू को रोसो इयरपुरिसेसु ? ॥३८८४॥  
ता एयं नियचित्ते मह वयणं भाविऊण उभाए वि ।  
उचियाणुद्वाणेणं जह सफलं होइ तह कुणह' ॥३८८५॥  
इय वीरसेणवयणं सोउमसोओ वि सेहरो दो वि ।  
ओसरियमोहपडला जहत्थपरिपेच्छिरा जाया ॥३८८६॥  
इह ताव च्चिय पसरइ संसारसहावसंगओ मोहो ।  
जाव न विवेयलोयणउम्मेसो होइ हिययंमि ॥३८८७॥  
कुमरोदयसेलुब्भवविवेयरविनिहयमोहतिमिरा ते ।  
अन्नोन्नमच्छरुब्भव-कुवियप्पविवज्जिया जाया ॥३८८८॥  
पसरइ पच्छायावो दुरणुद्वाणेसु पुव्वविहिएसु ।  
ताण विवेयसमुब्भवउवसमपरिणामसंभूओ ॥३८८९॥  
चितंति मणे दोन्नि वि कुमरुवएसेण नायपरमत्था ।  
अणवच्छिन्ननिरंतरसुद्धज्झवसायसंपत्ता ॥३८९०॥  
'मुज्झंति मारिसा वि हु जइ किर जिणधम्मनायपरमत्था ।  
को दोसो इयराणं ता मन्ने मिच्छदिट्ठीण ? ॥३८९१॥  
जइ जिणमए वि लद्धे राग-दोसा फुरंति हिययंमि ।  
ता तं जाण अलद्धं पईवचक्कं व अंधस्स ॥३८९२॥  
ता किरइ रवी तिमिरं जलणफुलिगे वि ससहरो मुयइ ।  
जिणपवयणे वि पत्ते रागदोसा जइ हवंति ॥३८९३॥

खणदिन्नसुहलवेहिं वि गुणिणो झिज्झंति रागदोसेहिं ।  
 किं पुण न निफ(प्फ)लेहिं इमेहिं दुक्खेक्कहेऊहिं ? ॥३८९४॥  
 इय ते समकालं चिय चिंतता वो वि सेहराऽसोया ।  
 अवरोप्परं पसंता खामंति पुराणदुच्चरियं ॥३८९५॥  
 तो सेहरेण भणियं 'कुमार ! मोहंधयारमूढेण ।  
 तिहुयणबंधू वि तुमं कलिओ सि मए उण रिउ त्ति ॥३८९६॥  
 ता वीरसेण ! तुह मणविसुद्धववहरणनिहयकुवियप्पो ।  
 अव्वभिचारी जाओ भिच्चोऽहं बंधुयत्तो व्व' ॥३८९७॥  
 तो जुगवं चिय दोहि वि असोय-सेहरयखयरराएहिं ।  
 आयर-विणयमहग्घं गुरु व्व कुमरो इमं भणिओ ॥३८९८॥  
 'अम्हेहिं पुरा घणराग-दोसविसपरवसंतकरणेहिं ।  
 जं किं पि तुज्झ वितहं आयरियं तं खमेज्जासु ॥३८९९॥  
 अज्ज दिणे अम्हेहिं वि परिहरिओ परपुरंधिसंभोगो ।  
 तुह वयणसवणसंभवविवेयकयतव्विराएहिं' ॥३९००॥  
 तो भणइ वीरसेणो 'समुच्चियमणुचिद्धियं तुमेहिं इमं ।  
 जम्हा कुलुब्भवाणं एयं चिय होइ ववहरणं' ॥३९०१॥  
 अह कुमरो चिंततो वणकम्मं रणपडिद्धपुरिसाण ।  
 जा रणभूमिं गच्छइ ता पेच्छइ खेयरं एगं ॥३९०२॥  
 नाणापहारपहरणपहारजज्जरियभीसणसरीरं ।  
 रणलच्छिसमालिंगणमीलियनयणं व निचे(च्चे)डुं ॥३९०३॥  
 जस्संगेसु वणा अवि विणितघणरुहिरघोसनिग्घोसा ।  
 हुंकारंति सरोसं अभिद्वंता कुमारं व्व ॥३९०४॥

तिख(क्ख)ग्गखुत्तचंचू जस्स य चलपुंखपक्खसंघाया ।  
 गिद्ध व्व मंसलुद्धा सोहंति सरा सरीरंमि ॥३९०५॥  
 तं पेच्छिऊण कुमरो वीररसुच्छूढबहलरोमंचो ।  
 'को एस' त्ति सहरिसं पुच्छइ खयरिंदसेहरयं ॥३९०६॥  
 तो सेहरेण भणियं 'एसो क्खु कुमार ! पवणकेउस्स ।  
 तह कमलकेउणो वि य सव्वलहू भायरो होइ ॥३९०७॥  
 नामेण चंडकेऊ पयंडभुयदंडखंडियविवक्खो ।  
 रणरंगसुत्तहारो वैरिवहूबंदिकारो य ॥३९०८॥  
 जो पवणकेउपुरओ जुज्झंतो छड्ढिओ सकरुणेण ।  
 तुमए तुरियपएणं पवणो पच्चारिओ जइया ॥३९०९॥  
 सो एस महासुहडो तुज्झाउहपहरजज्जरसरीरो ।  
 रणभूमीए महायस ! पडिओ पयडंगघणपुलओ ॥३९१०॥  
 इय सोऊण कुमारो हरिचंदण-वारिविहियतणुराओ ।  
 कारावइ वणकम्मं नीसेसं तस्स खयरस्स ॥३९११॥  
 पच्चागयचेयत्रो पुरओ दट्ठूण कुमरमइरोसो ।  
 भणइ 'न घुणेहिं खज्जइ बंधववइरं महावीर ! ॥३९१२॥  
 सल्लंति तह न देहे सव्वलवावल्लसेल्ल-भल्लीओ ।  
 जह पवण-कमलकेऊमारणमसमं तए विहियं' ॥३९१३॥  
 इय भणिउं सो गयणे उप्पइओ सह निएण सेन्नेण ।  
 कुमरो वि जायकरुणो तस्स कहं जाव उच्चरइ ॥३९१४॥  
 ता चंदसेहरेणं अक्खिविऊणं अपत्थुयालावं ।  
 सपणामं विव्रतो(त्तो) कुमरो करपंजलिउडेण ॥३९१५॥

'इह देव ! तुह समुज्जलपुण्णपहावेण सुहयरं जायं ।  
 इण्हिं पत्थुयकज्जे दिज्जउ नरनाह ! अवहाणं' ॥३९१६॥  
 'एवं होउ'त्ति तओ कुमरो संपेसिऊण नियमित्तं ।  
 आणावइ चंदसिरिं पज्जुन्नं बंधुजीवं च ॥३९१७॥  
 दट्ठूणं चंदसिरी कुमरं खयरिंदसेन्नपरियरियं ।  
 कयकरसंपुडसेहर-असोयराएहिं कयसेवं ॥३९१८॥  
 धगधगधगंतदूसहसाहावियतेयपसरदुद्धरिसं ।  
 कंचणगिरिं व्व बहुविहधरणीहरकलियपायंतं ॥३९१९॥  
 चिंतइ मणंमि 'पेच्छह अच्चब्भुयपुन्नपयरिसफलाइं ।  
 जं वैरिणो वि मित्ता संजाया अज्जउत्तस्स ॥३९२०॥  
 जायइ विसमं पि समं गहिरं पि सथाहमेव धन्नाण ।  
 इयराण पुणो तं चिय पए पए होइ विवरीयं ॥३९२१॥  
 एयंविहाण पायं कप्पतरूणं व परुवयारीण ।  
 जायंति साणुबंधा समंतओ पुन्नपारोहा' ॥३९२२॥  
 इय एवमाइ पिययमदंसणवसजायतगयवियप्पा ।  
 चंदसिरी बहुपरियणकयकलयलमागया तत्थ ॥३९२३॥  
 दूराओ च्विय सरहसनमंतसिरकुसुमदामनिवहेहिं ।  
 पणमिज्जइ चंदसिरी सेणा-विज्जाहरभडेहिं ॥३९२४॥  
 सा वीरसेणदंसणपयट्टपुलयं वरिल्लवत्थेण ।  
 पच्छायंती सविणयमुवविसइ कुमारपिड्ढंमि ॥३९२५॥  
 तो बंधुयत्तपयडियनामा खयरिंदसेहरासोया ।  
 पणमंति निव्वियारा चंदसिरीपायपंकरुहं ॥३९२६॥

दूराओ सत्थवाहो पसरियभुयवित्थरेण कुमरेण ।  
 आलिंगिओ सपणयं निवेसिओ नियसमीवंमि ॥३९२७॥  
 तो भणइ बंधुयत्तो 'कुमार ! न तहा विचित्तजसराया ।  
 खिज्जइ धूयाविरहे जह तुज्झ वियोगदुक्खेण ॥३९२८॥  
 तो तस्स देवजोगा मा कह वि अणत्थसंभवो होही ।  
 इय अविलंबं कीरउ नासिक्कपुरंमि पत्थाणं' ॥३९२९॥  
 आयन्निऊण एयं पभणइ कुमरो 'किमेत्थ अच्छरियं ? ।  
 मह उवरि एरिसो च्विय पडिबंधो रायरायस्स' ॥३९३०॥  
 तो सरलधवलपम्हलविसालरत्तंतकसिणघणतारं ।  
 कुमरो खयरिदेसुं दोसु वि दिट्ठिं परिट्ठवइ ॥३९३१॥  
 तो ते सरहससंघडियनिविडकरसंपुडा खयरनाहा ।  
 पभणंति एवमेवं जाइज्जइ रायपासंमि' ॥३९३२॥  
 अह भाविऊण हियए खणंतरं दीहमुक्कनीसासा ।  
 पभणइ असोयराया कुमराभिमुहं इमं वयणं ॥३९३३॥  
 मह सेहरस्स वि तए विहिया जह एगचित्तया देव !  
 तह कुणसु तं पि संपइ विचित्तजसराइणा समयं' ॥३९३४॥  
 तो भणइ वीरसेणो 'न हुंति गरुयाण चित्तकाणीओ ।  
 पच्छयावो सारियचिरावराहेसु पणईसु ॥३९३५॥  
 सुयणस्स सायरस्स य देवेहिं वि हरियसव्वसारस्स ।  
 पिसुणइ जुगंतपलयं मज्जायाइक्कमो चेव ॥३९३६॥  
 अइपीडिओ वि सुयणो न धरइ मल्लिणत्तणं मणे कह वि ।  
 अह धरइ न पयंपइ अह जंपइ नेय अवयरइ ॥३९३७॥



इय तस्स सयलसज्जणचूडामणिसन्निहस्स नरवइणो ।  
 न फुरंति खणं पि मणे परंमि अवयारबुद्धीओ ॥३९३८॥  
 तो तुह असोय ! हियए परिणयमिव जिणमयं ति मन्नामि ।  
 कह संभवन्ति इहरा पसमाणुगया सुहा भावा' ॥३९३९॥  
 इय भणिऊणं विरए कुमरंमि तओ असोयराएण ।  
 पउणीकयं असेसं नियसेत्रं विविहविच्छंडं(डुं) ॥३९४०॥  
 पुण सेहरेण वि तहा विज्जाबलकयविमाणनिवहेहिं ।  
 उच्छाइयं असेसं गयणयलमणेगरूवेहिं ॥३९४१॥  
 अवहरिया जेण पुरा चंदसिरी मणिविमाणरयणेण ।  
 तं चेय कुमरपुरओ उवट्टियं फुरयघणकिरणं ॥३९४२॥  
 बहलिंदनीलसामलमऊहमासलियमज्झिमपाएसं ।  
 चंदसिरिहरणजायं अंतोपावं व उव्वहइ ॥३९४३॥  
 विट्टुमरयणनिवेसियमहल्लुज्जुल्लंतमोत्तिउऊलं(?) ।  
 कयपच्छायावं पिव थूलंसुकणेहिं जं रुयइ ॥३९४४॥  
 पेरंतेसु परिट्टियरविमणिजालासहस्ससंवलयं ।  
 दुच्चरियसोहणत्थं कयप्पवेसं व्व जलणंमि ॥३९४५॥  
 इय पारियायपल्लवकयतोरणमुब्भिउब्भइपडायं ।  
 आरुहइ सह पियाए विमाणरयणं महावीरो ॥३९४६॥  
 उभयंसपाससंठियविज्जाहरसुंदरीकरथे(त्थे)हिं ।  
 वीइज्जंतो ससहरकरपंडुरचारुचमरेहिं ॥३९४७॥  
 पज्जुन्न-बंधुयत्ता बंधुजीवा य कुमरजाणंमि ।  
 सिररइयकरयलंजलिबंधा पुरओ समारूढा ॥३९४८॥

तस्स कुमारविमाणस्स वाम-दक्खिणविमाणमारूढा ।  
 समयं चिय संचलिया ससंभमं सेहरा-सोया ॥३९४९॥  
 जहजोगयाणुरूवं विमाण-नाणापघारजाणेसु ।  
 सव्वो वि समारूढो चलिओ विज्जाहरसमूहो ॥३९५०॥  
 अफा(प्फा)लिज्जइ बहुविहआओज्जसहस्ससद्वसंवलिया ।  
 सभयदिसागयनिसुया पत्थाणसमुब्भवा भेरी ॥३९५१॥  
 उप्पयइ बलं बहुविहपत्थाणावसरवइयरवसेण ।  
 कयकलयलरवबहिरियनहंतरं उत्तराभिमुहं ॥३९५२॥  
 उह्वं समुप्पयंता रएण खयरा अहो महीवेढं ।  
 सगिरि-पुर-काणणं पिव पेच्छंति रसायलपडंतं ॥३९५३॥  
 पढमं परिभावियसेलसंकडं थउडियं समतलं च ।  
 पेच्छंति कमेण धरं खयरा तम्मेव अह गयणं ॥३९५४॥  
 न निरिक्खिज्जइ गयणं तिरोहियं घणविमाणनिवहेहिं ।  
 तलसंठिएहिं उह्वं न तलं उद्धट्टिएहिं पि ॥३९५५॥  
 नाणाविमाणभवणं विज्जाहरजणसमूहसंकिन्नं ।  
 नहमग्गसंचरंतं हरिचंदपुरं व खयरबलं ॥३९५६॥  
 अवरोप्परं महामणिभित्तिसु पडिबिंबिए मणि-विमाणे ।  
 अन्नववएसभावं पावंति सहावविवरीयं ॥३९५७॥  
 अणुकूलपवणचंचलविमाणसिहरग्गधयवडायाओ ।  
 विणएण कुमारस्स व दावंति पुरोगमं मग्गं ॥३९५८॥  
 अइवेयवसपधावियविमाणपवणाणुगामिणो तुरियं ।  
 संजायकुमरसेवारस व्व धावंति वारिहरा ॥३९५९॥

संनिहियसूरमंडलवसपसरियवीरसेणसंतावं ।  
 घणमंडलप्पवेसो पसमइ सिसिरंबुसंगेण ॥३९६०॥  
 मेहंबुकणकणारियघंदसिरीसरलनयणपम्हाइं ।  
 दट्ठूण वीरसेणो सासंको खुहइ खणमेत्तं ॥३९६१॥  
 घणरविकिरणकरालियविमाणरविकंतजलणजालासु ।  
 दीसंति धूममंडलभमेण खयरेहिं घणनिवहा ॥३९६२॥  
 सहइ बहुवन्नमणिमयविमाणपसरंतकिरणकब्बुरियं ।  
 कुमरागमे व्व नहसिरिरंगावलिसोहियं गयणं ॥३९६३॥  
 गयणं ति अइजवेणं निम्मलफलिहुज्जले विमाणंमि ।  
 अब्भिद्धो पहसिज्जइ को वि नरो खयरनारीहिं ॥३९६४॥  
 संकिन्नपहत्तेणं अग्गेसरपिहुविमाणभित्तीए ।  
 ज्झापियविमाणदारे परिरंभइ को वि नियदइयं ॥३९६५॥  
 'किं पुरओ न निरिक्खसि ? निययविमाणेण पेल्लसे जमिह ।  
 मज्झ विमाणं वच्चसु थिरचित्तो पिययमापासे' ॥३९६६॥  
 नियडविमाणगवक्खयनिविद्धुविज्जाहरीओ अन्नोन्नं ।  
 अंगयकोडिविलग्गं दुहेण मोयंति हारलयं ॥३९६७॥  
 'तुह वीरसेणआणा जइ पेल्लसि अंतरे नियविमाणं ।  
 अइसंकडंमि मग्गे जाइज्जइ खेयर ! थिरेहिं ॥३९६८॥  
 रे विज्जाहर ! पुरओ कलयलसदं निवारसु खणद्धं ।  
 निसुणसु गाइज्जंतं परक्कमं वीरसेणस्स ॥३९६९॥  
 कोलाहले पसंते एसो कह समइ वीरसेणस्स ।  
 विज्जाहरिचलचामरकरकंकणझणझणासद्धो ? ॥३९७०॥

छडुसु चिरववहरणं एण्ह अन्नारिसो समायारो ।  
 परनारी(रिं) मा जोयसु न सहइ एयं महावीरो ॥३९७१॥  
 एयंमि पिए! कुमरो वच्चइ रयणुज्जले विमाणंमि ।  
 जं वेढियं निरंतरविज्जाहरभडसहस्सेहिं' ॥३९७२॥  
 इय एवमाइवइयरअन्नोत्रालावरसपराहीणं ।  
 सिरिवीरसेणसेन्नं वच्चइ गयणंमि तूरंतं ॥३९७३॥  
 एत्थंतरंमि दट्टुं विज्जाहरघणविमाणसंघट्टं ।  
 अवलोइऊण कुमरं पुण हसियं बंधुयत्तेण ॥३९७४॥  
 अह निक्कारणहसिरं नियमे(मि)त्तं पेच्छिऊण कुमरो वि ।  
 सासंकमणो पुच्छइ 'किं हसियं मित्त!?' मह कहसु' ॥३९७५॥  
 तो भणइ बंधुयत्तो 'न किं पि एमेव देव ! निक(क्क)ज्जं' ।  
 कुमरो भणइ 'न गुणिणो हसंति निक्कारणं मित्त ! ॥३९७६॥  
 एमेव पहसिराणं एमेव पयंपिराण भमिराण ।  
 पुरिसाण पिसायाण व न जाणिमो अंतरं किं पि' ॥३९७७॥  
 तो भणइ बंधुयत्तो 'कुमार ! एवं तए जहाइडं ।  
 किं तु न तरेमि भणिउं तुह पच्चक्खं गुणाइसयं' ॥३९७८॥  
 तो भणइ वीरसेणो 'सरूववायंमि मित्त ! न हु दोसो ।  
 ता भणसु निव्विसंको हेऊ हासस्स एयस्स ॥३९७९॥  
 नित्थरइ सुहं मग्गो चंदसिरीए वि जायइ विणोओ ।  
 हासत्थो वि मुणिज्जइ अविलंबं कहसु ता मित्त ! ॥३९८०॥  
 तो कुमरमहायरपुच्छिएण मित्तेण कहिउमाढत्तं ।  
 'जह देव! तुह निबंधो ता एक्कमणो निसामेसु ॥३९८१॥

हरियाए असोएणं चंदसिरीएऽणुमगगलगंगमि ।  
 तिस्सा तए नरेसर ! जं वित्तं तं तुह कहेमि ॥३९८२॥  
 चंदसिरीविरहानलपुलद्वदेहेण जारिसी चेद्वा ।  
 जणणि-जणयाइयाणं सा नणु तुह देव ! पच्चक्खा ॥३९८३॥  
 तयणंतरं च देवे विणिग्गए राइणो परियणस्स ।  
 देसस्स पुरस्स तहा दुक्खं अच्चब्भुयं जायं ॥३९८४॥  
 परिचत्तण्हाण-भोयण-विलेवणाहरणमाइसक्कारो ।  
 तह झिज्झइ नरनाहो जह चंदो किण्हपक्खंमि ॥३९८५॥  
 किं मह उवड्डियमिणं अदिट्ठपुव्वं अचित्तणीयं च ।  
 दुक्खं पच(च्च)क्खीकयनरयानलदाहदुव्विसहं ॥३९८६॥  
 जेहिं तुह लंपडेहिं व आयन्नण-दंसणामयं वीयं ।  
 ताण तुह विरहदुक्खे पीउव्वमियं च तं जायं ॥३९८७॥  
 इय एवमाइबहुविहपलावपविलीणमणअवट्ठंभो ।  
 तुह विरहंमि विसूरइ विचित्तजसनरवई जाव ॥३९८८॥  
 ताव गुरुविरहहुयवहकरालिए परियणे वि तुह देव ! ।  
 संपेसिऊण मंतिं आहूओ राइणा अहयं ॥३९८९॥  
 तोऽहं तुच्छपरिग्गहपरिवारो राउलं गओ तुरियं ।  
 जोक्कारिऊण रायं उवविट्ठो पायमूलंमि ॥३९९०॥  
 तो देव ! तह न पुव्विं मह सोओ आसि हिययमज्झंमि ।  
 जह तुह विओयदुत्थियविचित्तजसदंसणा जाओ ॥३९९१॥  
 तव्वेलं सव्वेहिं वि मह दंसणदीहमुक्कुसासमिस्सा ।  
 दूरमहं खित्तो इव हिययाओ कयग्घबुद्धीए ॥३९९२॥

१. पीतम् ॥

सोयंसुकणकणारियमच्छिजुयं धोइऊण सलिलेण ।  
 भूसन्नाए निउत्तो मंती 'कहसु' त्ति नरवइणो ॥३९९३॥  
 तो भणइ महामंती 'आयन्नसु बंधुयत्त ! एकूमणो ।  
 नरवइणा आइद्धो जहत्थवयणं तुह कहेमि ॥३९९४॥  
 इय बंधुयत्त ! राया चंदसिरि-कुमारविरहदुक्खेण ।  
 तह मूढो अइदूरं जह मन्ने होउ भणिएण ॥३९९५॥  
 ते आगमोवएसा ताइं चिय गुरुयणस्स वयणाइं ।  
 कुमराणुराएणं पिव हियएण समं पवसियाइं ॥३९९६॥  
 जे च्विय कीरंति तहिं नरिंदुक्खस्स उवसमोवाया ।  
 तेहिं चिय अहियअरं तं वड्ढइ अणुसएणं व्व ॥३९९७॥  
 जे हिययहारिणो किर कीरंति तहाविहा रसविणोया ।  
 ता सो च्वेय रसन्नू तिरिच्छसल्लं व ठाइ मणे ॥३९९८॥  
 इय एवमपेच्छंता दुक्खुवसामस्स कारणमिमस्स ।  
 अम्हे वियक्खणा विय परोवएसारिहा जाया ॥४९९९॥  
 अह अण्णादिणे राया संज्झासमयंमि वंदियजिणिंदो ।  
 दाहोवसमनिमित्तं उवरिमवलहिं मए नीओ ॥४०००॥  
 जा तत्थ खणं चिद्धइ सिसिरानलसंगलद्धतणुसोक्खो ।  
 खे संचरंतखेयरजणाण ता सुणइ संलावं ॥४००१॥  
 तो वारिऊण परियणकलयलसदं तदे(दे)क्कुगयचित्ता ।  
 निसुणामो जावऽम्हे ता भणियं उवरि खयरेण ॥४००२॥  
 'जह पवणंकेउणा सो मारिज्जंतो न जलहिमज्झंमि ।  
 ता तब्भएण पवणो वाऊ वि न एत्थ वाएज्ज ॥४००३॥

को कुणइ तस्स नामं मायाबहुलस्स पवणकेउस्स ।  
 सो वीरसेणसुहडो च्छलेण विणिवाइओ जेण?' ॥४००४॥  
 अन्नखयरेण भणियं अगेज्झनामो तिलोयमज्झमि ।  
 न मए दिट्ठो निसुओ बंधववैरं अणुसरंतो ॥४००५॥  
 सो पवणकेउणो किर कणिट्ठभाया इहेव णयरंमि ।  
 अत्थवइपियारत्तो निहओ नणु वीरसेणेण ॥४००६॥  
 पुरिसे कयावराहे खमंति जइ ते परं खमासमणा ।  
 इयराण असामत्थं भयं च खंती पयासेइ ॥४००७॥  
 सो चेव अदडुव्वो अगिज्झनामो य होइ सो चेव ।  
 अवयरमाणंमि न जो रिउंमि अवयरइ सत्तीए ॥४००८॥  
 एएण कारणेणं निहओ सो पवणकेउणा सत्तू ।  
 च्छलबंधणं च वइरिसु कायव्वं न उण पणईसुं ॥४००९॥  
 इय गयणंतरनिसिसंचरंतविज्जाहराण अन्नोन्नं ।  
 आलावं सोऊणं राया मं भणिमाढत्तो ॥४०१०॥  
 'हा ! किं निहओ कुमरो नियभाउयवेरमणुसरंतेण ।  
 पवणेण ? अन्नहा कह हवंति एवंविहालावा?' ॥४०११॥  
 निहओ त्ति निसुयमेत्ते राया गुरुदुक्खभारओडुब्धो ।  
 मुच्छनिमीलियच्छो 'धस'त्ति धरणीयले पडिओ ॥४०१२॥  
 तो चंदणरससीयलसमीरसंगेण लद्धचेयन्नो ।  
 मणसंठियकज्जत्थो मोणेण ठिओ महाराओ ॥४०१३॥  
 बोल्लाविओ[य] बहुयं अलंघवयणेहिं गुरुयणाईहिं ।  
 अवहीरणाए ताण वि एक्कं पि न उत्तरं देइ ॥४०१४॥

तो दट्टूण तहाविहसरूवपरिसंठियं नरवरिंदं ।  
 अम्हेहिं वि तो मुक्का नरिंद-नियजीयपच्चासा ॥४०१५॥  
 गरुयाण वि तं कज्जं संपज्जइ कह व देवजोएण ।  
 अत्थमियउवायाणं मरणं चिय ओसहं जस्स ॥४०१६॥  
 'सो किं न जणणिगब्भे पविलीणो बुद्धि-सत्तपरिहीणो ।  
 जस्स नियंत(त)स्स पुरा मरणावत्थं पहू लहइ?' ॥४०१७॥  
 इय जा चिंतामि अहं ता राया ज्झत्ति उवरिमतलाओ ।  
 उत्तिन्नो सेज्जाहरस(से)ज्जं खणमेत्तमल्लीणो ॥४०१८॥  
 भूसन्नाए सदुक्खं पासड्डियपरियणं विसज्जेइ ।  
 आणालंघणभीरू ते वि सदुक्खं विणिक्खंता ॥४०१९॥  
 तो नीहरिए सयले परिवारे संठिओ अहं एक्को ।  
 तो निहुयं चिय भणिओ 'पन्नायर ! वच्च नियगेहं' ॥४०२०॥  
 अह धिद्धिमाए भणिओ मए नरिंदो 'न देव! तुह जुत्तं ।  
 अप्पडियारे कज्जे निक(क्क)ज्जं सोयमुव्वहिउं' ॥४०२१॥  
 ताऽहं पुणो वि भणिओ नरवइणा 'किं पि जं तुमं भणसि ।  
 पच्चूसे पन्नायर ! तमहं सव्वं करिस्सामि' ॥४०२२॥  
 तोऽहं ससंकचितो विसज्जिओ राइणा अणिच्छंतो ।  
 बहुखेयखिन्नदेहो विपणिपहं पाविओ विमणो ॥४०२३॥  
 ता चिंतिउं पयत्तो 'अहमेव इमंमि राउले मंती ।  
 संप्प(प)इ अदिट्ठमंतो हासड्डाणं गमिस्सामि ॥४०२४॥  
 विसमड्डियंमि कज्जे न जाण मंतो मणंमि विफु(प्फु)रइ ।  
 ते हंत मंतिसइं समुव्वहंता न लज्जंति ॥४०२५॥



पहवइ न बुद्धिविहवो अग्घंति न नीइसत्थउवएसा ।  
 न परिक्रमो य पसरइ संपइ मह पत्थुए कज्जे ॥४०२६॥  
 पन्नायरो त्ति नामं गुणनिप्फन्नं जमासि मह पुव्विं ।  
 तमणेण वइयरेणं अजहत्थं संपयं होही ॥४०२७॥  
 ता पुरिसकारसज्झं न होइ एयंति वासणा मज्झ ।  
 जइ देवयाणुहावा नरिंदकुसलं परं होइ ॥४०२८॥  
 ता सव्वहा सुरासुरकिरीडमणिमसिणचरणतामरसं ।  
 उवरोहेमि नरेसरकज्जे चक्केसरिं देविं ॥४०२९॥  
 सा चेय दुत्थियजणं संधीरइ तिहुयणस्स जणणिव्व ।  
 भव्वंभोरुहनिवहं पहायसंझ व्व बोहेइ ॥४०३०॥  
 ता सव्वपयारेणं देविं आराहिऊण रायस्स ।  
 कुसलं चिंतामि अहं एयं मह संपयं किच्चं' ॥४०३१॥  
 इय हिययनिच्छयमिणं मंती काऊण विपणिमग्गाओ ।  
 नियपरियणं च वंचिय घणतिभिरनिरंतरनिसाए ॥४०३२॥  
 एक्कंगो च्चिय पत्तो पुरबाहिं तंमि सुंदरुज्जाणे ।  
 निहुयपयं च पविट्ठो चक्केसरिभवणमज्झंमि ॥४०३३॥  
 जा जामि तस्स मज्झे ता निसुओ अफुडवन्नविन्नासो ।  
 कस्स वि गब्भहरंतरपरिसंट्टियमाणुसालावो ॥४०३४॥  
 कोऊहलेण तोऽहं अलक्खदेहो तदेक्ककोणंमि ।  
 को जंपइ त्ति नाउं थंभंतरिओ ठिओ तत्थ ॥४०३५॥  
 जोएमि जाव निउणं ताव पईवप्पहावपडियंगो(पयडियंगो) ।  
 दिट्ठो मए महायस! विचित्तजसनरवई पुरओ ॥४०३६॥

तो चिंतियं मए 'कह नरनाहो एस एत्थ संपत्तो? ।  
 अहवा न एरिसाणं गम्मागमं(म्मं) जए अत्थि ॥४०३७॥  
 ता होउ ताव अहयं थंभंतरिओ निएमि किं कुणइ ।  
 राया देवीए तहा देवी वि पुणो नरिंदस्स ? ॥४०३८॥  
 तो कयविचित्तपूओ कालायरुधूवियंतगब्भहरो ।  
 कयअवितहगुणथोत्तो देविं विन्नवइ नरनाहो ॥४०३९॥  
 'जइ(ह) देवि ! वीरसेणो चंदसिरी दो वि अणहदेहाइं ।  
 मज्झ मिलिस्संति न वा ता तह अविलंबमाइससु' ॥४०४०॥  
 इय विन्नविऊण तओ राया परमेसरिं अणुसरंतो ।  
 वरमंतक्खरजावं परिवत्तंतो ठिओ ज्जा(ज्झा)णे ॥४०४१॥  
 अह खणमेत्तेणं चिय जहुत्तसुहज्झा(झा)णजोयउवरूढा ।  
 भणइ तिरोहियदेहा नरनाहं चक्किणी देवी ॥४०४२॥  
 'ज्झा(झा)इज्जइ ज्झा(झा)णाणलपुलुडुकम्मिंधणेहिं जिणनाहो ।  
 अम्हे पुण तूसामो नरिंद ! वरगीयवाएहिं ॥४०४३॥  
 अम्हे सरागदेवा सरागपूयाहिं चेव तूसामो ।  
 वरगीयवायमाई एयाओ सरागपूयाओ ॥४०४४॥  
 जह इच्छसि मज्झ पसायमज्ज ता कुणसु वल्लईमीसं ।  
 सवणं(णं)दियकयसोक्खं वरगीयं दिव्वनाएण' ॥४०४५॥  
 तो देवयाणुभावा उवड्डियं वल्लईं महाराओ ।  
 जा घेत्तुं पडिसारइ तड त्ति तंती तओ तुट्ठा ॥४०४६॥  
 जा आरोवइ अन्नं तंतिं पडिसारिऊण वाएइ ।  
 ता सा वि तहा तुट्ठा एवं दह जाव तुट्ठाओ ॥४०४७॥

तो सहसा नरनाहो अनियंतो अन्नतंतिसामग्गि ।  
 निययसरीरावयवे दिट्ठिं पक्खिवइ हिट्ठमणो ॥४०४८॥  
 तो कट्ठिऊण छुरियं निययसरीराओ कइए ण्हारुं ।  
 आवलिऊणं बंधइ वीणादंडंमि वाएइ ॥४०४९॥  
 सा वि तह च्चिय तुट्ठा अन्नं ण्हारुं च जाव कइइ ।  
 ता वीणादंडो च्चिय सहसा दोखंडमावन्नो ॥४०५०॥  
 तो भणइ नरवरिंदो 'मा उच्चवं करेसु खणमेत्तं ।  
 जा जणणि ! नियसरीरं वीणादंडं पगप्पेमि ॥४०५१॥  
 तं चिय तंतं काहं ताडिज्जंती वि जा न तुट्ठेइ' ।  
 इय जंपिऊण राया करेण छुरियं परिकलेइ ॥४०५२॥  
 तो नियचरणंगुट्टयमूला आरब्भ दीहपिहुचम्मं ।  
 उक(क्क)त्तिऊण बंधइ चलिऊणं निययसीसंमि ॥४०५३॥  
 अगणियसरीरवियणो अचलियसत्तो सदेहकयवीणं ।  
 मुट्ठियसरगामफुडं वायइ तह गायए हिट्ठो ॥४०५४॥  
 हिययब्भंतरपसरंतगीयस्सरवसचलंतकरजुयलो ।  
 तह गाइउं पयत्तो सासणदेवी जहाखित्ता ॥४०५५॥  
 तो तस्म सत्त-पोरुस-गीयगुणायट्ठियाए देवीए ।  
 पच्चक्खो च्चिय अप्पा पदंसिओ पुहइवालस्स ॥४०५६॥  
 'तुट्ठ म्हि पुत्त ! होही चंदसिरी-वीरसेणसंजोगो ।  
 तुह थोयदिणोहिं चिय निब्भंतो मज्झ वयणेण ॥४०५७॥  
 जे च्च्येय तस्स सत्तू असोय-सेहरयमाइणो खयरा ।  
 ते च्चिय भिच्चब्भावं तस्स कुमारस्स जाहिंति ॥४०५८॥

जेणं चिय अवहरिया चंदसिरी दिव्वविमाणेण ।  
 तत्थेव समारूढो एही बहुखयरपरिवारो ॥४०५९॥  
 इय भणिऊणं देवी पुण भणइ 'ममंगचंदणरसेण ।  
 आलिंपसु नियदेहं पुणन्नवो होसि जेण तुमं' ॥४०६०॥  
 इय भणिऊणं देवी संकंता झत्ति मूलपडिमाए ।  
 राया वि परमहिद्धो जहोवइडुं अणुद्धेइ ॥४०६१॥  
 तो पुणरवि सविसेसं पूयं काऊण परमभत्तीए।  
 थुणिऊण पुणो बाहिं निग्गच्छइ गब्भगेहाओ ॥४०६२॥  
 जा निव्वियप्पच्चि(चि)त्तो वच्चइ तो पेच्छए ममं पुरओ ।  
 जोक्कारिओ मए चिय नरनाहो परमविणएण ॥४०६३॥  
 तो भणइ नरवरिंदो 'कत्थ तुमं? एत्थ केण कज्जेण ।  
 संपत्तो पन्नायर ! भीसणरयणीए एक्कुंगो?' ॥४०६४॥  
 तो पुण मए पभणियं 'संपत्तो देविदंसणनिमित्तं ।  
 कज्जं पुण मह चित्ते जाणइ चक्केसरी देवी' ॥४०६५॥  
 अह भणइ पुणो राया 'सच्चमिणं किंतु कज्जसंसिद्धी ।  
 जइ जाया ता लडुं अह नो ता कहसु साहेमि ?' ॥४०६६॥  
 अह पुण मए पभणियं दरवियसियवयणपंकयच्छेण ।  
 भुयणोवयारदुत्थियदेवीए पसाहियं कज्जं ॥४०६७॥  
 तो राया निक्कारणहासनिर(रि)क्खणवसेण सविलक्खो ।  
 चिंतइ 'न मज्झ कज्जं मोत्तुं कज्जंतरमिमस्स ॥४०६८॥  
 एयस्स परं कज्जं असेसकम्मक्खउज्जमो चेव ।  
 संसारियपक्खे पुण मह कज्जमिमस्स नियकज्जं ॥४०६९॥

जे नियकज्ज(ज्जु)ज्जुत्ता आवइवडियं पहुं उवेक्खंति ।  
 वेरीण अमच्चाण य न अंतरं किं पि किर ताणं ॥४०७०॥  
 वेरी वरं समक्खं अवयरमाणो उवायमुवइसइ ।  
 पच्छन्नमवयरंतो जरो व्व मंती दुहावेइ ॥४०७१॥  
 ता अणुचियमिव पुट्टं दुव्वयणं पिव खु दुक्कइ इमस्स' ।  
 इय लज्जावसचित्तो नरनाहो भणिउमाढत्तो ॥४०७२॥  
 'पन्नायर ! पयडमिणं मह दुहदुहिओ तुमं परं एक्को ।  
 मह संतिनिमित्तं चिय देविं आराहिउं पत्तो ॥४०७३॥  
 ता कुमरविरहविहुरियहियएण मए जमणुच्चि(चि)यं भणियं ।  
 तं सव्वं खमियव्वं नट्टमणो को न भुल्लेइ'? ॥४०७४॥  
 तो बंधुयत्त ! अहयं अपसाहियपहुपओयणविलक्खो ।  
 अप्पाणं मन्नंतो अकिंचिकरमेव जंपामि ॥४०७५॥  
 किं मह नरिंद ! तुह दुहदुहियत्तं वयणमेत्तसारस्स? ।  
 जं विसमदसावडिया गरुया सयमुद्धरंति सयं' ॥४०७६॥  
 इय एवं जंपंता राया अहयं अलक्खिया दो वि ।  
 संपत्ता रायगिहं सेज्जाए सुहं नुवंना य(?) ॥४०७७॥  
 तो पच्चूसे अहयं नरव[इ]णा पेसिओ तुह समीवे ।  
 संधीरणत्थमसरिसकुमारविरहेण दुहियस्स ॥४०७८॥  
 ता बंधुयत्त ! मुंचसु अवसेरिं सव्वहा कुमारस्स ।  
 चक्केसरीपसाया मिलिही सो तुज्झ अचिरेण ॥४०७९॥  
 तस्सेय सयलपरियणलोयं संवग्गिऊण चिडुंतो ।  
 सिरिवीरसेणदुहियं संधीरसु तस्स विवरोक्खे ॥४०८०॥

तुह एकूस्स न दुक्खं दुक्खमिणं तिहुयणस्स सयलस्स ।  
 बहुएहि समं सुंदर ! विसहिज्जइ जं समावडइ' ॥४०८१॥  
 इय एवमाइ बहुयं नरवइणा मंतिणा य सप्पणयं ।  
 अणुसासिओ म्हि गेहं कयपा(प्प)साओ य पड्विओ ॥४०८२॥  
 तो देव ! मए एण्हि दट्ठूणं घणविमाणसंघट्ठं ।  
 तुह रिद्धिवित्थरं चिय तं देवीवयणमणुसरियं ॥४०८३॥  
 एएण कारणेणं हसियं नरनाह ! पहरिसवसेण ।  
 अब्रं पुण जंपंतो तुह पच्चक्खं च लज्जामि' ॥४०८४॥  
 इय बंधुयत्तवयणं नरिंदगुरुदुक्खसूयगं सोउं ।  
 कुमर-कुमारीण मणे संकंतं रायदुक्खं व्व ॥४०८५॥  
 निसुयनरेसरदीहरदुहसारणिसरणिसंचरंतेण ।  
 बाहंबुपवाहेणं दोण्हं पि य पूरिए नयणे ॥४०८६॥  
 तो यज्जुन्नपयंपियपक्खालियलोयणाइं सल्लिणेण ।  
 जायाइं दो वि खणलवविओयतणुदुक्खपसराइं ॥४०८७॥  
 पुण भणइ वीरसेणो 'मह गरुयं कोउयं मणे मे(मि)त्त ! ।  
 किं कारणेण तुमए अप्पा बंधाविओ तइया ? ॥४०८८॥  
 जं तुमए किर भणियं नरेण कज्जत्थिणा सहेयव्वं ।  
 वह-बंधणाइ पुव्विं सेहररायस्स पच्चक्खं ॥४०८९॥  
 कज्जं ताव तुहेयं मह दंसणमेव किं तु पुच्छामि ।  
 अतुलबलेण वि तुमए अप्पा संजामिओ किं तु(नु)?' ॥४०९०॥  
 तो भणइ बंधुयत्तो 'कुमार ! जह तुज्ज कोउयं एयं ।  
 ता निसुणसु साहिज्जइ इमं पि संखेवपयडत्थं ॥४०९१॥

संबोहिओ वि तइया बहुविहवयणेहिं राय-मंतीहिं ।  
 तह वि न मणांमि जाओ मह संतोसो तुह विओए ॥४०९२॥  
 पडिभवणं पडिपुरिसं पडिजुवइं तुह विओयसंजायं ।  
 विरहानलपजलंतं नयरं मह कुंभियाओ व्व ॥४०९३॥  
 किं अन्नं? विरहानलजलंतजणसंगतत्तसलिलोहा ।  
 गोलानई वि मन्ने तुह दुक्खे दुक्खिया जाया ॥४०९४॥  
 तोऽहं तहासरूवं नासिक्कुं पेच्छिउं म(अ)पारंतो ।  
 अगणियनरिंदवयणो नीहरिओ अन्नदियहंमि ॥४०९५॥  
 अत्थंगयंमि सूरे घणकज्जलबहलतमदुसंचारे ।  
 पुरबाहिरंमि पत्तो करधरियकरालकरवालो ॥४०९६॥  
 तो नयरदाहिणावरदिसाए एगं मढं गओ अहयं ।  
 झंपियदारंमि तहिं काणं पि[य] निसुमिओ सहो ॥४०९७॥  
 तो निहुयपयपयारं दारे ठाऊण जाव निसुणेमि ।  
 ताव जरजज्जरेणं भणियं एक्केण सैवेण ॥४०९८॥  
 'रे रे चेल्लय ! उड्डसु मह वयणं सुणसु मुंच रे ! निदं' ।  
 कयकलयलेण गुरुणा पडिबोहिओ चेल्लओ भणइ ॥४०९९॥  
 'राउल ! देहाऽऽएसं' भणइ गुरु(रू) 'त(तु)ह कहेमि अच्छरियं ।  
 चिड्डइ मढस्स बाहिं मित्तविउत्तो नरो कोवि ॥४१००॥  
 सो जइ एत्थावसरे वीसमिऊणं दुजामनिसिमेत्तं ।  
 वच्चइ तइए जामे तो पावइ वंछियं अत्थं ॥४१०१॥  
 जं निग्गओ गिहाओ कुमुहुत्तेणं च तस्स फलमेयं ।  
 खयरेहिं बंधिऊणं समुद्दसेलंमि निज्जिह(हि)इ ॥४१०२॥

जइ पुण खयरेहिं(हि) समं बंधिज्जंतो रणमि जुज्झिह(हि)इ ।  
तो सो जयं लहिस्सइ न उणो मित्तेण संजोयं ॥४१०३॥  
जइ पुण तत्थ न जुज्झइ तो ते तं बंधिउण जलहिंमि ।  
सेले विसालसिंगे नेहं(हिं)ति खणद्धमेत्तेण ॥४१०४॥  
तत्थ य सुमित्तजोगो होही अइभीसणो महासमरो ।  
जयलच्छिसमालिं गियमित्तजुओ इह पुरे एही' ॥४१०५॥  
इय एवं भणिरुणं विरए सैवे मए वि चित्तवियं ।  
'को एत्थ पच्चओ किर एयस्स परुक्खवयणेसु?' ॥४१०६॥  
जाव अहं नियचित्ते एवं चित्तेमि ताव सीसो वि ।  
पुच्छइ गुरुं 'क एसो पुरिसो? को तस्स वा मित्तो ?' ॥४१०७॥  
तो देव ! मए चित्ते परिचित्तियमेत्थ पच्चओ होही ।  
जइ मह नामं एसो साहिस्सइ अहव मित्तस्स' ॥४१०८॥  
तो सीसो सैवेणं मणिओ 'सो एस बंधुयत्तो त्ति ।  
मित्तो वि वीरसेणो इमस्स जो भुवणविक्खाओ ॥४१०९॥  
अच्चुत्तमखत्तियगोत्तसंभवा दो वि विक्कमरसद्धा ।  
अइनिम्मलजसधवलियदियंतराला महासत्ता' ॥४११०॥  
तो देव ! सरहसमणो सोउं तं तत्थ मढदुवारंमि ।  
अत्थुरणं काऊणं खणमेत्तं संठिओ अहयं ॥४१११॥  
इय एवं आलावं काऊणं ते वि निब्भरं सुत्ता ।  
एत्थावसरे नरवर ! दुजाममेत्ता गया रयणी ॥४११२॥  
तो हं कयप्पणामो गुरु-देवाणं विणिग्गओ तम्हा ।  
एत्तो उद्धं तुमए निसुयं विज्जाहराहिंतो' ॥४११३॥



तो भणइ वीरसेणो 'साहु कयं मित्त ! जुज्झियं जं न ।  
 पुरिसा वीरेक्करसा पत्थुयकज्जाइं नासंति ॥४११४॥  
 न परक्कमं हि गुणिणो बुद्धिविहीणं जहा पसंसंति ।  
 बुद्धिं पि तह न मन्ने सलहंति परक्कमविहीणं ॥४११५॥  
 सो सुहडो न पयंगो आवड्ढइ जो जडो पईवे व्व ।  
 अपसाहियपहुकज्जो निक(क्कु)ज्जं वैरिखग्गमि ॥४११६॥  
 ता मित्त ! तए असमयपरिहरियपरि(र)क्कमेण बुद्धिमया ।  
 समयकयविक्रमेणं सव्वं मह साहियं कज्जं' ॥४११७॥  
 इय कुमर-बंधुयत्ता दो वि समं विहियबहुविहालावा ।  
 लंधियगयणद्धाणा चंदउरं तक्खणं पत्ता ॥४११८॥  
 ता सत्थवाहपुत्तं तंमि समुत्तारिऊण नियगेहे ।  
 अपमाणरयणकंचणभूसणपरिपूरिए ठ्वइ ॥४११९॥  
 तो पुरओ संपेसियससिसेहरकहियकुमरवुत्तंतो ।  
 उव्वूढहरिसपुलओ विचित्तजसनरवई जाओ ॥४१२०॥  
 कुमरागमणमहारससंजीवणिजायजीयपच्चासो ।  
 पढमूसासमिसेण व नीणेइ जणो मणदुहाइं ॥४१२१॥  
 को जाणिही गुणाणं ? ति सिद्धिलिया जेहिं किर गुणाबंधा ।  
 तस्सागमणे जाया ते च्चेय गुणप्पिया गुणिणो ॥४१२२॥  
 जे च्चिय उव्वेययरा तव्विरहुव्वेवियाण लोयाण ।  
 ते च्चिय नयरपएसा संजाया पयइरमणीया ॥४१२३॥  
 आउ त्ति पढमनिसुए चिरविरहविमइनीसहाओ वि ।  
 तरुणीओ तक्खण च्चिय सिंगारमयाओ जायाओ ॥४१२४॥

न तहा बहुविरहदुहं बाहइ दइयंमि निहयसंगामे ।  
 जह सत्रिहियसमागमवसपसरियहिययतरलत्तं ॥४१२५॥  
 जाव य रायाएसो पसरइ लोयंमि ताव पढमयरं ।  
 कुमराणुरायओ च्विय सव्वं पि पसाहियं नयरं ॥४१२६॥  
 जं तदुक्खदवानलदहुरन्नं व तोरणमिसेण ।  
 नयरं घणागमे इव तस्सागमणंमि पल्लवियं ॥४१२७॥  
 जं भवणग्गपसारिय-चलदीहधयासहस्सबाहाहिं ।  
 आलिंणित्तं व वंछइ बहुदिवसुकुंठियं कुमरं ॥४१२८॥  
 जो कुमरस्स विओए वियंभिओ दुहभरो व्व रयपसरो ।  
 सो अवणिज्जइ एण्हि पुराओ हिययाओ व जणेहिं ॥४१२९॥  
 पसरंतवहलकुंकुमरसच्छडासोणतिय-चउक्कपहं ।  
 पयडइ पयडं व नियं कुमारचरिएसु अणुरायं ॥४१३०॥  
 कयकमलकुसुमपयरा परिवियडा जे पुरस्स रायपहा ।  
 उट्ठीकयाणणा इव नियंति ते कुमरमग्गं व ॥४१३१॥  
 नूणमणेण पहेणं एही कुमरोत्ति जायहरिसेहिं ।  
 लोएहिं सव्वओ च्विय विहूसिया पुरपहपएसा ॥४१३२॥  
 कयपटंसुयतोरणकल्लोला विविहरयणरमणीया ।  
 खीरोयहि व्व जाया विपणिवहा सियसुहाधवला ॥४१३३॥  
 घणरथणभूसणाओ तरलत्तणकयगमागमसयाओ ।  
 पसरंति सायरंमि व वीईओ पुरे पुरंधीओ ॥४१३४॥  
 कुमरागमणमहूसव-सुहरसपरिभोयवट्टियाणंदो ।  
 अइरित्तकयविलासो पिसायगहिओ व्व पुरलोओ ॥४१३५॥

इय वीरसेणसंगमसुहाभिलासेण जाव पुरलोओ ।  
 तरलायइ ता मंती भणिओ एवं महीवइणा ॥४१३६॥  
 'पन्नायर ! चक्केसरिपायपसाएण अज्ज फलिओ व्व ।  
 मज्झ मणोरहरुक्खो मणवंछियवत्थुलाहेण ॥४१३७॥  
 ता कुमरजोग्गयाए जं उच्चियं मज्झ विहव-नेहस्स ।  
 तं सव्वहा तुरंतो संपाडसु पहरिसारंभं' ॥४१३८॥  
 तो भणइ महामंती 'देव ! अभणिएण पौरलोएण ।  
 कुमराणुरायउच्चियं वद्धावणयं समाढत्तं ॥४१३९॥  
 तुह परियणेण पेच्छसु संपाडियसयलनियनिओएण ।  
 हरि-करि-रह-नरमाई सव्वं पउणीकयं देव ! ॥४१४०॥  
 तो देव ! जाव नज्जवि नहंतरे घणविमाणसंघट्टं ।  
 दीसइ ता तुरिययरं जाइज्जइ कुमरपच्चोणिं' ॥४१४१॥  
 तो सयलपौरपरियणपरिवारो कयवियड्डसिंगारो ।  
 राया निउणविहूसियसिंधुररायं समारूढो ॥४१४२॥  
 अन्नेसु जहाजोग्गं हरि-करिमाईसु विविहसामंता ।  
 मंडलिया रायाणो पहाणपुरिसा य आरूढ ॥४१४३॥  
 तक्कालपहयड्ड(ढ)क्का-सहस्सरवजायपडिरवमिसेण ।  
 आणंदुक्कलियाहिं व किलिगिलियमसेसभुयणेहिं ॥४१४४॥  
 समकालचलंतबलभरभरंतनीसेसनयररायपहो ।  
 महया संमदेणं नीहरइ पुराउ नरनाहो ॥४१४५॥  
 एत्थंतरे सविज्जू ससक्कचावो घणो व्व उत्थरइ ।  
 गायंतखयरनारीघणकिरणविमाणसंघट्टो ॥४१४६॥

रविकरफंसपवड्ढिय-भासुररयणुच्छलंततेयड्ढे ।  
 पेच्छइ पसारियच्छो राया मणिनिम्मियविमाणे ॥४१४७॥  
 दट्ठूण ससंभंतो सविम्हओ 'अहह ! पेच्छ अच्छरियं ।  
 राया पहिड्ढियओ पन्नायरसम्मूहं भणइ ॥४१४८॥  
 चक्केसरीए तइया जं भणियमिहासि तुह मह समक्खं ।  
 तं नूण संभविस्सइ ससिसेहरसाहियं कज्जं ॥४१४९॥  
 जं न कहासु सुणिज्जइ चित्तेण वि जं न चिंतिउं जाइ ।  
 तं धन्नाण पहुप्पइ हेलाए सुपुन्नजोएण ॥४१५०॥  
 बहुसाहेज्जबलेणं कहमवि रामेण पाविया दइया ।  
 एक्कुंणेण वि इमिणा तं विहियं जं न केणावि ॥४१५१॥  
 जे जयनीसामन्ना गुणेहिं एसो व्य ते क्खु दो तित्ति ।  
 जे उण जणसामन्ना घरे घरे संति ते गुणिणो' ॥४१५२॥  
 पन्नायर-रायाणो इय एवं जा कुणंति आलावं ।  
 ता तुरयखुरुख(क्ख)णिओ रेणू लग्गो विमाणेसु ॥४१५३॥  
 गयगज्जिररवुम्मीसिय-जलहरगंभीरतूरनिग्घोसो ।  
 विज्जाहराण सेन्ने वित्थरइ धराहिरायस्स ॥४१५४॥  
 तो निसुयतूरसदो पच्चक्खनिरिक्खियंबररओहो ।  
 पुच्छइ मित्तं कुमरो 'किमेइ(य)'मिइ जायआसंको ॥४१५५॥  
 तो भणइ बंधुयत्तो 'संपत्ता देव ! नियसु नासिक्कुं ।  
 एसो वि महाराओ तुह संमुहमागओ सबलो' ॥४१५६॥  
 तं बंधुयत्तवयणं सोऊण विवेयविइयपरमत्थो ।  
 पफु(प्फु)ल्लवयणकमलो चंदसिरिं भणइ वीरवई ॥४१५७॥

'तह कह वि देवि ! पसरइ पुव्वभवब्भासओ महामोहा ।  
 गरुया वि जहा मन्ने अणेण दूरं नडिज्जंति ॥४१५८॥  
 नणु देवि ! अउव्वो च्चिय को वि पसाओ ममंमि देवस्स ।  
 जं पेच्छ अणुच्चि(चि)एणं समागओ अद्धपंथेण ॥४१५९॥  
 तो देवि ! अवयरिज्जइ धरणियले उन्नई इमा चेव ।  
 जं चरणतले वासो गुरूण पडणं खु विवरीयं ॥४१६०॥  
 विणयारिहेसु सुंदरि ! दुव्विणओ दुक्खकारणं होइ ।  
 विणओ हि ताण विहिओ कल्लाणपरंपराहेऊ' ॥४१६१॥  
 'सव्वेसु वि कज्जेसु तुमं पमाणं' ति चंदसिरिभणिए ।  
 वाहरइ वीरसेणो सप्पणयं सेहरासोए ॥४१६२॥  
 तो संभमप्पधाविरवच्छत्थलघोलमाणहारलया ।  
 'देहाएसं' भणिरा सिररइयकरंजली पत्ता ॥४१६३॥  
 'एसेस महाराओ सेणासंघट्टदलियमहिवीढो ।  
 संपत्तो ता तुरियं ओयरह समं'ति ते भणिया ॥४१६४॥  
 तो ते कुमारआणं सीसेण पडिच्छिऊण सेसं व ।  
 तक्खणमेत्तेणं चिय अवयरिया धरणिवीढंमि ॥४१६५॥  
 जो खज्जोयगणो इव तारानियरो व्व भाणुभूओ व्व ।  
 कमसच्चवियावयवो जणेण दिट्ठो विमाणोहो ॥४१६६॥  
 जो उद्धच्छिनियच्छिर-पेच्छयजणजणियविमह्याणंदो ।  
 सो खेथराण निविहो(डो) ओयरइ विमाणसंघट्टो ॥४१६७॥  
 नीहरइ ललियकोमल-लडहुब्भडकयवियड्ढिसिंगारो ।  
 चंदसिरीए समओ कुमरो नियमणिविमाणाओ ॥४१६८॥

तो बहुविहविज्जाहर-जयसद्वनिबद्धदसदिसाभोओ ।  
 वीइज्जंतो ससहर-करपंडुरचारुचमरेहिं ॥४१६९॥  
 घोलंतकन्नकुंडल-मऊहमासलियमुहपहावलओ ।  
 उभयओ सपाससंठिय-सेहरयासोयकयसेवो ॥४१७०॥  
 गयवेयवसविसंतुल-सिरिकुसुमामोयविहियसंजमणो ।  
 भुयसिहर ल्हसियसेहरकरधरियलुलंतवरवत्थो ॥४१७१॥  
 अइनिद्धमित्तपीवर-पओट्टपरिसंठियगगकरकमलो ।  
 सुपयंडदंडिहक्का-वारियबहुखयरसंघट्टो ॥४१७२॥  
 गायंतवाम-दक्खिणकलकिंनरसावहाणमण-नयणो ।  
 चउदिसि खयरमहाभड-कोडिसहस्सेहिं परियरिओ ॥४१७३॥  
 सिरधरियचंदसेहर-विसेसधवलायपत्तसोहिल्लो ।  
 बहुविज्जाहरनारीपरिवारियचंदसिरिसहिओ ॥४१७४॥  
 संपत्तो पुरपरियण-नयणचउरेहिं सुचिरतिसिएहिं ।  
 पिज्जंतकंतिजोण्हापरिपुत्रो पुन्निमससि व्व ॥४१७५॥  
 अंतोभुत्तवियंभियसिणेहरसपसरियच्छिबत्तेण ।  
 अप्पत्तपुव्वपावियविसेससुहजायहरिसेण ॥४१७६॥  
 दिट्ठो रवि व्व परिचत्तहत्थिणा राइणा अभिभवंतो ।  
 तारायणं कुमारो निययपहावेण खयरबलं ॥४१७७॥  
 'एसो. असेसतिहुयण-भूसणभूओ व्व को वि परमप्पा' ।  
 इय गरिमागुणसारं वियप्पिओ रायरायेण ॥४१७८॥  
 दट्ठूण तस्स तव्विह-लहुईकयसुरसिरिं महारिद्धिं ।  
 कज्जपयडं च विक्कममभिभूयपुरंदरं राया ॥४१७९॥

मन्नइ मणंमि 'संपइ नत्थि तिलोए वि एयपडितुल्लो ।  
 जो उण इमाओ(उ) गरुओ दूरे च्चिय सो न संभवइ' ॥४१८०॥  
 इय बहुविम्हयत्तगय-वियप्पसयपरवसस्स नरवइणो ।  
 अहिधाविऊण कुमरो सम्पणयं पडइ पाएसु ॥४१८१॥  
 तो पायवडणपयडिय-लज्जासंजायमणविलक्खेण ।  
 'उड्डसु' इय भणिरुणं अवगूढो राइणा कुमारो ॥४१८२॥  
 एवमसोओ वि तहा सेहरयाया वि निच्चियप्पेण ।  
 कुमरसंभावणाए य वियप्पिया रायराएण ॥४१८३॥  
 तो जस्स जारिसी किर नियपहुसंभावणा तयणुरूवं ।  
 सव्वो वि खयरलोओ गोरविओ रायराएण ॥४१८४॥  
 तो भीमसुवेउब्भइ-भिउडीभयमुक्कवियडमगोहिं ।  
 खयरेहिं नमिज्जंती चंदसिरी चंदसमवयणा ॥४१८५॥  
 'जय जीव देवि ! दिज्जउ दिट्ठिपसाओ'त्ति जंपमाणेण ।  
 लज्जाए खे(ख)यराणं अदिन्नपच्चुत्तरालावा ॥४१८६॥  
 संनिहियबंधुजीवासिक्खावसविहियकिंचिपागब्भा ।  
 मणिभूसणकिरि(र)णह्हा पहायसंज्ज व्व हयदोसा ॥४१८७॥  
 एकूत्तो विज्जाहरि-करदावियरयणदप्पणा सणियं ।  
 अन्नत्तो गुरुलज्जावीडयविवरंमुही होइ ॥४१८८॥  
 गइवसमिलंतखेयरनारीकमठवियमणिमयाहरणा ।  
 पयपयवारविलासिणि-उत्तारियचक्खुभयलवणा ॥४१८९॥  
 संकुअइ सरीरंचल-संवग्गणपयडियप्पविणएहिं ।  
 पणमिज्जंती सविणयमसोय-सेहरयाएहिं ॥४१९०॥

बहुमाणभत्तिनिब्भर-सरीरनिरवेक्खपाए पणमंती ।  
 उव्वहइ नियनिडाले पवित्तपिउपायरयतिलयं ॥४१९१॥  
 दूरपसारियभुयवित्थरेण आलिंगिऊण नरवइणा ।  
 पुण नेहनिब्भरेणं सिरिं(रं)मि परिचुंबिया धूया ॥४१९२॥  
 चिरविरहदुक्खदुब्बल-देहं जणणिं च सा नमोक्करइ ।  
 जणणी वि समालिंगइ नियउच्छंगे निवेसेइ ॥४१९३॥  
 तो रायाएसजहाणुरूवपरिकप्पियासणनिविद्धा ।  
 संभासिया कमेणं नरवइणा वीरसेणाई ॥४१९४॥  
 पुण सायरं च पुद्धा सरीरकुसलाइ सब्बवुत्तंतं ।  
 पडिभणिंयमिमेहिं पि य 'तुह प्पसाएण कुसलं' ति ॥४१९५॥  
 तो भणइ वीरसेणो घणो व्व पढमो विओयगिम्हेण ।  
 संतावियाण हिययं पल्हायंतो जणवयाण ॥४१९६॥  
 'इह पयइसज्जणाणं न होइ नरनाह ! हिययमालिन्नं ।  
 अह होइ कह वि देव्वा तथा वि न त्थि(थि)रत्तणं लहइ ॥४१९७॥  
 जइ कहवि अंतरिज्जइ अमयमओ राहुणा व्व हरिणंको ।  
 दोज(ज्ज)न्नेणं सुयणो तं नणु कालस्स माहप्पं ॥४१९८॥  
 जे उण कालगुणेणं मणोवियारा हवंति सुयणस्स ।  
 ते खणमेत्तं ससिणो संझारायव्व जइ होंति ॥४१९९॥  
 तो ते ह्यमोहतमे तिरोहियासेसमलिणभावंमि ।  
 अप्पाणमप्पण च्चिय नाणायरिसंमि पेच्छंति ॥४२००॥  
 निम्मलविवेयलोयण-विलोइयासेसवत्थुसब्भावा ।  
 तो ते अविवेयंधं अन्नं पि जणं उव्वहसंति ॥४२०१॥



ता देव ! नमिरखेयर-किरीडसंघट्टमसिणकमपीढा ।  
 पुव्वुत्तगुणसरूवा सुयण च्विय सेहरासोया ॥४२०२॥  
 न हु देव ! दुज्जणाणं हवंति एवंविहाओ पयईओ ।  
 अणवेखि(क्खि)[य]उवयारा जं परकज्जे पयट्टंति ॥४२०३॥  
 एएहिं दुज्जणो वि हु कयावयारो वि मारिसो देव ! ।  
 तह उवयरिओ संपइ सज्जणगणणाए जह दिट्ठो ॥४२०४॥  
 अइदुज्जणो वि पावइ सुयणपसंगेण देव ! सुयणत्तं ।  
 लिंबरसस्स व बिंदू महरत्तं दुद्धजलहिंमि ॥४२०५॥  
 ता देव ! मज्झ वयणं [वयणं] चिय केवलं न मंतव्वं ।  
 कज्जपयडत्तणेणं एसो च्विय एत्थ परमत्थो' ॥४२०६॥  
 इय एवमाइबहुविहतग्गयगुणसंकहं सुणेऊण ।  
 नियगरुयत्तणसरिसं नरनाहो भणिउमाढत्तो ॥४२०७॥  
 'इह वीरसेण ! भुयणे सुयणत्तं तह य दुज्जणत्तं च ।  
 उवयारवयारकयं पायं सव्वत्थ संभवइ ॥४२०८॥  
 एकुद्धो तैलोक्के अवयरिए जो न चयइ सोजन्नं ।  
 दो-तिन्नि उदासीणा होंति अणंता उ अवयरिए ॥४२०९॥  
 उवयारमोल्लकीया दासा ते सज्जणा उण न होंति ।  
 कह ते वि सुयणसदं समुव्वहंता न लज्जंति ? ॥४२१०॥  
 इह कलिकाले संपइ एयं चिय सज्जणत्तणं रूढं ।  
 तं कयजुए वि दुल्लहं(लहं) जं मज्झत्थावयारेसु ॥४२११॥  
 ता सच्चं तुह वयणं अवयरिए वि हु न जेहिं परिचत्तो ।  
 पयईए सुयणभावो ते धन्ना सेहरासोया' ॥४२१२॥

तो दुच्चरियासेवणसुमरणसंजायचित्तवेलकखा ।  
 अभणंत च्विय हियए कहंति खयरेसरा दुक्खं ॥४२१३॥  
 तो भणइ महामंती 'पज्जंतो' नत्थि सज्जणगुणाण ।  
 ता पुरपवेससमओ संपत्तो देव ! उच्चलह' ॥४२१४॥  
 तो तव्वयणाणंतरमुडुंताणंतखयरलोयकओ ।  
 तक्कालकज्जवावडपरियणकोलाहलो जाओ ॥४२१५॥  
 'रे! ढोयसु करिरायं पल्लाणसु तुरयमाणसु रहं च ।  
 हक्कारसु च्छ(छ)त्तधरं कमेण ठावेसु पायालं ॥४२१६॥  
 पुरओ झा(ठा)णझाणे विरयसु पेच्छणय-कमपरिडुवणं ।  
 वारविलासिणिसत्थं आरोवसु करिणिखंधंमि ॥४२१७॥  
 चायत्थं मणि-कंचणभूसण-देवंगवत्थसंघायं ।  
 पउणीकरेसु तुरियं हक्कारसु तक्कुयसमूहं ॥४२१८॥  
 रे ! अज्ज हरिसदिवसो कुण बंधणमोयणाइं सव्वत्थ ।  
 उग्घोससु सव्वत्तो अभयपयाणं च पाणीण ॥४२१९॥  
 इय एवमाइबहुविहआएसनिउत्तपरियणो राया ।  
 आणावइ मत्तगयं आरोहत्थं कुमारस्स ॥४२२०॥  
 सिरिधरियधवलछत्तो सेहरराएण तह असोएण ।  
 सियचारुचमरचालण-तरलीकयकुडिलकेसगो ॥४२२१॥  
 तत्थेव मणिविमाणे आरूढा बहुविलासिणिसमेया ।  
 विजयवइ-बंधुजीवापरियरिया चंदसिरिदेवी ॥४२२२॥  
 तो अणुरूवनिरूवियनाणाविहजाण-वाहणारूढो ।  
 अन्नो वि पहाणजणो चडिओ सह रायकुमरेहिं ॥४२२३॥

लांबन्न-रूव-निवसण-महग्धमाणिकूभूसणधराण ।  
 पौराण खेयराण य उप्पयणकओ च्चिय विसेसो ॥४२२४॥  
 धवलब्भछत्त-चामर-मंजरिहत्थेहिं परिगओ कुमरो ।  
 सरय-महूहि व मयणो सेहरयासोयराएहिं ॥४२२५॥  
 सोहइ गयणंगणघोलमाणनाणाविमाणसंघट्टो ।  
 वद्धाविउं च(व)आओ सुरलोओ मच्चलोयस्स ॥४२२६॥  
 कत्थ वि पसत्थमंगल-गीयगुणाणंदवट्ठिउच्छाहो ।  
 अन्नत्थ बंदिमुहसुयनियगुणसामलियमुहच्छा(छा)ओ ॥४२२८७॥  
 एकूत्तो मणवंछिय-धणलाहपहिड्डजणसुयासीसो ।  
 अन्नतो(त्तो) अंतेउरथेरीकयनट्टपरिहासो ॥४२२८८॥  
 कत्थ वि पढंतबंभणअणुकंपाच्छिन्नजम्मदालिद्धो ।  
 अन्नत्थ मग्गसंडियपेच्छणयनियच्छणसयण्हो ॥४२२९॥  
 कत्थ वि नयरमहंतय-कयदिट्ठिपसायवसनमिज्जंतो ।  
 अन्नत्थ पयाताडणपडिहारनिवारणक्खणिओ ॥४२३०॥  
 इय नाणाविहपुरसंपवेसवै(वइ)यरनिरिक्खणक्खित्तो ।  
 पत्तो नयरब्भंतररायपहं सोहियं कुमरो ॥४२३१॥  
 'नूणमणेणं एही कुमरो मग्गेण' इय वियप्पेण ।  
 नियनियभवणाणुवरिं आरुहइ नयरतरुणियणो ॥४२३२॥  
 जह जह एइ समीवं रायसुओ तह तहा सुवियडो-वि ।  
 परिसंकडाइ मग्गो समोत्थरंतेण लोएण ॥४२३३॥  
 जत्तो च्चिय अवलोयइ कुमरो नयणुप्पलेहिं तरुणीण ।  
 ततो च्चिय अंचिज्जइ वलंतकंठद्धवल्लिएहिं ॥४२३४॥

गोत्ति व्व गिहं चत्तं, गरलं व गुरू रिउ व्व भत्तारो ।  
 चिर वीरसेणदंसणरसलालसकुलवहुजणेहिं ॥४२३५॥  
 जह अग्गेसरपहजण-जणियाणंदो समीवमल्लियइ ।  
 तह पच्छिमाण सो च्विय वोलीणपहो दुहं देइ ॥४२३६॥  
 कुमरो त्ति धावमाणा विसंखलुच्छलियणेउरारावा ।  
 चरणानुधावमाणं अक्कोसइ को वि हंसउलं ॥४२३७॥  
 जणसंमद्वनिपीडण-मिसमउलियलोयणा पियं का वि ।  
 पयडं चिय परिरंभइ अलद्धपिसुणंतरा कुलडा ॥४२३८॥  
 का वि लिहंती कुमरं धाया कयचित्तपट्टियाहत्था ।  
 अणुसोइया जणेणं दुल्लहलंभाणुराएण ॥४२३९॥  
 'तुह चेव हले ! कोडुं अन्नो मा को वि एत्थ पेच्छेओ !  
 जं मह दंसणमग्गं निरुंभसे नियसरीरेण ॥४२४०॥  
 मा को वि होउ पियसहि ! दुब्बलदेहो पराभवद्धानं ।  
 मं पेल्लिऊण एसा जमग्गओ कुमरमिक्खेइ' ॥४२४१॥  
 'किं जूरसि अप्पाणं अज्ज? न ता इच्छसे पुरो कुमरं?।  
 इय जंपिरेण केण वि मडहंगी ठाविया खंधे ॥४२४२॥  
 'किं न हले ! थणवट्टं अइधिट्ठे ! नवनहंकियं पिहसि? ।  
 एक्केण नियंबेणं तुमए उ निरुंभिओ मग्गो ॥४२४३॥  
 निवडिह(हि)सि पुरो पावे ! भवणसिरग्गाओ कुमरकोड्डेण ।  
 चिरनिवडियं पि बालं एसा उण न मुणइ हयासा ॥४२४४॥  
 सहि ! पेच्छ महच्छरियं कुमरेण महाबला वि जे रिउणो ।  
 ते अउरुव्वकमेण व दासत्तं अत्तणो नीया ॥४२४५॥

सहि ! एसा चंदसिरी विज्जाहरिविंदवेढिया एइ ।  
 जेणं चिय अवहरिया तेणं चिय मणिविमाणेण ॥४२४६॥  
 हलिमाए ! पेच्छ चोज्जं एसो च्विय सो असोयखयरिंदो ।  
 उज्जाणाओ तइया अवहरिया जेण चंदसिरी ॥४२४७॥  
 पियसहि ! चंदसिरि च्विय सलहिज्जइ सयलजुवइमज्जंमि ।  
 जा वीरसेणघरणीसदं पाविह(हि)इ अइदुलहं ॥४२४८॥  
 सहि ! सरिसरूव-जोव्वण-लावन्न-कला-कुलाणुरायाण ।  
 केसिंचि तुडिवसेणं संजोगो होइ धन्नाण' ॥४२४९॥  
 इय वीरसेणदंसणरसपरवसभावकयवियाराण ।  
 एमाइणो अणेया संजाया जुयइआलाया ॥४२५०॥  
 पत्तो कमेण पयपय-पेच्छणयच्छरियबहुविणोयसयं ।  
 घणवइयरं व नयरं पेच्छंतो राउलदुवारं ॥४२५१॥  
 पविसइ पविसंतमहा-करिंदघणदाणवारिधारहिं ।  
 पिहियरह-तुरयखरक्खु(खु)र-समुक्खयाणंतुरयपडलं ॥४२५२॥  
 समयविसमाणबलभर-दुवारपडिरुद्धनिग्गम-पवेसं ।  
 तोरणनिबद्धदप्पणघडंत-विहडंतजणपडिमं ॥४२५३॥  
 कत्थ वि वंसविमीसिय-गायंताणंतगायणसमूहं ।  
 कत्थ वि सिरिकरणट्टियसामंतविलद्धबहुदेसं ॥४२५४॥  
 कत्थ वि य सत्तसालादिज्जंताणंतलोयधण-कणयं ।  
 कत्थ वि पढंतबहुविहबंदिसमुग्घुडुजयसदं ॥४२५५॥  
 कत्थ वि वारविलासिणि-रसणामणिकिंकणीरवकरालं ।  
 कत्थ वि ह्ठ(ठ)क्का-मदल-कलकाहलसदगंभीरं ॥४२५६॥

कत्थ वि नयरंतेउर-नारीसंमद्वडिड्याणंदं ।  
 कत्थ वि पारद्धमहावद्धावणऊसवविसेसं ॥४२५७॥  
 इय सयलभुयणलच्छी-निवासड्डा(ठा)णं व सव्वओभदं ।  
 पासायं नरनाहो सवीरसेणो पविट्ठो त्ति ॥४२५८॥  
 तो नमियदेव-गुरुपय-कमले सि(सी)हासणंमि नरनाहो ।  
 उवविसइ पुणो बीए कुमरो सह खयरराएहिं ॥४२५९॥  
 अन्नो वि जहाजोगं कयपडिवत्ती नरिंदचदेण ।  
 दिन्नासणोवविट्ठो सेहरयासोयपरिवारो ॥४२६०॥  
 देवी विजयवई वि य सह चंदसिरीए बंधुजीवाए ।  
 संपत्ता नियभवनं अंतेउरसंठिया हेट्ठा ॥४२६१॥  
 तत्थ य चंदसिरीए चिरविरहविमद्वदुब्बलसरीरो ।  
 मिलिओ विलासलच्छीपमुहो सहियायणो सव्वो ॥४२६२॥  
 एत्थंतरंमि राया तं दट्ठुं वीरसेणसामग्गिं ।  
 ईसीसिखलंतक्खरवयणमिणं भणिउमाढत्तो ॥४२६३॥  
 'तुह वीरसेण ! असरिस-सुपुन्नपब्भारपिंडघडियस्स ।  
 असुहोदओ न होही जो खु अपुन्नेहिं संभवइ ॥४२६४॥  
 अम्हे च्विय इह भुयणे अपुन्नपरमाणुनिम्मिया किर जे ।  
 पच्छिमवए वि मूढा इह्विओयाइ पेच्छामो ॥४२६५॥  
 जं पुण पुन्नपसज्झं जायं तुह दंसणं न सो अम्ह ।  
 पयइगुणो किंतु गुणो सो चक्किणिपयपसायस्स ॥४२६६॥  
 पइं वीरसेण ! दिट्ठे संपइ पुण परिगणेमि अप्पाणं ।  
 बहुपुन्नभायणं पिव होही कज्जाणुमाणेण ॥४२६७॥

मुणियजिणपवयणत्थो वि एत्तियं जं विलंबिओ कालं ।  
 तं तुह विओयदुत्थियचंदसिरीसंगमासाए ॥४२६८॥  
 पढमं धूयादुक्खं तं तुह दुक्खेण सयगुणं जायं ।  
 जह विजयवईए तहा विसेसओ सयललोयस्स ॥४२६९॥  
 ता तद्दुक्खपवद्धियविवेयसंसारसुहविरत्तस्स ।  
 मह परिणयं जमेसो दुहहेऊ सयणसंबंधो ॥४२७०॥  
 ते विरला जाण सया सोक्खसमिद्धाण जायइ विराओ ।  
 दुहपीड(डि)याण काण वि दुहे वि न उणो जहन्नाणा ॥४२७१॥  
 इय जायविराएण वि पुणोवि परिभावियं मए हियए ।  
 एसो न होइ समओ मह पव्वज्जाविहाणंमि ॥४२७२॥  
 चंदिसिरी-कुमरदुस्सह-दुक्खेण वि पीडिओ जणो सब्बो ।  
 जइ पुण मह पव्वज्जा ता जायइ जयमहापलओ ॥४२७३॥  
 जइ अणुयत्तइ दे(द)इवो ता धूयं अप्पिऊण कुमरस्स ।  
 कयसयलरज्जकज्जो जहोच्चिय(यं) पुण करिस्सामि ॥४२७४॥  
 तुह वीरसेण ! निम्मलपुत्रेहिं जहेत्तियं समावडियं ।  
 अन्नं पि तहा होही तुहाणुहावेण भद्दयरं ॥४२७५॥  
 जा पुव्वकप्पिय च्विय नियपाणपयाणओ तए कीया ।  
 सा पत्थणामहग्घं घेप्पउ नरनाह ! चंदसिरी ॥४२७६॥  
 एत्तियकज्जनिमित्तं न तए वि सयं गहेण परिणीया ।  
 रत्तेण वि अणुरत्ता मए अदिन्नत्ति चंदसिरी ॥४२७७॥  
 कस्सेत्तिउ(ओ) विवेओ ! कस्स महासत्तया वि इयरूवा ! ।  
 कस्सिदियमणसंजमसत्ती ! जह तुज्झ संपत्ता' ॥४२७८॥

'इय भणिए नरवइणा भणियं कुमरेण 'अणवयासो मे ।  
 पडिउत्तरस्स नरवर ! जहोचियं कुणसु सयमेव' ॥४२७९॥  
 एत्थावसरे पत्तो फल-पुप्फकरो सयं अणाहूओ ।  
 दट्ठुं कुमारमासिच्चायपरो तत्थ जोइसिओ ॥४२८०॥  
 तं दट्ठूण नरिंदो पहिइहियओ वियप्पए एवं ।  
 'कह चिंतियमेत्तो वि य संपत्तो एस जोइसिओ ? ॥४२८१॥  
 ता अवस्समविग्घेणं होही मह वंच्छियत्थसंसिद्धी ।  
 कहमन्नहा अयंडे संपत्तो एस फलहत्यो?' ॥४२८२॥  
 तो पूइऊण विप्पं पुच्छइ चंदसिरि-वीरसेणाण ।  
 पाणिग्गहणानिमित्तं सुहलग्गदिणं महाराओ ॥४२८३॥  
 तो सो हरिसवसुग्गय-पुल्लयंकुरकहियकज्जसंसिद्धी ।  
 गणिऊण थिरो साहइ लग्गदिणं पंचमे दियहे ॥४२८४॥  
 तो भणियमसोएणं 'संनिहियं देव ! सुंदरं लग्गं' ।  
 पुण सेहरेण भणियं 'अविलंबं कुणसु नरनाह !' ॥४२८५॥  
 तो राइणा सहरिसं निययावासंमि पेसिओ कुमरो ।  
 सेहरयासोयजुओ तत्थच्छइ बुहविणोएहिं ॥४२८६॥  
 राया वि य उवउत्तो जं जं पुच्छइ महंतए कज्जं ।  
 तं तं चिय संपन्नं मणि-कणयाहरण-वत्थाई ॥४२८७॥  
 तो आइसइ नरिंदो 'हक्कारव(ह) दूरदेसरायाणो ।  
 पुण जणवयाण पयडह कुमारपाणिग्गहपमोयं ॥४२८८॥  
 सविसेसहट्टमंदिरसोहं कारेह देह दाणाइं ।  
 पालेह कुलायारं कारह तह वुद्धिसद्धं च ॥४२८९॥



कुलवुद्धाओ निरुवह सयलकुलायारकरणनिउणाओ ।  
 अट्टाहियामहूसवमसमं चंदप्पहे कुणह ॥४२९०॥  
 तह रायपंगणंतर-पमाणओ मंडवं सवारेह ।  
 तह माइनिमंतणयं भुंजावह माइबंभणए ॥४२९१॥  
 पूएह सयलदेवे कारह पुरदेवयाण पूयाओ ।  
 वारविलासिणिसत्थं संजत्तह लडहसिंगारं ॥४२९२॥  
 तह विविहखंड-खज्जय-भोज्जं अणिवारियं पयट्ठेह ।  
 दीण-किविणंधयाणं करुणादाणं दवावेह ॥४२९३॥  
 कन्नादाणनिमित्तं लक्खं करडीण दह तुरंगाण ।  
 पंचदह संदणाणं ठवेह लक्खे सुसोहाण ॥४२९४॥  
 दहकोडिलक्खमाणं पउणं कारेह कणयभंडारं ।  
 पेसेह जहाजोग्गं वत्थाहरणाइं लोयाण ॥४२९५॥  
 बहुकेत्तियं व भन्नह(इ)? जं जह जइया हवेज्ज उवउत्तं ।  
 तं तह तइया सव्वं कुणह सयं निययबुद्धीए' ॥४२९६॥  
 इय सयलविवाहोइय-वावारनिरुवणं करेतस्स ।  
 नरवइणो संपत्तो विवाहदियहो पमोएण ॥४२९७॥  
 जो भग्गिओ मणोरहसएहिं उवजाइएहिं बहुएहिं ।  
 सो जणवयाण दियहो आणंदमओ व्व संपत्तो ॥४२९८॥  
 दिव्वाहरण-विहूसण-दिव्वंसुयनिवसणो जणो नयरे ।  
 संचरइ विवाहूसव-परिओसपवट्ठिउच्छाहो ॥४२९९॥  
 पसरंतहियपहरिस-विसंखलुच्छलियवयणविन्नासो ।  
 उवहुत्तबहुमहूसवरसो व्व मत्तो जणो भमइ ॥४३००॥

कयकुंकुमंगराओ निबद्धवन्नद्धकुसुमपम्भारो ।  
 तरुणीयणो विवाहे न कस्स मणमोहणं कुणइ ? ॥४३०१॥  
 उस्सिखलपरिभमियं उस्सिखलजंपियं च हसियं च ।  
 जुवईण जुवाणाण य होइ विवाहूसवदिणेसु ॥४३०२॥  
 गोत्तिनिवासविमोक्खो व्व होइ गिहनिग्गमो कुलवहूण ।  
 सैरविहारमहासुहविवाहदियहं सरंतीण ॥४३०३॥  
 अन्नोन्नो सिंगारो सरसं गीयं च लडहनट्टं च ।  
 तरुणीण कहं जायइ जइ न विवाहूसवो होइ ॥४३०४॥  
 दसदिसिविहायपसरिय-तूररवुप्पन्नपडिरवमिसेण ।  
 दिसिवालेहिं व हरिसा वद्धावणयं व पारब्धं ॥४३०५॥  
 इय हल्लप्फलपरियण-पिसुणियसन्निहियलग्गपत्थावो ।  
 जा पत्थिवोऽणुपालइ ता तुरियं वीरसेणो वि ॥४३०६॥  
 वेयह्हाओ दुसेढीसमहियसंपत्तखयर-खयरीहिं ।  
 कयपढमनियकुलोइयवरकज्जविसेसकरणीओ ॥४३०७॥  
 वज्जंतगहिरमणहर-तूररवुफु(प्फु)न्नदसदिसावलयं ।  
 गायंतधवलमंगलविज्जाहरिवड्ढियाणंदं ॥४३०८॥  
 नच्चिरवारविलासिणि-संमद्वखुहंतमणिमयाहरणं ।  
 दिज्जंतपारिओसिय-मागहउग्घुड्डजयसदं ॥४३०९॥  
 कुमरस्स सयलतिहुयण-संजणियच्छेरयं महिड्डीए ।  
 अविहवकुलविज्जाहरिजणेहिं इय ण्हवणयं विहियं ॥४३१०॥  
 तो तदंसणपसरिय-अणुराय-परव्वसाहिं नारीहिं ।  
 ढोइयविविहाहरणो पारब्धो भूसिउं कुमरो ॥४३११॥

पढमं चिय तस्स कओ तिलओ हरियंदणेण भालयले ।  
 तल्लिहियक्खरपरिणय-पुत्रपयारस्स पंथो व्व ॥४३१२॥  
 उतत्तकणयदेहो सिरिखंडसियंगरायरुइरंगो ।  
 धवलब्भपडलपिहिओ रेहइ सो सारयरवि व्व ॥४३१३॥  
 मुत्ताणुगयं परलोयसुहयरं बहुसुवन्न-मणिघडियं ।  
 जिणवयणं पिव सवणे कुंडलजुयलं सहइ तस्स ॥४३१४॥  
 आमलयथूलमोत्तिय-हारावलिकलियवियडवच्छयलो ।  
 उइयमणगयणनिम्मलविवेयससिपारिवासो व्व ॥४३१५॥  
 निरुवद्ववं च निवसइ भुयदंडे जस्स जयसिरी निययं ।  
 कहमन्नहंगयमिसा दीसइ तिस्सा सिरकिरीडो? ॥४३१६॥  
 मणिकंकणकिरि(र)णपहा-पिहुमंडलपरिगओ करो जस्स ।  
 रयणमय-वालुयामयकयालवालो व्व कप्पतरू ॥४३१७॥  
 निवसियसियपट्टंसुय-तदुवरिपडिबद्धरयणकडिपट्टो ।  
 रयणायरपरिखित्तो रेहइ सो जंबूदी(बुदी)वो व्व ॥४३१८॥  
 मणिकंकण-कडयावलि-कलियकमो एसु परिणसु ममं ति ।  
 मणिमुदंगुलिकरजुयधरिओ व्व पियाए पाएसु ॥४३१९॥  
 साहावियतेयपहानिप्फुरतेयाइं तह न सोहंति ।  
 तणुभूसणाइं परिभवलज्जाए व जायसामाइं ॥४३२०॥  
 सो भूसणेहिं सोहइ जो न सयं रूवसंपयाजुत्तो ।  
 इयरस्स पुणो ताइं वि सहावसोहं तिरोहिंति ॥४३२१॥  
 विज्जाहरीहिं तह वि य सव्वंगेसु वि विहूसिओ कुमरो ।  
 जुयइयणपहाणत्तं पायं एवंविहत्थेसु ॥४३२२॥

इय विहियसयलमंगल-कोउयसंपुन्नसयलकायव्वो ।  
 विन्नविओ सम्पणयं सेहरयासोयराएहिं ॥४३२३॥  
 'इह देव ! रायउत्तो चंदजसो आगओ सयं दारे ।  
 तुज्झाहवणनिमित्तं विचित्तजसरायवयणेण ॥४३२४॥  
 आसन्नं सुमुहुत्तं किज्जउ विजओ कुमार ! नीसेसो ।  
 पडिवालइ तुह दंसणसमुज्जुओ जणवओ बाहिं' ॥४३२५॥  
 'एवं' ति पभणिरुणं अक्खय-सिद्धत्थ-दहि-दुरुव्वाहिं ।  
 दंतुरियसिरो कुमारो आरूढो पट्टहत्थिमि ॥४३२६॥  
 करिराओदयसिहरगओइयकुमरिंदुदंसणेणेव ।  
 विज्जाहरपुरलोओ पवियसिओ कुम(मु)यसंडो व्व ॥४३२७॥  
 कुमरकरिणो दुपासेसु दो गया तेसु सेहरासोया ।  
 करधरियचमरचालण-कणंतकरकंकणा चडिया ॥४३२८॥  
 सिरधरियधवलछत्तो पासनिविट्ठेण बंधुयत्तेण ।  
 पवणपघोलिरधवलब्भतलगओ सारयससि व्व ॥४३२९॥  
 अन्नेसु बहुविहेसुं करि-तुरय-महारहेसु नीसेसो ।  
 संचलइ समारूढो पहाणलोओ कुमारस्स ॥४३३०॥  
 मंथरचलंतबहुविह-विज्जाहरघणविमाणनिवहेण ।  
 सयलं चिय छाइज्जइ गयणयलं ओत्थरंतेण ॥४३३१॥  
 चउभदसालसुंदर-बहुवन्नविमाणनिवहसंछन्नं ।  
 कयकुंजरक्खरेहाबंधसुचित्तं व गयणयलं ॥४३३२॥  
 नियनियविमाणताडिय-विज्जाहरगहिरतूरसद्धमिसा ।  
 जयकारइ व्व कुमरं पडिसद्धमिसेण गयणतहं ॥४३३३॥

पडिघरदुवारनिग्गय-पुरनारीविहियमंगलसहस्सो ।  
 अणवरयं लायंजलिकयपूओ पुरपुरंधीहिं ॥४३३४॥  
 पडिभवणोवरि बहुपुन्नकलसपल्लवविकिन्नबिंदूहिं ।  
 तरुणीहिं पाउसो इव पसरइ कयदुद्धिणारंभो ॥४३३५॥  
 गयणट्टियविज्जाहरि-करकमलविमुक्कुसुमघणवरिसो ।  
 'जय जीव नंद वड्डसु' वुड्ढाजणदिन्नआसीसो ॥४३३६॥  
 इय जत्तो च्चिय जोयइ तत्तो च्चिय खयर-पुरजणं नियइ ।  
 तक्कुल्लाणनिमित्तं कयकोउयमंगलारंभं ॥४३३७॥  
 सो कयभुयणाणंदो आणंदमहासुहं अणुभवंतो ।  
 पत्तो विच्छडे(डु)णं मंडवद्दा(दा)रं महावीरो ॥४३३८॥  
 तो कुलवुड्ढापयडिय-अणुट्टियासेसनियकुलायारो ।  
 कयमंगलोवयारो जाइ वहु(हू)संनिहाणंमि ॥४३३९॥  
 तो दिन्नपत्थियाहिय-धणविहडियपडविडप्पसंबंधं ।  
 पेच्छइ अप्पुच्चं पिव वहुयामुहपुन्निमायंदं ॥४३४०॥  
 सुपसत्थदेहसोहा नियत्थसुपसत्थवत्थरुइरंगी ।  
 सुपसत्थवराहरणा पसत्थकयमंगलसहस्सा ॥४३४१॥  
 नियजणणि-जणय-परियण-सोवासिणि-बंधुवग्गपरियरिया ।  
 दिड्ढा पहिडुवयणा चंदसिरी वीरसेणेण ॥४३४२॥  
 पुत्विं लज्जावज्जिय-परोप्पराभिमुहदंसणसुहाण ।  
 अणुकूलो च्चिअ जाओ तारामेलावओ ताण ॥४३४३॥  
 उम्मेसपसरियाणं ताणं नयणाण पम्हघणपंती ।  
 अन्नोन्नसंकमसुहा सोहइ रोमंचराई व ॥४३४४॥

तो सुपसत्थमुहुत्तावसरे 'पुत्राह' सहगंभीरं ।  
 गेण्हइ चंदसिरीए पाणिं नियपाणिणा कुमरो ॥४३४५॥  
 तो अन्नोन्नकरग्गहमग्गेण व संचरंति दूय(र)व्व ।  
 दोहिं वि आजम्मावहि एकूत्तणहिययवावारा ॥४३४६॥  
 संपूइयपूयारिह-संमाणियमाणणीयजणनिवहं ।  
 कयसयलजहाकिच्चं वित्तं पाणिग्गहं ताण ॥४३४७॥  
 तो सरहसं पुरस्सर-पुरोहियारद्धपूयसक्कारं ।  
 पूयंति समं दोन्नि वि वण्हिं कयलायपूयाइं ॥४३४८॥  
 पुण ध(ब)हलधूमकलुसियपगलंतच्छीहिं मंडलाइं पि ।  
 भमियाइं समं दोहिं वि पुरोहिउत्तेण मग्गेण ॥४३४९॥  
 दिज्जंति तत्थ समए निविडघडाघडियकरडिसंघाया ।  
 तह संचरंति(त?)चंचलतरलयरतुरंगमुग्घाया ॥४३५०॥  
 पुस्सिद-नील-मरगय-कक्केयण-वज्ज-पउमराओहा ।  
 जहजोग्गयाणुरूवं नरिंदमाईण दिज्जंति ॥४३५१॥  
 उत्तत्तकणयपुंजा उल्लूडियमेरुसिहरसंकासा ।  
 विविहाहरणसमूहा सामंताईण दिज्जंति ॥४३५२॥  
 सो नत्थि को वि तइया जो न कओ राइणा धणकयत्थो ।  
 तह कह वि तेण दिन्नं जह से मग्गंतया नत्थि ॥४३५३॥  
 तो धूयापाणिग्गहमहोच्छवे हरिसपरवसमणेण ।  
 दिसि दिसि चउक्क-चच्चर-तिएसु पुरनिग्गमपहेसु ॥४३५४॥  
 एमेव सयंगाहं काऊणं कणयपुंजए विहियं ।  
 'गेण्हउ जणो' त्ति नयरे आघोसणयं नरिंदेण ॥४३५५॥

तह रिद्धिवित्थरेणं वीवाहमहूसवो कओ तेण ।  
 विज्जाहराहिवणं जह जाओ मणचमक्कारो ॥४३५६॥  
 निव्वत्तिऊण एवं महाविभूर्इए पहरिसमहग्घं ।  
 धूयाविवाहमसमं तो कुमरं भणइ नरनाहो ॥४३५७॥  
 'इह विज्जाहरलोओ नियविज्जालद्धिसिद्धि(द्ध)सव्वत्थो ।  
 कयकिच्चो ताण कहं मारिसलोओ उवयरेइ? ॥४३५८॥  
 जइ न गुणजोगयाए गरुयाणं उवयरिज्जइ कुमार! ।  
 ता अप्पणो परस्स य गरुयत्तं पडिहयं होइ ॥४३५९॥  
 अवयारो व्व पयासइ उवयारो अणुच्चिउच्चुणा(अणुचिउव्वुणा?) विहिओ।  
 गरुएसु लहू गरुओ लहूसु असमंजसनिमित्तं' ॥४३६०॥  
 इय जाव भणइ राया ता कुमरो तस्स वयणमक्खिविउं ।  
 सललियमुदारओच्चियवयणमिणं भणिउमाढत्तो ॥४३६१॥  
 कह उवयारो(रा?)वेक्खी पावइ गरुयत्तणं महिंदो वि ? ।  
 रंको वि निरहिलासी नरिंद ! गरुओ सुमेरु व्व ॥४३६२॥  
 नेच्छंति पयइगरुया दाणुवयारं परेहिं कीरंतं ।  
 किं तु समुज्जलमाणससिणेहरसमेव वंछंति ॥४३६३॥  
 जाणं सिणेहरहिओ महोवयारो वि तिणलहू होइ ।  
 ताणं सिणेहसहिअं तिणं पि कणयद्धिगरुययरं ॥४३६४॥  
 ता जह नरिंद ! संपइ तुह हिययमिमेसु पेमपरतंतं ।  
 तह ते उदारओच्चियमन्नं सव्वं पि संपडिही' ॥४३६५॥  
 इय जा नरिंद-कुमरा वयणवियारं करंति अन्नोन्नं ।  
 भंडारिण्ण राया विन्नतो(त्तो) ता इमं वयणं ॥४३६६॥

'जं जं नरिंद ! मग्गसि दाणनिमित्तं तयं तयं सव्वं ।  
 वड्ढइ अणंतगुणियं न याणिमो केण कज्जेण? ॥४३६७॥  
 संपइ पुण सेहररायासोयनरिंदाण उच्चियकरणत्थं ।  
 भणिओ तुब्भेहिं अहं भंडारगिहं गओ जाव ॥४३६८॥  
 ता देव ! थूलनिम्मल-महग्घमणि-रयणनिविडघडियाओ ।  
 दिट्ठाओ दोन्नि नरवर ! मज्झे वररयणमालाओ ॥४३६९॥  
 दिट्ठाइं देव ! बहुसो तुहप्पसाएण विविहरयणाइं ।  
 पायं न मच्चलोइयरयणनिवेसो भवे ताण ॥४३७०॥  
 तेओ वि अउव्वो च्चिय निज्जियससि-सूरकिरि(र)णवित्थारो ।  
 अणुसिणसिसिरो ताणं घल्हाइयलोयण-सरीरो ॥४३७१॥  
 जइ देवयाणुभावा एवंविहभूसणाइं जायंति ।  
 न उण इहरा संपइ नरिंद ! तुब्भे पमाणं ति' ॥४३७२॥  
 तो भणइ महाराओ 'अच्छरियमिणं कुमार ! सव्वं पि ।  
 जह जह दिज्जइ तह तह भंडारो वद्धए अहियं ॥४३७३॥  
 एयाओ(उ) रयणमालाओ कुमार ! मह विम्हयं पयासंति ।  
 अम्हे न एत्तियाणं भायणमिह भागधेयाण' ॥४३७४॥  
 तो भणइ वीरसेणो 'मा एवं देहि देव ! आएसं ।  
 नीसेसपुन्नपरिणइपयरिसभूओ तुमं चेव ॥४३७५॥  
 ता देव ! रयणमालाओ ताओ खयरेसराण दिज्जंति ।  
 'एवं होउ' ति तओ विचित्तजसराइणा भणियं ॥४३७६॥  
 हक्कारिया सपणयं कुमारसीहासणंमि(?) उवविट्ठा ।  
 नियनियपरियणसहिआ सेहरयासोयरायाणो ॥४३७७॥



तो परियणो असेसो उभएसिं ताण पूइओ पढमं ।  
दुलहत्त-महग्घत्तण-विम्वहकरविविहवत्थूहिं ॥४३७८॥  
तह कुमरपुन्नपरिणइ-पणामियाउव्व विहवसारेण ।  
उवयरिओ खयरजणो जह तग्गुणवावडो जाओ ॥४३७९॥  
'कह भूमिगोयराणं संपज्जइ रिद्धिवित्थरो एवं ?  
जो सुरलोयदुलंभो दूरे उण खयरलोयाण ॥४३८०॥  
ता एस वीरसेणो न होइ सामन्नमाणुसो को वि ।  
जो रिद्धिवित्थरेण(णं) तणं व तियसाहिवं गणइ' ॥४३८१॥  
इय विज्जाहरलोओ दुल्लहबहुवत्थुलाहविम्वइओ ।  
चिंतइ कयकुमरोचियपडिवत्तिपवडिढयाणंदो ॥४३८२॥  
तयणंतरं असोओ सेहरराया य कुमर-राएहिं ।  
पयडियपेम्मभरेहिं जहक्कुम्मं(मं) पूइया दो वि ॥४३८३॥  
तो चिंतियमेत्ताओ केण वि अप्फंसियाओ एंतीओ ।  
सव्वेहिं वि दिट्ठाओ ताओ समं रयणमालाओ ॥४३८४॥  
अप्पडिहयप्पयावं पयइथिरं वीरसेणमिच्छंती ।  
इय अथिरसूरविमुहा एइ व्व सहस्सकिरणाली ॥४३८५॥  
संपुन्नकलाकलियं अकलंकमदोसममयनिम्मायं ।  
दट्ठं कुमारचंदं चंददाराओ एंति व्व ॥४३८६॥  
अहिणवकयपाणिग्गह-कुमारआसीसदाणबुद्धीए ।  
अवयरइ नहयलाओ मन्ने सत्तरिसिमाल व्व ॥४३८७॥  
मन्ने अमाणुसोच्चिय-निम्मलगुणघडियपुन्नपंतीओ ।  
अणवच्छिन्नाओ समं कुमारमणुसंघडंति व्व ॥४३८८॥

इय कुमारसमाएसा सयमेव असोय-सेहराभिमुहं ।  
 गंतूण ताओ ताणं सहसा कंठे निबद्धाओ ॥४३८९॥  
 अद्धिढमणणुह्यं असु(स्सु)यमाहरणरयणमिक्खेउं ।  
 सेहरयासोयाणं जाओ चित्ते चमक्कारो ॥४३९०॥  
 चिंतंति दो वि 'पेच्छह अच्छरियमिमस्स वीरसेणस्स ।  
 एयस्स पुरो अम्हे रोरव्व सिरीए संजाया ॥४३९१॥  
 जो जो परिभाविज्जइ सामन्नो वि हु गुणो कुमारस्स ।  
 सो सो अणन्नसरिसो न कस्स आणंदए हिययं ? ॥४३९२॥  
 अम्हे न केवलं चिय नीया सपरि(र)क्कुमेण दासत्तं ।  
 एएण संपयं पुण अणंतविहवेण किणियव्व' ॥४३९३॥  
 तो भणियमसोएणं 'सुदिढं गुणबंधणेण बद्धाण ।  
 किं एस पुणो संपइ कुमार ! पडिबंधणारंभो ? ॥४३९४॥  
 अहवा न देव ! बंधणमेयं अम्हाण किंतु अउरुव्वो ।  
 भुयणब्भहियविभूसणपयाणसरिसो च्विय पसाओ' ॥४३९५॥  
 तो भणइ वीरसेणो 'चिरप्पवासेण खेइया बहुयं ।  
 ता जाह नियावासं पुणो वि मं संभरेज्जाह' ॥४३९६॥  
 तो ते भणंति दोन्नि वि 'पमाणमाएस एव भिच्चाण ।  
 वच्चामो देहेणं हिययं पुण तुम्ह चरणंते' ॥४३९७॥  
 तं चिय रयणविमाणं दाउं कुमारस्स खेयरसहस्सं ।  
 मोत्तूण सन्निहाणे रक्खट्ठं कुमरदेहस्स ॥४३९८॥  
 तो ते खयरनरिंदा विसज्जिया रायवीरसेणेण ।  
 पणमियचंदसिरीया सपरियणा गयणमुप्पइया ॥४३९९॥

एत्थंतरंमि सूरु कुमरस्स पयावमसहमाणो व्व ।  
 बहुमच्छरेण निवडइ अत्थइरिसिराओ जलहिंमि ॥४४००॥  
 मुणिऊण तं तहाविह-मसमं कुमरेक्ककरपरिफु(प्फु)रणं ।  
 लज्जाए रवी मन्ने संकोइय (संकोयइ) करसहस्सं पि ॥४४०१॥  
 पसरइ वारुणपुरघण-विलासिणीविविहभूसणमणीण ।  
 पच्छिमदिसाए संझामिसेण सोणंसुवित्थारो ॥४४०२॥  
 वित्थरइ सव्वओ च्चिय कत्थूरीबहलसलिलपूरो व्व ।  
 डज्झंतागुरुघणधूवधूमपडलो व्व तिमिरोहो ॥४४०३॥  
 अइदूरयरे पढमं पच्छा दरदूरसंडियपयत्थे ।  
 अंतरइ तिमिरनिवहो कमेण नियडे सुनियडो वि ॥४४०४॥  
 वुढि(ड्ढ)गएण दूरं कज्जलकसिणेण भयसरूवेण ।  
 गिलियं न दीसइ च्चिय भुयणं तमरक्खसेणं व्व ॥४४०५॥  
 अपयडपयत्थसारं अणग्घपरनाणमसरिससरूवं ।  
 भुयणं निहयालोयं मज्जइ मोहे व्व तिमिरंमि ॥४४०६॥  
 इय जाए कसिणभावं अंबरमिह कज्जलेण व तमेण ।  
 पक्खालंतो उइओ जोण्हादुद्धेण हरिणंको ॥४४०७॥  
 अक्कंतसयलभुयणं कयावयारं जणस्स तिमिरारिं ।  
 रोसारुणा हणंता पसरंति व ससहरमयूहा ॥४४०८॥  
 उदयदिदुमवणारुण-पल्लवसंकंतअरुणिमेहं व्व ।  
 नवकुंकुमरसरत्तं व होइ भुयणं ससिकरेहिं ॥४४०९॥  
 अजरढजोण्हापढमं पयडइ पासायधवलसिहराइं ।  
 कमलद्धजरढभावा स च्चिय भुयणं निरवसेसं ॥४४१०॥

१. अस्तगिरेः ॥

उदयइरिसिरगाओ लुढिएण व चंदखीरकलसेण ।  
 रेल्लिज्जइ भुयणयलं जोण्हादुद्धेण नीसेसं ॥४४११॥  
 अच्चुन्नयाण उवरिं ठविऊण पयं कमेण नीएसु ।  
 पसरंति ससिमऊहा जोहा इव वीरसेणस्स ॥४४१२॥  
 करकुंचएण धवत्तइ निउणयरं सिप्पिओ व्व हरिणंको ।  
 जोण्हासुहारसेण व नीसेसं भुयणपासायं ॥४४१३॥  
 एवंविहे पओसे ससहरजोण्हाहिणंदियजयंमि ।  
 उद्धामकामिणीयणपवियंभियमयणकल्लोले ॥४४१४॥  
 सैयरंधि-पुरंधीणं विलासगेहेसु जत्थ वित्थरइ ।  
 कत्थूरीपरिवत्तणचलकंकणज्झ(झ)णज्झ(झ)णासद्धो ॥४४१५॥  
 पसरंति पणयपकुविय-दइयापरिओसगहियसंदेसा ।  
 पुणरुत्तपियब्भत्थणउवरुद्धा ३द्वीसंघाया ॥४४१६॥  
 दीसइ फुल्लप्पयरो पडिवासगिहेसु कुसुमबाणेण ।  
 मिहुणाण रइसमागमरणे व्व मुक्को सरसमूहो ॥४४१७॥  
 मयघुम्मिरच्छिजुयला उद्धीवियकामिमयणरसभावा ।  
 निज्जंति रइगिहेसु सहीहिं पारावउग्घाया ॥४४१८॥  
 कयनिम्मलप्पईवा पउणीकयरइसुहोवगरणा य ।  
 ससहिपियालंकरिया संजाया रइगिहपएसा ॥४४१९॥  
 एवंविहे पओसे निव्वत्तियसयलसंझकरणीओ ।  
 आगच्छइ वासहरं दइयासमहिड्डियं कुमरो ॥४४२०॥  
 परियणकहियागमणो अब्भुड्डियपिययमाकउक्कंठो ।  
 परिमियजणपरिवारो विसइ कुमारो रइगिहंमि ॥४४२१॥

१. उदयगिरि ॥ २. सैरन्धी-पुरन्धीणाम् ॥ ३. द्वीतीसंघाताः ।

मणहरमहरिहसेज्जा-पल्लुके सहरिसं च उवविसइ ।  
 सेज्जामूलासंदियमहिद्विया चंदसिरिदेवी ॥४४२२॥  
 कयविविहमंगलसओ सुविण्डालाववद्वियाणंदो ।  
 अइसरसगीय-वाइय-पेच्छणयविणोयकयचित्तो ॥४४२३॥  
 तो बहुरयणिवसेणं विन्नत्तो परियणेण 'नरनाह ! ।  
 वच्चउ देहाएसं परिगंहो नियनियावासं ॥४४२४॥  
 तो अणुकंपापसरिय-उवरोहभरेण कयबहुपसाओ ।  
 उचियक्कमेण सयलं विसज्जए परियणं कुमरो ॥४४२५॥  
 जे मुणियपहुसहावा कामं विन्नायदेस-काला य ।  
 कज्जाकज्जविहन्नू ते दुलहा सेवया होंति ॥४४२६॥  
 तो वीरसेणकुमरो जहासुहं ठाइ महरिहुत्थरणे ।  
 बहु सज्जस-लज्जाभरपरव्वसाए सह पियाए ॥४४२७॥  
 विवरंमुहं पसुत्तं अदिन्नपडिउत्तरं च आलवियं ।  
 अणुरत्तबालियाणं हरंति हिययं छइल्लाणं ॥४४२८॥  
 जं नेहनिब्भराउ वि पियंमि पडिकूलिमं पयासंति ।  
 बालाओ तेण अहियं रंजंति मणं वियद्वान ॥४४२९॥  
 ते सहियणोवएसा ते च्विय नियहिययकप्पियवियप्पा ।  
 बालाण पिए दिट्ठे सव्वे वि निरत्थया होंति ॥४४३०॥  
 सप्पणयं साणुणयं सदक्खिणं साणुकूलमचितेण(कूलचित्तेण)।  
 अणुयत्तिया तहा सा पगब्भभावं जहा पत्ता ॥४४३१॥  
 जं सलहिज्जइ लोए तियसाण वि दुल्लहं च जं होइ ।  
 तं ता(ता)णन्नोर्धणाणुरायविवसाण संपत्तं ॥४४३२॥

सुरयपरिस्समघणसेय-बिंदुदंतुरियभालवट्ठाण ।  
अन्नोन्नसमालिंणसुहरससंपत्तनिद्वाण ॥४४३३॥  
सा सुहमय व्व रयणी अणुरायमय व्व अमयघडिय व्व ।  
अन्नोन्नमतित्ताणं ताण खणद्धं व वोलीणा ॥४४३४॥  
चउदियहजामपियविष्पि(प्प)ओयपडहो व्व निट्ठुरो निसुओ ।  
'कुक्कु कुक्कु' त्ति कक्कसकुक्कुडसदो मिहुणएहिं ॥४४३५॥  
विवरीओ संसारो होइ अनिद्धा निसा रहंगाण ।  
इद्धो दियहो ते चिय विवरीया हुंति मिहुणाण ॥४४३६॥  
पविसंति सवणविवरे रयणिविरामप्पयासया ताण ।  
पाहाऊयमंगलथोत्तपाढया मागहसमूहा(?) ॥४४३७॥  
'ज्झि(झि)ज्जइ कुमार ! रयणी ससहरसंभोयमणुसरंति व्व ।  
अंबरनिगूढपयडियनक्खत्तनहव्वणा एसा ॥४४३८॥  
एसो अत्थमइ ससी मणे व्हंतो व्व लंछणमिसेण ।  
मयणाहिसामलंगिं निरंतरं रयणिवरतरुणिं ॥४४३९॥  
रविरहरहंगनिहसण-पवणुद्धुयहेममहिहररण ।  
परिपिंजर व्व रेहइ पुव्वदिसा पेच्छ नरनाह! ॥४४४०॥  
संपत्तसूरसंगा पडिहयतेयंसिमंडला देव !  
वियसावियवरकमला पुव्वदिसा सहइ देवि व्व ॥४४४१॥  
नरनाह ! उइयमेत्तो तुमं व भुवणं करेइ पयडत्थं ।  
एस रवी खित्तकरो अणवरयं कमलकोसेसु ॥४४४२॥  
देसंतरं गएणं समं च जं पवसियं हयालयं ।  
पच्चागए तुमंमि व रविंमि पच्चागयं भुयणं' ॥४४४३॥

इय चाटुचउरचारणगणेहिं पडिबोहिओ महावीरो ।  
 पणमियगुरु-देवपओ पल्लंकें मुयइ गयनिहो ॥४४४४॥  
 कयसयलगोसकिच्चो समन्निओ बंधुयत्तमाईहिं ।  
 वच्चइ नरिंदपासं पुणो वि नियमंदिरं एइ ॥४४४५॥  
 एवं च ताण पइदिण-पवड्डमाण्णुरायरसियाण ।  
 विसयसुहासत्ताणं वच्चंति जहासुहं दियहा ॥४४४६॥  
 अन्नंमि दिणे राया पन्नायरमाइतुच्छपरिवारो ।  
 विजयवई(इ)सन्निहाणं वच्चइ उवविसइ य पहिड्डो ॥४४४७॥  
 जा जोयइ ता पेच्छइ चंदसिरिं तत्थ चेव संपत्तं ।  
 जणणिसयासे सविणयकयप्पणामं च पुच्छइ व्व ॥४४४८॥  
 'किं पुत्त ! तुज्झ भत्ता न दीसए ? अज्ज पंचमो दियहो ।  
 अपडुसरीरो अहवा कज्जंतरवावडो जाओ ?' ॥४४४९॥  
 भणियं चंदसिरीए 'आरोग्गो ताय ! तुह पसाएण ।  
 किं तु न जाणे कत्थ वि गओ पिओ पंचमो दियहो' ॥४४५०॥  
 तो भणइ महाराओ 'कहमेयं जं तुमं न जाणासि ?' ।  
 सा भणइ 'सच्चमेयं न ताय ! जाणामि तच्चरियं' ॥४४५१॥  
 राया भणइ 'न इड्डा तस्स तुमं तेण न कहइ तुहेसो ।  
 वल्लह-दइयाण जओ जीयंपि परव्वसं होइ' ॥४४५२॥  
 तो लज्जाए अहोमुहमवलोयइ कोड्डिमं करनहेहिं ।  
 विलिहंती चंदसिरी मोणेण ठिया खणं एक्कं ॥४४५३॥  
 तो भणइ महामंती 'न देव ! एवं जओ महापुरिसा ।  
 होंति न जुवईण वसे जिगीसिणो पुण विसेसेण ॥४४५४॥

तं होइ किं पि कज्जं जं न कहिज्जइ गुरूण मित्ताण ।  
 तरलहिययाण दूरे भोगेक्कुफलाण जुवइ(ई)ण ॥४४५५॥  
 भणियं विजयवईए 'नरिंद ! एएण कारणेणेसा ।  
 एत्थागया सखेया भत्तारसरूवकहणत्थं' ॥४४५६॥  
 तो भणइ महाराओ 'पुत्त ! तुमं एत्तियं पि न मुणेसि ।  
 केत्तियवेलाए गओ ? गच्छंतेणावि किं भणियं ? ॥४४५७॥  
 तो चंदसिरी जंपइ 'ताय ! पसुत्ता [अ]हं परिच्चत्ता ।  
 जा चेयामि ससंका ता भत्तारं न पेच्छामि ॥४४५८॥  
 एत्थंतरंमि निम्मल-मणिप्पईवप(प्प)हाकओज्जोयं ।  
 पेच्छामि केयइदलं कत्थूरीलिहियवरगाहं' ॥४४५९॥  
 एत्थंतरंमि पत्तं चंदसिरी अप्पए नरिंदस्स ।  
 राया वि ससंकमणो वायइ ललियक्खरं गाहं ॥४४६०॥  
 "अइगुरुकज्जेण गओ मा मणखेयं कुणंतु गुरुमाई ।  
 दसरत्ते कयकज्जो अप्पाणं तुम्ह पयडिस्सं" ॥४४६१॥  
 मुणिऊण महाराओ गाहत्थं सत्थमाणसो जाओ ।  
 संधीरई(इ) चंदसिरिं सावडुंभेहिं वयणेहिं ॥४४६२॥  
 एवं जाव नरिंदो चंदसिरिं संठवेइ सम्पणयं ।  
 ता तत्थ नहयलाओ समागओ खेयरो एक्को ॥४४६३॥  
 आगंतूण य तेणं नमिऊणं नरवइं च चंदसिरिं ।  
 विहियासणसंभासणपडिवत्ती भणिउमाढत्तो ॥४४६४॥  
 'चंपाणयरीओ अहं पड्ढविओ वीरसेणराएण ।  
 मा होउ तुम्ह हियए अवसेरी इय वियप्पेण ॥४४६५॥



चंपाए गमणहेऊ एसो किर तस्स रायरायस्स ।  
 साहिज्जंतो निसुणह समासओ तस्स वयणेण ॥४४६६॥  
 नरनाह ! सयलवसुहा-वसुहाहिवचेट्टियाण मुण्णत्थं ।  
 सव्वदिसासु वि पेसइ इह ट्टिओ खयरसंघाए ॥४४६७॥  
 तो पइदिणं नरेसर ! जं विच्चइ किं पि एत्थ भुयणांमि ।  
 तं वीरस्स असेसं खयरा आगच्च साहंति ॥४४६८॥  
 एवं सो अणुदियहं इह ट्टिओ नियइ सव्वरायाणं ।  
 सिरिवीरसेणराया ववहरणं चारचक्खुहिं ॥४४६९॥  
 अन्नंमि दिणे अहयं आइट्ठो वीरसेणराएण ।  
 'रे वज्जवाहु ! गच्छसु अंगादेसं तुमं अज्ज ॥४४७०॥  
 चंपापुरीए राया नरसीहो नाम अतुलमाहप्पो ।  
 अइगरुअं सत्तुत्तं सो पयडइ किर मए सद्धिं ॥४४७१॥  
 नियविक्रमकयगव्वो अन्नेसिं विक्रमं पि न सहेइ ।  
 सम्मं परिकिखऊणं तस्स सरूवं मह कहेसु' ॥४४७२॥  
 इय संपत्ताएसो विणिग्गओ पणमिऊण रायाणं ।  
 पत्तो नहेण तुरियं चंपानयरिं महाराय ! ॥४४७३॥  
 तो तत्थ परमदेवं पढमं अभिवंदिऊण वसुपुज्जं ।  
 निद्धयपावपंको पच्छ चंपं पविट्ठो हं ॥४४७४॥  
 तो देव ! नयणमोहणि-विज्जासामत्थओ अदीसंतो ।  
 नरसीहरायभवणं मणोहरं पुण पविट्ठो म्हि ॥४४७५॥  
 सो नरसीहो समरंगणंमि सीहो व्व दुज्जओ देव ! ।  
 एगायवत्तवसुहो विक्रमदप्पुद्धुरो वीरो ॥४४७६॥

तस्स न देवा वि रणंगणंमि पहवंति किं पुण मणुस्सा ? ।  
 तुम्हाण वि पच्चक्खो पायं संभवइ सो देव !” ॥४४७७॥  
 तो भणइ महाराओ ‘एवमिणं न अन्नहा जओ सुणसु ।  
 एत्थ ठिया तस्सम्हे पइवरिसं पेसिमो कप्पं ॥४४७८॥  
 ता कहसु खयर ! पुरओ नरसीहं को न जाणए एत्थ ? ।  
 दप्पज्जरो पणासइ रिऊण जन्नाममंतेण’ ॥४४७९॥  
 तो भणइ पुणो खयरो ‘कमेण कच्छंतरेसु नरसीहं ।  
 अणुमग्गतो पत्तो सेज्जाहरगब्भगेहंमि ॥४४८०॥  
 जा जामि तत्थ पुरओ ता नरसीहं समं सभज्जाए ।  
 विमलमइमंतिणा वि य मंतंतं किं पि पेच्छामि ॥४४८१॥  
 तो देव ! ससंको हं ‘किमेस मंतेइ ?’ इय वियप्पेण ।  
 ताण समीवपएसं गओ म्हि पहुकज्जकयचित्तो ॥४४८२॥  
 अह नरसीहो जंपइ ‘आयन्नह दो वि एगचित्ताइं ।  
 विमलमइ-कणयरेहे मह वयणं नीइसंबं(ब)द्धं ॥४४८३॥  
 इह देवि ! तुमं जइया अवहरिया कमलकेउणा पुत्विं ।  
 तइया मएऽणुहूयं तुह विरहे दारुणं दुक्खं ॥४४८४॥  
 ‘हा देवि ! कणयरेहे ! हा पाणपी(पि)ए ! असेसगुणखाणि !  
 इय बहुविहं रुयंतो विलवेमि विओयसंतत्तो ॥४४८५॥  
 विमलमइमंतिणा हं तो तंमि दिणे पुरीए बाहिंमि ।  
 मणविकखेवनिमित्तं वसुपुज्जजिणालयं नीओ ॥४४८६॥  
 तो नीसेसभवंतर-समज्जियाणंतदुक्खनिद्वलणं ।  
 दट्ठूण वासुपुज्जं मह जाओ हिययपरिओसो ॥४४८७॥

तो सभूयसमुज्जल-जिणगुणपरमत्थभावणासत्तो ।  
 अभिवंदिऊण देवं विणिग्गओ भवणबाहिंमि ॥४४८८॥  
 दिट्ठो विसालसीलोत्ति नाम निरवज्जभूपएसंमि ।  
 वसुपुज्जवंदणत्थं समागओ चारणमुणिंदो ॥४४८९॥  
 तो परमब्भ(भ)त्तिजुत्तो वंदामि मुणिंदपायपंकरुहं ।  
 संपत्तधम्मलाहो उवविट्ठो तस्स पासंमि ॥४४९०॥  
 तो तेण मुणिवरेणं गंभीरसरेण मज्झ परिकहियं ।  
 संसारंतगयाणं असारयं सव्ववत्थूण ॥४४९१॥  
 तत्थावसरे सुंदरि ! चित्तंमि खुडुक्किया तुमं मज्झ ।  
 तो सविणयं मुणिंदो पुट्ठो तुह वइयरमसेसं ॥४४९२॥  
 तेणावि मज्झ कहियं 'पावमई जुवइलंपडो खुट्ठो ।  
 इह अत्थि कमलकेऊ नामेणं खेयरो एगो ॥४४९३॥  
 अवहरिया सा तेणं तुह जाया मयणमोहियमणेण ।  
 नीया य विसमकूडं सेलं कुलसीलसंपन्ना ॥४४९४॥  
 मोत्तूण तेण गिरिवर-गहिरगुहामज्झसंठिया भणिया ।  
 'इच्छसु ममं किसोयरि ! हरिया सि मए अ(ऽ)णुरत्तेण' ॥४४९५॥  
 तो तीए तक्खणुप्पन्नबुद्धिविहवाए खेयरो भणिओ ।  
 'अज्जेव अहं जाया पुप्फवई किं करेमि?त्ति ॥४४९६॥  
 अभणंतो च्चिय सुंदर ! हरेसि हिययाइं इयरनारीण ।  
 पत्थंतो उण मन्ने अरुंधइं तं पि खोहेसि' ॥४४९७॥  
 तो तव्वयणायन्नणहरिसवसुव्वूढहिययउक्कुरिसो ।  
 'इच्छइ ममं'ति एसो मणंमि संजायपच्चासो ॥४४९८॥

तो अज्ज पओसे च्चिय आणेही सो अखंडियचरित्तं ।  
 पेच्छिह(हि)सि सच्चभदे पासाए तं नियकलत्तं' ॥४४९९॥  
 तो भणइ मुणिं राया 'जइ एवं ता पुणो वि सो एही ।  
 ता नत्थि किंपि कुसलं मुणिद ! मह हिययदइयाए' ॥४५००॥  
 तो भणइ मुणिवरिंदो 'मा भाहि नरिंद ! कामरूवंमि ।  
 अत्थवइ-पियासत्तो सो खयरो जणयठाणंमि ॥४५०१॥  
 तत्थत्थि वीरसेणो नामेणं विमलवंससंभूओ ।  
 जो सयलसुहडचूडामणि त्ति भुयणंमि विक्खाओ ॥४५०२॥  
 गयणंगणंमि तेणं विजु(ज्जु)क्खित्तेण दूरमुड्डेउं ।  
 मारिज्जिही रसंतो नरसीह ! न एत्थ संदेहो' ॥४५०३॥  
 तो मुणिविहियपसंसासवणसमुप्पन्नतप्पओसेण ।  
 भणियं मए 'न एयं मुणिद ! निसुणंति मह सवणा ॥४५०४॥  
 नीसेससुहडचूडामणि त्ति अहमेव एत्थ विक्खाओ ।  
 दिट्ठो सुओ व्व न रणे जो मह सवड(डं)मुहो होइ ॥४५०५॥  
 जइ कह वि देवजोया सो समरे मारिही कमलकेउं ।  
 ता एत्तियमेत्तेण वि माह्वप्यं तस्स आरूढं ॥४५०६॥  
 जइ एवंविहविक्रम-विसेससंपत्तनिम्मलजसोहो ।  
 ता किं न तेण तइया निहओ हं वैरिओ गरुओ ?' ॥४५०७॥  
 तो मुणिवरेण भणियं 'होसु थिरो केत्तिएहिं वि दिणेहिं ।  
 जेरुण तुमं नरवर ! स एव वसुहाहिवो होही' ॥४५०८॥  
 सोरुण साहुवयणं असद्वहंतो परक्कमं तस्स ।  
 नमिरुण जिण-मुणिंदे समागओ हं नियं पेहं ॥४५०९॥

दट्टूण तुमं सुंदरि ! पओससमये सपच्चयं वयणं ।  
 मुणिणो मुणिऊण मए मणंमि परिभावियं एयं ॥४५१०॥  
 दइयाए दंसणेणं विसालसीलस्स सच्चयं वयणं ।  
 जइ वीरसेणविसए वि तारिसं ता अहं नद्धो ॥४५११॥  
 अहवा जं जह होही तइय च्विय तं तहा करिस्सामि ।  
 किमहं भविस्सकज्जे अलियं ज्झूरेमि अप्पाणं ? ॥४५१२॥  
 तो हं मुणिवयणाओ नाऊण तुमं व सीलगुणकलियं ।  
 अहियाणुरायरसिओ भोए भुंजामि सह तुमए ॥४५१३॥  
 दइयासुरयपसत्तो सुगीयज्झं(झं)कारमुहलियदियंतो ।  
 विविहविणोयक्खित्तो गयं पि कालं न याणेमि ॥४५१४॥  
 अह अन्नदिणे रयणीए कणयरेहाए सुरयपरिसुद्धि(हि?)ओ ।  
 अइमंदमारुयसुहं उवरिमभूमिं समारूढो ॥४५१५॥  
 तत्था हं नियदइया-कवोलतलसेयबिंदुसंदोहं ।  
 कोमलवत्थेण सयं फुसमाणो जाव चिद्धामि ॥४५१६॥  
 ता सहसा गयणाओ असमंजसल्हसियकेस-वसणाओ ।  
 पगलंतभूसणाओ मुच्छवसमीलियच्छीओ ॥४५१७॥  
 पडियाउ 'दड'त्ति समं नहाओ(उ) विज्जाहरीओ(उ) मह पुरओ ।  
 निष्फंदावयववसा अट्ट वि ताओ मुयाओ व्व ॥४५१८॥  
 अणुमग्गेणं ताण वि समागओ परियणो वि रुयमाणो ।  
 सीयलकिरियाहिं तओ पुणरवि सत्थाओ(उ) जायाओ ॥४५१९॥  
 तो निट्टुरकरताडणवच्छत्थलतुट्टमाणहाराओ ।  
 सिरताडणसंतोडियसिणिद्धघणकेसपासाओ ॥४५२०॥

रोयंति सकज्जलअंसु-सलिलसामलियवयणकमलाओ ।  
 नाणापयारपलवियनिट्ठुरजणजणियकरुणाओ ॥४५२१॥  
 'हा नाह ! हिययवल्लह ! हा हा हा पवणकेउखयरिंद ! ।  
 हा वीर ! गुरुपरक्कम ! हओ सि कह वीरसेणेण ? ॥४५२२॥  
 हा हा ! हयाओ अम्हे निहयाओ अपुन्नघडियदेहाओ ।  
 निहओ त्ति सुए फुट्टइ न जाण सयसक्करं हिययं ॥४५२३॥  
 कह एयं पि न नायं जो गयणे हणइ कमलकेउं पि ? ।  
 हा सो वि वीरसेणो जमो व्व किं रोसिओ तुमए ? ॥४५२४॥  
 तह नाह ! जलहितीरे गुरुसेलसिहासहस्स निहओ जो ।  
 न मओ किमेत्तिणं न बुज्झसे जं रिऊ विसमो ? ॥४५२५॥  
 कह सो आरोडिज्जइ रणंगणे गुरुपरक्कमो सत्तू ।  
 अणुकूलं चिय जायं जस्स महाजलहिपक्खवणं ? ॥४५२६॥  
 वेयद्धोभयसेदीसु जेण रुट्ठेण होइ जयपलओ ।  
 तं पि असोयं जेउं चंदसिरी जेण आणीया ॥४५२७॥  
 एक्कुंणेण वि जेणं भडकोडिसहस्ससंगया तुब्भे ।  
 दप्पुद्धरे वि तणमिव परितुलिया सेहरसमेया ॥४५२८॥  
 एक्केक्केण वि चरिएण जस्सच्चब्भुयप्पहावेण ।  
 सामन्नो वि हु बुज्झइ कह न तुमं जो असामन्नो ? ॥४५२९॥  
 अहवा को तुह दोसो ? दोसो अम्हाण एस सव्वो वि ।  
 जं जुयइलक्खणेणं सुहासुहं होइ पुरिसस्स' ॥४५३०॥  
 इय एवमाइबहुविह-पलावसयजायघग्घरसराओ ।  
 कह कह वि परियणेणं मए वि संबोहियाओ त्ति ॥४५३१॥

तो ताओ तक्खणे च्चिय नियपरियणसंजुयाओ गयणयले ।  
 रुयमाणीओ सकरुणं उप्पई(इ)य गयाओ(उ) रणभूमिं ॥४५३२॥  
 तो ताण मज्झवत्ती पुट्ठो एगो नरो मए सव्वं ।  
 'एयाओ काओ? कह वा पडियाओ इहं? कुओ वा वि?' ॥४५३३॥  
 तो तेण मज्झ कहियं 'भज्जाओ इमाओ पवणकेउस्स ।  
 सो वेयढे(ढे) मोत्तुं इमाओ जलहिं गओ सययं ॥४५३४॥  
 सेहरयचुल्लभाउय-नियबलसंमद्दसंजुया दो वि ।  
 संगाममहिलसंता सद्धिं किर वीरसेणेण ॥४५३५॥  
 पवणो भाउयवइरं अणुस्सरंतो तहाय सेहरओ ।  
 चंदसिरीउद्दालणकज्जेण दुवे गया एवं ॥४५३६॥  
 जह चंदसिरी लद्धा जलहितले वीरसेणकुमरेण ।  
 पवणेण तं तह च्चिय विज्जास(सा)मत्थओ नायं ॥४५३७॥  
 एवं न कोइ ताणं कहइ सरूवं गयाणमइदूरं ।  
 तो अवसेरिवसेणं एयाओ तहिं पि चलियाओ ॥४५३८॥  
 एत्थागयाण एण्ह निय(यु)त्तविज्जाहरेहिं परिकहियं ।  
 जह पवणकेउराया वियारिओ वीरसेणेण ॥४५३९॥  
 तो निसुयमित्तमुच्छसंछन्नअसेसइंदिय-मणाओ ।  
 पडियाओ एत्थ नरवर ! इय कहियं तुज्झ संक्खित्तं ॥४५४०॥  
 कहिऊण इमं खयरो तिरोहिओ तक्खणेण गयणयले ।  
 अम्हे वि समं दोन्नि वि सेज्जाहरयं पविट्ठाइं ॥४५४१॥  
 एत्थंतरंमि सूरे समुग्गए विहियगोसकरणीओ ।  
 अथा(त्था)णे उवविट्ठो निसिवइयरमणुसरंतो हं ॥४५४२॥

तत्थ ठिओ खणमेत्तं वसुहाहिवसिरकिरीडकोणेहिं ।  
 सेवापणामसमए मसिणीकयपायवीढो हं ॥४५४३॥  
 अत्थाणमंडवाओ तह संठियसयलजणसमूहाओ ।  
 घेत्तुं मंतिं हत्थे सेज्जाहरयं पविट्ठो म्हि ॥४५४४॥  
 तो एसा इह देवी एस तुमं मंतिमंडलपहाणो ।  
 मह कहह एत्थ काले किं जुत्तं होइ करणीयं ? ॥४५४५॥  
 ता जाव सो न सत्तू मह उवरिं एइ ता अहं तस्स ।  
 दप्पुद्धुरस्स सीसे खग्गं भंजाभि गंतूण ॥४५४६॥  
 सो मह तहा न सत्तू होइ जहा निच्छियं विचित्तजसो ।  
 जो मह भिच्चो होउं एवविहदुन्नए कुणइ ॥४५४७॥  
 सत्तुमि वि मित्तत्तं मित्ते सत्तुत्तणं च जो कुणइ ।  
 सो निच्छयएण(निच्छएण)नाओ पच्छन्नरिऊ निहंतव्वो ॥४५४८॥  
 ता एस मज्झ मंतो संपइ तुब्भे वि भणह हिययगयं' ।  
 इय भणिए नरवइणा विमलव(भ)ई भणिउमाढत्तो ॥४५४९॥  
 'तुह देव ! पयावानल-पलीवियाणंतमहिहरुग्घाया ।  
 दीसंति तणमसीहिं व सामलिया नियअकित्तीहिं ॥४५५०॥  
 केसिं न नरिंद ! तए अहिमाणधणाण ठाविओ उवरिं ।  
 सत्तूण पणामावसरेसु सिरेसु नियचरणो ॥४५५१॥  
 तो देव ! तुह परक्कम-पयावसरिसो असेसभुयणे वि ।  
 जइ वि न सत्तू तह वि हु सुबुद्धिजुत्तेहिं होयव्वं ॥४५५२॥  
 आवइसमुद्दपडिओ उत्तरइ नरो सुबुद्धिनावाए ।  
 बुद्धिविहीणस्स पुणो गोपयमवि सायरो होइ ॥४५५३॥



तो देव ! वीरसेणो परक्कमी बुद्धि-दैवसंपन्नो ।  
वेयहोभयसेढीखयरिंदसहायसंजुत्तो ॥४५५४॥  
वस्सिंदिओ अवसणी सुयणो चाई कयन्नुओ वीरो ।  
एमाइगुणसमेओ विग्गहणिज्जो न सो सत्तू ॥४५५५॥  
समविक्कम-सेन्नसहायसंजुए होइ विग्गहो जुत्तो ।  
अहिए रिउंमि नरवर ! संधाणमवस्स कायव्वं' ॥४५५६॥  
सोऊण मंतिवयणं नरसीहो रोसतंबिरनिडालो ।  
साहिकखेवं वयणं विमलमइं भणिउमाढत्तो ॥४५५७॥  
'नियजाइपच्चएणं पायं बुद्धीओ होंति पुरिसस्स ।  
अहमुत्तिम-मज्झाणं तव्विहहिययाणुसारेण ॥४५५८॥  
जे तंमि वीरसेणे नियमइपरिकप्पिया गुणा तुमए ।  
मह असिकसवट्ठो च्चिय ताण परिक्वं रणे काही ॥४५५९॥  
विमलमइ ! तुह मईए अम्हे सरिसा वि तेण न भवामो ।  
अम्हाण वि अहियगुणो वियप्पिओ सो तए-सत्तू ॥४५६०॥  
तेणेव कारणेणं तेण समं समहियप्पहावेण ।  
सव्वारंभेण मए कायव्वो विग्गहो अवस्सं(विग्गहोऽवस्सं) ॥४५६१॥  
लज्जावहो जओ वि हु हीणे सरिसे व्व होइ सत्तुमि ।  
च्छज्जइ पराजयो विहु भुवणब्भहियंमि पुण तंमि' ॥४५६२॥  
इय भणिऊणं राया समुट्ठिओ रोसवसफुरंतोड्ढो ।  
अत्थाणे ठाऊणं आइसइ असेससामंते ॥४५६३॥  
'रे सामंता ! तुरियं पउणा होऊण अज्ज पुरिबाहिं ।  
नियगुडुराईं घेल्लह न विलंबो एत्थ कायव्वो ॥४५६४॥

रे रे ! अमच्च ! तुरियं मह सेन्नं तुरय-करि-रहाई य ।  
 जं संगामसमत्थं संजत्तसु तं खणद्धेण ॥४५६५॥  
 गंतूण वि जो पुरओ दइयं गेहं सुयं च संभरिही ।  
 सो एत्थेव विलंबउ जो सुहडो सो समं जाओ(उ) ॥४५६६॥  
 वेगेण दक्खिणावह-विसए नासिक्कसंमुहं चलह ।  
 सविचित्तजसं समरे निहणित्थं वीरसेणरिउं ॥४५६७॥  
 तो आएसाणंतर-मणंतजणहिययखोहणो सहसा ।  
 पत्थाणाहयभेरवभेरिरवो अह समुच्छलिओ ॥४५६८॥  
 नीहरइ तुरय-रह-करि-पाइक्कुकंतसयलपुरिमग्गं ।  
 सेन्नं सन्नाहुब्भडबहुसुभडसहस्ससंकित्रं ॥४५६९॥  
 मंडलिया रायाणो सामंता मंतिणो अमच्चा य ।  
 नरवइलद्धाएसा तुरियं नयरीओ नीणंति ॥४५७०॥  
 एत्थंतरंमि अहयं नरसीहनरिंदगमणपारंभं ।  
 नाऊण खणद्धेणं संपत्तो एत्थ नरनाह ! ॥४५७१॥  
 आगंतूण य सब्बं जं जह दिट्ठं सुयं च तं सब्बं ।  
 एगंते नीसेसं परिकहियं वीरसेणस्स ॥४५७२॥  
 परिभाविऊण हियए भणिओ हं राइणा 'अरे ! सुणसु ।  
 मह कारणेण सब्बो आढत्तो विग्गहो तेण ॥४५७३॥  
 एत्थागएण तेणं उवहवो होइ अम्ह देसस्स ।  
 परचक्कभउब्भंतो लोओ वि हु दुत्थिओ होइ ॥४५७४॥  
 होइ महारायस्स वि गरुयाहिणिवेसदुत्थियं हिययं ।  
 सेणासामग्गीए धणक्खओ होइ अइगरुओ ॥४५७५॥

मिलियंमि उभयसेत्रे संजायइ विविहसत्तसंहारो ।  
 तो मह सज्जे कज्जे किमित्तिएण प्पयासेण ? ॥४५७६॥  
 अहमेव य एक्कंगो गंतूणं तस्स दुट्टनरवइणो ।  
 भुयदंडसमरकंडुं अवणेमि किमेत्थ बहुएण ?' ॥४५७७॥  
 इय मंतिऊण कुमरो मए समं जायविक्रमुक्करिसो ।  
 सेज्जाए सुहनिसत्रं च्छ(छं)डेउं चंदसिरिदेवि ॥४५७८॥  
 उप्पइओ खग्गकरो मह विज्जाबलपयट्टनहगमणो ।  
 वच्चइ अवलोयंतो गयणयलं तारयाइत्रं ॥४५७९॥  
 जा तत्थ देव ! अम्हे वच्चामो दो वि नहयले तुरियं ।  
 ता अच्छरियं जं किर रंजायं तं निसामेहि ॥४५८०॥  
 कुमरविणोयनिमित्तं पारच्चकहापरव्वसमणो हं ।  
 वीसरिऊण गओ किर अंगइयाजिणहरस्सुवरिं ॥४५८१॥  
 तो भट्टगयणगामिणिविज्जो सहस त्ति सह कुमरेण ।  
 पडिओ चेइयमंदिरदुवारदेसे विलक्खमणो ॥४५८२॥  
 एत्थंतरमि भणिओ कुमरेणाहं किमागया चंपं ? ।  
 जं विविहहट्टमंदिरनिरंतरं दीसए नयरं ?' ॥४५८३॥  
 भणियं मए न चंपं अंगइयानगरमागया देव ! ।  
 जिणभवणलंघणेणं विज्जाभट्टो अहं पडिओ ॥४५८४॥  
 एयं नरिंद ! पुरओ जिणभवणं जत्थ रयणपडिमाओ ।  
 चिद्वंति तिलोयस्स वि पुज्जाओ महप्पभावाओ ॥४५८५॥  
 पढमं बंभेण तओ सक्केण तओ दसाणणेणाऽवि ।  
 तम्हा पुण रामेणं इह देव ! पय(इ)ट्टियाओ त्ति' ॥४५८६॥

तो भणइ वीरसेणो एवंविहजिणवरिंदपडिमाण ।  
 अभिवंदणेण होही विज्जाब्भंसो वि उवयारी ॥४५८७॥  
 पुण जिणवरिंददंसण-संपूयण-वंदणाहिहयपावा ।  
 आसाइयपुत्रुदया वच्चिस्सामो सुहं गयणे' ॥४५८८॥  
 'एवं' ति पभणिऊणं दो वि पविट्ठा जिणिंदभवणंमि ।  
 कयकालोइयपूयाकम्मा य थुणंति जिणनाहं ॥४५८९॥  
 "जय सयलभुयणभूसण ! जय जय परमत्थबंधव ! जिणिंद ! ।  
 जय सव्वसत्तकरुणानिज्झरणपवाहगिरिराय ! ॥४५९०॥  
 जय निव्वाणपुरेसर ! जय जय दुक्कम्मवणमहादाव ! ।  
 जय भवपंजरभंजण ! जय वम्महवाहिवरवेज्ज ! ॥४५९१॥  
 जय अंतरंगगुरुबल-जलहिमहामहणमंदरगिरिंद ! ।  
 जय गुरुदुरियमहागिरिविदलणदंभोलि ! जिणनाह ! ॥४५९२॥  
 जय नाणाविहकुसु(स)मयपयंगपरिपडणभासुरपईव ! ।  
 जय जय पवित्तदंसणजलखालियपावपंकोह ! ।' ॥४५९३॥  
 इय जिणवंदणपसरिय-हरिसवसुव्वूढबहलरोमंचो ।  
 पणमइ भूमिनिवेसियसिर-जाणु-करो जिणिंदाण ॥४५९४॥  
 तो कुमरो मे सद्धिं बाहिं नीहरइ देवभवणस्स ।  
 पेच्छइ समीवसंठियमुज्जाणं विविहतरुगहणं ॥४५९५॥  
 अह देव ! दक्खिणावरभाए उज्जाणफासुयधराए ।  
 दिट्ठो ज्ञाणारूढो कुमरेण महामुणी एगो । ॥४५९६॥  
 दट्ठूण मुणिवरं तं दुक्करतवचरणसोसियसरीरं ।  
 सुविसुद्धज्जवसाओ संपत्तो तस्स पासमि ॥४५९७॥

तो परमब्भ(भ)त्तिनिब्भर-हिययब्भंतरफुरंतसंतोसो ।  
 पयडियगुणाणुराओ पणमइ वीरो मुणिवरिंदं ॥४५९८॥  
 मुणिणा वि ज्ञा(झा)णजोगं मोत्तूणं सायरेण वयणेण ।  
 दिन्नो भ्भ(भ)वदुक्खहरो सुधम्मलाहो कुमारस्स ॥४५९९॥  
 उवविसइ नाइदूरे विहियाणुमई मुणिंदचंदेण ।  
 मुणिचरणकमलफंसणमहग्घवसुहातले कुमरो ॥४६००॥  
 तो भणइ वीरसेणो 'भयवं ! वेरग्गकारणं गरुयं ।  
 किं पि तुह तेण नियतणुनिरवेक्खो चरसि तवचरणं ॥४६०१॥  
 कारणरहियं कज्जं सिज्झइ न कयाइ एस जणवाओ ।  
 कज्जं नणु कम्मखओ तस्स य किर कारणं देहो' ॥४६०२॥  
 तो भणइ मुणी 'सावय ! सच्चमिणं किंतु पेच्छ अच्छरियं ।  
 एणं पि कारणमिणं कज्जाइं(इ) य दोत्रि साहेइ ॥४६०३॥  
 एगो वि एस काओ होइ निमित्तं सुहस्स असुहस्स ।  
 सुहमेव संजयप्पा असंजयप्पा दुहं जणइ ॥४६०४॥  
 एयसरीरेणं चिय एस(य) सरीरस्स कारणे मणुया ।  
 निच्चाइं अणिच्चस्स वि पावाइं कुणांति पावमई ॥४६०५॥  
 बहुसागरोवमंतं खणलवमणसोक्खकंक्खुओ जीवो ।  
 अज्जिणइ पावपडलं देहस्स कए असारस्स ॥४६०६॥  
 ससरीरपोसणत्थं पहरइ बहुयाण परसरीराण ।  
 हा हा ! खणसुहकज्जे अप्पाणं ठवइ दुक्खंमि ॥४६०७॥  
 एक्कुंमि हए जीवे मेरुसमो होइ पावपब्भारो ।  
 कह पुण अणंतजीवे हंतूणं तस्सं निव्वाहो ? ॥४६०८॥

एवं असारनियकायकारणे जे कुणंति परपीडं ।  
 ते होंति महानरए नेरइयाऽणंतवाराओ ॥४६०९॥  
 भासंति असच्चं पि हु परावयारं नराहमा वयणं ।  
 इह परलोयविरुद्धं एयस्य कए सरीरस्स ॥४६१०॥  
 पुव्वमसेवियधम्मा दारिदोवद्वया इह भवम्मिं ।  
 सदाइविसयलुद्धा हरंति परसंतियधणाइं ॥४६११॥  
 'सुहसंतुट्टमणो हं अच्छिस्सं परधणाइं घेत्तूण' ।  
 इय चिंतंतो चोरो घेप्पइ आरक्खियनरेहिं ॥४६१२॥  
 पावइ इहलोए च्चिय चोरो नाणाविहाइं दुक्खाइं ।  
 परलोये पुण नरओ करट्ठिओ तस्स न हु भंती ॥४६१३॥  
 जे परजुयइपसंगं ससरीरसुहत्थिणोऽणुसेवंति ।  
 भक्खंति कालकूडं ते मंदा अमयबुद्धीए ॥४६१४॥  
 ३द्वहसरीरस्स कए गेण्हंति परिग्गहंअपरिमाणं ।  
 कम्मगुरू उवला इव पडंति नरयंधकूवेसु ॥४६१५॥  
 इय एवमाइबहुविहपावट्ठाणेहिं पावमज्जिणइ ।  
 तेण सरीरं सावय ! हेऊ पावस्स इय भणियं ॥४६१६॥  
 दद्वहसरीरस्स कए जेत्तियमेत्तं नरा किलिस्संति ।  
 लक्खंसेण वि धम्मे जयंति ता किन्न पज्जत्तं ? ॥४६१७॥  
 इय चउगइसंसारे चउरासीजोणिलक्खविसमंमि ।  
 पत्ताइं सरीराइं अणंतसो पावजणयाणि ॥४६१८॥  
 लद्धेहिं अइबहूहिं वि पावसरीरेहिं को गुणो तेहिं ?

१. ४६११ गाथाया द्वितीयचरणं ला. प्रतितः; आदर्शं तत् खण्डितम् ॥

२. ४६१५ गाथाया 'गेण्हंति' पर्यन्तः अंशः आदर्शं खण्डितः, ला. प्रतौ च दृश्यते ॥

तं भवकोडिदुलंभं जं नवरं जिणमयाणुगयं ॥४६१९॥  
 तं तुडिवसेण लद्धं सम्मना(न्ना)णेण नायभवभावं ।  
 कम्मक्खए समत्थं तवोविहाणे निउंजामि ॥४६२०॥  
 सचराचरे वि भुयणे नत्थि असज्झं तवस्स चित्तस्स ।  
 नियदेहनिरावेक्खो तेण तवं काउमारद्धो ॥४६२१॥  
 जं पुण भणियं तुमए 'भयवं ! वेरग्गकारणं गरुयं' ।  
 तं सावहाणहियओ आयन्नसु सावय ! कहेमि ॥४६२२॥  
 इह जं जं चिय दीसइ रागनिमित्तं सरागपुरिसाण ।  
 तं तं चिय नीसेसं वेरग्गकरं विवेईण ॥४६२३॥  
 जह नरयगया भावा चिंतिज्जंता जणंति उव्वेयं ।  
 तह दुक्खरूवयाए जाणसु संसारभावा वि ॥४६२४॥  
 तय-मूल-पत्त-पल्लव-पुप्फ-फलाईणि निंबरुक्खस्स ।  
 विरसाइं तहा जाणसु संसारसुहाइं परिणामे ॥४६२५॥  
 वस-मंस-रुहिर-फोफस-तयट्टि-विड-मुत्त-अंतबीभच्छं ।  
 जह य सरीरमसारं तह जाणसु भवसरूवं पि ॥४६२६॥  
 नियचित्तवियप्पेणं मुणंति जह सुंदरं मह सरीरं ।  
 संसारे सारत्तं तह होइ वियप्पसंजणियं ॥४६२७॥  
 परमत्थसुहविहीणे नियमइपरियप्पणाकयसुहंमि ।  
 परमत्थपंडियाणं संसारे होइ निव्वेओ ॥४६२८॥  
 सो जइ वि विविहनिव्वेयकरणकारणसहस्ससंकित्रो ।  
 तह वि न मूढमईणं निव्वेयं जणइ अनिमित्तो ॥४६२९॥  
 ता सावय ! मह जायं निमित्तमेत्तं तयं पि निसुणेहि ।  
 अइसयपसंतचित्तो सि तेण साहिज्जई तुज्झ ॥४६३०॥

इह अत्थि भरहवासे नयरी वाणारसि त्ति नामेण ।  
 नीसेसनयरगुणगणविहूसिया परमरम्मा य ॥४६३१॥  
 तत्थऽत्थि चंदगुत्तो त्ति नाम राया पवड्ढियपयावो ।  
 नामेण चंदसेणा तस्सऽत्थि मणोहरा भज्जा ॥४६३२॥  
 तस्सऽत्थि परमपुज्जो पुरोहिओ नाम चंडसम्मो त्ति ।  
 भज्जा से सोमसिरी ताण अहं संगमो पुत्तो ॥४६३३॥  
 परिचत्तबालभावो अणुवमसंपत्तजोव्वणो तत्थ ।  
 नीसेसकलाकुसलो जुवईण मणोहरो जाओ ॥४६३४॥  
 परिणाविओ य पिउणा विमलमइं नाम सुंदरं कत्तं ।  
 तीए सह विसयसोक्खं भुंजंतो तत्थ चिड्ढामि ॥४६३५॥  
 नियकम्मपरिणईए किलिड्ढचित्तो अईव कूरप्पा ।  
 बहुपाणिघायणरओ संजाओ पयइनिक्कुरुणो ॥४६३६॥  
 मारेमि अणंतेऽहं घरमूसय-मसय-मंक्कुणाईए ।  
 उंदुर-सप्पवहत्थं पोसेमि विराल-नउले वि ॥४६३७॥  
 अह मज्झ पिया कालक्कमेण मरिऊण कम्मवसवती ।  
 तत्थेव निए गेहे जाओ कोलुंदुरत्तेण ॥४६३८॥  
 भत्तारमणुसरंती पविसइ जलणंमि मज्झ जणणी वि ।  
 मरिउं नियगेहे च्चिय मज्जारित्तेण उववन्ना ॥४६३९॥  
 ताणं च उवरयाणं वेयविहाणेण विविहरूवाइं ।  
 उद्धदेहाइयाइं मए वि विहियाइं कम्माइं ॥४६४०॥  
 तो उवरयंमि जएण(जणए) अहमेव पुरओहिओ(पुरोहिओ) परिड्ढिविओ ।  
 नरवइणा लोएण य पिउपडिवत्तीए(इ) दिट्ठो म्हि ॥४६४१॥



जा विमलमई नामा मह भज्जा सा वि साविया जाया ।  
 सेज्जयसावयभज्जाजिणमइसंगेण दिढचित्ता ॥४६४२॥  
 सा पाणिवहपयट्टं मं दट्ठुं सकरुणा निवारेइ ।  
 'पिय ! मा मारसु जीवे नरयफलो जेण पाणिवहो' ॥४६४३॥  
 तोऽहं तिस्सा वयणं अवगब्रंतो हणेमि बहुजीवे ।  
 सा वि य अविसेतमणा मं वारइ कूरकम्माओ ॥४६४४॥  
 कोलुंदुरो वि गेहें पाडइ विवराइं खाइ वत्थाइं ।  
 निब्भरपासुत्ताणं चरणतले करडइ अलक्खो ॥४६४५॥  
 अह अन्नया पहाए कयसंझावंदणो गमिस्सामि ।  
 किर राउलं पविट्ठो चोडयवत्थाइं पहिरेउं ॥४६४६॥  
 जा कड्ढिऊण वत्थं निएमि परिहेमि ता असेसं पि ।  
 कोलुंदुरेण खब्धं खंडाखंडीकरेऊण ॥४६४७॥  
 जह निवसणं तहेव य उवरिल्लुं चोडओ वि तह चेव ।  
 तिलमित्तं पि न ठाणं तस्सऽत्थि न जत्थ तं खब्धं ॥४६४८॥  
 जा जोएमि सरोसो ता हं नियचोडयस्स गुज्झंमि ।  
 पेच्छमि उंदुरं तं निब्भरनिद्वाए पासुत्तं ॥४६४९॥  
 तो तं तत्थ पसुत्तं पच्छिमचरणोहिं रज्जुपासेण ।  
 कट्ठेमि बंधिऊणं दड ति धरणीए घेल्लेमि ॥४६५०॥  
 तो जणणीमज्जारिं रज्जुनिबब्धं च दाहिणकरेण ।  
 वामेण जणयकोलं घेत्तुणं जाव ढोएमि ॥४६५१॥  
 ता उंदुरो सरोसो वयणग्गविणिग्गयाहिं दाढाहिं ।  
 डसिऊणं मज्जारिं तिस्सा खंधं समारूढो ॥४६५२॥

गहिया खंधपएसे अंतोपक्खित्तदंतनिवहेण ।  
 तो कड्ढिरुण रज्जुं मए पुणो सो पुरो खित्तो ॥४६५३॥  
 मज्जारीए(इ) सकोवं करालदाढापसारियमुहीए ।  
 उंदुरमुहुं(हं) पि समुहे व(प)क्खित्तं कुल्लगल्लाए ॥४६५४॥  
 कोलुंदुरेण तेण वि मज्जारीमुहपविट्ठवयणेण ।  
 दोखंडिया खणेणं तीए जिब्भा सदाढाहिं ॥४६५५॥  
 इय ताइं दो वि समयं अन्नोन्नं कोहपत्तमरणाइं ।  
 मरिरुण पुणो सगिहे जाओ कोलुंदुरो नउलो ॥४६५६॥  
 मज्जारी पुण सप्पो पुव्वज्जियदुकयकम्मवसगाइं ।  
 परिपुट्ठसरीराइं जायाइं कमेण जुगवं पि ॥४६५७॥  
 अह अन्नया स सप्पो परिब्भमंतो मए सगेहंमि ।  
 दिट्ठो ससंभमेणं पुण तुरियं आणिओ नउलो ॥४६५८॥  
 तो जणणीसप्पुवरिं मए विमुक्को सजणयनउलो जा ।  
 ता धाविया तुरंती विमलमईं सकरुणालावा ॥४६५९॥  
 नियजणयच्चंडसम्मं सोमसिरिं मायरं च मारेसि ।  
 जइ एयाणन्नोन्नं संघट्टं कुणसि तिरियाण ॥४६६०॥  
 तो नउल-भुयंगाणं नियघरसुय-सुण्हदंसणवसेण ।  
 जायं जाईसरणं सनामसवणेण य फुडत्थं ॥४६६१॥  
 जाओ ताण वियप्पो 'एयं तं मह घरं, इमो पुत्तो ।  
 एसा सुण्हा संपइ अहं पुण एरिसावत्था' ॥४६६२॥  
 एत्थंतरंमि भणिओ विमलमईंए अहं सखेयाए ।  
 'को नाह ! तुज्झ दोसो ? दोसु क्खु पुराणकम्मस्स ॥४६६३॥

जं निग्घिणाण कम्मं मेच्छाण तए तयं समाढत्तं ।  
 विप्पेण वि किं एसा गोत्तड्ढि(ठि)ई तुम्ह मण्णामि ? ॥४६६४॥  
 जं ववहारविरुद्धं धम्मविरुद्धं च जणविरुद्धं च ।  
 तं मरणे वि न वीरा कुणंति जं अजसहेउं च ॥४६६५॥  
 अप्पं बहुं च कज्जं आरंभंतेण एत्थ पुरिसेण ।  
 परिभावणीयमेवं किं फलमेयस्स परिणामे ? ॥४६६६॥  
 जं जणइ सया सोक्खं जं च न दुक्खं करेइ परिणामे ।  
 तं कज्जं कायव्वं विवेइणा उभयलोगहियं ॥४६६७॥  
 जं पुण खणसोक्खकरं परिणामे होइ दुक्खसंजणयं ।  
 तं बुद्धिमया कज्जं परिहरियव्वं पयत्तेण ॥४६६८॥  
 तुह पाणिवहो सुंदर ! कीलाहेउ त्ति दिन्नखणसोक्खो ।  
 परिणामो(मे) एसो च्चिय नरयफलो होही(होहिइ) अवस्सं ॥४६६९॥  
 दुक्खतरुमूलमेसो पाणिवहो होइ सव्वसत्ताण ।  
 नरयपहसत्थवाहो सुर-सिवपुरज्झं(झं)पणकवाडो ॥४६७०॥  
 वसणसयरायहाणी धम्ममहाकप्परुक्खपरसु व्व ।  
 सम्मन्नाणपर्इवुणहावणपवणो व्व पाणिवहो ॥४६७१॥  
 निहणइ मणपणिहाणं रोद्धज्झाणं च कुणइ हिययंमि ।  
 जणइ अमेत्तीभावं बहुभववैराइं संचिणइ ॥४६७२॥  
 जो निहणिज्जइ जीवो सो अन्नभवंमि घायगं हणइ ।  
 अवरोप्परं हणंता वेरं वड्ढंति इह जीवा ॥४६७३॥  
 बहुवरिससहस्ससमज्जियं पि अइदुक्करं तवच्चरणं ।  
 एगंमि हए जीवे सव्वं पि निरत्थयं होइ ॥४६७४॥

जो भुयणं पि असेसं अत्थपयाणेण कुणइ अदरिदं ।  
 तस्स वि य दाणधम्मो अकयत्थो होइ हिंसाए ॥४६७५॥  
 इह होइ न अत्थखओ सरीरपीडा वि कोइ इह नत्थि ।  
 किन्न मुहाए(इ) विढप्पइ दयाए(इ) बहुपुन्नपब्भारो ? ॥४६७६॥  
 सव्वेसिं सत्ताणं सव्वभयाणं महाभयं मरणं ।  
 मह तुह अन्नेसिं पि य पच्चक्खो एस दिडुंतो ॥४६७७॥  
 कणयगिरिं दिज्जंतं रज्जं वा विविहमंडलाणुगयं ।  
 मारिज्जंतो सव्वं चइऊणं जीवियं महइ' ॥४६७८॥  
 इय एवमाइ सव्वं विमलमईधम्मदेसणावयणं ।  
 सोऊण सप्प-नउला संविग्गा तक्खणच्चेय ॥४६७९॥  
 निंदति पुव्वजम्मं बहुं च मन्नंति विमलमई(इ)वयणं ।  
 परिहरियवेरभावां पसंतरूवा दुवे जाया ॥४६८०॥  
 सुमरंति विप्पजम्मं उंदुर-मज्जारिजम्ममइनीयं ।  
 निंदति भवसहावं कम्माण वि दारुणविवागं ॥४६८१॥  
 'हा हा ! अन्नाणंधा असमंजसचेट्टियं ववहरंति ।  
 निवडंति जेण घोरे दुहावहे भवसमुद्धंमि ॥४६८२॥  
 जो विप्पभवे विहिओ विविहकुसत्थोवएसओ धम्मो ।  
 तं मन्ने गरलं पि व पीयं पीऊसबुद्धीए' ॥४६८३॥  
 इय ते पसंतचित्ता परिवज्जियपयइवेरवावारा ।  
 नियमणसंकप्पेणं अणसणभावं पवज्जंति ॥४६८४॥  
 तो तं दइयावयणं अवहीरंतेण पावकम्मेण ।  
 मुक्को मए सरोसं नउलो उवरिं भुयंगस्स ॥४६८५॥

तो नउलो सप्यो वि य दो वि समं जायपरमपरिओसा ।  
 अन्नोन्नसमालिंगणसुहमउलियलोयणा जाया ॥४६८६॥  
 जाव न ते अन्नोन्नं जुज्झंति पसन्नमाणसा दो वि ।  
 ता मुसलपहारेणं हया मए पावकम्मेण ॥४६८७॥  
 तो 'वारंतीए मए निहया ते' इय पयट्टरोसाए ।  
 सव्वो गिहवावारो परिचत्तो विमलमइए वि ॥४६८८॥  
 गंतूण वासभवणं रोसारुणलोयणा फुरंतोड्डी ।  
 सेज्जाए सुहनिसन्ना जा अच्छइ ता अहं पत्तो ॥४६८९॥  
 सप्पणयं साणुणयं समहुरमुवसामिया मए दइया ।  
 सा भणइ 'तुज्झ पिययम ! हिओवएसो मए दिन्नो ॥४६९०॥  
 जो जह बंधइ कम्मं सो तहरूवं फलं पि पावेइ ।  
 अन्नेण विसे भुत्ते न हु अन्नो मरइ कइया वि ॥४६९१॥  
 जं तुह रोयइ तं कुणसु नाह ! परमेत्तियं वियाणेमि ।  
 वच्चिह(हि)सि फुडं नरए घोरे कंदुज्जयपहेण' ॥४६९२॥  
 इय एवमाइ बहुयं जंपंती तत्थ वासभवणंमि ।  
 तद्वियसमेव ण्हाया उवभुत्ता तक्खण च्वेय ॥४६९३॥  
 तो तव्वेलुवभुत्ताए तीए कुच्छीए सप्प-नउला ते ।  
 जमलगसुयभावेणं उववन्ना दो वि समकालं ॥४६९४॥  
 सुण्हाकहियअहिंसाधम्मं हिययंमि सदहंता ते ।  
 विहियाणसणफलेण सुमाणुसत्तंमि उववन्ना ॥४६९५॥  
 धी ! संसारसहावो पुत्तो जेसिं पि जणणि-जणयाण ।  
 सो च्वेय ताण जणओ जणणी सुण्हा य संभवइ ॥४६९६॥

तो विमलमई समहियनवमासाणंतरं सुहमुहुत्ते ।  
संपुन्नदेहसोहा सुयाण जुयलं पसूया सा ॥४६९७॥  
जणएण सत्तिसरिसं वद्धावयणं कयं पहिद्वेण ।  
बारसमेऽइक्कंते नामाइं कयाइं दोहिं(णहं)पि ॥४६९८॥  
सिरधरनामो पढमो बीओ गंगाधरो त्ति नामेण ।  
वड्ढंताऽणुक्कमसो कुमारभावं च ते पत्ता ॥४६९९॥  
कयवयबंधा जाया पढमासमबंधचारिणो दो वि ।  
पाढिजं(ज्जं)ति असेसं वेयागमसत्थसंघायं ॥४७००॥  
तो ताण सुकयकम्मोदएण दुकयकम्मक्खओवसमजोगा ।  
जणणीसंसग्गेण य जिणधम्मरुई समुप्पन्ना ॥४७०१॥  
वच्चंति जिणहरेसुं वंदंति जिणे गुरू य सेवंति ।  
निसुणंति एगचित्ता जिणधम्मं सिवसुहप्फलयं ॥४७०२॥  
अहिगयजीवाइपयत्थ-मुणियपरमत्थवित्थरा दो वि ।  
दढसम्मत्ता जाया सुसावया निरइयारा य ॥४७०३॥  
पूएंति वीयरए महरिहपूओवगरणदव्वेहिं ।  
सब्भूय[सु]गुणकित्तणरूवाहिं थुईहि य थुणंति ॥४७०४॥  
सेवंति निप्पिवासे परमागमपंडिए मुणिवरिंदे ।  
सुह(हु)मत्थवियारेसुं निउणा रंजंति गुरुहिययं ॥४७०५॥  
भावंति भवसरूवं सुमिणय-माइंदजालसमसरिसं ।  
निंदंति महामोहं रागदोसे निसेहंति ॥४७०६॥  
सेवंति उचियकिच्चं तसंति संसाररक्खसभयाओ ।  
कयदुक्करतवचरणा(णे) मुणिंदचंदे पसंसंति ॥४७०७॥

इय एवं अणवरयं दोन्नि वि ते बंभचारिणो बडुया ।  
 कयविविहधम्मकम्मा गीयत्था सावया जाया ॥४७०८॥  
 तो हं तहासरूवे नियपुत्ते पेच्छिऊण मोहंधो ।  
 निंदियजहत्थधम्मो अजहत्थकुधम्मकयचित्तो ॥४७०९॥  
 विमलमईए उवरिं सिरिधर-गंगाधराण उयरंमि(उवरिंमि) ।  
 मज्झ गुणमच्छरेणं पओसभावो समुप्पन्नो ॥४७१०॥  
 अह अन्नदिणे दोन्नि वि निवारिया जिणहरंमि वच्चंता ।  
 भज्जा वि मए भणिया 'तुमए मह नासिया पुत्ता ॥४७११॥  
 भत्तारसमणुचिन्नं मग्गं सेवंति कुलपसूयाओ ।  
 तुमए पुण विवरियं(विवरीयं) सव्वं पि हु काउमारद्धं ॥४७१२॥  
 जे मह पियराणं पि य पच्छ काहं(हिं)ति सव्वकिरियाओ ।  
 ते मह पुत्ता इण्हि जाया नियधम्मनिरवेक्खा ॥४७१३॥  
 जइ नाम तुमं भत्ता सेवडयाणं हवेसु न भणेमि ।  
 कह मज्झ संतई वि य पासंडीणं समप्पेसि ? ॥४७१४॥  
 किं जंपिएण बहुणा ? जइ जिणधम्मं चएसि ता चिट्ठ ।  
 अह न चयसि ता पावे ! नीहरसु गिहाओ मह तुरियं ॥४७१५॥  
 इय एवमाइ बहुविहनिब्भच्छणवयणदूमिया संती ।  
 निच्छयसारं वयणं विमलमई भणिउमाढत्ता ॥४७१६॥  
 'इह संसारसमुद्वे जाइ-जरा-मरणदुहसयावत्ते ।  
 बहुभवपरिचत्ताणं गिहाण को जाणइ पमाणं ? ॥४७१७॥  
 जीयपरिच्चाएण वि जो चइयव्वो मए न जिणधम्मो ।  
 गिहवासमेत्तकज्जे चएमि कह तं अइदुलंभं ॥४७१८॥

चिंतामणि व्व लद्धं पयडनिहाणं व कप्परुक्खं व ।  
 कह परिहरामि तुह तुच्छगेहकज्जेण जिणधम्मं ? ॥४७१९॥  
 एसो न तुज्झ रोसो किं तु पसाओ व्व मह असामन्नो ।  
 जं कारायारनिबंधणाओ गेहाओ नीणेसि ॥४७२०॥  
 जो बहुमणोरहेहिं परिहरित्तं वंछिओ गिहारंभो ।  
 सो पुत्रपरिणईए अकिलेसेणेव परिचत्तो' ॥४७२१॥  
 इय भणिउं विमलमई ममं च आपुच्छिऊण नीहरिया ।  
 बहुरोसेण मए वि य 'जाहि' त्ति सनिट्ठुरं भणिया ॥४७२२॥  
 गंतूण साहुणीणं सयासमाचि(च)क्खियं नियसरूवं ।  
 'मह देह अज्जियाओ ! पव्वज्जं पावनिम्महणं' ॥४७२३॥  
 तो साहुणीहिं(हि) भणियं 'भद्रे ! मा होसु किं पि उच्छुक्का ।  
 अज्ज वि नो जाणिज्जइ तुह पइणो केरिसं चित्तं ? ॥४७२४॥  
 धम्मनिमित्तो एसो पारंभो तुज्झ साविए ! सो वि ।  
 सब्वसमाहाणेणं जह होइ तहा करेयव्वो' ॥४७२५॥  
 तो ते वि मज्झ पुत्ता नियजणणीमग्गमणुसरंता य ।  
 मं चइऊण विसं पिव विमलवई(मइ)समीवमणुपत्ता ॥४७२६॥  
 गंतूण तेहिं भणिया जणणी 'मा अंब ! कुणसु मणखेयं ।  
 अणुकूला गलथल्ला अम्हं पुत्तेहिं(हि) संजाया ॥४७२७॥  
 एण्हि जा तुज्झ गई अम्हं विय सा न एत्थ संदेहो ।  
 उडेहि किं विचित्तसि ? वच्चामो गुरुसमीवंमि ॥४७२८॥  
 अंब ! विलंबो कीरइ पावट्टाणे न धम्मकज्जंमि ।  
 निस्सेयसकज्जाइं होंति सविग्घाइं इह जेण ॥४७२९॥



तो ते जणगिसमेया कम्मखओवसमजायसुहभावा ।  
 'लोयाणंदाई(य)रियं उज्जाणडि(ठि)यं समणुपत्ता ॥४७३०॥  
 गंतूण भत्तिनिब्भरपणामविलुलंतचूलियगोहिं ।  
 आणंदपुलयकक्कसतणूहिं अभिवंदिओ सूरी ॥४७३१॥  
 तो सूरिणा वि अणुवमसुहकारणादिन्नधम्मलाहेण ।  
 पणमियसाहुसमूहा उवविट्ठा सुद्धवसुहाए ॥४७३२॥  
 तो तेहिं मुणी भणिओ 'भयवं ! भुयणोवयारिणो तुज्झ ।  
 किं भन्नइ जस्स सया परदुक्खे दुक्खिओ अप्पा ? ॥४७३३॥  
 ता परमदुक्खियाणं करुणायर ! कुण पसायमम्हाणं ।  
 नीसेसदुक्खदलणोवायं साहेसु जिणधम्मं' ॥४७३४॥  
 तो गुरुणा बालाणं गंभीरपगब्भभासियं सोउं ।  
 अब्भुवगमगहणत्थं जहत्थरूवं इमं भणियं ॥४७३५॥  
 इह संसारे सुंदर ! बहुदुक्खसहस्सदुत्थियाणं पि ।  
 होइ अमेज्झकिमीण व जीवाण न भवभउव्वेवो ॥४७३६॥  
 इह इट्ठविओय-अणिट्ठजोय-धणहरण-भरणमाईहिं ।  
 निवि(व्वि)न्ना वि हु जीवा 'कट्ठो त्ति भवो' इय भणंति ॥४७३७॥  
 न उणो तदुवसमविहीए विहियपरमायरा पयट्ठंति ।  
 मक्कडवेरग्गेणं लद्धोवाया वि जिज्झ(झि)ज्झंति ॥४७३८॥  
 हा हा ! विसं अणत्थो मरणनिमित्तं अणंतदुहहेउं ।  
 एत्तियमेत्तेण न तं सरीरर(?)मियं समुत्तरइ ॥४७३९॥  
 जाव न विसावहारयसुसिद्धमंतोसहीओ दिज्जंति ।  
 चत्तपमाएहिं न ता ओसरइ विसं सरीराओ ॥४७४०॥

भवदुक्खविसं पि तहा एमेव न दारुणं ओ(उ)वणमेइ ।  
 जाव न दुक्करदिव्खा-तवाइणा ज्झो(झो)सियं कम्मं ॥४७४१॥  
 जाव न असेससावज्जजोगपरिवज्जणेण संसुद्धो ।  
 परिहरियपावपंको निल्लेवो होसि नीसल्लो ॥४७४२॥  
 ताव कह बहुभवंतरसमज्जियं किट्ठकम्मसंघायं ।  
 भवसयनिबंधमूलं च्छि(छि)ज्जइ एमेव सुहियाए ॥४७४३॥  
 दुद्धरपंचमहव्वयविसुद्धपरिवालणेण नो जाव ।  
 अप्पा आयासिज्जइ न ताव मणवंछिया सिद्धी ॥४७४४॥  
 जा देहनिरावेक्खं नो चिन्नं दुक्करं तवच्चरणं ।  
 एमेव लगसगाए न ताव तुह होइ कम्मखओ ॥४७४५॥  
 उप्पायणेसणुग्गम-बाए(य)त्तालीसदोसपरिसुद्धो ।  
 जा गहिओ नाहारो ता कह अहिलसियसंसिद्धी ॥४७४६॥  
 नियविसयपयट्टंते दुट्टंते इंदिए न जा दमसि ।  
 ता एएहिं तुमं चिय दमियव्वो चउगइभवंमि ॥४७४७॥  
 जाव न रागदोसे दुनिग्गहे तुह मणंमि पसरंते ।  
 निग्गहसि न ता होही पसमामयसुत्थिओ अप्पा ॥४७४८॥  
 जाव न अदीणचित्तो बावीसपरीसहे तुमं सहसि ।  
 अक्खुहियसत्तसज्झं निव्वुइनारिं न ता लहसि ॥४७४९॥  
 जा सीलंगट्टारससहस्सभारं सया अविस्संतो ।  
 न वहसि पहिड्डहियओ ता कह भवपंजरविमोक्खो ? ॥४७५०॥  
 गिरिकंदरकयवसही सुक्कज्झाणगिगिदट्टघणकम्मो ।  
 जाव न गमेसि कालं न होसि ता खीणमोहो त्ति ॥४७५१॥

इय एव मए कहिओ संसारदुहाण उवसमोवाओ ।  
 अणुचरसु इमं सुंदर ! जइ सच्चं दुक्खनिव्विन्नो ॥४७५२॥  
 लद्धूण माणुसत्तं विवेयओ भाविउं भवसहावं ।  
 एत्थेव परमजत्तो कायव्वो बुद्धिमंतेहिं ॥४७५३॥  
 सो च्विय सफलो जम्मो सरीरलाहो वि सो च्विय कयत्थो ।  
 आरोग्गया वि स च्विय पालिज्जइ जेण पव्वज्जा ॥४७५४॥  
 बहुपावपोसिण्ण वि देहेण न का वि होइ तुह रक्खा ।  
 रक्खइ भीममहाभवनिवडंतं नवर पव्वज्जा ॥४७५५॥  
 पिय-माइयाइसयणा कारिमनेहा तहेक्कजम्मा य ।  
 एसा भवंतरेसु वि पालइ जणणि व्व पव्वज्जा ॥४७५६॥  
 जह जह विसय-धणाइसु पिय-पुत्त-कलत्त-मित्तमाईसु ।  
 अणुरज्जसि एगमणो तह तह निरयंमि निवडेसि ॥४७५७॥  
 जइ पुण निरवेक्खमणो एयाण असारयं विचिंतेउं ।  
 परिहरसि ता कमेणं पावसि अजरामरं ठाणं ॥४७५८॥  
 इय मुणिवयणं सोउं 'तह'त्ति परभाविऊण परमत्थं ।  
 दुक्खग्गिणा जलंतं संसारं ते नियच्छंता ॥४७५९॥  
 पुव्वविरत्तमणा वि य समहियसंसारजायवेरग्गा ।  
 पाउभूव(य)निरंतरपव्वज्जासुद्धपरिणामा ॥४७६०॥  
 खणमेत्तमपारंता विलंबिउं तत्थ ते मुणिवरिंदं ।  
 सिररइयकरयं(यन्नं)जलिबद्धा विन्नविउमारद्धा ॥४७६१॥  
 'भयवं ! महापसाओ इच्छामो नाह ! तुम्ह अणुसद्धिं ।  
 जइ अत्थि जोग्गया णे ता तुरियं देह पव्वज्जं' ॥४७६२॥

तो गुरुणा नाऊणं तहाविहिं(हं) ताण आसयविसुद्धिं ।  
 'मा होउ विलंबेणं एएसिं पत्थुयविघाओ' ॥४७६३॥  
 एमाइ चिंतिऊणं भणइ गुरु 'मा करेह पडिबंधं ।  
 उज्जमह सकज्जत्थं एस अहं तुम्ह अणुकूलो' ॥४७६४॥  
 तो तव्वेलं जणणी नियदेहविभूसणोवगरणेण ।  
 जिणभवणोसु करावइ विसिद्धपूयाइसक्कारं ॥४७६५॥  
 तो ताइं सुहमुहुत्ते पसत्थविहि-करण-वार-लगंगमि ।  
 पव्वावियाइं गुरुणा विसुज्झमाणेण चित्तेण ॥४७६६॥  
 विमलमई अज्जियाए समप्पिया सीलदेविनामाए ।  
 इयरे वि मुणिकुमारा चिद्धंति गुरुण पासंमि ॥४७६७॥  
 अब्भसियसाहुकिरिया अहिगयनीसेससुत्तसारत्था ।  
 विविहतवसुसियदेहा अट्टमयट्ठाणपरिहीणा ॥४७६८॥  
 ते थोयदिणेहिं चिय संजाया उत्तरोत्तरगुणद्धा ।  
 परलोयसुत्थियमणा विहरंति गुरुहिं(हि) सह वसुहं ॥४७६९॥  
 तो ताण अहं सावय ! गुरुसन्निहिगमणमाई(इ)वुत्तंतं ।  
 पव्वज्जापज्जंतं जाणंतो लोयवयणेहिं ॥४७७०॥  
 सिद्धिलियनेहाबंधो उवेक्खमाणो मणेण चिद्धामि ।  
 पव्वइयाइं ति तओ सोऊणं सुत्थिओ जाओ ॥४७७१॥  
 तो हं नियसयणेहिं अन्नं परिणाविओ कुलपसूयं ।  
 वररूय-जोव्वणद्धं कंतिमइं नाम दियकन्नं ॥४७७२॥  
 सह तीए परमहिद्धो पीणथणकलसकंठकयबाहू ।  
 रइसायरे निबुद्धो गयं पि कालं न याणामि ॥४७७३॥

अह चंदगुत्तराया अन्नदिणे आसवाहणिनिमित्तं ।  
 बहुबलसंमद्रेणं निगच्छइ तुरयमारूढो ॥४७७४॥  
 दोपासवरविलासिणिकरचालियचमरचारुउभयंसो ।  
 सिरधरियधवलछत्तो मणिकुंडलणिद्ध(?)गंडयलो ॥४७७५॥  
 आमलयथूलमोत्तियमोत्तावलिकलियवियडवच्छयलो ।  
 रूवेण अणणसमो पच्चक्खो मयरकेउ व्व ॥४७७६॥  
 अवइन्नो रायपहं पासायतलट्टि(ठि)याए सो दिट्ठो ।  
 कंतिमईए नरिंदो रईए कामो व्व ससिणेहं ॥४७७७॥  
 तो चंदउत्तदंसणसेउल्लगलंतघुसिणसोणंगा ।  
 अणुरायसायरंमि व निबुडा(निब्बुडा) तक्खणं बाला ॥४७७८॥  
 तो मसिणमंदमउलियकन्नंतनिहित्तनयणबाणेहिं ।  
 पच्चक्खहिययचोरो त्ति तीए विद्धो महाराओ ॥४७७९॥  
 नरनाहेण वि कहमवि थिरधरियतुरंगमेण सा दिट्ठा ।  
 सोहग्ग-रूव-जोव्वण-लावन्नक्खित्तहियएण ॥४७८०॥  
 अन्नोन्नं पेसियदिट्ठिइवावारनायहियएहिं ।  
 जणपच्चक्खं दूरट्टिएहिं कज्जं विणिच्छइयं ॥४७८१॥  
 पत्तो य वाहियालिं सरीरमेत्तेण नरवई तत्थ ।  
 परियणउवरोहेणं वाहइ सो जच्चवोलाहे ॥४७८२॥  
 उचियसमएण राया समागओ वाहियालिभूमीए ।  
 सयलविसज्जियलोओ वासगिहं अह पविट्ठो य ॥४७८३॥  
 तं चेय विचिंततो थक्कइ सयणंमि 'कोमलसरीरं ।  
 कमलदलदीहरच्छिं कंतिमईकमलमुहसोहं ॥४७८४॥

कह वामकरायद्वियकेसकलावं च चिबुयमुन्नमियं ।  
 दरमउलियच्छिवत्तं चुबिस्सं तीए मुहकमलं ? ॥४७८५॥  
 उभयभुयापरिरंभणधूलथणरुद्धवियडवच्छयलो ।  
 आलिंगिस्सामि कहं तीए तणुं कुसुमसुकुमारं ? ॥४७८६॥  
 तीए सह सरससिंजियमणिरवुल्लसियबिउणरइपसरो ।  
 कह भोए भुंजिस्सं करघायविवद्धिउच्छाहो ? ॥४७८७॥  
 इय कंतिमइसंभोगविसयसंकप्पपरव्वसो राया ।  
 दिट्ठो पहिड्डमणसा विडेण रइकेलिणा भणिओ ॥४७८८॥  
 'किं देव ! मुहा खिज्जसि निक्कज्जं एत्तिए व कज्जंमि ? ।  
 तुह विट्ठिमुणियभावेण तं मए साहियं कज्जं' ॥४७८९॥  
 सिद्धं कज्जं ति सुए तिहुयणरज्जाहिसेयहिट्ठो व्व ।  
 आपुच्छइ रइकेलिं नीसेसं तीए वुत्तंतं ॥४७९०॥  
 रइकेली भणइ 'नरिंद ! निसुणसु तुह आसवाहणिगयस्स ।  
 तव्वेलं चिय तिस्सा घरं गओऽहं कयपवंचो ॥४७९१॥  
 दिट्ठ विनडिज्जंती तुह निब्भरनेहगुरुगहेणं व ।  
 सा सुन्हापरिसोसियअहरोट्ठा किं पि चिंतंती ॥४७९२॥  
 तो एगंते तिस्सा कहियं सव्वं नरिंद ! तीए वि ।  
 नीसेसं पडिवन्नं तुहाणुराएक्कचित्ताए' ॥४७९३॥  
 तो नरवइणा भणियं 'निसुणसु रइकेलि ! अणुचिओ एसो ।  
 नरवालाण विसेसा परजुवइपसंगवावारो ॥४७९४॥  
 अइदीहपिहुललोयणतिक्खग्गकडक्खभल्लिज्जजरिए ।  
 परिगलियव्व असेसा मह हियए आगमरहस्सा ॥४७९५॥

तो मज्झ एस पढमो भवतरुमूलो अकज्जपारंभो ।  
 भावियसुविवेयस्स वि ओसरइ खणंपि न मणाओ ॥४७९६॥  
 रइकेलि ! जइ न कहमवि कंतिमईसुरयसंगमो होइ ।  
 तो मह होइ निययं अतक्किओ पाणसंदेहो ॥४७९७॥  
 ता जह को वि न याणइ तहा तए सव्वमेव कायव्वं ।  
 रयणीए वीरचरियागयस्स सव्वं पि य अलक्खं ॥४७९८॥  
 ता जाहि तुमं तिस्सा संकेयं कहसु जेण सा तुरियं ।  
 नियनिग्गमणोवायं चिंतइ पइ-परियणअलक्खं ॥४७९९॥  
 तेण नरनाहवयणं 'तह'त्ति संपाडियं नरवई वि ।  
 वरिससहस्सपमाणं दिणसेसं नियइ च्छिकेण (?) ॥४८००॥  
 अह सूरु नरवइणो कुचेड्डियारंभजायखेओ व्व ।  
 अत्थैरिसिरग्गाओ घेल्लइ झंपं समुद्धंमि ॥४८०१॥  
 संझासमयजिणच्चणसुरहिसमुक्खित्तधूववेलासु ।  
 जिणमंदिरेसु पसरइ तारो घंटाठणक्कारो ॥४८०२॥  
 अत्थैरिवासभवणं गयं पि(गयंमि) सूरु अदिन्नतमपसरा ।  
 पसरंति निसि पईवा पडिभवणं जामइल्ल व्व ॥४८०३॥  
 दीसइ चउक्क-चच्चर-तिएसु संगहियसरससिंजारो ।  
 तुच्छुधणासानडिओ वोडा(?)पन्नंगणानिवहो ॥४८०४॥  
 एवंविहंमि समए राया कयसयलमंगलायारो ।  
 अत्थाणे उवविट्ठो अणेयनरनाहसंकिन्नो ॥४८०५॥  
 तत्थ वियड्डमणोहरविणोयसयगमियरयणिपहरेक्को ।  
 उट्ठइ अत्थाणाओ विसज्जियासेससामंतो ॥४८०६॥

१. अस्तगिरिशिरोऽग्रात् ॥

सेज्जाहरं पविद्धो पड्वइ पसायपादुयाईए ।  
 सेज्जाए सुहनिसन्नो भणिओ रइकेलिणा एवं ॥४८०७॥  
 'एसो देव ! पओसो ओसारंतो जणस्स संचारं ।  
 अणुरत्तसेवओ इव उवट्ठिओ तुज्झ समरञ्चू ॥४८०८॥  
 एसा वि देव ! रयणी जणणि व्व कुचंद्दियाइं झंपंती ।  
 अंधारपडं व तमं वित्थारइ मोहियजणोहं ॥४८०९॥  
 पहरस्सुवरिं(रि) नरेसर ! चउनाडीसमयताडिया भेरी ।  
 मणवंछियत्थसिद्धिं निविग्घं तुज्झ साहेइ' ॥४८१०॥  
 इय रइकेलिसमुत्थ(त्थि)यवयणेहिं तुरंतमाणसो राया ।  
 दिढवीरगंठिनिवसणनियंबसुनिबद्धअसिधेणू ॥४८११॥  
 सुनिबद्धकेसपासो करालकरवालकलियकरकमलो ।  
 हारकयबंभसुत्तो विणिग्गओ वासभवणाओ ॥४८१२॥  
 अविगणियसेज्जवालो दूरं परिहरियदारपडिहारो ।  
 भुल्लवियजामइल्लो नीहरिओ रायभवणाओ ॥४८१३॥  
 मह भारिया वि धुत्ती भणइ ममं नाह ! अज्ज तइयाए ।  
 दट्ठूण अहं गोरिं भुंजिस्सं ता विसज्जेहि ॥४८१४॥  
 तो सरलसहावेणं विसज्जिया सा मए सह सहीहिं ।  
 पूओवगरणसहिया पडिवालइ दारदेसंति ॥४८१५॥  
 तो तत्थ दारदेसे संपत्तो नरवई सरइकेली ।  
 घेत्तूणं कंतिमइं नीहरिओ हट्टमग्गेणं ॥४८१६॥  
 अह तुरियपओ राया तीए समं जाइ बाहिरुज्जाणे ।  
 रइकेलिणा पयप्पिय-कुसुमत्थरणंमि उवविसइ ॥४८१७॥



रइकेली वि सखग्गो बहुभत्तिपरो असेसमुज्जाणं ।  
 'मा होही इह दुद्धो' एवं बुद्धीए परियडइ ॥४८१८॥  
 तह राया कंतिमईवियड्डसंभोयसुहरसासत्तो ।  
 संजाओ जह दूरं विम्हरिया इयरनारीओ ॥४८१९॥  
 पहरद्धमच्छिऊणं तीए समं सुरयसुहपगब्भाए ।  
 उज्जाणाओ नरिंदो नीहरइ विसइ नयरीए ॥४८२०॥  
 तो तं पवेसिऊणं नियगेहं नरवई सरइकेली ।  
 सेज्जाहरंमि पविसइ ओल्लरइ य महरिहत्थुरणे ॥४८२१॥  
 एवं कंतिमईए दढमणुरत्तस्स चंदउत्तस्स ।  
 वच्चंति सुहं दियहा निसिद्धसकलत्तवग्गस्स ॥४८२२॥  
 अह कंतिमई पइदिणं अन्नोन्नमिसेहिं तत्थ वच्चंती ।  
 नायं मए जहेसा विणड्डसील व्व पडिहाइ ॥४८२३॥  
 अहवा- अविणिच्छियं न कज्जं हियए वि धरंति धीधणा पुरिसा।  
 तंमि कयनिच्छए वि य पसरंति न ताण वाणीओ ॥४८२४॥  
 ता सव्वहा सयं पि य निउणं नियभारियं परिक्खेमि ।  
 तो अन्नया निसाए अहमवि सह तीए(इ) नीहरिओ ॥४८२५॥  
 दारुद्देसठिओ हं जाव निरिक्खामि ताव नरनाहो ।  
 कंतिमईए सरोसं सो धरिओ अग्गकेसेसु ॥४८२६॥  
 भणियं च एत्तियाए वेलाए समागओ सि किं अज्ज ।  
 अन्ननारीए पायं धरिओ सि? विलंबिओ तेण ? ॥४८२७॥  
 समहुर-सललिय-ससिणेह-साणुकूलुत्तरेहिं नरवइणा ।  
 आणंदिऊण नीया पुणो वि तं बाहिरुज्जाणं ॥४८२८॥

तो नरवइ ति एयं न सम्ममुवलक्खियं मए तत्थ ।  
 'परपुरिसंमि पसत्ता' एसो पुण निच्छओ जाओ ॥४८२९॥  
 तो जायनिच्छओ हं वलिओ नियमंदिरं पविट्ठो मि(म्हि) ।  
 नाणाविहे वियप्पे चिंतंतो तत्थ चे(चि)ट्ठामि ॥४८३०॥  
 'एसा मह पाणपिया सफलो जम्मो इमीए लाहेण ।  
 मन्नामि अप्पणो हं चइउं न तरेमि ता एयं ॥४८३१॥  
 सामोवक्कमवयणेहिं किं पि जं होइ तं भणिस्सामि ।  
 दंडेणं पुण एसा लज्जं च भयं च परिहरिही ॥४८३२॥  
 सव्वो वि सलज्जो च्चिय परिहरइ जणो न लोयववहारं ।  
 पच्चारिओ उ सो च्चिय निल(ल्ल)ज्जो होइ निप्पसरो' ॥४८३३॥  
 इय सेज्जाए निसन्नो चिंतंतो जाव तत्थ चिट्ठामि ।  
 ता सा वि अद्धरत्ते समागया मज्झ पल्लंके ॥४८३४॥  
 सासंका य नुवन्ना मए वि पासुत्तवेट्ठयं काउं ।  
 आमोडिऊण अंगं परिरद्धा पभणिया एयं ॥४८३५॥  
 'धम्ममहागहगहिया किं हिंडसि एत्तियाए रयणीए ? ।  
 किं न घरसंठिएहिं किज्जइ धम्मो जहुवइट्ठो ? ॥४८३६॥  
 बहलतमाओ निसाओ चोराहि-पिसाय-रक्खसघणाओ ।  
 निक्कारणेण सुंदरि ! मा अप्पा खिव अणत्थंमि ॥४८३७॥  
 तुज्जायत्तं मे जीवियं ति पभणामि तेण पुणरुत्तं ।  
 फुट्टे घडंमि नासइ तग्गयसलिलं न संदेहो' ॥४८३८॥  
 तो मज्झ साणुकूलं वयणं सोऊण जायउवरोहा ।  
 सा भणइ 'जं भणिस्स[सि] तमेव नीसंसयं काहं' ॥४८३९॥

तो सा मए पभणिया 'जइ एवं ता न उवरिमतलाओ ।  
 उत्तरियव्वं तुमए निसाए मह देहि वरमेयं' ॥४८४०॥  
 सा भणइ तुम्ह वयणं न कयावि विलंघियं मए जेण ।  
 एवं जंपसि जम्हा सासो वि हु मह तुहायत्तो' ॥४८४१॥  
 तो महर-सललियक्खर-वयणोहिं पसाइया मए धुत्ती ।  
 अइनेहमोहिणं उवभुत्ता पुव्वनीइए ॥४८४२॥  
 तो सा पहायसमए पच्चइयसहीमुहेण रायस्स ।  
 मह वइयरं असेसं जाणावइ कवडकयचित्ता ॥४८४३॥  
 तेण वि सा संदिट्ठा 'पउणा चिट्ठेज्ज गिहगवक्खंमि ।  
 तत्थागंतूण अहं तुज्झ मिलिस्सामि रयणीए ॥४८४४॥  
 तो अइगयंमि दिवसे दहरदाराइं झंपए धुत्ती ।  
 चिट्ठइ गवक्खदारे नरिंदमग्गं पलोएंती ॥४८४५॥  
 नियसमएणं राया समागओ विज्जुखित्तकरणेण ।  
 आरूढो उवरितलिं(लं) तंमि दिणे तत्थ भुत्ता सा ॥४८४६॥  
 भणिओ तीए नरिंदो 'न गिहे मह जायए हिययतोसो ।  
 अभिरमइ तत्थ चित्तं रमणीए बाहिरुज्जाणे' ॥४८४७॥  
 तो नरवइणा भणियं 'होउ इमं तत्थ चेव वच्चिस्सं ।  
 अन्नदियसेसु सुंदरि ! गोहारज्जुप्पओगेण' ॥४८४८॥  
 तो तं निसाए राया पइदियहं नेइ गिहगवक्खाओ ।  
 गोहारज्जुपहेणं उत्तरइ तहेव आरुहइ ॥४८४९॥  
 अह अन्नदिणे अहयं उवरिमभूमीए जाव वच्चामि ।  
 ता दहरे असेसे पेच्छामि निरंतरं पिहिए ॥४८५०॥

तो हं ससंकचित्तो सेज्झइमग्गेण नियघरस्सुवरिं ।  
 आरूढो वासहरं कंतिमइं नो निरिक्खेमि ॥४८५१॥  
 अह अड्ढरत्तसमए दिट्ठा गोहा गवक्खमारूढा ।  
 तिस्साणुमग्गओ सा धुत्ती पच्छ समारूढा ॥४८५२॥  
 वलिऊण गया गोहा सा मह पासं समागया धिट्ठा ।  
 सेज्जाए मह निसत्ता पहिड्ढवयणा इमं भणइ ॥४८५३॥  
 'पिययम ! दिट्ठो तुमए गोरिदेवीए जो कओ मज्झ ।  
 अच्चभु(ब्भु)ओ पसाओ मह भत्तिवरोवरुद्धाए ॥४८५४॥  
 तुह वयणेण ठियाहं भवणस्सुवरिं न जामि जा देविं ।  
 पच्चक्खमागयाए ता तीए अहं इमं भणिया ॥४८५५॥  
 'किं न हत्ते ! मह पासं समागया अज्ज ?' ता मए भणियं ।  
 'नियभत्तुणा निसिद्धा चोराइभएण रयणीए' ॥४८५६॥  
 गोरी भणइ 'किमेवं बीहसि ? मह दिव्ववाहणारूढा ।  
 एज्जसु पइदियसं चिय नीसेसभयाइं चइऊण' ॥४८५७॥  
 'तो अज्जउत्त ! एयं गोहं नियवाहणं पसाएण ।  
 संपेसिऊण नीया तह चेय पुणो इहाणीया' ॥४८५८॥  
 तो तव्वयणं सोउं साहस-धिट्ठत्त-अलियवयणेहिं ।  
 ईसीसि कलुसियमणो सिढिलियनेहो अहं जाओ ॥४८५९॥  
 'एवंविहाइं जिस्सा अइविसमभयावहाइं चरियाइं ।  
 सा कह वि कुवियचित्ता मारइ मं नत्थि संदेहो' ॥४८६०॥  
 एमाइ चिंतिऊणं हिययट्ठियरोसदूसियमणेण ।  
 हसिऊण केयवेणं मए अलक्खं व सा भणिया ॥४८६१॥

'कंतिमइ ! महच्छरियं जं तुह पासं समागया गोरी ।  
 नीसेसनारिमज्जे तं चिय सोहग्गमंजूसा ॥४८६२॥  
 ता भणसु तुमं देविं 'किं मह गोहाए सरढसरिसाए ? ।  
 जइ मह तुमं पसन्ना ता सीहं वाहणं देसु' ॥४८६३॥  
 अह सा भणइ 'न सीहो मह वाहणमत्थि' ता तुमं भणसु ।  
 'तं नत्थि जं न सिज्झइ देवाण असेसभुयणे वि' ॥४८६४॥  
 इय सिक्खिया मए सा 'तह'त्ति पडिवज्जइ महाधुत्ती ।  
 मह वयणं जाणावइ नरवइणो किर पहायंमि ॥४८६५॥  
 अह सा कयसंकेया घरसीहं पेसिऊण नरवइणा ।  
 तह चेव पुणो नीया अहं पि अणुमग्गओ लग्गो ॥४८६६॥  
 रइकेलिणा समेओ सो पत्तो तंमि बाहिरुज्जाणे ।  
 अहमवि तेहिं अदिट्ठो विसामि तरुनिविडगहणंमि ॥४८६७॥  
 तो सा मह पच्चक्खं निवेण सह सुरयसोक्खमणुहविउं ।  
 आयमणत्थं पत्ता पुक्खरणिं विमलजलभरियं ॥४८६८॥  
 जा किर आयमिऊणं पुक्खरणि-तडंमि ठाइ ता तीए ।  
 दिट्ठो चोरजुवाणो बब्बरइंटीकसिणकाओ ॥४८६९॥  
 वामकरकलियचावो दक्खिणकरपंचभल्लिभासुरिओ ।  
 उज्जाणदंसणत्थं समागओ पंचबाणो व्व ॥४८७०॥  
 तो सा तं दट्ठूणं चोरजुवाणं महाणुराएण ।  
 वच्चइ तस्स समीवं सो सभओ गुम्ममल्लियइ ॥४८७१॥  
 सा भणइ 'को तुमं रे ! इह भमसि निसाए?' तक्करो भणइ ।  
 'चोरो म्हि तुज्झ रूवं दट्ठूणं थंभिओ एत्थ' ॥४८७२॥

सा भणइ 'इच्छसु ममं अहं पि तुह रूवरंजिया आया' ।  
 चोरो भणइ 'न सुद्धा बंभणिनारीओ भुंजंति ॥४८७३॥  
 सा भणइ 'किं पयंपसि रे चोर ! न जइ करेसि मह वयणं ।  
 ता मारयामि निययं कलयलसद्धं करेऊण' ॥४८७४॥  
 भणिया य तद्धरेणं 'जइ एवं ता तुमं पमाणं मे' ।  
 आलिंगिऊण चोरं मह पुरओ रयइ अत्थुरणं ॥४८७५॥  
 मह पेच्छंतस्स पुरो अणज्जचेद्धाहिं विविहरूवाहिं ।  
 चोरेण कामिणी सा उवभुत्ता रइवियहेण ॥४८७६॥  
 तो तंमि चोरपुरिसे अणुरत्ता सा तहा जहा सव्वे ।  
 ते नरवइमाइ(ई)या वीसरिया उत्तमा पुरिसा ॥४८७७॥  
 'पइदियसं चिय एज्जसु इहेव उज्जाणे निविडगुम्मंमि' ।  
 चोरेण समं काउं संकेयं नरवइं पत्ता ॥४८७८॥  
 रइकेलिणा वि चोरो परिब्भमंतेण कह वि सच्चविओ ।  
 दूराओ हक्किऊणं सो बद्धो पच्छिमभुएहिं ॥४८७९॥  
 तो नरवइणो पासं आणीओ तं च सा निएऊण ।  
 मोयावइ मणइद्धं करुणाभावं पयासंती ॥४८८०॥  
 तो उज्जाणवणाओ नियनियगेहं गयाइं सव्वाइं ।  
 अहमवि पणइच्चित्तो मित्तस्स गिहंमि पासुत्तो ॥४८८१॥  
 अइनिब्भरनेहेणं सिंगारमय व्व जा मए दिद्धा ।  
 स च्विय भयभीएणं रक्खसिरूव व्व सच्चविया ॥४८८२॥  
 चिंतामि अहं चित्ते 'पेच्छय मयरद्धयस्स माहंमं' ।  
 जं गरुए वि हयासो कारइ असमंजससयाइं ॥४८८३॥

अच्युत्तमकख(ख)त्तियगोत्तसंभवो सव्वकख(ख)त्तियपहाणो ।  
 नीसेससत्थनिउणो अइनिम्मलगुणगणावासो ॥४८८४॥  
 जहठाणपरिद्धावियअसेसवन्नासमो पयापालो ।  
 सो वि हयउभयलोओ अंगीकयअजसपब्भारो ॥४८८५॥  
 जं चंदउत्तराया वि कुणइ एयारिसाइं नीयाइं ।  
 कम्माइं तीए ता किर को दोसो हयविवेयाए ? ॥४८८६॥  
 रूवविणिज्जियसुरसुंदरीसु अणुरायसीलवंतासु ।  
 विविहंतरेउरनारीसु रइवियइहासु संतीसु ॥४८८७॥  
 कह तेण वियड्ढेण वि अणेयविडघायजज्जरंगीए ।  
 बद्धो नेहाबंधो दुद्धसीलाए पावाए ? ॥४८८८॥  
 अहवा तस्स न दोसो काण वि पयईओ होंति पुरिसाण ।  
 साहीणं चइऊणं होइ रई जं पराहीणे ॥४८८९॥  
 एवं पि होइ ता होउ कित्तु सा चेव निंदिया पावा ।  
 जं तारिसं नरिंदं चइऊणं चोरमहिरमइ ॥४८९०॥  
 ता सव्वहा पहाए किं विच्चइ ताण चोर-रायाण ।  
 कोऊहलेण पुणरवि वच्चिस्सं बाहिरुज्जाणे' ॥४८९१॥  
 इय एवमाइ सव्वं चिंतंतस्स य सहस्सवरिस व्व ।  
 मह रयणी वोलीणा अरइसमद्धासियमणस्स ॥४८९२॥  
 तो विहियगोसकिच्चो पजलंतंमि व निएमि तं नयरिं ।  
 तब्भयचत्तघरो हं अलद्धसोक्खो परियडामि ॥४८९३॥  
 'सा चेय पुव्वभज्जा विमलमई मह खुड्कुए हियए ।  
 गुण-सील-विणयसारा जं दुलहा तारिसा नारी' ॥४८९४॥

इय एव माइबहुविहअट्टज्जाणाइं चित्तमाणस्स ।  
 कह कह वि अइक्कंतो दियहो मह नट्टहिययस्स ॥४८९५॥  
 तो हं तत्थुज्जाणे पढमं गंतूण रुक्खगहणंमि ।  
 परिसंठिओ अलक्खो निसाए पहरंमि वोलीणे ॥४८९६॥  
 अह खणमेत्तेणं चिय समागओ तक्कुरो घरं मुसिउं ।  
 रयण-मणि-कणयरित्थं सागरदत्तस्स सेट्ठिस्स ॥४८९७॥  
 आगंतूण पविट्ठो जत्थाहं तत्थ तरुगणनिकुंजे ।  
 संगोविऊण दब्बं कंतिमईसंगमासाए ॥४८९८॥  
 अह राया रइकेली कंतिमई वि य समं पविट्ठाइं ।  
 माहविलयाए मंडवतलंमि वच्चंति हिट्ठाइं ॥९८९९॥  
 तो पुव्वकमेणं चिय राया सह तीए कुसुमसयणंमि ।  
 थक्कइ रइकेली पुण उज्जाणवणंमि परियडइ ॥४९००॥  
 तो सा अहिरमिऊणं रायाणं पुव्ववन्नियकमेण ।  
 चोरसमीवं पत्ता तेण वि आलिगिया निविडं ॥४९०१॥  
 तं कणय-रयणरित्थं बाढं अवहरियमाणसो तीए ।  
 सब्बं चेव समप्पइ सिणेहसारं च सो भणइ ॥४९०२॥  
 'किं बाहिरेण इमिणा तुच्छसरूवेण दब्बनिवहेण ? ।  
 साहस-नेहविढत्तं जीयं पि हु मह तुहायत्तं' ॥४९०३॥  
 तो सा पहिड्ढिहियया समहियसंजायनेहसब्भावा ।  
 तेण समं अह अच्छइ वीसत्था तत्थ गहणंमि ॥४९०४॥  
 अन्नोन्नपवट्ठियगरुयनेहसब्भावपरवसमणाण ।  
 मच्चू विव सन्निहिओ वीसरिओ नरवई ताण ॥४९०५॥



अह कहवि परियडंतो रइकेली तं समागओ गहणं ।  
 निसुणइ ताणन्नोत्रं संचल्लं कीलमाण्ण ॥४९०६॥  
 अत्रायपयपयारो पासं गंतूण ताण जा नियइ ।  
 ता सो पेच्छइ चोरं कंतिमईरइसुहक्खणियं ॥४९०७॥  
 तो जायनिच्छओ सो तुरियं गंतूण कहइ रायस्स ।  
 राया असइहंतो ताण समीवं सयं एइ ॥४९०८॥  
 तं तह चेय नियच्छइ चोरं सह तीए दुडुनारीए ।  
 सो भणइ 'सच्चमेयं रइकेलि ! पयंपियं तुमए ॥४९०९॥  
 'ता निहुयं निसुणामो अन्नोन्नमिमिसि पत्थुयालावे ।  
 पच्छ जं कालोचियमिह होही तं करिस्सामि' ॥४९१०॥  
 अह निव्वत्तियसंभोयसोक्खवीसंभजायपणयाए ।  
 'पुट्ठो कंतिमईए चोरो 'कह एत्तियं दव्वं ?' ॥४९११॥  
 तो तेण वि कहियमिणं 'सागरदत्तस्स संतियं गहियं' ।  
 सा भणइ 'साहु विहियं जं मुट्ठो दुडुवणिओ सो' ॥४९१२॥  
 'किं किं ति?' भणइ चोरो कंतिमई भणइ सावओ सो खु ।  
 अच्चंतरूव-लावन्नसंगओ सयलगुणजुत्तो ॥४९१३॥  
 तो तेण परमनेहाणुरायरत्ता वि इच्छिया नाऽहं ।  
 सेवडयवयणपरनारिसोक्खउवभोगभीएण ॥४९१४॥  
 अवमाणिय म्हि जेणं पडिसेहंतेण मज्झ अहिलसियं ।  
 तस्स अवहरंतेण धणं उवयारो मह कओ तुमए' ॥४९१५॥  
 चोरो भणइ 'किराडो केत्तियमेत्तो व्व सो मह वराओ ।  
 अत्रो वि हु जो गरुओ तुह सत्तू तं पि मह कहसु ॥४९१६॥

सा भणइ कन्नमूले निहुयं ठाऊण 'तुज्झ जइ सत्ती ।  
 ता मह दइयं मारसु एयं चिय नरवइं बीयं ॥४९१७॥  
 तो हं तुह नीसंका जावज्जीवं भवामि पियभज्जा ।  
 एए दुवे वि सल्ले जइ कह वि तुमं समुद्धरसि ॥४९१८॥  
 सेसाण पुणो सुंदर ! बीहामि न वणिय-बंधणार्इण ।  
 परदारियाण तम्हा जइ सक्कसि ता इमं कुणसु' ॥४९१९॥  
 चोरो भणइ 'नरिंदं उट्टसु, दावेसु मज्झ, मारेमि ।  
 अन्नदिणे पुण तं चिय मारिस्सं बंधणं तुज्झ' ॥४९२०॥  
 सोऊण ताण वयणं रोसारुणलोघणो महाराओ ।  
 आभासइ रइकेलि किं अज्ज वि इह विलंबेमि ? ॥४९२१॥  
 तो कट्ठिऊण राया करवालं धाइ तस्स चोरस्स ।  
 दूराओ हक्कंतो कक्कसवयणोहिं तज्जइ य ॥४९२२॥  
 'रे पाव ! मओ एण्हिं न होसि मारेमि निच्छियं अज्ज ।  
 जइ अत्थि का वि सत्ती ता तुरियं संमुहो ठासु ॥४९२३॥  
 परदव्वहरणदोसेण किं च परजुवइसंगदोसेण ।  
 रायविरुद्धासेवी वज्झो सि तुमं न संदेहो' ॥४९२४॥  
 चोरो भणइ 'निसामसु सम्मं मह वयणमेग नरइंद ! ।  
 पच्छा तुह भुयदंडे रणकंडुं फेडइस्सामि ॥४९२५॥  
 सयलजयनिंदणीया दोसा दो च्चे(व) इह जयपसिद्धा ।  
 जं परधणावहारो जं च परत्थीण परिभोगो ॥४९२६॥  
 सच्चमिणं चोरो हं निंदियकम्मेण मारणिजो(ज्जो) म्हि ।  
 परदारिओ उ नरवर ! तुह रज्जे होइ किं पुज्जो ? ॥४९२७॥

एत्तियमेत्तेणं च्विय अहवा सामित्तणं सुहावेइ ।  
 जं चिय पडिहाइ मणे तं कीरइ भन्नए तं च ॥४९२८॥  
 नरनाह ! सरिसदोसत्तणेण समभूमिया दुवे अम्हे ।  
 को केण निग्गहिज्जइ अन्नोन्नं दोसदुद्धणं ? ॥४९२९॥  
 जहठाणपरिद्धावियअसेसवन्नासमो भवे राया ।  
 जणओ व्व जणवयाणं निसिद्धपरदार-चोराई ॥४९३०॥  
 वीसासमुवगयाणं सरणपवन्नाण दुब्बलाणं च ।  
 दुज्जणपरिभूयाणं परिताणं नरवई कुणइ ॥४९३१॥  
 जइ पुण स एव जायइ अम्हारिसलोयसरिसआयरणो ।  
 हद्धी निरासयाओ पयाओ ता कत्थ वच्चंतु ॥४९३२॥  
 सो चेय तुमं हुंतो खयदिणयरतेयरासिदुद्धरिसो ।  
 दुक्कज्जायरणेणं अम्हाण वि गोयरो एण्हि' ॥४९३३॥  
 इय एवमाइ विविहं चोरो जा नरवइ उवालहइ ।  
 ता धाविऊण पुरओ खित्तो रइकेलिणा धाओ ॥४९३४॥  
 रइकेलिणो पहारं चोरो दक्खत्तणेण वंचेउं ।  
 भमिऊण पुणो चोरो रइकेलिं हणइ छुरियाए ॥४९३५॥  
 दिठचोरपहारहओ रइकेली पडइ जाव निवपुरओ ।  
 ता दंडवासिएहिं उज्जाणं वेढियं सहसा ॥४९३६॥  
 एत्थंतरंमि चोरो रइकेलिं मारिऊण नरवइणो ।  
 पच्चारंतो दुक्को असिधेणुकरो महासुहडो ॥४९३७॥  
 एत्थंतरंमि तुरियं पधावमाणोहिं दंडवासीहिं ।  
 चोरो निवाडिऊणं पच्छा बाहूहिं सो बधो(द्धो) ॥४९३८॥

तो राया मं दट्ठुं मह समुहं इक्खित्तं अपारंतो ।  
 लज्जावणयमुहेणं विलक्खवयणं इमं भणइ ॥४९३९॥  
 'नीसामन्नसरूवा दुवे वि अम्हे असेसभुयणे वि ।  
 सुयणत्तणेण य तुमं अहं पुणो दुज्जणत्तेण ॥४९४०॥  
 ता संगमयपुरोहिय ! तक्करवयणेहिं चेव विलिओ हं ।  
 तुज्ज पुण दंसणेणं छारस्स व पुंजओ जाओ' ॥४९४१॥  
 अह चोरो वि हु नीओ नियगेहं दंडवासिपुरिसेहिं ।  
 उद्दालियं च सयलं तीए सयासाओ सेट्ठिघणं ॥४९४२॥  
 सा वि नियदोसभीया पयडीहुयसयलदुट्ठववहरणा ।  
 धिडुत्तणेण पत्ता पुणो वि तं चेव मह गेहं ॥४९४३॥  
 रइकेलिस्स करावइ नरनाहो तत्थ अग्गिसक्कारं ।  
 घेत्तूण ममं पच्छा निययावासं च संपत्तो ॥४९४४॥  
 तत्थ वि कंतिमईगयसकीयदुच्चरियसेवणाविसयं ।  
 राया बहुप्पयारं कहेइ चिरवइयरं मज्झ ॥४९४५॥  
 अहमवि जं जह दिट्ठं जं जह निसुयं जहाणुहूयं च ।  
 तं तह कहेमि सच्चं नरवइणो हिययसब्भावं ॥४९४६॥  
 तो कंतिमईदुच्चरियदंसणुप्पन्नपरमनिव्वेया ।  
 पच्छयावाणुगया दुवे नयामो य निसिसेसं ॥४९४७॥  
 तो पच्चूसे राया हक्कारिय दंडवासियं भणइ ।  
 'रे वावायह तुरियं तं चोरं दुट्ठववहरणं' ॥४९४८॥  
 तो आएसणांतरमणंतजणपयडमेव सो चोरो ।  
 कणवीरमुंडमालो तणमसिपविलित्तसव्वंगो ॥४९४९॥

छित्तरयधरियछतो विरसपव्व(व)ज्जंतडिंडिमो पुरओ ।  
 कयडिंभकलयलरवो आरूढो रासहस्सुवरिं ॥४९५०॥  
 नीसेसं चिय नयरिं चउक्क-तिय-चच्चरेसु रत्थासु ।  
 संझाए भामिऊणं नि(नी)ओ सो वज्झट्ठा(ठा)णंमि ॥४९५१॥  
 तो तस्स कंठदेसे निविडं दिढरज्जुपासयं दाउं ।  
 ओलंबिऊण बद्धो चिंचासाहाए पुरिसेहिं ॥४९५२॥  
 तो पण्हियाए उयरिं सयलसिलाजालवेढियद्धंते ।  
 छिंदंति उभयपाएसु टंकए तस्स चोरस्स ॥४९५३॥  
 तो ते पुरिसा भीसणमसाणभयतरललोयणा तुरियं ।  
 ओलंबिऊण चोरं सव्वे वि पुरिं अणुपविद्धा ॥४९५४॥  
 एत्थंतरंमि राया अहं च कोऊहलेण मह गेहं ।  
 कंतिमइचरियदंसणरसेण तत्थेव संपत्ता ॥४९५५॥  
 तो परियणेण कहियं 'एण्हिं चिय निग्गया नियगिहाओ' ।  
 तिस्साणुमग्गलग्गा अम्हे वि विणिग्गया बाहिं ॥४९५६॥  
 दिद्धा य बाहिरेणं मग्गेण मसाणमेव वच्चंती ।  
 पत्ता य सा खणेणं तं चिंचापायवं धिद्धा ॥४९५७॥  
 दिद्धो य तीए चोरो निविडीकयपासरुद्धगलसरणी ।  
 'हा पिययम ! हा वल्लह ! हा नाह !' इमं भणंतीए ॥४९५८॥  
 'जो मह कोमलभुयवल्लिवेढसंदाणिओ पुरा कंठो ।  
 सो दुड्डराइणा कह निट्ठुररज्जूए तुह बद्धो ? ॥४९५९॥  
 जइ सो न बंभणो मह अणिट्ठुभत्ता तुमं पडिखलंतो ।  
 ता तंमि हए राए न को वि तुह एरिसं काही' ॥४९६०॥

इय एवमाइ विविहं विलवंती रइणा मए वि सुया ।  
 अच्छमो पेक्खंता ववहरणं तीए(इ) निहुयंगा ॥४९६१॥  
 तो सा बहुमडयाणं कूडं काऊण तत्थ आरूढा ।  
 तं कंठगयप्पाणं, दरमउलियलौयणद्धंतं ॥४९६२॥  
 लंबंतपाणि-पायं वियणावसचडफुडंतसव्वंगं ।  
 आलिंगिऊण गाढं चुंबइ वयणांमि कंतिमई ॥४९६३॥  
 तो कड्डिऊण निसियं लोहमईकत्तियं महाधिद्धा ।  
 छिंदइ छणत्ति रज्जुं आलिंगइ तं च निवडंतं ॥४९६४॥  
 मेल्लइ महीए चोरं सीयलजलपवणसुत्थियं कुणइ ।  
 पच्चागयचेयन्नो पुरओ सो पेच्छए नारिं ॥४९६५॥  
 सा भणिया चोरेणं 'तुमए हं रक्खिओ इह मरंतो ।  
 ओलंबिओ अणाहो जइ न तुमं ता- कह जियंतो ?' ॥४९६६॥  
 तो सा तं घेत्तूणं चोरं अंतंमि सुंदरुज्जाणे ।  
 पविसइ निविडलयाहरगेहं उवभोगबुद्धीए ॥४९६७॥  
 तो नरवइणा सहिओ अहमवि तत्थेव सुंदरुज्जाणो ।  
 संपत्तो कोड्डेणं उज्जाणं दट्ठुमारद्धो ॥४९६८॥  
 अह तत्थ अयंडे च्चिय निक्कारणमेव पविसमाणेण ।  
 जाओ महापमोओ वियंभिओ धम्मववसाओ ॥४९६९॥  
 'किं किं ति महच्छरियं' मणभावं जाव तं वियप्पेमो ।  
 ता झत्ति मए दिट्ठो असोयतलसंठिओ साहू ॥४९७०॥  
 सो चेय मज्झ पुत्तो सिरधरपुत्तो ति आसि जो जेट्ठो ।  
 सो देवगुत्तनामा आयरिओ समणसंघजुओ ॥४९७१॥

सज्झाय-ज्ञाननिरओ विवज्जियासेसदोससंसग्गो ।  
 परमोहिनाणलोयणविन्नायतिलोयसब्भावो ॥४९७२॥  
 नीसेसभुयणदडुव्ववत्थुसीम व्व सो महासूरी ।  
 सललियलायण्णुज्जलजोण्हापव्वा(क्खा)लियदियंतो ॥४९७३॥  
 सयलकलागमकुसलो वि निकुलागमरओ महासत्तो ।  
 जो पढमजोव्वणो वि हु मयणवियारेहिं परिचत्तो ॥४९७४॥  
 जो परिहरियपरिग्गहसंगो वि हु तवसिरीए परियरिओ ।  
 चम्मट्टिमेत्तदेहो मोहमहामल्लुपडिमल्लो ॥४९७५॥  
 जो पयडलक्खणो वि हु रामासंगेण वज्जिओ निच्चं ।  
 पंचसमिओ वि रक्खियसुहुमेयरसत्तसंघाओ ॥४९७६॥  
 जो दंसणमित्तेण वि भव्वाणं जणंइ धम्मववसायं ।  
 आवहइ सुहं भावं विहडावइ कुमइवामोहं ॥४९७७॥  
 पयडइ विवेयदीवं हणइ कसाए पसंतयं कुणइ ।  
 निव्वावइ भव्वाणं ससि व्व संसारसंतावं ॥४९७८॥  
 तो राइणा मया वि य तं दट्ठुं मुणिवरं महावीरं ।  
 तक्खणमेत्तेणं चिय परिगलिओ पावपब्भारो ॥४९७९॥  
 एयं च पुणो सावय ! अणुहवसिद्धं न तीरए कहिउं ।  
 आणंद-बाह-पहरिस-पुलयाइगुणेहिं बोधव्वं ॥४९८०॥  
 कज्जाणुमाणओ च्चिय पयडमिणं रायपुत्त ! मह जायं ।  
 जो हं तहासरूवो मिच्छदि(दि)ट्ठी पुरा हुंतो ॥४९८१॥  
 नियजाइमउम्मत्तो बहुमन्नियवेयधम्मववहारो ।  
 गुणदेसी मच्छरिओ उवहसियजिणिंदधम्मो य ॥४९८२॥

सो तस्स दंसणेणं उवसंतमणो तथा [अ]हं जाओ ।  
 जह मज्झ तक्खणे च्चिय उल्लसिओ धम्मववसाओ ॥४९८३॥  
 जं आगमंमि सुव्वइ पयडफलं साहुदंसणं होइ ।  
 तं तइया मह सावय ! पच्चक्खं चेव संजायं ॥४९८४॥  
 एएण कारणेणं अणवरयं साहुदंसणं गुणिणो(णा)।  
 कायव्वमेव जम्हा सफलो च्चिय साहुसंजोगो ॥४९८५॥  
 जे निहयपावपसरा धम्मसम्म(म)द्धासिउत्तमसरीरा ।  
 ते दंसणेण मुणिणो हणंति पावं किमच्छरियं ? ॥४९८६॥  
 अम्हारिसा वि अविरइ-पमायवसवत्तिणो वि कूरप्पा ।  
 जं लद्धसाहुसंगा खवंति पावं निरवसेसं ॥४९८७॥  
 उल्लसइ सुहो भावो पयलं वच्चंति अट्ट-रोद्धां ।  
 भवनिव्वेओ जायइ विसिद्धमुणिदंसणगुणेण ॥४९८८॥  
 जइ पुण अनन्नचित्तो विसुद्धपरिणामसंजुओ असढो ।  
 ताण सयासे निसुणइ जिणवयणं किन्न ता सिद्धं ? ॥४९८९॥  
 तो सावय ! अन्नोन्नं आणंदपवाह-पुलयमंगेसु ।  
 दट्ठूण परमहिद्धा संपत्ता सूरिपासंमि ॥४९९०॥  
 तो परमभत्तिनिब्भरगलंतनयणंसुसित्तगत्तेहिं ।  
 पंचंगपणामेणं पणिवइओ दोहि वि मुणिंदो ॥४९९१॥  
 तेण वि अण्येयभवसयवणगहणदवानलो व्व मुणिवइणा ।  
 मोत्तूण ज्ञाणजोगं दिन्नो णे धम्मलाभो य ॥४९९२॥  
 तो तस्स चरणफंसणपवित्तवसुहायलंमि उवविद्धा ।  
 अणुवमसरीरसोहं निरिक्खिमो जाव तस्सेव ॥४९९३॥



तो मुणिवरेण भणियं 'कुसलं तुह चंदउत्तनरनाह ! ।  
 मा किंपि मणे झूरसु तुमं पि संगमय ! भज्जत्थे ॥४९९४॥  
 जीवाण भवावत्ते नियकम्मवसेण परियडंताणं ।  
 तं कज्जं संपज्जइ लज्जिज्जइ जं कहंतेहिं ॥४९९५॥  
 अन्नह चितइ जीवो कज्जं पुण अन्नहा समावडइ ।  
 जं चिंतंताण मणे जायइ गरुओ चमक्कारो ॥४९९६॥  
 सव्वन्नू(नुं) मोत्तूणं को भवपरमत्थवित्थरं मुणइ ? ।  
 वैधम्मिणो य अन्ने तमन्नहा संपवज्जंति ॥४९९७॥  
 कुसमयमोहियचित्ता अनायपरमत्थधम्मसब्भावा ।  
 अजहत्थं पि हु धम्मं जहत्थमिव ते पवज्जंति ॥४९९८॥  
 तो ताण सो कुधम्मो अणुचिन्नो वि हु अणेगभेएहिं ।  
 परलोए सो विहडइ कुसहाओ समरकाले व्व ॥४९९९॥  
 अपरिक्खगपहिणं हिरण्णबुद्धीए रीरिया गहिया ।  
 जह विहडइ पज्जंते तह जाणसु ते कुधम्मा वि ॥५०००॥  
 इह जे पवाहपडिया अपरिक्खयधम्मगाहगा होति ।  
 पावंति न तस्स फलं तुम्हे च्चिय एत्थ दिट्ठंतो' ॥५००१॥  
 तो नरवइणा भणियं 'कहमम्हे दो वि एत्थ दिट्ठंतो ।  
 काऊण करुणभावं तं साहह अम्ह नीसेसं' ॥५००२॥  
 तो भणइ देवगुत्तो 'नरिंद ! जइ तुम्ह कोउयं अत्थि ।  
 तो सावहाणचित्ता आयन्नह एस साहेमि ॥५००३॥  
 इह वाराणसिनयरीए आसी राया महिंदसीहो त्ति ।  
 तस्स पहाणा भज्जा नामेणं आसि मयणसिरी ॥५००४॥

१. पित्तल ॥

सो राया तीए समं भुंजंतो अणुवमे परमभोए ।  
 देवो व देवलोए गयं पि कालं न याणेइ ॥५००५॥  
 तस्सासि परमपुज्जो पुरोहिओ नाम विण्हुमित्तो त्ति ।  
 सयलेसु वि कज्जेसुं पमाणभूओ नरिंदस्स ॥५००६॥  
 तस्स कणिद्धो भाया नामेणं अत्थि अग्गिमित्तो त्ति ।  
 लावन्न-रूव-जोव्वण-सोहग्गुणाण आवासो ॥५००७॥  
 जयदेवी-नामेणं परिणीया तेण विण्हुमित्तेण ।  
 बीएण वसंतसिरी परिणीया अग्गिमित्तेण ॥५००८॥  
 ते दो वि वेयवन्नियधम्माणुद्धणसेवणानिरया ।  
 अच्छंति जहासोकखं महिंदसीहस्स गुरवो व्व ॥५००९॥  
 भणिओ य विण्हुमित्तो नरवइणा अन्नया दिणे एवं ।  
 'मह पासं न खणं पि हु मोत्तव्वं एस तुह नियमो ॥५०१०॥  
 मेहाण व उद्धणं अतक्कियं होइ रज्जकज्जाण ।  
 ता इय तुह विवरोकखे केण समं संपहारेहि ? ॥५०११॥  
 एसो च्चिय तुह भाया मह गेहे कुणसु संतियम्माइं ।  
 अंतउरे वि एसो निव्वत्तउ सव्वकज्जाइं' ॥५०१२॥  
 तो 'एवं' ति पभणिउं निरूविओ तेण अग्गिमित्तो सो ।  
 निययपुरोहियठाणे मंतिपए अप्पणा जाओ ॥५०१३॥  
 एवं च विण्हुमित्तो मंती नीसेसमंतिवग्गस्स ।  
 नियबुद्धिपहावेणं विहिओ सो राइणा जेद्धो ॥५०१४॥  
 इयरो वि अग्गिमित्तो पुरोहियाणं च जाइं कज्जाइं ।  
 ताइं कुणंतो अच्छइ नरिंदअंतेउरगिहेसु ॥५०१५॥

अणवरयं विय दंसण-संभासण-हास-गोट्टिमाईहिं ।  
 अभिगमणीएहिं तहा जोव्वण-लावन्नरूवेहिं ॥५०१६॥  
 समुइन्नतहाविहकम्मपरिणईए य अग्गिमित्तमि ।  
 अणुरत्ता मयणसिरी तेण समं भुंजए भोए ॥५०१७॥  
 अह अन्नदिणे दिट्ठो नरिंदसेज्जाए मयणसिरिसहिओ ।  
 दासीए अग्गिमित्तो जालगवक्खेण निहुयाए ॥५०१८॥  
 तो कहियं नरवइणो तीए गंतूण तन्निउत्ताए ।  
 गंभीरमणो सो विय अवहीरइ तीए(इ) तं वयणं ॥५०१९॥  
 इय एवं अणवरयं सा दासी ताण चेड्डियं कहइ ।  
 लज्जाए विण्हुमित्तस्स नरवई किं पि न भणेइ ॥५०२०॥  
 तो कंचुइणा भणिओ राया 'किं देव ! वंभणस्स तुमं ।  
 जाणंतो वि सरूवं उवेक्खसे अइसयविरुद्धं ?' ॥५०२१॥  
 तो तव्वयणं राया सोउं संजायपच्चओ भणइ ।  
 'सो एइ जत्थ समए तं समयं मज्झ साहेसु' ॥५०२२॥  
 अह अन्नदिणे राया गोसे कयसयलगोसकरणीओ ।  
 जालगवक्खस्सुवरिं उवविट्ठो तुच्छपरिवारो ॥५०२३॥  
 अह विण्हुमित्तमंती समागओ अग्गिमित्तपरियरिओ ।  
 मंतुच्चारपुरस्सरमासीसं देइ रायस्स ॥५०२४॥  
 कयसमुचिओवयारा उवविट्ठो दो वि रायपासंमि ।  
 तक्कालसमुचिएणं चिडंति विणोयकम्मेण ॥५०२५॥  
 एत्थंतरंमि दिट्ठो गवक्खपरिसंठिएण नरवइणा ।  
 चत्तारो मुणिवसहा परिसक्कणिए य वच्चंता ॥५०२६॥

ते राया दट्टूणं तवसुसिए मलखरंटिए साहू ।  
 निप्पडिकम्मसरीरे पसंतचित्ते जियकसाए ॥५०२७॥  
 परिसडियमलिणचीवर-कंबलपच्छाइए भवविरत्ते ।  
 जुगमित्तखित्तदिट्ठी पसंसए परमसंविग्गो ॥५०२८॥  
 'धन्ना एए साहू संसारविरत्तमाणसा निच्चं ।  
 मोक्खत्थमुज्जमंता चरंति जं घोरतवचरणं' ॥५०२९॥  
 तं नरवरिंदवयणं अणुकूलंतेण विण्हुमित्तेणं ।  
 सेवाधम्मठिएणं 'एवं' ति पसंसिया तेण ॥५०३०॥  
 तो तेण साणुबंधं उवज्जियं तक्खणेण सुहकम्मं ।  
 एत्तियमेत्तेणं चिय मुणीण अणुमोयणफलेण ॥५०३१॥  
 न परं(नवरं?) पसंसमाणो अणुमन्नंतो य साहुगुणनिवहं ।  
 पावइ पावविणासं परलोए बोहिलाभं च ॥५०३२॥  
 तो भणइ अग्गित्तो 'देव ! एयाण सुद्धजाईण ।  
 दंसणमवि पच्चूसे उचियं(सेऽणुचियं?) दूरे उण पसंसं(सा?)' ॥५०३३॥  
 तो मुणिवरिंददूसणनिव्वत्तियअसुहकम्मबंधेण ।  
 तेणावि दुक्खमसमं उवज्जियं अग्गित्तेण ॥५०३४॥  
 गुणमच्छरेण पावा जहुत्तगुणभूसिए महासाहू ।  
 जे निंदंति सगव्वा पडंति ते दुक्खजोणीसु ॥५०३५॥  
 जम्मंतरे वि ते च्चिय सजाइगव्वेण नीयजाईसु ।  
 जायंति जहन्नगुणा भवंतरे दुक्खहेऊ य ॥५०३६॥  
 तो राया सोऊणं वयणमिणं विण्हु-अग्गित्ताणं ।  
 अक्कूसिउं कणिडुं पसंसए विण्हुमित्तं पि ॥५०३७॥

तो राया उवविद्धो अत्थाणे मिलियमंति-सामंते ।  
 इयरो वि अग्गिमित्तो मयणसिरीसत्रिहिं पत्तो ॥५०३८॥  
 परिणीयमिव कलत्तं हत्थे घेत्तूण जाइ वासहरं ।  
 रायसेज्जाए गंतुं अभिरमइ जहासुहं देविं ॥५०३९॥  
 एत्थंतरंमि दट्ठुं तहाविहं कंचुई निवविरुद्धं ।  
 गंतूण तक्खण च्विय साहइ रायाहिरायस्स ॥५०४०॥  
 मोत्तूण तं तह च्विय अत्थाणं नरवई परमकुद्धो ।  
 संपत्तो वासहरं पेच्छइ सव्वं गवक्खेण ॥५०४१॥  
 तो मुणिदूसणकम्मं तक्खणमेत्तेण समुइयं तस्स ।  
 इहलोए वि मुणीणं फलइ दुगुंछा न संदेहो ॥५०४२॥  
 तो दिट्ठपायपहारपहयकवाडेण राइणा तुरियं ।  
 विसिऊण अग्गिमित्तो भणिओ सोल्लुंइवयणेहिं ॥५०४३॥  
 'रे अग्गिमित्त ! सुद्धा महामुणी जइ अदंसणीया ते ।  
 ता किं परनारिरया दियाइणो होंति द्ढव्वा ? ॥५०४४॥  
 जइ ताण नो पसंसा कायव्वा परमबंधारीण ।  
 तुम्हारिसाण ता किं एयसरूवाण कायव्वा ?' ॥५०४५॥  
 इय एवमाइ बहुयं निब्भच्छिय कक्कुसेहिं वयणेहिं ।  
 केसेसु तओ घेत्तुं नीओ अत्थाणमज्झंमि ॥५०४६॥  
 तो नरवइणा सव्वं आमूलं सव्वलोयपच्चक्खं ।  
 कहियं तस्स सरूवं पुण भणिओ विण्हुमित्तो वि ॥५०४७॥  
 'जाणंतो दुच्चरियं कणिट्ठनियभाउणो जणविरुद्धं ।  
 जं न निवारसि पायं तं मन्ने सम्मयं तुज्झ' ॥५०४८॥

तो विण्हुमित्तवरमंतिचित्तरक्खं मणे धरंतेण ।  
 आणत्तो निव्विसओ अग्गिमित्तो नरिंदेण ॥५०४९॥  
 मयणासिरिं पि नरिंदो संपेसइ माउगेहमइकुद्धो ।  
 तेणेव निमित्तेणं विसएसु परंमुहो जाओ ॥५०५०॥  
 ताणं चेव मुणीणं पासं गंतूण मुणइ जिणधम्मं ।  
 रणसीहनामध्येयं नियपुत्तं ठवेइ रज्जंमि ॥५०५१॥  
 गेण्हइ विसुद्धचित्तो पव्वज्जं पालए निरइयारं ।  
 कयसंलेहणकम्मो मरिउं वेमाणिओ जाओ ॥५०५२॥  
 इयरो वि अग्गिमित्तो सकम्मपरिणामओ मरेऊणं ।  
 मुणिनिंदापावेणं असुइंमि किमी समुप्पन्नो ॥५०५३॥  
 ततो वि सुणयजोणिं तओ सपागो पुणो अमेज्झकिमी ।  
 गड्डासूयरओ पुण पुणो वि चंडालजम्मंमि ॥५०५४॥  
 पुण सुणयभवे कम्मं खविरुणं एत्थ चेव नयरीए ।  
 गणियाए कुच्छिसिं उववन्नो चोरबीएण ॥५०५५॥  
 संवड्ढिओ कमेणं संपत्तो जोव्वणं परमरम्मं ।  
 एसो नरिंद ! चोरो जेण तुमं वहिउमाढत्तो ॥५०५६॥  
 इयरो वि विण्हुमित्तो नरिंदसंगेण भइओ जाओ ।  
 नामेण चंडसम्मं जणइ सुयं विजयदेवीए ॥५०५७॥  
 आउक्खएण सो च्चिय मरिऊणं सुकयकम्मजोएण ।  
 तुममेव समुप्पन्नो महिंदसीहस्स सुयपुत्तो ॥५०५८॥  
 नामेण चंदउत्तो जो पुण तुह आसि भारिया पुत्वि ।  
 नामेणं जयदेवी सा कंतिमई समुप्पन्ना ॥५०५९॥

पुव्वभवब्भासेणं तुहाणुरत्ता नरिंद ! एसा वि ।  
 पुव्वभवदेवरे च्चिय तहेव चोरे वि अणुलग्गा ॥५०६०॥  
 जुवईउ नाम सावय ! निरुवायाओ विसस्स गंठीओ ।  
 मयणानलुब्भवाओ जालाओ व दड्डलोयाओ ॥५०६१॥  
 नरयदुवारुग्घाडणकुंचियकुडिलाओ सगनयरंमि ।  
 पविसंताण निरुंभणभुयग्गलाओ व्व जीवाणं ॥५०६२॥  
 संपुन्नधम्मसहरकिण्हतिहीओ व्व खयनिमित्ताओ ।  
 विविहवसणंकुराणं पादुब्भवकंदलीओ व्व ॥५०६३॥  
 जणनयणमोहणीओ भुयणस्स वि जणियतिव्वतण्हाओ ।  
 परमत्थदुहफलाओ इमाओ माइण्हियाउ व्व ॥५०६४॥  
 अणुरत्ताओ दूरं दीसंति नराण जणियहरिसाओ ।  
 जा सुयणमालियाओ व दरवलियाओ विरज्जंति ॥५०६५॥  
 बहुकूडकवड-माया-पवंच-परवंचणाइदोसाण ।  
 एयाओ चिय पायं निवासभूमीओ जुवइ(ई)ओ ॥५०६६॥  
 एयासु जे अणुलग्गा नावासु व च्छिन्नसव्वबंधासु ।  
 बुड्ढंति ते अणाहा संसारमहासमुदंमि ॥५०६७॥  
 वीसमह वरं भीसणभुयंगप्फारप्फणाण छायासु ।  
 न उणो दवग्गिदीवयस(सा?)हासु व दुड्डजुयईसु ॥५०६८॥  
 कह ताण जीवियासा नराण नारीपसत्तचित्ताण ।  
 जा जणणि-जणयदिन्नं परिणीयपइं पि मारेइ ? ॥५०६९॥  
 तं किं पि महासाहसमचित्तीयं कुणंति एयाओ ।  
 जं गरुयसाहसा वि हु भएण कंपंति चिंतंता ॥५०७०॥

पर(रि)णीयपइं अणुरत्तमाणसं दिन्नविहववित्थारं ।  
 परिहरइ विरत्तमणा अन्नस्स कए महिद्धिस्स ॥५०७१॥  
 तं पि महारिद्धिल्लं परिचयइ अणाहरंकरेसंमि ।  
 तह वि एवंविहाण मूढा रज्जंति नारीण ॥५०७२॥  
 भावंति न परमत्थं खणसुहकज्जेण नवर मुज्झंति ।  
 रागंधा कावुरिसा पेच्छंति न आयइं मूढा ॥५०७३॥  
 न गणंति गुरुवएसं जहत्थमवि पवयणं पदूसंति ।  
 एमेव गयनिमीलं काऊणं तहेव सीयंति ॥५०७४॥  
 तो ते असमत्था इव सत्ताऽवट्टंभवज्जिया दीणा ।  
 सीह व्व मोहपंजरमज्झगया तह विसूरंति ॥५०७५॥  
 दुक्कज्जायरणसमज्जिएण तो ते सयंकएणेव ।  
 पावेण महानरए निवडंति अणंतदुक्खंमि ॥५०७६॥  
 कह तुच्छसोक्खकंखाए जाणमाणेहिं इममकज्जं ति ।  
 अप्पा दुहंमि खिप्पइ बहुसागरसंखदुत्तारे' ॥५०७७॥  
 इय मुणिवयणं सोउं समहियसंसारजायवेरग्गा ।  
 जा चिंतेमो तत्तं ता सहसा आगओ चोरो ॥५०७८॥  
 मुणिणो पयाहिणतिगं काऊणं भवविरत्तचित्तो य ।  
 पाएसु पडइ निब्भरभत्तिवसुव्वूढरोमंचो ॥५०७९॥  
 'जय अन्नाणदिवायर ! जय जय निम्महियमोहतिमिरोह ! ।  
 जय सव्वसत्तपयडियसंसारसरूववित्थार !' ॥५०८०॥  
 इय थुणिऊण मुणिंदं उवविट्ठो अम्ह नाइदूरम्मि ।  
 सिरविरइयंजलिवुडो सो चोरो भणिउमाढत्तो ॥५०८१॥



'भयवं ! जं जह दिट्ठं तुमए अइविमलनाणनयणेण ।  
 तं तह मए असेसं जाईसरणेण सच्चवियं ॥५०८२॥  
 सो च्वेय अग्गिमित्तो सुसाहुजणनिदि(द)ओ अहं पावो ।  
 एसो च्विय मह भाया विण्हुमित्तो महाराओ ॥५०८३॥  
 एसा वि य जयदेवी कंतिमई इह भवे समुप्पन्ना ।  
 जिस्सा कए इमे च्विय दो वि मए वहिउमाढत्ता ॥५०८४॥  
 हद्धी जुयइनिमित्तं अयाणमाणेण पावकम्मेण ।  
 कह मारिउमाढत्तो जेड्ढो भाया य नत्तु य ? ॥५०८५॥  
 कह नाम वंदणीयं जणणिं पिव जेड्ढभायरकलत्तं ।  
 भुंजामि महापावो अन्नाणविमोहिओ मूढो ॥५०८६॥  
 कह तेत्तियमेत्तस्स वि मुणिनिंदामेत्तदुकयकम्मस्स ।  
 जस्सेत्तिओ विवाओ पच्चक्खो मज्झ संजाओ ॥५०८७॥  
 किमि-सुणय-सपाग-किमी-सूयर-चंडाल-सुणय-चोरेसु ।  
 आइमवंभणजम्मे अइविसमं पावियं दुक्खं' ॥५०८८॥  
 तो नरवय(इ)णो य तहा कंतिमईए य तक्खणं जायं ।  
 पुणरुत्तचोरवन्नियवइयरओ जाइसरणं पि ॥५०८९॥  
 तो तिण्हं पि हु ताणं जाईसरणेण जायसंवाए ।  
 'अवितहवाइ' त्ति ममं मुणिवयणे निच्छओ जाओ ॥५०९०॥  
 'जह एस मुणी नाणेण वइयरं जाणए इमाणं पि ।  
 मह जणणी-जणयाण वि वइयरमेसो तहा मुणिही' ॥५०९१॥  
 इय चिंतिऊण भणिओ मए मुणी 'जयपईव ! मुणिनाह ! ।  
 मह पुव्वमासि जणओ चंडसम्मो त्ति नामेण ॥५०९२॥

जणणी य मज्झ भत्तारचरणभत्ता महासई आसि ।  
 सोमसिरी नामेणं निम्मलदियवंससंभूया ॥५०९३॥  
 दोन्नि वि समचित्ताइं दोन्नि वि अन्नोन्नबद्धनेहाइं ।  
 दोन्नि वि वेयपयासियधम्माणुद्वाणनिरयाइं ॥५०९४॥  
 तो उवरयंमि ताए विलवंतं अगणिऊण मं माया ।  
 जम्मंतरे वि जोगो मह होउ पिएण इय बुद्धी ॥५०९५॥  
 जस्सिं चय चियाए पक्खित्तो मह पिया तहिं चवं ।  
 अप्पाणं खिविऊणं कयसंकप्पा मया त्तथ ॥५०९६॥  
 ता कहसु मज्झ भयवं ! जणओ जणणी य कत्थ जायाइं ? ।  
 चिद्धंति कहं ? किं वा परोप्परं ताइं मिलियाइं ? ॥५०९७॥  
 तो भयवया असेसं दोण्हं पि हु ताण जणणि-जणयाण ।  
 कोलुंदुर-मज्जारी-अहि-नउलाईसु जम्मेसु ॥५०९८॥  
 जं जं वित्तं जं जं च पावियं तेहिं कम्मवसगेहिं ।  
 जं च कयं ताण मए नीसेसं वित्थरसमेयं ॥५०९९॥  
 तं तेण ताव कहियं जा 'पुत्तो अहं तुह महाभाग ! ।  
 सिरधरनामा साहू बीओ गंगाधरो सो वि ॥५१००॥  
 इह चेव माहविलयामंडवतलफासुयाए भूमीए ।  
 झाणट्टिओ महप्पा चिद्धइ कम्मक्खउजु(ज्जु)त्तो' ॥५१०१॥  
 तो तं मुणिंदकहियं जणणी-जणयाण वइयरमसेसं ।  
 सोऊण मणे जाक्षो अहिययरो मज्झ संवेओ ॥५१०२॥  
 पजलंतो इव दिद्धो संसारो तब्भयं च संजायं ।  
 'कह वा नित्थरियव्वं बहुपाणिवहुब्भवं पावं ?' ॥५१०३॥

इय भयतरलियहियओ सकीयदुच्चरियजायअणुतावो ।  
 नमिऊण सायरमहं मुणिनाहं भणिउमाढत्तो ॥५१०४॥  
 'भयवं ! जं जह वित्तं पच्चक्खं तं तहा असेसं पि ।  
 पयडंतेण फुडत्थं छिन्नो मह संसओ सव्वो ॥५१०५॥  
 पढमं पियामहाणं सरूवमच्चुज्जलम्मि जिणधम्मे ।  
 दूसग-अदूसगाणं दोस-गुणुब्भावणं कहियं ॥५१०६॥  
 तथणंतरं च नारीसरूवकहणेण अणुभवपसिद्धो ।  
 मह तिव्वयरो जणिओ विसयविराओ तए नाह ! ॥५१०७॥  
 संसारसुहाणं किर मूलं एयाओ होंति जुयईओ ।  
 एयाण कए सयलं जयं पि इह दुत्थियं होइ ॥५१०८॥  
 ताणं च पुण सरूवं चिंतिज्जंतं पि किर विवेईण ।  
 भीमं भयमुप्पायइ पच्चक्खं जं मए दिट्ठं ॥५१०९॥  
 परजुयइपसत्ताणं तव्विरत्ताण होंति दोस-गुणा ।  
 ते तक्कर-सागरदत्तपयडदिट्ठंतओ भणिया ॥५११०॥  
 मिच्छत्तमोहियाओ मरंति नियभत्तुणा समं जाओ ।  
 तं ताण निप्फलं चिय मरणं पयडीकयं तुमए ॥५१११॥  
 सव्वे भिन्ना जीवा परोप्परं भिन्नकम्मसंजोया ।  
 कह ते समं मरंता वि संगमं एत्थ पावंति ? ॥५११२॥  
 तह वेउत्तो धम्मो अणुट्ठिओ तेण मज्झ वयणेण ।  
 मरिऊण जहा जाओ सगिहे कोलुंदुरत्तेण ॥५११३॥  
 उवमाठाणं लोए मह माउ-पिऊण आसि जो नेहो ।  
 ताइं चिय अन्नोन्नं तिरियत्तभवंमि भंक्खंति ॥५११४॥

अच्चब्भुयो पहावो सुयमेत्तस्स वि जिणिंदधम्मस्स ।  
 जं पयइविरुद्धा वि अहि-नउला नवर संबुद्धा ॥५११५॥  
 ता जिणधम्मं सोउं दयापहाणं पसंतचित्ता ते ।  
 अकयाणुद्धाणा वि हु सुमाणुसत्तंमि संजाया ॥५११६॥  
 होंति नियकम्मवसगा पुत्ता पुत्तस्स जणणि-जणया वि ।  
 अहमेव एत्थ पयडो दिट्ठंतो नवर संजाओ ॥५११७॥  
 पाणिवहमहापावं काऊण अहं सुदुत्थिओ जाओ ।  
 इह, परलोए[य] पुण(णो), वसियव्वं दूसहे नरए ॥५११८॥  
 एयाइं पुणो तिन्नि वि सिरधर-गंगाधरा य विमलमई ।  
 जायाइं सुत्थियाइं धम्मपहावेण सव्वत्थ ॥५११९॥  
 अहयं तु अकयधम्मो कुधम्मसत्थोवएससंमूढो ।  
 पावानलसंतत्तो भमामि वायाहयदलं व ॥५१२०॥  
 ता नाह ! कहं होही बहुपाणिवहुभवस्स पावस्स ।  
 मह विच्छेओ संपइ घोरमहानरयहेउस्स ? ॥५१२१॥  
 तह अवितहजिणसासण-दूसणजणियस्स दुकयकम्मस्स ।  
 मन्ने अणुभवियव्वं फलमसुहं नीयजोणीसु' ॥५१२२॥  
 तो भणइ मुणी 'सुंदर ! बद्धं नरयाउयं तए घोरं ।  
 बहुजीववहेहि कयं जिणधम्मपओसजणियं च ॥५१२३॥  
 'मरसु'त्ति भणियमेत्ते जीवो अज्जिणइ दारुणं नरयं ।  
 निहयंमि पुणो जीवे करडिओ तस्स सो निययं' ॥५१२४॥  
 तो मुणिवयणं सोउं संभरिऊणं च पुव्वदुच्चरियं ।  
 बहुसज्झस-भयवेविरसव्वंगावयवनिवहेण ॥५१२५॥

भणिओ मए मुणिंदो खलियक्खरविरसवयणविन्नासं ।  
 'हा रक्ख रक्ख सामिय ! एसो सरणागओ तुम्ह ॥५१२६॥  
 जइ तुह चरणसरोरुहसरणलीणा वि नाह ! सीयंति ।  
 तो ताण तिहुयणे वि हु को अन्नो कुणइ परिताणं?' ॥५१२७॥  
 मुणिणा भणियं 'सावय ! मा एवं भणसु सुणसु मह वयणं ।  
 जं जेण कयं कम्मं अणुहवियव्वं तयं तेण ॥५१२८॥  
 चिड्डुअ अन्नो दूरे पहवंति पुरंदराइणो वि नो एत्थ ।  
 ताण वि कम्मवसाणं नत्थि परित्तावि(य)णो भुयणे ॥५१२९॥  
 चंदो वि रवी कहमवि परियत्तइ ससहरो रवित्तेण ।  
 कम्मं पुराकयं पुण को किर परियत्तिउं तरइ ? ॥५१३०॥  
 केण वि सामत्थेणं परिवत्तिज्जइ तिलोयपरिवाडी ।  
 नियकम्मपरावत्तणकज्जे विहडंति सत्तीओ ॥५१३१॥  
 तं नत्थि एत्थ भुयणे सिज्जइ जं किर न दुक्करतवेण ।  
 परकम्मनिराकरणे महातवस्सी वि असमत्थो ॥५१३२॥  
 तम्हा जं जेण कयं सुहासुहं तव्विहेहिं जोएहिं ।  
 सयमेव तेण तं चिय अणुहवियव्वं न संदेहो' ॥५१३३॥  
 तो पुण मए मुणिंदो भणिओ 'कह एरिसं महापावं ।  
 भयवं नित्थरियव्वं ? एत्थ उवायं समाइससु ' ॥५१३४॥  
 तो भणइ मुणिवरिंदो 'एयं पुण जुत्तिसंगयं वयणं ।  
 जं पुव्वदुक्कडाणं पुच्छसि किर उवसमोवायं ॥५१३५॥  
 ता सुणसु एगचित्तो कहेमि दुच्चरियउवसमोवायं ।  
 जमणंता काऊणं पत्ता अयरामरं ठाणं ॥५१३६॥

इह पुव्वदुक्कडेसुं अणुतावो जस्स अत्थि सो जोगो(ग्गो) ।  
 दिढबद्धं पि हु विहडइ पच्छयावेण दुक्कम्मं ॥५१३७॥  
 एसो पुव्वभवंतरसमज्जियाणंतकिडुकम्मोहं ।  
 अग्गिकणो व्व घणिंघणपब्भारं डहइ वड्ढंतो ॥५१३८॥  
 एसो हत्थालंबो नरयमहाकूवनिवडमाणण ।  
 एसो अजोग्गाणं पि हु उत्तरगुणजोग्गयं कुणइ ॥५१३९॥  
 कुणइ अ कम्मदुगंछं मोहं निम्महइ जणइ मणसुद्धिं ।  
 वियरइ सम्मन्नाणं पयडइ संसारवेरगं ॥५१४०॥  
 जो भवविरत्तचित्तो सो च्चिय जोगो गुरूवएसाण ।  
 वेरग्गविरहियाणं हिओवएसो न लग्गंति ॥५१४१॥  
 तुम्हारिसाण तम्हा पुव्विं मिच्छत्तमोहियमणाण ।  
 एसो पच्छयावो आसंघइ उज्जलगुणोहं ॥५१४२॥  
 ता भो ! भणामि सावय ! परमोवायं जिणेहि पण्णत्तं ।  
 एगंतसाहयं जं सत्तावड्ढंभसज्झं च ॥५१४३॥  
 इह चयसु ताव पढमं मिच्छत्तमसग्गहाण जं होउं ।  
 अंगीकरेसु सावय ! सम्मत्तं मोक्खतरुबीयं ॥५१४४॥  
 जं एस परमधम्मो दुविहो वि हु जइ-गिहत्थमेएण ।  
 सम्मत्तसंजुओ च्चिय कम्मक्खयकारणं होइ ॥५१४५॥  
 मिच्छत्तमहामोहंधयारमूढाण एत्थ जीवाण ।  
 पुत्तेहि कह व जायइ दुलहो सम्मत्तपरिणामो ॥५१४६॥  
 रागदोसमलड्ढं सव्वपयत्तेण चित्तमाणिक्कं ।  
 सोहु(ह)सु संपइ निम्मलविवेयजलदव्वजोएहिं ॥५१४७॥

अन्नाणपवणजणिया हिययसमुद्दे वियप्पकल्लोला ।  
 अणवरयं वड्ढंता निरुंभणीया पयत्तेण ॥५१४८॥  
 एए इंदियचोरा दुनिग्गहा ते वि निग्गहेयव्वा ।  
 अविणिग्गहिया जम्हा मुसंति परलोयंसपत्तिं ॥५१४९॥  
 सव्वेसु वि सत्तेसु समभावं सव्वहा वि अब्भससु ।  
 इड्ढाणिड्ढवियप्पो न जईहिं कयाइ कायव्वो ॥५१५०॥  
 सावज्जजोगपरिवज्जणेण निरवज्जजोगकरणेण ।  
 अप्पा नणु कायव्वो निल्लेवो भोक्खकंखीहिं ॥५१५१॥  
 दुद्धरपंचमहव्वयपरिपालणतग्गएक्कचित्तेण ।  
 नियजीवसंसए वि हु न ताण मालिन्नयं कुज्जा ॥५१५२॥  
 इरियाइयाओ सम्मं समिइ(ई)ओ पंच पालियव्वाओ ।  
 गुत्तीहिं गोवियव्वो सब्भितर-बाहिरो अप्पा ॥५१५३॥  
 हियए विचिंतिउं जो न जायइ दीणेहिं दुक्करत्तणओ ।  
 तेण तवेणं अप्पा तवियव्वो बारसविहेण ॥५१५४॥  
 कायव्वाओ विहीए(इ) मासाईयाओ विविहपडिमाओ ।  
 अप्पा हु सोसियव्वो दव्वाइअभिग्गहेहिं पि ॥५१५५॥  
 अण्हाणं भूसयणं निप्पडिकम्मत्तणं च देहस्स ।  
 सिरकुंचसमुल्लुंचणमणवरयं होइ कायव्वं ॥५१५६॥  
 अइदुसहा सहियव्वा बावीस परीसहा महाघोरा ।  
 दिव्वायिणो य सम्मं उवसग्गा एत्थ सोढव्वा ॥५१५७॥  
 लद्धाए नेय हरिसो न विसाओ तह अलद्धभिक्खाए ।  
 लद्धावलद्धविच्चीए पोसियव्वो निओ देहो ॥५१५८॥

किं बहुणा ? अद्वारससीलंगसहस्सगुरुमहाभारो ।  
 वोढव्वो अणवरयं बाढमविसं(स्सं)तचित्तेण ॥५१५९॥  
 इय एस मए कहिओ अणंतभवजणियपावकम्माण ।  
 निम्महणो किं पुण ते इह जम्मकयाण नो होही ? ॥५१६०॥  
 ता जइ सच्चं सावय ! निव्विन्नो दुहफलाण पावाण ।  
 एणण उवाएणं ता चिंतसु अत्तणो मोक्खं ॥५१६१॥  
 एणण उवाएणं जहुत्तविहिणा पउंजिएणेह ।  
 निहयनरयाउओ पुण पाविह(हि)सि कमेण निव्वाणं ॥५१६२॥  
 एयस्स तिहुयणे वि हु पुव्व(व्यु)त्तविसुद्धसाहुधम्मस्स ।  
 अउरुव्वो सामत्थो अवाय-मण-गोयरो जम्हा ॥५१६३॥  
 जं चिंतिउं न तीरए मणोरहाणं अगोयरे जं च ।  
 तं एस साहुधम्मो साहइ जं जयअसज्झं पि ॥५१६४॥  
 जइ नरयभउब्भंतो अहवा जइ सिद्धिसोक्खकंखी य ।  
 ता साहुधम्मुवाए बहुदुक्खहरे समुज्जमसु' ॥५१६५॥  
 तो मुणिवयणाणंतरमसरिसहरिसुल्लसंतपुलएहिं • ।  
 नमिऊण मुणी भणिओ 'इच्छामो तुम्ह अणुसट्ठिं ॥५१६६॥  
 भणिओ मए मुणिंदो एसो च्विय भव-भवंतरकयाण ।  
 पावाण छेयकारी अणुचरियव्वो मए धम्मो' ॥५१६७॥  
 तो नरवइणा भणियं 'भयवं ! भवसायरे निबुडुंतं ।  
 मं उद्धरसु महायस ! सुसाहुदिकखापयाणेण' ॥५१६८॥  
 चोरेण वि मुणिनाहो पसंतचित्तेण पभणिओ एवं ।  
 'भयवं ! एयावत्थासमुचियमिच्छामि आएसं' ॥५१६९॥



तो भुणिवरेण भणियं 'देवाणुपियाइं ! चयह पडिबंधं ।  
 तुम्ह मणवंछियत्थे एस अहं सम्ममुजु(ज्जु)त्तो' ॥५१७०॥  
 तो मुणिणा पुण भणिओ चोरो 'मा कुणसु किं पि मणखेयं ।  
 निहयपयजुयलटंको एक्कदिणं आउयं तुज्झ ॥५१७१॥  
 तो अणसणेण सम्मं पंचनमोक्कारमेव ज्ञायंतो ।  
 कयसव्वजंतुमेत्ती पंडियमरणेण मरसु तुमं' ॥५१७२॥  
 तो सो मुणिंदवयणं 'तह'त्ति पडिवज्जिऊण सुद्धप्पा ।  
 कयपाणपरिच्चाओ सोहम्मे सुरवरो जाओ ॥५१७३॥  
 तो राया कयखेओ कारावइ तस्स अग्गिसक्कारं ।  
 पुण वंदिऊण साहुं दोहिं वि एवं मुणी भणिओ ॥५१७४॥  
 'भयवं ! कंतिमईए करुणं काऊण कुणह उवयारं ।  
 आइसह जिणुदिइं धम्मं सिवसोक्खतरुबीयं' ॥५१७५॥  
 तो मुणिवरेण भणियं 'नरिंद ! अम्हे अपत्थिया चेव ।  
 जिणधम्मवएसेणं परोवयारंमि उज्जुत्ता ॥५१७६॥  
 परमेसा कंतिमई दूरमजोग्गा हिओवएसाण ।  
 दुक्कम्मवसा एसा ममंमि कोवं समुव्वहइ ॥५१७७॥  
 तो ते कयमणखेया विसमत्तं भाविऊण कम्माण ।  
 कयसूरिपयपणामा पविसंति पुरिं सवेरग्गा ॥५१७८॥  
 तो नरवइणा पुत्तो ठविओ रज्जंमि चंदसेणाए ।  
 नामेण चंदकेऊ पसत्थतिहि-करण-लग्गंमि ॥५१७९॥  
 अह दोहिं वि सविसेसं चेइयभवणेषु विविहविच्छुं ।  
 अद्दाहियामहोसवमसमं काऊण पत्तेयं ॥५१८०॥

पुण पूइऊण विहिणा फासुयदाणेण समणसंघं च ।  
 सम्माणिकुण सव्वं पणइयणं सयणवग्गं च ॥५१८१॥  
 कयकायव्वविसेसा पसत्थतिहि-करण-वार-रिक्खंमि ।  
 महया विच्छुद्धेणं समागया गुरुसमीवंमि ॥५१८२॥  
 गुरुणा वि सुत्तवन्नियविहिणा संसुज्झमाणपरिणामा ।  
 पव्वाविया कमेणं नियनियपरिवारपरियरिया ॥५१८३॥  
 अब्भसियसाहुकिरिया दुवालसंगाण नायपरमत्था ।  
 दुक्करतव-चरणरया चिद्धामो गुरुसमीवंमि ॥५१८४॥  
 तो जायपरमवेरग्गवासणा नियसरीरनिरवेक्खा ।  
 गुरुणा समणुन्नाया एग्ग(ग)ल्लविहारिणो जाया ॥५१८५॥  
 ता एवं मह सावय ! जायं वेरग्गकारणं तेण ।  
 संजायभवविराओ चरेमि घोरं तवच्चरणं ॥५१८६॥  
 तो भणइ वीरसेणो 'भयवं ! वेरग्गकारणं तुज्झ ।  
 अइसुंदरं महायस ! संजायं भवविरायकरं ॥५१८७॥  
 निसुणंताण वि एयं नराण संवेयकारयं चरियं ।  
 किं पुण समयविहूयं न तुम्ह सुविसुद्धचित्ताण ? ॥५१८८॥  
 धन्नो सि जेण तुमए नेहासंगेण निच्चपजलंतो ।  
 अहकलुसकज्जलफलो चत्तो दीवो व्व घरवासो ॥५१८९॥  
 एत्थंतरंमि सहसा विन्नत्तो देव ! अह मए वीरो ।  
 'तुरियं पत्थुयकज्जे सुसावहाणो हवउ देवो ॥५१९०॥  
 तो भणइ वीरसेणो 'पढमं जिणवंदणेण पुण तुम्ह ।  
 पयंकमलदंसणेणं पहीणपाओ(वो) अहं जाओ ॥५१९१॥

तुह अच्चब्भुयसच्चरियसवणसंजायसुद्धपरिणामो ।  
 पयडविवेयपईवो तुह पयसेवाए(इ) जाओ हं ॥५१९२॥  
 इय भणिऊण नरिंदो पंचंगं पणमिऊण मुणिचंदं ।  
 सहिओ मए सवेगं उज्जाणवणाओ नीहरिओ ॥५१९३॥  
 अह जिणपूया-वंदणपडिहयविज्जोवघाइपावंसा ।  
 सुविसुद्धसाहुसेवाविढत्तबहुपुन्नपब्भारा ॥५१९४॥  
 सिरिवीरसेणअसरिसपहावसंजायविज्जसामत्था ।  
 दो वि समं चिय गयणे उप्पइया सुरकुमार व्व ॥५१९५॥  
 पत्ता खणेण चंपं ओयरिया वासपुज्जजिणभुयणे ।  
 कयजिणपूया सम्मं थुणामु परमाइ भत्तीए ॥५१९६॥  
 एत्थंतरंमि सूरुो संझारुणकिरणकंतिकब्बुरिओ ।  
 पुव्वदिसावहुकुंकुमरसरइओ भालतिलओ व्व ॥५१९७॥  
 आलोयसुहं पढमं संजायं तयणु दरदुरालोयं ।  
 तं चेव भाणुबिंबं खणेण जायं सुदुव्विसहं ॥५१९८॥  
 जह जह कमेण गयणं आरुहइ रवी तहा तहा अहियं ।  
 पावइ पयाववुढिं(डिं) असेसतेयंसिहयपसरं ॥५१९९॥  
 एवंविहंमि समए नरसीहो विहियगोसकरणीओ ।  
 सेवयसयसंकिन्नो अत्थाणे तयणु उवविसइ ॥५२००॥  
 तो विमलमईपमुहा उज्जलयरवेससोहियसरीरा ।  
 पविसंति पसन्नमणा सुमंतिणो तह अमच्चा य ॥५२०१॥  
 एत्थंतरंमि भणिओ पडिहारो राइणा 'अरे ! तुरियं ।  
 हक्कारसु जोइसियं पुच्छामि पयाणसुहलग्गं' ॥५२०२॥

तो आएसाणंतरमइतुरियगई पधाविओ दंडी ।  
 पुरओकयजोइसिओ समागओ रायवासंमि ॥५२०३॥  
 जोइसिओ नरवइणा 'सत्थि'काऊण उत्तराभिमुहो ।  
 उवविसइ पुव्वकप्पियसमीववरविट्टरे हिट्ठो ॥५२०४॥  
 तो भणइ नरवरिंदो 'नेमित्थिय ! चिंतिऊण मह कहसु ।  
 पत्थाणसुहं लगं तुह पुव्विं कहियकज्जंमि' ॥५२०५॥  
 नेमित्थिएण भणियं 'जइ जिणवयणं पमाणमिह भुयणे ।  
 तो तुह पण्हाए फुडं गमणं चिय नत्थि चंपाओ' ॥५२०६॥  
 तो नरवइणा भणियं 'जइ जो जरकंबलिं निवसिऊण ।  
 नियकंठकयकुठारो मह सेवालंपडो एइ ॥५२०७॥  
 इह चेव वीरसेणो ता गमणं मज्झ खलइ निब्भंतं ।  
 इहरा नत्थि विलंबो ता सम्मं चिंतिउं भणसु' ॥५२०८॥  
 नेमित्थिएण भणियं 'सच्चमिणं देव ! आगओ एत्थ ।  
 किं तु न सेवाकंखी तुज्झ अणत्थाय संपत्तो' ॥५२०९॥  
 तो भणइ सकोवमणो नरसीहो रोसतंबिरनिडालो ।  
 नेमित्थियस्स वयणं असहहंतो सगव्वो य ॥५२१०॥  
 'रे जोइसिय! अयाणय! तेण वि मह कह णु कीरइ अणत्थो? ।  
 बलिओ वि हु खज्जोओ कह तेओ हणइ सूरस्स ? ॥५२११॥  
 संभवइ न आगमणं गणमाणो सव्वहा तुमं भुल्लो ।  
 कहमेत्थ सो पहुत्तो भूचारी जं न सो खयरो ॥५२१२॥  
 भूमी वि मज्झ पय-पय-पच्चइयअसंखपणिहिसंकिन्ना ।  
 नीसेसदिसिपयद्वियठाणंतरपुरिसदुल्लंघा' ॥५२१३॥

जोईसिएण भणियं 'सच्चं सो भूमिगोयरो देव ! ।  
 केणावि उवाएणं समागओ तह वि तुह नयरिं' ॥५२१४॥  
 राया भणइ 'विसत्थो होऊण निरिक्ख मा भयं कुणसु ।  
 जम्हा तुह वयणमिणं असंगयं अघडमाणं च' ॥५२१५॥  
 नेमित्तिएण भणियं 'नरिंद ! जइ सो न आगओ होज्ज ।  
 ता मज्झ सिरच्छेएण देव ! दंडं करेज्जाहि ॥५२१६॥  
 राया भणइ 'निवेयसु कंमि पएसंमि संपइं वसइ ।  
 नेमित्तिएण भणियं 'चिट्ठइ सो वासपुज्जंमि' ॥५२१७॥  
 तो नरवइणा भणियं जइ एवं ता सुनिच्छियं भणसु ।  
 मा भणसु जं न कहियं असहामि अहं असच्चस्स ॥५२१८॥  
 नेमित्तिएण भणियं 'अन्नंमि कहेमि देव ! सो वीरो ।  
 एक्कंगो इह पत्तो वावायसु जइ समत्थो सि' ॥५२१९॥  
 तो जंपइ नरसीहो 'जइ तं पेच्छामि आगयं एत्थ ।  
 तो तुज्झ देमि रज्जं विचित्तजसमंडलाणुगयं ॥५२२०॥  
 ता उच्चलह तुरंता सामंता ! मउडबद्धमंडलिया ।  
 चिरगज्जियस्स संपइ निव्वाहं तुम्ह पेच्छामि ॥५२२१॥  
 रे ! रे ! तरलतुरंगमखुरुक्खउच्छलियरेणुपूरेण ।  
 तं पिहिऊण ममारिं मारह हरिसाहणनिउत्ता ! ॥५२२२॥  
 रे गयवइणो ! तुरियं तुम्हे वि करिंदघणघडाबंधं ।  
 काऊण तमेक्कंगं चमढह पुरओ मह रसंतं ॥५२२३॥  
 रे रहवइणो ! रणरसविसारयं वीरसेणुगुरुसत्तुं ।  
 नियरहमारोहंतं रक्खेज्जह परमजत्तेण ॥५२२४॥

रे तंतपाल ! पुरओ निरंतरं नियनराओ(उ)होहेहिं ।  
 कयसण्हखंडखंडं देह बलिं तं दसदिसासुं ॥५२२५॥  
 अन्नो वि को वि जो मह संतिं अहिलसइ तस्स य असंतिं ।  
 सो सव्वपयारेणं तंमि वहत्थं समुज्जमउ' ॥५२२६॥  
 इय दाऊणाएसं असेसनियपरियणस्स नरसीहो ।  
 आपुच्छिउं गओ सो आवासं कणयरहेहाए ॥५२२७॥  
 'वद्धाविज्जसि दइए ! तस्सागमणेण वीरसेणस्स' ।  
 इय पभंणतो राया विहसिरवयणो गओ पासं ॥५२२८॥  
 तो नेमित्तियवयणं सव्वं साहेइ कणयरहेहाए ।  
 तीए वि पुणो भणियं 'कहं कहं आगओ सत्तू ?' ॥५२२९॥  
 तो नरवइणा भणियं 'न याणिमो देवि ! कह इहं पत्तो ?' ।  
 भणियं तीए 'न एयं परिणामसुहावहं कज्जं ॥५२३०॥  
 जो भूमिगोयरो वि हु एक्कुंगो जिणइ खयरसंघट्टं ।  
 मा रुस नरिंद ! तुमं का गणणा तस्स तुम्हेहिं ? ॥५२३१॥  
 सो वीसरिओ किं तुह सामत्थो देव ! वीरसेणस्स ? ।  
 एक्कुंगेण वि जेणं धरिओ सि करेणुयारूढो' ॥५२३२॥  
 जावेयं आलावा अन्नोन्नं ताण एत्थ वट्ठंति ।  
 ओयरमाणो सहसो ता दिट्ठो खेयरिसमूहो ॥५२३३॥  
 तो नरवइणा भणियं 'दइए ! सो एस पवणकेउस्स ।  
 अंतंउरविज्जाहरिसंमहो आगओ एत्थ' ॥५२३४॥  
 तो समुचियपडिवत्तिं काऊण नरेसरेण भणियाओ ।  
 'निव्वत्तियं असेसं मयकज्जं पवणकेउस्स ?' ॥५२३५॥

तो ताण पहाणयरा परमपिया तस्स पाव(पवण)केउस्स ।  
 नामेण मयणसेणा सखेयमिव भणिउमाढत्ता ॥५२३६॥  
 'कह कीरइ मयकम्मं तंमि जियंतंमि दुद्ध(डु)सत्तुंमि ।  
 जा तस्स न वच्छत्थलरुहिरनिवायंजलिं देमि?' ॥५२३७॥  
 तो चिंतइ नरसीहो 'एसा अणुक्कू (कू)लभासिणी मज्झ ।  
 विज्जाबलसाहेज्जं करेइ ता सुंदरं होइ' ॥५२३८॥  
 पुण खेयरीहि भणियं 'मुच्छवडियाओ दुक्खदट्ठा(द्धा?)ओ ।  
 आसासियाओ तुमए सप्पणयं बंधवेणं च (व) ॥५२३९॥  
 तं तुह परमुवयारं हियए धरिऊण एत्थ आयाओ ।  
 सारमिणं जियलोए उवयरियं जं न वीसरइ' ॥५२४०॥  
 तो भणइ नरवरिंदो 'भइणि ! कहं तस्स रुहिरसलिलेण ।  
 नियभत्तुणो किसोयरि! काहिसि मयकज्जमइविसमं?' ॥५२४१॥  
 तो भणइ 'मयणसेणा जइ तं पेच्छामि अज्ज अच्छीहिं ।  
 ता तुज्झ संपयं चिय नियसामत्थं पयासेमि ॥५२४२॥  
 जुयइ त्ति अहव रंड त्तिदुक्खदट्ठ त्ति मा अवधीरेसु ।  
 भाय ! धरित्ती एसा बहुरयणा किं तए न सुयं ? ॥५२४३॥  
 एयाओ अट्ठ अम्हे भज्जाउ तस्स पवणकेउस्स ।  
 जइ हुंतीओ समीवे रणंमि ता सो न हारंतो' ॥५२४४॥  
 भणियं नरसीहेणं 'जइ एवं ता करेह साहेज्जं ।  
 मह भाउणो अवस्सं तुह सत्तुं-जेण मारेमि ॥५२४५॥  
 जो तुम्ह वेरिओ सो मज्झ विसेसेण नत्थि संदेहो ।  
 मह तुम्हाण वि पुत्रेहिं वासपुज्जंमि संपत्तो ॥५२४६॥

सो तुम्हाणं सुंदरि ! महासईणं पहावरज्जूए ।  
 मीणो व्व गलेण इहं वहाय आकरिसिओ याओ ॥५२४७॥  
 आओ त्ति निसुयमेत्ते फुरंतकोवारुणच्छिवत्ताहिं ।  
 निद्वयडसिउट्टुडंडं 'हुं हुं' ति पयंपियं ताहिं ॥५२४८॥  
 तो तक्खणेण अट्ट वि विज्जाबलविहियघोररूवाओ ।  
 दिट्ठाओ नरिंदेण वि महाभउब्भंतनयणेण ॥५२४९॥  
 'हा रक्ख रक्ख सामिय ! किमेयमच्चब्भुयं तयं जायं ।  
 इय जंपिरीए राया परिरद्धो कणयरेहाए ॥५२५०॥  
 आपिं गवट्टुल्लोयणकरालदादुद्धकविलकेसाओ ।  
 निच्छोल्लियमंससरीरमुक्कुचम्मट्टिमेत्ताओ ॥५२५१॥  
 मणसंभवंतरक्खसिभावेण व जाण भखि(क्खि)यमसेसं ।  
 लावन्न-रूव-जोव्वणमंतो-व्वस-मंस-रुहिराई ॥५२५२॥  
 तो ताहिं तक्खण च्चिय भणिओ राया 'किमज्ज वि विलंबो?।  
 जावज्ज वि न करेमो नीसेसजयस्स खयकालं ॥५२५३॥  
 तो तंमि चेव निवडउ समकालं रोसजलणजालोली ।  
 जम्हा विहत्तदेहो वसइ जमो अट्टसु इमासु' ॥५२५४॥  
 तो भणइ कणयरेहा 'न याणिमो देव ! कज्जपरिणामं ।  
 भमइ व्व मज्झ हिययं कुलालचक्के व आरूढं' ॥५२५५॥  
 'मा बीह पिए ! संपइ सिद्धं कज्जं न एत्थ संदेहो ।  
 जं सो वि एत्थ पत्तो एयाओ वि एत्थ पत्ताओ' ॥५२५६॥  
 एमाइ कणयरेहं धीरविऊणं विणिग्गओ राया ।  
 ताहि समं पुरिलोयं भयतरलच्छं निरिक्खंतो ॥५२५७॥



एत्तो वि वीरसेणो वसुपुज्जाराहणं करेमाणो ।  
 जावच्छइ ताव तहिं विलासिणी आगया एगा ॥५२५८॥  
 अप्पसमाहिं समेया चेडीहिं समाणभूसणधराहिं ।  
 नियलावन्नमहोयहिपडिबिंबियनियसरीर व्व ॥५२५९॥  
 वरवेसरिमारूढा बहुविहपूओवगरणहत्थेण ।  
 नियपरियणेण जुत्ता ताराणुगया ससिकल व्व ॥५२६०॥  
 नियदेहपहापोसियभूसणमणिकिरणजायपरिवेसा ।  
 गुरुसोहग्गायड्डियरविणेव्व सयं समवऊढा ॥५२६१॥  
 पुरहुत्तसहीदावियदप्पणसंकंतवयणपडिबिंबा ।  
 हिययनिहित्तवराणणअतित्तससिणो नियंति व्व ॥५२६२॥  
 वामकरकलियवग्गा इयरकरासत्तसरलकसलड्डी ।  
 जा मयणरायबंधणताडणबहुल व्व गुरुगोत्ती ॥५२६३॥  
 जा सव्वंगविहूसणमणीसु संकंतपेच्छयजणच्छी ।  
 रूवाणुरत्तवासवनिहित्तनीसेसनयणे व्व ॥५२६४॥  
 सहिवत्थंचलवारियसुयंधमुहगंधघडियभमरोली ।  
 मसिनिमि(म्मि)यथूलक्खरवैसियसत्थं व विरयंती ॥५२६५॥  
 उभयंसपासगायणगीयरसावेसमउलियच्छिउडा ।  
 कारिममुद्धवियारणसंमोहणमब्भसंति व्व ॥५२६५॥  
 इय कामजयपडाया जयप्पडाइ त्ति नाम सुपसिद्धा ।  
 संपत्ता तित्थेसरदुवारदेसंमि सा बाला ॥५२६६॥  
 उत्तरइ वेसरीओ पुंजियबहुदास-दासिपरियरिया ।  
 कयचलणसोयकम्मा पविसइ वसुपुज्जभवणंमि ॥५२६७॥

वरगंध-वास-कुसुमदखएहिं नेविज्ज-धूव-दीवेहिं ।  
 परिपूइऊण देवं पुण वंदइ परमभत्तीए ॥५२६८॥  
 अहिवंदिऊण देवं पयाहिणं जाव देइ उवउत्ता ।  
 दिद्धो ताव भ्वंति-गवक्खपंतीए वीरवई ॥५२६९॥  
 भुवणच्चभ्युनरनाहरूवदंसणसविम्हओब्भंता ।  
 न तरइ पुरओ गंतुं न य लज्जापरवसा ठाउं ॥५२७०॥  
 अइकुसलस्स वि दुल्लहनेहविमूढस्स किं पि तं होइ ।  
 न गुणा न बुद्धिपसरो न धीरिमा जत्थ उवयरइ ॥५२७१॥  
 जह तीए जयं पि पुरा सनेहराएण पाडियं दुत्थे ।  
 दिन्नपडिहो गओ तह निवाडिया सावि कुमरेण ॥५२७२॥  
 मा कुणउ को वि गव्वं जोव्वण-सोहग्ग-रूव-दव्वेहिं ।  
 किं कीरइ जयमेयं गरुयाणं संति गरुययरा ॥५२७३॥  
 हिययब्भंतरपसरंतगरुयपेम्माणुरायविवसाए ।  
 जायं वियक्खणाए वि मुद्धत्तं जयवडायाए ॥५२७४॥  
 दिद्धो सुहेण पुरओ तिरिच्छवलियच्छमऽहतिरिच्छच्छे ।  
 दइओ वलंतकंठच्छिमणहरंतीए पिट्ठमि ॥५२७५॥  
 नवकन्नपूरमंजरिविलग्गभमडंत(?)ताररम्मेहिं ।  
 तरलायइ न कुमारो विद्धो वि हु तीए नयणेहिं ॥५२७६॥  
 तो विणयपणयसारं निक्कारिमनेहनिब्भरं तिस्सा ।  
 दट्ठुं तहासरूवं सदयं वीरो मए भणिओ ॥५२७७॥  
 'वच्चउ खयं नराहिव ! जम्मो वेसाण पयइकुडिलाण ।  
 सब्भावो वि हु जाणं नज्जइ मायापवंचो व्व ॥५२७८॥

एवं न देव ! जइ ता सब्भावसिणेहसंगया तहवि ।  
 अवहीरिया तए कह एसा 'धुत्ति'त्ति काऊण ? ॥५२७९॥  
 निक्कारिमनेहाए इमीए जो तुज्झ 'कारिम'त्ति मई ।  
 सो तुज्झ पंडियस्स वि अयाणुयत्तं पयासेइ' ॥५२८०॥  
 तो भणइ वीरसेणो 'सुजाण ! कह जाणियं तए एयं ? ।  
 जं किर ममंमि एसा सब्भावसिणेहरत्त त्ति ?' ॥५२८१॥  
 तो पुण मए पभणियं 'रोमंच-पकंपमाइणो देव ! ।  
 एए सत्तियभावा न कारिमा होंति नियमेण ॥५२८२॥  
 संगोविस्सइ पुलयं पिहुलपडंतेण कहवि अंगेसु ।  
 जिणवंदणत्थविरइयकरंजली न य पउडेसु ॥५२८३॥  
 संगोवइ मयणवियारचेट्टियं विहियहिययपागब्भा ।  
 थरहरियथूलथणहरपयडं कह पिहउ तणुकंपं ? ॥५२८४॥  
 कूडुत्तरबहुलाए वि होही अन्नत्थ उत्तरमिमीए ।  
 आणंदबाहसंदिरनयणेसु किमुत्तरं दाही ? ॥५२८५॥  
 तो देव ! इमे भावा न हवंति कया वि कारिमसरूवा ।  
 तेण विनिच्छइऊणं भणामि निक्कारिमा एसा' ॥५२८६॥  
 एत्थंतरंमि बाला सव्वं जिणवंदणाइवावारं ।  
 काऊण सहीहिं तओ सहासमिव पुच्छिया एवं ॥५२८७॥  
 'सहि ! अज्ज महच्छरियं असंभवं जायमणणुहूयं च ।  
 किं अम्ह चेव एयं अह तुज्झ वि फुरइ चित्तंमि ? ॥५२८८॥  
 जं जिणपूयच्चण-वंदणाइ सव्वं तदेक्कचित्ताए ।  
 अणुवेट्टियं पयाहिणकम्मं तु परव्वसाए व्व ॥५२८९॥

१. पिहुलपडंतेण - पृथुलवस्त्रांतरितत्वेन, खंता. टि० ॥

किं ते अपडुसरीरं ? किं वा कज्जंतरेण केणावि ।  
 अवहरियं ते चित्तं? अन्नं वा किं पि? तं कहसु' ॥५२९०॥  
 निउणसहीयणविन्नायवीरसेणाणुरायमेसा वि ।  
 मुणिऊण कज्जकुसला जहत्थपडिउत्तरं देइ ॥५२९१॥  
 'सहि ! पंडियाण पुरओ जो जंपइ जडमई अपरमत्थं ।  
 सो कुणइ सिणेहखयं पत्थुयकज्जं च नासेइ ॥५२९२॥  
 ता सुटठु लक्खिओ मह सहीओ ! तुम्हेहिं माणसवियारो ।  
 जइ सच्चं निउणाओ ता जाणह साहणोवायं ॥५२९३॥  
 जइ मज्झ न संपज्जइ तुब्भेहिं वि एस निउणबुद्धीहिं ।  
 ताऽकिंचिकरत्तेणं तुम्हं सलिलंजलिं दाउं(दाहं?) ॥५२९४॥  
 तुब्भे वि मह पमाणं एवंविहकज्जसाहणोवाए ।  
 जइ कइया वि सहीओ मए निउत्ताओ ता कहह ॥५२९५॥  
 को को न सहीउ मए दोसो काऊण वाहिओ पुरिसो ।  
 दासित्तणं पि मन्ने एयंमि पुणो मह दुलंभं' ॥५२९६॥  
 तो सा सहीहिं(हि) भणिया 'मा झूरसु करिसिओ तुह गुणेहिं ।  
 सयमेव वसे होही एस जुवा नत्थि संदेहो ॥५२९७॥  
 दिट्ठे तुज्झ सरूवे केत्तियमेत्तं व रागिणो पुरिसा ? ।  
 वस्सिदिया वि मुणिणो गयरागा ते वि खुब्भंति ॥५२९८॥  
 तुह चेव रूव-जोव्वण-सोहग्ग-विलास-हासमाईया ।  
 दूया हवंति सुंदरि ! अवयासो कत्थ अम्हाण ? ॥५२९९॥  
 जो होइ अप्पणा किर हीणगुणो तस्स पाडुयवसेण ।  
 संपडइ कज्जसिद्धी न उणो तुम्हारिसजणस्स' ॥५३००॥

तो भणइ जयवडाया 'तुब्भे मुद्धाओ जाणह न किंपि ।  
 वस्सिदिओ महप्पा अन्नो च्चिय को वि एस जुवा ॥५३०१॥  
 मह दंसणमेत्तेण वि चलंति बुद्धीओ इयरपुरिसाण ।  
 एएण स च्चिय अहं सच्चविया रोरनारि व्य ॥५३०२॥  
 तो मुणह महापुरिसं गरुयं अइगरुयवंसंसभूयं ।  
 जयपयेडविक्रमगुणं अखुहियरयणायरगहीरं' ॥५३०३॥  
 तो सा सहीहिं भणिया 'सहि ! सच्चमिणं जहा तए नायं ।  
 अम्हेहिं पि न नाओ तस्स मणागंपि मणभावो ॥५३०४॥  
 ता सहि ! पत्तावसरं एयं चिय ताव कीरउ रसहं ।  
 जिणनाहपुरो संपइ पेच्छणयं परमभत्तीए ॥५३०५॥  
 जम्हा अणंतपुत्रं सगीय-वाइत्त-नट्टमाईहिं ।  
 कहियं जिणागमे किर अणंतवरनाणदंसीहिं ॥५३०६॥  
 जिणनाहचरणसेवा फलइ अकालंमि कप्पवलि व्य ।  
 सामन्ना वि हु किं पुण विसेसओ गीय-वायकया ॥५३०७॥  
 पारद्धे पेच्छणए कोऊहलतरलिओ जइ न एही ।  
 दटठुं तुह पेच्छणयं ता अम्हे वाहरिस्सामो ॥५३०८॥  
 पेच्छणयदंसणत्थं समागए तंमि वरजुवाणंमि ।  
 सावेक्ख-निरावेक्खं सरूवमवलो(य)इस्सामो' ॥५३०९॥  
 'एवं होउ'त्ति तओ भणिउ सिरिवासुपुज्जनाहस्स ।  
 पारद्धं पेच्छणयं पेच्छयजणजणियसंतोसं ॥५३१०॥  
 दिज्जइ पढमं आओज्जिएहिं बिहिरियनहंतराभोओ ।  
 भयपरिरंभियखेयरिपियसत्थो गहिरसवहत्थो ॥५३११॥

पसरंति महुरमणहर-मंसलवरवेणु-सललिउल्लावा ।  
 आकुंचियदिढतंती-विपंचिसंचारिया धुवया ॥५३१२॥  
 वज्जंति पडह-झल्लरि-मुयिग-डक्का-हुडुक्क-घणपाडं ।  
 सरसत्तणं खणेणं समागयं तत्थ पेच्छणयं ॥५३१३॥  
 एत्थंतरंमि भणियं कन्नोसारेण जयवडायाए ।  
 पेच्छह सहीउ ! सुहओ दट्ठं पि समागओ नेह' ॥५३१४॥  
 तो सव्वसहीणं पि हु पहाणभूया पगब्भभावा य ।  
 नामेण नागदमणी सा भणिया जयपडायाए ॥५३१५॥  
 'सहि ! जाहि सिक्खविज्जसि किं किर?आणेहि तं सुहयं ।  
 तिप्पंतु लोयणाइं तदंसणअमयपूरेण' ॥५३१६॥  
 तो सा तव्वयणेणं गंतूण भवंतिया-गवक्खंमि ।  
 कयवीरपयपणामा पत्थुयकज्जं पजंपेइ ॥५३१७॥  
 'धिइ त्ति निट्ठुरत्ति य सुदुव्वियइ त्ति अणुचिउन्न त्ति ।  
 मा देव ! मं वियप्पसु पयइ च्चिय एरिसी अम्ह ॥५३१८॥  
 ता एस सयलतिहुयणपरमुवयारित्तणेण जिणनाहो ।  
 जयबंधवो महप्पा न कस्स किर पूयणिज्जो त्ति ? ॥५३१९॥  
 ता कह एवंविहपरमदेवयं षइ अणायरो तुम्ह ? ।  
 जेण इह संठिया वि हु पेच्छह न महोच्छवं तस्स?' ॥५३२०॥  
 तोऽहं भणामि एवं भूसन्नापेरिओ कुमारेण ।  
 सच्चं तुमए भणियं भुयणस्स वि बंधवो भयवं ॥५३२१॥  
 पाइयलोओ वि न एत्थ अन्नहा कुणइ किर विसंवायं ।  
 जो परमसम्मदिट्ठी सो मह सामी कहं कुणइ ? ॥५३२२॥

जिणदंसणपूयण-वंदणेहिं जायंति उच्छवा सव्वे ।  
 ते पुण अम्हं जाया कयकिच्चा तेण चिद्धामो ॥५३२३॥  
 नियभत्ति-विहवसरिसं जिणिंदलुहुदुक्खुडं करंतंमि ।  
 अणुमोयणं कुणंतो तत्तुल्लफलो नरो होइ ॥५३२४॥  
 लोयववहारमेतं पि जो न जाणइ नरो व्व नारिव्व ।  
 सो कह अणुमाइज्जइ उचियपवित्तिं अयाणंतो ॥५३२५॥  
 अब्भागया हु अम्हे तुम्हे पुण एत्थ चेव वत्थव्वा ।  
 अब्भागओ खु पुज्जो गुरु व्व वत्थव्वलोएण ॥५३२६॥  
 ता तुम्ह सामिणी सा नियजोव्वण-रूव्व(व)-विहवगव्वेण ।  
 उम्मत्ताए व न कयं संभासणमेत्तमवि अम्ह ॥५३२७॥  
 सव्वस्स वि विणओ च्चिय आवहइ जणे अईवसोहगं ।  
 वेसाण पुणो सो च्चिय भुयणवसीकरणमंतो व्व' ॥५३२८॥  
 तो भणइ नागदमणी 'मा रूसह मह सहीए मणयं पि ।  
 तुह चेव सामिसालो सव्वाणत्थाण इह मूलं ॥५३२९॥  
 सव्वो च्चिय अवरारो इमस्स असमंजसेक्कहेउस्स ।  
 जा विणयनिदरिसणमवि दुव्विणयं जेण सिक्खविया' ॥५३३०॥  
 तो सा वि मए भणिया 'असच्चभासिणि ! असंगयं भणियं ।  
 कह दंसणमेत्तेण वि दुव्विणओ तीए संकंतो ?' ॥५३३१॥  
 नागदमणीए भणियं 'ससिदंसणमेत्तमुक्कनियपयई ।  
 कयकल्लोलविलासो उल्लसइ महोयही कह णु ? ॥५३३२॥  
 एक्कस्स दंसणेण वि सूरस्स अणंतकमलसंडाइं ।  
 विहडंतसरसदलसंपुडाइं कह नाह ! वियसंति ?' ॥५३३३॥

तो भणइ वीरसेणो 'किं बहुणा पलविण ? वच्वामो ।  
 रे वज्जबाहु ! उड्डसु संतोसो होउ एयाण' ॥५३३४॥  
 तो गंतूण कुमारो पंचंगपणामपणामियजिणिंदो ।  
 चइऊण दिन्नमासणमुवविसइ धराए जिणपुरओ ॥५३३५॥  
 तो कुमरदंसणत्थं परिवत्तियवयण—दरनिहित्तच्छी ।  
 पव[ण]णुवत्तियकमला तरलदला सहइ नलिणि व्व ॥५३३६॥  
 ते च्विय नयणनिवेसा ते च्विय सव्वंगसंठियावयवा ।  
 दिद्धंमि पिए परिवत्तिय व्व अन्नारिसा होंति ॥५३३७॥  
 अजरो सरीरकंपो अगहियपिसायं व होइ विवसत्तं ।  
 निम्मइरमओ दइओ एक्को वि अणेगहा होइ ॥५३३८॥  
 तो बहुनच्चिरनच्चणिकमेण भरमागयंमि पेच्छणए ।  
 लद्धावसरा उड्डइ पणच्चिउं जयवडाया वि ॥५३३९॥  
 बहुसावहाणगायण-मणन्नमणजायवायणसमूहं ।  
 अन्नोन्नवरिघणाघणपेच्छयजणजणियसम्महं ॥५३४०॥  
 विरयनिमेसुम्मेसं जहठाणपरिद्धियंगविन्नासं ।  
 संपत्तमूयभावं पेच्छणयं चित्तलिहियं व ॥५३४१॥  
 गाइज्जइ जिणनाहो नच्चिज्जइ भरहसंगओ भावो ।  
 वाइज्जइ तालगयं तिण्ह समत्तं लओ भणिओ ॥५३४२॥  
 नच्चंती सा पढमं घणकुंकुमपंकपिंजरपयग्गा ।  
 पक्खिवइ रंगमज्जे रत्तुप्पलपुप्फपयरं व्व ॥५३४३॥  
 झणझणिरचरणनेउररयपयडियपायवाडववएसा ।  
 नट्टवय व्व चरणा नट्टविहिं जीए स(सा?)हिंति ॥५३४४॥



उव्विल्लिरकरपल्लवघणयरपल्लवियगणयपेरंता ।  
 नीलुप्पलमालाहिं व दिसाओ(उ) अच्चेइ तरलच्छी ॥५३४५॥  
 अंगुव्वत्तणपसरियपंडुरकिरणोहतारहारलया ।  
 जिणसेवाए समज्जियनिम्मलयरपुन्नकलिय व्व ॥५३४६॥  
 करचालणवसचंचलकणंतमणिकंकणावलिपओद्धा ।  
 न मुहेण ल्ल(ल)ज्जमाणा कहइ व्व करेहिं करवाडं ॥५३४७॥  
 इय वियडनियंबत्थलरणंतमणिदामकिंकिणिकरालं ।  
 दट्टूण तीए(इ) नट्टं चिंतइ वीराहिवो तुट्टो ॥५३४८॥  
 'हत्थंमि जत्थ दिट्ठी, दिट्ठीए रसो, रसंमि फुडभावो ।  
 उप्पायइ अच्छरियं न कस्स नट्टं ससिमुहीए ?' ॥५३४९॥  
 तो निरुवमपुन्नपहावपत्तमणवंछियत्थसंपत्ती ।  
 गयणाओ(उ) तीए कुमरो देइ सुदेवंगवत्थाइं ॥५३५०॥  
 तो लोयदुल्लहाइं मणिकुंडल-हार-कंचि-दामाइं ।  
 उभयकरकंकणाली-चरणाहरणाइं दिन्नाइं ॥५३५१॥  
 तेलोके(क्के)वि असज्जं न किंपि पुन्नाणुबंधिपुन्नाण ।  
 कहमन्नहा कुमारो दुहइ नहं कामधेणु व्व ? ॥५३५२॥  
 तो वित्तं पेच्छणयं पेच्छयलोओ गओ नियं ठाणं ।  
 कुमरो वि पुव्ववन्नियठाणंमि गओ गवक्खंमि ॥५३५३॥  
 तो सहसा उच्छलिओ अक्कुंदरवो सहीसमूहस्स ।  
 निसुएण जेण कुमरो करुणाए परव्व(व)सो जाओ ॥५३५४॥  
 तो भणइ सदुक्खमणो 'तुरियं रे वज्जबाहु ! अत्रिसिउं ।  
 मह कहसु किंनिमित्तो नारीण इमो महक्कुंदो?' ॥५३५५॥

तो जामि अहं तुरियं तत्थ खणं अच्छिऊण विणियत्तो ।  
 तव्वइयरमुणियत्थो कहेमि सव्वं कुमारस्स ॥५३५६॥  
 'सा देव ! जयवडाया पयाहिणावसरमुणियमणभावा ।  
 तुह पढमं चिय कहिया तए वि 'वेस'त्ति परिभूया ॥५३५७॥  
 तो देव ! संपयं सा सहीहिं अब्भत्थिया बहुपयारं ।  
 इच्छइ न गेहगमणं तुज्झ विओयं अणिच्छंती ॥५३५८॥  
 तो सा सरोसनिट्ठुरसहिवयणायन्नणेण अहिअयरं ।  
 तुज्झ अलाभुदीवियसंतावं वहइ अंगमि ॥५३५९॥  
 पुण सा सहीहिं भणिया 'जाउ क्खयं तुज्झ एरिसविवेओ ।  
 गांधारि व्व अकज्जे अप्पाणं जं विडंबेसि ॥५३६०॥  
 नियजीयसंसए वि हु न होइ तुम्हारिसीण नारीण ।  
 एवंविहं सरूवं जणंमि उवहाससंजणयं ॥५३६१॥  
 को मच्छरो गुणेसुं ? सोहग्गनिहि क्खु सो महापुरिसो ।  
 भग्गो जेण अभग्गो सोहग्गमडप्फरो तुज्झ ॥५३६२॥  
 अइसुहएण वि गुणवंतएण किं तेण सहि ! सुरूवेण ? ।  
 जो मुणियतुहसरूवो करुणामेत्तं पि नो कुणइ ? ॥५३६३॥  
 साहीणे च्चिय रज्जसु न पराहीणंमि सुट्ठु वि गुणहे ।  
 नणु चक्कवट्ठिघरिणीराओ रंकस्स दुहहेऊ ॥५३६४॥  
 तो सो अन्नासत्तो तस्स पुरो चयसि जइ वि नियपाणे ।  
 तो वि तुह उत्तरं सो वरिससहस्सेहिं वि न दाही' ॥५३६५॥  
 तो देव ! इमं वयणं सहीण सोऊण निहयपच्चासा ।  
 तलछिन्नवणलया इव मुच्छए महीयले पडिया ॥५३६६॥

सा देव ! तक्खणे च्चिय मिलाणसव्वंगसुंदरावयवा ।  
 दुल्लहजणाणुरत्ता पत्ता जणसोयणीयत्तं ॥५३६७॥  
 तो देव ! समुच्छलिओ करताडणतुट्टहारवच्छयलो ।  
 उप्पाइयकरुणरसो अक्कंदो सयलनारीण ॥५३६८॥  
 एयं तुज्झ सरूवं फुडवियडत्थं मए समक्खायं ।  
 जं एत्थ होइ उचियं तं देवो कुणसु सयमेव' ॥५३६९॥  
 तो भणइ वीरसेणो 'सच्चमिणं उचियमेव कायव्वं ।  
 पन्नंगणाय(इ) संगो, गरुयाणं अणुचिओ होइ ॥५३७०॥  
 अणुरत्ताउ वि सुंदर ! गुणगंधविवज्जियाओ वेसाओ ।  
 जा सुयणमालियाओ व न होंति परिभोगजोगाओ ॥५३७१॥  
 एयाओ गुणह्वाओ वि भुयंगसंगोवियाओ भीमाओ ।  
 सज्जणविवज्जियाओ दूरं चंदणलयाओ व्व ॥५३७२॥  
 वग्धीसु व वेसासु पयईए भयावहासु को नेहो ? ।  
 कूरत्तणेण जाणं दंसणमवि हणइ विस्सासं ॥५३७३॥  
 देहसरूवेणं चिय सरत्ताओ गईए होंति कुडिलाओ ।  
 परभक्खणनिरयाओ वेसाओ भुयंगियाओ व्व ॥५३७४॥  
 एयाहि सह पसंगो सुंदर ! सुकुलुग्गयाण पुरिसाण ।  
 लज्जावहो खु पढमं पुण मइलइ निम्मलगुणोहं ॥५३७५॥  
 ताव च्चिय गरुयत्तं ताव च्चिय फुरइ निम्मला कित्ती ।  
 ताव च्चिय सुगुणित्तं जाव न वेसाहि सह संगो' ॥५३७६॥  
 तो पुण मए वि भणियं 'अवितहमेयं न अन्नहा देव ! ।  
 पुव्वुत्तसरूवाओ वेसाओ होंति नियमेण ॥५३७७॥

किंतु नरो कज्जत्थी परिभावियदेस—कालउचियत्थो ।  
 आयरइ अणुचियं पि हु इह—परलोयाविरोहेण ॥५३७८॥  
 कज्जं तुह सत्तुजओ सो वि उवायंतरेण कायव्वो ।  
 को मुणइ केत्तिएहिं दिणेहिं पुण लब्भइ उवाओ ? ॥५३७९॥  
 तो अम्ह एत्थ देसे सव्वो च्चिय अहियचित्तओ लोओ ।  
 मोत्तूण जयवडायं निक्कारिमपेम्मपरतंतं ॥५३८०॥  
 तो तीए घरे नरवर ! काऊण अवट्ठिइं विसत्थमणो ।  
 नरसीहनिग्गहे पुण नरिंद ! परिभावसु उवायं ॥५३८१॥  
 एसा वि देव ! वेसा एएण कमेण मन्निया होइ ।  
 तंव(तव्वं)छियकरणेणं निह्विखन्नं पि परिहरियं ॥५३८२॥  
 तो देव ! मह पसायं काऊण इमीए परमकारुन्नं ।  
 कायव्वमणुचियं पि हु' पडिओ पाएसु इय भणिउं ॥५३८३॥  
 तो मज्झ गरुयउवरोहपीडिओ कज्जसिद्धिकयचित्तो ।  
 तक्कुरुणागयहियओ पडिवज्जइ सयलमवि वीरो ॥५३८४॥  
 तो पुण मए पभणियं 'जामि अहं ताण तुह पसायमिणं ।  
 साहेमि जेण जायइ अइगरुओ चित्तसंतोसो' ॥५३८५॥  
 तो भणइ वीरसेणो 'एवं कुणसु' त्ति पभणिओ अहयं ।  
 गंतूण जयवडायं तोसेमि कुमारवयणेहिं ॥५३८६॥  
 अणुकूलदइयवयणं सोउं हरिसुल्लसंतरोमंचा ।  
 मन्नइ तिहुयणरज्जाहिसेयलाभो व्व परिओसं ॥५३८७॥  
 पुणरवि मए पभणियं कत्रे ठाऊण जयवडायाए ।  
 'एयं खु गुत्तकज्जं नाऊण जहोच्चियं कुणसु' ॥५३८८॥

तो भणइ जयवडाया 'एवं काहामि जं तुमं भणसि ।  
 पहुणो हिएकूनिरया अवस्समणुजीविणो होंति ॥५३८९॥  
 तो भणिया सा वि मए 'जाह तुमे पुण खणंतरेणेव ।  
 कुमरो वि आगमिस्सइ' इय भणिए निग्गया बाला ॥५३९०॥  
 कुमरो वि खणद्धेणं जिणिंदपयपंकयं पणमिऊण ।  
 सद्धिं मए तुरंतो उप्पइओ गयणमग्गंमि ॥५३९१॥  
 तो देव ! मए विरइय-अदिद्धविज्जापहावओ वीरो ।  
 लोएहिं अदीसंतो संपत्तो तीए गेहंमि ॥५३९२॥  
 कयमंगलोवयारो पविसइ एगंतवासभवणंमि ।  
 देवो व्व देवलोए चिद्धइ सह जयवडायाए ॥५३९३॥  
 एत्तो य सयलबलभर-भरंतधरणीयलो य नरसीहो ।  
 नीहरइ सनगरीओ नहंमि खयरीओ(उ) पेच्छंतो ॥५३९४॥  
 नेमित्तिएण सहिओ रोसारुणनयणजुयलदुप्पेच्छो ।  
 संपत्तो जिणभवणं परिवेढइ तं पि सेन्नेहिं ॥५३९५॥  
 तो निउणयरनिरिक्खिय कुमारमंतो बहिं च अनियंतो ।  
 पुण पुच्छइ जोइसियं 'कहमेवं विनडिया तुमए ?' ॥५३९६॥  
 नेमित्तिएण भणियं जंमि मुहुत्तंमि पुच्छियं तुमए ।  
 तंमि इह च्विय हुंतो नरिंद ! न हु एत्थ संदेहो' ॥५३९७॥  
 तो जंपइ नरनाहो 'किं बहुणा बंभणित्थ भणिएण ? ।  
 संदेहतुलारूढं रक्खेज्ज ममाओ(उ) अप्पाणं' ॥५३९८॥  
 अह ताओ रक्खसीओ अट्ट वि गयणाओ ओयरंतीओ ।  
 दिट्ठाओ नरिंदेणं भयविहडियबलसमूहेण ॥५३९९॥

ओयरिऊण पसारिय-करालमुहखित्तमंसखंडाओ ।  
 परिवेढिऊण रायं कत्तियहत्थाउ थक्काओ ॥५४००॥  
 तो भणइ मयणसेणा 'रक्खसिवे(वि)ज्जाए एरिसी पयई ।  
 अप्पाणप्प-हियाहिय-भक्खाभक्खक्कमो नत्थि ॥५४०१॥  
 ता वेगेण नरेसर ! तं सत्तुं सव्वहा समप्पेहि ।  
 मा भणसु जं न कहियं कूरमणा रक्खसा जेण ॥५४०२॥  
 जइ कह वि न पावेमो तं पावं ता जलंतजढराण ।  
 अम्ह बुभुक्खोवसमं जो काही तं पि आइक्ख' ॥५४०३॥  
 तो भणइ नरवरिंदो 'अज्ज वि जोइसिय ! किं पि जंपेसु ।  
 जाव न नासइ कज्जं इहरा तुह आगओ मच्चू' ॥५४०४॥  
 नेमित्तिण भणियं 'जं जाणसि तं नरिंद ! मह कुणसु ।  
 जाणंतो वि हु संपइ कुमरं न कहेमि, किं भणसि ?' ॥५४०५॥  
 तो राइणा सरोसं जोइसियं दंडवासिपुरिसाण ।  
 तुरियं समप्पिऊणं विसइ सयं जिणवरगिहंमि ॥५४०६॥  
 तो तत्थ देवदंसण-समागयं जणवयं पि पुच्छेइ ।  
 घरपीडमणिच्छंतो सावयलोओ वि न कहेइ ॥५४०७॥  
 देसंतरागएणं एगेण दियाइणा तओ कहियं ।  
 जं जहवित्तं सयलं वीराहिव-जयवडायाण ॥५४०८॥  
 द्दोद्धभिउडिभासुर-विमुक्कणघोरघघररवेण ।  
 नरसीहनरिंदेणं सरोसमिव भणिउमाढत्तं ॥५४०९॥  
 'पेच्छ मह तेत्तियस्स वि विविहपसायस्स तस्स पणयस्स ।  
 कह लज्जियं न तीए जं सत्तू नियघरे छूढो ? ॥५४१०॥  
 अहवा किमेत्थ चोज्जं नीयजणो होइ एरिसो चेव ।

ता जाह तीए(इ) गेहं तं दुद्धरिउं वि निग्गहह' ॥५४११॥  
 तो रक्खसीहिं(हि) भणियं 'केत्तियठाणेसु वच्चिमो अम्हे ?' ।  
 राया भणइ 'न जइ तं पावह ता खाह तं वेसं' ॥५४१२॥  
 तो ताओ तक्खणेणं गेहं पत्ताओ जयवडायाए ।  
 मुंचंतीओ मुहेणं कोवमहाजलणजालाओ ॥५४१३॥  
 कुमरो वि रयणिजागर-निदापरिघुम्मिरच्छिसयवत्तो ।  
 एगंतवासगेहे निदाए सुहेण पासुत्तो ॥५४१४॥  
 तो पुण मए सम्पणयं असेससहिसंजुया जयवडाया ।  
 भणिया 'नीहरह तुमे सुयओ(उ) कुमारो खणं एक्कं ॥५४१५॥  
 अहमवि बाहिदुवारे देसे ठाऊण एयदेहंमि ।  
 काहामि परमजत्तं सपच्चवाया हि परभूमी' ॥५४१६॥  
 तो भणइ जयवडाया 'एवं होउ'त्ति निग्गया बाहिं ।  
 अहमवि य खग्गपाणी दारं दाऊण उवविद्धो ॥५४१७॥  
 तो ताहिं वासगेहं पविसउकामाहिं अग्गए दिद्धो ।  
 सक्किवाणो हं पुरओ दट्ठूणं पच्चभिन्नाओ ॥५४१८॥  
 सासंकमाणसाओ वलियाओ पुणो य पच्छिम्मगवक्खे ।  
 पविसंति सुहपसुत्तं पेच्छंति पुरो महावीरं ॥५४१९॥  
 अह देव ! मए तइया अयंडसच्चवियघोररूवेण ।  
 सासंकमणेण तओ सहसा आयड्डियं खग्गं ॥५४२०॥  
 एत्थंतरंमि निब्भरनिदावसपरवसं सुहपसुत्तं ।  
 दट्ठूण वीरसेणं नियंति जा निब्बदिद्धीहिं ॥५४२१॥  
 ता तस्स विजियतिहुयणअच्चब्भुयरूवदंसणजलेण ।  
 सहस त्ति ताण हियए विज्झाणो विसमकोवग्गी ॥५४२२॥

तो समकालं सव्वाहिं चव विज्जाहरीहिं चइऊण ।  
 रक्खसिभावं विहियं नियपयइमणोहरं रूवं ॥५४२३॥  
 निब्भरनिद्वासुत्तस्स तस्स जह जह नियतिं वररूयं ।  
 तह तह अहिययरं चिय ताण मणे फुरइ मयणग्गी ॥५४२४॥  
 तो भणइ मयणसेणा 'न एस सामन्नमाणुसायारो ।  
 आयारसमुचिओ च्चिय एयस्स परक्कमो होही ॥५४२५॥  
 अहवा को संदेहो जयपयडपरक्कमो क्खु एस जुवा ।  
 हंतूण जेण पवणं रंडत्तं अम्ह आणीयं' ॥५४२६॥  
 थु थु त्ति पभणिऊणं सिंगारवईए जंपियं एयं ।  
 दीहाऊ(उ)ए जियंते इममि कहमम्ह रंडत्तं ?' ॥५४२७॥  
 तो भणइ चंदलेहा 'सहीओ किं तुम्ह जीविणेह ? ।  
 जं एस रूवनिज्जियमयणंगो कीरइ न भत्ता ?' ॥५४२८॥  
 तो कामसिरी जंपइ 'इमा पसिद्धी न अन्नहा होइ ।  
 जं बहुरयणा पियसहि ! वसुंधरा भयवई एसा ॥५४२९॥  
 अह भणइ पुण्फदंती 'जाव न पीणत्थणोवरिं धरिउं ।  
 आलिंजिज्जइ पियसहि ! ता कह सियलाइ मह अंगं?' ॥५४३०॥  
 तो भणइ वसंतसिरी ओसरह सहीउ ! तुम्ह चक्खुभया ।  
 उत्तारिस्सामि अहं इमस्स लोणं सहत्थेण ॥५४३१॥  
 तो भाणुमई पभणइ 'सहि ! सच्चमिणं पयंपियं तुमए ।  
 एवंविहंमि पुरिसे अवस्स चक्खूणि लग्गंति' ॥५४३२॥  
 भणियं पहावईए 'किं पलवह ? कुणह जमिह कायव्वं ।  
 सुविनिच्छियबुद्धीणं कज्जपहाणा समारंभा' ॥५४३३॥



तो भणइ मयणसेणा 'सहीओ ! आबालभावाउ(भावओ) अम्ह ।  
 समसुह-दुक्खसरूवो निव्वूढो पेम्मपब्भारो ॥५४३४॥  
 ता जइ संपइ एवं एगगमणाओ ता तहा भणह ।  
 जाव न जग्गइ एसो ता तुरियं अवहरामो त्ति' ॥५४३५॥  
 तो सव्वाहिं(हि) वि भणियं 'ताउ च्चिय पियसहीओ एयाओ ।  
 स च्चेय तुमं सुंदरि ! को किर इह वड्डणावसरो' ॥५४३६॥  
 ओमिच्छि पभणिऊणं सव्वाहिं वि विहियबहुपयत्ताहिं ।  
 अवहरिओ वीरवई ओसायणिविज्जजोएण ॥५४३७॥  
 चंपापुरीओ(उ) नीओ सो ताहिं अमाणुसाए अडवीए ।  
 ज्ञेयणसयपिहुलाए बहुसावय-साहिसुघणाए ॥५४३८॥  
 तो ताहिं तत्थ रइओ विज्जासत्तीए तहविहसरूवो ।  
 पासाओ अइरम्मो जह दिट्ठो जयवड्डायाए ॥५४३९॥  
 तह च्चेव वासभवणे कोमलतूलीसणाहसेज्जाए ।  
 मुक्को वीराहिवई जह न मणागंपि हल्लेइ ॥५४४०॥  
 तो ताहिं परोप्पर-एगचित्त-हिययाहिं भंतियं एवं ।  
 कमविहियजयवड्डायारूवाओ(ड) इमं अणुसा(स)रेह' ॥५४४१॥  
 तो भणइ चंदलेहा 'जइ कह वि न देवजोगओ एस ।  
 तुब्भे इच्छइ ता किं कायव्वमिमस्स पुरिसस्स?' ॥५४४२॥  
 तो भणियं सव्वाहिं वि जइ कहवि न एस मन्निही सुरयं ।  
 ता मिलिऊणमवस्सं वहियव्वो एस दुड्डप्पा ॥५४४३॥  
 अभिगमणीओ त्ति वियाणिऊण भत्तारवहकओ दोसो ।  
 एयस्स सरूवदंसणपयडियमयणाहिं सो खमिओ ॥५४४४॥

तो सव्वपहाणयरा सव्वाणुमईए पढममणुसरिया ।  
 नामेण मयणसेणा मयणपरायत्तसव्वंगा ॥५४४५॥  
 एत्थंतरे कुमारो निब्भरनिद्वापरव्वसो सुत्तो ।  
 सुमिणंतरंमि पेच्छइ सासणदेविं समवइन्नं ॥५४४६॥  
 विविहकरग्गपरिड्डिय-चक्काउहनीहरंतजालोलिं ।  
 परिवियडगरुडवाहण-परिठियं चक्किणिं देविं ॥५४४७॥  
 तो परमेसरिदंसण-ससंभमुब्भंतनयणतामरसो ।  
 पणमइ पणामविलुलियवसुहायलकुंतलकलावो ॥५४४८॥  
 तो सुप्पसन्नदेवी-मुहकमलविदिन्नअवितहासीसो ।  
 चक्केसरीए(इ) भणिओ वीराहिवई इमं वयणं ॥५४४९॥  
 'एयाओ पुत्त ! अइ वि भज्जाओ होंति पवणकेउत्स' ।  
 इयमाइ असेसो च्चिय जहक्कमं वइयरो कहिओ ॥५४५०॥  
 'एवंविहम्मि कज्जे जं उचियं होइ तं करेज्जासु' ।  
 इय जंपिऊण देवी खणेण अदंसणीहूया ॥५४५१॥  
 ओसारियओसायणि-निद्वाभंगेण जग्गिओ वीरो ।  
 तो नियइ जयवडायारूवंतरियं मयणसेणं ॥५४५२॥  
 सो सहसा चइऊणं सेज्जं उवविसइ धरणिवट्टंमि ।  
 तो भणइ ससंभंता ललियपयं मयणसेणा वि ॥५४५३॥  
 'किं नाह ! कायरो इव हियए धरिऊण किं पि कुवियप्पं ।  
 ओयरिओ सेज्जाओ ? करुणं काऊण मह कहसु' ॥५४५४॥  
 तो भणइ वीरसेणो विभावियासेसुविणपरमत्थो ।  
 'सुण बहिणि ! कायरो हं परजुयइपसंगभयभीओ' ॥५४५५॥

'बहिणि'त्ति निरावेक्खं निट्ठुरवयणं निसामिउं खयरी ।  
 अद्धिद्ववज्जनिवडण-पहारनिहय व्व सा भणइ ॥५४५६॥  
 'किं नाह ! तुमं एवं निद्वाभरपरव्वसो व्व झंखेसि ? ।  
 स च्चेय जयवडाया तुह दासी नउण परजुयई ॥५४५७॥  
 वेसाओ कत्थ देसे जणवयसामन्नजोव्वणंगाओ ।  
 परजुयईओ नरेसर ! मह साहसु इह भणिज्जंति ?' ॥५४५८॥  
 वीराहिवेण भणियं 'झंखेमि न पत्थुयं चिय भणामि ।  
 अद्ध खयरीओ(उ) तुब्भे भज्जाओ पवणकेउस्स ॥५४५९॥  
 ता मा मइलह सव्वाओ चैव अइतुच्छसोक्खकज्जंमि ।  
 अच्चुज्जलमुभयकुलं पिउपक्खं ससुरपक्खं च' ॥५४६०॥  
 तो वीरसेणवयणं सोउं निरवेक्खमियरखयरीओ ।  
 सहसा समागयाओ सविम्हमु(उ)ब्भंतनयणाओ ॥५४६१॥  
 तो ताण(उ?) तक्खण च्चिय विलक्खवयणाओ चत्तलज्जाओ ।  
 कुमराणुराइणीओ करेत्ति अह पत्थणं विविहं ॥५४६२॥  
 'हा सोहग्गमहानिहि ! कारुन्नमहासमुद ! एयाओ ।  
 तुम्हाणुराइणीओ अवहीरसु माऽणुकूलाओ ॥५४६३॥  
 अब्भत्थियाऽइवंका गुणहीणा खणमुहुत्तरंगिल्ला ।  
 सुरधणुसरिसा पुरिसा विहडंति पुणो न तुह सरिसा' ॥५४६४॥  
 तो भणइ वीरसेणो परनारिविवज्जणं कुणंतस्स ।  
 वंक्त-निग्गुणत्तण-खणिगत्तं तं पि मह इट्ठं' ॥५४६५॥  
 तो भणइ मयणसेणा 'भूगोयर ! केत्तियं व पलवेसि ? ।  
 जइ इच्छसि ता जीवसि अह निच्छसि ता धुवं मरसि ॥५४६६॥

एयाओ(उ) कूडबुद्धिय ! अड्ड वि करसंडियाओ व दिसाओ ।  
 एयाण पसाएणं भुंजसु निक्कंटयं रज्जं' ॥५४६७॥  
 तो भणइ वीरसेणो 'सीलविहीणाण जीवियं मरणं ।  
 मरणं पि हु सलहिज्जइ नियसीलं रक्खमाणस्स ॥५४६८॥  
 स च्वेय कूडबुद्धी जा परनारीपसत्तचित्तस्स ।  
 एवं जंपंतीओ अड्ड वि मह आवयाओ व्व' ॥५४६९॥  
 तो सव्वाहि वि भणियं 'सच्चमिणं आवयाओ तुह अम्हे' ।  
 इय भणिरुण ठियाओ रक्खसिभावेण सव्वाओ ॥५४७०॥  
 तो भणइ वीरसेणो 'किं इमिणा बालभेसणपरेण ? ।  
 धिद्धो मि रक्खसाणं सुपसिद्धो भेक्खसो[अ]हयं ॥५४७१॥  
 ता जाह मा विगोयह अप्पाणं एरिसेहिं रूवेहिं ।  
 पावंति परिभवपयं हवंति जे निफ(प्फ)लारंभा' ॥५४७२॥  
 तो ताओ वीरसेणं भणंति करकलियनिसियकत्तीओ ।  
 'रे पवणकेउवैरिय ! जइ सक्कसि गिण्ह ता खगं ॥५४७३॥  
 इण्हि न सव्वह च्विय जीवसि रे पावकम्म ! निल्लज्ज !' ।  
 ता सरसु इड्डेवं' इय भणित्तं वंति(ठंति?) कुद्धाओ ॥५४७४॥  
 तो भणइ वीरनाहो 'आयासिज्जइ किमेत्तियं अप्पा ? ।  
 जुयइवहत्थं सुंदरि ! गेण्हामि कयाइ नो सत्थं' ॥५४७५॥  
 एवं जंपंतो च्विय कुमरो सएयाहि ताहि पावाहिं ।  
 कयकत्तियापहारं समकालं हणिउमाढत्तो ॥५४७६॥  
 कुमरेण वि समकालं अउव्वकरणुप्पयंतदेहेण ।  
 ताण करकत्तियाओ समरवियड्ढेण गहियाओ ॥५४७७॥

तो ताहिं तक्खण च्चिय कुमरो कयखग्ग-खेडयकराहिं ।  
पारद्धो निम्महिउं समयं चिय ओत्थरंतीहिं ॥५४७८॥  
पुण तह चेव कुमारो उद्दालइ खग्ग-खेडयाइं पि ।  
ताहिं पि करे कलिया सुतिक्वधारा महापरसू ॥५४७९॥  
ते वि तह च्चिय गहिया कुमरेण अजायदेहखेएण ।  
एवं निराउहाओ अणेगहा ताओ(उ) विहियाओ ॥५४८०॥  
पुण ताहिं तक्खण च्चिय विउरुव्वियदिढसरीरबंधाहिं ।  
सव्वाहिं सिलाओ(उ) करे गहियाओ अईव गरुयाओ ॥५४८१॥  
पिहियंबराओ दट्ठुं तिरोहियासेसतरणिकिरणाओ ।  
अइगरुयसिलाओ(उ) तओ उप्पयइ नहे महावीरो ॥५४८२॥  
दिढवज्जघायनिट्ठुर-करमुट्ठिपहारताडणेणइ ।  
धरणीए पाडियाओ(उ) धूलीसेसाउ काऊण ॥५४८३॥  
तो रोसवसविसंखल-दुव्वयणपराहिं ताहिं सव्वाहिं ।  
विज्जासत्तीए करे जहक्कमं पव्वया गहिया ॥५४८४॥  
तो भणइ वीरसेणो 'चिरपरिचियमह पव्वयं जुज्झं ।  
अन्नेण अउव्वेण रणेण केणाऽवि जुज्झेह' ॥५४८५॥  
तो अन्नोन्नं ताओ समु(म्मु)हमवलोइऊण जंपंति ।  
जो अमह सव्वथामो सो च्चिय एयस्स उवहासो' ॥५४८६॥  
तो ताहिं सरोसत्थं ते च्चिय सेला विसालसिंगगा ।  
हत्येहिं तोलिऊणं पक्खित्ता वीरसेणस्स ॥५४८७॥  
कुमरो दक्खत्तेणं निवड्ढणविसजायनियडभावाण ।  
उप्पइऊण सिरग्गं आरुहइ गिरीण गरुयाण ॥५४८८॥

तो ताओ गिरिसिरत्थं सव्वंगावयव्व(व)देहसंपुन्नं ।  
 दट्ठुण वीरसेणं भएण चित्तंमि खुहियाओ ॥५४८९॥  
 जंपत्ति य अन्नोन्नं 'एस च्चिय अम्ह जीवियव्वासा ।  
 नारीओ त्ति सकरुणं जं न कुणइ खंडखंडेहिं ॥५४९०॥  
 अपहुप्पंतीओ तओ तडत्ति तडिदंडतडयडरवेण ।  
 बीहाविऊण वीरं गयाओ दुक्खं गहेऊण ॥५४९१॥  
 तो एकुंगो कुमरो चित्तइ चित्तेण 'पेच्छ-अच्छरियं ।  
 एयाओ कत्थ ? चक्किणिदेवी वि य कत्थ सुविणंमि ? ॥५४९२॥  
 संपय-विवयाओ जओ समयं चिय संवरंति पुरिसाण ।  
 लद्धूण देसकालं पच्छा पयडाओ जायंति ॥५४९३॥  
 हा ! पेच्छ भवसभावं न ताओ नारीओ नेयं तं भवणं ।  
 गिरिणो वि न ते सव्वं नट्टं मायंदजालं व्व ॥५४९४॥  
 जाहिं चिय अवहरिओ अणुरायपरव्वसाहि नारीहिं ।  
 ताओ चेय सरोसं पहरंति ममंमि नीसंसं ॥५४९५॥  
 वीसरिओ नियभत्ता चिरपरिचियपेम्मबंधसंबंधो ।  
 हा हा ! निल(ल्ल)ज्जाओ तव्वहगे कह णु रत्ताओ ? ॥५४९६॥  
 अहवा न किंपि कज्जं अणिड्डचित्ताए मज्झ एयाए ।  
 अइकुडिलसहावाओ नारीओ होंति पयईए ॥५४९७॥  
 ता कह होही संपइ चंपागमणं पहो व्व को एत्थ ?' ।  
 इय चित्तिऊण कुमरो उत्तरदिसिसमु(म्मु)हं चलिओ ॥५४९८॥  
 पेच्छइ निरंतरं चिय धव-धम्मण-धाइनद्धधाहोडं ।  
 भल्लायंकोल्ल-महल्लसल्लईसाहिसंकिन्नं ॥५४९९॥

सरसरलसाल-वंजुल-तमाल-तहताल-बउलपरिकलियं ।  
 सज्ज-करंज-महज्जुण-वड-पिप्पल-बहुप्पलासं च ॥५५००॥  
 जंबीर-जंबु-लिंबुय-लिंबं-बय-घणकयंबसंबद्धं ।  
 एला-लवंग-लवली-कक्कोललयाउलं अडविं ॥५५०१॥  
 जा कुमरदंसणेण व फुरंतघणमयणविसमदावगी ।  
 पसरंतविविह<sup>१</sup>विभमनिरंतरा झिज्झइ खणेण ॥५५०२॥  
 अंतो परियोलिरसरलनेत्तारं<sup>२</sup>जणविडविलाला ।  
 निककुट्टणि व्व वेसा जा सोहइ बहुभुयंगपिया (?) ॥५५०३॥  
 हरिनिट्टुरनहदारिय-हरिण-क्खसजद्धरविलुलमाणंता ।  
 नवपल्लवारुणाभा जा रेहइ कालसंज्झ व्व ॥५५०४॥  
 हरिनिब्भन्नमहाकरि-निम्मलघणथूलमोत्तिया सहइ ।  
 मायण्हियामहोयहिवेल व्व भमंतबहुवाहा ॥५५०५॥  
 एवंविहअडवीए परिब्भमंतो भमंतसरहाए ।  
 पत्तो घणतरुयरसंडमंडियं जुन्नदेवउलं ॥५५०६॥  
 दूराओ च्चिय दिढलोह-खप्परीपडणताडण(णु)ब्भूओ ।  
 निसुओ झणकाररवो अंधियजूए वराडीण ॥५५०७॥  
 चिंतइ 'इह जूययरा के वि भविस्संति अन्नहा कह णु ।  
 सुम्मइ निवडंतकवडियाण तारो झणक्कारो ?' ॥५५०८॥  
 तो कोऊहलतरलियचित्तो सो जाइ ताण उवरिंमि ।  
 पेच्छइ पुरओ गरुयं नाणाजूयारसंघट्टं ॥५५०९॥  
 तो सव्वेहिं वि समयं तिरिच्छवलियच्छि-कंठ-वयणेहिं ।  
 भाणु व्व भासुरंगो सो दिट्ठो जूयगारेहिं ॥५५१०॥

१. वीनां पक्षिणां भ्रमो विभ्रमो विलासश्च ॥ २. नेत्रस्तरुविशेषः ॥ ३. अंजनतरवः ॥

४. हिरण्यकशिपुः, पक्षे हरिणाः खसा वनेचराः ॥ ५. व्याधः प्रवाहाश्च ॥ खंता० पत्तौ टिप्पण्यः ॥

'ए एहिं(हि), कुण पइडुं, उवविससु खणं'ति पभणितुं तेहिं ।  
 सव्वेहिं वि अवयासो दिन्नो सिरिवीरसेणस्स ॥५५११॥  
 उवविडुंमि कुमारे सहसा घणघंटियारवकरालं ।  
 ओयरमाणं दिडुं नहाओ दिव्वं वरविमाणं ॥५५१२॥  
 तो नीहरइ तुरंतो वच्छत्थलघोलमाणहारलओ ।  
 दिव्वंबरो किरीडी विज्जाहरदारओ तम्हा ॥५५१३॥  
 सो भणइ 'सारियमिणं विमाणरयणं अचिंतमाहप्पं ।  
 जइ को वि तुम्ह वीरो ता सारउ मज्झ संगामं' ॥५५१४॥  
 तो सव्वे जूयारा तुन्डिक्का ठंति तस्स वयणेण ।  
 मोत्तूण महासत्तं जएक्कसुहडं महावीरं ॥५५१५॥  
 ईसीसि विहसिऊणं भणइ कुमारो 'किमेरिसं तुज्झ ।  
 संगाममहावसणं जेण विमाणेण कीणासि ?' ॥५५१६॥  
 विज्जाहरेण भणियं 'जइ सत्ती अत्थि तुज्झ ता रमसु ।  
 पुव्वभणियाए सुंदर ! चलियव्वं नो ववत्थाए' ॥५५१७॥  
 तो भणइ वीरसेणो 'भणियववत्थाए एत्थ जो चलइ ।  
 निग्गहणिज्जोऽवस्सं अन्नोन्नं सो सयं चेव' ॥५५१८॥  
 तो रोसतंबिरच्छो खयरो हिययंतपयडियामरिसो ।  
 'सच्चं खु को न मन्नइ ?' इय भणितुं रमिउमाढत्तो ॥५५१९॥  
 तो तक्खणेण लद्धा लीहा कुमरेण जायहरिसेण ।  
 विज्जाहराओ गहियं <sup>१</sup>[विमाणरयणं पहिट्ठेण ॥५५२०॥  
 एत्थंतरम्मि] अन्नो पयघघरिघोसबहिरियदियंतो ।  
 वामकरकलियखगगो दक्खिणडमडमियडमरुकरो ॥५५२१॥  
 आगुंफंतपलंबिरकुलघोसो पिहियटोणियसिरग्गो ।

१. [ ] एतदन्तर्गतः अंशः ताडपत्रे न दृश्यते । ला. प्रतावेव ॥



जोगिंग(गिं)दो सच्चविओ समोयरंतो नहयलाओ ॥५५२२॥  
 ओयररिऊण सवेयं उवविद्धो सो वि तह कडित्तं ते ।  
 १[दट्टूण वीरसेणं विम्हयवसविहि]यसिरकंप्पो(पो) ॥५५२३॥  
 सो कुमरं पइ जंपइ 'खग्गं मह सव्वकामियं एयं ।  
 जं चिंतिज्जइ चित्ते तं सव्वं होइ एयाओ ॥५५२४॥  
 आसीविसे व दिट्ठे इमंमि सहस त्ति मुक्कमज्जायं ।  
 परसेनं(न्नं) पि पलायइ विहडंतमडफ(प्फ)रफडोहं ॥५५२५॥  
 चिंतियमेत्ताइं चियं भूत्तो नणु नीहरंति सेन्नाइं ।  
 करि-तुरय-नर-महारह-दिव्वत्थाइं असंखाइं ॥५५२६॥  
 जेतूण सत्तुनिवहं पुणो वि इह चेव ताइं लीयंति ।  
 एमाइणो असंखा सत्तीओ इमस्स खग्गस्स ॥५५२७॥  
 थंभइ जलं च जलणं नहगमणं कुणइ हणइ वाहीओ ।  
 विद्देसण-वसियरणं थंभइ मोहाइयं जणइ ॥५५२८॥  
 जइ सच्चं चिय वीरो ता खग्गमिणं अचिंतसामत्थं ।  
 नियमंसकयपणेणं २[अदीणमणसो परिकिणीहि ॥५५२९॥  
 एयं[च]] मज्झं खग्गं सिद्धं सिरिवीरसेणमित्तस्स ।  
 साहिज्जेणं दक्खिणजलहितडे बंधुयत्तस्स ॥५५३०॥  
 इह कौलसासणा किर हवंति विविहाओ खुद्दविज्जाओ ।  
 सिज्झंति ताओ सुंदर ! विविहाहिं य खुद्दकिरियाहिं ॥५५३१॥  
 महु-मज्ज-मंस-वस-रुहिरमाइविविहेहिं भक्ख-पाणेहिं ।  
 खुद्दपयईणं ता<sup>३</sup>[णं एवं चिय जायए तित्ती ॥५५३२॥

१.२. एतच्चिह्नस्थोऽशः ला. प्रतावेव, न ता. प्रतौ ॥

३. एतच्चिह्नस्थोऽशः ला. प्रतावेव, न ता. प्रतौ ॥

ता तिहुय]णवसियरणित्ति नाम मह अत्थि वीर ! वरविज्जा ।  
 तिस्सा पसाहणत्थं होमं मंसेण काहिस्सं ॥५५३३॥  
 मंसं पि न जं तं च्चिय गहियव्वं किंतु सयलभुयणंमि ।  
 एक्को च्चिय जो वीरो न जस्स अत्रो समो भुयणे ॥५५३४॥  
 तं चिय नियविक्रमेणं अहवा जूएण सव्वहा जेतुं ।  
 इय दोहिं उवाएहिं गहियव्वं तस्स मंसं ति' ॥५५३५॥  
 तो भणइ वीरसेणो 'किं इमिणा पोसिएण मंसेण ? ।  
 तं चिय सफलं मंसं जं तुह कज्जंमि उवयरइ ॥५५३६॥  
 ता किमिह जुज्झिएणं जूएण वि किमिह संसयपरेण ।  
 एमेव देमि मंसं' इय भणिउं कड्डए छुरिउं(यं) ॥५५३७॥  
 तो जोइंदो जंपइ 'कहियं नणु पुव्वमेव तुह वीर ! ।  
 जं समरंगण-जूएहिं चेव मंसं गहेयव्वं' ॥५५३८॥  
 तो भणइ वीरसेणो 'तुह वयणं मह पमाणमिह कज्जे ।  
 समरस्स व जूयस्स व तुह दोहिं(हि) वि दायगो अहयं' ॥५५३९॥  
 तो जोइंदो पभणइ 'किं वीर ! रणेण ? पत्थुयं जूयं ।  
 तं चेव मए सद्धिं कहियववत्थाए खेत्तेसु' ॥५५४०॥  
 तो भणइ वीरनाहो 'एवं होउ'त्ति खेलिउं लग्गा ।  
 खेलुंताणं ताणं सव्वदियहो अइकुंतो ॥५५४१॥  
 चिंतइ कुमरो 'एसो जोइंदो मंतसिद्धिसंपत्तो ।  
 जेतुं न जाइ अहवा सुमरामि जिणिंद-नवक्कारं ॥५५४२॥  
 पंचनमोक्कारो खलु दुव्विज्जा-मंत-तंतसामत्थं ।  
 हियए सुमरियमेत्तो विहडावइ नत्थि संदेहो' ॥५५४३॥

तो सावहाणचित्तो कुमरो सुमरेइ जिणनमोक्कारं ।  
 हयमंत-तंतसत्तिं जोइंदं जिणइ सहस्स(स) त्ति ॥५५४४॥  
 तो जित्तं नाऊणं अप्पाणं तक्खणेण जोइंदो ।  
 कयखग्गकरो सहसा उप्पइओ गग्गणमग्गंमि ॥५५४५॥  
 तो जूयजित्तखेयरविमाणमारुहइ तक्खणे कुमरो ।  
 उप्पइऊणं लग्गो अणुमग्गे जोइनाहस्स ॥५५४६॥  
 तो कुमरो वि सवेगं पुरओ ठाऊण तस्स जोइस्स ।  
 जंपइ 'न जोइ ! वीरा छलेण छलिउं तरिज्जंति ॥५५४७॥  
 जित्तं मि हु खग्गमिणं देतो हं तुज्झ जइ सि पत्थंतो ।  
 तुम्हारिसाण भिक्खुय ! विहूसणं पत्थणा चेव ॥५५४८॥  
 संपइ पुण उभयं चिय तुमए नित्रासियं महामुक्ख ! ।  
 चिरपरिच(चि)यसोजन्नं कमागयं भिक्खुगत्तं च ॥५५४९॥  
 असुरो सुरो व्व खयरो जइ एवं सो ममं इह छलंतो ।  
 ता जाणंतो सच्चवं तुमं सि पुण पयडगोज्झ व्व ॥५५५०॥  
 ता जइ किवाणमेयं जह तुमए वन्नियं तहसरूवं ।  
 तुहभणियववत्थाए जइ जित्तं ता करे चडउ' ॥५५५१॥  
 तो कुमरजंपियाणंतरेण तं विप्फुरंतघणकिरणं ।  
 खग्गं विहियपयाहिणकुमारहत्थंमि संकमइ ॥५५५२॥  
 विहियपराहववसजायकुमरबहुरोसजलणदुद्धरिसं ।  
 दट्ठं पि अपारंतो तस्स तणुं पलइ जोइंदो ॥५५५३॥  
 तो तक्खणेण कुमरो तेण विमाणेण तेण खग्गेण ।  
 जाओ असमपहावो विज्जाहरचक्खवट्ठि व्व ॥५५५४॥

विज्जाहराण जायइ सविग्घविज्जापसाहणकएहिं ।  
 दुक्खेहिं खेयरत्तं धन्नाण पुणो अ(5)किलेसेण ॥५५५५॥  
 सिद्धत्तं पि हु जायइ गुलियासिद्धाइयाण किच्छेण ।  
 एयस्स पुणो जायं अकयदुहं खग्गसिद्धत्तं ॥५५५६॥  
 सव्वेसिं सिद्धाणं गरुययराणं पि हुंति अइगरुया ।  
 जे सव्वसिद्धजयसिरिवसियरणा पुत्रसंसिद्धा ॥५५५७॥  
 तो चिंतइ वीरवरो 'एण्ह वच्चामि चंपनयरीए ।  
 पत्थुयकज्जपसाहणवावारे उज्जमिस्सामि' ॥५५५८॥  
 तो मणचिंतियपसरंतवेयमणिमयविमाणमारूढो ।  
 कय चंपा-संकप्पो संचलिओ उत्तराभिमुहं ॥५५५९॥  
 गयणंगणपरिसक्किरकिन्नर-गंधव्व-सिद्ध-जक्खेहिं ।  
 भयतरलमाणसेहिं दूरं परिहरियपंधाणं ॥५५६०॥  
 अणुकूलपव्व(व)णचंचलविउरुव्विधयसहस्सबाहूहिं ।  
 गंभीरगयणसायरमदिट्ठपारं तरंतं च ॥५५६१॥  
 उभयंतपासपसरियविमाणमुत्तामयूहनविहेहिं ।  
 सेवाणुसारिसुरसरिसंकं व नहे पयासंतं ॥५५६२॥  
 बहलिंदनील-मरगय-मयूहसामलियचउदिसाभोयं ।  
 वीराहिवकीलत्थं चलमुज्जाणं वहंतं व ॥५५६३॥  
 वीरविणोयत्थं पिव पिहुफलहसिलानिबद्धरयणसिलं ।  
 हिमवंतरोहणेणं पयडंतं मल्लजुज्झं च(व) ॥५५६४॥  
 निम्मलमणिभित्तिथलपडिबिबियघणकिवाणकरकुमरं ।  
 परिकलियअंगरक्खणपरिवारदुलंघवेढं च ॥५५६५॥

धंभसिरग्गनिवेसियपुत्तलियाकलियवंसवीणघणं ।  
 कमसंविभत्तमारुयकयमहुरसरं व गायंतं ॥५५६६॥  
 एवंविहं विमाणं अवलोयंतस्स वीरसेणस्स ।  
 अच्छरियरसविमीसो आसि वियप्पो मणे एवं ॥५५६७॥  
 'थूलयरमणिसिलासयगरुयस्स वि कह णु एरिसो वेओ ? ।  
 जं चुलुयपमाणं पिव तिलोयमवि होइ एयस्स ? ॥५५६८॥  
 भण केत्तियं व पसरइ पयइजडं माणसं मणुस्साण ? ।  
 मन्ने लोयालोओ विसओ नाणस्स व इमस्स ॥५५६९॥  
 एगट्टं पि हु एयं सव्वपएसद्धियं व्व पडिहाइ ।  
 संकप्पाओ पढमं जं दीसइ वंछिए ठाणे ॥५५७०॥  
 दूरयरपसारियरयणकिरिणरज्जूहिं करसियाइं व ।  
 मन्ने लीयंति इमंमि चेव सयलाइं ठाणाइं ॥५५७१॥  
 इय एवमाइ कुमरो विमाणविसयं वियप्पए जाव ।  
 ता तलनिविट्ठदिट्ठी पेच्छइ चंपापुरी(रिं) रम्मं ॥५५७२॥  
 नीसेसघरनिरंतरनिबद्धसुसिणिद्धतोरणसमूहं ।  
 कयहट्टभवणसोहं वज्जिरबहुतूरसम्मइं ॥५५७३॥  
 परितुट्टसयललोयं उज्जलनेवत्थपरियणाइत्रं ।  
 रायउलं पि य दिट्टं गयणग्गठिएण वीरेण ॥५५७४॥  
 तो तं तहासरूवं वइयरमवलोइऊण वीरवई ।  
 कोऊहलतरलच्छे अह चिंतिउमेवमाढत्तो ॥५५७५॥  
 'किं एत्थ कोइ पायं संभविही नूण उच्छवविसेसो ? ।  
 अहवा इह रायउले संजाओ को वि आणंदो ? ॥५५७६॥

अहवा वि एत्थ कस्स वि जत्ता वा देवयाविसेसस्स ? ।  
 पेच्छामि जेण एयं निरंतरं पमुइयं नयरिं ॥५५७७॥  
 इयमाइ चिंतिऊणं 'को होही एत्थ कज्जपरमत्थो ?' ।  
 अवबुज्झित्तं विमाणं सहसा नियडीकयं तेण ॥५५७८॥  
 मंदरमहणसमुब्भवअइगरुयसमुद्धोसगंभीरं ।  
 जणसम्महुल्लसियं आइन्नइ नरवईघोसं ॥५५७९॥  
 कमलट्टियहंसनिवेससुहयपयउज्जलावहासाओ ।  
 आलोयइ चंपाए सीमाओ सरस्सईओ व्व ॥५५८०॥  
 चउप्पेरंतनिरंतरवियडसरन्नोन्नलग्घणपालिं ।  
 सायर(संतर?)दीवमहोयहिकयवेढं जंबुदीवं व ॥५५८१॥  
 पेच्छइ पायारनियंबलुलियपरिहंबुअंबराभोयं ।  
 घणपासायपओहरमरविंदमुहिं व वरतरुणिं ॥५५८२॥  
 सुविसालदीहरच्छं सुविभत्ततियं च सुरयणचउक्कुं ।  
 बहुजणवयपरिमलियं वेसाविलयं व रमणीयं ॥५५८३॥  
 इय निउणयरनिरिक्खयनयरीसोहावहरियमण-नयणो ।  
 पन्नंगणाए गेहे वीरो दिट्ठिं परिट्ठवइ ॥५५८४॥  
 पेच्छइ सच्छंद-नरिंदलोयलूडिज्जमाणभंडारं ।  
 सुपयंडसुहडहक्का वित्तत्थअसेसदासिगणं ॥५५८५॥  
 करवालकरनिरंतरनरसीहनरेहिं निबिडकयवेढं ।  
 अक्कुंदमाणपरियणघणसद्धनिरुद्धगयणयलं ॥५५८६॥

१. चत्वारो ये नगरीपर्यन्तास्तेषु निरन्तराणि यानि विकटसरांसि तेषामन्योन्यलग्नाः पालयो यत्र सा पुरी कीदृशी ? सह अन्तरद्वीपैर्वर्तते सान्तरद्वीपो यो महोदधिस्तेन कृतवेष्यो जम्बूद्वीप इव सा पुरी, खंता. टि. ।

कत्थवि नरिंदपुरिसो सव्वालंकारभूसियं चेडिं ।  
 एगंते छोढूणं गेण्हइ सव्वं पि आहरणं ॥५५८७॥  
 अन्नतो पुण एगा भएण मुहखित्तअंगुलीदसगा ।  
 भंडारिणि त्ति काउं सेहिज्जइ रायपुरिसेहिं ॥५५८८॥  
 अन्ने दुडुभुयंगा जे पुढ्वि वंचिया वणे घेत्तुं ।  
 ते अवसरो त्ति मुणिउं ससत्ति सरिसं अवयरंति ॥५५८९॥  
 अन्ने वि मित्त-सेणा-नरवइहढदिन्नदुडुआएसा ।  
 चिरपरिचयलज्जाए एमेव कुणांति हलबोलं ॥५५९०॥  
 गरुयाणुरायरत्तो तिस्सा अमणोरमो नरो कोइ ।  
 पयडंतो नियदुक्खं तचि(च्चि)त्ताराहणं कुणइ ॥५५९१॥  
 अणुसोयइ पुरिलोओ 'हा ! नरवइणा अकज्जमायरियं ।  
 जं वीरसेणरोसा अवयरियं जयवडायाए ॥५५९२॥  
 चोरस्स विसिद्धस्स य रिउस्स देसंतरागयस्साऽवि ।  
 वेसाओ च्विय जम्हा आवासो सव्वलोयस्स' ॥५५९३॥  
 तो तं खणेण सव्वं अवहरियासेसविहववित्थारं ।  
 जायं रोरगिहं पिव अइदुल्लुहखप्परद्धं पि ॥५५९४॥  
 एत्थंतरे कुमारो नहडिओ पेच्छिऊण चित्तेइ ।  
 'हरिस-विसायविमीसं पुरीए पेच्छामि ववहरणं ॥५५९५॥  
 एत्तो पुरी असेसा आणंदरसे व्व निब्भरनिमग्गा ।  
 स च्वेय पुणो एत्तो गुरुसोयावत्तखित्त व्व ॥५५९६॥  
 अहवा किमेत्थ चोज्जं ? संसारो च्विय पुरी न परमेगा ।  
 हरिस-विसायाणुगओ तक्कम्मनिमित्तजोएण ॥५५९७॥

नणु केण कारणेणं सुसियमिमं मंदिरं वराईए ।  
 मन्ने मज्झ निमित्तो इमीए एसो महाणत्थो ॥५५९८॥  
 तं परिवह्णइ ठाणं सप्पुरिसो जत्थ निवसइ खणंपि ।  
 मह संगेण उ इस्सा विवरीयं एत्थ संजायं ॥५५९९॥  
 किमणिद्धिचिंतिएणं ? परमत्थं ताव इह गवेसामि ।  
 पुण देसकालमुचियं कज्जारंभे जइस्सामि' ॥५६००॥  
 एत्थंतरे कुमारो नियडीकयनियविमाणभावेण ।  
 पेच्छइ जहासरूवं नीसंदिद्धं च निसुणेइ ॥५६०१॥  
 अह करुणमारसंती घेत्तूणं घणसिरग्गकेसेसु ।  
 आयद्धिया गिहाओ भडेहिं तुरियं जयवडाया ॥५६०२॥  
 अक्कंदमाणपरियणपरियरिया पुरिजणेहिं दीसंती ।  
 निब्भच्छिज्जंती घणकक्कसवयणेहिं पुरिसेहिं ॥५६०३॥  
 'आ पावे ! निल्लज्जे ! कयग्घचूडामणी तुमं जीए ।  
 नरसीहपसायाणं जं उचियं तं तए विहियं ॥५६०४॥  
 सो दुड्डप्पा धिद्धो अदिद्धपुव्वो कओ तए इद्धो ।  
 न उणो महानरिंदो गुणेसु आरोविया जेण ॥५६०५॥  
 जइ सच्चं सो वीरो आगंतूणं च ता सयं एत्थ ।  
 इह किन्न तुमं रक्खइ मारिज्जंतिं नरिंदेण ?' ॥५६०६॥  
 इय एवमाइ उच्छिखलाइं वयणाइं ताण सोऊण ।  
 चिंतइ वीराहिवई गरुयाहिणिवेसफुरिओद्धो ॥५६०७॥  
 'निच्छइयमिमं पुब्बिं' मएऽणुमाणेण जं महनिमित्तो ।  
 एसोऽणत्थो सव्वो संजाओ जयवडायाए ॥५६०८॥



ता किमिह पडिविहेयं एसो च्विय दुट्टसुहडसंघट्टो ।  
 मह खग्गवासिणो च्विय जमस्स अतिहित्तणं जाओ(उ) ॥५६०९॥  
 अहवा नेवं जुज्जइ अविसिद्धाएसकारिणो एए ।  
 जुयईसु परक्कमिणो न मारणीया मह हवंति ॥५६१०॥  
 ता किंतु एस राया सरायगिह-परियणो ससेत्रो य ।  
 उच्चल्लिरुण उहं खिवामि पायालकुच्छीए ॥५६११॥  
 एयं पि अजुत्तं चिय निग्गहणिज्जे इमंमि नरसीहे ।  
 रायगिह-सेन्न-परियणमाईणं नत्थि अवरालो ॥५६१२॥  
 ता होउ इमे संपइ किमिमीए कुणंति ताव पेच्छमि ।  
 इय चिंतंते बीरे सा नीया रायपासंमि ॥५६१३॥  
 ठविऊण रायपुरओ विन्नत्तं तेहिं 'देव ! जं किं पि ।  
 अत्थि इमीए असेसं तं तुह भंडारमाणीयं ॥५६१४॥  
 एसा वि देव ! संपइ आणीया तुह समीवमिह जुत्तं ।  
 जं होउ तं सयं च्विय नरनाहो कुणउ एयाए' ॥५६१५॥  
 तो राइणा सरोसं निदयदट्टोद्धभिउडिभीमेण ।  
 आणत्तं 'रे ! आणह तुरियं नेमिच्चियं तं पि' ॥५६१६॥  
 तो आएसाणंतरमाणीओ सो वि रायपुरिसेहिं ।  
 पच्छ बाहुनिबद्धो हम्मंतो लउडपहारेहिं ॥५६१७॥  
 सो वि तह चेव पुरओ ठविओ पासंमि जयवडायए ।  
 दिट्टो नरसीहेणं सककुसं भणिउमाढत्तो ॥५६१८॥  
 कुमरो वि नहयलत्थो अदीसमाणो असिप्पहावेण ।  
 रोसफुरियाहरोट्टो नरेदचेट्टं पलोएइ ॥५६१९॥

भणियं नरसीहेणं 'रे ! रे ! जोइसिय ! संपयं कहसु ।  
 सो कत्थ तुज्झ वीरो उप्पन्नो पाव ! मरिऊण ?' ॥५६२०॥  
 नेमित्तिएण भणियं 'न जुज्जए तुह नरिंद ! इय भणित्तं ।  
 कह तुह मणोरहेहि य वयणेहिं य मरइ सो कुमरो ? ॥५६२१॥  
 सो देव ! जायमेत्तो आइद्धो नणु विसिद्धलोएहिं ।  
 निरुवक्कमाउओ जं वरिससहस्सा(उ)ओ तह य' ॥५६२२॥  
 पुण भणियं नरवइणा 'गओ सि एयाए कूडविज्जाए ।  
 नणु पवणकेउणो भारियाहिं सो मारिओ कल्ले' ॥५६२३॥  
 पुण जंपइ जोइसिओ 'किं पलवसि थु त्थु थु त्ति तुह वयणं ।  
 किं न नियच्छसि उद्धं विमाणपरिसंठियं देवं ?' ॥५६२४॥  
 तो राइणा सरोसं दुव्वयणुत्तेजिएण पुण भणियं ।  
 'आयन्नह रे लोया ! पच्चक्खमिमस्स अलियत्तं ॥५६२५॥  
 कल्लदिणे सव्वेहिं वि निसुयं किर पवणकेउभज्जाहिं ।  
 नेऊण अडविमज्झे निहओ जं ताहिं मह कहियं ॥५६२६॥  
 अड्ढहि ताहि सरोसं उक्कत्तिय कत्तियाहिं तस्स पलं ।  
 खद्धो जह तह ताणं कोवबुभुक्खाइणो संता ॥५६२७॥  
 वलियाहि ताहि कहियं एक[क्कु]स्स न मज्झ किंतु चंपाए ।  
 मिलियस्स असेस[स्स] वि लोयस्स पहिडुवयणाहिं ॥५६२८॥  
 एयनिमित्तेणं चिय मए पहिड्ढेण उच्छवो विहिओ ।  
 फोडावियं च जम्हा बिल्लं बिल्लेण बुद्धीए ॥५६२९॥  
 ता असमंजसजंपिर ! रे ! रे ! जोइसिय ! अच्छउ इमं ता ।  
 मह एयं चिय साहसु तुह मरणं कस्स हत्थेण ? ॥५६३०॥

एयाए वि दासीए(इ) अच्चत्थं वीरसेणरत्ताए ।  
 मारिज्जंतीए मए सो काही इह परिताणं ॥५६३१॥  
 एवं भणिऊण तओ नरसीहो रोसतांबिरनिडालो ।  
 धरइ परियारसहियं वामकरगंगमि करवालं ॥५६३२॥  
 दिढमुट्ठिनिविट्ठेणं दाहिणहत्थेण कड्ढइ सरोसं ।  
 दिठे(ट्ठे)ण जेण सव्वो भयरतरलच्छो जणो जाओ ॥५६३३॥  
 पुण पुच्छिण्ण भणियं जोइसिएणं 'नरिंद ! मह मरणं ।  
 एयाइ वि वेसाए दोवाससए वि न उ अज्ज ॥५६३४॥  
 वयपरिणामे अहयं दिक्खं घेत्तूण कयत्तवच्चरणो ।  
 कयअणसणाइकिरिओ सुद्धमणोऽहं मरिस्सामि ॥५६३५॥  
 एसा वि जयवडाया जहासुहं वीरसेणदिन्नाइं ।  
 भोत्तूण बहुसुहाइं पज्जंते विहियजिणधम्मा ॥५६३६॥  
 झायंती नवकारं अणसणविहिणा य वासुपुज्जस्स ।  
 पुरओ मरिऊण तओ सोहम्मे सुरवरी होही' ॥५६३७॥  
 इय एवं जोइसियं जंपंतं तं च जयवडायं पि ।  
 राया अहिद्ववंतो इय एवं भणिउमाढत्तो ॥५६३८॥  
 दोन्नि वि समकालं चिय कयावराहाइं वेरिपक्खाइं ।  
 मारिस्सं न खमिस्सं जो रक्खइ जाह तं सरणं ॥५६३९॥  
 तो जंपइ जोइसिओ जयवडाया य वीरसेणो अम्ह(ऽम्ह) ।  
 सरणं भुयणसरन्नो पज्जंते वासुपुज्जो य' ॥५६४०॥  
 तो कुमरनामकित्तणसमहियसंजायरोसफुरिओट्ठो ।  
 उग्गिरइ खग्गरयणं नरसीहो हणणबुद्धीए ॥५६४१॥

तो परियणेण भणियं मंतियणेणं च कणयरेहाए ।  
‘एयं देव ! अकज्जं इह-परलोए विरुद्धं च ॥५६४२॥  
जो जिणनामुच्चारणमेत्तं नरो वियाणइ न अन्नं ।  
सो होइ पूयणीओ न उण अवन्नारिहो होइ ॥५६४३॥  
जो नामसावए वि हु कुणइ अमेत्तिं अनायतत्ते वि ।  
सो खलु न सम्मदिट्ठी मिच्छदि(दि)ठी नरो नेओ ॥५६४४॥  
जो पुण जीवाइपयत्थजाणओ मुणियजिणमयरहस्सो ।  
तंमि वहज्जवसाओ नरयफलो अणंतभवहेऊ’ ॥५६४५॥  
तो कोवपरवसेणं भणियं नरसीहराइणा एवं ।  
वच्चह सुगइं तुब्भे साहम्मियपक्खवाएण ॥५६४६॥  
अहयं पुण एयाइं मज्झ अणिट्ठे पयट्टमाणाइं ।  
मारंतो जइ नरयं जाइस्सं होउ एयं पि ॥५६४७॥  
किर सिट्ठपालणं चिय अविसिट्ठविणिग्गहो य निवधम्मो ।  
नियधम्ममणुडुंतस्स मज्झ जं होइ तं होउ’ ॥५६४८॥  
तो तेसिं सव्वेसिं वयणं अवमन्निऊण नरसीहो ।  
सीहासणाओ उट्ठइ पजलंतो कोवजलणेण ॥५६४९॥  
तो नियनियंबवेढियवरिल्लवत्थो फुरंतअहरोट्ठो ।  
उच्चल्लिऊण हारं पट्ठिमि परिट्ठवंतो य ॥५६५०॥  
उभयंसपासघोलिरबहुतरलियचारुचमरनारिजुओ ।  
रेहइ रायसिरीहिं व सावन्नं उवहसिज्जंतो ॥५६५१॥  
निविडयरनियंबत्थलनिबद्धवरखग्गधेणुनिहियच्छो ।  
कुवहावलोयलज्जियनयणेहिं च वालियग्गीवो ॥५६५२॥

रोसवसेणुच्चल्लियचलणंतचलंतसियनहमऊहो ।  
 पायतलेण व किंत्तिं चिरकालसमज्जियं मलइ ॥५६५३॥  
 अंतोहुत्तनिवेसियविवाहरवहिनिखित्तदसणंसू(?) ।  
 पियइ व्व उव्वमेइ व रोसग्गिं मणविवेयं च ॥५६५४॥  
 इय जाव सो नरिंदो अहिधावइ ताण मारणनिमित्तं ।  
 ताव विमाणारूढो सहसा पयडीहुओ वीरो ॥५६५५॥  
 पलयमहाकालुग्गयरविसयदुद्धरिसतेयदुप्पेच्छो ।  
 तक्कोहग्गिभएण व अलीणासेसजयतेयो ॥५६५६॥  
 निम्मलयरगंडत्थलपडिबिंबियकन्नकुंडलाहरणो ।  
 छेढूण मुहे रोसा ससि-सूरजुयं व भक्खेइ ॥५६५७॥  
 आकन्नंतपरिट्ठियरोसारुणदीहनयणदुव्विसहो ।  
 मणपरिकप्पियरणबहुभडसोणियसरियमिद वहइ ॥५६५८॥  
 सव्वंगियमणिभूसणघणसोणपहाहिं रंजियनहंतो ।  
 अंगमि अमायंतं किरइ व्व नहंमि नियरोसं ॥५६५९॥  
 करसंठियभासुरखग्गरयणकिरणोहिं सामसव्वंगो ।  
 वेरिपरिभूयदइयादंसणअहिमाणकलुसो व्व ॥५६६०॥  
 पंचप्पयारमणिमयच्छरुंफुरियपयंडकिरणदंडेहिं ।  
 वहइ व्व जस्स खग्गं थंभणमोहाइसत्थाइं ॥५६६१॥  
 इय वीरनराहिवई दिट्ठो सव्वेहिं तरलतारच्छं ।  
 अउरुव्वसरूवंतरदंसणहुयमणचमक्कारं ॥५६६२॥  
 मूढेहिं मुच्छिणहिं व विवसेहिं व थंभिणहिं व मुणहिं ।

१. खड्डुष्टित्तल्लिका, खंता. टि. ॥

२. स्तम्भन-मोहन-विद्वेषणादीनि पच्च तन्त्राणीति मन्त्रनये, खंता. टि. ॥

दिट्ठो वीराहिवई नरिंदमाईहिं सव्वेहिं ॥५६६३॥  
 ते हिययावट्ठंभा ते च्विय सुहडाण विक्कमक्करिसा ।  
 दिट्ठंमि वीरसेणे सव्वे वि निरत्थया जाया ॥५६६४॥  
 न कयाइ जम्मणेसुं लद्धपएसं भयं वरभडाण ।  
 तं वीरदंसणेणं सव्वंगं ताण वित्थरियं ॥५६६५॥  
 तो तस्स विम्हयकरं भुयणस्स वि जणियगुरुचमक्कारं ।  
 दट्ठं तहा सरुवं पुरिलोओ चिंतए एवं ॥५६६६॥  
 'एसो को वि अउव्वो परमप्पा परमदेवयारूवो ।  
 न सुरा-सुर-खयराणं मज्झे एवंविहो अत्थि ॥५६६७॥  
 एयस्स तेयपसरं नयणाइं जणस्स असहमाणाइं ।  
 मउलणलद्धसुहाइं वंछंति न कह वि उम्मेसं' ॥५६६८॥  
 तो जंपइ जोइसिओ 'रे मूढा ! किं वियप्पजालेण ? ।  
 सो एस वीरसेणो तुम्ह मए जो पुरा कहिओ' ॥५६६९॥  
 'सो एस वीरसेणो'त्ति जंपिए जायविसमरोसेण ।  
 नरसीहनरिदेणं अह एयं भणिउमाढत्तं ॥५६७०॥  
 'जइ एस वीरसेणो एसो च्विय ता मए निहंतव्वो ।  
 चिट्ठंतु ता इमाइं करमुट्ठिपरिट्ठियाइं मे ॥५६७१॥  
 भो वीरसेण ! संपइ धर सुदिढं नियकरंमि करवालं ।  
 मह दंसणेण जम्हा गलंति वेरीण सत्थाइं ॥५६७२॥  
 जइ नाम कह वि गयणे वियरसि ता वियर मह भउब्भंतो ।  
 एत्थ ठिओ वि न छुट्ठसि किं बहुणा[मह] जमस्सेव ॥५६७३॥  
 जइ स च्विय तुह सत्ती मए सुया जा नरिंदलोयाओ ।  
 ता होहिसि मज्झ खणं रणरसतण्हाविणोयखमो ॥५६७४॥

सो को वि न भूवलए जाओ जणणीए तारिसो पुत्तो ।  
 जो मज्झ रणझडप्पं अक्खुद्धो सहइ दुव्विसहं ॥५६७५॥  
 तो अप्पपसंसावयणसवणसंजायसिद्धिलहियएण ।  
 लीलावहासगब्भं सो भणिओ वीरसेणेण ॥५६७६॥  
 'नरसीह ! तुज्झ विसए सव्वं संभवइ जं असंभवियं ।  
 किं तु न छज्जंति जणे किरियाहीणा मुह्ल्लावा' ॥५६७७॥  
 'किं तु न छज्जंति जणे'त्ति निसुयमेत्तेण वीरवयणेण ।  
 उत्तेजिओ नरिंदो विज्जुक्खित्तेण उप्पइओ ॥५६७८॥  
 तो निक्कारिमनरसीहविक्कमुक्करिसरंजिओ वीरो ।  
 परियप्पइ नियचित्ते रणरसरोमंचियसरीरो ॥५६७९॥  
 'इह होंति विचित्ताओ पयईओ जयंमि वीरपुरिसाण ।  
 एक्के कज्जपहाणा बहुवयणा तदुभया अत्रे ॥५६८०॥  
 ता एसो नरसीहो वयणपहाणो य कज्जसारो य ।  
 ता एएण सहाऽहं खत्तायारेण जुज्झिस्सं' ॥५६८१॥  
 एवं धरिऊण मणे वीरो ओयरइ वरविमाणाओ ।  
 तं पि नियखग्गरयणं ठवइ विमाणेक्कदेसंमि ॥५६८२॥  
 तो सो उप्पयमाणो अहो पडंतेण वीरनाहेण ।  
 वच्छत्थलंमि पहओ नियएण वियडयरवच्छेण ॥५६८३॥  
 तो अन्नोन्नोरत्थलसंघट्टुच्छलियपडिरवरउदं ।  
 वित(त्त)त्थसयललोयं सहसा फुडियं व बंभंडं ॥५६८४॥  
 अह कुमरमहोरत्थलपहारवियणापरव्वसो पडिओ ।  
 मुच्छानिमीलियच्छे 'धस'त्ति धरणीयले राया ॥५६८५॥

कुमरो वि असंभंतो असिधेणुम्पेतपहरणसहावो ।  
 ओयरिऊण नहाओ नियडे परिसंठिओ तस्स ॥५६८६॥  
 तो वीरदंसणेणं तेयं रविणो व्व असहमाणं तं ।  
 नरसीहमहत्थाणं तमं व नडं निरवसेसं ॥५६८७॥  
 अह तं परियणलोयं संधीरइ कोमलेहिं वयणेहिं ।  
 'मा भाह न तुम्ह भयं नाऽहं भीयाण पहरेमि' ॥५६८८॥  
 पुण कुणइ वीरसेणो नरसीहनिवस्स सीयकिरियाओ ।  
 आसासिओ य ताहिं उड्डइ सो रोसफुरिओड्डो ॥५६८९॥  
 पुण भणइ वीरसेणो 'होऊण धिरो मए समं जुज्झ' ।  
 इय भणिओ नरसीहो अभि(ब्भि)ड्डो वीरसेणस्स ॥५६९०॥  
 एत्थंतरंमि गयणे दूरडमडमिरडमरुयकरग्गो ।  
 सहस त्ति अघोरगणो जोइंदो आगओ तत्थ ॥५६९१॥  
 आसीसदाणपुव्वं जोइंदो भणइ रायनरसीहं ।  
 'तुह पुन्नरज्जुसंदाणिओ व्व अहमागओ एत्थ ॥५६९२॥  
 ता भणसु किं पि जं किर नरिंद ! तुह तिहुयणे वि हु असज्झं ।  
 एसेव वीरसेणो जाणइ मह जारिसा सत्ती ॥५६९३॥  
 दियहं पि करेमि निसं निसिं पि दियहं अहं खणद्धेण ।  
 चंदाइच्चा नरवर ! मह आणावत्तिणो निययं ॥५६९४॥  
 निच्चसरुवं पि सया सद्धानपरिद्धियं पि अचलं पि ।  
 तं पि परिब्भमइ हढा कुलालचक्कं व विसिचक्कं ॥५६९५॥  
 अहवा किं बहुणा जंपिएण ? तं तिहुअणे वि न हु अत्थि ।  
 जं मह मंतअसज्झं ता कहसु विसेसकायव्वं ॥५६९६॥



अहवा अच्छउ अन्नं एयं चिय भुयणदुज्जयं वीरं ।  
 नियमंतपहावेणं करेमि भूर्इए उक्कुरुडं ॥५६९७॥  
 एएण अहं छलिओ अरन्नमज्झम्मि कूडजूएण ।  
 गहियं मम असिरयणं इय अवयारी इमो मज्झ ॥५६९८॥  
 असहायाण न सिद्धी सुट्ठु वि बल-विरिय-सत्तिमंताण ।  
 ता होहामो अम्हे अन्नोन्नं राय ! सुसहाया' ॥५६९९॥  
 तो पभणइ नरसीहो 'मा जंपसु जोइनाह ! गुरुगव्वं ।  
 छलिओऽहं खयरीहिं सिरिपवणनरिंदभज्जाहिं ॥५७००॥  
 तम्हा नियभुयबल-विक्रमेण जं होइ तं करिस्सामि ।  
 किमहं कुंटो मढो(मूढो?) संगामजडोव्व भीरु व्व ?' ॥५७०१॥  
 तो भणइ वीरसेणो नरिंद नरसीह ! मा इमं भणसु ।  
 इच्छंति भोयणे वि हु सुसहायं किं पुण न समरे ? ॥५७०२॥  
 ता मा चयसु सहायं सयमेव समागयं समरकाले ।  
 पणईण पणयभंगं न कयाइ कुणांति सप्पुरिसा ॥५७०३॥  
 संबोहिऊण एवं नरसीहं तयणु वीरनाहेण ।  
 आहूओ महरगिरा जोइंदो जुज्झरसिएण ॥५७०४॥  
 'ए एहि समरसज्जण ! जोईसर ! मा करेहि विक्खेवं ।  
 तुह नत्थि दोसलेसो पउंज नियमंतसामत्थं' ॥५७०५॥  
 तो तक्खणेण कुमरो हिययपरिद्धवियपंचनवक्कारो ।  
 अहिधाविऊण उहं आइइइ जोइयं रोसा ॥५७०६॥  
 ते दो वि समं धरिया भणिया वीरेण राय-जोइंदा ।  
 'गरुओऽहं तुम्ह रिऊ ता जुज्झह सव्वसत्तीए ॥५७०७॥

मा भणह जं न कहियं संतंमि मए न राय ! तुह रज्जं ।  
 जोइंद ! सविग्घ च्चिय होही नणु मंतसंसिद्धी' ॥५७०८॥  
 इय भणिरुणं वीरो बिउणीकयवामनियभुयादंडो ।  
 खडहडियभुवणसिहरं करेइ भीमं करप्फोडं ॥५७०९॥  
 अह दो वि ते सरोसा असहायं पाविऊण वीरवई(इं) ।  
 जुज्झंति जुज्झदक्खा नाणाविहबंधकरणेहिं ॥५७१०॥  
 तित्रि वि गुरुसामत्था तित्रि वि नियकज्जसाहणुज्जुत्ता ।  
 तित्रि वि पहारदक्खा तित्रि वि वंचंति परघाया ॥५७११॥  
 खणमेक्कुपहारेणं अहिहूया दो वि वीरसेणेण ।  
 मुच्छंति अडवडंता पडंति धरणीए निच्चेद्धा ॥५७१२॥  
 पुण लद्धचेयणा ते हणंति जुगवं कुमारमइरोसा ।  
 वियसियमुहसयवत्तो पुणो वि ते दो वि पाडेइ ॥५७१३॥  
 तो निट्ठुरकुमरपहारजज्जरंगाण ताण दोणहं पि ।  
 संदेहतुलारूढं जायं जीयं च विहवं च ॥५७१४॥  
 एत्थंतरंमि जोई खणमेगं ठाइ ज्ञाणजोगंमि ।  
 सुमरियमेत्ता तेणं समागया तत्थ चामुंडा ॥५७१५॥  
 निम्मंसकक्कुसतणू पयंडनरमुंडमंडियसिरग्गा ।  
 अइभुक्खा खीणंगी जयभक्खणकयबहुमुह व्व ॥५७१६॥  
 सिक्कंतरपण्ह(ल्ह?)त्थियवामकरंतंगुलीकयनिवेसा ।  
 पयडियभेरविमुद्धा सुहाए असइ व्व अप्पाणं ॥५७१७॥  
 दूरं पसरियमुहकुहरकुडिलदाढाहिं भीसणा काली ।  
 सहचंदकलाकवलियबहुबहुलनिस व्व पलयनिसा ॥५७१८॥

दूरपवित्थरियमुहंतरालनीहरियजीहविकराला ।  
 गिलियसवासुइपायालगहिरविवर व्व दुप्पेच्छा ॥५७१९॥  
 रेहइ जिस्सा बीभत्स-रोद्ध-भयरसमयं व सव्वंगं ।  
 आसयवसपरियत्तियसत्ताइगुणेहिं कलियं व ॥५७२०॥  
 रहसुच्चलियकसिणोभयंसअट्टट्टभीमभुयदंडा ।  
 उव्वेव(य)णिज्जरूवा दवदट्टा वंसजालि व्व ॥५७२१॥  
 आजढरकूवलंबिरथणजुयला मंसरुहिरलुद्धेण ।  
 नीहरियदुजीहेणं हियएण व गसियउयरंता ॥५७२२॥  
 चलवलिरकविलविच्चुयसहस्ससंचलियजढरपायाला ।  
 संधुक्कियगिगकुंड व्व भुयणसंहारहोमंमि ॥५७२३॥  
 कयवग्घकत्तियवसणा भुयंगकडिपट्टियानिबद्धकडी ।  
 खज्जूरीदुमदीहरविकरालतयट्टिउरुदंडा ॥५७२४॥  
 हेट्टट्टियवाहणसवपिट्टिनिविट्टिमेत्तपयजुयला ।  
 दिट्ठिं परिट्टवंती कमेण नियसोलसभुएसु ॥५७२५॥  
 डमरुय-तिसूल-कत्तिय-कत्तरि-वज्जासि-चक्क-बाणाणि ।  
 समयं संभालंती अट्टसु नियदाहिणकरेसु ॥५७२६॥  
 वामेसु संठवंती खट्टंग-कवाल-भेरवीमुहं ।  
 नरसिर-यास-सुखेडय-अंकुस-चावाइं अट्टेसु ॥५७२७॥  
 सममोत्थरंतभीसणरक्खस-वेयालपरियणाइन्नं ।  
 करनरसिरपच्चासा उग्गीवसिवाए परियरिया ॥५७२८॥  
 इय सा पयइरउद्धा पयइपयंडा य पयइबीभत्सा ।

१. बीभत्स-रोद्ध-भयरसमयं तस्याः शरीरं कीदृक् ? । क्रूराशयवंशेनैव परावर्तिता ये सत्त्वादयो गुणास्तैः कलितमिव, खंता. टि. ॥

पयईए(इ) भयसरूवा ओयरइ नहाओ चामुंडा ॥५७२९॥  
 तो तं तहासरूवं जोईदो पासिऊण पुलयंगो ।  
 पाएसु पडइ तिस्सा धरणीयललुलियसव्वंगो ॥५७३०॥  
 तो पणमंतं जोईं सा जंपइ 'भणसु रे ! किमाहूया ?' ।  
 सो भणइ देवि ! दासो तुज्झ च्चिय सव्वकालमहं ॥५७३१॥  
 न कयाइ मए धरिया तुमं विणा अन्नदेवया हियए ।  
 अहवा किं भणिएणं ? पमाणमिह भयवई चेव ॥५७३२॥  
 तो देवि ! दुत्थिएणं कयवेरिपराहवेण भीएण ।  
 भयवइ ! भुयणसरन्ने ! आहूया सरणबुद्धीए ॥५७३३॥  
 दुत्तरआवइसायरपडियस्स न देवि ! होइ उत्तारो ।  
 जाव न लद्धाऽसि तुमं सुनिच्छियं सुदिढ्ढोणिव्व' ॥५७३४॥  
 जोइवयणावसाणे जंपइ 'तुह भयं कुओ कहसु ।  
 जेणाऽहं जोईसर ! मुणियथा(त्था) तुह जइस्सामि' ॥५७३५॥  
 तो जोइएण भणियं 'एसो च्चिय देवि ! तुज्झ पच्चक्खो ।  
 नामेण वीरसेणो मह अवयारी महासत्तु ॥५७३६॥  
 जं देवि ! तए तइया पसन्नचित्ताए दिन्नमसिरयणं ।  
 मह तं पि ह्ढेण हियं अणेण अडवीए मज्झंमि ॥५७३७॥  
 ता देवि ! कुण पसायं मारेसु इमं कयावयारं मे ।  
 मह देसु खग्गरयणं इमस्स रायस्स थिररज्जं' ॥५७३८॥  
 कच्चायणी पयंपइ 'होऊण थिरो अणेण सह जुज्झ ।  
 छिहं लद्धूण तओ अहं पि उच्चियं करिस्सामि' ॥५७३९॥  
 तो जोईदो हिट्ठो चामुंडावयणहुयअवट्ठंभो ।  
 नरसीहकयसहाओ जुज्झइ सह वीरसेणेण ॥५७४०॥

तो तीए नियकरत्थं समपि(प्पि)यं तस्स जोइणो खग्गं ।  
 फरयं च महाफारं सुदुज्जओ तेहिं सो जाओ ॥५७४१॥  
 तो सो दूरुप्पइउं जोइंदो खग्ग-खेडयविहत्थो ।  
 जा हणइ वीरसेणं ता वीरो गयणमुप्पइओ ॥५७४२॥  
 तो निवडंतं वीरं निहणिस्सामो त्ति विहियसंकप्पा ।  
 ते राय-जोइणो जा चिडंति पहारकयचित्ता ॥५७४३॥  
 ता कुमरेण सरोसं जुगवं दट्ठोड्ढभिउडिभीमेण ।  
 दिढपायपहारेणं दो वि हया पट्टिदेसंमि ॥५७४४॥  
 तो पायतलेण हया दो वि समं उव्वमंतमुहरुहिरा ।  
 पडिया अहोमुहेहिं तुलंतकर-पहरणा वसुहं ॥५७४५॥  
 मुच्छनिमीलियच्छ मयव्व दिट्ठा नरिंद-जोइंदा ।  
 'हा ह'त्ति पलविरेहिं नरिंदपरिवारलोएहिं ॥५७४६॥  
 एत्थंतरे सरोसा चामुंडा कडयडंतदसणोहा ।  
 संजंतंती तुरियं सोलसकरपहरणसमूहं ॥५७४७॥  
 जंपइ 'न वीर ! एए सहंति तुह संगरे दिढपहारं ।  
 ता एहि मज्झ समुहं जेण परिक्खामि तुह विरियं' ॥५७४८॥  
 तो भणइ वीरसेणो 'भयवइ ! न तए समं मह विरोहो ।  
 होइ न विरोहरहिओ संगामो कस्स व कहिं पि ॥५७४९॥  
 न तए सह धणवेरं भूवेरं मज्झ देसवेरं वा ।  
 बंधुवेरं च भयवइ ! जेणाहं [होमि] तुह समुहो ॥५७५०॥  
 ता तुज्झ पुप्फ-बलि-गंध-धूवेहिं सम्मुहीहोउं ।  
 जुज्जइ न उणो समरे पहरणहत्थेण जुज्जेउं' ॥५७५१॥

तो वंतरीए(इ) भणियं 'कह न विरोहो तए समं मज्झ ।  
जो मज्झ परमभत्तं मारसि जोईसरं पुरओ ॥५७५२॥  
मह सरणमुवगओ सो अहवा पुत्तो व्व मज्झ अणुगेज्झो ।  
ता बंधुवहनिमित्तं तुमए सह बंधुवेरं मे' ॥५७५३॥  
वीराहिवेण भणियं 'एसो तुह बंधवो अहं तु रिऊ ? ।  
पायं न जाणसि च्चिय-सरुवमिह बंधु-वेरीण ॥५७५४॥  
उवयारवयारकया होंति जए बंधु-वैरिया निययं ।  
कहमेसो उवयारी ? अहं पि कह तुज्झ अवयारी ? ॥५७५५॥  
तुमए च्चिय उवयरियं इमस्स खग्गाइदाणभावेण ।  
एयस्स न उण सत्ती जो तुह उवयरइ गरुययरं' ॥५७५६॥  
**कच्चायणीए(इ)** भणियं 'तूसामि न समहिओवयारेहिं ।  
किंतु निक्कारिमाए तूसामि नरिंद ! भत्तीए' ॥५७५७॥  
तो भणइ वीरनाहो 'सच्चविया का तए मह अभत्ती ? ।  
जेण अभत्तित्तणओ मए समं भिडिउमुज्जुत्ता ?' ॥५७५८॥  
**कच्चायणीए(इ)** भणियं 'सक्केमि न दाउमुत्तरं तुज्झ ।  
जइ सच्चं मह भीओ ता मुक्को जाहि नियठाणं' ॥५७५९॥  
तो भणियं वीरेणं 'न केवलं उत्तरंमि असमत्था ।  
वस-मंस-मज्जभक्खरि ! तक्केमि रणे वि असमत्था' ॥५७६०॥  
'असमत्थ'त्ति सरोसं वयणं सोऊण वीरसेणस्स ।  
सा भेरवी सुभीमं करेण परितोलइ तिसूलं ॥५७६१॥  
तो चिंतइ वीरवई 'एयाओ खुद्धरुद्धदेवीओ ।  
मायाबहुलाओ(उ) न ता इमासु सरलेहिं होयव्वं ॥५७६२॥

ते मूढमई पुरिसा पावंति पराहवं पराहिंतो ।  
 जे होंति न समयन्नू मायाविसु माइणो अवस्सं ॥५७६३॥  
 तो सावहाणचित्तो गुरुवइद्वेण विहिविहाणेण ।  
 सुमरामि परममंतं परमं परमेद्धिनवक्का(का)रं ॥५७६४॥  
 तं नत्थि तिहुयणे वि हु संपज्जइ जं न परममंताओ ।  
 विसमं पि समं जायइ समं पि विसमं इमाहिंतो' ॥५७६५॥  
 एत्थंतरे कुमारो सुमरियमेत्तेण तेण मंतेण ।  
 अच्चंतदुराधरिसो संजाओ वंतरिसुरीए ॥५७६६॥  
 तो तीए(इ) ससंकाए नवकारपहावहयपहावाए ।  
 धरिऊण करजुएणं सूलेण समाहओ वीरो ॥५७६७॥  
 'जुवइ त्ति देवयत्ति य दुब्बलदेह त्ति परकलत्तं त्ति ।  
 कह तुह पहरेमि अहं ?' इय भणिया वीरसेणेण ॥५७६८॥  
 सा भणइ कुवियचित्ता 'इमीए किं अलियवीरिमत्ताए ? ।  
 जइ सक्कसि ता जुज्जसु न दोसलेसो वि तुह अत्थि' ॥५७६९॥  
 तो कुमरो रणदक्खो तिसूलसूलंतरेण नीहरिओ ।  
 उद्दालिऊण तिस्सा सूलं चक्कं च ओसरिओ ॥५७७०॥  
 वीरो तिसूल-वरचक्कवावडो पुरिजणेहिं कह दिट्ठो ? ।  
 भयसंपेसियहरि-हरनियनियसत्थो व्व समरंमि ॥५७७१॥  
 विवरीएण तहा सा तिसूलदंडेण आहया तेण ।  
 सोलसभुएसु तिस्सा पडियाइं जह पहरणाइं ॥५७७२॥  
 तो अन्नोन्नामोडियसोलसकरपयडियंतरामरिसा ।  
 अप्पाणमप्पण च्चिय सा खायइ तिच्चरोसेण ॥५७७३॥

तो तक्खणेण तीए पलयानलजायविसमरोसाए ।  
 दूरं निग्गयजीहं पसारियं पिहुलमुहकुहरं ॥५७७४॥  
 दट्ठूण वीरसेणो पसारियं तीए दारुणं वयणं ।  
 पक्खिवइ सकक्खासं (?) दुवे वि ते राय-जोगिंदे ॥५७७५॥  
 उप्पइऊणं गयणे जा विसइ मुहं पयंडचंडीए ।  
 ता संवेल्लियजीहं वयणं संकोइयं तीए ॥५७७६॥  
 पुण दो वि वीरसेणो मेल्लइ धरणीए देइ सत्थाइं ।  
 जंपइ 'जुज्झह निउणं तुब्भे वि नरिंद-जोइंदा !' ॥५७७७॥  
 पुण नरसीहो जोई चामुंडा तिन्नि समरदक्खाइं ।  
 एक्कुस्स वि न पहुप्पति तस्स रणरंगवीरस्स ॥५७७८॥  
 एत्थंतरंमि रुद्धो नरसीहो चयइ पहरणसमूहं ।  
 दिढयरकच्छियचलणो निविडनिबद्धुद्धसिरजूडो ॥५७७९॥  
 तो वियडभुयप्फालणदूरसमुच्छलियपडिरवमिसेण ।  
 अक्कुदंति दिसाओ असहंतीओ व्वं तं सद्धं ॥५७८०॥  
 जा अब्भिइइ राया वीरस्स असंभमं निजुद्धन्नू ।  
 ता जंपइ वीरवई समहियसंजायउव्वेव्वो ॥५७८१॥  
 'किं अज्ज वि संजत्तसि नरसीहनरिंद ! मल्लजुज्झत्थं ? ।  
 सुमरसि न मज्झ घाया वीसरिया तुज्झ एण्हि पि ? ॥५७८२॥  
 लीलादिन्नेहिं वि जेहिं जासि मुच्छं खणे खणे राय ! ।  
 कह एण्हि पुण सहिहसि मह भुयदंडाण आमोडं ?' ॥५७८३॥  
 तो नरसीहो जंपइ 'सच्चमिणं वीर ! तुह पहारेहिं ।  
 वच्चामि अहं मुच्छं तहा वि एक्कु खणं जुज्झ' ॥५७८४॥



वीरो जंपइ 'जइ एवं पुज्जउ तुह कोउयं महाराय ! ।  
 पयडसु नियविन्नाणं अब्भसियं जं पुरा किं पि' ॥५७८५॥  
 तो अन्नोन्नं दोन्नि वि अब्भिट्ठा वीरसेण-नरसीहा ।  
 बहुरोसरत्तनयणा पयभरनिद्वलियमहिवीढा ॥५७८६॥  
 बहुबंधकरणकत्तरि-ढोक्कर-तलहत्थमाइकिरियाहिं ।  
 तह जुज्झंति सरोसा तसंति जह नहयरा गयणे ॥५७८७॥  
 जइ बंधइ वीरवई दक्खसरूवो हढेण नरसीहं ।  
 ता सो वि तहा छोडइ जह रंजइ वीरसेणो वि ॥५७८८॥  
 एवं ताणन्नोन्नं नियनियविन्नाणपयडणपराण ।  
 वीरेण खणद्धेणं पत्तो सीसंमि नरसीहो ॥५७८९॥  
 धरिऊण कंठदेसे एक्केण करेण रायनरसीहं ।  
 पुण लेइ धडफडंतं बीएण य जोइनाहं पि ॥५७९०॥  
 एक्कत्थ मेलिऊणं दोहिं वि हत्थेहिं वीरसेणेण ।  
 गयणे भमाडिया ते चामुंडं तज्जयंतेण ॥५७९१॥  
 'एए मारिज्जंते चामुंडे ! किं न रक्खसि असरणे ?' ।  
 पच्चारिऊण एवं पक्खित्ता राय-जोइंदा ॥५७९२॥  
 कयपरियणहाहारवअसमंजसिहूयसयलपुरिलोयं ।  
 तह कत्थ वि ते खित्ता विन्नाया जह न केणाऽवि ॥५७९३॥  
 ते घेल्लिऊण दूरं दुक्को कच्चायणीए जा वीरो ।  
 भयमुक्किलिगिलिरवा ता सा नद्धा नहपहेण ॥५७९४॥  
 तो नहं दट्ठूणं चामुंडं वलइ वीरसेणो वि ।  
 आसासइ नीसेसं नरसीहनरिंदपरिवारं ॥५७९५॥

दरविहसियमुहकमलो वीरो जोइसिय-जयवडायाण ।  
 काउं महापसायं ससिणेहं भणिउमाढत्तो ॥५७९६॥  
 'अइमहया गंभीरा जलनिहिणो ते वि पलयकालंमि ।  
 खुब्भंति किमच्छरियं ? न उण तुम्हारिसा सुयणा ॥५७९७॥  
 किं भन्नइ सुयणाणं ? अलद्धथाहंमि जाण हिययंमि ।  
 मज्जंति महोयहिणो वि जम्मि जे पयइगंभीरा ॥५७९८॥  
 पच्चक्खसज्जण च्विय कलिकाले संभवति सावेक्खा ।  
 ते कयजुए वि दुलहा निरवेक्खा जे परोक्खंमि ॥५७९९॥  
 किं जंपिएण बहुणा ? का गणणा देस-विसय-विहवेहिं ? ।  
 एयं पि मह सरीरं आयत्तं तुम्ह दोहिं(ण्हं?)पि' ॥५८००॥  
 तो जंपइ जोइसिओ 'जं उचियं होइ नियपहुत्तस्स ।  
 तं वीरसेण ! तुमए पयंपियं अब्भुवगयं च ॥५८०१॥  
 तुह देव ! भुयणभारो वसइ सरीरंमि जंमि अकिलेसं ।  
 कह तं भुयणायत्तं पि कुणसि अम्हाण आयत्तं ? ॥५८०२॥  
 तुम्हारिसाण नरवर ! पयईए परोवयारनिरयाण ।  
 हिययाइं सुगेज्जाइं तुच्छेण वि मणकिलेसेण ॥५८०३॥  
 ता देव ! देसकालोच्चि(चि)याइं कज्जाइं कुणसु सयमेव ।  
 तुह गुणगणबद्धाइं व विहडंति न अम्ह हिययाइं' ॥५८०४॥  
 इय जाव वीरसेणो जोइसिएणं च जयवडायाए ।  
 सह जंपइ ता सहसा जं जायं तं निसामेह ॥५८०५॥  
 सहसोत्थरंतबहुविहविज्जाहरवरविमाणनिवहेहिं ।  
 छाइज्जइ गयणयलं अकालमेहेहिं व सहेलं ॥५८०६॥

निमिसद्धेण य जायं तिरोहियासेसतरणिकिरणोहं ।  
 निबिडविमाणनिरंतरछायाच्छन्नं धरणिवट्टं ॥५८०७॥  
 एत्थंतरे नहाओ समागओऽहं नरिंद ! सहस त्ति ।  
 जोकारिऊण वीरं विन्नविउं अह समाढत्तो ॥५८०८॥  
 'वीराहिव ! तइयाऽहं तुमंमि खयरीहिं अवहडे नाह ! ।  
 दीणो व्व अणाहोऽहं सरणविहीणो व्व संजाओ ॥५८०९॥  
 तो वासुपुज्जभवणे गवेसिओ तिय-चउक्क-रत्थासु ।  
 आसम-विहारेसु उज्जाण-मढेसु य न दिट्ठो ॥५८१०॥  
 सो नत्थि इह पएसो तिलतुसमेत्तो वि चंपनयरीए ।  
 जत्थ न भयतरलच्छं गवेसिओ वीरसेण ! मए ॥५८११॥  
 तो पुणरवि वलिऊणं समागओ जयवडायगेहंमि ।  
 सा वि तुह विरहतविया अक्कंदइ परियणसमेया ॥५८१२॥  
 सव्वंगकसिणकुंतलकलावपच्छइया रुयइ निहुयं ।  
 विरहानलदज्जंती सिमसिमइ व धूमछन्नगी ॥५८१३॥  
 तो देव ! मए एसा संठविया वि हु न ठाइ रोवंती ।  
 तह विलवइ दुक्खत्ता जह हिययं अम्ह दलइ व्व ॥५८१४॥  
 तो देव ! अहं भणिओ इमीए 'भो वज्जवाहु ! अत्रिससु ।  
 विज्जासत्तीए सइं वीरवइं सयलवसुहाए' ॥५८१५॥  
 किंकायव्वविमूढो एगागी तुह पउत्तिमलहंतो ।  
 निरुवाओऽहं पत्तो वेयट्ठे उभयसेढीसु ॥५८१६॥  
 सेहरयासोयाणं एगासणवीढसमुवविट्ठाण ।  
 तुह चरियगयं गीयं निमीलियच्छं सुणंताण ॥५८१७॥

तुह चरियकहासत्ताण तुज्झ गुणभावणापुलइयाण ।  
 तुह चेव दंसणुकुंडियाण कहियं मए ताण ॥५८१८॥  
 जह मज्झिमभुयणयलं विजिगीसंतेण वीरणाहेण ।  
 संपेसिओ म्हि पणिही नरसीहनरिंदनयरीए ॥५८१९॥  
 जह तस्स दुस्सरुवं निक्कारणमच्छरिस्स नरवइणो ।  
 नासिक्के गंतूणं कहियं किर तुह मए सव्वं ॥५८२०॥  
 जह तुमए वि पइन्ना विहिया दसरत्तमज्झयारंमि ।  
 एक्कुणेण असेसं भूवलयं साहियव्वं ति ॥५८२१॥  
 जह निग्गओ सि नरवर ! अंगइयानयरमागया जह य ।  
 संगमयमुणी दिट्ठो जह निसुयं तस्स चरियं पि ॥५८२२॥  
 जह आगया य चंपं जह य जिणो वंदिओ य वसुपुज्जो ।  
 जह तत्थ संठियाणं समागया जयवडाया वि ॥५८२३॥  
 जह तीए गया गेहं तिस्सा जह वासभवणासिज्जाए ।  
 सुत्तो वीराहिबई खग्गकरोऽहं ठिओ दारे ॥५८२४॥  
 जह ताओ मए अट्ट वि रक्खसिरूवाओ तत्थ दिट्ठाओ ।  
 दट्ठूण ससंकोऽहं जाओ पुण कहियं खग्गं ॥५८२५॥  
 जह ताओ मं दट्ठुं इयरगवक्खेण किर पविट्ठाओ ।  
 जह चिंतियं मए किर किमेत्थमेयाण आगमणं ? ॥५८२६॥  
 चिंतंतस्स मणे मह 'एयाओ न सुंदराओ' इइ फुरियं ।  
 'ता उट्ठवेमि वीरं करेमि तस्संगरक्खं पि ॥५८२७॥  
 जह उट्ठिओ तुरंतो गंतूणं जाव पच्छिमगवक्खे ।  
 जोएमि तुमं नरवर ! न ताव पेच्छामि सेज्जाए ॥५८२८॥

तो निच्छइयं एयं 'ताहिं चिय पवणकेउभज्जाहिं ।  
 अवहरिओ वीरवई निब्भरनिद्वाए पासुत्तो' ॥५८२९॥  
 एयं नीसेसं चिय सवित्थरं ताण खयररायाण ।  
 वेयद्दुग्गमणं तं परिकहियं वीर ! तुह विसयं ॥५८३०॥  
 'ता मा कुणह विलंबं उट्ठह वेगेण परियणसमेया ।  
 विज्जाहरे वि तुरियं नीसेसदिसासु पेसेह' ॥५८३१॥  
 इय एवमाइ सयलं सोऊणं ते असोय-सेहरया ।  
 विहडंतासणबंधा सद्वाणचलंतलंकारा ॥५८३२॥  
 संभमचलंतभूसणसंघट्टझणज्झणारवकरालं ।  
 उट्ठंति दो वि समयं खयरिंदा आसणवराओ ॥५८३३॥  
 कयपाणि-पायसोया विसंति देवहरगब्भगेहंमि ।  
 कयजिणपूयाकम्मा झाणजोगेण चिट्ठंति ॥५८३४॥  
 नियनियविज्जादेवीओ तेहिं पुट्ठाओ कुमरवुत्तंतं ।  
 ताहि वि ताण असेसं जहवित्तं तं तहा कहियं ॥५८३५॥  
 तो ते पहिडुवयणा नीहरिया देवगब्भगेहाओ ।  
 भणियं 'निसुणह लोया ! अच्छरियं वीरसेणस्स ॥५८३६॥  
 ओसायणि-विवसमणो नीओ खयरीहिं अडविमज्झंमि ।  
 अइसयसुरूवदंसणअणुरायपरव्वसमणाहिं ॥५८३७॥  
 आढत्तो अभिरमिउं छलेण कयजयवडाहि(य)रूवाहिं ।  
 सुमिणंमि चक्किणीए परिकहिओ ताण वुत्तंतो ॥५८३८॥  
 पुण जग्गिएण तेणं सव्वाओ वि ताओ किर निसिद्धाओ ।  
 संगामे जित्ताओ पुण रत्ते खेल्लियं जूयं' ॥५८३९॥

इय एवमाइ सव्वं दिव्वविमाणासिरयणलाहं च ।  
 चामुंडाविजयंतं कहियं खयरण दोहिं(ण्हं)पि ॥५८४०॥  
 'ता किं तयस्स भन्नओ(उ) लोगुत्तरचरियगुणनिहाणस्स ।  
 जस्सेक्को(क्के)क्को वि गुणो अणंतगुणसंगओ होइ ? ॥५८४१॥  
 जस्स विरायइ कित्ती भुयणायरगब्भसंठियमयंका ।  
 अणवच्छिन्नपहावा 'कित्तंतरगब्भिण(णि)व्व जए ॥५८४२॥  
 ता संजत्तह सव्वं विमाण-जाणाइ तत्थ वच्चामो ।  
 जत्थऽच्छइ जयवंतो जयगरुओ वीरसेणपहू' ॥५८४३॥  
 तो तव्वयणाणंतरमणंतभडखोहजायसंखोहं ।  
 संचलइ खयरसेन्नं तुह दंसणकयमणुकं(क्कुं)ठं ॥५८४४॥  
 कयमंगलोवयारा नियनियपरिवारपरिगया देव ! ।  
 एत्थागया नहेणं सेहरयासोयरायाणो ॥५८४५॥  
 ता देव ! एस दीसइ जो गयणे जाण-वाहणसमूहो ।  
 सो एयाण असेसो संबद्धो खयररायाण' ॥५८४६॥  
 तो तव्वयणविरामे धी(वी)रो वी(वि)यरंतदसणकिरिणोहो ।  
 ईसि हसिरुण जंपइ 'किं भन्नइ तुज्झ भत्तीए ? ॥५८४७॥  
 नाऽहं ताव समत्थो तुह नेहकयाण पडिकयं काउं ।  
 किं तु मणागमणुच्चियमणुद्धियं वज्जबाहु ! तए ॥५८४८॥  
 जं एए खयरिंदा मह दुक्खावेयणेण दुक्खविया ।  
 जं इह निप्फल्लाए खडप्फडाए य खेयविया ॥५८४९॥  
 सुहडाण पुरो सुंदर ! लज्जिज्जइ जुयइजयकहाए वि ।  
 किं पुण पासुत्ताणं अवहरणकहाए नो ताण ? ॥५८५०॥

१. कीर्तिः कीर्त्यंतरगर्भिणीव, खंता. टि. ॥

रे वज्जबाहु ! तुह किं एत्तियमेत्तो वि भरवसो नत्थि ? ।  
 तासिं भत्तारेण वि जो न जिओ कह णु पुण ताहिं ? ॥५८५१॥  
 तो राय ! मए भणियं 'वीर ! अहं तुह पउत्तिमलहंतो ।  
 मूढो व्व मणेण तओ गओ म्हि एआण पासंमि' ॥५८५२॥  
 तो भणइ वीरसेणो 'सच्चमिणं नेहमोहियमणाण ।  
 पुरिसाण मच्छियाण व चेयन्नविवज्जओ होइ ॥५८५३॥  
 ता वच्चामो समुहं खेयररायाण नियविमाणेण' ।  
 इय भणिऊणं कुमरो आरूढो वरविमाणंमि ॥५८५४॥  
 तो देव ! मए सहिओ जोइसिएणं च जयवडायाए ।  
 सकिवाणेण (स)सत्थत्तेण तह य सियचमरहत्थाए ॥५८५५॥  
 उप्पेइओ गयणयलं भासुरकिरणोहपूरियदियंतो ।  
 भाणु व्व पबोहंतो विज्जाहरकमलसंडाई ॥५८५६॥  
 पणमिज्जंतो पुरओ ससंभमं अग्गिबाणसुहडेहिं ।  
 परमप्पओ व्व दिट्ठो असोय-सेहरयराएहिं ॥५८५७॥  
 तो दंसणमेत्तेण वि परिचत्तविमाण-आसण-विलासा ।  
 सेवयकरसंवेल्लियवरिल्लवत्थंचला दो वि ॥५८५८॥  
 गरुयाण(णु)रायनिब्भरनिहित्तिदिट्ठी कुमारमुहकमले ।  
 आणंदवियसिउज्जलनीलुप्पलदीहरच्छिजुया ॥५८५९॥  
 गइवसचलंतकुंडलवच्छत्थलघोलमाणहारलया ।  
 वियसंतकबोलत्थलपिसुणियअब्भितरपमोया ॥५८६०॥  
 असरिसपहरिसरोमंचकंचुइज्जंतपयडसव्वंगा ।  
 पणमंति वीरसेणं सगौरु(र)वुच्चरियजयसद्दा ॥५८६१॥

दूराओ च्विय कुमरो वि दीहपसरंतउभयभुयदंडो ।  
 आलिंणइ सप्पणयं जहक्कमं खेयरनरिंदे ॥५८६२॥  
 पुच्छइ कुसलोदंतं वीरो साहंति ते वि सप्पणयं ।  
 'तुज्झ पसाएण सया कुसलं चिय अम्ह नरनाह !' ॥५८६३॥  
 तो ते समयं दोन्नि वि सिरग्गविणिवेसियंजलीबंधा ।  
 आढत्ता विन्नविउं वीरं विज्जाहरनरिंदा ॥५८६४॥  
 'किं देव ! एत्तियंमि वि कज्जे सयमागओ सि चंपाए ? ।  
 दिन्नो किन्न नरेसर ! आएसो एस अम्हाण ? ॥५८६५॥  
 अइगुरुपरक्कमाण वि सोहइ भिच्चत्तणं न भिच्चाण ।  
 संतेहिं जेहि पहुणो सयं किलिस्संति कज्जेसु ॥५८६६॥  
 जइ अवसरे वि पत्ते न पत्तिणो उवयरंति सामीण ।  
 ता ताण निप्फलं च्विय अन्नोन्नं भिच्च-सामित्तं ॥५८६७॥  
 जं विणिओयविहीणं कुणइ पसायं पहु स भिच्चस्स ।  
 तं तस्स निच्छएणं दूरीकरणं अदुव्वयणं' ॥५८६८॥  
 तो सहसा नियकरयलज्जंपियसवणेण वीरसेणेण ।  
 भणियं 'न तुम्ह एयं हियए वि वियप्पिउं जुत्तं ॥५८६९॥  
 को कस्स एत्थ भिच्चो ? अहवा को कस्स साम्वि(मि)ओ होइ ?  
 अलियाभिमाणमेयं एसो भिच्चो अहं सामी ॥५८७०॥  
 नियसामित्तमएणं हढेण वावरयंति जे अन्नं ।  
 ते आभिओगियं खलु कम्मं बंधंति अइविरसं ॥५८७१॥  
 जइ पयइनम(म्म)याए गरुया सुयणा सुनम्मयं जंति ।  
 तो ताण एत्तिएण वि किं भिच्चत्तं समावडियं ? ॥५८७२॥



जह सामिणो वि तुब्भे अप्पा(प्पं?) भिच्चत्तणेण मन्नेह ।  
 अहमवि तहेव जम्हा गरुयाणं एरिसो मग्गो ॥५८७३॥  
 ता मा किं पि वियप्पह चित्ते अन्नारिसं खयरराथा ! ।  
 तुब्भेहि वि नियकज्जे अहमेव निओयणीओ त्ति' ॥५८७४॥  
 इय जा ते अन्नोन्नं सुयणालावेहिं तत्थ चिद्धंति ।  
 ता वासुपुज्जभवणे दिट्ठी सब्वाण ओवडिया ॥५८७५॥  
 पेच्छंति तत्थ गरुयं जणस(सं)मदं पसारियच्छिउडा ।  
 पुच्छंति कोउएणं 'किं एसो लोयसंघट्ठो ?' ॥५८७६॥  
 तो राय ! मए भणियं 'अहमवि सम्मं न देव ! जाणामि ।  
 किं तु तए निक्खित्तो नरसीहो निवडिओ एत्थ' ॥५८७७॥  
 तो भणइ वीरसेणो 'जइ एवं चलह तत्थ वच्चामो ।  
 जिणनाहदंसणेणं तुम्ह वि कम्मक्खओ होउ ॥५८७८॥  
 एयंपि य नरसीहं सत्थं काऊण निययरज्जंमि ।  
 पुणरवि संठावेमो ' इय भणिउं तत्थ ओइन्ना ॥५८७९॥  
 कयबहुपूयाकम्मा जिणनाहं वंदिऊण सब्बे वि ।  
 पुच्छंति 'किं किमेसो संमदो सब्बलोयाण ?' ॥५८८०॥  
 तो जंपियमेगेणं 'देव ! इमे वीरसेणराएण ।  
 उल्लालिऊण इहइं पक्खित्ता राय-जोइंदा ॥५८८१॥  
 ते मुच्छवसपरवससब्बंगां चैयणं न पावंति ।  
 ताणेसो परिवारो सीयलकिरियाहिं उज्जमइ' ॥५८८२॥  
 तो भणइ वीरसेणो 'हा ! कद्धं एत्तिएण वि खणेण ।  
 चैयन्नं नरसीहो न लहइ ता एह वच्चामो' ॥५८८३॥

तो सो दूराओ च्विय जोइज्जंतो जणेहि सवियप्पं ।  
 सूरुो व्व गुरुपयावो एगागी एस इह दिट्ठो ॥५८८४॥  
 'कह संपइ नहवसुहंतरालभाए अलद्धठाणेहिं ।  
 विज्जाहरसेत्तेहिं एकूखणेणेव परियरिओ ॥५८८५॥  
 बहुपुत्र-मंदपुत्राण एत्थ अइगरुयमंतरं होइ ।  
 रविणेव्व उडुसमूहो अंतरिओ जेण खयरोहो ॥५८८६॥  
 मन्ने एसो च्विय सयलभूमिवलयस्स अहिवई होही ।  
 जं एरिसो पयावो वभिचरइ न सव्वभोमत्तं' ॥५८८७॥  
 इय एवमाइ विविहं कुमारविसयं वियप्पमाणाण ।  
 लोयाण कयाणंदो पत्तो नरसीहपासंमि ॥५८८८॥  
 सहसोसरंतपरियणजणेण दूराओ दिन्नओवासो ।  
 पत्तो वीराहिवई विज्जाहरविंदपरियरिओ ॥५८८९॥  
 जा नियइ तत्थ पुरओ तो पेच्छइ तिच्चतेयदिप्पंतं ।  
 बहुसीससंपरिवुडं अणेयगुणभासुरसरीरं ॥५८९०॥  
 तदंसणहरिसियलोयपरिसाए मज्झमुवविट्ठं ।  
 पप्फ(प्फु)ल्लुकमलसरवरसंकंतं भाणुबिंबं व ॥५८९१॥  
 फासुयलद्धसमुज्जलकयवत्थद्धंतउत्तरासंगं ।  
 सरयब्भनिरुद्धद्धं चित्ततवं सूरबिंब व ॥५८९२॥  
 उन्नयकरग्गसंठियसुदीहमुहवत्तियाविरायंतं ।  
 संपत्तजयवडायं व सयलचारित्तिसंग्घेसु ॥५८९३॥  
 सद्धम्मदेसणासेयदसणकिरिणोहपुरियदियंतं ।  
 वित्थारंतं व जणे पावमलक्खालणजलाइं ॥५८९४॥

पिहियमुहवत्तियमुहं पसारयंतं व चक्खुरक्खद्धा ।  
 मुहसुईहरपसवियसरस्सईकंडवडयद्धं ॥५८९५॥  
 पंचविहायाररयं पंचमहव्वयपवित्तियसरीरं ।  
 पंचसमियं पसंतं पंचिंदियचोरदंडधरं ॥५८९६॥  
 निम्मलखत्तियकुलवंससंभवं भवसमुद्दबोहित्थं ।  
 नामेण बंभगुत्तं विसुद्धतव-बंभगुत्तं च ॥५८९७॥  
 सूरिं भुयणसरन्नं चलणंतलुलंतरायनरसीहे ।  
 दिट्ठिं परिडुवंतं करुणारसमउलियद्धंतं ॥५८९८॥  
 इय बंभगुत्तसूरिं वीरो दट्ठूण बहलरोमंचो ।  
 आणंदतरलियच्छो वंदइ परमाए(इ) भत्तीए ॥५८९९॥  
 सव्वे वि खेयरिंदा असोय-सेहरयमाइणो तस्स ।  
 सूरिस्स चरणकमलं वंदति विसुद्धभावेण ॥५९००॥  
 गुरुणा वि सायरेणं अणेयभवदुक्खदलणदंभोली ।  
 दिन्नो सुधम्मलाभो वीराहिव-खेयरिंदाण ॥५९०१॥  
 आयरियमईए(इ) भुवं पमज्जिऊणं वरिल्लवत्थेण ।  
 पयइपवित्ते सुद्धे उवविद्धा पायमूलंमि ॥५९०२॥  
 पुच्छियकुसलोदंता कहंति सव्वं गुरुण सुहकुसलं ।  
 पुच्छंति विणीयप्पा 'किं भयवं एत्थ नरसीहो ?' ॥५९०३॥  
 तो भणइ गुरु 'सावय ! अम्हे वि विसेसओ न याणामो ।  
 किं तु इह संठियाणं दडत्ति इह निवडिया एए' ॥५९०४॥  
 तो भणइ वीरसेणो 'असेसभूयलयसांविओ(सामिओ) एस ।  
 नरसीहो नामेणं एसो पुण जोइओ बीओ ॥५९०५॥

मुच्छानिम्मी(मी)लियच्छ दोन्नि वि कह चेयणं न पावन्ति ?' ।  
 इय भणिऊणं वीरो सिंचइ हरिचंदणजलेण ॥५९०६॥  
 तो तक्खणेण दोन्नि वि हरियंदणसिसिरवारिणा सित्ता ।  
 आमोडिऊण अंगं उट्ठंति दिसीओ(उ) जोयंता ॥५९०७॥  
 तो अन्नपएसंतरदंसणसंजायमणपरामरिसा ।  
 पेच्छंति मुणिवरिंदं सखेयरं वीरसेणं च ॥५९०८॥  
 एत्थंतरंमि सहसा विमुक्ककेसं कउब्भडपलावं ।  
 ताडियसिरवत्थयलं रुयमाणं दीहधाहाहिं (बाहाहिं ?) ॥५९०९॥  
 सिरिकणयरहेपमुहं असेसमंतेउरं गरुयदुक्खं ।  
 संपत्तं तत्थ जहिं अच्छइ नरसीहनरनाहो ॥५९१०॥  
 विमलमइपमुहपरियणपरियरियं तं महापलावेहिं ।  
 पलवइ जहा रिऊण वि दोखंडइ कढिणहिययाइं ॥५९११॥  
 'हा ! नरसीहनरेसर ! असेसवसुहापयंडमाहप्प ! ।  
 को को न एत्थ भुयणे जो न तए गंजिओ राय ! ? ॥५९१२॥  
 हा ! तुज्झ पायकमले नमंतसामंतमौलिमालाण ।  
 रयपिंजरिए पुत्विं कह संपइ धूलिधूसरिए ? ॥५९१३॥  
 हा ! पुत्विं नरवइणो तुह उच्छंगठियाओ जंघाओ ।  
 संबाहंति कहेण्हिं लुलंति भूमीए ता चेव ? ॥५९१४॥  
 हा ! उच्चरयणसीहासणंमि जो आसि पणइपरियरिओ ।  
 सो च्विय भूमिनिविट्ठो दीससि वैरीहिं परिकिन्नो ? ॥५९१५॥  
 निवडंतचामरानिलविलुलंतो तुज्झ कुंतलकलावो ।  
 सो च्विय संपइ वसुहातलनिवडणदुत्थिओ दिट्ठो ॥५९१६॥

जो च्विय तुमं नरेसर ! भयतरलच्छं रिऊहिं सच्चविओ ।  
 सो च्विय संपइ दीससि तेहिं चिय जायकरुणेहिं ॥५९१७॥  
 जह वारिओ सि पुठ्विं सुमंतिणा तह मए सयं चेव ।  
 'मा कुणसु विग्गहं किर अणेण सह वीरसेणेण' ॥५९१८॥  
 तं अम्ह तए तइया न कयं वयणं सयं भणंताण ।  
 विरसविवायं भुंजसु एण्हिं नियकूडमंताण ॥५९१९॥  
 एएण तुमं नरवर ! वीरेण भमाडिओ सयं गयणे ।  
 अच्छोडिऊण खित्तो किमित्थ[तं] निवडिओ एण्हिं ? ॥५९२०॥  
 तो वीर ! उडु तुरियं उद्धरसु धरं च धीरिमं कुणसु ।  
 नणु संगामो एसो पडंति उडुंति इह सुहडा ॥५९२१॥  
 संभालसु नियरज्जं संठवसु विसंतुलं च परिवारं ।  
 किमुवेक्खसि अप्पाणं रिऊहिं परिवारिओ नाह ! ? ॥५९२२॥  
 अज्ज वि न किं पि नडुं तुह भुयदंडेसु जयसिरी वसइ ।  
 ते उण तुह आयत्ता ता कुणसु मणे अवडुंभं' ॥५९२३॥  
 इय एवमाइ बहुयं भणिओ सिरिकणयरेहमाईहिं ।  
 किं पि मणे ज्ञायंतो पुण भणिओ वीरसेणेण ॥५९२४॥  
 मूढो व्व किं विचिंतसि ? नरसीह नरिंद ! वंदसु मुणिंदं ।  
 चइऊण असग्गाहं पणमसु जोईसर ! तुमं पि ॥५९२५॥  
 जो भुयणवंदणिज्जाण कुणइ मूढो गुरूण वि अवन्नं ।  
 सो गुणदेसित्तणओ पडइ नरो घोरनरएसु ॥५९२६॥  
 जो कुणइ अपुज्जे वि पूयमपूयं च भुयणपुज्जंमि ।  
 'सो अविवेयत्तणओ अज्जिणइ किलिडुकम्माइं' ॥५९२७॥

सोऊण वीरसेणं 'एवं'ति य पभणिऊण नरसीहो ।  
 पाएसु पडइ गुरुणो गुरुतरसंजायसंवेगो ॥५९२८॥  
 गुरुणा वि सायरेणं उत्रामियदाहिणग्गहत्थेण ।  
 दिन्नो दुहसयदलणो सुधम्मत्ताहो नरिंदस्स ॥५९२९॥  
 पुणरवि सुहासणत्थं नरसीहं भणइ बंभदत्तगुरु ।  
 'मा मणयंपि नरेसर ! मणखेयं कुणसु हिययंमि ॥५९३०॥  
 विहिए वि हु मणखेए न किंपि परमत्थओ परित्ताणं ।  
 लच्छीए चंचलत्तं जयपयडं को न जाणेइ ? ॥५९३१॥  
 वच्चइ खणेण अन्नं चइऊण कुलक्कुमागयं पुरिसं ।  
 पंसुलिनारि व्व सिरिं दिट्ठविलीयं परिच्चयसु ॥५९३२॥  
 पयडियजयाणुराया पूइज्जंती वि सयलभुयणेहिं ।  
 विहडंति च्चिय दावइ पओससंज्झ व्व तिमिरभरं ॥५९३३॥  
 संके संकंता इव अणवरयं कमलवाससंगेण ।  
 दीसंति जं सिरिए वि खणिया संकोय-वित्थारा ॥५९३४॥  
 एसा नरिंद ! लच्छी जेट्ठा भइणी विसस्स जं एसा ।  
 दाऊण दुहसयाइं मारइ गरलं तु अकयदुहं ॥५९३५॥  
 चइऊण सुरसमूहं मंदरमहणंमि जो सयं वरिओ ।  
 सो वि हरी परिच्चत्तो जीए न किं चयइ सा तुब्भे ? ॥५९३६॥  
 सा नयरी बारवई सा य सिरि सुरवईण वि दुलंभा ।  
 पेच्छंतस्स य नट्ठा हरियंदपुरि व्व कण्हस्स ॥५९३७॥  
 को सुविणे वि वियप्पइ विणस्सिही दससिरस्स जं लच्छी ।  
 तैलोयकंटयस्स वि जाव सिरि तस्स वि पणट्ठा ॥५९३८॥

परिवट्टिया सुदूरं आसग्गीवेण अत्तणो कज्जे ।  
 तं पि चइऊण लच्छी वेस व्व तिविट्ठुमल्लीणा ॥५९३९॥  
 निवनधुस-नल-महाबल-दिलीव-दसभद-दसरहाईण ।  
 जाया थिरा न लच्छी सा तुह नरसीह ! कह होही ? ॥५९४०॥  
 लंघंती रायसए तुहागया अद्धंगि व्व जइ लच्छी ।  
 ता किं न चिंतसि इमं पुव्वनरिंदे व्व मं चइही ? ॥५९४१॥  
 जइ एसा वि नरेसर ! होइ थिरा पयइचंचला लच्छी ।  
 भरहाइणो नरिंदा ता किं छडं(डुं)ति मोक्खमणा? ॥५९४२॥  
 ता मा कुण पडिबंधं सिरीए सयणेसु सुय-कलत्तेसु ।  
 सव्वं पि अपरमत्थं परमत्थो जिणमओ धम्मो' ॥५९४३॥  
 तो नरसीहो गुरुवयणजायसंवेगरसविसुद्धप्पा ।  
 विन्नवइ गुरुं 'भयवं ! सच्चमिणं जं तए भणियं ॥५९४४॥  
 अविवेयसमुब्भूया पसरंति नराण अ(ऽ)कुसलबुद्धीओ ।  
 जा पयडियपरमत्थं मुणांति न मुणिंद ! तुह वयणं ॥५९४५॥  
 जह चेव तए कहियं चंचलरूवं सिरीए मह नाह ! ।  
 तह चेव अपरमत्थं ति मज्झ हियए वि संकंतं ॥५९४६॥  
 किं तु परमत्थभूओ जिणधम्मो जो तए पुरा भणिओ ।  
 तं मज्झ जोइणो विय काऊण पसायमाचिक्ख' ॥५९४७॥  
 तो भणइ गुरू गंभीर-महुरसद्देण सव्वजयसुहयं ।  
 धम्मं जिणोवइडुं असेसकम्मक्खयसमत्थं ॥५९४८॥  
 'धम्मो धम्मो ति जए सुव्वई(इ) सव्वेसु दरिसणपहेसु ।  
 सो च्चिय परिक्खयव्वो विवेइणा नियविवेण ॥५९४९॥

जह काऊण तिसुद्धं कणयं गिन्हंति अद्धगा के वि ।  
 कालंतरेण पुण तं न विहडए अन्नदेसे वि ॥५९५०॥  
 सुपरिक्खऊण धम्मं तहेव धम्मत्थिणो वि गिन्हंति ।  
 जेण न भवंतरेसु वि सो विहडए वंछियफलेसु ॥५९५१॥  
 जे पुण पवाहपडिया अपरिक्खियधम्मगाहगा होंति ।  
 ते धम्मवासणाए कुणंति पावाइं बहुयाइं ॥५९५२॥  
 जह सो परिक्खियव्वो धम्मो धम्मत्थिणा इह नरेण ।  
 तह तं एगग्गमणा आयन्नह राय-जोइंदा ! ॥५९५३॥  
 एयं पि भावियव्वं नियचित्ते सव्वदरिसणाणं पि ।  
 को परमत्थो भणिओ निययागमवेस(य?)सत्थेसु ॥५९५४॥  
 पंच पवित्ताणि सया सव्वेसिं होंति धम्मचारीण ।  
 दय-सच्च-मचोरिक्कुं बंभं च परिग्गहच्चाओ ॥५९५५॥  
 एयाइं जत्थ पंच वि निव्वाहं जंति अकयबाहाइं ।  
 आइ-मज्झा-वसाणे सो धम्मो फलइ परलोए ॥५९५६॥  
 जत्थ य पुण एयाइं मूलं धम्मस्स<sup>१</sup> जंति वभिचारं ।  
 आइ-मज्झा-वसाणे विरोहओ चयह तं धम्मं ॥५९५७॥  
 पासंडियधम्मसेसुं पढमं पडिवज्जिऊण एयाइं ।  
 सव्वेहिं तओ पच्छ हिंसाईया अणुत्राया ॥५९५८॥  
 जिणधम्मे पुण सावय ! मूलगुणे चेव होंति एयाइं ।  
 किं जंपिण ? अहवा परिभावह सुहमबुद्धीए' ॥५९५९॥  
 तो राया जोइंदो दो वि समं विन्नवंति आयरियं ।  
 'भयवं ! को संदेहो ? एवमिणं जं तए भणियं' ॥५९६०॥

१. मूलधम्मस्स इति स्यात् ॥



भणियं जोइंदेणं 'मुणिंद ! मह अणुहवेण पच्चक्खं ।  
 कोलागमेसु विसुयं मूलं धम्मस्स जीवदया ॥५९६१॥  
 जेणेव कोलधम्मो पयट्टिओ भेरवेण भुयणंमि ।  
 सो च्विय भक्खइ मंसं पियइ सुरं वहइ जीवे वि ॥५९६२॥

तथा च- "रंडा चंडा दिक्खिदा धम्मदारा

मज्जं मंसं पिज्जए खज्जए य ।

भिक्खाभोज्जं चम्मखंडं च सेज्जा

कौलो धम्मो कस्स नो ठाइ रम्मो"? ॥५९६३॥

तो भयवं ! जिणधम्मं परमत्थवियारणाखमं सोउं ।

जा सुव्वइ कुलधम्मो ता मुणह विडंबणं सव्वं ॥५९६४॥

किं तु अजाणंतो च्विय पुच्छामि इमं कहेह मह भयवं ! ।

जइ एस अधम्मो च्विय ता कह अणिमाइसिद्धीओ ?' ॥५९६५॥

तो भणइ गुरु 'जोइय ! एयाओ होंति खुदिसिद्धीओ ।

साहंति न कज्जाइं परलोयसुहाइं इह जेण ॥५९६६॥

एयत्थं कौला वि य सिवसोक्खं चइय पुण किलिस्संति ।

उट्ठीसमाइयाइं य सत्थाइं वि एयरूवाइं ॥५९६७॥

जिणधम्मो पुण जोइय ! मोक्खफलो जिणवरेहिं पन्नत्तो ।

अणिमाई सिद्धीओ किसिकम्मपलालकप्पाओ ॥५९६८॥

सो च्विय धम्मो सावय ! चउव्विहो होइ जिणवरमयंमि ।

इह दाण-सील-तव-भावणे(ण)हिं भिन्नो जहाकम्म(म)सो ॥५९६९॥

दाणमई(इ)ओ उ पढमो भण्णइ संखेवओ महाराय ! ।

दाणं तिविहं भणियं जिणागमे तंपि निसुणेह ॥५९७०॥

पढमं खु नाणदाणं बीयं पुण होइ अभयदाणं च ।  
 धम्मोवग्गहदाणं तइयं पुण होइ नरनाह ! ॥५९७१॥  
 नाणं पि होइ दुविहं मिच्छानाणं च सम्मनाणं च ।  
 जं राग-दोसजणं मिच्छानाणं तयं भणियं ॥५९७२॥  
 जं इहलोयनिबद्धं उवजुज्जइ राय ! न उण परलोए ।  
 तं मूढरिसीहिं कयं मिच्छानाणं भवे सव्वं ॥५९७३॥  
 रायनीईओ(उ) नरवर ! धणुवेओ होइ जुज्झसत्थं च ।  
 करि-तुरयाणं सिक्खा सूयाराहेडगगयं च ॥५९७४॥  
 तह य चिगिच्छासत्थं जोईसत्थं विवायसत्थं च ।  
 रसधाउवायसत्थं जाणह वसियरणसत्थं च ॥५९७५॥  
 एमाइ बहुप्पयारं नाडयसत्थं च भरहमाईयं ।  
 मिच्छानाणं सव्वं रागाइविवह्वणं जम्हा ॥५९७६॥  
 सव्वन्नुणा जिणेणं जो भणिओ अवितहागमो राय ! ।  
 तं होइ सम्मन्ना(ना)णं परलोयपसाहणं जम्हा ॥५९७७॥  
 जीवाजीवा पुत्रं पावासव्व(व)संवरो य निज्जरणं ।  
 बंधो मोखो(क्खो) य तहा जाणिज्जइ सम्मनाणेण ॥५९७८॥  
 एमाइणो अणंता विसया इह होंति सम्मनाणस्स ।  
 नाएण जेण सम्मं पलयं वच्चंति रागाइं ॥५९७९॥  
 तं नाणं पि न भण्णइ रागाई जेण उक्कडा होंति ।  
 सो कह भन्नइ सूरो विहडावए जो न तिमिरोहं ॥५९८०॥  
 तं राय ! सम्मनाणं ससत्तिसरिसं नरेण दायव्वं ।  
 दिन्नेण जेण जीवा मुणंति जीवं अजीवं ति ॥५९८१॥

नाणपयाणेण विणा जीवमजीवं च जाणइ न सम्मं ।  
 अमुणियजीवाजीवो कह रक्खं कुणइ जीवाण ? ॥५९८२॥  
 नाणेण राय ! जीवा मुणंति पुत्रं तहेव पावं च ।  
 तक्कारणाणि य तहा सम्मन्नाणेण नज्जंति ॥५९८३॥  
 एयं नाणपयाणं संसारदुम्म(म)स्स होइ परसु व्व ।  
 तह दैत-गाहगाणं दोहिं(णह) वि मोक्खं पसाहेइ ॥५९८४॥  
 बारस अंगाइं तहा चोइस पुव्वाइं तह य नरनाह ! ।  
 एयं सम्मन्नाणं जाणंतो सिवसुहं लहइ ॥५९८५॥  
 सम्मानाणी हुंतो जीवाणं देइ अभयदाणं च ।  
 जीवा वि होंति दुविहा ते थावर-जंगमकमेण ॥५९८६॥  
 तरु-गुम्म-लया वल्ली गुच्छा हरिया य होंति तणमाई ।  
 थावरजीवा विविहा पोर-खंध-ग्गबीया य ॥५९८७॥  
 तह होंति जंगमा वि य बेइंदियमाइणो असंखेया ।  
 पंचिंदियपज्जंता जिणिंदवयणेण बोधव्वा ॥५९८८॥  
 दुप्पय-चउप्पय-अपया बहुपय-पयसंकुला य नायव्वा ।  
 अंडय-जरया पोयज-रसजा तह सेयजाईया ॥५९८९॥  
 एमाइयाण सावय ! जो अभयं देइ सव्वजीवाण ।  
 सो जीवाभयदाया वसइ सुहं सग्ग-मोक्खेसु ॥५९९०॥  
 आरोग(ग्ग-)-भोग-धण-सयण-संपया-दीहमाउ-सोहग्गं ।  
 पंडिच्चमाइया खलु होंति गुणा अभयदाणेण ॥५९९१॥  
 तस्स य सफलं नाणं तस्स य सफलाओ सव्वनीईओ ।  
 मणुयत्तं पि हु तस्स य सफलं अभयप्पयाणेण ॥५९९२॥

जस्स दया तस्स तवो जस्स दया तस्स सीलसंपत्ती ।  
 जस्स दया तस्स गुणा जस्स दया तस्स सिवसोक्खं ॥५९९३॥  
 जो सयलजीवलोयं अत्थपयाणेण कुणइ अदरिदं ।  
 मारइ एगं जीवं सव्वं पि निरत्थयं तस्स ॥५९९४॥  
 नीसेसधम्ममूलं असेससुहकारणं पवित्तं च ।  
 अभयप्पयाणदाणं सेसाइं उवप्पयाणाइं ॥५९९५॥  
 धम्मोवग्गहदाणं भन्नइ नरनाह ! तं पि संखेवा ।  
 जे सव्वगुणसमिद्धा मुणिणो तं दिज्जए ताण ॥५९९६॥  
 जेण अवट्ठंभेणं सेज्जासण-वत्थ-पत्तभत्तेण ।  
 सावट्ठंभसरीरा कुणंति मुणिणो परमधम्मं ॥५९९७॥  
 तं पि उवग्गहदाणं चउप्पयारं नरिंद ! विन्नेयं ।  
 दायग-गाहगसुद्धं सुद्धं तह कालरूवेहिं ॥५९९८॥  
 दायगसुद्धं भन्नइ जो दया देइ नाणसंपन्नो ।  
 असद्धो य निरभिलासो सद्धारोमंचियसरीरो ॥५९९९॥  
 गाहगसुद्धं भन्नइ जो किर तं गिणहइ त्ति सो साहू ।  
 पंचमहव्वयजुत्तो छज्जीवनिकायकयरक्खो ॥६०००॥  
 गुरुसुस्सूसानिरओ सुमूणो दंतिदियो अलोभो य ।  
 खममाइधम्मनिरओ सुसाहुकिरियासमुज्जुत्तो ॥६००१॥  
 पत्तविसुद्धिविहीणं जं दाणं होइ बहुप्पयारं पि ।  
 तं परलोए नरवर ! दिन्नं पि न बहुफलं होइ ॥६००२॥  
 साहुस्स जहा देंतो लहइ पसंसं असेसभुयणे वि ।  
 चोरस्स पुणो देंतो पावइ वंडं नरिंदाओ ॥६००३॥

एगं पि मेहसलिलं पत्तविसेसेण बहुरसं होइ ।  
 उच्छुंमि महुरसायं लिंबंमि कडुयसायं च ॥६००४॥  
 इय एवमाइ सव्वं सम्मं परिभाविऊण हिययंमि ।  
 काऊण पत्तसुद्धिं दायव्वं सव्वहा दाणं ॥६००५॥  
 तं जाण कालसुद्धं जं जइदेहोवयारकालंमि ।  
 दिज्जइ जओ अकाले दिन्नं न करेइ उवयारं ॥६००६॥  
 कालंमि कीरमाणं किसिकम्मं बहुफलं जहा होइ ।  
 इय दाणं पि हु काले दिज्जंतं बहुफलं होइ ॥६००७॥  
 सो चेव एत्थ कालो उवयारो जत्थ चेव दिन्नंमि ।  
 होइ जईणं नरवर ! न उणो इह निच्छिओ कालो ॥६००८॥  
 भन्नइ संखेवेणं भावविसुद्धं च राय ! जं दाणं ।  
 जो सद्धासुद्धमणो अट्टमयट्ठाणपरिहीणो ॥६००९॥  
 कयकिच्चं मन्नंतो अप्पाणं जं मए सुपत्ताण ।  
 दिन्नं दाणं संपइ पत्तं धण-जम्मसाफल्लं ॥६०१०॥  
 दित्तस्स जस्स गिहिणो भावा एवंविहा मणे होंति ।  
 तं होइ भावसुद्धं दाणं कम्मक्खयनिमित्तं ॥६०११॥  
 नरनाह ! सीलमइयं धम्मं निसुणेसु एगभावेण ।  
 जो चेय संजमो इह सो च्चिय सीलं ति विन्नेयं ॥६०१२॥  
 पंचासवा विरमणं पंचिंदियनिग्गहो कसायजओ ।  
 दंडत्तयस्स विरई सीलमिणं सतरसविभेयं ॥६०१३॥  
 पाणिवह-अलियभासण-अदत्त-अब्बंभ-बहुपरिग्गहया ।  
 पंचासवा इमे खलु पन्नत्ता वीयराएहिं ॥६०१४॥

पढमं खलु सीलंगं जा जीवदया असे[स]जीवाण ।  
 एगिंदिय-बेइंदिय-तिय-चउ-पंचिंदियाणं च ॥६०१५॥  
 जो चयइ अलियवयणं परपीडपयासयं च पेसुन्नं ।  
 सो अलियभासणकयं दोसं परिहरइ सच्चेण ॥६०१६॥  
 जो दंतसोहणत्थं तणमेत्तं पि हु न गिण्हइ अदिन्नं ।  
 सो अ(ऽ)दत्तादाणकयं पावं न कयाइ बंधेइ ॥६०१७॥  
 नवबंभगुत्तिजुत्तो मण-वइ-काएहिं चयइ जुयईओ ।  
 तिरि-मणु-सुरीओ सो खलु अबंभविहियं हणइ पावं ॥६०१८॥  
 जो निहयलोहदोसो परिहरइ परिग्गहं बहुकिलेसं ।  
 सो न परिग्गहविहियं किलिडुकम्मं समज्जिणइ ॥६०१९॥  
 पंचासवपरिहीणो पंचिंदियनिग्गहं तओ कुणइ ।  
 फरिसण-रसणं घाणं चक्खुं सवणं च एयाइं ॥६०२०॥  
 जो फरिसणस्स विसओ कोमलसयणासणाइओ भणिओ ।  
 तं वज्जंतो नरवर ! तज्जणियं बंधइ न कम्मं ॥६०२१॥  
 जेण निरुद्धं एयं नरिंद ! रसणिंदियं पयत्तेण ।  
 सो जिब्भिंदियलंपडभावकयं बंधइ न पावं ॥६०२२॥  
 जो न सुयंधे रायं न विरायं जायि(इ) तह य दुग्गंधे ।  
 भावइ वत्थुसरूवं तस्स विसुद्धं हवइ सीलं ॥६०२३॥  
 दट्ठूण सुंदराइं रूवाइं न जाइ तेसु अणुरायं ।  
 इयरेसु य न विरायं तस्स विसुद्धं हवइ सीलं ॥६०२४॥  
 जो सुस्सरे नरेसर ! न पसंसइ दूसरे न दूसेइ ।  
 दसमंगं तस्स फुडं सीलस्स सुनिम्मलं होइ ॥६०२५॥

इय पंचिंदियनिग्गहरूवं सीलं मए समक्खायं ।  
 संपइ कसायविजयं सीलंगं संपवक्खामि ॥६०२६॥  
 पजलंतो कोहग्गी विज्झविओ खंतिवारिणा जेण ।  
 तस्स न तदुब्भवकयं पावइ पावं अवट्ठाणं ॥६०२७॥  
 भंजंतो विणयवणं अट्टमयट्ठाणमाणमत्तगओ ।  
 जो मइवंकुसेणं कुणइ वसे तस्स सीलंगं ॥६०२८॥  
 माया महाभुयंगी सहावकुडिलं अजायविस्संभं ।  
 जो अज्जवमंतेणं निसेहए तस्स सीलंगं ॥६०२९॥  
 इच्छावसवट्ठंतो लोभमहापव्वओ अदिट्ठंतो ।  
 आकिंचन्नसुनिट्ठुरवज्जप्पहारेण हणियव्वो ॥६०३०॥  
 भणिओ कसायविजओ सीलंगं संपयं पुण नरिंद ! ।  
 आयन्नसु एगमणो तिदंडविरयं महासीलं ॥६०३१॥  
 मणदंडो ज्ञायंतो अट्टवसट्ठाइं अट्ट-रोदाइं ।  
 सम्मं निरुंभियव्वो नरिंद ! सुहधम्मज्ञाणेण ॥६०३२॥  
 वायादंडो दुव्वयण-फरुस-पेसुन्नमाइ जंपंतो ।  
 निग्गहणिज्जो नरवर ! विसुद्धनियसीलबुद्धीए ॥६०३३॥  
 कायदंडो य सम्मं संजमियव्वो असंजमाहितो ।  
 सीलमओ वि य धम्मो भणिओ सत्तरसविहो वि ॥६०३४॥  
 दाऊण तिविहदाणं सीलं धरिऊण सतरसविभेयं ।  
 धीरा चरंति सुत्तवं बारसभेयं तयं सुणह ॥६०३५॥  
 सो होइ तवो दुविहो वाहिर-अब्भितरो य जहक्कु(क)मसो ।  
 एक्केक्को पत्तेयं नरिंद ! जाणेज्ज छब्भेओ (छब्भेओ) ॥६०३६॥

“अणसणमूणोयरिया वित्तीसंखेवओ रसच्चाओ ।  
 कायकिलेसो संलीणया य बज्झो तवो होइ ॥६०३७॥  
 पायच्छित्तं विणओ वेयावच्चं तहेव सज्झाओ ।  
 ज्ञाणं उस(स्स)ग्गो वि य अब्भितरओ तवो होइ” ॥६०३८॥  
 जावइयं चिय कालं नियमपरो होइ अणसणं ताव ।  
 ताइं च नियमभेया हवंति बहुभेयभिन्नाइं ॥६०३९॥  
 मुट्ठी-गण्डिनिमित्तं नवकारो पहर-सङ्घ-पुरिमहं ।  
 राईभोयणचाओ उववासाइं भवे अ(S)णसणं ॥६०४०॥  
 अन्नं च जावजीवं मरणंते अणसणं भवे राय ! ।  
 वज्जियचउआहारं पायववडणाइबहुभेयं ॥६०४१॥  
 नियसत्तिसरिसमेयं जो जहरूवं करेइ सुद्धप्पा ।  
 सो तयणरूवफलमवि पावइ न हु एत्थ संदेहो ॥६०४२॥  
 वित्तस्स य नियमस्स य कलंतरं तह फलं च दोहिं पि ।  
 लब्भइ विचारियं चिय न होइ अविचारियं किं पि ॥६०४३॥  
 जो नियमवज्जियनरो पसु व्व सो चरइ अचरमाणो वि ।  
 जं अचरंतो दीसइ अलाभओ अहव असमत्थो ॥६०४४॥  
 भणिओ अणसणमइओ बज्झतवो संपयं पुण भणामि ।  
 ऊणोयरियं बीयं आयन्नसु एगचित्तेण ॥६०४५॥  
 स च्विय ऊणोयरिया ऊणाहारत्तणं खु जं राय ! ।  
 ऊणयरभोयणस्स हि संभवइ न इंदियक्खोहो ॥६०४६॥  
 पंचिंदियखोभविवज्जियस्स न मणंमि फुरइ मयणग्गी ।  
 निक्कामस्स य जइणो सव्वे सफला समारंभा ॥६०४७॥



वित्तीसंखेवतवो सो भन्नइ जत्थ भिक्खुवित्तीए ।  
 संखेवणं नरेसर ! तं पुण एवं करेयव्वं ॥६०४८॥  
 भिक्खागएण मुणिणा वियप्पियव्वं जहा मए अज्ज ।  
 एयावंति घराइं भमियव्वाइं न अहियाइं ॥६०४९॥  
 निच्चं निरग्गिसरणा करणहिया निप्परिग्गहा मुणिणो ।  
 तेसिं नरिंद ! भिक्खा भणिया सेसाण नित्थारो ॥६०५०॥  
 वित्तीसंखेवेणं भिक्खालाहो निसेहिओ होइ ।  
 लाभे य नेय हरिसो न विसाओ तह अलाभे य ॥६०५१॥  
 एण्हि भणामि नरवर ! रसचाओ नाम जो चउत्थतवो ।  
 कडु-तित्त-कसायंबा महुरा लवणा य छच्च रसा ॥६०५२॥  
 विगईओ होंति दसहा महु-मज्जं मंस-लोणियं दुच्चं ।  
 दहिय-घयं गुल-तेल्लं पक्कन्नं दस इमा भणिया ॥६०५३॥  
 इह साहु-सावयाणं आइल्लाओ नरिंद ! चत्तारि ।  
 विगईओ(उ) विरुद्धाओ जावज्जीवं निसिद्धाओ ॥६०५४॥  
 खीरमाईओ(उ) जा किर विगईओ(उ) नरिंद ! एत्थ भणियाओ ।  
 तासु एगं च दोन्नि व लेइ मुणी न उण सव्वाओ ॥६०५५॥  
 विविहरसं आकंठं भुत्तं पीणेइ इंदियग्गामं ।  
 पीणिंदिओ हु साहु संजमजोगाओ संचलइ ॥६०५६॥  
 भन्नइ कायकिलेसो अग्गहाणं भूमिसयण-सिरलोओ ।  
 सीउ-ण्ह-खुप्पिवासा सहियव्वा दंस-मसगाई ॥६०५७॥  
 नाणाविहतुलणाओ कप्प-भिक्खाओ विविहभेयाओ ।  
 जायण-अवमाणकओ कायकिलेसो सहेयव्वो ॥६०५८॥

भणिओ कायकिलेसो एण्हिं संलीणयं पवक्खामि ।  
 संलीणा कायव्वा सुहज्जा(झा)णा इंदियग्गामा ॥६०५९॥  
 जस्स पयट्ठंति सया नाणे झाणे तवे य नियमेषु ।  
 इंदियजोगा मुणिणो इंदियसंलीणया तस्स ॥६०६०॥  
 जेण निबद्धा मुणिणा मण-वइ-काया तवेषु नियमेषु ।  
 उम्मग्गाओ निसिद्धा स जोगसंलीणया तस्स ॥६०६१॥  
 भणिओ संखेवेणं छब्भेओ वाहिरो तवो राय ! ।  
 अब्भिंतरं पि नरवर ! छब्भेयं सुणसु तवमिण्हिं ॥६०६२॥  
 अब्भिंतरतवधम्मो पायच्छित्तं नरिंद ! इह पढमं ।  
 तं पुण बहुप्पयारं भणामि संखेवओ तह वि ॥६०६३॥  
 नाणस्स हीलणेणं दंसण-चारित्तखंडणेणं च ।  
 गुरुवयणेण जहागममेगमणो कुणइ पच्छित्तं ॥६०६४॥  
 पंचमहव्वयभंगे उमग्गगमणे य इंदियाणं च ।  
 जाए कसायपसरे उप्पहगमणे तिदंडाण ॥६०६५॥  
 न कयं आगमवयणं आयरियं जं च नागमे भणियं ।  
 इयमाइसु पच्छित्तं कायव्वं अप्पसुद्धीए ॥६०६६॥  
 अप्पा जाणइ सव्वं अप्पा अप्पेण वंचिओ होइ ।  
 अप्पं सोहइ अप्पा अप्पा अप्पं वहुं मुणइ ॥६०६७॥  
 जणरंजणेण माया धम्मो पुण अप्पसक्खिओ भणिओ ।  
 जं अप्पा पावफलं करेइ तं धुयइ पच्छित्तं ॥६०६८॥  
 गरहण-निंदणजुत्तो पच्छायावेण जं कयं दुकयं ।  
 तं हणइ पायच्छित्तं तह मिच्छादुक्कडं तं च ॥६०६९॥

भण्णइ विणओ एण्हिं दंसण-नाणे य तह य पच्छित्ते ।  
 अरहंते य पवयणे थेर-गिलाणे तवस्सीसु ॥६०७०॥  
 बाले गुणगरुएसु एमाइसु साहुणा पयत्तेण ।  
 विणओ खलु कायव्वो विणओ खु महातवो जेण ॥६०७१॥  
 विणयफलं सुस्सुसा गुरुसुस्सुसाफलं सुयन्नाणं ।  
 नाणस्स फलं विरई विरइफलं आसवनिरोहो ॥६०७२॥  
 संवरफलं च सुतवो तवस्स पुण निज्जरा फलं तीए ।  
 होइ फलं कम्मखओ तस्स फलं केवलं नाणं ॥६०७३॥  
 केवलनाणस्स फलं अब्बाबाहो निरामओ मोक्खो ।  
 तम्हा कम्मखयाणं सव्वेसिं भायणं विणओ ॥६०७४॥  
 विणयंजणे(णं) पणासइ अट्टमयद्वाणतिमिरपडलाइं ।  
 पेच्छइ तओ असेसं जयं पि जहवड्डियं साहू ॥६०७५॥  
 वेयावच्चं भन्नइ तइयं अब्भितरं तवं राय ।  
 अनिगूहियबल-विरिया करंति जं साहवो हिड्डा ॥६०७६॥  
 अब्भागयाण निच्चं गुरुण बालाण तह गिलाणाण ।  
 एमाइयाण सावय ! वेयावच्चं करेयव्वं ॥६०७७॥  
 अंगस्स मद्दणाइं नाणावीसामणाओ साहूण ।  
 अन्न-भेसज्जमाई दायव्वं जं जहाजोगं ॥६०७८॥  
 एण्हिं सुण सज्झायं तवं चउत्थं नरिंद ! अइगरुयं ।  
 तं होइ पंचभेयं आयन्नसु सावहाणमणो ॥६०७९॥  
 सज्झायतवो भण्णइ सो च्चिय सुयवायणाण(ए) पुच्छाए ।  
 तच्चित्तण-गुणणेण वक्खाणकमेण नायव्वो ॥६०८०॥

“बारसविहंमि वि तवे अब्भितर-बाहिरे जिणुद्धिडे ।  
 नवि अत्थि नवि य होही सज्झायसमं तवोकम्मं” ॥६०८१॥  
 जावइयं चिय कालं सज्झायं कुणइ सुद्धपरिणामो ।  
 तावइयं चिय कालं असेसकम्मक्खयं कुणइ ॥६०८२॥  
 पयपरिभावण-अत्थावबोह-पहरिस-विवेय-वेरग्गं ।  
 मोहदुग्गुं सज्झायवावडाणं गुणा होंति ॥६०८३॥  
 एण्हि भण्णइ ज्ञाणं चउप्पयारं नरिंद ! तं होइ ।  
 रोहं अट्टं धम्मं सुक्कं ति कमेण नायव्वं ॥६०८४॥  
 जत्थ वह-बंधणाइं मारण-परपीडणाइं रोदाइं ।  
 झाइज्जंति नियमणे तं रोहं भण्णए ज्ञाणं ॥६०८५॥  
 जं पुण पुत्त-कलत्ते पियमित्ते अत्थ-सयण-गेहेसु ।  
 जायइ नरिंद ! ज्ञाणं तं अट्टं होइ नायव्वं ॥६०८६॥  
 तं जाण धम्मज्ञाणं जं जायइ धम्मविसयमेगंता ।  
 सव्वं मुणइ अणिच्चं संसारसरूववित्थारं ॥६०८७॥  
 होइ चउत्थं ज्ञाणं सुक्कज्झाणं नरिंद ! निक्कंपं ।  
 निव्वायपर्इवो इव जत्थ भवे निच्चलं चित्तं ॥६०८८॥  
 सव्वे वि इंदियत्था मण-वइ-काया निरुंभिया जत्थ ।  
 तं सिवसुहेक्कलीणं ज्ञाणं निदहइ कम्माइं ॥६०८९॥  
 अग्गिफुलिं गो व्व इमं बहुतिणनिवहं किलिडुकम्माइं ।  
 डहिऊण तक्खणेणं केवलनाणं समज्जिणइ ॥६०९०॥  
 तं राय ! न सव्वस्स वि संभवइ नरस्स कालदोसेण ।  
 उत्तिमपुरिसावेक्खं उत्तमसंघयणसज्झं च ॥६०९१॥

कहियं सुक्कज्जाणं उस्सग्गं पि हु कहेमि संखित्तं ।  
 जं आलोयण-निंदण-गरहणकज्जेसु कायव्वं ॥६०९२॥  
 दुस्सुमिण-दुन्निमित्ते महोवसग्गे य देव-माणुसिए ।  
 पायच्छित्ते आराहणे य इह होइ उस्सग्गो ॥६०९३॥  
 संखेवेण नरेसर ! बारसभेओ तवो समक्खाओ ।  
 जं चरिऊण सुविहिया अणंतपावाइं सोसंति ॥६०९४॥  
 बहुदिवससंचियं पि हु तणरासिमसंसयं डहइ अग्गी ।  
 तह बहुभवेसु बद्धं घोरतवो डहइ घणकम्मं ॥६०९५॥  
 जह विसमदुग्गभूमिं अहिट्ठिओ कवचपहरणसमिद्धो ।  
 रिउनिवहं नेइ खयं विसमतवत्थो तह दुक्कम्मं ॥६०९६॥  
 जह कळिणं पि हु मयणं विलाइ पज्जलियजलणसंगेण ।  
 तह य विलाइ असेसं दित्ततवेणाऽवि दिट्ठकम्मं ॥६०९७॥  
 जह जलणतावतवियं मुयइ मलं कंचणं बहुमलं पि ।  
 तह य तवग्गिनिदहं कम्ममलं गलइ जीवस्स ॥६०९८॥  
 तं नत्थि किं पि भुयणे न सिज्झए जं तवप्पहावेण ।  
 एएणेव तवेणं अणंतजीवा गया मोक्खं ॥६०९९॥  
 जोइंद ! तए पुव्विं पुट्ठोऽहं अणिममाइसिद्धीओ ।  
 सिज्झंति इमाओ च्चिय तवाओ न हु एत्थ संदेहो ॥६१००॥  
 आमोसहिमाईओ लद्धीओ होंति तवपहावेण ।  
 विणहुकुमाराईया आगमसिद्धा य दिट्ठता ॥६१०१॥  
 कहिओ तुह तवधम्मो संपइ नरनाह ! भावणामइयं ।  
 धम्मं संखेवेणं साहिप्पंतं निसामेह ॥६१०२॥

इह राय ! भावणाओ बारसभेयाओ होंति ताणं च ।  
 नामाइं कित्तइस्सं अन्नत्थ इमाओ नेयाओ ॥६१०३॥  
 पढममणिच्च-मसरणयं संसारो वे(ए)गया य अन्नत्तं ।  
 असुइत्तं आसव-संवरो य तह निज्जरा नवमा ॥६१०४॥  
 लोगसहावो बोही य दुल्लहं(हो) धम्मसाहओ अरहा ।  
 एयाओ राय ! बारस जहक्कमं भावणीयाओ ॥६१०५॥  
 इय भावणाहिं नरवर ! परिभावंतो सुहं च असुहं च ।  
 सत्वं वत्थुसरूवं होइ मुणी सुद्धपरिणामो ॥६१०६॥  
 सुद्धपरिणामजुत्तो निड्डहइ तओ खणेण कम्माइं ।  
 कम्मक्खयत्थमेसो चउव्विहो साहिओ धम्मो ॥६१०७॥  
 एयं समुणुइंता धम्मं नरनाह ! जिणवरुद्धिं ।  
 पत्ता अणंतजीवा सासयसोक्खं परं मोक्खं ॥६१०८॥  
 लद्धूण इमं धम्मं दुत्तरभवजलहिजाणवत्तं व ।  
 एयाणुट्ठाणेणं नियमणुयत्तं कुणह सफलं ॥६१०९॥  
 ता नरवरिंद ! एसो जिणिंदभणिओ चउव्विहो धम्मो ।  
 कहिओ संखेवेणं तुम्हाण अणुग्गहट्ठाए' ॥६११०॥  
 एत्थंतरंमि राया जोइंवे सयलच्छिन्नकुग्गाहा ।  
 पादुब्भूयनिरंतर-विसुद्धचारित्तपरिणामा ॥६१११॥  
 पेच्छंति जलंतं पि व संसारघरं तओ वि नीहरिउं ।  
 इच्छंता निव्विन्ना विसयमहापासबंधाओ ॥६११२॥  
 अंतोहुत्तवियंभियविसुद्धपरिणामनिहयमणखेया ।  
 गोत्तिं पिव मन्नंता गिहत्थभावं विरत्तमणा ॥६११३॥

तो दो वि कयपणामा आणंदुव्यूढबहलरोमंचा ।  
 हरिसंसुपवाहेणं पच्चालियनयणतामरसा ॥६११४॥  
 पभणंति गुरुं 'सामिय ! सम्मं पडिवोहिया तए धीर ! ।  
 अइनिविडमोहनिद्वानिभरनिच्चेडुसुत्ते व्व ॥६११५॥  
 जइ अत्थि जोग्गया णे उचिया वा एयधम्ममग्गस्स ।  
 ता देह मज्झ भयवं ! पव्वज्जं जिणवरुद्धिं' ॥६११६॥  
 तो भणइ बंभगुत्तो 'जोगा(ग्गा) उचिया य अरुहधम्मस्स ।  
 तुब्भे च्चिय जाण इमो विवेयपसरो समुब्भूओ ॥६११७॥  
 ता मा कुण पडिबंधं देवाणुपिया ! इमंमि कज्जंमि ।  
 उज्जमह तुरियतुरियं बहुविग्घा जेण पव्वज्जा' ॥६११८॥  
 अह भणइ वीरसेणो "नरसीहनरिंद ! सुणसु मह वयणं ।  
 उचिओ तुह ववसाओ पारद्धं उत्तमं कज्जं ॥६११९॥  
 किं तु मह चित्तखेओ मणे मणागं न फिट्टए राय ! ।  
 जं तुमए विहिओ हं असमत्तमणोरहो एण्हि ॥६१२०॥  
 तुह चेव वेरिमदणसुहडत्तमडफ(प्फ)रो परं सहइ ।  
 अन्नस्स नणु न छज्जइ तुह पुरओ वंकिमा भणिउं ॥६१२१॥  
 अउरुव्वं तुह विरियं न होइ जं इयरनरवइसरिच्छं ।  
 सामन्नकुलगिरीणं कह तुल्लो होइ कणयदी ? ॥६१२२॥  
 संपइ खत्तियसद्धो अलहंतो च्चिय जहत्थयं राय ! ।  
 निवसइ तुमंमि निययं गुणानिफ(प्फ)न्नो नरवरिंद ! ॥६१२३॥  
 ता इत्थ जेण तेण व कारणजोगेण तुज्झ पासंमि ।  
 आओ म्हि अहं संपइ दिट्ठो तुह विक्कमो राय ! ॥६१२४॥

न जओ पराजओ वि य हरिस-विसायाण कारणं होंति ।  
 राय ! गरुयाण जम्हा अन्नं चिय कारणं किंपि ॥६१२५॥  
 नियजीयसंसए वि हु जो न चयइ विक्रमं च माणं च ।  
 सो जिणइ निज्जिओ वि हु ते हु चयंतो य हारेइ ॥६१२६॥  
 जइ कह वि पहे पडिओ अक्खुलिऊणं नरिंद ! गंडुवले ।  
 ता तस्स एत्तिएण वि नरिंद ! अवमाणणा जाया ॥६१२७॥  
 ता मह मणोरहो किर आसि इमो जं 'नियंमि रज्जंमि ।  
 ठविऊण इमं नरवर ! कयकिच्चो हं भविस्सामि' ” ॥६१२८॥  
 तो जंपइ नरसीहो 'असंभवं नत्थि किंपि तुह हिययए(हियए) ।  
 जलहिगरुयत्तणेणं सरिसा उट्ठंति कल्लोला ॥६१२९॥  
 पेच्छह निस्सीमाणो गरुयाण गुणा फुरंति भुयणंमि ।  
 बहुमच्छराण वि मणे हणंति जे मच्छरुच्छाहं ॥६१३०॥  
 तुमए सह समसीसिं वहंतु कह मारिसा सुगुरुया वि ? ।  
 पहरंति जस्स पुरओ वेरीण गुण च्चिय मणेसु ॥६१३१॥  
 किं तु भणिस्से एगं न रूसियव्वं तए महावीर ! ।  
 निव्वाहियं तए च्चिय सत्तुत्तं आइमंतेसु ॥६१३२॥  
 जं तुच्छरज्जदाणोवलोहणं दाविऊण मह राय ! ।  
 तं गुरुसंजमरज्जं दिज्जंतं मह निवारेसि ॥६१३३॥  
 ते हुंति य मुहमुयणा परिणामरिउव्व एत्थ भुवणंमि ।  
 एवंविहाओ पायं जे देंति कुरज्जबुद्धीए(ओ) ॥६१३४॥  
 ता सब्बहा विरत्तं मह चित्तं वीर ! रज्जमोहाओ ।  
 सासयसुहंमि रज्जे अहिलासो वट्टए एण्ह' ॥६१३५॥



पुण भणइ वीरसेणो 'जइ एवं ता समप्पसु सुयं मे ।  
 अहंवा कणिड्डभाउं जस्स पयच्छमि तुह रज्जं' ॥६१३६॥  
 तो जंपइ नरसीहो 'मा सोजन्नेण कुणसु मह पीडं ।  
 मह को वि नत्थि भाया न य पुत्तो तारिसो जोगो(ग्गो) ॥६१३७॥  
 इह वीर ! रणकडित्ते काऊण पणं सजीवियं तुमए ।  
 जित्तमिणं, तुह रज्जे अहिगारी कह अहं जाओ ? ॥६१३८॥  
 सिरिवीरसेण ! रज्जं पडग्गलग्गं तणं व मन्नामि ।  
 तस्स परिच्चाए खलु न मणागं अत्थि मह पीडा ॥६१३९॥  
 तुममेव मज्झ बंधू जित्तं पि तए सविक्रमबलेण ।  
 दिन्नं मए वि संपइ ता भुंज तुमं नियं रज्जं' ॥६१४०॥  
 तो नरसीहो काउं अंजलिवंधं पुरा कुमारस्स ।  
 जंपइ 'महंतरायं करेसु मा वीर ! दिक्खाए' ॥६१४१॥  
 तो भणइ वीरसेणो 'धन्नो सि तुमं नरिंद ! सकयत्थो ।  
 सिज्झउ तुह निवि(त्वि)ग्घं नरसीह ! मणिच्छियं कज्जं' ॥६१४२॥  
 कारावइ सविसेसं वसुपुज्जजिणिंद्माइसु पहिड्डो ।  
 अट्टाहियामहोत्सवमसेसजिणनाहभवणेषु ॥६१४३॥  
 मणवंछियत्थसमहियदाणेण करेइ भुवणउवयारं ।  
 वीरो चउक्क-चच्चर-रत्था-सिंघाडय-पहेसु ॥६१४४॥  
 तो सो पसत्थतिहि-करण-वार-लग्गंमि सुहमुहुत्तंमि ।  
 विमलमइपमुहपरियणपरियरिओ सहसभज्जाहिं ॥६१४५॥  
 सिरिबंभगुत्तगुरुणो पासे सह तेण जोइनाहेण ।  
 पव्वई(इ)ओ नरसीहो विसुज्झमाणेण चित्तेण ॥६१४६॥

अब्भसियसाहुकिरिया सम्मं विन्नायसयलसिक्खंगा ।  
 कयबहुतवोवहाणा समहिज्जियवारसंगा य ॥६१४७॥  
 तह दो वि परमवेरग्गवासणाविहियघोरतवचरणा ।  
 जह नियतणुनिरवेक्खा जाया चम्मट्टिसेस व्व ॥६१४८॥  
 चिद्धंति गुरुसमीवे असेसकम्मक्खयंमि उज्जुत्ता ।  
 विहरंति दो वि सुहिया सह गुरुणा बंभगुत्तेण ॥६१४९॥  
 पव्वइए नरसीहे असोय-सेहरयरायपरियरिओ ।  
 पविसइ चंपं वीरो सुरवइलीलं विडंबंतो ॥६१५०॥  
 तो तत्थ तुंगभद्दे पासाए सयलरम्मयानिलए ।  
 सीहासणोवविट्ठो आसासइ सयलपुरलोयं ॥६१५१॥  
 संठवइ सयलसेन्नं हरि-करि-रह-पुरिसतप्पहाणाण ।  
 काऊण गुरुपसायं जहठाणं ते निरूवेइ ॥६१५२॥  
 भंडाराइसु ठाणेसु तह य काऊण सव्वसुत्थाइं ।  
 सव्वेसु जहट्ठाणं निओइवग्गं निरूवेइ ॥६१५३॥  
 गामागर-पुरपट्टण-दुग्गाहिट्ठाण-देस-विसयाण ।  
 हक्कारिऊण वुट्ठे जहजोगं कुणइ सुपसायं ॥६१५४॥  
 सिक्खवइ 'कुणह धम्मं पावं परिहरह वट्टह नएण ।  
 पालह नियमज्जायं जहसत्ति परेसु उवयरह ॥६१५५॥  
 नियवन्नववत्थाए वट्टह पालह उचियमायारं ।  
 जीवेसु कुणह करुणं परिहरह असच्चवयणं च ॥६१५६॥  
 मा गिण्हह परकीयं तणमेत्तं पि हु चएह परनारिं ।  
 वज्जह लोयविरुद्धं मज्जं मंसं च परिचयह' ॥६१५७॥

इह(य) एवमाइ बहुयं लोयं अणुसासिऊण सप्पणयं ।  
 जाव विसज्जइ वीरो ता भणिओ सव्वलोएहिं ॥६१५८॥  
 'धन्नाओ ताओ नरवर ! पयाओ असि दिट्ठिगोयरे जाण ।  
 जणओ व्व जाण एवं कयसिक्खो ताण किं भणिमो ? ॥६१५९॥  
 इह संपइ नरवइणो निरंकुसा देव ! मत्तहत्थि व्व ।  
 पुरओ तूररवेण व खुद्धा सेवंति परपीडं ॥६१६०॥  
 देव ! देव ! त्ति भणिया तूसंति मणे वहंति उक्करिसं ।  
 सेवंति पुणो कम्मं जं नारय-तिरियगइजोगं ॥६१६१॥  
 वारंति तरणितावं अड्ढतिरिच्छेहिं छत्तनिवहेहिं ।  
 नरयग्गिमहातावोवसमे उ निरुज्जमा होति ॥६१६२॥  
 धारंति न दिन्नं पि हु उवएसं नरिंद ! सवणेसु ।  
 तं वोढुमसक्केसु व मणिकुंडलहारखेएण ॥६१६३॥  
 कह उल्लासं पावइ ताण विवेओ नरिंद ! हिययंमि ।  
 जो कंचणभूसणसंकलाहिं बद्धो व्व अणवरयं ॥६१६४॥  
 जइ कह वि ताण गुणिसंगसंभवो घडइ पुत्रपरमाणू ।  
 ता चलिरचामरानिलपहओ व्व खणेण ओसरइ ॥६१६५॥  
 तुम्हारिसाण जा पुण कलिकाले वीर ! होइ उप्पत्ती ।  
 सो मरुदेसे पउमिणिसरोवमो जणइ अच्छरियं ॥६१६६॥  
 गुरुगिम्हदुसहसंतावतत्तदेहाण सव्वलोयाण ।  
 आसासंतो भुयणं घणो व्व अब्भुन्नओ तमिह ॥६१६७॥  
 ता देव ! तए इण्हि मओ व्व संजीविओ जणो सव्वो ।  
 चिरदुक्खताविओ इव नरिंद ! निव्वाविओ निययं' ॥६१६८॥

इय एवमाइ विविहं भणिउं रोमंचकंचुइज्जंतो(ता) ।  
 पुणरवि कयप्पसाया नियनियठाणं गया लोया ॥६१६९॥  
 एत्थंतरंमि पविसइ पलंबसियचोडएण छत्रंगो ।  
 अच्चुज्जलपट्टंसुयसिरवेदुव्वेढणक्खणिओ ॥६१७०॥  
 वसुहानिहित्तजाणू पणामपुव्वं असंभमुब्भंतो ।  
 करवत्थंचलझंपियमुहकमलो मूलपडिहारो ॥६१७१॥  
 विन्नवइ पगब्भगिरो 'देव ! दुवारंमि तुज्झ पडिक्ख(ख)लिया ।  
 अइ व्व दिसावइणो चिट्ठंति सहस्सपरिगुणिया ॥६१७२॥  
 सव्वे वि मउडबद्धा अइदिसाभायसंठिया देव ! ।  
 अवरोप्परपरक्कूममसहंता गंधकरिणो व्व ॥६१७३॥  
 तुह चंडप्पयावानलसंतत्ता नाह ! भूमिवलयंमि ।  
 वीसाममलहमाणा तुम व्व कप्पदुमं ल्ली(ली)णा ॥६१७४॥  
 जाणं पयाणसमये वलभरसम्मद्वपीडिया पुहई ।  
 धाहाविउं व वच्चइ रयच्छला इंदलोयंमि ॥६१७५॥  
 जाणमणंतनराहिव-सियछत्तच्छाइयाइं सेन्नाइं ।  
 दीसंति व सेवाआगयाइं बहुसेयदीवाइं ॥६१७६॥  
 चलधयधवलच्छिजुया करिंदकुंभत्थलोरुथणवड्डा ।  
 वेस व्व जाण सेणा निरत्थयं कुणइ भूमिवई ॥६१७७॥  
 ते अइसहस्ससंखा असंखसेणाभरेण संजुत्ता ।  
 सेवाहिलासिणो तुह दंसणसोक्खं अहिलसंति' ॥६१७८॥  
 तो भणइ वीरसेणो 'तुरियं पडिहार ! ते पवेसेसु' ।  
 'आएसो' त्ति भणित्ता दुवारदेसं गओ दंडी ॥६१७९॥

तो ते परिगणिकुणं तंबोलपदायगेक्कपरिवारा ।  
पडिसिद्धसेसलोया पवेसिया दारपालेण ॥६१८०॥  
विद्धो य तेहिं वीरो खयरिंद-नरिंदविंदपरियरिओ ।  
सासंकमाणसेहिं 'हवेज्ज किं सुरवई एसो' ॥६१८१॥  
अइउच्चरयणसीहासणडिओ उवरिधरियसियछत्तो ।  
सरयब्भतलनिविद्धो रवि व्व उदयगिरिसिहरंमि ॥६१८२॥  
परिवियडपहावलएण नियपयावेण साहियजएण ।  
आणियधराहिवइणा सहइ व्व पयक्खिज्जंता ॥६१८३॥  
रेहइ फुरंतभूसणमणिप्पहाजालबद्धसुरचावो ।  
चउदिसिदुलंघआणापवेसकयतोरणो व्व नहे ॥६१८४॥  
सेवोवविद्धखेयर-नरिंदसिरमउडमणिसु संकंतो ।  
सव्वसिरसेहरेण वि लज्जंतो नियलहुत्तेण ॥६१८५॥  
विफु(प्फु)रियचरणनहमणिसियकिरणपसाहियावणिपएसो ।  
गयवसुहाहिवकलुसियपुहइं पक्खालयंतो व्व ॥६१८६॥  
दट्ठूण ते नरिंदा दंसणसंजायचित्तसंखोहा ।  
'किं किं किमेयमसुयं अदिद्धपुव्वं'ति चिंतंति ॥६१८७॥  
'तं किं पि इमस्स महंतमुज्जलं खत्तवीरियप्पहवं ।  
अच्चंतदुरालोयं तेयं तेयंसिहयपसरं ॥६१८८॥  
सव्वन्नुणो वि विसयं न होइ गुरुणो वि गोयर जं न ।  
जं भुयणअसामन्नं तमिमस्स सरूवमिक्खामो ॥६१८९॥  
सच्चं सो नरसीहो जो होइ इमस्स संमुहो समरे ।  
हक्कंपि सहइ पहरइ वीरो नरसीहसरहस्स ॥६१९०॥

मन्ने भरह-भगीरह-भग्ग(ग)दत्ताईण भूमिपालाण ।  
समयं मिलिऊणं पिव एस पयावेहिं परियरिओ ॥६१९१॥  
ता संपइ पुव्वभवंतरेसु विहिएहिं अम्ह सुकएहिं ।  
फलियं जाओ जाणं महापहू एरिसो भुयणे' ॥६१९२॥  
एवं ते चिंतता पुरओ धरिऊण वीरसेणस्स ।  
पडिहारेण नमंता पयासिया नाम-त्था(था)मेहिं ॥६१९३॥  
'पणमइ नरिंद ! एसो महेंदसीहो त्ति नाम महिवालो ।  
जो पुव्वदिसापालो सहस्सनरनाहपणिवइओ ॥६१९४॥  
एसो य अग्गमित्तो अग्गेयदिसाहिवो गुरुपयावो ।  
तुह नमइ चलणजुयलं तावइयनरिंदपरिवारो ॥६१९५॥  
एसो वि देव ! पणमइ सुदक्खिणो नाम दक्खिणाहिवई ।  
परमेसरपयकमलं पुव्वुत्तनरिंदपरिवारो ॥६१९६॥  
एसो पणमइ भीमो अइभीमपरक्कमो महीनाहो ।  
नेरइयदिसिनिवासो तावंतनरिंदकयसेवो ॥६१९७॥  
मयरद्धओ त्ति नामं तुह पणमइ परमभत्तिसंजुत्तो ।  
पच्छिमदिसाहिनाहो सहस्सनरनाहकयसेवो ॥६१९८॥  
अरिबलपहंजणो जो पहंजणो नाम नमइ तुह नाह ! ।  
वायव्वदिसाहिवई पुव्वुत्तनरिंदपरिवारो ॥६१९९॥  
एसो उत्तरसेणो उत्तरदिसिसासओ महाराय ! ।  
तुह नमइ चरणकमलं सहस्सनरनाहकयसेवो ॥६२००॥  
एसो वि उग्गसेणो ईसाणदिसाहिवो नमइ तुम्ह ।  
पयकमलममलचित्तो तावंतनरिंदपरिवारो ॥६२०१॥

एमाइणो नरिंदा सिरधरियकिरीडसोणमणिकिरणा ।  
 तुह विसयं व वहंता सिरेण अणुरायमिह पत्ता' ॥६२०२॥  
 तो भणइ वीरसेणो 'कमेण पडिहार ! जस्स जं जोग्गं ।  
 तं तस्स देहि तुरियं वरासणं सव्वरायाण' ॥६२०३॥  
 दिन्नासणोव्वविद्ध महिंदसीहाइणो कयपसाया ।  
 परिहियवत्थाहरणा वीरेण इमं तओ भणिया ॥६२०४॥  
 'भो रायाणो ! तुम्हं महिंदसीहाइणो सया कुसलं ? ।  
 रज्जंगाइ य सत्त वि सीयंति न सामिपमुहाइं ?' ॥६२०५॥  
 तो ते भणंति सव्वे सिरग्गसंघडियउभयकरकोसा ।  
 'अज्जेव देव ! कुसलं जं दिट्ठं तुम्ह पयकमलं ॥६२०६॥  
 पइ सामियंमि संपइ सत्तंगाइं पि कह णु सीयंति ! ।  
 जीयं पि जाण अम्हं सामिय ! तुह चेव आयत्तं' ॥६२०७॥  
 तो भणइ वीरसेणो 'सच्चमिणं जं च मज्झ आयत्तं ।  
 तं सीयइ न कहं चिय अहं तु तुम्हाण आयत्तो' ॥६२०८॥  
 इयमाइकहालावेहिं ताण सव्वाण भूमिपालाण ।  
 काऊण गुरुपसायं पच्चेयं देइ आवासे ॥६२०९॥  
 तो सिद्धसेणेनेमित्तिएण गणिए पसत्थदियहंमि ।  
 सेहरयासोएहिं महिंदसीहाइराएहिं ॥६२१०॥  
 विन्नविऊण सहरिसं वीराहिवमायरेण पणएहिं ।  
 मेल्लियमहोवयरणो पारद्धो रज्जअहिसेओ ॥६२११॥  
 एत्थंतरंमि अहयं तुरियं वीराहिवेण आहूओ ।  
 भणिओ य सप्पसायं असोय-सेहरयराएहिं ॥६२१२॥

'रे वज्जबाहु ! तुरियं नासिकुं वच्च कहसु वीरस्स ।  
 रज्जाहिसेयदिवसं विचित्तजसराइणो तह य ॥६२१३॥  
 चंदसिरीदेवीए तह पढुमित्तस्स बंधुयत्तस्स ।  
 तह कुणसु जहा तुरियं एत्थ पढुप्पंति सब्वाइं' ॥६२१४॥  
 इय राय ! वीरसेणेण तुम्ह पासंमि पेसिओ अहयं ।  
 सोऊण इमं देवो जं जुत्तं तं समायरउ' ॥६२१५॥  
 इय भणिऊणं विरए खयरिदे वज्जबाहुनामंमि ।  
 आणंदपुलइयंगो विचित्तजसनरवई भणइ ॥६२१६॥  
 'धन्नाण निययपुन्नाणुहावविहडंतघोरदुरियाण ।  
 ताणं चिय सुकएहिं कल्लाणपरंपरा होइ ॥६२१७॥  
 ता वज्जबाहु ! मह पुव्वमेव हियए परिट्टियं एयं ।  
 तं नत्थि भूमिवलए न सिज्जए जं कुमारस्स' ॥६२१८॥  
 एत्थंतरंमि देवी चंदसिरी हरिसवियसियकवोला ।  
 दइयाणुरायविवसा गणइ पउड्ढंमि वलयाइं ॥६२१९॥  
 विजयवई पहरिसवसपसरियरोमंचकुइज्जंता ।  
 संठवइ करग्गेणं अलयालिं निययधूयाए ॥६२२०॥  
 पिययमपउत्तिगरुओ अव्वभिचारि ति गुणमहग्घविओ ।  
 देवीए वज्जबाहु पलोइओ कयपसायाए ॥६२२१॥  
 पन्नायरेण भणियं 'देव ! कुमारस्स पेच्छं अच्छरियं ।  
 आजलहिमहीवलयं पसाहियं सत्तहिं दिणेहिं ॥६२२२॥  
 गलगज्जिऊण सलिलं देति न देति व्व जलहरा गयणे ।  
 गरुयाण सिद्धकज्जाइं सयलभुयणाइं साहंति ॥६२२३॥



जे वयणगव्वगरुया कज्जमि न निव्वडंति ते पुरिसा ।  
 जयगरुयकज्जकारीण देव ! गव्वो उण न होइ ॥६२२४॥  
 तो देव ! तए रज्जाहिसेयपरमुच्छवंमि गंतव्वं ।  
 चंदसिरीए वि दिज्जउ गमणत्थं तुरियमाएसो' ॥६२२५॥  
 तो राइणा सहरिसं आणंदजलाविलच्छिवत्तेण ।  
 सुचिरमवलोइऊणं चंदसिरी पभणिया एवं ॥६२२६॥  
 'तुह चेव परं सोहइ असेसभुवणाहिवत्तणं पुत्त ! ।  
 जीए सिरिवीरसेणो तिखंडभरहेसरो दइओ ॥६२२७॥  
 ता वच्च नियं गेहं तुमं पि हे बंधुयत्त ! उच्चलसु ।  
 सह खेरय(खेयर)सेत्रेणं परिवारियनियबहुकलत्तो' ॥६२२८॥  
 एत्थंतरंमि सहसा आणंदपयाणसंभवा भेरी ।  
 आ(अ)फा(प्फा)लिया सहेलं बहिरियनह-दसदिसाभोया ॥६२२९॥  
 सुयगहिरहरिसभेरीझंकारससंभमुल्लसंतेहिं ।  
 आणंदमुक्किलिगिलिरवेहिं चलियं बलोहेहिं ॥६२३०॥  
 करि-तुरय-नर-महारहसमहिद्वियसंदणोहसमदं ।  
 सायरजलं व सेत्रं रेल्लंतं महियलुदोसं ॥६२३१॥  
 तो राया सुहलग्गे पुरोहियारद्धसयलकल्लाणे ।  
 अणुक्कलसउणाहिद्वो आरुद्धो पट्टहत्थिमि ॥६२३२॥  
 तह पन्नायरपमुहा पहाणपुरिसा य तत्थ संचलिया ।  
 विजयवंई वि य देवी कंचणजंपाणमारुद्धा ॥६२३३॥  
 एत्तो वि चलइ चंचलचारणपारुद्धचाडुया गयणे ।  
 दिव्वविमाणारुद्धा चंदसिरी परियणसमेया ॥६२३४॥

तो राया पेच्छंतो गयणे धूयाए रिद्धिवित्थारं ।  
 वच्चइ सुहेण मग्गे आणंदुव्वूढरोमंचो ॥६२३५॥  
 कत्थ वि नियदेसपयाहिं विहियनाणापयारपडिवत्ती ।  
 वच्चइ समिद्धजणवयदंसणपरिवद्धिउच्छाहो ॥६२३६॥  
 कत्थ वि दुलंघअडवीसंकडपहत्थिरपयट्टकडओहो ।  
 पुच्छंतो पल्लिवइं नाणादुमजाइनामाइं ॥६२३७॥  
 कत्थ वि सदेसएकग्गलग्गअरिरायविहियभयसेवो ।  
 जामाउयसंकाए वच्चइ परिओससंपत्तो ॥६२३८॥  
 इय अणवरयपयाणयविलंधियासेसपुहइवित्थारो ।  
 पत्तो कमेण चंपं विचित्तजसनरवई सबलो ॥६२३९॥  
 तो वज्जबाहुणा वि य पुरओ गंतूण वीरसेणो वि ।  
 वद्धाविओ सहरिसं ससुरसमागमणवत्ताए ॥६२४०॥  
 एत्थंतरंमि सहसा पडिहारपवेसिओ महामंती ।  
 पन्नायरो पविट्ठो नरिंदसंपेसिओ तत्थ ॥६२४१॥  
 तो दट्ठूण सुमंतिं वीरो आणंदनिब्भरुकुंठो ।  
 परिओसइ सप्पणयं समुच्चि(चि)यपडिवत्तिकरणेण ॥६२४२॥  
 दिन्नासणोवविट्ठो पहिट्ठ-वीराहिवेण पुण पुट्ठो ।  
 'कुसलं तुह पन्नायर ! ?, पत्तो कुसली महाराओ ?' ॥६२४३॥  
 तो भणइ महामंती "तुम्ह पसाएण देव ! मह कुसलं ।  
 तुज्झाणुहावओ च्विय कुसलेण समागओ राया-॥६२४४॥  
 संपेसिओ म्हि वीराहिराय ! राएण तुम्ह पासंमि ।  
 कज्जेण तं पि सुव्वउ अणुट्ठियव्वं च तं तुमए ॥६२४५॥

तह लघुएण वि तुमए ववहरियं वीर ! विणयनम्मेण ।  
 जह गरुयाण वि जाओ नरिंद ! सिरसेहरो एण्हिं ॥६२४६॥  
 अप्पायत्ते सुयणे नरिंद ! गरुयत्तणं लहुत्तं च ।  
 तह वि न पावन्ति नरा तमब्भसंता वि सुचिरेण ॥६२४७॥  
 ता देव ! इमं भणियं विचित्तजसराइणा मह मुहेण ।  
 'जइ मं मन्नसि हियए जइ वा मह गोरवं महसि ॥६२४८॥  
 ता सब्बहा न संमुहमागंतव्वं तए महावीर ! ।  
 अह एहिसि ता अहयं एत्तो च्चिय पडिनियत्तिस्सं ॥६२४९॥  
 जइ कह वि तए मह वीरसेण ! धूया विवाहिया ता किं ।  
 एत्तियमेत्तेणं चिय लहुयत्तं तुम्ह संजायं ? ॥६२५०॥  
 उवहसियसुरपरक्कम ! अयाणमाणेण तुज्झ गरुयत्तं ।  
 जं अणुचियमायरियं खमियव्वं तं तए पुव्वि ॥६२५१॥  
 मह परिओसनिमित्तं पारंभसि जं उवक्कमं वीर ! ।  
 सो च्चिय जइ मणखेयं उप्पायइ निफ(प्फ)लो ता सो' ॥६२५२॥  
 तो भणइ वीरसेणो 'पन्नायर ! संगयं तए भणियं ।  
 पडिहाइ ताण जं चिय मए वि तं चेव कायव्वं ॥६२५३॥  
 जा मह लच्छी अरिनिग्गहाइणो जे गुणा य तो तेहिं ।  
 मह विक्कमो त्ति नायं न उणो नियचरणमाहप्पं ॥६२५४॥  
 अहवा किं मह कज्जं तव्वयणं अन्नहा वियप्पेउं ? ।  
 जुत्तं व अजुत्तं वा गरुय च्चियं ते वियाणंति' ॥६२५५॥  
 इय भणिऊणं वीरो पडिहारं आणवेइ उच्छुक्को ।  
 कारेह नयरसोहं महापमीयं च चंपाए ॥६२५६॥

सव्वो सबाल-वुद्धो पुरलोओ जाउ रायपच्चोणि ।  
 सव्वाइं साहणाइं परिगहो-सव्वसेत्रं च ॥६२५७॥  
 तो आएसाणंतरमणंतनरतुरियदिन्नआएसो ।  
 कारावइ पडिहारो जं भणियं वीरसेणेण ॥६२५८॥  
 अह चडयरेण महया नीहरिओ राय-पौरपरिवारो ।  
 पत्तो संमदेणं विचित्तजसराइणो पासे ॥६२५९॥  
 तो चंदसिरीदंसणसविम्हउब्भंतनयणतामरसो ।  
 बहुकोऊहलतरलियमण-नयणो पिच्छए लोओ ॥६२६०॥  
 तो तेहिं महाराओ पढमं जोका(क्का)रिओ नरिंदेहिं ।  
 पुर-पौर-परियणेण य पणिवइओ विणयनम्महिं ॥६२६१॥  
 दिव्वविमाणारूढं निज्जियसुरसुंदरीयणं देवीं(विं) ।  
 लोओ चंदसिरीं(रिं) पि हु पणमइ विज्जाहराइत्रं ॥६२६२॥  
 नरवइणा वि जहोच्चि(चि)य पडिवत्तिपुरस्सरं असेसो वि ।  
 लोओ कयसम्माणो नियनियजाणेसु आरूढो ॥६२६३॥  
 पहयपडुपडह-मदल-मउंद-ढक्का-हुडुक्कसंधायं ।  
 वज्जिरगहीरभेरी-काहलकोलाहलाइत्रं ॥६२६४॥  
 पूरियअसंखघणसंखसदसदोहनहयलाभोयं ।  
 घणघंटारववहिरियदियंतरं आहयं तुरं ॥६२६५॥  
 देवी चंदसिरी वि य मणिरयणविणिमि(म्मि)ये विमाणंमि ।  
 सीहासणोवविट्ठा उभयंसपडंतचमरोहा ॥६२६६॥  
 अइदूरदिसागयबंदिविंदउग्घुडु-जयजयासदा ।  
 कव्वयबंधनिबद्धं नियपइणो सुणइ सच्चरियं ॥६२६७॥

निसुणियदइयपरक्कमपहरिसरोमंचकंचुयच्छइया ।  
 गयणद्धिया य वरिसइ वसुहारं बंदिलोयस्स ॥६२६८॥  
 मंसलवंसविमीसियसुगीयसवणद्धमीलियच्छिउडा ।  
 ते वि कुणइ अदरिद्वे पइनामायन्नणपहिद्धा ॥६२६९॥  
 पत्तो कमेण राया रायपहं विविहजणवयाइन्नं ।  
 सलहिज्जंतो सहरिसनीसेसपुराणपुरिसेहिं ॥६२७०॥  
 'एयस्स नत्थि सरिसो असेसभुयणे वि रायरायस्स ।  
 जो वहइ ससुरसदं जयदुल्लहं वीरसेणस्स' ॥६२७१॥  
 अह नियइ सव्वलोओ उत्रामियकंधरो महादेविं ।  
 घुंसिणारुणंगसोहं पहायसंझं व जयपुज्जं ॥६२७२॥  
 उभयंसपासघोलिरकवोलसंकंतचारुसियचमरा ।  
 अंतोसंवेल्लियवयणचंदकिरिण व्व दियससिरी ॥६२७३॥  
 घणसामलनीलमहिंदनीलथंभंतरंमि संकंता ।  
 जलभरियजलहरंतरपरिफु(प्फु)रंती तडिलय व्व ॥६२७४॥  
 सुसिणिद्धचरणकोमलतलंगुलीसोणकिरिणवित्थारा ।  
 नीसेसपुरिसपेसियमणुरायं ताडयंति व्व ॥६२७५॥  
 जा वहइ चरणनहनिवहमुज्जलं नहमुहेण समसीसिं ।  
 कुणइ त्ति खंडखंडीकयं व धारेइ हरिणकं ॥६२७६॥  
 गुफा(प्फा)वलंबिनेउरमणिकंचणवलयमंडलीकलिया ।  
 हडबंधसमाकिद्धा पविसंती भुयणलच्छि व्व ॥६२७७॥  
 अंतोकयवीरपइद्धिययपासायधारणत्थं व ।  
 जा वहइ थंभजुयलं अप्पमाणोरुवित्थारं ॥६२७८॥

जा धरइ नियंबतडं मणिमेहलमंडियं धरित्ति व्व ।  
जलफेणधवलनिवसणरयणायरविहियपरिवेढा ॥६२७९॥  
जा तिवलिवलयपरिगयतणुमज्झा सहइ लोयरमणीया ।  
मज्झ परिट्टियतिवहयपवित्तिया तिहुयणसिरि व्व ॥६२८०॥  
अइदूरुन्नयथणवट्टमंडला सहइ दक्खिणदिसि व्व ।  
फुडदिसमाणदिसिगयकुंभयडा आगय व्व सयं ॥६२८१॥  
थणवट्टोवरि तारं मुत्ताहारं उरेण धारंती ।  
वीरस्स करडिकरसीयरोहकलिय व्व जयलच्छी ॥६२८२॥  
सहइ निसग्गारुणपाणिपल्लवा भुयणकप्पवल्लि व्व ।  
अणवरयवीरपयकमलमलणसंकंतघणराया ॥६२८३॥  
जा वहई मुहकमलं व वियसियं दीहरच्छिदलललियं ।  
नासग्गकन्नियं वीरसेणमुहमाणसावासं ॥६२८४॥  
निम्मलमणिमयकुंडलपडिबिंबियगंडमंडला सहइ ।  
मुहदोखंडियससहरसरणागयउभयखंड व्व ॥६२८५॥  
सवणट्टियमणहरकन्नपूरमणिकिरणनिवहमुव्वहइ ।  
जा पिययमाणुरायं पियइ व्व जणाउ सवणेहिं ॥६२८६॥  
इय चंदसिरीमणहरसरीरसोहावहरियमण-नयणो ।  
लोओ विम्हयरसपसरमूढचित्तो व्व संजाओ ॥६२८७॥  
जंपइ अन्नोन्नमिणं 'संजायं लोयणाण साफल्लं ।  
भुयणच्छेरयभूयं जमिमीए पलोइयं रूवं ॥६२८८॥  
पेच्छ पयावइणो वि य असरिससंजोयसंभवो अजसो ।  
अणुसरिसमिहुणसंजोयणेण निन्नासिओ एण्हिं ॥६२८९॥

१. त्रिपथगा खंता. टि ॥

कहमुच्चविमाण्ठियं जयदुल्लहदंसणं पलोएमो ? ।  
 पुरओ आरुहइ जणो पासायमहातरुगिहेसु ॥६२९०॥  
 आइन्नइ चंदसिरी समुच्चपासायसाहिसिहरेसु ।  
 जुयईण समुल्लावे नियविसेसविसेसवित्थरिए ॥६२९१॥  
 'कह तस्स हरइ हिययं सहिओ ! तुम्हारिसो तरुणिसत्थो ।  
 रूवोहामियसुरसुंदरी इमा भारिया जस्स ?' ॥६२९२॥  
 अन्ना जंपइ 'गिरिकंदरंमि एयाए पूइया गोरी ।  
 लावंन्न-रूव-सोहग्ग-रज्जमाई गुणा तेण' ॥६२९३॥  
 अन्नाए पुण भणियं 'मिच्छादिट्ठिणि ! असंगयं भणियं ।  
 जम्मंतरविहियजिणिंदधम्मकुसुमाइं एयाइं' ॥६२९४॥  
 अन्नाए(इ) पुच्छिया सा 'पुप्फाइं इमाइं ता फलं किं नु ?' ।  
 सा भणइ 'फलं मोक्खो जिणिंदधम्मस्स विहियस्स' ॥६२९५॥  
 अन्नेक्काए भणियं 'सहिओ ! जइ एरिसो भवे धम्मो ।  
 ता सच्चाओ समयं तमेव धम्मं अणुट्ठेमो' ॥६२९६॥  
 अन्नाए भणिय 'मिस्सा दासित्तं पि हु न पुन्नहीणाओ ।  
 पावंति किं पुण भवे एयसरूवस्स संपत्ती ?' ॥६२९७॥  
 अन्ना य भणइ 'पियसहि ! एसा खु महासई जए पयडा ।  
 जीएँ, कुमारीए वि हु न अन्नपुरिसो मणे धरिओ' ॥६२९८॥  
 अन्नाए पुण भणियं 'सा एसा जा असोयखयरेण ।  
 अणुरत्तमाणसेणं हरिऊणं सायरे खूढा ॥६२९९॥  
 एएण पुण सिरिवीरसेणराएण कट्ठिया तत्तो ।  
 सेहरयासोयाणं पच्चक्खं चेव परिणीया' ॥६३००॥

अन्नेक्काए भणियं 'पियसहि ! को एस वीरसेणो त्ति ?' ।  
 सा भणइ 'जेण गयणे कमलकेऊ हओ खयरो' ॥६३०१॥  
 अन्नाए पुणो भणियं 'को सो सहि ! खेयरो कमलकेऊ ?' ।  
 सा भणइ 'जेण हरिया नरसीहपिया कणयरेहा' ॥६३०२॥  
 इय अन्नोन्नालावे निसुणइ सा जाव तरुणिसत्थाण ।  
 पत्तो रायदुवारं विचित्तजसनरवई ताव ॥६३०३॥  
 उत्तरइ तओ राया सीहदुवारंमि हत्थिखंधाओ ।  
 वारिज्जंतो वि सयं वीराहियरायपुरिसेहिं ॥६३०४॥  
 उयरुयरिपरिपेसियपडिहारपरंपराकहियमग्गो ।  
 वच्चइ अवलोयंतो रायउलं विविहववहारं ॥६३०५॥  
 जं सेवागयनरवालतुरयखुरुखा(क्खा)यखोणिरयपडलं ।  
 पविसंतमत्तमयगलमयजलधाराहि उवसमइ ॥६३०६॥  
 केहिं पि जुद्धकीलत्थमाणिएहिं च दीयमाणेहिं ।  
 पढममयदंसणत्थं आहूएहिं च केहिं पि ॥६३०७॥  
 अन्नेहिं पट्टबंधाप(य?) द्वाविएहिं नवनिबद्धेहिं ।  
 घणवारणेहिं वियडं पि संकडं नियइ रायउलं ॥६३०८॥  
 अणवरयचलियखुरपुडधरामद्वलेहिं तुरएहिं ।  
 नट्टवेएहिं व थिरं रायसिरिं नट्टयंतेहिं ॥६३०९॥  
 पहरिसहेसारवबहिरियंबरेहिं व संकडाभोयं ।  
 रायाजिरं नियंतो वच्चइ राया विचित्तजसो ॥६३१०॥  
 दूरं पेसिज्जंतेहिं दूरसंपेसियागएहिं च ।  
 करहेहिं संकडं रायपंगणं जाइ पेच्छंतो ॥६३११॥

१. राजाजिरं राजप्राङ्गणम् खंता. टि. ॥



अंतोपविड्नरवालछत्तनिवहेहिं सेयवन्नेहिं ।  
 सरयब्भजलहरेहिं व वायाहयनिवडिएहिं च ॥६३१२॥  
 पेच्छइ पुरओ राया ओलग्गुयविविहरायसंघायं ।  
 जे न कयाइ वि पावंति दंसणं वीरसेणस्स ॥६३१३॥  
 सीहदुवारोवरि तइया भूमियापहयभेरिसदेण ।  
 वित्तत्थं पेच्छंतो घडियाहरयस्स जणनिवहं ॥६३१४॥  
 पेच्छइ कत्थूरीहरिणजूहमुत्तरदिसानरिदेहिं ।  
 संपेसियं विचित्तं नाणाविहदव्वजायं च ॥६३१५॥  
 कत्थ वि हिरन्नकूडेहिं संकडं वीरसेणभीएहिं ।  
 नरवालपेसिएहिं कंचणगिरिकूडसरिसेहिं ॥६३१६॥  
 अन्नत्थ विविहमणि-रयणरासिपुंजेहिं मंडियं नियइ ।  
 रोहणगिरिसिहरेहिं व उड्डं बद्धिदधणुहेहिं ॥६३१७॥  
 अन्नत्थ पुणो हिमसेलसिहरसंकासरुप्परासीहिं ।  
 भयपेसियाहिं दीसइ निरंतरं दूरराएहिं ॥६३१८॥  
 अन्नत्तो पुण हिमगिरिनरिंदसंपेसियाइं कोडेण ।  
 पेच्छइ तुरयमुहाणं मिहुणाइं विचित्तजसराया ॥६३१९॥  
 कत्थ वि पुण कोऊहलतरलमणो गरुयलोहकुंडजले ।  
 जलमाणुसाइं पेच्छइ दीवंतरायपहियाइं ॥६३२०॥  
 एकत्तो पुण करि-तुरय-वेसरी-हेमडोलजाणे(णा)उ ।  
 उत्तरमाणाहिं विलासिणीहिं अपहुत्तवित्थारं ॥६३२१॥  
 चलचारुचरणनेउरमणिमेहलकणिरकिंकिणिरवेहिं ।  
 बहिरियदियंतरालं नियइ निवो वारविलयाण ॥६३२२॥

गामागर-पुर-पट्टण-दुग्गाहिद्वण-देस-विसयाण ।  
 पव्वयपमाणरासीओ नियइ हेमस्स सिरिकरणे ॥६३२३॥  
 लेखयदाणनिमित्तं बहुदेसनिउत्तघणनिओईहिं ।  
 सेविज्जंतं पेच्छइ नरनाहो मूलसिरिकरणं ॥६३२४॥  
 अन्नत्थ पुणो नीसेसभुयणदारिहुवहुयजणाण ।  
 राया पेच्छइ विविहं दिज्जंतं कणयवित्थारं ॥६३२५॥  
 अन्नत्थ पुणो धम्माहिगरणम्मि(मि)क्खेइ देस-कालाण ।  
 समुचियनएण लोयं सासंतं नयववत्थाहिं ॥६३२६॥  
 इय एवमाइबहुविहवइयरसयसंकुलं महाराओ ।  
 रायउलं पेच्छंतो संपत्तो तुंगभइते ॥६३२७॥  
 नीणंत-विसंताणं संघट्टपडंतभूसणमणीहिं ।  
 अन्नोन्नं रायाणं संचलियं नियइ रायउलं ॥६३२८॥  
 पज्जलियजलणकणभासुराइं दट्ठूण भूमिरयणाइं ।  
 चयइ फुलिंगासंकी उडुंतो पामरो को वि ॥६३२९॥  
 अंतोपविसंतविलासिणीण बहिनीहरंतपुरिसेहिं ।  
 पीणपओहरफंसो पाविज्जइ जत्थ निम्मोल्लं ॥६३३०॥  
 पडिहारेण सरोसं पडिसिद्धा तह वि पवे(वि)समाणा जे ।  
 गलथल्लिऊण दूरं खिप्पंति महामहीनाहा ॥६३३१॥  
 दूराओ च्विय पडिहारपुरिसपडिसिद्धसयललोयंमि ।  
 सिरितुंगभइदारे पविसइ पुहईसरो तत्थ ॥६३३२॥  
 सर-ऊसर-सत्ति-सम्बल-पट्टिस-कोहं(दं)ड-कुंत-खग्ग-धणुं ।  
 वावल्ल-भल्ल-भल्ली-तिसूल-कण-चक्क-मोग्गरए ॥६३३३॥

एमाइ आउहाइं धारंता उद्धजाणुणो पुरिसा ।  
 दसलक्खसंखमाणा पलोइया पहरयपइइहा ॥६३३४॥  
 आरुहइ उयरिभूमिं राया तं नियइ सव्वओ निउणं ।  
 पेच्छइ असंखनरवइनिरंतरं तं पि चिंतइ य ॥६३३५॥  
 'अच्छरियजणयमेयं रज्जं सिरिवीरसेणरायस्स ।  
 जं हियए वि न तीरइ विचिंतिउं किं नु वोतुं(त्तुं) जं ॥६३३६॥  
 मन्ने अह्हाइयदीवसंभवो एत्थ पुंज्जिओ लोओ ।  
 जम्हा निएमि जत्तो तत्तो अहियं च पेछामि' ॥६३३७॥  
 तं पि परक्कुमिऊणं आरुद्धो तइयभूमियं राया ।  
 तं पि तह च्चिय पेच्छइ निरंतरं सव्वलोएहिं ॥६३३८॥  
 दीसंति जत्थ विविहा दियाइणो विविहलिंणि-पासंडी ।  
 नाणाविहा य कइणो पामाणिय-पंडियसहस्सा ॥६३३९॥  
 अह के वि तत्थ कज्जत्थमागया मंडलिं करेऊण ।  
 कारंति बंभघोसं चउवेयविसेसवांढेण ॥६३४०॥  
 अन्ने वि लिंणिणो पुण समुच्चरंता सधम्मववहारं ।  
 अन्नोन्नदूसणपरा दंसणऽवसरं नियच्छंति ॥६३४१॥  
 अन्ने वि तत्थ कइणो अन्नोन्नं कव्वपाढरसविवसा ।  
 पहरिसपुलइज्जंता चिरकइकव्वाइं वन्नति ॥६३४२॥  
 पामाणिया य केइ वि विहियपमाण-प्पमेयपविभागा ।  
 आदंसणसमयावहिं विवदंता तत्थ चिद्वंति ॥६३४३॥  
 तं पि परिचइऊणं चउत्थभूमीए चडइ नरनाहो ।  
 पेच्छइ वीराहिवइं अइगरुयत्थ,णमज्झमयं ॥६३४४॥

दिद्धो अइगरुयमहीवईण मज्झट्टिओ महावीरो ।  
 नीसेसचराचरचक्कपरिरओ कंचणगिरि व्व ॥६३४५॥  
 अपरिट्टिए ठवंतो अन्ने उ पइट्टिए अ धणयंतो ।  
 कम्माणुरूवफलओ जयकत्ता जो सयंभु व्व ॥६३४६॥  
 पुर-पिट्ठ-ओभयपासेसु विन्नवंताण दिट्ठिसन्नाए ।  
 सयमाएसं देंतो दिसिवालाणं व कज्जेसु ॥६३४७॥  
 भयभीयमहारायाण कयप्पणामाण जायकारुत्तो ।  
 'मा भाह'त्ति भणंतो नियपाणिं ठवइ पट्टीसु ॥६३४८॥  
 पसरियसियकिरिणकलावहारमज्झिममणीसु संकंतो ।  
 हियए व्व परिवसंतो सेवागयरायरायाण ॥६३४९॥  
 घोलंतकन्नकुंडलमिसेण साहंति सोम-सूर व्व ।  
 ससि-सूरवंसजेसुं तुह सरिसो पत्थिवो नत्थि ॥६३५०॥  
 आमलयथूलमोत्तियहारावलिकलियवियडवच्छयलो ।  
 गुणगुंफियाहिं रेहइ सुपुन्नबंधावलीहि व्व ॥६३५१॥  
 सव्वंगभूसणारुणमणिप्पहावलयपूरियत्थाणो ।  
 हयतेयस्सिपहावं पहायसंकं व वहइ रवी ॥६३५२॥  
 चालियवारविलासिणिसियचम्मरसहस्सधवलियनहंतो ।  
 जेउं सुरिंदकित्तिं निर्यकित्तिं पेसयंतो व्व ॥६३५३॥  
 पुरओवविट्ठएक्कग्गचित्तनयणाए जयवडायाए ।  
 उच्छंणिएक्कचरणो हरि व्व लच्छीए हिट्ठाए ॥६३५४॥  
 जणचक्खुनिवायभया अणवरयं विविहवारविलयाहिं ।  
 कयकल्लाणसहस्सो लोणं उत्तारयंतीहिं ॥६३५५॥

१. जगत्कर्ता स्वयम्भूरिव ॥

इय निज्जियसयलतिलोयगरुयमाहप्पयरिसो वीरो ।  
 वहुंतो नरवइणा दिट्ठो परमप्पयमईए ॥६३५६॥  
 तो पडिहारसमुब्भडहक्कासासंकभूमिवालेहिं ।  
 दिन्नपिहुगमणमग्गो ओइन्नो वीरदिट्ठीए ॥६३५७॥  
 दट्ठूण विचित्तजसं वीरो हरिसुल्लसंतरोमंचो ।  
 सीहासणाओ उट्ठइ संखुहियत्थाणवित्थारो ॥६३५८॥  
 सहसंचलंतमहिवइचाडुसमुच्चरियजयजयव(ध?)मालो ।  
 पियरं व महारायं पणमइ सह सव्वराएहिं ॥६३५९॥  
 तो नरवई दिसागयकरसरिसपसारिओभयभुएहिं ।  
 आलिंकिऊण वीरं पुण चुंबइ उत्तिमंगंमि ॥६३६०॥  
 ता तत्थ चेव पेच्छइ वीरो वरमित्तबंधुयत्तं पि ।  
 आलिंगइ सम्पणयं सो वि सविणयं च पणमेइ ॥६३६१॥  
 ता पुब्बिं परिकप्पियसिंहासणसंठिए महाराए ।  
 उवविसइ वीरसेणो सकीयसीहासणे पच्छ ॥६३६२॥  
 पुच्छियकुसलोदंता परोप्परं जायसमुचियालावा ।  
 अच्छंति खणं पच्छ विचित्तजसराइणा भणियं ॥६३६३॥  
 'सकयत्थोऽहं दिट्ठोसि जेण रयणायरो व्व इह जंमि ।  
 संभंततिलोयाओ विसंति रिउकित्तिगंगाओ ॥६३६४॥  
 तुह वसइ वीर ! केऊररयणमणिसघणकिरिणसरियंमि ।  
 भुयपंजरंमि लच्छी जहासुहं रायहंसि व्व ॥६३६५॥  
 जे वीर ! अमच्छरिणो तुह गुणनिवहं वहंति हिययंमि ।  
 चिंतामणि व्व ताणं चिंतियफलदायगो होसि ॥६३६६॥

पंचगुलिघणसाहं नहकुसुमं किरणरयणओऊलं ।  
 पयकप्पतरुच्छायं आ(अ)लीणा तुह न सीयंति ॥६३६७॥  
 अन्ने साहिंति महिं चउरंगाडंबरेहिं सेन्नेहिं ।  
 एक्कुणेण वि तुमए तहा कयं जह न केणावि' ॥६३६८॥  
 इय एवमाइ विविहं आणंदुव्वूढहिययउक्करिसो ।  
 जंपंतो पडिभणिओ वीरेण विचित्तजसराया ॥६३६९॥  
 'सिज्झइ न सिज्झइ च्चिय एयं पुन्नाण देव ! आयत्तं ।  
 नियजोगयाणुरूवं उज्जमियव्वं तु पुरिसेण' ॥६३७०॥  
 इय एवमाइ बहुविहगोड्डीसंतुड्डमाणसा जाव ।  
 चिड्ढंति ताव भणियं असोयराएण वयणमिणं ॥६३७१॥  
 'वीरस्स राय ! रज्जाहिसेयकज्जेण आगया अम्हे ।  
 ता सो निव्वत्तिज्जइ पसत्थतिहि-वार-लग्गंमि ॥६३७२॥  
 एएणं चिय कज्जेण राय ! तुब्भे वि एत्थ आहूया ।  
 तह बंधुयत्तमित्तो चंदसिरी परियणसमेया' ॥६३७३॥  
 तो भणइ विचित्तजसो 'उचियमिणं खेयरिंद ! तुह वयणं ।  
 वत्थुंमि वत्थुघडणा न कस्स किर रंजए हिययं ? ॥६३७४॥  
 अच्चुन्नयमहिहरमंडलाई चइऊण पयइविणयंमि ।  
 रयणायरे व्व वीरे सिरि(री)ओ सरियाओ उव्वेतु ॥६३७५॥  
 एयस्स पुन्नपरिणइपणामियासेसभुयणरज्जस्स ।  
 नियचित्तसुद्धिपयडणमेत्तो च्चिय तुम्ह वावारो ॥६३७६॥  
 ता उज्जमह तुरंता जं जह समओचियं हवइ कज्जं ।  
 तं तह कारेह सयं असोय-सेहरयरायाणो !' ॥६३७७॥

'एवं' ति पभणिऊणं नियनियविज्जाहरेहिं आणीए ।  
 उवगरणे खयरिंदा पेच्छति तहा नरिंदा य ॥६३७८॥  
 अट्टुत्तरं सहस्सं कलसाण नियंति रयणघडियाण ।  
 चउद्धह-महानईणं पवित्तपयपूरियंगाण ॥६३७९॥  
 तह सव्वकुलगिरीणं सिहरठियमट्टियाओ सुरगिरिणो ।  
 पंडुसिलासलिलाणि य कप्पदुम्म(डुम)पल्लवा चेव ॥६३८०॥  
 ताणं चेव कसाया कुसुमाणि य पंचदेवरुक्खाण ।  
 मंदार-पारियायय-नमेरु-संताणयाईण ॥६३८१॥  
 मणि-रयणनिम्मियाइं विचित्तसिंहासणाइं तुंगाइं ।  
 चउसायरसलिलाणि य सियचामर-छत्तसंघाया ॥६३८२॥  
 पंचरयणाइतुरया उत्तमदेसुब्भवा करिंदा य ।  
 तह सत्तधन्नयाइं जवंकुरा दहियकलसा य ॥६३८३॥  
 गयदंतमट्टियाओ इत्थीरयणं च चंदसिरिदेवी ।  
 तह मच्छयाण जुयलं सत्थिय-चक्कुं च वज्जं च ॥६३८४॥  
 तक्कालवियसियाइं कमलाइं महाधओ य सिरिवच्छो ।  
 कयदक्खिणआवत्ता संखा तह अंकुसाइं च ॥६३८५॥  
 सुरसेलसंठियाणं विविहफलाइं च नंदणवणाण ।  
 तह खग्गमहारयणं मणि-भूसण-वत्थसंघाया ॥६३८६॥  
 इय एवमाइवहुविहरज्जुवओगोवगरणदव्वाणि ।  
 दट्टूण परमहिद्धा विचित्तजसराइणो जाया ॥६३८७॥  
 एत्थंतरंमि पूयं सक्कारं गोरवं च काऊण ।  
 पुट्ठो खयरिंदेहिं सुहदिवसं सिद्धसेणो वि ॥६३८८॥

तेणावि निउणमइणा सम्मं परिभाविऊण चित्तंमि ।  
 कहियं 'नरिंद ! सुज्झइ कल्ले च्विय वीरसेणस्स ॥६३८९॥  
 देव ! पयावइनामो पंचमसंवच्छरो अइपसत्थो ।  
 वेसाहो वि य मासो अक्खयतइथा तिही देव ! ॥६३९०॥  
 भिगसिरसुहनक्खत्तं वारो सूरस्स सिद्धिजोगो य ।  
 वीरो वि वसहरासी जम्मत्थो ससहरो तस्स ॥६३९१॥  
 अन्ने वि गहा सव्वे गोयरसुद्धीए तस्स फलदा य ।  
 नरनाह ! वसहलग्गस्स सूरमाई गहा सत्था ॥६३९२॥  
 छव्वग्गो वि नरेसर ! सुहफलदो तह पसत्थहोरा य ।  
 इय एरिसं सुलग्गं वरिससहस्सेहिं वि न होइ ॥६३९३॥  
 एयंमि परमलग्गे विहियं कज्जं कयाइ न चलेइ ।  
 ता उज्जमह तुरंता निच्छियमेयं मए लग्गं' ॥६३९४॥  
 'न चलेइ' त्ति पभणिए समाहयं मंगलं महातूरं ।  
 तो सव्वनरिंदेहिं बद्धाओ सउणगंठीओ ॥६३९५॥  
 घोसावियं च तुरियं चंपानयरीए कल्लदियहंमि ।  
 सिरिवीरसेणरज्जाहिसेयपरमुच्छवो होही ॥६३९६॥  
 सव्वेसिं रायाणं सामंताणं च मंडलीयाण ।  
 जाणावियं असेसं पहिद्धिययाण लोयाण ॥६३९७॥  
 एत्थंतरंमि सहसा दिणावसाणाहयाए भेरीए ।  
 सव्वेहिं सुओ सद्धो बहिरियभुयणंतरालाए ॥६३९८॥  
 सलिलस्स व जाइ रवी संझासोवासिणीए परियरिओ ।  
 पच्छिमसमुद्धमज्झं अहिसेउं वीरसेणं व ॥६३९९॥



संज्ञावसरे संज्ञावहूय उवरिं भमाडिऊण रवी ।  
 खिप्पइ आरत्तियदीव्वओ व्व सिरिवीरसेणस्स ॥६४००॥  
 पसरइ सव्वत्तो च्विय संज्ञाराओ जयस्स वीरंमि ।  
 सोरज्जरंजियस्स व सव्वाणुगओ व्व अणुराओ ॥६४०१॥  
 वित्थरइ दिसाभित्तिसु कत्थूरीकद्धमोवलेवो व्व ।  
 पढमं पसाहयंतो जयपासायं व तिमिरोहो ॥६४०२॥  
 अंतोफुरंततारं नीलुप्पलदलविनीलघणकंतिं ।  
 दूरं पसारियच्छं नियइ व्व धरायलं गयणं ॥६४०३॥  
 ..... उट्टिय(?) पईवनिवहाओ वित्थरंतेहिं ।  
 तिमिरेहिं कज्जलेहिं व सामायइ नहयलाभोयं ॥६४०४॥  
 एवंविहे पओसे नरनाहो विहियसयलकल्लाणो ।  
 ठाऊण किंचिवेलं विसज्जए सव्वनरवाले ॥६४०५॥  
 दाऊण महावासं विचित्तजसमायरेण पेसेइ ।  
 सयलविसज्जियखेयरलोओ अह उट्टइ सयं पि ॥६४०६॥  
 ..... उट्टिय(?)चंदसिरीभवणमेव वीरवई ।  
 बहुदिवसदंसणेणं समहियसंजायउक्कंठो ॥६४०७॥  
 अन्नोन्नदंसणोल्लसियहरिसपरवसमणाण दोहिं(ण्हं) पि ।  
 नयणाइं भुक्खियाइं व तिप्पंति न दंसणरसस्स ॥६४०८॥  
 भुयणेसराण ताणं परोप्परं विरहदुक्खसंजायं ।  
 आणंदइ दोब्बल्लं पयडियअवरो.....(?) ॥६४०९॥  
 ..... पुव्वपरिट्ठाविय-महरिहसीहासणे समुवविट्ठो ।  
 संभासइ चंदसिरिं वीरो गरुयाणुराएण ॥६४१०॥

'किं तुह सरीरकारणमासि तओ दुब्बला सरीरेण ? ।  
 अहवा मह अवसेरीवसेण खीणा तुमं देवि ?' ॥६४११॥  
 भणियं चंदसिरीए 'न खलु सरीरस्स कारणविहीणं ।  
 संजायइ दोब(ब्ब)ल्लं सव्वमिणं ..... (?) ॥६४१२॥  
 अवरो तुमं ति (?) नरवर ! खीणत्तं होइ अरिवसेणेव(?) ।  
 अहेहिं अरिवसेहिं (?) खीणो सि तुमं तमच्छरियं' ॥६४१३॥  
 ईसीसि विहसिऊणं पुण वीरो भणइ 'देवि ! तुज्झ वसे ।  
 मह जीय-सरीराई वि का गणणा रज्जमाईसु ? ॥६४१४॥  
 जं पुण अकहंतेण य गमणं पि अणुट्टियं मए देवि ! ।  
 तं तुह भुवणब्भंतरभूवालवहूण सेवत्थं' ॥६४१५॥  
 इय एवमाइबहुविहवयणविणोएण अच्छिऊण खणं ।  
 विन्नत्तो मित्तेणं समीवठियबंधुयत्तेण ॥६४१६॥  
 'उट्टह नरिंद ! तुब्भे उववासवएण पीडिया बहुयं ।  
 नियमाणुट्टाणाइं कज्जाइं संति बहुयाइं' ॥६४१७॥  
 तो तव्वयणाणंतरमुट्टंताणंतभडसहस्सेहिं ।  
 विहियंगरक्खकम्मो संपत्तो तुंगभदंमि ॥६४१८॥  
 तत्थ वि जिणपूयापुव्वमेव निव्वत्तिऊण नियमविहिं ।  
 सो बंभचेरधारी पासुत्तो भूमिसयणंमि ॥६४१९॥  
 एत्थंतरंमि रयणी सुरस्स पयावमसहमाणि व्व ।  
 ता बिभज्जिउं पयत्ता बंदीकयरायनारि व्व ॥६४२०॥  
 पविसंति तओ बहुचाडुचउरचारणसहस्ससंघाया ।  
 पारद्धपहाओच्चियबहुविहमंगल्लुथुइपाढा ॥६४२१॥

'अंतोसंमीलियतारजायनीलुप्पलच्छिंसंक्रोया ।  
 वीरेदुविओएण कयमुच्छा व्भिज्जए रयणी ॥६४२२॥  
 वियसियकमलदलच्छी अन्नोन्नघडंतचक्कुथणकलसा ।  
 वीरुच्छवंमि पत्ता दिणलच्छी संझनवरंगा ॥६४२३॥  
 दट्ठण तुज्झ उदयं पुव्वावरक्खिणुत्तरदिसासु ।  
 तह मच्छरेण नरवर ! पेच्छ रवी रायमुव्वहइ' ॥६४२४॥  
 इय एवं सोऊणं 'नमो जिणाणं' ति पभणिरो वीरो ।  
 उट्ठइ सयणीयाओ पुलिणाओ रायहंसो व्व ॥६४२५॥  
 कयपाहाउयकिच्चो जिणनाहं पूइऊण भत्तीए ।  
 अभिवंदिऊण य तहा निग्गच्छइ वासभवणाओ ॥६४२६॥  
 पविसइ महंतमत्थाणमंडवं विविहरयणमणिखचियं ।  
 देवंगवत्थविरइयवियाणरमणीयवित्थारं ॥६४२७॥  
 सियसुरहिकुसुममालाकयफुल्लहरंतरेसु रमणीयं ।  
 घणमुत्ताहलमणिरयणलंविओऊलनिवहेहिं ॥६४२८॥  
 ओलंवियनाणाविहपसत्थफल-पुप्फ-रयणमालाहिं ।  
 कप्पडुमवासं पिव सुवेसबहुमिहुणसंकिन्नं ॥६४२९॥  
 पेरंते सुपरिद्वियबहुपहरणपाणिपत्तिसंघायं ।  
 उचियट्ठणनिवेसियअसेससेवागयनरिंदं ॥६४३०॥  
 मणि-रयण-कणयनिम्मियचउरंसविचित्तवेइयाबंधं ।  
 तदुवरिनिविट्ठमणिमयसीहासणलद्धउस्सेहं ॥६४३१॥  
 बहुरज्जमज्जणोचियउवगरणनिवेसरुद्धवित्थारं ।  
 बहुविहविलासिणीयणसंघट्ठपडंतहारलयं ॥६४३२॥

बहुविज्जाहरविलयापारंभिज्जंतविविहमंगल्लं ।  
 तक्कज्जवावडुब्भडभमंतविज्जाहरसहस्सं ॥६४३३॥  
 इय एवमाइबहुविहकालोच्चियसयलवइयराइन्नं ।  
 पेच्छंतो सीहासणमुवविट्ठो वीरवरनाहो ॥६४३४॥  
 तो पारद्धपुरोहियअसेससुहसंतिकम्मकल्लाणे ।  
 सिरिसिद्धसेणठावियसंकुच्छयामुहुत्तंमि ॥६४३५॥  
 पूइज्जमाणजोइणिसहस्सअंचिज्जमाणसुरनिवहे ।  
 वसुपुज्जमाइजिणहरपारद्धाहियामहिमे ॥६४३६॥  
 दिज्जंतदीणदुत्थियजणवयबहुकणय-रयण-मणिनिवहे ।  
 पूइज्जमाणपुज्जे संमाणिज्जंतसगुणंमि ॥६४३७॥  
 एत्थंतरंमि सणियं नियडीहुंतंमि लग्गपत्थावे ।  
 सेहरयासोएहिं वि कंचण-मणिकलसहत्थेहिं ॥६४३८॥  
 सयमेव धरियच्छते विचित्तजसनरवइंमि इयरोहिं ।  
 राएहिं उज्जएहिं कलसइसहस्सहत्थेहिं ॥६४३९॥  
 जहजोग्गयाणुरूवं अन्नेसु वि गहियरायचिंधेसु ।  
 वीरे निहित्तिदिट्ठिसु सुसावहाणीकयमणेसु ॥६४४०॥  
 पडिहारसद्धवित्तत्थसयलभूवालविहियमाणेसु ।  
 नियनियआउज्जुज्जयएक्कग्गाउज्जिलोएसु ॥६४४१॥  
 इय निच्चलनिप्फंदे अमुणियसुहुमयरसद्धमेत्ते वि ।  
 जाए य मंडवंतरपरिवारे चित्तलिहिय व्व ॥६४४२॥  
 एत्थंतरंमि सहसा इट्ठसेसमुइए सुहु(ह)मुहुत्ते ।  
 'पुन्नाह'सद्धघोसणपुव्वं समाहया भेरी ॥६४४३॥

तो घंटारवनि सुणणहरिसवसुल्लसियबहलपुलएहिं ।  
 कलसट्टसहस्सेहिं सव्वेहिं वि ण्हाविओ वीरो ॥६४४४॥  
 निज्जियजलहररवगहिरतूरफुट्टंतवियडबंभंडं ।  
 आणंदमत्तखेयरपारब्बुकुकुट्टिसीहरवं ॥६४४५॥  
 करपल्लवियनहंतं वियडथणअन्नोन्न(थणऽन्नोन्न)पेल्लणसयणं ।  
 वियडयरनियंबत्थलसंघट्टपडंतरसणो(णा?)हं ॥६४४६॥  
 नच्चणवसचंचलचरणकलियथलकमलपयरसंमोहं ।  
 कस्स न हरेइ हिययं पणच्चियं वारविलयाणं ? ॥६४४७॥  
 तो वित्ते अहिसेए असोय-सेहरय-रायमहिसीहिं ।  
 जयमाला-रयणावलिमाईहिं समागयं तत्थ ॥६४४८॥  
 आगंतूण ससंभम-ससंक-सतिरिच्छनयणपंतीहिं ।  
 निव्वत्तियबहुमंगलकोउयकल्लाणवित्थारो ॥६४४९॥  
 सेहरयासोएहिं उब्भडपडिबद्धरयणमणिमउडो ।  
 नीसेसकन्नकुंडलमाईहिं विभूसिओ वीरो ॥६४५०॥  
 हरियंदणंगराओ पसत्थदेवंगवत्थपरिहाणो ।  
 गोरोयण-सिद्धत्थय-दहि-दुव्वाचच्चियसिरग्गो ॥६४५१॥  
 परिमलमित्तंतमहुयरमालइमालाए विहियसेहरओ ।  
 सुमुहुत्तसमयठावियअचलमहारायसद्वो य ॥६४५२॥  
 तो समयं सव्वेहिं सेहरयासोयमाइराएहिं ।  
 जोक्कारिओ सहरिसं महिंदसीहाइएहिं च ॥६४५३॥  
 एत्थंतरंमि दोहिं वि सेहरयासोयखयरराएहिं ।  
 सियचमरकरेहि सयं परिट्टियं रायपासेसु ॥६४५४॥

जो पुण महिंदसीहो तेण सयं कणयदंडहत्थेण ।  
 पुरओ परिट्टिएणं पडिहारत्तं च पडिवन्नं ॥६४५५॥  
 अन्नेहिं सयं परिकलियखग्ग-खेडयकरेहिं देवस्स ।  
 संठियमोलग्गाए गरुएहिं वि रायराएहिं ॥६४५६॥  
 एवं च तस्स नीसेसभुयणसंपत्तरायसदस्स ।  
 एगच्छत्तधरायलपयडपयावप्पयंडस्स ॥६४५७॥  
 वच्चंति सुहं दियसा तिखंडभरहाहिवस्स रायस्स ।  
 अणुवमरज्जमहासुहमुवभुंजंतस्स अणुदियसं ॥६४५८॥  
 संमाणिकुण समहियपसायदाणेण वीरसेणेण ।  
 पढममसोओ पच्छा सेहरओ पेसिया दो वि ॥६४५९॥  
 इयरे वि जे नरिंद महिंदसीहाइणो पसाएहिं ।  
 विविहेहिं पूइऊणं सदेसमणुपेसिया सव्वे ॥६४६०॥  
 निकुंटयकयवसुहो नियपुन्नबलप्पसाहियदियंतो ।  
 पीसियजवचुन्नेसुं निसुणइ नियसत्तुसंलावं ॥६४६१॥  
 सिरिचंदसिरीए समं अणुवमपंचप्पयारविसयसुहं ।  
 अच्छइ उवभुंजंतो सईए सह तियसन्ना(ना)हो व्व ॥६४६२॥  
 गच्छंतेसु य दियसेसु ताण बहुएहिं नवर वरिसेहिं ।  
 चंदसिरीए जाओ पुत्तो सुपसत्थसव्वंगो ॥६४६३॥  
 नामेण अमरसेणो असेससुहलक्खणोवचियदेहो ।  
 जणणि-जणयाण इट्ठो अइगयसिसुभाववावारो ॥६४६४॥  
 अहिगयकलाकलावो पादुब्भुयसरसजीव्वणारंभो ।  
 सुललियलायन्ननिही उज्जलसिंगारलडहंगो ॥६४६५॥

तो नाऊण समत्थं पुत्तं सव्वेसु चेव कज्जेसु ।  
 सिरिवीरसेणराया अहिसिंचइ जोवरज्जंमि ॥६४६६॥  
 एवं वच्चइ कालो संसारो सरइ जंति दियहा वि ।  
 भुंजइ अखलियरज्जं वीराहिवई महाराओ ॥६४६७॥  
 अह अन्नया कयाई दोन्नि वि अकलंक-निम्मला मुणिणो ।  
 गयणंगणेण पत्ता चंपाए बाहिरुज्जाणे ॥६४६८॥  
 तो नाऊण नरिंदो आगमणं ताण धम्मसूरीण ।  
 आणंदनिव्वरो कहइ चंदसिरी-बंधुयत्ताण ॥६४६९॥  
 'जे तुम्ह मए कहिया पुव्विं मह धम्मदायगा गुरवो ।  
 अकलंक-निम्मला इह ते पत्ता मज्झ पुत्तेहिं' ॥६४७०॥  
 तो ताइं गुरुसमागमहरिसवसुल्लसियबहलपुलयाइं ।  
 चइयासणाइं समुहं सत्तइ पयाइं गंतूण ॥६४७१॥  
 परिछुट्टियकेसपासगपढमसुपमज्जियावणितलाइं ।  
 वंदंति गुरुं वसुहानिहित्तिसिर-जाणु-हत्थाइं ॥६४७२॥  
 तो ण्हाओ सुइभूओ हरियंदणकयविलेवणो राया ।  
 परिहियसव्वाहरणो पसत्थजयवारणारूढो ॥६४७३॥  
 महया संमद्देणं असंखनरनाहसेन्नपरियरिओ ।  
 चंदसिरीसंजुत्तो असेसपुरिलोयपरिकिन्नो ॥६४७४॥  
 सविचित्तजसो राया संबंधुयत्तो समंतिपरिवारो ।  
 चंपाए नीहरिओ अइगरुयमहापमोएण ॥६४७५॥  
 संपत्तो य कमेणं महापमोयाभिहाणमुज्जाणं ।  
 ओयरइ करिंदाओ पत्तो गुरुपायमूलंमि ॥६४७६॥

दूराओ च्विय दिद्धा पहिद्धवयणेण रायराएण ।  
 देवा-सुर-नरपरिसामज्झगया दिव्ववरनाणी ॥६४७७॥  
 कमलोयरे निविद्धा पयासियासेसभुयणपरमत्था ।  
 क्रोमलकमलग्गकराहयमोहतमा दिणयर व्व ॥६४७८॥  
 सिरधरियधवलछत्ता सिद्धिवहूए व्व दंसणनिमित्तं ।  
 पच्चागयाए उवरिं सोहंति समुच्छुयमणाए ॥६४७९॥  
 अच्चुज्जलनाणपहा धवलियनीसेसपरिसवित्थारा ।  
 संविभयंत व्व जणे नाणं उवयारवुद्धीए ॥६४८०॥  
 उज्जलकवोलभित्तिसु चरणनहेसुं व विंखियजणोहा ।  
 आसिर-चरणंगेसु वि संकंतासेसभुयण व्व ॥६४८१॥  
 सुहधम्मदेसणानीहरंतसियदसणकिरिणवित्थारा ।  
 अंतोभरिउव्वरियं पयासयंता उवसमं व ॥६४८२॥  
 इय ते पसंतरूवे दंसणनिट्ठयपावपव्वारे ।  
 भुयणत्तयस्स पुज्जे अणंतवरनाणसंपन्ने ॥६४८३॥  
 दट्ठण महाराओ हरिसवसुल्लसियबहलरोमंचो ।  
 सपरिग्गहोऽभिवंदइ संधुणई परमभत्तीए ॥६४८४॥  
 'नमह नमिरामरेसरकिरीडमणिकिरिणजालकव्वुरिए ।  
 दोसत्थमणपयासियसंझे व्व मुणिंदपयकमले ॥६४८५॥  
 जेहिं पणामावसरे नहमणिसंकंतनियसरीरेहिं ।  
 अवलोइज्जइ अप्पा दुगे(ग्गे)ज्झा ते भवदुहाण ॥६४८६॥  
 दंसणमेत्तेण वि तुम्ह नाह ! विहडंति पावपडलाइं ।  
 कह संभवति तिमिराइ देव ! दूरुग्गए सूरे ? ॥६४८७॥



तुह पुव्वदंसणाओ समुवज्जियविमलपुन्नबंधेहिं ।  
 संपाडियं दुलंभं पुणो वि मह दंसणं एण्हिं ॥६४८८॥  
 इय परमभत्तिवसनीहरंतसब्भूयगुणसमूहेहिं ।  
 थोऊण महाराओ पुणो पुणो पडइ पाएसु ॥६४८९॥  
 सुपमज्जिऊण वसुहं वरिल्लवत्थंचलेण उवविसइ ।  
 पुण केवलिणा उचियं नरनाहो भणिउमाढत्तो ॥६४९०॥  
 'नरनाह ! जत्थ तुम्हारिसा वि निम्मलविवेयरयणा वि ।  
 हीरंति दुरासाहिं को दोसो तत्थ इयराण ? ॥६४९१॥  
 जइ कह वि पुन्नपरिणइवसेण अणुकूलदेव्वजोएण ।  
 रज्जसिरी संपत्ता रंकेण व पोलियाखंडं ॥६४९२॥  
 ता किं तत्थेव तए विहियथिरासेण लंपडत्तणओ ।  
 अप्पा उवेक्खियव्वो भण अज्ज वि केत्तियं कालं ? ॥६४९३॥  
 सुवियहो वि हु परमत्थपंडिओ विइयभवसहावो वि ।  
 कह धुत्तकुट्टणीए व छलिज्जसे रायलच्छीए ॥६४९४॥  
 नरनाह ! देवलोए बहुसागरदीहकालमाणेहिं ।  
 तित्तो न सुरसुहेहिं सो कह एएहिं तिप्पिहसि ? ॥६४९५॥  
 दारिद्वपरिहवकयं दुक्खं दट्ठूण परभवे राय ।  
 जिणधम्मपहावेणं सुर-नररिद्धीओ लद्धाओ ॥६४९६॥  
 जइ दिट्ठुफलो तं चिय नरिंद ! धम्मं करेसि पडिपुन्नं ।  
 सासयसोक्खमणंतं एण्हिं मोक्खं पि पावेसि' ॥६४९७॥  
 तो भणइ वीरसेणो 'भयवं ! दारिद्व-परिभवाईयं ।  
 कह मे दुक्खं जायं ? कह वा जिणधम्मसंपत्ती ? ॥६४९८॥

को वा जिणिंदभणिओ धम्मो परिवासिओ मए भयवं ? ।  
 कह वा संपत्तीओ सुरनररिद्धीओ मुणिनाह !? ॥६४९९॥  
 काऊण मह पसायं कहेह एयं असेसपरिसाए ।  
 मज्झ वि जेणुप्पज्जइ भवनिव्वेओ विसेसेण' ॥६५००॥  
 तो कहइ गुरू गंभीर-धीरवयणेहिं वीरसेणस्स ।  
 बहुपुत्र(व्व)भवनिबद्धं चरियं संवेगसंजणणं ॥६५०१॥  
 'इह चेव भरहवासे मगहादेसंमि अत्थि वरग्गा(गा)मो ।  
 नामेण मल्लुगामो धण-धन्नसमाउलो रम्मो ॥६५०२॥  
 तत्थत्थि नागदत्तो नामेण कुडुंबिओ धणसमिद्धो ।  
 नामेण नागदत्ता मणइद्धा भारिया तस्स ॥६५०३॥  
 ताण तुमं एक्कसुओ गुणराओ नाम पयइनिव्वणो ।  
 फुडियकर-चरण-केसो निदरिसणं अइकुरूवाण ॥६५०४॥  
 अविवेई य मुरुक्खो विन्नाणविवज्जिओ कलारहिओ ।  
 सव्वजणनिंदणीओ असेसदोहग्गभंडारो ॥६५०५॥  
 पत्तो जोव्वणभावं अमणोन्नं सयलजुवइवग्गस्स ।  
 नामं पि तुज्झ निसुयं चिरं दुगुंछंति नारीओ ॥६५०६॥  
 ता तुज्झ जणणि-जणया मग्गंता वि हु कहिं पि न लहिति ।  
 बहुदव्व-सुवन्नेहिं वि परिणयणत्थं वहुं राय ! ॥६५०७॥  
 'को दाही नियधूयं तस्स कुरूवस्स परममुक्खस्स ।  
 विन्नाणविरहियस्स य?' इय लोओ उत्तरं देइ ॥६५०८॥  
 तो महया कट्टेणं बहुविहधण-कणय-दव्वनिवहेहिं ।  
 अब्भत्थणामहग्गं वरिया तुह चंगुला नाम ॥६५०९॥

तो सुप्पसत्थदियहे पारब्धो तुह विवाहसंबंधो ।  
 तारामेलावसरे कन्ना दट्ठुं तुमं भीया ॥६५१०॥  
 आरसइ रुयइ विलवइ लोट्टइ धरणीए जंपइ अणिठुं ।  
 'हे माइ ! मह न कज्जं किंपि विवाहेण एएण ! ॥६५११॥  
 देह वरं भूयाणं वेयाल-पिसाय-रक्खसाईण ।  
 जे भक्खंति तुरंता न उणो एयस्स पावस्स ॥६५१२॥  
 तो सा पडिसेहंती तेहिं बलामोडिया परोयंती ।  
 परिणाविया ह्ढेणं उवहसमाणेण लोएण ॥६५१३॥  
 वित्तं पाणिग्गहणं जीयं पिव तुज्झ चंगुला इड्ढा ।  
 तिस्सा उण अमणोन्नं नामं पि हु तुज्झ किं अवरं ? ॥६५१४॥  
 तो सासुयाए एसा पवड्डिया ण्हाण-भोयणाईहिं ।  
 जह अचिरेणं पत्ता तारुन्नं सयलजणइडुं ॥६५१५॥  
 तो तीए समं भुंजसि विडंबणारूवविसयसोक्खाइं ।  
 अणुरत्त-विरत्ताणं परोप्परं केरिसं सोक्खं ? ॥६५१६॥  
 तो तुज्झ जणणि-जणया नियआउपरिक्खएण पाणीण ।  
 मरणसहावत्तणओ समयं चिय उवरया दो वि ॥६५१७॥  
 तो उवरयंमि सोए मंदीभूए य माय-पिउमोहे ।  
 परिवालइ तं गेहं स च्चिय तुह चंगुला भज्जा ॥६५१८॥  
 स च्चिय गिहे पहाणा संकाट्टाणं पि किं पि से नत्थि ।  
 जाया निरंकुसा सा सच्छंदपयारिणी कुडला(लडा) ॥६५१९॥  
 बाढमणिट्ठो दइओ निरंकुसत्तं च लडहतारुन्नं ।  
 अणुरत्ता. य जुयाणा कह असई होउमावरई ॥६५२०॥

तो तुज्झ अत्थजायं जं पिउणा संचियं पुरा किं पि ।  
 पुन्नखएण तं तुह नीसेसं झिज्जिउं लग्गं ॥६५२१॥  
 जं किं पि अत्थि सेसं तं जुयइपरव्वसेण सव्वं पि ।  
 तुमए पिथाए कहियं परपुरिसवसत्तचित्ताए ॥६५२२॥  
 तो तुह कालकमेणं खीणे दव्वंमि पविरलीहूए ।  
 कम्मारायाण वग्गे परिकलिए घरपरिफ्फंदे ॥६५२३॥  
 गुणराय-चंगुले च्विय दोन्नि वि थक्काइं तत्थ गेहंमि ।  
 अन्नं पुण नीसेसं पप्फुट्टं वोरघडओ व्व ॥६५२४॥  
 तो जासि सयं छेत्ते एगागी लंगलं च वाहेसि ।  
 सा चंगुला वि भत्तं घेत्तूणं जाइ तुह छेत्ते ॥६५२५॥  
 छेत्तंतरालमग्गे सुन्नं देवउलमत्थि अइगरुयं ।  
 कयसंकेयनरेहिं सह भुंजइ तत्थ सा भोए ॥६५२६॥  
 अह अन्नदिणे धुत्ती भत्तं घेत्तूण सा गया पइणो ।  
 भुंजाविऊण दइयं समागया तत्थ देवउले ॥६५२७॥  
 तो कम्मधम्मजोगा कयसंकेओ न आगओ पुरिसो ।  
 अच्छइ पडिवालंती तस्सागमणं खणं जाव ॥६५२८॥  
 ता तत्थ पहपरिस्समपयंडरविकिरणतावसंतत्तो ।  
 तण्हा-छुहाकिलंतो पढमवयत्थो सुरूवो य ॥६५२९॥  
 देसंतराओ एगो पहिओ तत्थेव सुन्नदेवउले ।  
 आजाणुधूलिधूसरचरणंतो आगओ तुरिओ ॥६५३०॥  
 सो तीए साणुरायं तिरिच्छवलियच्छिभल्लिनिभि(ब्भि)न्नो ।  
 हयहियओ तह विहिओ जह तीए संगओ वरओ ॥६५३१॥

तो तत्थ अइविवित्ते परोप्परुप्पन्नपरमनेहाण ।  
 ताण असेसं जायं विसिद्धजणनिंदियं जमिह ॥६५३२॥  
 अहिगमणीयत्तणओ तंमि जुयाणंमि सा तहा रत्ता ।  
 जह पामरा जुयाणा वीसरिया तीए नीसेसा ॥६५३३॥  
 तो तीए घरं नीओ एसो मे माइगेहओ आओ ।  
 इय काऊण पवंचं ण्हाविओ(अ?) भुंजाविओ सरसं ॥६५३४॥  
 समइक्कंते दियहे गुणराओ आगओ पओसंमि ।  
 कयसयलगेहकज्जो भुत्तो राईए सुत्तो य ॥६५३५॥  
 तो पच्छिमंमि पहरे गो-महिस-बलदमाइयं घेतुं ।  
 नीहरिओ गुणराओ तीए उण झंपियं दारं ॥६५३६॥  
 तो सा विवित्तगेहे तेण समं परमनेहबुद्धीए ।  
 सुरयवियट्ठेण तहिं भुंजइ भोए बहुवियारा ॥६५३७॥  
 चिरसुरयपरिस्समजायनिद्वनिच्चेड्डसव्वगत्ताणि ।  
 अन्नोन्नसमालिंणणउभयभुयावल्लिनद्धाण ॥६५३८॥  
 ताण पहाया रयणी आरूढो दिणयरो नहे दूरं ।  
 निद्वापरव्वसाइं तहा वि चेरंति नो ताइं ॥६५३९॥  
 तो गामतलवरेणं तग्घरसन्नेज्झघरनिवासेण ।  
 तह संठियाइं दोन्नि वि दिद्दाइं कवाडविवरेहिं ॥६५४०॥  
 तो तेण तुरियतुरियं गंतूणं गामठक्कुरस्स पुरो ।  
 नीसेसं परिकहियं तेण वि पुण पेसिया पुरिसा ॥६५४१॥  
 तेहिं वि तहट्टियाइं निद्वानिच्चेड्डसव्वगत्ताइं ।  
 दिद्दाइं अह सरोसं पाएहिं समाहयं दारं ॥६५४२॥

'हण निहण छिंद भिंदह मारह कड्हेह' कलयलं एयं ।  
 सोऊण ताइं सहसा उट्टंति पवेविरतणूणि ॥६५४३॥  
 तो तेहिं पविसिऊणं दोन्नि वि बद्धाइं पच्छबाहाहिं ।  
 जं किं पि घरे दिट्ठं तं सव्वं लूडियं तेहिं ॥६५४४॥  
 छेत्तठिओ गुणराओ गो-महिसी-वसहमाइपरियरिओ ।  
 बंधेऊणं तुरियं आणीओ भज्जदोसेण ॥६५४५॥  
 पुण सेहियाइं दोन्नि वि तो कहियं चंगुलाए नीसेसं ।  
 जं किं पि दव्वजायं तं गहियं ठक्कु(क्कु)रनरेहिं ॥६५४६॥  
 लूडियदुपय-चउप्पय-धण-कण-उवगरण-दव्वसव्वस्सो ।  
 दाऊण य कच्छोदं मुक्को दुक्खेहिं गुणराओ ॥६५४७॥  
 सा चंगुला वि विविहं पहिएण समं विडंबिया घेत्तुं ।  
 पहियस्स सम्बलाइं समयं निव्वासियाइं च ॥६५४८॥  
 तो गुणराओ तव्विहघरभंगदुहेण दुक्खिओ संतो ।  
 लज्जाए अकहंतो नीहरिओ सयणवग्गस्स ॥६५४९॥  
 मग्गे गच्छंतेणं दिट्ठं मुणिजुयलयं भवविरत्तं ।  
 उग्गतवसुसियदेहं सिद्धिवहूबद्धरायं च ॥६५५०॥  
 तं सो तहासरूवं दट्ठूण विरायवासणाजुत्तं ।  
 वंदइ दुहसंतत्तो मुणिजुयलं परमभत्तीए ॥६५५१॥  
 तो तेहिं तस्स दिन्नो बहुतरदुहरुक्खकड्ढणकुळारो ।  
 संसारजलहिपोओ सुधम्मलाहो मुणिदेहिं ॥६५५२॥  
 तो तेण मुणी भणिया 'कथ(त्थ) तुमे पथि(त्थि)या महामुणिणो ? ।  
 तुम्ह सयासंमि अहं तुम्हाएसेण चिट्ठामि ॥६५५३॥

बहुदुक्खसमाहूओ एण्हि इच्छामि तुम्ह पासमि ।  
 ताणुवसामनिमित्तं पव्वज्जं परमसुहहेऊ(उं) ॥६५५४॥  
 तो मुणिवरेहिं भणियं 'अम्हे नीसेसतित्थभूमिसु ।  
 'वंदामो जिण-पडिमे अप्पडिबद्धा य विहरामो ॥६५५५॥  
 जायइ परोवयारो धम्मवएसेण जत्थ ठाणंमि ।  
 निव्वहइ संजम-तवो तत्थऽच्छामो तहिं जामो ॥६५५६॥  
 ता गच्छामो पुरओ गामे ठाऊण तुज्झ साहेमो ।  
 धम्मसरूवं पच्छा जं उचियं तं करेज्जासु' ॥६५५७॥  
 तं संपत्ता गामं धम्मं साहंति तस्स दसभेयं ।  
 खम-मद्व-ज्जवाइं असेसकम्मक्खयसमत्थं ॥६५५८॥  
 तो गुणराओ जंपइ 'भयवं ! भवचारगाओ निव्विन्नो ।  
 मह देह धम्ममेयं पव्वज्जं तह य दुहदलणं' ॥६५५९॥  
 तो सावहाणचित्ता जाव नियच्छंति दिव्वसुयनाणी ।  
 ता भोगफलं उइयं कम्मं पेच्छंति नाणेण ॥६५६०॥  
 तो जंपंति मुणिंदा 'न ताव निव्वहइ तुज्झ पव्वज्जा ।  
 एण्हि सावयधम्मं अणुचिड्डसु परमसद्धाए' ॥६५६१॥  
 तो तेण मुणी भणिया 'भयवं ! कह मज्झ भोगसंपत्ती ? ।  
 एवंविहागिईए सुविणे वि न संभवो ताण ॥६५६२॥  
 जाइं पि मज्झ पिउणा हठेण संपाडियाइं सोक्खाइं ।  
 ताण परोक्खे ताइं वि मज्झ भएणं व नड्डाइं' ॥६५६३॥  
 तो जंपंति मुणिंदा 'मा वयणमिणं वियप्प विवरीयं ।  
 इह चेव तुज्झ जम्मे सावयधम्मो ध्रुवं फलिही' ॥६५६४॥

'एवं होउ'त्ति तओ भणिए साहूहिं तस्स हिद्धेहिं ।  
 सम्मत्तमूलबंधो जीवाइपयत्थदढखंधो ॥६५६५॥  
 पंचाणुव्वयसाहो तिगुणव्वयपत्तपल्लुवाइन्नो ।  
 चउसिक्खावयकुसुमो सुर-नरसिवसोक्खबद्धफलो ॥६५६६॥  
 सो कप्पपायवो इव पच्चक्खविइन्नकप्पियफलोहो ।  
 गुणरायस्स विइन्नो गिहिधम्मो बारसवियप्पो ॥६५६७॥  
 तेण वि पमुइयमणसा परमत्थमईए परमसद्धाए ।  
 गहिओ दुहसयदलणो धम्मो कम्मक्खयनिमित्तं ॥६५६८॥  
 तो तं जहोवइडुं गिहिधम्मं परमतत्तबुद्धीए ।  
 अणुपालंतो चिद्धइ साहुसमीवे भवविरत्तो ॥६५६९॥  
 अह अन्नया मुणिंदा विहरंता जंति महुरनयरीए ।  
 'जिणथूहवंदणत्थं सो वि य तत्थेव संपत्तो ॥६५७०॥  
 तो मुणिवरिंदसहिओ जिणथूहं वंदिऊण भत्तीए ।  
 उज्जाणसुहपएसट्टिएहिं अ(स?)ह अच्छइ मुणीहिं ॥६५७१॥  
 अह महुरानयरीए राया जसवद्धणो त्ति सुपसिद्धो ।  
 अत्थि धरायलतिलओ असेसगुणरायहाणि व्व ॥६५७२॥  
 अह तस्स अत्थि दोसो एगो च्विय सयलगुणगणमयस्स ।  
 ईसालुत्तणनडिओ मन्नइ अंतेउरं दुडुं ॥६५७३॥  
 अह तस्स परमइड्डा भज्जा नामेण गुणसिरी तिस्सा ।  
 एक्का जाया धूया नामं जयसुंदरी तीए ॥६५७४॥  
 अह अन्नया नरिंदो विणिग्गओ वाहियालिकीलाए ।  
 वाहइ विचित्तुरए सुजच्च-वोलाह-कंबोए ॥६५७५॥



तो तुरयवाहणुब्भवपरिस्समुप्पन्नदेहसंतावो ।  
 वच्चइ सिंसिरुज्जाणं वीसाममईए नरनाहो ॥६५७६॥  
 जा जाइ तत्थ पुरओ ता पेच्छइ साहुजुवलमुवसंतं ।  
 अभिवंदइ भत्तीए सद्धारोमंचियसरीरो ॥६५७७॥  
 आयन्नइ धम्मकहं लद्धावसरो य भणइ दट्ठूण ।  
 'को एस अइकुरूवो भयवं ! तुम्हंतिए पुरिसो ?' ॥६५७८॥  
 कहियं साहूहिं तओ धम्मत्थी विविहदुक्खसंतत्तो ।  
 गिहिधम्ममणुद्धंतो अच्छइ संसारनिव्विन्नो' ॥६५७९॥  
 तो चिंतइ नरनाहो 'एस कुरूवाण पढमदिद्धंतो ।  
 मंह अंतेउररक्खापुरिसो अइसुंदरो होइ ॥६५८०॥  
 अइसयकुरूवदेहो अमणोन्नो सावओ य धम्मरुई ।  
 परत्तोयपरमभीरू कुकम्मविरओ य सासंको' ॥६५८१॥  
 एमाइ चिंतिकुणं काऊण मुणीण पुण पुण पणामं ।  
 भणियं(ओ) राएण इमं गुणराओ जणियबहुमाणं ॥६५८२॥  
 'साहम्मिओ सि सावय ! जाव न तुह सव्वविरइपरिणामो ।  
 ता अम्ह सन्निहाणे अच्छसु अंतेउरमहल्लो' ॥६५८३॥  
 तो नरवइपरमग्गहउवरुद्धमणेण तेण पडिवन्नं ।  
 अच्छइ रायंतेउरकुलनारीरक्खणक्खणिओ ॥६६८४॥  
 तो परमसावयत्तणगुणाणुराएण रंजियमणाओ ।  
 जायाओ सपक्खाओ गुणराए रायपत्तीओ ॥६५८५॥  
 तो सो नरिंदगोरवउवरुद्धमणो तदेक्कमण-नयणो ।  
 अविलोयइ पविसंतं अप्पमणप्पं च परिवारं ॥६५८६॥

पडिठुंभइ नरवग्गं अपरिचियं खलइ जुयइवग्गं पि ।  
 जोगिणि-पच्चइयाओ पविसंतीओ निसेहेइ ॥६५८७॥  
 वारइ विचित्तदेसं नरिंदपत्तीण उभयघणनेहं ।  
 मंगलकुडीए छोदुं रक्खइ दारंमि ठरुण ॥६५८८॥  
 वारइ विकहालावं तित्थयराईण कहइ चरियाइं ।  
 जोयइ नयणवियारं उवविसिउं देइ न गवक्खे ॥६५८९॥  
 इय एवमाइबहुविहपयत्तसयधुत्तलोयदुल्लंघे ।  
 अंतेउरंमि निवसइ भयजणणो रायपत्तीण ॥६५९०॥  
 तत्थेव ण्हाण-भोयण-विलेवणा-हरण-वत्थ-मल्लेहिं ।  
 नरवरआएसेणं दासीओ करंति सुस्सुसं ॥६५९१॥  
 अंतेउरमि बहुए संति अणेगाओ रायपत्तीओ ।  
 अच्छंतमणिट्ठाओ इट्ठयराओ वि रायस्स ॥६५९२॥  
 तो ताओ अणिट्ठाओ वरिससएहिं पि कह वि न लहंति ।  
 नरवइणा संजोयं मयणगिपरव्वसमणाओ ॥६५९३॥  
 इय तत्थ पुरिसदुहियाण तिव्वकामगिगडज्जमाणाण ।  
 नत्थि कुरूव-सुरूवो त्ति ताण पुरिसं पइ विवेओ ॥६५९४॥  
 तो ताण तारिसीणं एगा अइलडहा जोव्वणुम्मत्ता ।  
 गुणराए अणुरत्ता नरिंदपत्ती विजयनामा ॥६५९५॥  
 सविसेसण्हाण-भोयणमाईहिं य तस्स कुणइ उवयारं ।  
 गुणराओ वि असंको पसायबुद्धीए मन्नेइ ॥६५९६॥  
 तो तीए अन्नदियहे अपडुसरीरं ति मन्नमाणीए ।  
 गुणरायं पइ भणियं सगिहे निदं करिस्सामि ॥६५९७॥

पडिवन्नं तेण तहिं इयराओ तत्थ मंगलकुडीए ।  
 रयणीए छेदूणं दारंमि परिद्धिओ सययं ॥६५९८॥  
 जसवद्धणो वि राया विसज्जियत्थाणपरियणो होउं ।  
 विहरइ पच्छन्नंगो अंतेउरमज्झयारंमि ॥६५९९॥  
 जोयइ जुत्ताजुत्तं नियभज्जाणं च चेद्धियं मुणइ ।  
 गुणरायं पि परिक्खइ गुण-दोसविभागमुणणत्थं ॥६६००॥  
 तो सो कमेण राया समागओ विजयमंदिरं गुत्तो ।  
 पेच्छइ सेज्जाए ठियं मयणवियाराउलं विजयं ॥६६०१॥  
 तो तत्थ चेव निहुओ थक्को जसवद्धणो अलक्खंगो ।  
 'किं एसा इह सुत्ता न गया किं मंगलकुडीए' ॥६६०२॥  
 एत्थंतरंमि तीए मयणपराहीणमणवियप्पाए ।  
 संपेसिऊण दासिं गुणराओ सद्धिओ सगिहे ॥६६०३॥  
 तो सो नीसंकमणो अपडुसरीर त्ति मन्नमाणो य ।  
 काऊण दाररक्खं संपत्तो तीए गेहंमि ॥६६०४॥  
 जोक्कारिऊण दूरं उवविद्धो कयकरंजलीबंधो ।  
 पभणइ 'देहाएसं आहूओ केण कज्जेण ?' ॥६६०५॥  
 तो तीए तक्खणुप्पन्नमयणवियाराए दीहमूससिउं ।  
 आमोडिऊण अंगं पयंपियं कामविवसाए ॥६६०६॥  
 जं सुविणे वि न पेच्छइ गुणराओ जं मणे न चिंतेइ ।  
 तं तीए तया भणियं विसिद्धजणलज्जणीयं जं ॥६६०७॥  
 तो तं तिस्सा वयणं अयंडगुरुवज्जवडणदुव्विसहं ।  
 सोऊण विसुद्धप्पा गुणराओ भणिउमाढत्तो ॥६६०८॥

'तुह देवि ! अत्थि विसमं किं पि सरीरस्स कारणं गरुयं ।  
 जेण पराहीणमणा झंखसि एवंविहाइं पि ॥६६०९॥  
 अंतोवियंभिउद्दामगरुयजरभरपरव्वसंगीए ।  
 तुह देवि ! अपयइत्थं उवट्ठियं किंपि दुसरूवं' ॥६६१०॥  
 तो तीए पुण भणियं 'न किं पि झंखेमि किंतु पयइत्था ।  
 तुज्झाणुरायरत्ता संभोयमईए पत्थेमि' ॥६६११॥  
 भणियं गुणराएणं 'हा ! हा ! मह देवि ! तुज्झ वयणेण ।  
 निसुएण वि गुरुदुक्खं अच्छउ दूरे अणुद्दणं ॥६६१२॥  
 नियजीयसंसए वि हु न कुलीणो कुणइ वो अकज्जाइं ।  
 एक्कं परधणहरणं वीयं परनारिपरिभोयं ॥६६१३॥  
 निम्मलदिवेयनयणो जहत्थउवलद्धपुन्नपावंगो ।  
 कह तुच्छसुहनिमित्तं पडामि घोरंधनरएसु ? ॥६६१४॥  
 जह देवि ! दुगुंछणीए ममंमि तुह रायवासणा, जाया ।  
 तह एयं पि दुकम्मं दुगुंछणीयं विसिद्धाण ॥६६१५॥  
 दित्रो गुरूहिं जो मह अणुव्वएसुं अभिग्गहो गरुओ ।  
 ताण कह देवि ! भंगं करेमि सम्मं वियाणंतो ? ॥६६१६॥  
 कह वंचामि नरिंदं साहम्मियवच्छलंधवीससियं ? ।  
 कह जणणीओ भणिउं पच्छा भुंजामि तुब्भे वि ? ॥६६१७॥  
 कह देवि ! तुज्झ सुकुलुब्भवाए सुकुलीणरायपत्तीए ।  
 एवं जंपंतीए हा हा ! जीहा वि नो खलिया ?' ॥६६१८॥  
 इय एवमाइ सव्वं सोऊणं तस्स निट्ठुरं वयणं ।  
 सा मलियमुहमयंका भणइ इमं जायवेलक्खा ॥६६१९॥

'रे दुड्ड ! धिड्ड ! निट्टुर ! जह जह पत्थेमि तह तहा वंको ।  
 मह पडिकूलं जंपसि निव्विन्नो किं सजीएण ? ॥६६२०॥  
 जइ नेच्छसि मह वयणं ता एण्हि कलयलं करेऊण ।  
 माराविस्सामि तुमं अकज्जकारि त्ति काऊण' ॥६६२१॥  
 भणइ पुणो गुणराओ 'भयस्स मारिज्जए किमिह देवि ! ? ।  
 पाणपरिच्चाएण वि अवस्स रक्खेमि नियसीलं' ॥  
 तो तीए(इ) पुणो भणियं 'न तुज्झ चुक्क्रेमि दोन्नि दियहाइं ।  
 आलोच्चिऊण चित्ते जं उचियं तं मह कहेसु' ॥६६२२॥  
 तो गुणराओ तुरियं निग्गतूणं च विजयगेहाओ ।  
 मंगलकुडीए पत्तो अच्छइ सोव्वेवचित्तो य ॥६६२३॥  
 एत्थंतरंमि राया तहाविहं वइयरं निएऊण ।  
 आरुद्धो विजयाए गुणराए तह य परितुड्डो ॥६६२४॥  
 तो नीहरिओ राया विजयगिहाओ समागओ तुरियं ।  
 जत्थऽच्छइ गुणराओ चिंतासंतत्तसव्वंगो ॥६६२५॥  
 उवविट्ठो तस्संते राया पुण जंपिउं समाढत्तो ।  
 'गुणराय ! किंनिमित्तं उव्विग्गो दीससे अज्ज?' ॥६६२६॥  
 काऊण पयपणामं भणइ 'न मे को वि देव ! उव्वेवो ।  
 संभवइ अप्पविसए सव्वत्थनिराकुलमणस्स ॥६६२७॥  
 तुह विसए पुण नरवर ! गरुयं उव्वेवकारणं अत्थि ।  
 एगासत्तो होउं अवहीरसि इयरदेवीओ ॥६६२८॥  
 पुरिसवसेणं नरवर ! सईओ असईओ हुंति नारीओ ।  
 पयईए पुण न कत्थ वि गुण-दोसा हुंति एयाण ॥६६२९॥

अलहंताओ पियसुहं अन्नं पुरिसंतरं अहिलसंति ।  
 एसो देव ! अणत्थो पुरिहरियव्वो पयत्तेण ॥६६३०॥  
 निहणांति उभयलोगं दूंसति य ससुर-पिउकुलाइं च ।  
 कलुसंति तुम्ह चित्तं होंति अणत्था इमे ताण ॥६६३१॥  
 अब्भत्थिओ सि नरवर ! चरणंतलुलंतमत्थएण मए ।  
 अज्ज दिणे सव्वासु वि वारं देवीसु देज्जाहि' ॥६६३२॥  
 तो भणइ नरवरिंदो 'किमयंडे चेव अज्ज उव्विग्गो ? ।  
 न कयाइ सिक्खवंतो अज्ज पुण कह णु सिक्खेसि ? ॥६६३३॥  
 ता किं दिट्ठं कीय वि वेगुन्नं अज्ज रायपत्तीए ? ।  
 मह कहसु कज्जगब्भं परमत्थं एत्थ गुणराय ! ॥६६३४॥  
 किं पुच्छिएण ? अहवा पच्चक्खं चेव अज्ज मह जायं ।  
 विजयाए किर तुहोवरि जं भणियं साम-दंडेहिं ॥६६३५॥  
 गुणराय ! तुज्झ सरिसो पुरिसो इह नत्थि सयलभुयणे वि ।  
 धम्मपरो पहुभत्तो अकज्जभीरू कुलीणो य' ॥६६३६॥  
 तो गुणराओ पभणइ 'तुह पयसेवापहावओ देव ! ।  
 सव्वो मह गुणनिवहो किं न हुओ एस मह पुव्विं ? ॥६६३७॥  
 जइ देव ! तए सव्वो विन्नाओ विजयवइयरो अज्ज ।  
 किं कायव्वं तिस्सा ? एण्हिं मह कहसु परमत्थं ॥६६३८॥  
 तो राइणा पभणियं 'पायालंतरगहीरगत्ताए ।  
 नरयस्स अद्धमग्गे पयिद्रोहिं पेसइस्सामि' ॥६६३९॥  
 तो जंपइ गुणराओ कन्ने पिहिऊण दोवि (दोहिं) हत्थेहिं ।  
 'हा हा नरिंद ! एवं वोत्तुं पि न जुज्जए तुज्झ ॥६६४०॥

निग्गहणिज्जे अप्पमि देव ! कह तीए निग्गहं कुणसि ? ।  
 तुमए परिचत्ताए तिस्सा दोसो समुप्पण्णो ॥६६४१॥  
 ता इह परमत्थेणं दोसो तुह राय ! न उण विजयाए ।  
 मयणग्गिपलित्ताणं गरुयाण वि जंति बुद्धीओ ॥६६४२॥  
 किं देव ! तए न सुयं पुराणसत्थेसु बंभराएण ।  
 नियधूया उवभुत्ता मयणपरायत्तचित्तेण ॥६६४३॥  
 अच्छंतु ताव अन्ने गोयमरिसिभारियाए सक्केण ।  
 जं विहियमहल्लूए लज्जिज्जइ तं भणंतेहिं ॥६६४४॥  
 इय तत्थ देव ! एवंविहा वि नीसेसभुयणगरुया वि ।  
 होंति अणंगस्स वसे को दोसो तत्थ नारीसु ? ॥६६४५॥  
 जह देव ! मिट्ठभोई अलहंतो मिट्ठभोयणं को वि ।  
 किं कुणइ बुभुक्खत्तो ? कुभोयणे कुणइ अहिलासं ॥६६४६॥  
 तह देव ! रूव-लायन्न-लडह-सोहग्गसंगयं देवं ।  
 अलहंताओ न इच्छंति ताओ अम्हारिसं अहमं ? ॥६६४७॥  
 ता मह पसायबुद्धिं काऊण मणे अ(S)वलंबिय पहुत्तं ।  
 विजयाए एकुदोसो खमियव्वो मज्झ वयणेण' ॥६६४८॥  
 इय भणिऊणं पडिओ गुणराओ नरवरिंदपाएसु ।  
 तेणाऽवि कज्जसारं वियप्पियं तस्स तं वयणं ॥६६४९॥  
 'गुणराय ! तुज्झ वयणं पडिवन्नं तं तहा मए सव्वं ।  
 परमत्थपंडिण व पयंपियं अवितहं तुमए' ॥६६५०॥  
 जसवद्धणो नरिंदो विजओवरि गलिअमच्छरामरिसो ।  
 परिभावियपरमत्थो दइओवरि जायकारुन्नो ॥६६५१॥

गुणराएणं भणिओ विजयागेहं च तक्खणे पत्तो ।  
 अमुणियपुव्वसरूवो व्व तीए सह भुंजए भोए ॥६६५२॥  
 इय एवं पडिदियहं अन्नाओ वि जा अणिट्ठपत्तीओ ।  
 जसवद्धणो कमेणं ताण वि निसिवासयं देइ ॥६६५३॥  
 एवं सो गुणराओ जिणधम्मपहावओ य पुन्नभरो ।  
 नरनाहमंतिपरियण-पोराणं वल्लहो जाओ ॥६६५४॥  
 अह अन्नदिणे राया अत्थाणे बहलगुंदलुद्दामे ।  
 जा अच्छइ उवविट्ठो नाडय-पेच्छणयआसत्तो ॥६६५५॥  
 ता नरवरिंदधूया गुणसिरिसुहगब्भसंभवा तत्थ ।  
 जयसुंदरी सुरूवा समागया तियसनारि व्व ॥६६५६॥  
 संपुत्रमियंकमुही नीलुप्पलप्प(प)त्तदीहतरलच्छी ।  
 चक्कलियथूलथणहरपडिरुद्धउरत्थलाभोया ॥६६५७॥  
 गंभीरनाहिदेसा वलित्तयालंकिया य तणुमज्झा ।  
 परिवियडनियंबयडा रंभोरू कुम्मचरणा य ॥६६५८॥  
 इय एवंविहमणहरसव्वंगावयवसुंदरं धूयं ।  
 दट्ठण नरवरिंदो अह चिंतासायरे पडिओ ॥६६५९॥  
 'कस्सेसा दायव्वा ? दाऊणं कह व सुत्थिओ होउं ? ।  
 दिन्ना वि कह णु होही नियगेहे सुत्थिया एसा ?' ॥६६६०॥  
 इय एवमाइ तग्गयचिंतासंतावदुहियहिययस्स ।  
 काऊण पयपणामं उवविट्ठा रायपासंमि ॥६६६१॥  
 तो तत्थ विविहवइयरविणोयसय-नट्ट-गीयमाईहिं ।  
 खणमच्छिऊण राया उट्टइ अत्थाणभूमीओ ॥६६६२॥



जयसुंदरीए(इ) सहिओ वच्चइ तम्माउ-गुणसिरीगेहं ।  
 सेज्जाए सुहनिसत्रो नियधूयं भणिउमाढत्तो ॥६६६३॥  
 'कस्स पयच्छामि तुमं ? को वा तुह चित्तसंगओ राया ? ।  
 परिभाविऊण चित्ते मह साहसु पुत्ति ! वेगेण' ॥६६६४॥  
 तो सा पिउवयणेणं लज्जावसअवणउत्तिमंगेणं ।  
 परिकह्णइ रेहाओ धरणीए सयं कररुहेहिं ॥६६६५॥  
 तो तं तहासरूवं लज्जाभरमंधरं निएऊण ।  
 नरनाहो पडिभणिओ धूयाकज्जे गुणसिरीए ॥६६६६॥  
 'अंतोहुत्तवियंभियविमलविवेयाओ जइ वि नरनाह ! ।  
 लज्जंति गुरुण पुरो तहा वि वोत्तुं कुलवहूओ ॥६६६७॥  
 ता काऊण पसायं इमीए सव्वंगसुंदरीए (?) ।  
 किज्जउ सयंवरेण महापसाओ महाराय ! ॥६६६८॥  
 तो नियपडिहासेणं सकीयमणवासणाणुसारेण ।  
 अप्परुईए सयत्थं सयंवरे वरउ वरमेसा' ॥६६६९॥  
 तो नरवइणा सव्वं गुणसिरिवयणं 'तह'त्ति पडिवन्नं ।  
 कारावइ बहुनरवइसंमहसयंवरं राया ॥६६७०॥  
 मिलिएसु रूव-जोव्वण-लावन्न-कलानिवासराएसु ।  
 सो कोइ नत्थि जो किर तिस्सा हिययं अवहरेइ ॥६६७१॥  
 तो ते रायकुमारा जयसुंदरिमणपवेसमलहंता ।  
 नियनियठाणेसु गया जसवद्धणजणियआमरिसा ॥६६७२॥  
 तो नरवइणा भणिया नियदइया गुणसिरी इमं वयणं ।  
 'पेच्छ जयसुंदरीए विगोविओ रायमज्झंमि ॥६६७३॥

लावन्न-रूव-जोव्वण-विलास-विन्नाण-गुणसमिद्धाण ।  
 कुमराण न सो जाओ जस्सेसा खिवइ वरमालं' ॥६६७४॥  
 तो नरवइणा पुण पुण धूयानेहेण विविहकुमरेहिं ।  
 काराविया असंखा सयंवरा गुणसमिद्धेहिं ॥६६७५॥  
 तह वि जयसुंदरीए न को वि चित्ते परिट्ठिओ कुमरो ।  
 कयबहुमणवेलक्खा नियनियठाणं गया ते वि ॥६६७६॥  
 एत्थंतरंमि राया सिद्धिलियधूयासिणेहसब्भावो ।  
 मणजायरोसपसरं नियचित्ते चिंतिउं लग्गो ॥६६७७॥  
 'जे के वि एत्थ महिमंडलंमि गरुया वि संति नरवइणो ।  
 ते सव्वे आणीया सयंवरे पावधूयत्थे ॥६६७८॥  
 एण्हिं को किर होही जस्सेसा दिज्जिही महापावा ? ।  
 चिद्धंति परं दासा पिंडारा तह य गोवाला ॥६६७९॥  
 तो नूण कुधूयाए इमीए मन्नामि मज्झ सीसंमि ।  
 घल्लेयव्वो छारो दुच्चरियाचरणकरणेण ॥६६८०॥  
 अहवा जं कायव्वं नियपुरिसायार-सत्त-धर्णसज्झं ।  
 तं सव्वं पि हु विहियं धूयाचित्ताणुसारेण ॥६६८१॥  
 एण्हिं पुण जावऽज्ज वि जुवइवियारं पयासइ न एसा ।  
 ताव इमं पइ जत्तं अविलंबमहं करिस्सामि ॥६६८२॥  
 एयाए विविहदुक्खं आणाभंगेहिं परिहवेहिं च ।  
 जह मज्झ कयं अहमवि इमीए तह तं करिस्सामि ॥६६८३॥  
 धूयामिसेण एसा उवट्ठिया मज्झ का वि किच्च व्व ।  
 सा वि पडिकूलिमाए हंतव्वा नाणुकूलेहिं' ॥६६८४॥

तो अन्नदिणे एगंतवासभवणडिण्ण राएण ।  
जणणिसमेया धूया वाहरिया अत्तणो पासे ॥६६८५॥  
भणिया बहुप्पयारं 'आचिक्खसु पुत्ति ! अम्ह नियचित्तं ।  
कह तावंतनरिंदाण को वि तुह वल्लहो न हुआ ?' ॥६६८६॥  
तो जणणि-जणयबहुविहपत्थणवयणोवरुद्धचित्ताए ।  
जयसुंदरीए भावो जणणिमुहेणं तंओ कहिओ ॥६६८७॥  
'सो चेव मज्झ भत्ता रंको रोडो व्व होउ जो सो वि ।  
जो अहिलसइ न अन्नं जुयइं चित्ते वि जइ लिहियं ॥६६८८॥  
ते सब्बे वि सयंवरनरनाहा एत्थ आगया जे उ ।  
विविहंतेउरकलिया बहुविहनारीपसत्ता य' ॥६६९१॥  
तो नरवइणा भणियं 'जइ एवं ता न कोइ इह भुयणे ।  
होही हुआ व्व जो किर एक्कगमणो नियकलत्ते ॥६६९०॥  
एवंविहगुणजुत्तो गुणराओ चेव पुत्ति ! संभवइ ।  
तस्स तुमं दायव्वा सुनिच्छियं एगचित्तस्स' ॥६६९१॥  
तो रोसवसविसंठुलवयणपरिक्खलणगग्गयगिरेण ।  
'जा जाहि' त्ति सरोसं राएण विसज्जिया धूया ॥६६९२॥  
तो नरवइणा तुरियं गुणराओ सद्धिओ सकोवेण ।  
'रे गुणराय ! पडिच्छसु परिणयणत्थं सुयं मज्झ ॥६६९३॥  
जइ किं पि भणसि अन्नं ता सविओ मह सरीरसवहेण ।  
तुह चेव पुन्नपरिणइ पणामिया आगया एसा' ॥६६९४॥  
तो तं रायाएसं सरीरसवहं च तं अलंघंतो ।  
मोणव्वयं विहेउं उट्ठइ नरनाहपासाओ ॥६६९५॥

नरवइणा वि असेसं पउणं कारावियं विवाहत्थे ।  
 तो सुपसत्थे दियहे पसत्थतिहि-वार-लग्गंमि ॥६६९६॥  
 जा किर ण्हवणयकज्जे गुणरायं अन्निसंति ता सो वि ।  
 अकहंतो चिय नद्धो पुच्चाभिमुहो य निहुयंगो ॥६६९७॥  
 तो नरवइणा तुरियं तुरयत्थे पेसिऊण नियपुरिसे ।  
 आणावइ परिणावइ सिरिं व जयसुंदरिं देविं ॥६६९८॥  
 जयसुंदरीए भणियं 'पलासि किं ? किं व वहसि मणखेयं ? ।  
 तुह मज्झ वि संजोयं पत्ति य भवियव्वया कुणइ ॥६६९९॥  
 जं जह लिहियं विहिणा तं तह परिणव(म)इ किं वियप्पेण ?  
 इय भाविऊण धीरा विहुरे वि न कायरा हुंति ॥६७००॥  
 चिंतामि अहं अन्नं तुमं पि अन्नं पि(वि)चिंतसि मणंमि ।  
 कज्जं पुण तं होही जं विहिणा चिंतियं एत्थ ॥६७०१॥  
 एण्ह निच्चिंताइं दोन्नि वि चिरसंचियस्स फलमतुलं ।  
 संपइ उवभुंजामो जहद्वियं पुव्वकम्मस्स' ॥६७०२॥  
 इय एवमाइ विविहं गुणराओ सिक्खिओ तहा ताए ।  
 जह एगचित्तहियओ आएस्सपरायणो जाओ ॥६७०३॥  
 परमत्थवत्थुरूवं आलौवं तीए भावगरुयं च ।  
 राया सोऊण तओ गयमच्छरमाणसो जाओ ॥६७०४॥  
 तो भावइ परमत्थं 'धूयाए विहियपुव्वकम्मेण ।  
 मह बुद्धी संजणिया गुणरायपयाणकज्जंमि' ॥६७०५॥  
 तो पच्चागयचित्तो धूयानेहेण देइ गुणराए ।  
 अब्धं नियरज्जस्स य असेसनियमंडलस्स वि य ॥६७०६॥

तो तीए समं अणुवमभोए भुंजेइ तत्थ गुणराओ ।  
 संजाओ पुहईए सुपसिद्धो मंडलाहिवई ॥६७०७॥  
 एवं च तए तइया जयसुंदरिविसयसोक्खरत्तेण ।  
 पन्नासं वरिसाइं गमियाइं पहट्ठचित्तेण ॥६७०८॥  
 अह अन्नदिणे दोन्नि वि पासायगवक्खए बइड्डाण ।  
 जयसुंदरी वि देवी तुह केसे विवरए जाव ॥६७०९॥  
 ता कम्म-धम्मजोया तव्विहभव्वि(वि)यव्वयानिओएण ।  
 नियआउसमत्तीए दोहिं वि विज्जू सिरे पडिया ॥६७१०॥  
 तो मरिऊणं दोन्नि वि सीयानइउत्तरंमि कूलंमि ।  
 जंबूतरुपुव्वेणं मिहुणगभावेण जायाइं ॥६७११॥  
 तत्थ वि संपत्ताइं तारुन्नं सुरकुमारसारिच्छं ।  
 दसविहकप्पमहातरुसमुब्भवं भुंजह सुहं पि ॥६७१२॥  
 जायाइं ताइं दोन्नि वि तिगाउउच्चाइं देहमाणेण ।  
 पलिओवमाइं तिन्नि य आउपमाणं हवे ताण ॥६७१३॥  
 दसविहकप्पमहातरुअजत्तसंपज्जमाणसोक्खाण ।  
 वच्चंति ताण दियहा सुपुन्नपरिणामजोएण ॥६७१४॥  
 मत्तंगकप्पतरुणो परिकप्पणमेत्तजायउवरोहा ।  
 विविहरसमज्जनिवहं ताण पयच्छंति पाणत्थं ॥६७१५॥  
 तह भिर्गकप्पतरुणो मणचिंतियमेव ताण विरयंति ।  
 अइकोमलसयणासणमाईयं सुकयपुन्नाण ॥६७१६॥  
 तुडियंगनामधेया सुहतरुणो दिंति ताण धन्नाण ।  
 विविहाओज्जसमूहं नियहिययवियप्पमेत्तेण ॥६७१७॥

दीव<sup>४</sup>सिहनामधेया जोई<sup>५</sup>सनामा य दुविहकप्पदुमा ।  
 विरयं(वियरं?)ताणं ताणं उज्जोयं ते पयासंति ॥६७१८॥  
 चिंत्तंगा कप्पदुमा मणचिंतियमेव ते पयच्छंति ।  
 नाणाविहकुसुमुज्जलगुंफियमल्लोवयारोहं ॥६७१९॥  
 चित्तर<sup>७</sup>सा उण वरकप्पसाहिणो भोयणाइं सुरसाइं ।  
 मणचिंतियमेत्ताइं ताण विचित्ताइं ढोयंति ॥६७२०॥  
 मणि<sup>८</sup>यंगा उण तरुणो ताणं मणि-रयण-कणयघडियाइं ।  
 विविहाइं भूसणाइं चिंतियमेत्ताइं पयडंति ॥६७२१॥  
 जे भवण<sup>९</sup>रुक्खनामा सुहतरुणो ते वि ताण विरयंति ।  
 विविहाइं मंदिराइं देवाण व वरविमाणाइं ॥६७२२॥  
<sup>१०</sup>आकिन्नकप्पतरुणो ताण पयच्छंति कप्पियं चैव ।  
 देवंगदूसस(सु)कुमारवत्थनिवहं मिहुणयाण ॥६७२३॥  
 इय दसविहकप्पडुमसंपाइयहिययवांछियत्थाण ।  
 वच्चइ सुहेण ताणं कालो अन्नोन्नरत्ताण ॥६७२४॥  
 ईसा-विसाय-मय-कोह-माण-मायाहिं तह य लोहेण ।  
 परपरिभव-परपेसण-पेसुन्नपरव्वसत्तेण ॥६७२५॥  
 अन्नोन्नसिरिविरोहत्तणेण एमाइ दूसिओ सग्गो ।  
 जियसुरलोयं सोक्खं जुयलाहम्मे मिहुणयाण ॥६७२६॥  
 निययाउयक्खएणं मरिऊणं ताइं दो वि जुगवं पि ।  
 सोहम्मदेवलोए चंदाणणवरविमाणंमि ॥६७२७॥  
 तिन्नि-पल्लाउयाइं उप्पन्नाइं खणेण तत्थ चिय ।  
 अणुवमसुरलोयसुहं भुंजंति पहिड्डहिययाइं ॥६७२८॥

अन्नोन्नपरमनेहाणुरायरसियाण ताण सुरलोए ।  
 निमिसद्धं व गयाइं तिन्नि वि पलियाइं दोहिं पि ॥६७२९॥  
 चविऊण तुमं सिरिबीरसेण ! एत्थेव जंबुद्धीवंमि ।  
 दाहिणभरहे मज्झिमखंडे उज्जेणिनयरीए ॥६७३०॥  
 आसि जसदेवनामो नियधणसिरिविजियधणयधणनिवहो ।  
 नीसेसनयरपमुहो सेट्ठी सुविसिद्धकुल-जाई ॥६७३१॥  
 तस्साऽऽसी पियभज्जा जसदेवी नाम विमलकुलजाया ।  
 पंचप्पयारविसए सह भुंजइ तीए सो संट्ठी ॥६७३२॥  
 गुणरायजीवदेवो चविऊणं तत्थ सेट्ठिभज्जाए ।  
 उव[व]न्नो कुच्छीए बहुपुन्नालंकियररीरो ॥६७३३॥  
 सा पच्छिमंमि जामे पेच्छइ सुविणयं सुहपसुत्ता ।  
 किरि पुन्निमामयंकं संकंतं तीए उयरंमि ॥६७३४॥  
 तो सा सुविणयदंसणसंभमसंजायतरलतारच्छी ।  
 जसदेवसिद्धिणां कहइ सो वि आणंदइ सुएण ॥६७३५॥  
 एवं तीए अणुदियहअतुलवहंतपुन्नगवभाए ।  
 इय जाओ डोहलओ अभयपयाणं पयच्छामि ॥६७३६॥  
 जसदेवसिद्धिणा वि य सविसेसुप्पन्नपरमहरिसेण ।  
 गुणचंदं रायाणं विन्नविय करावियं सव्वं ॥६७३७॥  
 तो तिस्सा पडिपुन्नेसु नवमासेसु सुहमुहुत्तंमि ।  
 परमसुहेण पसूया सलक्खणं उत्तमं पुत्तं ॥६७३८॥  
 तो सिद्धिणा सहरिसं कारावियमसमदिन्नधणनिवहं ।  
 नच्चंतलडहविलयं वद्धावणयं मणभिरामं ॥६७३९॥

तो अभयदाणदोहल-सुविणयससिदंसणेण य जहत्थं ।  
 अभयचंदो त्ति नामं पइद्वियं अइगए मासे ॥६७४०॥  
 वड्डइ वड्डंतुज्जलपुत्रेहिं समं व सुहसरीरेण ।  
 पत्तो कुमारभावं विमलकलागहणसुसमत्थं ॥६७४१॥  
 पइदियहन्नोन्नकलागहणपवड्डंतकंतिवित्थारो ।  
 सियपक्खससहरो इव जाओ संपुन्नसव्वंगो ॥६७४२॥  
 पत्तो जोव्वणभावं नीसेसकलाकलावनिम्माओ ।  
 मेहा-पन्ना-धी-धारणाजुओ अभयचंदजुवा ॥६७४३॥  
 चाओ पसंसरहिओ परक्कमो खंतिसजुओ जस्स ।  
 नाणे मोणं परनारिवज्जियं जस्स सोहग्गं ॥६७४४॥  
 एवं असारसंसारसायरो तेण अभयचंदेण ।  
 सारत्तणं पवत्तो अहिलसणीउत्तमगुणेण ॥६७४५॥  
 इय तस्स सयलतिहुयणअच्छेरयभूयरूवविहवस्स ।  
 वच्चंति सुहं दियहा असेसजणपेच्छणीयस्स ॥६७४६॥  
 अह अन्नदिणे मित्तेहिं परिगओ जाइ बाहिरुज्जाणे ।  
 कीलत्थमभयचंदो कीलइ य विचित्तकीलाहिं ॥६७४७॥  
 अह तत्थ चेव पुत्विं समागया कीलिउं सहिसमेया ।  
 गुणचंदरायधूया उज्जाणे जयसिसीकन्ना ॥६७४८॥  
 सो तीए कह वि बहुवल्लिगहणअंतरियविग्गहो दिट्ठो ।  
 मयणो व्व मयणविवसाए साणुरायं अभयचंदो ॥६७४९॥  
 तो तं तदेक्कहिययं तदेक्कनयणं च जयसिरिं दट्ठुं ।  
 किं कि त्ति सहियणो वि हु अवलोयइ कोउहल्लेण ॥६७५०॥



जह जह पेच्छइ तस्संगचंगिमं जह वियड्डसिंगारं ।  
 अइमणहरं च कीलं वियक्खणं वयणविन्नासं ॥६७५१॥  
 सा जयसिरी वि तह तह दूरयरपवड्डमाणअणुराया ।  
 मूढ व्व थंभिया इव संजाया खीलियंगि व्व ॥६७५२॥  
 तो सा सहीहिं भणिया 'किं देवो कोइ सावपभ(ब्भ)द्वो ? ।  
 विज्जाहरो व्व एसो विज्जाभद्वो इहं पडिओ ?' ॥६७५३॥  
 तं रायसुया सोउं 'मा कह वि वियक्खणाओ एयाओ ।  
 मुणिहं(हिं)ति ममं' ति तओ करेइ आयारसंवरणं ॥६७५४॥  
 'कुसुमरयदूसियाइं पेच्छ हले ! मह गलंति अच्चणीणि ।  
 सिसिरानिलेण पेच्छइ सरीरमुव्वहइ उद्धोसं' ॥६७५५॥  
 इय जा सहीण पुरओ सा एवं भणइ अभयचंदेण ।  
 ता सा वि कह वि दिट्ठा दुमंतरालेण सप्पणयं ॥६७५६॥  
 अह सो वि तह च्चिय साणुरायचित्तो असेसमित्तेहिं ।  
 सच्चविओ सभएहिं सगिहं च छलेण आणीओ ॥६७५७॥  
 तो ताण वयंसाणं मज्झे केणाऽवि चवलचित्तेण ।  
 जयसिरि-सेट्ठिसुयाणं सरूवमावेइयं पिउणो ॥६७५८॥  
 तेणाऽवि अभयचंदो एगंते सद्विऊण सिक्खविओ ।  
 सप्पणयं साणुणयं सगौरवं सबहुमाणं च ॥६७५९॥  
 'पुरिसेण सया पुत्तय ! सजाइसमचेट्ठिएण होयव्वं ।  
 सकुलट्ठिइं चयंतो इहपरलोए य होइ दुही ॥६७६०॥  
 वणियाण पुण विसेसेण पुत्त ! एवंविहो समायारो ।  
 इह जाण जोव्वणे वि हु वुड्ढाण व होइ आयरणं ॥६७६१॥

विहवे वि दरिद्वत्तं दासत्तं तिजयपहुत्ते वि ।  
 रूवं पि सिक्खवंति व अप्पकुरूवत्तबुद्धीए ॥६७६२॥  
 सकलत्तेण वि जोगो जाण अकज्जं व होइ रयणीए ।  
 वेसो वि जाण पिसुणइ पसंतयं सव्वभावेसु ॥६७६३॥  
 अन्नं च पुत्त ! वणिओ गम्मो सव्वस्स होइ पयईए ।  
 गुडपिंडओ व्व दिट्ठो सद्धं उप्पायइ जणस्स ॥६७६४॥  
 जइ पुण रायविरुद्धं करेज्ज सो पुत्त ! केण वि नएण ।  
 छिद्वेण तेण पुत्तय ! होइ पवेसो खलयणस्स ॥६७६५॥  
 एगं रायविरुद्धं कुल-जाइविलक्खणं भवे वीयं ।  
 तइयं च परकलत्तं इयमाई होंति इह दोसा ॥६७६६॥  
 निद्वोसे वि हु दोसं ठवंति जे पुत्त ! दुज्जणा होंति ।  
 दोसंमि पुणो लद्धे ताण घरे उच्छवो होइ ॥६७६७॥  
 अत्थखओ खलतोसो अजसो परपरिभवो अधम्मो य ।  
 सुयणाण अत्तणो वि य मणदुक्खं दुक्कयकम्महिं ॥६७६८॥  
 तो भणइ अभयचंदो 'आयासिज्जइ किमेत्तियं अप्पा ? ।  
 नाऽहं ताय ! तहाविहकम्माणं कारओ होमि ॥६७६९॥  
 जेण जणे लज्जिज्जइ तुम्हाण वि अजससंभवो होइ ।  
 तं पाणसंसए वि हु नाऽहमकज्जं करिस्सामि' ॥६७७०॥  
 तो 'साहु साहु पुत्तय !' एवं भणिऊण चुंबिओ सीसे ।  
 'किं तुज्झ पुत्त ! भन्नइ पयइविणीयस्स सोमस्स ?' ॥६७७१॥  
 तो जाइ अभयचंदो सेज्जाहरयं विसज्जियवयंसो ।  
 तत्थुव्वेविरच्चि(चि)त्तो अट्टदुहट्टाईं चिंतेइ ॥६७७२॥

'कह मह विसए जाया अलीयसंभवाणा(संभावणा) मह गुरूण ? ।  
 ता अज्ज वि अच्छिज्जइ जाव निओ सुव्वए अजसो ॥६७७३॥  
 संभाविउज्जलगुणो जा पुरिसो होइ ताव सुहमतुलं ।  
 संभावियदोसस्स य विएसगमणं व मरणं व ॥६७७४॥  
 ता सव्वहा वि एयं संतमसंतं च अजसपब्भारं ।  
 सोउं असमत्थेणं न अच्छियव्वं मए एत्थ' ॥६७७५॥  
 इय रयणिचरिमजामे अकहंतो चेव मित्तमाईण ।  
 दोखंडवत्थनिवसणपावरणो निग्गओ तुरियं ॥६७७६॥  
 जाए पहायसमए जा तं न नियंति जणणि-जणयाइं ।  
 ता तव्विओयहुअवहपुत्तुद्धदेहाइं विलवंति ॥६७७७॥  
 'हा ! कत्थ गओ सिरिअभयचंद! चंदो व्व कुसुमसंडाईं ।  
 संमीलिऊण अम्हे सोयमहातमनिमग्गाइं ॥६७७८॥  
 देहेण परं पुत्तय! सिरीसकुसुमं व होसि सुकुमारो ।  
 मुणिओ ववहरणेण उ हियएणं वज्जकट्ठिणो सि' ॥६७७९॥  
 इय एवमाइबहुविहपलाव-मुच्छासहस्सदुहियाइं ।  
 उज्जेणिं पि हु दुहियं कुणांति नीसेसजणसहियं ॥६७८०॥  
 तो जणपरंपराए मुणियं गुणचंदराइणा सव्वं ।  
 सो वि हु तदुक्ख(तद्दुह?)दुहिओ नाओ अंतेउरेणाऽवि ॥६७८१॥  
 अंतेउरंमि सोउं तग्गमणं जयसिरी ससंभंता ।  
 मुच्छानिम्मी(मी)लियच्छी 'धस' ति धरणीयले पडिया ॥६७८२॥  
 कह कह वि महाकट्टेण सीयलसिरिखंडसिसिरपवणेण ।  
 आसासिया सहीहिं खणंतरे मुच्छइ पुणो वि ॥६७८३॥

तो सा सहीहिं कहमवि अणेयदिद्वंत-हेउ-जुत्तीहिं ।  
 साहारिया 'पउत्तिं तस्स कहिस्सामि तुह अइरा' ॥६७८४॥  
 इय ताहिं जयसिरीए चित्तथिरीकरणकारणत्तेण ।  
 जं किं पि जंपिऊणं सकोमलं सिक्खिया बहुयं ॥६७८५॥  
 तो जयसिरीए भणियं 'सिक्खवह किमेवमेव निक(कू)ज्जं ? ।  
 सो वा मह पियदइओ अग्गी वा संगमहिलसइ' ॥६७८६॥  
 एसो विनिच्छओ से निसुओ गुणचंद्राइणा कह वि ।  
 धूयादुहेण दुहिओ सव्वत्तो तं गवेसेइ ॥६७८७॥  
 एवं च ताव एयं इओ य सो निग्गओ अभयचंदो ।  
 तुरियगई संपत्तो उत्तरकूलं समुदस्स ॥६७८८॥  
 तीरंमि नीरनिहिणो नयरं सिरिवद्धणं ति सुपसिद्धं ।  
 संजत्तियवणियाणं कुणइ जहत्थं नियं नामं ॥६७८९॥  
 सो नियसुरूवदंसणसुहेण नीसेसनयरलोयाण ।  
 अच्छरियं जणयंतो पविसइ तो विपणिमग्गो ॥६७९०॥  
 अइगुरुच्छु(छु)हा-पिवासाकिलंतदेहो य कुल्लुरीयाण ।  
 हट्टे गंतूण तओ कारावइ भोयणं विविहं ॥६७९१॥  
 कयदेव-गुरुपणामो भोत्तुं उवविसइ गेहमज्झंमि ।  
 ता तत्थ विहरमाणो समागओ मुणिवरो एगो ॥६७९२॥  
 विविहतवसुसियदेहो परिचत्तो राग-दोस-मोहेहिं ।  
 पसमामयमयरहरो पंचेदियमल्लनिद्वलणो ॥६७९३॥  
 मासोपवासपारणयकारणा भिक्खमन्निसंतो सो ।  
 उग्गम तह उप्पायण एसणदोसेहिं परिसुद्धं ॥६७९४॥

गोमुत्तियाकमेणं समागओ कुल्लुरीयगेहंमि ।  
 खत्तियगोत्तुप्पन्नो अरिदमणो नाम रायरिसी ॥६७९५॥  
 तो तं महामुणिंदं अदीणचित्तं अणंतगुणगरुयं ।  
 दट्ठूण अभयचंदो सहसा रोमंचिओ जाओ ॥६७९६॥  
 चिंतइ 'असारसंसारसायरे विविहदुक्खपउरंमि ।  
 सकयत्थं अप्पाणं मन्नामि सुपत्तलाहेण ॥६७९७॥  
 नवकोडीपरिसुद्धं दायव्वं तं पि मज्झ संपन्नं ।  
 चित्तं पि मज्झ संपइ दानाभिमुहं पवइंतं' ॥६७९८॥  
 इय नाणाविहसुपसत्थभावणाजायसुद्धपरिणामो ।  
 उच्चल्लिऊण थालं देइ मुणिंदस्स नीसेसं ॥६७९९॥  
 परिभाविऊण मुणिणा 'सुज्झइ एयं' ति जायचित्तेण ।  
 'मा होउ दायगस्स वि विसुद्धपुन्नंतरायं'ति ॥६८००॥  
 गहियं पडिग्गहे तं पणमइ दाऊण अभयचंदो वि ।  
 मुणिचरणकमलधूलि(ली)धूसरियसिरो सुभत्तीए ॥६८०१॥  
 सकयत्थं मन्नंतो अप्पाणं वहइ चित्तपरितोसं ।  
 साहू वि पडिनियत्तो अह जायं तत्थ अच्छरियं ॥६८०२॥  
 गयणे पवज्जियाओ गहिरं सुरदुंदुहीओ सहस त्ति ।  
 पडिया दसद्धवन्नाण सुरकुसुमाण वुट्ठी वि ॥६८०३॥  
 तयणंतरं च निवडइ मणीण रयणाण कंचणस्सावि ।  
 वुट्ठी पहिइसुरवरकरमुक्का पत्तदाणेण ॥६८०४॥  
 तं सो हिरन्न-मणि-रयणवरिसमसमं च संवरेऊण ।  
 दारिद्धदुहियदुत्थियजणाण साहारणं कुणइ ॥६८०५॥

तो सो नियपुन्नेहिं व परियरिओ विविहपरियणजणेण ।  
ववहरइ गरुयववहारविजियसंजत्तियसमूहो ॥६८०६॥  
बहुदियहेहिं नरिंदो गुणचंदो जाणिऊण तस्सुद्धिं ।  
अभयचंदस्स पेसइ पहाणपुरिसं विवाहत्थं ॥६८०७॥  
भणिओ बहुप्पयारं नरिंदपुरिसेण सेट्ठिपुरिसेण ।  
तह वि न वंछइ गमणं अहिमाणपरो अभयचंदो ॥६८०८॥  
दाऊण उत्तरं किं पि ताण पेसेइ राय-सेट्ठिनरे ।  
तेसु परिपेसिएसुं करावए जाणवत्ताइं ॥६८०९॥  
संगाहियविविहभंडो संजत्तियसयलउवगरणजाओ ।  
बहुपरियणपरियरिओ पसत्थतिहि-वार-लगंगमि ॥६८१०॥  
आरुहइ जाणवत्ते पूयं काऊण पूयणिज्जाण ।  
कयकायव्वो चलिओ कडाहदीवं पहिड्डमणो ॥६८११॥  
अणुकूलपवणपेल्लियपवहणदुल्लंघलंधियसमुद्धो ।  
पत्तो कडाहदीवं उत्तरिओ परियणाइन्नो ॥६८१२॥  
उत्तारइ नीसेसं भंडुवगरणाइवत्थुवित्थारं ।  
नरवइदंसणपुव्वं तयट्ठिओ कुणइ ववहारं ॥६८१३॥  
तो सो कडाहदीवे अपत्तमणवंछियत्थसंपत्ती ।  
अच्छइ सोव्वेवमणो चिंताजलहिंमि निवु(व्वु)द्धो ॥६८१४॥  
तो तं तहासरूवं चिंतावसवत्तिणं निएऊण ।  
घरचित्तएण भणिओ वयणमिणं सोमएवेण ॥६८१५॥  
'किं नाह ! कायरं इव चित्तसि एमेव विहियमणखेओ ।  
ववसाओ च्विय वीराण होइ एगो नियसहावो ॥६८१६॥

दारिद्रमहोयहिणो पारं पावंति नाह! सप्पुरिसा ।  
 ववसायपवहणेणं सुदेवनिज्जामयजुएण ॥६८१७॥  
 ता तह तह काहामो ववसायं धीरबुद्धिसंजुत्ता ।  
 दासि व्व सिरि जह जह तुरियं वसवत्तिणी होही ॥६८१८॥  
 इह अज्ज चेव पत्तं पवहणभेगं अणंतरयणोहं ।  
 रयणसिहाओ महायस ! दीवाओ आगयं गरुयं' ॥६८१९॥  
 तो भणइ अभयचंदो 'जइ एवं एह तत्थ वच्चामो ।  
 तव्वइयरं असेसं पुच्छामो नोरियाईया' ॥६८२०॥  
 दिट्ठं च तेहिं वहणं बहुकिरणनिबद्धसुरयणु(ण?)सहस्सं ।  
 तेयंसिणो व्व जेउं पारद्धरणं व ससि-सूरे ॥६८२१॥  
 दिट्ठा य तेण वणिया पुट्ठा रयणसिहवइयरमसेसं ।  
 'उवलद्धधरणिपडिया दीवे लब्भंति रयणाइं ॥६८२२॥  
 तं उव्वसं च दीवं जणरहियं विविहकूरसत्तं च ।  
 रयणीए पच्छिमद्धे तहियं घेप्पंति रयणाइं ॥६८२३॥  
 पाविज्जइ तं दीवं वारहमासेहिं दक्खिणविसाओ ।  
 गम्मइ पुव्वसमुदहस्स जेण तं परतरं तीरं' ॥६८२४॥  
 तो भणइ अभयचंदो 'संजत्तह पवहणाइं बहुयाइं ।  
 रयणसिहमहादीवं गंतव्वमवस्स वेगेण ॥६८२५॥  
 अह पउणीकयपवहणजलमाइअसेसउवर्णरणजाओ ।  
 सप्परिवारो चडिओ पयट्टिए पवहणे तुरियं ॥६८२६॥  
 संवत्सरेण पत्तो खड्ढादारंमि तस्स दीवस्स ।  
 उत्तारइ नीसेसं परिवारं अग्गओ ताव ॥६८२७॥

पुण अप्पणा वि उत्तरइ जाव थोवंतरं च किर जाइ ।  
 ता रविकिरणकरालियरयणमऊहोहमसहंतं ॥६८२८॥  
 अभिमुहमभिधावंतं पेच्छइ नियपरियणं अभयचंदो ।  
 पुच्छइ 'किं किमेयं धावह रे ! ? किं भयं तुम्ह ?' ॥६८२९॥  
 तो ते भणंति 'सांविद्य(सामिय)! नत्थि भयं किं पि किं तु रयणाण ।  
 रविकरकरालियाणं संतावं सोढुमसमत्था ॥६८३०॥  
 नाह ! इह च्चिय चे(चि)इह पुरओ मा जाह पलयकाले व्व ।  
 उइयवहुदिणयरारण व रयणाणं दूसहो तेओ' ॥६८३१॥  
 तो भणइ अभयचंदो 'सच्चमिणं पुच्चमेव मह कहियं ।  
 रयणीए पच्छिमद्धे उच्चिणियव्वाइं रयणाइं' ॥६८३२॥  
 पुण भणइ अभयचंदो 'अणुकूलो जइ विही मह हवेज्ज ।  
 तो मह गोत्तं वि फुडं दारिदुहं न संभविही ॥६८३३॥  
 अह ते सव्वे वि नरा झुलुक्किया रयणकिरणजालाहिं ।  
 मज्जंति जलहिसलिले पहुसहिया पवहणे ठंति ॥६८३४॥  
 तो अइगयंमि दिवसे पढमद्धे जामिणीए बोलीणे ।  
 उत्तरइ अभयचंदो सपरियणो भमइ दीवंमि ॥६८३५॥  
 प[व]ररयणकिरणोहनिहयतिमिरकयसुहालोए ।  
 दिवसे व्व पयडसुहुमयरकीडिया-कुंथुसंचारे ॥६८३६॥  
 पफु(फ्फु)डियकुमुयसंडे निम्मलमणिकिरणपयडियपयत्थे ।  
 जाणिज्जइ जत्थ निसा संमीलियकमलसंडेहिं ॥६८३७॥  
 दीसंति जत्थ तरला दीवमिह्वासंकिणो पयंगोहा ।  
 पासेमु परिभमंता निवि(व्वि)ग्घं वियडरयणाण ॥६८३८॥



परमजोइस्स जोणी अलंघदुग्गं च तेयरासिस्स ।  
 सुरपासायदलानं एसा खाणि व्व वरदीवं ॥६८३९॥  
 दट्ठूण अभयचंदो दीवसिहं विविहवइयराइन्नं ।  
 संजायविम्हयरसो करेइ नाणाविहवियप्पे ॥६८४०॥  
 'दट्ठूण दीवमेयं केणाऽवि सुवियक्खणेण पुरिसेण ।  
 उप्पाइओ पवाओ बहुरयणा जं धरित्ति त्ति ॥६८४१॥  
 रयणोहपूरिएहिं वहणसहस्सेहिं जलहिफुट्ठेहिं ।  
 रयणायरो त्ति नामं संजायं तेण जलहिस्स' ॥६८४२॥  
 एवं सो अणुदियहं रयणपरिक्खाखमेहिं पुरिसेहिं ।  
 अच्चब्भुयरयणाइं उच्चिणावेइ विविहाइं ॥६८४३॥  
 भरियाइं जाणवत्ताइं तेण रयणाण बहुप्पयाराण ।  
 कारावइ सामग्गिं नियदेसाभिमुहगमणत्थं ॥६८४४॥  
 तो जत्थ किर निसाए पूरेयव्वाइं सव्ववहणाइं ।  
 तत्थेव खेत्तदेवयपूयत्थं सो समुत्तरइ ॥६८४५॥  
 तत्थेसो किर कप्पो एगागी नायगो कउववासो ।  
 उत्तरइ न उण अन्नो पायं पि ठवेइ तीरंमि ॥६८४६॥  
 अह जाव अभयचंदो वच्चइ थोवंतरं पुरो ताव ।  
 संपूइयखेत्तवई आइन्नइ सकरुणयं सहं ॥६८४७॥  
 रोवंतीए कीय वि जुवईए परमदुक्खदुहियाए ।  
 करुणपलावेहिं मणं दूमंतीए व्व कुमरस्स ॥६८४८॥  
 'हा नाह! हा गुणायर ! हा सूहव ! हा रसन्न ! हा वीर ! ।  
 सुविणंतरं व दाउं न याणिओ कत्थ वि गओ सि ॥६८४९॥

अवहीरिया तएऽहं आणीया एत्थ दुज्जणजणेहिं ।  
 ता नाह! कुण पसायं दंससु दीणाए अप्पाणं ॥६८५०॥  
 जइ वि तुमं निन्नेहो तह वि तुमं चेव मज्झ इह सरणं ।  
 दूरंतरिए सूरै अवस्स संमीलए नलिणी' ॥६८५१॥  
 इय एवमाइ विविहं कीय वि नारीए विलवियं सोउं ।  
 तेणाऽऽकरिसियहियओ परदुहदुहिओ गओ पुरओ ॥६८५२॥  
 जा जाइ ताव पेच्छइ धवलहरं सत्तभूमियं धवलं ।  
 तिस्सा करुणपलावेहिं कलुसियप्पा पुरो चडिओ ॥६८५३॥  
 तो सत्तमभूमीठियसेज्जाहररइयवियडपल्लंके ।  
 दिट्ठा सा वत्थंचलपच्छइयवयणतामरसा ॥६८५४॥  
 तो भणइ अभयचंदो 'काऽसि तुमं ? कत्थ संतिया एत्थ ? ।  
 एगागिणी केणत्थं रोवसि ? मह कहसु सव्वं पि' ॥६८५५॥  
 सा वि मणे इय चिंतइ 'कहेत्थ मणुयाण संभवो होही ? ।  
 ता को एसो रक्खो ? भूओ वा अह पिसाओ वा ? ॥६८५६॥  
 ता होइ सुंदरं चिय जइ एसो खाइ मं महापावं' ।  
 इय चिंतिऊण जंपइ 'रे रक्खस! भक्ख वेएण' ॥६८५७॥  
 तो भणइ अभयचंदो 'नाऽहं भूओ न रक्खस-पिसाओ ।  
 मणुओ म्हि वणिइजाई उज्जेणीकयनिवासो य ॥६८५८॥  
 सिरिवद्धणाओ पढमं कडाहदीवं समागओ तत्तो ।  
 इह रयणसिहे बहुवहणसंजुओ आगओ एण्ह' ॥६८५९॥  
 उज्जेणिकयनिवासो त्ति वयणामयं सुहारसमयं व ।  
 सोऊण सा वि फेडइ मुहाओ वत्थंचलं सहसा ॥६८६०॥

पेच्छइ अच्छेरयभूयरूव-लावन्न-जोव्वणारंभं ।

सहस त्ति अभयचंदं विहसंतमुही कुमुइणि व्व ॥६८६१॥

तेण वि सा सच्चविया निज्जियसुरलोयरूवरमणीया ।

आणंदबाहजलभरियनयणसंजायपुलएण ॥६८६२॥

‘स च्चिय एसा गुणचंद्राइणो जयसिरि त्ति जा धूया ।

इह कह वि देव्वपरिणामजोगओ आगया होही ॥६८६३॥

अहवा-वि न तीए सजीवियाओ अइवल्लहाए रायस्स ।

होही कहेत्थ आगमणसंभवो दूरदीवमि ॥६८६४॥

अहवा किं बहुएहिं वि निच्छयरहिएहिं मणवियप्पेहिं ? ।

एसा पुच्छिज्जंती संदेहं मज्झ अवणेही’ ॥६८६५॥

तो भणइ अभयचंदो ‘मा भाहि जहत्थमेव मह कहसु’ ।

तो जयसिरीए भणियं ‘अहं पि उज्जेणिवत्थव्वा’ ॥६८६६॥

‘सो चेय इमो अन्नो व्व कोइ तस्साणुसरिससुसरीरो’ ।

इय हरिस-विसायसमाउलाए मोणं पुणो विहियं ॥६८६७॥

‘लज्जिज्जइ तस्स पुरो अवलंबियधिद्धिमेहिं भणिउं पि ।

पुरिसंतरेण उ समं जंपंति न कुलपसूयाओ’ ॥६८६८॥

इयमाइबहुयमणउल्लसंतसंदिद्धिमणवियप्पाए ।

उभयपक्खेहिं तीए संवरिओ वयणवित्रासो ॥६८६९॥

तो भणइ अभयचंदो ‘अम्ह वहणाइं अज्ज रयणीए ।

वच्चिस्संति किसोयरि! ता चलसु नयामि उज्जेणिं’ ॥६८७०॥

पुण भणइ अभयचंदो ‘गुणचंदसुया न जयसिरी होसि ?’ ।

सा भणइ ‘अत्थि एवं’ पुण जंपइ अभयचंदो वि ॥६८७१॥

'ता कह न जाणसि ममं पुत्तं जसदेवसेट्टिणो देवि! ।  
 नामेण अभयचंदं इहागयं वणिजबुद्धीए ?' ॥६८७२॥  
 तो अन्नोन्नोलक्खणसंजायविणिच्छयाण दोहिं(ण्हं)पि ।  
 ना(आ)णंदविम्हयकया चित्तवियारा समप्पंति ॥६८७३॥  
 तो भणइ अभयचंदो 'एत्थाऽऽगमणं कहं तुह कहेसु ?' ।  
 सा भणइ 'गिहसुत्ता केण वि खयरेंण अवहरिया ॥६८७४॥  
 इह आणिरुण मुक्का विज्जासामत्थरइयभवणेण ।  
 सो अप्पणा उण गओ विवाहसामग्गियं काउं ॥६८७५॥  
 जइ कह वि सो इहेही पावो विज्जाहरो परमरोद्धो ।  
 ता मज्झ तुज्झ वि फुडं अवयरिही नत्थि संदेहो ॥६८७६॥  
 मह नाह! पयापूरणमेत्ताए होउ किं पि जं होइ ।  
 तुह उण तिहुयणदुलहस्स होउ मा विग्घलेसो वि' ॥६८७७॥  
 तो भणइ अभयचंदो 'जं जह होही तहेव तं काहं ।  
 एण्हिं चैव पयाणं काहामो चलसु वेगेण' ॥६८७८॥  
 घेत्तूण अभयचंदो जयसिरिदेविं सिरिं व पच्चक्खं ।  
 आरोहइ बोहित्थं तल्लाभुल्लसियआणंदो ॥६८७९॥  
 अह एगं कम्मयरं निययाउपरिक्खण तत्थ मयं ।  
 नेउं धवलहरंते गुरुकइचियाए पक्खित्तं ॥६८८०॥  
 मा कह वि कूरकम्मो विग्घं काहि ति खयरभीएण ।  
 अभयचंदेण एसो बुद्धिपवंचो कओ तस्स ॥६८८१॥  
 तो पूरियाइं जुगवं असेसवहणाइं तेण तुरियाइं ।  
 अणुकूलमारुएणं पत्ताइं कडाहदीवंमि ॥६८८२॥

तत्तो वि पुण कमेणं सिरिबद्धणपट्टणं च संपत्तो ।  
 तत्थागएण दिट्ठो जणओ नियपरियणसमेओ ॥६८८३॥  
 उत्तरइ अभयचंदो कुणइ पणामं पिउस्स पणयसिरो ।  
 पिउणा वि समवऊढो हरिसगलंतंसुनयणेण ॥६८८४॥  
 अन्नोन्नं कुसलोदंतपुच्छणेणं कुणंति आणंदं ।  
 अन्नोन्नदंसणेणं परिओसो ताण संजाओ ॥६८८५॥  
 तो भणइ अभयचंदो 'कुसलं गुणचंदराइणो ताय!' ।  
 सेट्ठी भणइ 'नरिंदो जयसिरिदुक्खेण अइदुहिओ' ॥६८८६॥  
 तो कहइ अभयचंदो नीसेसं जयसिरीए वुत्तंतं ।  
 संजायमहाणंदो सेट्ठी हिययंमि परितुट्ठो ॥६८८७॥  
 उत्तारिऊण तीरे करेइ रासीओ पव्वयसमाओ ।  
 रयणाण अभयचंदो पिउणो मणविग्घयकराओ ॥६८८८॥  
 तं सव्वं घेत्तूणं जयसिरिदेविं च अभयचंदं च ।  
 जसदेवो नियनयरं उच्चलिओ गरुयसत्थेण ॥६८८९॥  
 अणवरयपयाणयसयविलंघियासेसपुहइवित्थारो ।  
 पत्ता उज्जेणिपुरिं सव्वे वि अविग्घखलियेण ॥६८९०॥  
 तो विन्नायसरूवो गुणचंदो एइ अभयचंदस्स ।  
 पच्चोणिं पुरपरियणपरियरिओ सेन्नसंपन्नो ॥६८९१॥  
 महया संमहेणं परमविभूर्इए परमनेहेण ।  
 पइसारइ सेट्ठिसुयं सलहिज्जंतं पुरिजणेण ॥६८९२॥  
 तो सेट्ठि-अभयचंदे नियगेहं नेइ नरवई हिट्ठो ।  
 उचियपडिवत्तिपुव्वं समप्पए जयसिरिं धूयं ॥६८९३॥

पुण भणइ अभयचंदं 'कुमार! मा अन्नहा वियप्पेहि ।  
 तुह पुन्नपरिणईए संघडिया न उण अम्हेहिं ॥६८९४॥  
 नियपिउसिक्खविओ किर एयं चइऊण अइगओ दूरं ।  
 ता तत्थ चेव पत्ता जत्थ तुमं नियइ वसवत्ती ॥६८९५॥  
 नासंतस्स वि दूरं नरस्स धावंति पिड्डओ दोन्नि ।  
 अप्पडिहयपसराइं सुहासुहाइं चिरकयाइं ॥६८९६॥  
 तुम्हारिसाण का किर कुल-जाइवियारणा सुपुत्राण ।  
 रासीसु संकमंतो मेसाइसु दिणयरो पुज्जो' ॥६८९७॥  
 इय एवमाइ संबोहिऊण सुपसत्थदिवसलग्गमि ।  
 अइगरुयविभूर्इए कारावइ ताण वीवाहं ॥६८९८॥  
 वित्ते पाणिग्गहणे नीसेसजणस्स जणियअच्छरिए ।  
 निव्वत्तिएसु समुचिय-आयारेसुं च सव्वेसु ॥६८९९॥  
 तो तत्थ अभयचंदो जयसिरिदेवीए अणुवमे भोए ।  
 सह भुंजंतो अच्छइ देवो इव देवलोयंमि ॥६९००॥  
 एवं च जंति दियहा वच्चइ कालो सुहेण दोहिं(णहं) पि ।  
 उप्पन्नो कयपुत्रो जयसिरिदेवीए सुहपुत्तो ॥६९०१॥  
 तो जाइ अभयचंदो अन्नदिणे बाहिरंमि उज्जाणे ।  
 तस्संतरालमग्गे मयजुयइकडेवरं नियइ ॥६९०२॥  
 अवलोइऊण सो तं उव्वेवयरं सहावबीभच्छं ।  
 जुयइसवं संविग्गो सरूवपरिभावणं कुणइ ॥६९०३॥  
 'पेच्छह इमीए जे किर रागानलदीवणा पुरावयवा ।  
 ते च्चिय विरायमेण्हिं जणंति मूढाण वि नराण ॥६९०४॥

ओसूणसरीरत्तणपरियोसियअवयवा कहेइ व्व ।  
 एयसरूवस्स य जोव्वणस्स नणु वासणा भिन्ना ॥६९०५॥  
 सभयं समोयडंता इमीए सुणया वरं ससंकमणा ।  
 अवहीरियनरयभया नीसंका न उण कापुरिसा ॥६९०६॥  
 जस्स कए एयाए वि कयाइं देहस्स विविहपावाइं ।  
 सो एत्थ लुलइ सा उण अन्नत्थ सुहासुहर्गईए ॥६९०७॥  
 देहस्स कए जीवो करेइ नाणाविहाइं पावाइं ।  
 सो पुण पयइअसारो परिणइविरसो व्व एसो व्व ॥६९०८॥  
 न कुणंति सुया न कुणंति बंधवा न य कलत्त-मित्ताइं ।  
 विहडंतस्स खणेणं परिताणं हयसरीरस्स ॥६९०९॥  
 एएण सरीरेणं विहवेण य पयइविहडणपरेण ।  
 धम्मविणिओयणेणं दोहिं(ण्ह)वि साफल्लयं कुज्जा' ॥६९१०॥  
 इय एवमभयचंदो चितंतो जाइ बाहिरुज्जाणे ।  
 पेच्छइ फासुयवसुहापरिट्ठियं मुणिवरं एगं ॥६९११॥  
 तस्संते सोऊणं धम्मं तित्थयरभासियं परमं ।  
 पव्वइओ चइऊणं पुत्त-कलत्ताइ नीसेसं ॥६९१२॥  
 तो सो दुक्करतवचरणखीणदेहो विरायसंपत्तो ।  
 उप्पन्नो मरिऊणं ईसाणे सुरवरो पवरो ॥६९१३॥  
 जयसिरिदेवी वि तओ दइयविओएण जायसंवेगा ।  
 संतागणणिसमीवे पव्वइया कुणइ तवचरणं ॥६९१४॥  
 सा वि तहा मरिऊणं ईसाणे चेव तुह वरविमाणे ।  
 संजाया पुण भज्जा चिरभवनेहाणुबंधेण ॥६९१५॥

तो सुरलोए दोन्नि वि नियआउं भुंजिऊण अणुकमसो ।  
 चइऊण जंबुदीवे इहेव भरहे अओज्जाए ॥६९१६॥  
 सीहरहो नामेणं राया तत्थासि विजियपडिवक्खो ।  
 तस्सासि पिया भज्जा तेलोक्कसिरि त्ति नामेण ॥६९१७॥  
 ताण अन्नोन्नपवह्वियघणपेम्मपरव्वसाण दोहिं(दोण्हं)पि ।  
 विसयसुहासत्ताणं वच्चंति जहासुहं दियहा ॥६९१८॥  
 तो अभयचंददेवो ईसाणाओ चुओ य उववन्नो ।  
 तेलोक्कसिरीगव्भे सुहसुविणयसूइओ धन्नो ॥६९१९॥  
 निसि पच्छिमंमि जामे पेच्छइ सा सुमिणयं जहा इंदो ।  
 नियहत्थेण समप्पइ तेलोक्कसिरीए फलमेगं ॥६९२०॥  
 सा तक्खणे पबुद्धा साहइ दइयस्स सो वि वज्जरइ ।  
 'सक्केण देवि! दिन्नो कां वि सुरो तुह सुओ होही' ॥६९२१॥  
 तो सा पसत्थदियहे पसत्थसुहलक्खणेहिं संजुत्तं ।  
 पुन्निमनिसि व्व चंदं संपुन्नं पसविया पुत्तं ॥६९२२॥  
 तो सीहरहो राया वद्धावणयं करावइ पहिद्धो ।  
 बहुदास-दासि-पुरजण-परियणपरिवह्वियाणंदं ॥६९२३॥  
 तो अइगयंमि मासे सीहरहो विहियदेव-गुरुपूओ ।  
 पुत्तस्स कुणइ नामं पयडत्थं इंदत्तो त्ति ॥६९२४॥  
 पइदिणपयपाणपरंपराहिं तह कह वि वड्ढिओ जह सो ।  
 कप्पहुमो व्व जाओ जणस्स मणवंछियप्फलओ ॥६९२५॥  
 अहिगयकलाकलावो विन्नायासेससत्थपरिवारो ।  
 विन्नाणगुणनिहाणं पत्तो सो जाव्वणारंभं ॥६९२६॥



रूवेण लोयनयणे सुपरिद्वियभासिएण सवणे वि ।  
 सो हरइ वियङ्गाण वि हिययाइं गुणेहिं गरुएहिं ॥६९२७॥  
 तं किं पि तस्स जायं माहप्पं सयलतिहुयणब्भहियं ।  
 जं वाल-मुख-पंडिय-जुयइजणाणं पि मणहरणं ॥६९२८॥  
 इय जम्मंतरकयसुकयपुन्नसंपाइयाइं भुंजंतो ।  
 सोक्खाइं इंददत्तो गयं पि कालं न याणेइ ॥६९२९॥  
 सो सब्वत्थ पसिद्धो सवक्ख-पडिवक्खरायभूमीसु ।  
 सल्लइ पडिवक्खाणं तिरिच्छसल्लं व हियएसु ॥६९३०॥  
 तह मित्तमंडलस्स य पडिहयरिउमेहडंवावरणो ।  
 सरओ व्व इंददत्तो गरुयं परिवह्णइ पयावं ॥६९३१॥  
 अह अन्नदिणे अत्थाणमंडवत्थस्स सीहरायस्स ।  
 उवविट्ठमि य पुरओ इंददत्तमि पियपुत्ते ॥६९३२॥  
 अन्नसु वि मंतिमहंतएसु सामंत-मंडलीएसु ।  
 कयसंवजलिवंधेसु रायपासोवविट्ठेसु ॥६९३३॥  
 एत्थंतरमि दूओ समागओ गौडदेसरायस्स ।  
 नीमंसमहीवइणो महिंदपालस्स वारंमि ॥६९३४॥  
 पडिहारसमाइट्ठो रायाणुमईए तत्थ संपत्तो ।  
 कयरायपयपणामो उवविट्ठो भणिउमाढत्तो ॥६९३५॥  
 'तुह देव! पयावइणो व्व जायवहुगुणपयाहिरावस्स ।  
 मन्ने हुयं न होही कुमारसरिसं पयारयणं ॥६९३६॥  
 गयणं व तुमं पि नरिंद! होसि तेयंसियाण आवासो ।  
 किं तु न सूरसमाणो हयन्नतेओ त्थि तेयस्सी ॥६९३७॥

किं वन्निज्जइ रयणायरस्स इह ? किं तु तस्स वि न जायं ।  
 पुरिसोत्तिमहिययत्थं व कोत्थुहाओ परं रयणं ॥६९३८॥  
 ता देव ! पलविएणं किं बहुणा एत्थ कज्जरहिएण ? ।  
 एएण सुएण तुमं सकयत्थो रिउअसज्जो य ॥६९३९॥  
 ता देव! तुह सयासे महिंदपालेण पेसिओ अहयं ।  
 कज्जेण जेण तं पि य साहिज्जंतं निसामेहि ॥६९४०॥  
 सयलंतेउरपमुहा विणयवई नाम भारिया तस्स ।  
 जीयं व परमइड्ढा महिंदपालस्स सुकुलीणा ॥६९४१॥  
 तीसे उयरुप्पत्रा महिंदलच्छि त्ति कन्नया सगुणा ।  
 जिस्सा रूवं जायं उवमाणं देवलोयंमि ॥६९४२॥  
 तीए कयाइ नरेसर! इंददत्तस्स निम्मलगुणोहं ।  
 तद्देसागयबहुबंदिलोयवयणाउ किर निसुयं ॥६९४३॥  
 तो तद्वियहाओ च्विय तग्गुणसवणेक्कबद्धचित्ताए ।  
 मोत्तूण इंददत्तं न अन्नपुरिसो मणे ठाइ ॥६९४४॥  
 चित्तंमि चित्तकम्मे कव्वपवंधंमि गुणिजणकहासु ।  
 अन्नेसु वि वावारेसु नायगो तीए तुह पुत्तो ॥६९४५॥  
 तो धूयामणभावं नाऊण सहीमुहेहिं विणयवई ।  
 विन्नवइ महारायं इंददत्तस्स दाणत्थे ॥६९४६॥  
 नरवइणा वि य भणियं 'ठाणे च्विय देवि ! तीए अणुराओ ।  
 आरुहउ कप्पलइया भुवण(णु)वयारंमि कप्पदुमे' ॥६९४७॥  
 तो देव! अहं आलोच्चिरुण सहमंति-बुद्धिमंतेहिं ।  
 धूयादाणनिमित्तं नरवइणा पेसिओ एत्थ ॥६९४८॥

संपइ तुमं पमाणं' भणिउं तुण्हिक्कओ ठिओ दूओ ।  
 सीहरहो वि य राया पुण एवं भणिउमाढत्तो ॥६९४९॥  
 'इह दूय! सयं घिय संघडंति पुव्वज्जिएहिं सुकएहिं ।  
 भज्जा विज्जा अत्थो नेहो तह दोक्ख-सोक्खाइं ॥६९५०॥  
 तो को न मन्नइ इमं महिंदपालेण जोणिसंबंधं ? ।  
 किं तु न पेसेमि सुयं स च्चेय सयंवरा एउ' ॥६९५१॥  
 तो भणइ पुणो दूओ 'मा धरसु मणंमि पुव्ववयराइं ।  
 तुहपुत्तभउब्भंतं भुयणं निदा(द्वा)इ न सुहेण ॥६९५२॥  
 जाव न उएइ सूरु जयंमि ता चेव पसरइ तमोहो ।  
 न तमो न य तेयस्सी उम्मीलइ संभवे तस्स' ॥६९५३॥  
 इय एवमाइ बहुविहनाणादिट्ठंत-हेउ-जुत्तीहिं ।  
 संबोहिऊण रायं मन्नावइ सव्वकज्जाइं ॥६९५४॥  
 तो सोहणंमि दिवसे बहुसेन्नसमूहपरिगयं काउं ।  
 पट्टवइ इंदवत्तं वीवाहत्थंमि रायगिहे ॥६९५५॥  
 अणवरयपयाणेहिं रायगिहं पुरिवरं च संपत्तो ।  
 नीसेसं नियसेन्नं मोत्तूण सदेससीमाए ॥६९५६॥  
 तो कइवयतुरियतुरंगमेहिं गुरुवेयविंदनिवहेहिं ।  
 सुहडेहिं रहवरेहिं य परियरिओ विसइ रायगिहं ॥६९५७॥  
 सोऊण तयागमणं महिंदपालो वि सव्वरिद्धीए ।  
 कयनयरगुरुपमोओ पवेसइ परमसोहाए ॥६९५८॥  
 सीहरहो उण राया सुयविरहविसेसदुब्बलसरीरो ।  
 तं चेव मणे ज्ञायइ तव्विसयकहाहिं य रमेइ ॥६९५९॥

न य कोइ एइ तत्तो जो कुसलं कहइ इंदवत्तस्स ।  
 सासंकमणो चिद्धइ चिरवैरविहावणुत्त(त्त)त्थो ॥६९६०॥  
 एवं जा सीहरहो अवसेरिं कुणइ इंदवत्तस्स ।  
 ता अत्थाणे पत्तो सहसा लेहारिओ एगो ॥६९६१॥  
 धूलीधूसरियंगो सीयायवदद्धथाणुसमदेहो ।  
 अइमलिणवसणधारी कक्खाकयलेहपोत्तो य ॥६९६२॥  
 नामेण वाउमित्तो काऊण पणाममवणिनाहस्स ।  
 उवविसइ सायरेणं नरवइणा पुच्छिओं वत्तं ॥६९६३॥  
 'रे वाउमित्त! साहसु कुसलं पुत्तस्स सपरिवारस्स ।  
 किं कज्जमाउरो विय(व) दीससि ? मह कहसु वेगेण' ॥६९६४॥  
 तो भणइ वाउमित्तो 'कुसलं कुमरस्स सपरिवारस्स ।  
 किं तु गौडाहिवेणं न सम्ममणुचिद्धियं कुमरे ॥६९६५॥  
 कुमरेण देव! पढमं सदेससीमाए ठावियं सेन्नं ।  
 परिमियपरिग्गहेणं रायगिहं तयणु संपत्तो ॥६९६६॥  
 तो तेण गौडराएण देव! जं किं पि होइ कायव्वं ।  
 तं नीसेसं विहियं उचियं सिरिइंदवत्तस्स ॥६९६७॥  
 तो सोहणंमि दियहे पसत्थतिहि-करण-वार-लग्गंमि ।  
 वीवाहो वि य विहिओ महिंदसिरि-इंदवत्ताण ॥६९६८॥  
 कयमुचियं कायव्वं अणुद्धिया जाइ-कुलसमायारा ।  
 वीवाहत्थं आया सामंताई य पड्डविया ॥६९६९॥  
 अह अन्नदिणे राया एगंते सयलमंतिवग्गेहिं ।  
 विन्नतो(त्तो) 'देवेसो इंदवत्तो महासत्तु ॥६९७०॥

भूवलयपरक्कमजुओ ववसाई गरुयनिगयपयावो ।  
 एगसीमो य नरवर! उवेक्खणीओ न सो होइ ॥६९७१॥  
 ता देव! एत्थ एसो तुम्ह सुसज्झो न अब्रदेसंमि ।  
 इय भाविऊण चित्ते जं उचियं तं समायरह ॥६९७२॥  
 एएण पुण अवस्सं तुम्हे उम्मूलिऊण अचिरेण ।  
 एगच्छत्ता धरणी भोत्तव्वा विक्कमहेण' ॥६९७३॥  
 जंपइ महिंदपालो 'न एयमुचियं कुलप्पसूयाण ।  
 अब्रो वि वइरिओ नणु होइ अवज्झो चरे आओ ॥६९७४॥  
 एसो पुण आहूओ दूअं संपेसिऊण जामाऊ ।  
 वीससिओ गुणगरुओ अदिट्ठवंकत्तणो सुयणो ॥६९७५॥  
 ता नणु अदिट्ठदोसो अप्पयडियदुट्ठमणवियारंमि ।  
 कह कीरइ अवयारो इमंमि रे मंतिणो ! एण्हि ?' ॥६९७६॥  
 तो भणइ सुमइनामो मंती 'नरनाह! सुणसु मह वयणं ।  
 रज्जं हि नाम विसमं दुप्परियण्णं कुबुद्धीण ॥६९७७॥  
 वेसाण जोव्वणं पिव अहिलसणीयं न कस्स किर रज्जं ।  
 बहुसप्पमंदिरं पिव सभयावासं भवे एयं ॥६९७८॥  
 सकलत्तं पिव एयं अइविविहपयत्तरक्खणीयं च ।  
 होइ अविस्ससणीयं वेरीयणसंगयं च इमं ॥६९७९॥  
 वस्सिदिएहिं एयं भुंजेयव्वं सओवउत्तेहिं ।  
 मारइ अप्पाणं चिय रज्जं अजिन्नं व विवरीयं ॥६९८०॥  
 इह अप्प-परविभागो जईण राईण होइ न कयाइ ।  
 कज्जावेक्खाए जओ अप्प-परत्तं नरिंदाण ॥६९८१॥

कायव्वं दोजन्नं अप्पमि वि जाव किं न परलोए ? ।  
 छिंदंतो जियइ चिरं अहिदट्टं चिय सरीरं पि ॥६९८२॥  
 सोजन्नं पि हु मारइ नरिंद! विहियं अदेसकालंमि ।  
 संभाविज्जइ निययं अप्पा वि हु सन्निवायहओ ॥६९८३॥  
 मारिही पमुहमहुरं परिणामविवायदारुणसहावं ।  
 दूरे परिहरियव्वं किंपागफलं रिउकुलं च' ॥६९८४॥  
 इय एवमाइदिट्टंत-हेउ-नय-जुत्ति-नीइसारेहिं ।  
 वयणेहिं नरवरिंदो पबोहिओ सुमइनामेण ॥६९८५॥  
 एवं च तेहिं कुमरस्स घायणत्थं निगूढभावेहिं ।  
 परिचिंतिया विचित्ता कूरोवाया किलिट्ठेहिं ॥६९८६॥  
 तो देव! महिंदसिरीए अत्थि नामेण मयणमंजूसा ।  
 बीयं व जीवियं सा पसायठाणं पिया दासी ॥६९८७॥  
 सो तीए सुमइनामो मंती भवि[य]व्वयानिओएण ।  
 दढमासन्नो(त्तो) अणुरायनिब्भरो कहइ नीसेसं ॥६९८८॥  
 जं जह जइया होही जं जत्थ दिणंमि होइ कायव्वं ।  
 तं तह सुमई साहइ मयणसंजूसनामाए ॥६९८९॥  
 सा वि असेसं नरवर ! महिंदलच्छीए कहइ तक्कुहियं ।  
 सा वि पइचलणभत्ता साहइ सिरिइंददत्तस्स ॥६९९०॥  
 कुमरो वि इंददत्तो विन्नायासेसदुडुववहरणो ।  
 पयईए दक्खचित्तो न छलिज्जइ कह वि वेरीहीं(हिं) ॥६९९१॥  
 तो कहइ महिंदसिरी 'अज्ज तुमं देव! वाहरिज्जिहसि ।  
 बहिरुज्जाणपरिट्ठियगुरुमंडवमज्झयारंमि ॥६९९२॥

तायस्स वामभागे तुज्झ निमित्तं च आसणं ठवियं ।  
 तस्स अहो उण रइया जलंतखइरानला खाई' ॥६९९३॥  
 तं सोऊण कुमारो अलक्खहिंयओ य सद्धिओ बाहिं ।  
 उज्जाणे संपत्तो पुव्व(व्वु)वविट्ठे नरिंदंमि ॥६९९४॥  
 तो आगयंमि कुमरे महिंदपालो भणेइ 'उवविसह' ।  
 तो छीयं सोऊणं परिहरइ तमासणं कुमरो ॥६९९५॥  
 सो दियहो वोलीणो अन्नदिणे विरइयं पुणो कवडं ।  
 दस घायगा निउत्ता ते वि निसिद्धा कुमारेण ॥६९९६॥  
 अह अन्नदिणे भीया कुमरस्स निवेयए महिंदसिरी ।  
 'अन्नो कओ उवाओ तुह घायत्थं अपडियारं ॥६९९७॥  
 पिय! पंचमंमि दिवहे ताओ वच्चिहइ बाहियालीए ।  
 विवरीयसिक्खतुरयं दासी तुह वाहणनिमित्तं ॥६९९८॥  
 तेण तुमं अवहरिओ खिप्पिहसि अरन्नमज्झयारंमि ।  
 तत्थ वि नीसेसं चिय नियसेन्नं राइणा ठवियं ॥६९९९॥  
 पडिओ सि ताण मज्झे तेहिं समं तुज्झ उत्थरेऊण ।  
 तं कायव्वं जं किर ताणं चिय मत्थए पडिही ॥७०००॥  
 ता एयं नाऊणं जं उचियं होइ तं सयं कुणसु' ।  
 तो भणेइ इंदवत्तो 'उवट्ठिओ सुंदरो मंतो' ॥७००१॥  
 तो तक्खणेण कुमरो सीमासंधीए निययदेसस्स ।  
 पच्चइयआसवारे किंचि कहेऊण पेसेइ ॥७००२॥  
 तो तंमि दिणे कुमरो आहूओ आसवाहणिनिमित्तं ।  
 हिययट्ठियनियमंतो बाहियालिं गओ तुरियं ॥७००३॥

नियपरियणं निरूवइ 'देविं घेत्तूण जाह तुब्भे वि ।  
 जत्थच्छइ रिउसेन्नं सवियक्का सावहाणा य' ॥७००४॥  
 वाहइ महिंदपालो तुरए नाणाविहे कुमारो वि ।  
 तह देव ! जच्च-वोल्लाह-तुरग-कंबोय-बल्हीए ॥७००५॥  
 तो विवरीयं तुरयं कुमारचडणाय आणियं तत्थ ।  
 तं दट्ठूण कुमारो आरुहइ गरुयवेएण ॥७००६॥  
 सो तेण विविहभांवरिकमेण तुरओ पवाहिओ बहुयं ।  
 दाउं कसप्पहारं पुण मुक्को वेयबुद्धीए ॥७००७॥  
 तुरएण हीरमाणो पेच्छइ कुमारो वि उभयपासेसु ।  
 पच्छाहुत्तं वसुहं पधावमाणं च वेयवसा ॥७००८॥  
 तो जा दिणस्स पच्छिमपहरद्धे जाइ रत्तमज्झंमि ।  
 ता कुमरवलेण हयं महिंदपालस्स गुरुसेन्नं ॥७००९॥  
 उद्दालियमत्तगयं निल्लूडियतुरय-रहसमुग्घायं ।  
 दोखंडियसुहडजणं अणंतरोयंतनारिजणं ॥७०१०॥  
 तो तं तहासरूवं पेच्छंतो रिउबलं हयपयावं ।  
 नियसेन्नसमूहेणं कुमारो पडिगाहिओ तुरियं ॥७०११॥  
 इयरो वि य परिवारो महिंदसिरिसंजुओ असेसो वि ।  
 निवि(द्वि)ग्घं संपत्तो इंददत्तस्स पासंमि ॥७०१२॥  
 तो असमत्थं लोयं पेसइ नियदेससम्मुहं कुमारो ।  
 विग्गहबुद्धीए सयं रायगिहं वेढइ बलेहिं ॥७०१३॥  
 हयविप्पहयं काउं दुग्गं सो भंजिऊण ससुरं पि ।  
 घेत्तूण करे पच्छा मं पेसइ तुम्ह पासंमि ॥७०१४॥



तो तव्वयणायन्नण-दूरसमुल्लसियपहरिसो राया ।  
 अहिणंदइ नियपुत्तं परोक्खगुणवायगहणेण ॥७०१५॥  
 तो राया पडिपेसइ तुरियं आलोचिऊण मंतीहिं ।  
 'तुह दंसणउक्कुंढाए पुत्त! पज्जाउलो अहयं' ॥७०१६॥  
 इयमाइ जंपिऊणं वाउमित्तं पुणो वि पळ(डु)वइ ।  
 अणवरयपयाणेहिं सो वि गओ कुमरपासंमि ॥७०१७॥  
 तो पिउणो आएसं सोऊणं अकयचित्तसंकप्पो ।  
 ठविऊण गौडदेसे नियसेणानायगं भीमं ॥७०१८॥  
 अणुसंख्खिऊण देसं पडिकूलजणं च तत्थ फेडेइ ।  
 हंतूण कुल्लवग्गं समागओ जणयपासंमि ॥७०१९॥  
 तो नरवइणा पुत्तागमंमि संजायगुरुपमोएण ।  
 काराविओ महंतो महोच्छवोऽओज्झनयरीए ॥७०२०॥  
 पणमइ पणमंतमहिंदलच्छिसहिओ पिउस्स पयकमलं ।  
 पिउणा वि सुहासीसाहिं दो वि अभिणंदियाइं च ॥७०२१॥  
 कयसयलोच्चियकज्जो परिओसियपउरपरियणजणो य ।  
 संपूइयगुरु-देवो निकं(क्कुं)टियमहियलाभोओ ॥७०२२॥  
 पसरंतन्नोन्नघणाणुरायसंघडियनिविडनेहाण ।  
 लोयाण सलहणिज्जं विसयसुहं ताइं भुजंति ॥७०२३॥  
 अदिडुविप्पियदुहं अनायईसा-विसायदोसं च ।  
 अकयपडिकूलभावं निव्वूढं ताण थिरपिम्मं ॥७०२४॥  
 समजाइ-कुलं समगुणगणं च समनेह-समसुह-दुहं च ।  
 समरूव-जोव(व्व)णं पि य मिहुणं पुत्रेहिं संघडइ ॥७०२५॥

१. असमर्थजनवर्ग, खंता. टि. (?) ॥

ते सुहमय व्व अहवा अणुरायमय व्व अमयघडिय व्व ।  
 वचनंति ताण वियहा महिंदसिरि-इंददत्ताण ॥७०२६॥  
 अह अन्नदिणे कुमरो गवक्खए जाव अच्छइ निसन्नो ।  
 ता भिक्खाए पविट्ठं पेच्छइ मुणिजुगलयं एयं ॥७०२७॥  
 पुरओ निविट्ठदिट्ठिं पयपयएक्कग्गखित्तमण-नयणं ।  
 मलमलिणसव्वगतं किडिकिडिजंतट्टिसंघायं ॥७०२८॥  
 अइनिव्वियारदंसणपयडमुणिज्जंतउवसमसरूवं ।  
 उवसमसरूवपिसुणियनिव्विसयकसायभावं च ॥७०२९॥  
 अकसायभावसाहियखम-मद्वव-अज्जवाइसब्भावं ।  
 सब्भावणापयासियअणिच्चयामाइभवभावं ॥७०३०॥  
 भवभावणाविहावियसंसारसरूवपरमवेरगं ।  
 वेरगं वसवियंभियसमहियसंवेगसुविसुद्धं ॥७०३१॥  
 सुविसुद्धनाण-दंसणचारित्तपवित्तसंतसुहमुत्तिं ।  
 सुहमुत्तिदंसणेण वि असेसजणनिहयपावोहं ॥७०३२॥  
 तं दट्ठूण कुमारो अंतोपवियंभमाणसुहभावो ।  
 उल्लसियहरिसपसरो मुणिजुयलं सलहइ मणंमि ॥७०३३॥  
 'धन्ना एए मुणिणो असारसंसारसुहविरत्ता जे ।  
 मोक्खेक्कबद्धचित्ता तवेण तोलंति अप्पाणं ॥७०३४॥  
 एयाण कयत्थाणं कम्मक्खयकयसहावभावेण ।  
 देहंमि नीवियंमि य धलामेज्जम्मंमि(?) बहुमाणो ॥७०३५॥  
 गुणवुट्ठिपयट्ठाणं दूरं परिहरियदोसहेऊण ।  
 ठाहेंति केत्तिं किर दोसा एयाण गरुया वि ॥७०३६॥

खीणत्तं पि हु सोहइ अंतोनिक्कलुसयाए साहुस्स ।  
 न उण पयासियकलुसं संपुत्रंगं ससिस्सेव' ॥७०३७॥  
 इय एवमाइ मुणिगयगरुयगुणभावणाए सुद्धप्पा ।  
 जा अच्छइ ता सहसा पेच्छइ लोयं समुच्चलियं ॥७०३८॥  
 सविसंसकयविभूसं बहुविहपूओवगरणहत्थं च ।  
 तग्गुणकहाणुलग्गं पमोयसंजायपुलयं च ॥७०३९॥  
 दट्ठूण इंददत्तो लोयं नयरीओ वाहिरुच्चलियं ।  
 पुच्छइ नियपडिहारं 'कत्थेसो चल्लिओ लोओ ?' ॥७०४०॥  
 भणियं पडिहारेणं 'देवेसो पत्थिओ जणो बाहिं ।  
 रविचंदसूरिपासे वंदणभत्तीए तस्सेय' ॥७०४१॥  
 तो भणइ इंददत्तो 'जइ एवं ता पयट्टह तुरंता ।  
 अम्हे वि तत्थ जामो मुणिदपयवंदणं काउं' ॥७०४२॥  
 तो सो कलत्त-पिउ-माय-बंधुपरिवारसंजुओ चलिओ ।  
 रविचंदघरणवंदणबुद्धीए विसुद्धपरिणामो ॥७०४३॥  
 पत्तो गुरुस्स पासं पणमइ भत्तीए जायरोमंचो ।  
 गुरुणा वि धम्मलाहं दाऊण अणुसासिओ विहिणा ॥७०४४॥  
 तो पारद्धा गुरुणा जलहरगंभीरधीरसद्धेण ।  
 सोउं सम्मुज्जयाए असेसपरिसाए धम्मकहा ॥७०४५॥  
 'जीवाण भवसमुद्धे परिब्भमंताण कम्मवसगाण ।  
 नीसेसं चिय दुक्खं सोक्खं पुण वासणाजणियं ॥७०४६॥  
 सो वि य चउप्पयारो संसारो होइ गइविभेण ।  
 नरय-तिरियं च नर-सुरगईओ पुण हांति चत्तारि ॥७०४७॥

महु-मज्ज-मंसनिरया कूरमणा बहुपरिग्गहारंभा ।  
 पाणिवहंमि पसत्ता परध्वण-परनारिलुद्धा य ॥७०४८॥  
 इयमाइ दोसकलिया जीवा कंदुज्जएण मग्गेण ।  
 वच्चंति महानरए भीसणबहुपउरदुक्खंमि ॥७०४९॥  
 जं जेण पुव्वजम्मे नीसंकमणेण सेवियं पावं ।  
 तं सो बहुप्पयारं नेरइओ सहइ नरयंमि ॥७०५०॥  
 तत्थ य छिंदण-भिंदण-उक्कत्तण-कुंभिपाय-करवत्ते ।  
 असिपत्तवणपवेसं वेयरणीतरणमाईयं ॥७०५१॥  
 'तुह इट्ठयरं मंसं' इय भणिउं तस्स नरयवालेहिं ।  
 तम्मंसमेव छुब्भइ मुहंमि विरसं रसंतस्स ॥७०५२॥  
 'रे पाव! तुज्झ पुव्विं मज्जरसो वल्लहो तओ एण्हिं ।  
 तव्वण्णं पिय सुबहुं उक्कट्ठियं तत्तंतंवरसं' ॥७०५३॥  
 'पाणिवहफलं भुंजसु' इय भणिउं तेहिं असुरपुरिसेहिं ।  
 दससु वि दिसासु खिप्पइ खंडाखंडीकरेऊण ॥७०५४॥  
 'पेसुन्नं जंपंतो तस्सेयं फलमुवट्ठियं पाव !' ।  
 इय कट्ठिज्जइ असुरेहिं तस्स जीहा रसंतस्स ॥७०५५॥  
 'परदव्वमवहरंतो' त्ति गरुयबहुठिंककंकाएहिं ।  
 तस्स दिट्ठचंचुसंपुडघाएहिं विलुप्पए अंगं ॥७०५६॥  
 'परनारिमहिलसंतो' त्ति तेहिं असुरेहिं लोहमयनारिं ।  
 पजलंतजलणभीमं अवगूहाविज्जइ रुयंतो ॥७०५७॥  
 इयमाइ पावजीवा निसुयं चिय जणइ जं मणुव्वेवं ।  
 तं बहुसागरदीहं नरयगईए सहंति दुहं ॥७०५८॥

उम्मग्गदेसणरया गूढमणो(णा) माइणो ससल्ला य ।  
 इयमाइनिमित्तेहिं जीवा पाविति तिरियगयिं ॥७०५९॥  
 आरोवियबहुभारो न तरइ गंतुं पयं पि खरगोणो ।  
 कुट्टिज्जंतो उट्टो विरडइ अइनिग्घिणनरेहिं ॥७०६०॥  
 ओसूणखंधवणनीहरंतरुहिरो सहेइ बलिवद्धो ।  
 जुत्तो सगडे दुक्खं आरपहारेहिं हम्मंतो ॥७०६१॥  
 तण्हा-सुहाकिलंता दुब्बलदेहा य रोगिणो तिरिया ।  
 सीउण्हइडिकिलंता सहंति विविहाइं दुक्खाइं ॥७०६२॥  
 पयईए तणुकसाया दाणपरा सील-संजमविहीणा ।  
 मज्झत्थगुणा जीवा मणुयगयिं भद्दया जंति ॥७०६३॥  
 वस-मंस-रुहिर-फोफस-अमेज्झ-बहुमुत्तगब्भवसहिंमि ।  
 वसिऊण नरयतुल्ले मंसपिंड व्व जायंति ॥७०६४॥  
 बहुमुत्तासुइमज्झे रमंति धूलीए धूसरसरीरा ।  
 पत्ता जीव्वणभावं कामुम(म्म)त्ता परियडंति ॥७०६५॥  
 ईसा-विसाय-मच्छर-पेसुन्न-पराहवाइं दुक्खाइं ।  
 दारिद्धिद्विओया अणिद्वजोगा य रोगा य ॥७०६६॥  
 पावेंति विद्धभावे मणुया दुक्खं जराए जज्जरिया ।  
 वलिपलियदंतवडणं अंधत्तं बहिरभावं च ॥७०६७॥  
 नियपरियणपरिभूया कलत्त-पुत्तायएहिं अवगणिया ।  
 अज्जंति अट्टरोद्धेहिं बहुविहं पावपब्भारं ॥७०६८॥  
 इयमाइ बहुप्पयारं जीवा मणुयत्तणे वि अइभीमं ।  
 पावंति महादुक्खं पुव्वज्जियपावसंभूयं ॥७०६९॥

सम्मदंसणजुत्ता बालतवा अ(5)णुव्वयाइगुणकलिया ।  
 वच्चंति सुरगयिं ते अकामनिज्जरियकम्मा य ॥७०७०॥  
 ईसा-विसाय-मच्छर-सुरपरिभव-पेसणापरायत्ता ।  
 देवत्तणे वि जीवा पावंति दुहाइं विविहाइं ॥७०७१॥  
 इट्ठविओयमहादुहहुयवहसंतावतावियसरीरा ।  
 कम्मायत्ता जीवा अणिट्ठजोवं पि पावंति ॥७०७२॥  
 जं पुण चवणावसरे दुक्खं देवाण जायइ महंतं ।  
 तं नरयाओ वि अहियं सुरलोयविओयसंभूयं ॥७०७३॥  
 इय चउगइसंसारे न किं पि परमत्थओ सुहं अत्थि ।  
 नियवासणाए ताणं दुक्खं पि सुहं व पडिहाइ ॥७०७४॥  
 जह जायनयणतिमिरा ससिबिंबदुगं नियंति एगं पि ।  
 तह मोहतिभिरमूढा संसारसुहं पवज्जंति ॥७०७५॥  
 धुत्तीरयरसमूढा हेमं पिव पत्थरं पि मन्नंति ।  
 तह मोहमूढमइणो संसारसुहं सुहं बेत्ति ॥७०७६॥  
 इह के वि मुणंता वि य असारसंसारविरसववहारं ।  
 काऊण गयनिमीलं विसयसुहे चेव रज्जंति ॥७०७७॥  
 ते हरिणग व्व दीणा मच्चुं वाहं व अकयपडियारा ।  
 पेच्छंता वि समीवं निरुज्जमा पुण विणस्संति ॥७०७८॥  
 ता लद्धूण दुलंभं मणुयत्तं धम्मकज्जकरणखमं ।  
 संसारुच्छेयकरे जिणधम्मे आया(य)रं कुणह' ॥७०७९॥  
 इय भगवया पभणियं सोउं पुण भणइ इंददत्तो वि ।  
 'इच्छामो अणुसट्ठिं सच्चमिणं भगवया भणियं ॥७०८०॥

भयवं ! तुह परमत्थं वयणं सोऊण अवितहसरूवं ।  
 एण्हि मज्झ वि जाओ असारसंसारनिव्वेओ ॥७०८१॥  
 भवभावविरत्ताण वि न होइ मणवंछियत्थसंपत्ती ।  
 जाव न लब्भंति जए सुहगुरुणो तुम्ह सारिच्छा ॥७०८२॥  
 ता मह भयवं ! जइ अत्थि जोग्गया अह पसायबुद्धी वि ।  
 दुक्खत्तयरं(?) ता देह मज्झ मुणिनाह! पव्वज्जं ॥७०८३॥  
 तो भणियं पुण गुरुणा 'जहासुहं मा करेह पडिबंधं ।  
 भुयणोवयारकरणे अम्हाण वि एस वावारो ॥७०८४॥  
 तो इंदत्तकुमरो महिंदलच्छी य दो वि विहिपुव्वं ।  
 आपुच्छिऊण जणयं कयजिणहरपूयकम्माइं ॥७०८५॥  
 तो सुपसत्थदियसे अज्झवसाएण सुज्झमाणेण ।  
 रविच्चंदगुरुसगासे पव(व्व)ज्जं अह पवज्जंति ॥७०८६॥  
 अब्भसियसाहुकिरिओ अहिगयनीसेससुत्तसारत्थो ।  
 विविहतवसुसियदेहो रागदोसेहिं प(पा)मुक्को ॥७०८७॥  
 पंचमहव्वयधारी इरियासमियाइपंचसमिइजुओ ।  
 छव्विहजीवाण हिओ सत्तभयट्ठाणप(पा)मुक्को ॥७०८८॥  
 अट्टमयनिग्गहपरो अविकलनव-बंधगुत्तिसंजुत्तो ।  
 दसविहधम्मज्ज(ज्जु)त्तो गुरुसहिओ विहरइ महीए ॥७०८९॥  
 विविहतवसुसियदेहो नाणाभिग्गहविसेसतुलियप्पा ।  
 सुहभावणसुद्धप्पा अवसेसियदुद्धकम्मंसो ॥७०९०॥  
 काऊण सुचिरकालं अइदुक्करदुद्धरं तवच्चरणं ।  
 नाऊण आउसेसं सम्मं संलेहए अप्पं ॥७०९१॥

नियआउयक्खएणं अणसणविहिणा य सुद्धपरिणामो ।  
 पाओवगमणपुब्बं पाणच्चायं च सो कुणइ ॥७०९२॥  
 कयपाणपरिच्चाओ मरिऊणं अच्चुयंमि सुरलोए ।  
 बावीससागराऊ महिंदलच्छीए सह जाओ ॥७०९३॥  
 तत्थ वि भोत्तूण सुहं निरंतरं सागराइं बावीसं ।  
 पज्जंते पुण जायाइं ताण किर चवणलिंगाइं ॥७०९४॥  
 चइऊण अच्चुयाओ उप(प्प)न्नो एत्थ चंपनयरीए ।  
 सिरिसूरसेणपुत्तो सिंगारवईए गब्भंमि ॥७०९५॥  
 एसा वि य चंदसिरी नासिक्कपुरे विचित्तजसधूया ।  
 चंदप्पहपयपूयापसायओ विजयवईए वि ॥७०९६॥  
 कोहंडिपसाएणं उप(प्प)न्ना राय ! तुम्ह कुलपंती ।  
 एत्तो उद्धं सयलं पच्चक्खं राय! तुह चरियं ॥७०९७॥  
 ता किर एयं भणिमो सत्तइभवेसु जाइं भुत्ताइं ।  
 सोक्खाइं देव-मणुयत्तणेसु अविओयसाराइं ॥७०९८॥  
 एसा तुह चंदसिरी गुणरायभवाओ वीर! आरंभ(आरब्भ) ।  
 सत्तसु भवेसु भज्जा अच्चुयकप्पंमि मित्तो य ॥७०९९॥  
 अन्नोन्नभवपवड्ढियअहियाहियगुरुसिणेहसुहियाण ।  
 अहिययरो च्चिय वड्ढइ मयणो वड्ढंतनेहेण ॥७१००॥  
 जह वीरसेण ! जलणो अहिययरं जलइ इंधणेहिंतो ।  
 इंधणहीणो सो च्चिय विज्झायइ कारणविहीणो ॥७१०१॥  
 गयणाओ घणविमुक्कं अणेयसरियामुहाओ वसुहाए ।  
 जलहिंमि जलं पविसइ न तिप्पए तह वि सो तेण ॥७१०२॥



तह राय! एस मयणो सेविज्जंतो नरेहिं अणुसमयं ।  
 अहियरो च्चिय वड्ढइ अविवेयपवड्ढिओच्छाहो ॥७१०३॥  
 धम्माणुद्धाणं च्चिय होइ फलं वीर! वरविवेयस्स ।  
 जिणधम्मपहावेणं सव्वं चिय तुज्झ संपडिही ॥७१०४॥  
 अच्छउ ता अन्नभवं तरेसु इह चेव तुज्झ जम्ममि ।  
 गुणरायभावफलिओ जिणधम्मो सोक्खलाहेण ॥७१०५॥  
 गुणरायपभिइबहुभवपरंपराउत्तरोत्तर-सुहाइं ।  
 नर-सुरलोएसु तए भुत्ताइं तहा वि न हु तित्ती ॥७१०६॥  
 नेरइयाणं तिरिया सुहिया इह होंति ताण पुण मणुया ।  
 मणुयाहिंतो देवा तत्तो वि अणुत्तरसुरा वि ॥७१०७॥  
 एएसिं सव्वाणं सिद्धी अच्छंतसोक्खसंपन्ना ।  
 जाण सुहस्स न उवमा संभवइ तिलोयमज्जे वि ॥७१०८॥  
 ता तत्थ चेव सिरिवीरसेण! सव्वुत्तममि सिवसोक्खे ।  
 कायव्वो बुद्धिमया महायरो परमजत्तेण' ॥७१०९॥  
 तो भणइ वीरसेणो 'एवमिणं न उण अन्नहा होइ ।  
 सव्वसुहाण पहाणं अणुद्धियं मोक्खसुहमेव ॥७११०॥  
 इहरा वि मज्झ भुयणेक्कनाह! हियये इमं सया वसइ ।  
 तुम्होवएसओ पुण कायव्वमईए परिगहियं ॥७१११॥  
 किं तु मणागं मुणिवर! विन्नवणीयं महऽत्थि तुह पुरओ ।  
 तत्थ वि उचियाणुचियं भगवंतो चेव जाणंति ॥७११२॥  
 किर पवयणे वि सुव्वइ दुप्पडियाराइं माउ-पियराइं ।  
 एयाहिंतो वि पुणो दुप्पडियारो गुरू होइ ॥७११३॥

ता भयवं! मह सरिसो पुत्तो मा होज्ज को वि संसारे ।  
 जो दुक्खकारणं चिय उप्पन्नो जणणि-जणयाण ॥७११४॥  
 सूरसुओ वि हु मंदो तं पीडइ जत्थ निवसइ खणं पि ।  
 कहिओ च्चिय जाणिज्जइ सणिच्छरो वीरसेणो य ॥७११५॥  
 ताव च्चिय वड्डइ वंससंतई महिहराण निरवाया ।  
 जाव न मज्झ समाइ जायंति जए दुवीयाइं ॥७११६॥  
 जायंमि जेहिं जायइ नियकुलवुद्धी जयंमि जसकित्ती ।  
 जणणि-जणयाण तोसो ते पुत्ता न उण मह सरिसा ॥७११७॥  
 सल्लइ न तहा भयवं! मह पिउणो नड्डसमरसल्लोहो ।  
 जह वैरिपरिभवो मह दुपुत्तविरहो य अच्चत्थं ॥७११८॥  
 अहिमाणमहोयहिणो मह पिउणो चक्कवट्टिरज्जं पि ।  
 न सुहायइ माणब्भंसजायबहुदुक्खभारस्स ॥७११९॥  
 तो ताइं कह वि जइ एत्थ एंति ता ताण मज्झ वि पमोओ ।  
 जायइ एवं चिय मज्झ अत्थि आलंबणं भयवं ॥७१२०॥  
 न उणो मह तुम्ह पसायपत्तसुविवेयमुणियत्तस्स ।  
 रज्जसिरी-विसयपसंगसंभवे अत्थि वामोहो' ॥७१२१॥  
 तो भयवया वि भणियं 'अहासुहं मा करेह पडिबंधं ।  
 एसो वि परमधम्मो जं माइ-पिऊण हियकरणं ॥७१२२॥  
 एवं चिय कीरंतं ताण वि परिणामसुंदरं होही ।  
 सव्वत्थ तुह अविग्घं संपज्जउ धम्मकज्जेसु' ॥७१२३॥  
 इय पभणंता अकलंक-निम्मला पभणिया नरिंदेण ।  
 'नियदंसणेण भयवं! कायव्वो पुणरवि पसाओ' ॥७१२४॥

पेच्छंताणं ताणं खणेण अइंसणीहुया मुणिणो ।  
 राया वि सपरिवारो समागओ राउलं निययं ॥७१२५॥  
 तो सोहणंमि दिवसे पसत्थतिहि-करण-वार-लग्गंमि ।  
 सिरिवीरसेणराया संबंधुयत्तो विमाणेण ॥७१२६॥  
 करकलियखग्गरयणो संमाणियराय-मंति-सामंतो ।  
 लब्धाणुमई सव्वाहिणंदिओ सुहमणुच्छहो ॥७१२७॥  
 अणुकूलपवणसउणो उप्पइओ नहयलंमि नरनाहो ।  
 आणयणत्थं चलिओ नियमाउ-पिऊण वेगेण ॥७१२८॥  
 पवणपहल्लिरचलचलिरकिंकिणीजालमुहलियदियंतं ।  
 जयजयरवं व उच्चरइ रायपत्थाणसमयंमि ॥७१२९॥  
 पवणुधु(द्धु)यधवलधयाभुयाहिं नच्चइ व जायसंतोसं ।  
 पुरओ भविस्सपिउ—माइदंसणुच्छवगुरुरसेण ॥७१३०॥  
 घरपंगणं व वसुहा जलनिहिणो सारणि व्व गंभीरा ।  
 जत्थ ठिएहिं दीसंति गिरिवरा गंडसेल व्व ॥७१३१॥  
 जं विविहमहामणिकिरणजालसुरचावबंधरमणीयं ।  
 सुरवइविमाणसंकाए चयइ दूरं खयरलोओ ॥७१३२॥  
 दक्खिणदिसि धावंतं जं दीसइ रक्खसेहिं सभएहिं ।  
 पुफ्फ(फ्फ)यविमाणगइरामभइआगमणसंकाए ॥७१३३॥  
 तो भणइ बंधुयत्तो 'तुह पच्चासाए इह मए भमियं ।  
 हरिणेण व मायातण्हियाए नडिएण रन्नंमि ॥७१३४॥  
 सो देव! एस जलही तुह दंसणजायहरिसपडहत्थो ।  
 दूरुल्लासियकल्लोलवीइहत्थेहिं नच्चइ व ॥७१३५॥

दीसइ विलाससिंगो सग्गो व मणोहरो महाराय! ।  
 अंतरियनहदियंतो जसो व्व तुह विविहसिहरेहिं ॥७१३६॥  
 एसा सा रणभूमी जत्थ हओ पवणकेउखयरिंदो ।  
 दीसंति भडक्खंभा खयरारणं जत्थ सयणकया ॥७१३७॥  
 तं देव! इमं होही मज्झं जलहिस्स दुरवगाहस्स ।  
 जंमि हरिणेव तुमए सिरि व्व आयढि(द्धि)या देवी ॥७१३८॥  
 एसो देव! सुवेलो महागिरी जत्थ निवसए लंका ।  
 अज्ज वि नरिंद! दीसंति जत्थ रामस्स जयखंभा ॥७१३९॥  
 लवणोयहिस्स मज्झे अंतरदीवाइं देव! दीसंति ।  
 एयं च दक्खिणं वेजयंतनामं पुरो दारं ॥७१४०॥  
 एसेस जिणमएण व भवो विमाणेण लंघिओ जलही ।  
 दीसइ जेण नरेसर! पुरओ परतीरवणराई' ॥७१४१॥  
 इय ताण अन्नोन्नपएसकहणवावडमणाण दोहिं(ण्हं) पि ।  
 पत्तं झत्ति विमाणं धाईसंडं महादीवं ॥७१४२॥  
 एत्थंतरमि सहसा निययविमाणद्धिएहिं दोहिं पि ।  
 दिट्ठो नहे पडंतो छिन्नो सकिवाणभुयदंडो ॥७१४३॥  
 केऊरकोडिपडिलग्गरयण-मणिकिरणवद्धपरिवेसो ।  
 सफरो व्व सचक्को इव सहइ सपासो व्व सवणु व्व ॥७१४४॥  
 तं दट्ठूण पडंतं सविम्हउत्ताणियच्छिवत्तेहिं ।  
 'किं किं'ति ससंभंतेहिं तेहिं अवलोइओ बाहू ॥७१४५॥  
 गुरुवेयनियडनिवडंतवियडभुयदंडअग्गहत्थाओ ।  
 गहियं नराहिवइणा खग्गं नियवामहत्थेण ॥७१४६॥

दट्ठुण खग्गरयणं अयंडसंपत्तपरमपरिओसो ।  
 चिंतइ राया हियाए 'महंत-अच्छरियमिव एयं ॥७१४७॥  
 करकलियमेत्तकरवालगरुयअणुहास(व?)संभवतेहिं ।  
 असरिसविक्रम-उच्छाह(विक्रमुच्छाह)-सत्तिमाईहिं मह फुरियं' ॥७१४८॥  
 इय जाव मणे राया करवालगुणे विचिंतइ पहिड्डो ।  
 ता निवडंतो दिड्डो नहाउ एगो महापुरिसो ॥७१४९॥  
 वामकरधरियसीसो दक्खिणकरधरियनिसियअसिधेणू ।  
 निद्वयनिद्वदोदो भिउडीसंकडियभालो य ॥७१५०॥  
 लक्खिज्जइ निरवडुंभपडणअजहत्थलुलियसव्वंगो ।  
 भूगोयरो त्ति पयडं विकिन्नसिरकुंतलकलावो ॥७१५१॥  
 सो गयणाओ पडंतो दड त्ति पडिओ विमाणवलभीए ।  
 सहस त्ति धाविऊणं आससिओ वीरसेणेण ॥७१५२॥  
 संजायसत्थचित्तो उम्मीलियदीहनेत्तसयवत्तो ।  
 जोयइ वीराहिववयणपंकयं रोसरत्तच्छो ॥७१५३॥  
 तो भणइ वीरसेणो 'को सि तुमं? कह नहाओ इह पडिओ ? ।  
 किं वा सकोवहियओ लक्खिज्जसि अहं विसयंमि ?' ॥७१५४॥  
 तो उट्ठिऊण सहसा सीसं अच्छोडिऊण छडे(डे)इ ।  
 सो भणइ 'अप्प खग्गं अहव रणे संमुहो ठासु' ॥७१५५॥  
 तो भणइ वीरसेणो 'नाऽहं जुज्झामि कारणविहीणं' ।  
 तो भणइ नरो 'अज्ज वि पच(च्च)क्खे निण्हवं कुणसि ?' ॥७१५६॥  
 तो भणइ वीरसेणो 'किं निण्हवियं ? किमेत्थ पच्चक्खं ?' ।  
 भणइ नरो 'मह खग्गं पच्चक्खं तं पि निण्हवसि ?' ॥७१५७॥

तो भणइ वीरसेणो 'एयं नरकरयला हढेणज्ज ।  
 उदालियं किवानं कह णु तुहेयं सकीयं ति ?' ॥७१५८॥  
 तो भणइ नरो 'नाऽहं बहुयं जाणामि बोल्लिउमसच्चं ।  
 तुज्झ सयासे दिट्ठं संपइ खग्गं गहिस्सामि ॥७१५९॥  
 जइ सुसमत्थो ता जुज्झ अह न ता अप्प मज्झ करवालं ।  
 न हु वयणचावलेणं छुट्टिज्जइ अम्ह पासमि' ॥७१६०॥  
 तो भणइ वीरसेणो 'कह णु तए संपयं पबोहेमि ? ।  
 जो एक्कग्गाहेणं जुत्तिं पि विधारइ न मूढो ? ॥७१६१॥  
 नीइबलेणं सपरक्कमेण नेहेण अहव गरुएण ।  
 पाविज्जइ खग्गमिणं न उण तए लगसगंतेण' ॥७१६२॥  
 पुण भणइ नरो 'रे दुव्वियद्ध ! जाणामि तुह विणाएयं (वि णो एयं ?) ।  
 तेण मए पढमं च्चिय जुज्झं अंगीकयं तुमए' ॥७१६३॥  
 तो भणइ वीरसेणो 'करेमि नीइं बुहाण मज्झंमि ।  
 रणलंपडस्स वि ममं हिययं नोच्छहइ समरंमि' ॥७१६४॥  
 तो भणइ खग्गपुरिसो 'कत्थेत्थ बुहाण संभवो होही ? ।  
 एमेव मज्झ खग्गं रणभीरुय! घेतुमहिलससि ॥७१६५॥  
 जइ कह वि नीइपक्खे वि जिणसि मज्झत्थपुरिसपरिसाए ।  
 गिण्हिस्सं तह वि य(ह)ढेण वीरभोज्जा जओ वसुहा' ॥७१६६॥  
 तो भणइ वीरसेणो 'नीइनिसिद्धस्स तुज्झ जं उचियं ।  
 होही तं तइय च्चिय भणियच्चं न उण अज्जेव ॥७१६७॥  
 नयमग्गमणुसरंतस्स विक्रमो वीर! पावइ पसंसं ।  
 लंघियनयस्स सो च्चिय अप्पविणासाय अजसाय' ॥७१६८॥

जावेवं तत्थ नहंगणंमि वच्चंति दोवि कयरोला ।  
 ता गयणे वच्चंतो दिट्ठो विज्जाहरसमूहो ॥७१६९॥  
 तो भणइ वीरसेणो 'एए विज्जाहरा पुरो ज्जं(जं)ति ।  
 मज्झत्थाण इमाणं पासे नीइं इह करेमो' ॥७१७०॥  
 तो भणइ खग्गपुरिसो 'जं रुच्चइ तुज्झ तं चिय करेहि ।  
 अम्हेहिं पुणो खग्गं सव्वऽवसव्वेहिं घेत(त्त)व्वं' ॥७१७१॥  
 तो जंति खेयराणं पासे कयविणयउत्तरासंगा ।  
 असिसंवाए दोन्नि वि अहिट्ठिया अहिनिविट्ठमणा ॥७१७२॥  
 तो भणइ वीरसेणो 'आयण्णह सावहाणकयचित्ता ।  
 नरकरयलाओ खग्गं मए गिहीयं न एयाओ' ॥७१७३॥  
 खग्गपुरिसेणं भणियं 'मह भासं सुणह मज्झ सुत्तस्स ।  
 अवहरिऊणं खग्गं उप्पइओ एस गयणंमि ॥७१७४॥  
 उप्पयमाणो एसो धरिओ परिवियडकडिपएसंमि ।  
 एएण समं अहमवि समागओ एत्तियं दूरं ॥७१७५॥  
 एत्थागएण य मए मायावी एस विविहकयरूवो ।  
 छिन्नो छुरियाए भुओ सीसं पि य खंडियमिमस्स ॥७१७६॥  
 विज्जाहरो खु एसो अहयं पुण भूमिगोयरो पडिओ ।  
 विज्जा-बलविउरुव्वियविमाणरयणे पुणो दिट्ठो ॥७१७७॥  
 दिट्ठं च खग्गरयणं सम्मं नाऊण पच्चभिन्नायं ।  
 मग्गामि एस नोऽप्पइ इय भासा अम्ह खयरिंदा!' ॥७१७८॥  
 परिभाविऊण सम्मं भणिओ विज्जाहरेहिं वीरवई ।  
 'एयस्स इमं खग्गं नरस्स तुह न उणो नरिंद! ॥७१७९॥

एसो वि नरो जंपइ तस्स मए पाडिओ रणे बाहू ।  
 जंपसि तुमं पि एवं लद्धं नरकरयलाओ मए ॥७१८०॥  
 ता निच्छइयं एयं खग्गं एयस्स नत्थि संदेहो ।  
 चिंतेयव्वं तु इमं को चोरो खग्गरयणस्स ?' ॥७१८१॥  
 तो विज्जाबलउवलद्धतत्तनाणेहिं सव्वखयरेहिं ।  
 निच्छइयमिणं 'एसो न तक्करो को वि परमप्पा ॥७१८२॥  
 हुं ! जाणिओ सि सम्मं जंबुदीवंमि भारहे वासे ।  
 चंपाहिराय! नरवर ! खेमं तुह सव्वकालं पि' ॥७१८३॥  
 तो भणइ वीरसेणो 'नाऽहं चंपाहिवो अवि य रंको ।  
 मज्झत्था होऊणं जं होई तं समाइसह ॥७१८४॥  
 जइ कुणह मज्झ पक्खं खयरा! मज्झत्थयं पमोत्तूण ।  
 ता तुम्ह देव-गुरुदोहयाए सवहो मए दिन्नो' ॥७१८५॥  
 विज्जाहरेहिं भणियं 'होसि न चोरो तए निवडमाणं ।  
 नरकरयलाओ गहियं न उणोऽसितक्करो होसि ॥७१८६॥  
 असितक्करो खु खयरो निहओ एएण सो वि सयमेव ।  
 खयरभमेण तुहेसो लग्गो दट्ठूण करवालं ॥७१८७॥  
 गयणंमि महीयलंमि पडियं सव्वो वि गिण्हइ गिहत्थो ।  
 जइणो चेय अदत्तं गेण्हंति न पवयणविरुद्धं ॥७१८८॥  
 अन्नं च देस-बल-काल-पत्त-भावाणुगाओ नीईओ ।  
 दड्ढ्वाओ नरेसर! न उणो एगंतपक्खेण ॥७१८९॥  
 राया सि तुमं गिण्हसि संतमसंतं च पयइसंबद्धं ।  
 पयईए ववत्थालंघणंमि नीईओ दिट्ठाओ ॥७१९०॥



किं व कुणइ अवराहं करी मयंदस्स जो तयं हंतुं ।  
 कुंभत्थलाओ कड्डइ मोत्तानियरं सहत्थेहिं ॥७१९१॥  
 ता सब्बहा वि एयाओ हुंति नीईओ इयरलोयाण ।  
 तुम्हारिसाण चंपाहिराय ! एवं न नीईओ ॥७१९२॥  
 ता खग्गपुरिस ! मग्गसु विणएण असिं इमाओ रायाओ ।  
 गरुया जायंति वसे विणएण न विक्कमाईहिं ॥७१९३॥  
 एवं ते भणिऊण खयर सट्ठाणमुवगया सब्बे ।  
 खग्गनरेण य भणिओ नरनाहो रोसविवसेण ॥७१९४॥  
 'रे रे दुट्ठ ! दुरायार ! धिड्ठ ! निल्लज्ज ! चत्तमज्जाय ! ।  
 सब्बपयारेहिं मए मारेयव्वो तुमं अज्ज ॥७१९५॥  
 चोरावराहदुट्ठो वीयं च चंपाहिवत्तकयदांसां ।  
 तइयं अकज्जनिरओ दोसेहिं इमेहिं दुट्ठो सि ॥७१९६॥  
 ता किं च मणे चिंतसि? पाव! करे कुण करालकरवालं ।  
 नत्थि तुह अज्ज मोक्खो सयं मए हब्बनिरुद्धस्स' ॥७१९७॥  
 चंपाहिवेण भणियं 'न तए सह जुज्झिउं मई मज्झ ।  
 एएण कारणेणं नीइविलंबो मए विहिओ ॥७१९८॥  
 कहमन्नहा महायस ! नीईओ करंति इयरपुरिस व्व ।  
 नियजीविद्यमोल्लेणं जे भुयणं घेत्तुमीहंति ॥७१९९॥  
 नीइनिमिद्धो वि न वुज्झसे जया वि समजायमइमोहो ।  
 ता जुज्झिस्सं एण्ह अन्नमुवायं अपेच्छंतो' ॥७२००॥  
 तो भणइ खग्गपुरिसो 'उत्तरसु महीए तत्थ जुज्झामो' ।  
 उत्तरइ वीरसेणो जुज्झरसुल्लसियरोमंचो ॥७२०१॥

समतलकोमलतणमणभिरामवसुहायलंमि ते दो वि ।  
 अह जुज्झंउं पयत्ता निबद्धदढपरियरायारा ॥७२०२॥  
 उब्भडबाहुप्फालणपडिरववित(त्त)त्थवणयरसमूहा ।  
 अइभीमभिउडिभाला जुज्झंति निजुज्झजुज्झेण ॥७२०३॥  
 तो बंध-विबंधुब्भडढो(ठो?)क्कर-करघाय-कत्तरिसएहिं ।  
 पयडियबहुविन्नाणा जुज्झंति दुवे अहिनिविट्ठा ॥७२०४॥  
 दीसंति निविडमुट्टिप्पहारदिढवज्जघायघुम्मंता ।  
 अन्नोन्ननिबिडदिढबंधपीडणुव्वमिररुहिरोहा ॥७२०५॥  
 घोराभिघायज्जरियदीहनीहरियरुहिररत्तंगा ।  
 पलयंतकालसंझारुणदेहा चंद-सूर व्व ॥७२०६॥  
 एवं च ताण जुज्झंतयाण दुत्ताररन्नमज्झंमि ।  
 रणपरवसाण दी(दि)यहा वोलीणा सोलस कमेण ॥७२०७॥  
 तो सोलसमे दियहे विन्नत्तो बंधुयत्तमित्तेण ।  
 वीरो 'केत्तियकालं इहच्छियव्वं रणरसेण ॥७२०८॥  
 इह कालविलंबेणं कज्जाइं पुरो नरिंद! सीयंति ।  
 ता संवर संगामं देव ! उवायंतरेणेह' ॥७२०९॥  
 तो भणइ वीरसेणो 'मित्त! महंतं जणेइ मह कोडुं ।  
 जुज्झंतो एस भडो विसेसजुज्झंमि अइकुसलो' ॥७२१०॥  
 एवं पभणंतेण य बद्धी सो गारुडेण बंधेण ।  
 सुदिढं च बंधिऊणं पक्खित्तो नियविमाणंमि ॥७२११॥  
 आरूढो य विमाणं विहियअओज्झापुरीमणवियप्पो ।  
 पेच्छइ खणेण वीरो पुरिं अओज्झं परमरम्मं ॥७२१२॥

अइगहिरखाइयाजलपडिबिंबियतुंगसालकव(वि)सीसा ।  
 दंसणपायालागयभवणवइविमाणपंति व्व ॥७२१३॥  
 उत्तुंगट्टालयसिहरमारुयंदोलमाणधवलधया ।  
 जा तज्जइ व्व उड्डं सुरनयरं दीहबाहूहिं ॥७२१४॥  
 पडिमंदिरमणिसिहरुच्छलंतकिरिणोहबद्धसुरचावा ।  
 चंपाहिरायआगमनिबद्धबहुतोरणसय व्व ॥७२१५॥  
 जुयइ व्व बहुसहावो नाणाविहकुडिलमग्गकयमोहो ।  
 पयडपयावइसाल व्व भुयणदीसंतजणनिवहा ॥७२१६॥  
 दट्ठूण पुरिं राया मित्तं पइ भणइ विम्हयरसेण ।  
 'उप्पायइ अच्छरियं एसा नयरी पदीसंती ॥७२१७॥  
 पायं न एत्थ पहवइ पुरीए सव्वंकसो हयकयंतो ।  
 तेण अमरो व्व लोओ अणिट्ठिओ एत्थ अइवहुओ' ॥७२१८॥  
 इय एवमाइ बहुविहनयरागयगुणसहस्सअक्खित्तो ।  
 पेच्छइ लोयं वीरो वच्चंतं बाहिरुज्जाणे ॥७२१९॥  
 तो भणइ बंधुयत्तो 'एसो उण कत्थ वच्चए लोओ ? ।  
 एसा वि रायपत्ती का वि परी[वारपरि]यरिया ? ॥७२२०॥  
 किं वीरसेण ! एसा उव्वेवाहिड्डिय व्व रायवहू ? ।  
 पायं इमीए होही अइगरुओ दुक्खपब्भारो ॥७२२१॥  
 तेण नियच्छसु नरनाहं! खीणसव्वंगजायदोब्वल्ला ।  
 बहुओववासवयमिव अभणंती कहइ देहेण ॥७२२२॥  
 परिचत्तभूसणा वि य पविरलदीसंतमंगलाहरणा ।  
 अभणंत च्चिय साहइ अविहवभावं अइसुदीहं ॥७२२३॥

पेच्छसु उवणिज्जंतं हारं दासीहिं पेल्हइ करेण ।  
 दाविज्जंतं मणिदप्पणं पि अवहीरइ सदुक्खा ॥७२२४॥  
 जाणारूढाए पुरो पयडिज्जंतं विलेवणं नियसु ।  
 निन्नामियअंगुलीए वंदइ पडिसेहए सेसं ॥७२२५॥  
 घेत्तूण कुसुममेगं सिरंमि धारेइ मंगलनिमित्तं ।  
 अवरं च कुसुमदामं पासत्थसहीण ओप्पेइ ॥७२२६॥  
 तंबोलकरंडयवाहिणीए पुणरुत्तदिज्जमाणं पि ।  
 तंबोलबीडयं नियडरायपुत्ताण सा देइ ॥७२२७॥  
 इय देव! का वि एसा महानरिंदस्स कुलवहू होही ।  
 सामंत-मंति-मंडलियरायवंद्रेहिं परिकिन्ना ॥७२२८॥  
 ता देव! जत्थ एसा वच्चइ अम्हे वि तत्थ वच्चामो' ।  
 इय भणिऊणं दोन्नि वि पत्ता उज्जाणमज्झंमि ॥७२२९॥  
 उत्तरइ विमाणाओ वीरो सह बंधुयत्तमित्तेण ।  
 तस्स विमाणं पि नहे थक्कुं सह बद्धपुरिसेण ॥७२३०॥  
 तो राय-बंधुयत्ता जा जंति पुरो नियंति ता सूरिं ।  
 पुरओ अणंतगुणरयणभूसियं पडिहयवियारं ॥७२३१॥  
 दिप्पंतविसमतवतेयभासुरं दूरबद्धपरिवेसं ।  
 निंदियच्चिरभववसियं जलणंमि व सोहए अप्पं ॥७२३२॥  
 परिमियखेत्तपयासं दूरं हसइ व्व नियपयावेण ।  
 पयडियलोयालोयं केवलवरनाणकिरणेहिं ॥७२३३॥  
 खेत्तं व महाखंतीए मंदिरं मद्दवस्स व अलंघं ।  
 जोणिं व्व अज्जवस्स व अपरिग्गहयाए परिपागं ॥७२३४॥

सव्वेण अंचणीयं सुपवित्तियतिहुयणं व सोएण ।  
 निहयअसमंजसं पिव निम्मलनियसंजमगुणेण ॥७२३५॥  
 तवदह्कम्मकिट्टं समतण-मणि-लेट्ठुकंचणवियप्पं ।  
 सुविसुद्धबंभधारिं एमाइअणंतगुणकलियं ॥७२३६॥  
 नामेण मयणसीहं दट्ठूण य दो वि हरिसपुलयंगा ।  
 वंदंति इलातललुलियभालवट्ठा महासूरिं ॥७२३७॥  
 तो उवविसंति गुरुणो पयइपवित्तंमि नियडभूभाए ।  
 एत्थंतरंमि सा वि य समागया रायवरपत्ती ॥७२३८॥  
 तीए वि तहच्चिय परमभत्तिविवसाए वंदिओ सूरी ।  
 नीसेसमंति-सामंतमाइपरिवारसहियाए ॥७२३९॥  
 उवविट्ठा सा वि तयंतियंमि वीरे निहित्तमण-नयणा ।  
 अणुकूलसउणसूइयभविस्सपरिओसपुलयंगी ॥७२४०॥  
 एत्थंतरंमि सूरी साहइ धम्मं जिणिंदपन्नत्तं ।  
 पयडइ भवसब्भावं अइविरसं सव्वपरिसाए ॥७२४१॥  
 लद्धावसरा देवी विन्नवइ गुरुं विमुक्कुनीसासा ।  
 'भयवं! सोलस दिवसा अज्ज षउत्थस्स रायस्स ॥७२४२॥  
 ता कत्थ अज्जउत्तो ? जीवइ व न व ? त्ति साह मह भयवं ! ।  
 बहुदुक्खदुक्खियाए तुह वयणे मज्झ जीयासा ॥७२४३॥  
 नियबंधुविप्पओगो तह वि य सुयरयणविप्पओगो य ।  
 एण्ह एसो जाओ नियपिययमविप्पओगो मे ॥७२४४॥  
 तां नाह! दुक्खभरभारभारियंगी चएमि नो धरियं ।  
 संपइ प(पु)णो बहुदुक्खभाइ(य)णा मरिउमिच्छामि' ॥७२४५॥

एत्थंतरंमि छीयं केण वि तत्थेव परिसमज्झंमि ।  
 तो भणइ गुरू 'वच्छे! मा खेयं कुणसु चित्तंमि ॥७२४६॥  
 दुहरूवो च्विय एसो संसारो एत्थ नत्थि सुहलेसो ।  
 इह लिंबकीडयस्स व ज्जि(जि)यस्स परियप्पियं सोक्खं ॥७२४७॥  
 कमलमुही बिंबोड्डी कुवलयनयणा य कुंददसणा य ।  
 परियप्पणा जहेसा तह जाण भवे वि सोक्खाइं ॥७२४८॥  
 अच्छउ वच्छे! एयं पयडं चिय पेच्छ अन्नमच्छरियं ।  
 रिउवासणाए बद्धो पुत्तेण पिया हहो! कट्ठं! ॥७२४९॥  
 तो भणइ गुरू 'आणेहि नियविमाणाओ तं महारायं ।  
 चंपाहिराय! तुरियं सत्तुवियप्पेण जं बद्धं' ॥७२५०॥  
 तो गुरुवयणायन्नण-ससंभमुत्थंतनयणतामरसो ।  
 उड्डइ सासंकमणो आणेई तं विमाणाओ ॥७२५१॥  
 तो पविसंतं दट्ठं सूरनरिंदं मुणिंदपरिसाए ।  
 देवीमाइअसेसो परितुड्डो परियणो सहसा ॥७२५२॥  
 जे पुट्ठिं रायविओयदुक्खहुयवहपुलुड्डसब्बंगा ।  
 ते सूरदंसणामयपण्हाइयमाणसा जाया ॥७२५३॥  
 तो सूरसेणराया संभमविलुलंतकुंतलकलावो ।  
 पाएसु पडइ सिरिमयणसीहसूरिस्स पुलयंगो ॥७२५४॥  
 उवविसइ पुरो सूरिस्स सिरपणामिओभयग्गो(भयंगो ?) ।  
 परमत्थवयणविन्नासमणहरं पभणिओ गुरुणा ॥७२५५॥  
 'किं सूर ! सूरकुलसंभवस्स तुह होइ एरिसं उच्चियं ?  
 जं सोलस दियसाइं जुज्झसि सह निययपुत्तेण ॥७२५६॥

सुविवेइणो महत्था जइ किर तुम्हारिसा वि मुज्झंति ।  
 बालस्स तस्स मन्ने को दोसो ता तुह सुयस्स ? ॥७२५७॥  
 हा! कट्टं अन्नाणं अच्छउ ता परभवे इह भवे वि ।  
 पियपुत्तो वि हु रिउवासणाए पहरिज्जए पिउणा ॥७२५८॥  
 जस्स किर रक्खणत्थं चंपाए कओ तए महासमरो ।  
 कह सो पुत्तो नियकरयत्तेहिं घाइज्जइ नरिंद ! ? ॥७२५९॥  
 जीए सिणेहपराए वूढे उयरेण अहियनवमासे ।  
 सा जणणी तं पुत्तं मन्नइ परपुत्तवुद्धीए ॥७२६०॥  
 पुत्तो वि एस अन्नाणमोहिओ खग्गखंडरेसंमि' ।  
 पहरइ पिउस्स जेणं उवयरियं अप्पडि(डी)यारं ॥७२६१॥  
 परमत्थभावणाए को कस्स पिओ ? रिउ व्व को कस्स ? ।  
 अन्नाणमोहियाणं मित्तो वि रिऊ रिऊ मित्तो ॥७२६२॥  
 जह तुम्ह ताव एयं पच्चक्खं नरवरिंद! संजायं ।  
 तह जाण परभवेसु वि अववत्था सव्वजीवाण ॥७२६३॥  
 ता संसारे नरवर! अणवट्ठियपिउ-सुयाइसंबंधे ।  
 पडिबंधं मोत्तूणं जिणधम्मे आयरं कुणसु' ॥७२६४॥  
 तो भणइ सूरसेणो 'भयवं! सो एस मह सुओ सच्चं ? ।  
 सिंगारवईनियगव्भसंभवो वीरसेणो जो ?' ॥७२६५॥  
 'एवं' ति पभणिए मुणिवरंमि उट्ठंति दो वि पिउ-पुत्ता ।  
 आणंदवाहपच्वालियाणणा हरिसपुलयंगा ॥७२६६॥  
 दूरपसारियभुयदंडपीडणन्नोन्ननिबिडियसरीरा ।  
 अइनेहनिब्भरेसुं परोप(प्प)रंगेसु व विसंति ॥७२६७॥

१. खड्गखण्डहेतो: ॥

तो वीरो निस्सहोरक्खित्तमणिमउडकिरणकब्बुरिए ।  
 जणयस्स नमइ चलणे ण्हावंतो अंसुधाराहिं ॥७२६८॥  
 उम्मुक्कदीहधाहो पिउदंसणुल्लसंतवामोहो ।  
 इयरपुरिसो व्व वीरो उन्नमइ सिरं न चरणाओ ॥७२६९॥  
 तो तेण रुयंतेणं असंखसामंत-मंति-मंडलिया ।  
 सव्वे वि य रायाणो विमुक्कथोरंसुयं रुन्ना ॥७२७०॥  
 तो महया कट्टेणं पिउणा पिउवच्छल्लो महावीरो ।  
 उभयकरुक्खित्तसिरो पुणो पुणो चुंविओ सीसे ॥७२७१॥  
 'किं पुत्तय! रुन्नेणं ? इहरच्चिय पयडिओ पिउसणेहो ।  
 जंबुदीवाओ इहं एंतेणं धाइसंडंमि' ॥७२७२॥  
 तो वीरसेणसाहियवइयरकयबंधुयत्तपडिवत्ती ।  
 नियपुत्तनिव्विसेसं गोरवबुद्धीए पेच्छेइ ॥७२७३॥  
 पुण भणइ सूरसेणो 'आसाससु मायरं बहुदुहत्तं ।  
 नियदंसणेण सुहियं करेसु पीऊसह(व)रिसेण' ॥७२७४॥  
 एवं पिउणा भणिओ सिंगारवईए पडइ पाएसु ।  
 सा वि परिरंभिऊणं चुंवइ सीसे बहुसिणेहा ॥७२७५॥  
 अंतोहुत्तवियंभियसिणेहथरहरियथूलथणवट्ठा ।  
 नीहरियथन्नधारा हिययविसुद्धिं व दावंती ॥७२७६॥  
 तो राय-रायपत्ती-सामंताईण सयललोयाण ।  
 नयणाइं वीरसेणे खुत्ताइं व नो नियत्तंति ॥७२७७॥  
 अउरुव्वरूव-सिंगार-लडह-लायन्न-गारवघ(घ)विओ ।  
 ओसरइ खणं पि न सज्जणाण हिययाओ सूरसुओ ॥७२७८॥



एत्थंतरंमि राया सुयसहिओ नडुसोयतिमिरोहो ।  
 जाओ गयणाभोओ व्व हाणुणा पयडियपयावो ॥७२७९॥  
 तो भणइ सूरसेणो 'भयवं! नियजणणिहत्थवडियस्स ।  
 जं जायं मज्झ सुयस्स कहह तं दिव्वनाणेण' ॥७२८०॥  
 तो भयवया वि सव्वं केवलनाणोवलच्छतत्तेण ।  
 कहिओ नीसेसो च्विय वुत्तंतो वीरसेणस्स ॥७२८१॥  
 तो सूरसेणराया अणुवमनियपुत्तचरियसवणेण ।  
 सकयत्थं मन्नंतो अप्पाणं भणिउमाढत्तो ॥७२८२॥  
 'जायंति जए पुत्ता पिउणो हीण व्व अहव सरिस व्व ।  
 पिउणो वि जेहिं जिप्पंति तिहुयणे सो परं एसो ॥७२८३॥  
 पुत्तेहिं गुण-परि(र)क्कममाईहिं जियस्स नवर जणयस्स ।  
 अहिययरं चिय वित्थरइ तस्स जयपायडा कित्ती' ॥७२८४॥  
 तो पणमिऊण भयवं पवड्डियाणंदनंदियजणोहं ।  
 दिसि दिसि पयट्टवरजुयइनट्टुट्टंतहारलयं ॥७२८५॥  
 वज्जंतगहिरमणहरबहुतूरदियंतबद्धपरिमदं ।  
 आणंदनिब्भरुग्गीयमाणनारीयणादिन्नं ॥७२८६॥  
 घरघरनिबद्धतोरणअणंतजणजणियकलयरगहीरं ।  
 घरदारमुक्कसियकमलपिहियबहुपुन्नकलसोहं ॥७२८७॥  
 उन्नामियगगकरवंदिविंदउग्घुट्टुजयजयासदं ।  
 पुरनारीविरइज्जंतघरघरुद्दाममंगल्लं ॥७२८८॥  
 एवं गुणाभिरामं पासडियपुत्तपत्तसोहग्गो ।  
 पविसइ पुरिं नरिंदो पहाणजयवारणारूढो ॥७२८९॥

पत्तो नियरायउलं समुच्चसीहासणंमि उवविट्ठो ।  
 एक्कासणठियपुत्ते कारावइ मंगलसयाइं ॥७२९०॥  
 एवं वच्चंति दिणा अन्नोन्नपवट्ठमाणहरिसाण ।  
 ताण तिणीकयतियसिंदपरमसोक्खाण मिलियाण ॥७२९१॥  
 एगवरिसावसाणे विन्नत्तं वीरसेणराएण ।  
 'ताय! पयट्ठह गम्मइ जंबुद्धीवंमि चंपाए' ॥७२९२॥  
 तो नरवइणा तत्थन्नरायधूयाए गब्भसंभूओ ।  
 नामेण रायसेणो पुत्तो अहिसिंचिओ रज्जे ॥७२९३॥  
 तस्स समप्पइ सयलं परिवारं विसयमंडलसयाइं ।  
 आपुच्छियसयलजणो सिंगारवईए सह राया ॥७२९४॥  
 जा किर गमणाभिमुहो अच्छइ सुमुहुत्तदिवसमीहंतो ।  
 ता सेहरयासोया समागया नियनियबलेहिं ॥७२९५॥  
 खेयरनिरुद्धपरिवियडनहपहंतरियदिणयरमऊहो ।  
 जाओ अयंडघणडंबरो व्व गयणंगणाभोओ ॥७२९६॥  
 पडिबिंबिज्जइ मणिमयविमाणभित्तिथलीसु वरनयरी ।  
 अब्भुट्ठिऊण आलिंगइ व्व पहुपक्खकयनेहा ॥७२९७॥  
 अफा(प्फा)लियबहुविहत्तूरसद्वपडिसद्वरुंदरावेहिं ।  
 अक्कंदइ व्व गयणं खयरेहिं हडक्कमिज्जंतं ॥७२९८॥  
 पूरिज्जंति पुरीए चउक्क-तिय-रायमग्ग-रत्थाओ ।  
 अन्नोन्नखयरसंघट्टखुडियतणुभूसणमणीहिं ॥७२९९॥  
 इय परमरिद्धिवित्थरवित्थारियरायविम्हयाणंदं ।  
 दट्ठूण भणइ सूरु 'पुत्त! किमेयं नहे सेन्नं ?' ॥७३००॥

एत्थंतरमि सहसा समागओ पवणहल्लिरवरिल्लो ।  
 नामेण ब्रज्जबाहू खयरो वीरस्स पासंमि ॥७३०१॥  
 तो पणमिऊण पढमं सूरं सिरिवीरसेणरायं च ।  
 विन्नवइ सविणयं सिरनिहित्तकरपंजलीबंधो ॥७३०२॥  
 'तुह मगमणुसरंता समागया देव! सेहरासोया ।  
 वेयइ-दक्खिणुत्तरसेढीपहुणो पहुसमीवं ॥७३०३॥  
 उच्चलह देव! गम्मइ तुह विरहंधारियंमि भरहद्धे ।  
 ससि-सूरेहिं व तुम्हेहिं देव! संपज्जउ पयासो' ॥७३०४॥  
 एत्थंतरमि सूरु सपुत्त-दइओ सबंधुयत्तो य ।  
 आरुहइ वरविमाणं उप्पयई गयणमग्गंमि ॥७३०५॥  
 तो समुहागयविज्जाहरिंदसंघट्टघडियमणिमउडो ।  
 नमिओ पुन्न(त्त)पयासियतव्विक्रम-नामसब्भावो ॥७३०६॥  
 सुयसंपाडियसंसारदुल्लहभूसण-सुवत्थदाणेहिं ।  
 सूरु करेइ खयरेसराण सेन्नाण य पमोयं ॥७३०७॥  
 संचलइ चलिरघणमणिविमाणबहुसिहरयनिरंतरियं ।  
 सेन्नं निबद्धगयणप्पमाणउल्लोयवत्थं च ॥७३०८॥  
 अणवरयं वच्चंतं सेन्नं खयराण उचियकालेण ।  
 संपत्तं चंपाए ऊसियधयचिंधमालाए ॥७३०९॥  
 पढमं च पणमिऊणं परमेसरवासपुज्जपयकमलं ।  
 चिरकालदंसणुप्पन्नगरुयमणभत्तिराएण ॥७३१०॥  
 पविसइ पुरीए सूरु सणंकुमारो व्व खयरबलसहिओ ।  
 हरिसपरव्वसचिरपौरलोयपरिवड्डियाणंदो ॥७३११॥

तो वीरसेणराया पिउभत्तिसमुल्लसंतरोमंचो ।  
 नियभत्ति-सत्तिसरिसं वद्धावणयं करावेइ ॥७३१२॥  
 वेयह्णोभयसेढीसु केइ जे खेयरेसरा संति ।  
 विज्जाहरीओ मणहरसरीरसिंगारलडहाओ ॥७३१३॥  
 तह अद्धभारहंमि य जे केइ महीहरा मउडबद्धा ।  
 मंडलिया सामंता रायाणो सव्वपरिवारा ॥७३१४॥  
 आयन्नियसूरागमणजायहरिसुल्लसंतपुलयंगा ।  
 पत्ता चंपानयरिं अंतेउरपरिगया सव्वे ॥७३१५॥  
 सव्वत्तो च्विय सूरागमंमि उवसंतसोयसंतमसो ।  
 वियसंतवयणतामरससुंदरो सहइ जियलोओ ॥७३१६॥  
 सुण्हा वि य चंदसिरी सहिया सिरिअमरसेणकुमरेण ।  
 पणमइ पणामविलुलंतकेसपासा सुसुरयस्स ॥७३१७॥  
 पुत्तं पि अमरसेणं परिरंभइ चुंबई य सीसंमि ।  
 सकयत्थं मन्नंतो अप्पाणं पुत्तपुत्तेण ॥७३१८॥  
 अहिणंदइ सप्पणयं विचित्तजसनरवई महाराओ ।  
 भणइ 'भुयणे तुमं चिय सुयणो पडिवन्नसूरो य' ॥७३१९॥  
 जह जह पेच्छइ पुत्तस्स विजियतियसिंदसुंदरं रिद्धिं ।  
 तह तह सूरो तप्पणइणी य हियए न मायंति ॥७३२०॥  
 अन्नोन्नसंगमुब्भवसुहरसपसरंतहरिसपसराण ।  
 वच्चंति ताण दियहा सुहेण आणंदघडिय व्व ॥७३२१॥  
 अह अन्नया कमेणं आणंदियसयलभुयणवित्थारो ।  
 पत्तो वसंतसमओ वणप्फईपरमबंधु व्व ॥७३२२॥

सव्वत्तो च्चिय पसरंतसरसतरुकिसलयारुणच्छायं ।  
 जायं महीयलं महुसमागमुल्लसियरायं व ॥७३२३॥  
 दूरे मणुस्सलोओ वणस्सईओ वि जत्थ सवियारा ।  
 दीसंति बद्धकुसुमा गायंता भमरविरुएहिं ॥७३२४॥  
 “किंसुयकुडिलनहरकमदारियदप्पियसिसिरसिंधुरो ।  
 घणसहयारसरसतरुमंजरि-जालकडारकेसरो ॥  
 परहुयदुसहसद्दगुंजियरव-भेसियविरहिहरिणओ ।  
 वियरइ कुसुमपंतिदाहुब्भडबालवसंतसीहओ” ॥७३२५॥  
 जे पुव्विं मलयद्धिचंदणलयागेहाओ(उ) संचल्लिया ।  
 एलापल्लवलासिणो य लवली-कक्कोलिहल्लावया ॥  
 भद्रंगीसरियातरंगियजला पंपासरुल्लासया ।  
 ते वायंति विओइणीकयदुहा मंदं वसंतानिला ॥७३२६॥  
 हेलुल्लसंतवियइल्लपसूणलग्ग-भिगावलीवलइणो दुमसन्निवेसा ।  
 दीसंति मोत्तियनिहित्तमहिंदनील-कंठावली पवहिणो व्व महुस्सिरीए  
 ॥७३२७॥

हेलानिज्जियदेव-दाणवगणो पृइज्जए वम्महो ।  
 मंदुच्चारियपंचमं व महुरं गीयं जहिं गिज्जए ॥  
 गाढालिंगणनिब्भरं व सुरयं सेविज्जए संतयं ।  
 सो लोयाण न वल्लहो किर कंहं मन्ने वसंतूसवो ॥७३२८॥  
 इह तरुसु असोओ पंचमो गीयमज्झे ।  
 सयलसुरवरेसुं देवदेवो अणंगो ॥  
 घणतिहुयणकीलाकीलियेसुं वसंते ।

१. सुरतं, खता. टि. ॥

जुयइकोइलाणं सिंजियं सिंजिएसुं(?) ॥७३२९॥  
 एवंविहे वसंते सूरुो सिरिवीरसेणराएण ।  
 सिरिविरइयंजलिवुडं विन्नत्तो विणयनम्मणेण ॥७३३०॥  
 'तुज्झागमणेण व देव ! हरिसियं महियलं वसंतेण ।  
 सीयज्जरमुक्कं पिव उच्छहइ विलासकीलासु ॥७३३१॥  
 कस्स न हरंति हियं दियहा नियसमयलद्धसोहग्गा ।  
 जायनियउउसमागमतरुकुसुमवियासहासव्वा ॥७३३२॥  
 गरुएहिं वि कायव्वं जणवयचित्ताणुवत्तणं देव ! ।  
 इहरा पयइविराओ जायइ नियं नरिंदस्स ॥७३३३॥  
 ता देव ! एस लोओ उज्जलनेवत्थभूसणकलावो ।  
 तुह निग्गमणमहूसवदंसणउक्कुंठिओ द्वारे' ॥७३३४॥  
 तो भणइ सूरसेणो 'करेम एवं' ति जायपरिओसो ।  
 सविसेसरिद्धिदंसणजणियच्छरियओ(रिओ) चलइ राया ॥७३३५॥  
 जयवारणमारूढा दुवे वि धुव्वंतचामराडोवा ।  
 सिरिधरियधवलछत्ता तलसंठियविविहसामंता ॥७३३६॥  
 बहुपौरपरियणारद्धविविहचच्चरिनियच्छरा नियडं ।  
 ठाणड्ढाणनिवेशियपेच्छणयनिहित्तनियदिट्ठी ॥७३३७॥  
 पत्ता उज्जाणवणं विसालभवणं व माहवसिरीए ।  
 संकेयट्ठाणं पिव नीसेसरिऊसुकुसुमाण ॥७३३८॥  
 जं होइ सरसमहुयावाणं व बहुभमरमत्तवालाण ।  
 महुभयनइस्स जए अलंघदुग्गं व सिसिरस्स ॥७३३९॥  
 जं गायइ व्व भसलुल्लसंतरुणिड्ढुणिरवेण महुररवं ।  
 दक्खिणपवणुवे(व्वं)ल्लिरवल्लिभुयाहिं व्व नच्चंइ ॥७३४०॥

जयजयरवं व वियरइ सूरनरिंदप्पवेससमयमि ।  
 अइबहलकोइलाकलयलेण संजायपरिओसं ॥७३४१॥  
 दक्खिणपवणपहल्लिरनवपल्लवपाणिक्खित्तकुसुमोहं ।  
 बहुदियसागयसिरिसूरसेणअग्घं व उक्खिवइ ॥७३४२॥  
 एवं गुणाभिरामं घणकुसुमं नाम उववणं विसइ ।  
 राया पौरपरिग्गहपरियरिओ परमहरिसेण ॥७३४३॥  
 तो भणइ सूरराया पियपुत्तं वीरसेणनरनाहं ।  
 कीलह तुब्भे सव्वे अहमुज्जाणं निरिक्खिस्सं ॥७३४४॥  
 'एवं' ति पभणिऊणं वीरो नीसेसमंडलवईहिं ।  
 नाणाविलासिणीहि य सहिओ अह कीलिउं लग्गो ॥७३४५॥  
 राया वि सूरसेणो सिंगारवईए परिगओ भमइ ।  
 अप्पसमाणनरेसरपरियरिओ मणहरुज्जाणे ॥७३४६॥  
 अल्लवओ नामेणं वणवालो कहइ रायरायस्स ।  
 नाणाविहतरुनियरं विसेसडोहलयनामजुयं ॥७३४७॥  
 'देवदुलंघा विसया हरंति जं माणवा न तं चोज्जं ।  
 एग्गिंदिया वि तरुणो तेहिं हरिज्जंति तं चोज्जं ॥७३४८॥  
 इह केइ फरसणेणं रसणेण य के वि के वि घाणेणं ।  
 रुवणेण के वि तरुणो फुल्लंति य के वि सहेण ॥७३४९॥  
 सरहसपीणपओहरफंससमुप्पन्नतक्खणवियासं ।  
 एयं कुरुबयरुक्खं पेच्छसु घणकुसुमसंछन्नं ॥७३५०॥  
 एसो वि असोयतरु तरुणीपयपहरफंसपरितुडो ।  
 फुल्लइ पहल्लिरुवेल्लपल्लवो [तरुसु रमणीओ(?) ॥७३५१॥

पेच्छह केसरतरुणो तरुणीगंडूसियाए मइरीए ।  
 फुल्लंति नरेसर! न उण अन्नहा पेच्छ अच्छरियं<sup>१</sup> ॥७३५२॥  
 एए चंपयतरुणो वियसंति नरिंद! सुरहिगंधद्धा ।  
 सुसुयंधसलिलदोहलयबद्धफल्लोहरमणीया ॥७३५३॥  
 एसो सो तिलयतरु जो वियसइ कामिणीकडक्खेहिं ।  
 विसमा ह्नु नयणवाणा हुंति अमोहा तरुणं पि ॥७३५४॥  
 विरहितरुणो नरेसर! इमे भणिज्जंति गीयरसिया जे ।  
 फुल्लंति पंचमुग्गारगीयसद्देण रागंधा ॥७३५५॥  
 एए उत्तमतरुणो पुव्वुद्धिद्धा इमे उ मज्झत्था ।  
 जे मज्झिमगुणजुत्ता मज्झिमडोहलयमिच्छंति ॥७३५६॥  
 एसा पियंगुलइया पयइसलज्जा नरिंद! जं एसा ।  
 ताव न वियसइ जाव न झंपिज्जइ रत्तवत्थेण ॥७३५७॥  
 अहमगुणा उण अन्ने अहमसंजायडोहलत्तेण ।  
 इह केए(अ)इमाईया विन्नेया असुइडोहलया ॥७३५८॥  
 इय एवमाइ तरुणो नियनियविसयाहिलासमीहंता ।  
 हेलुल्लसंतकुसुमोहसुंदरा देव ! दीसंति ॥७३५९॥  
 दिट्ठीए कुण पसायं इओ सिणिद्धाए पेच्छ उज्जाणं ।  
 अंतरियपल्लवोहं निरंतरं जत्थ कुसुमोहं ॥७३६०॥  
 हसियं व महिसिरीए तारुन्नभरो व्व सुरहिमासस्स ।  
 कामस्स व जसपसरो दीसइ उज्जाणकुसुमभरो ॥७३६१॥  
 एयं सहयारवणं खुडंतनवमंजरीरयमिसेण ।  
 तुज्झागमणे नरनाह! किरइ रंगावलीओ व्व ॥७३६२॥

ला. प्रती । (ता.प्रतावयं पाठःखण्डितपृष्ठचात्र दृश्यते ॥)



रेहइ दरारुणदलं कुसुमं नवकंचणारविडवस्स ।  
 अहरदलं पिव माहवसिरीए पीयं वसंतेण ॥७३६३॥  
 दरदलियदरंतरनीहरंतमयरंदवासियदियंतं ।  
 फुल्लं सोहइ वियइल्लसंभवं परिमलमहग्घं ॥७३६४॥  
 एयं नरिंद! नोमालियाए आमोयमिल(लि)यभमरोलं ।  
 कुसुमं नवपिंडाउद्धसुद्धवन्नं मणभिरामं ॥७३६५॥  
 एकुविमीसियरुप्पयसुवन्नरससरिसवन्नदलसोहं ।  
 एयं च लकुचतरुणो फुल्लं भण कं न मोहेइ ? ॥७३६६॥  
 एयं च देव! मघकुंदसंभवं दीहकेसरसडालं ।  
 आपिंणपीवरदलं कुसुमं गंधुद्धरं सहइ ॥७३६७॥  
 मणहरवन्नं पि हु कन्नियारकुसुमं न एइ भसलाली ।  
 रूवेण किं व कीरइ गुणेहिं छेया हरिज्जंति ॥७३६८॥  
 अंतो घणकेसरभरदलंतदलसंपुडंतरपिसंगं ।  
 फुल्लं पुन्नागदुमस्स जणइ इंदिराणंदं ॥७३६९॥  
 एए उण फलतरुणो पुरओ दीसंति देव! बहुभेया ।  
 जे नियनियपरियणफलनिहित्तमिव देंति अमयरसं ॥७३७०॥  
 एला-लवंग-लवली-कक्कोली-कथलि-नालिकेरी य ।  
 दक्खामंडव-पिंडी-खज्जूरी-फणसमाईया ॥७३७१॥  
 पेच्छ नरनाह! पुरओ कीलारसपरवसो व्व पुरलोओ ।  
 अणुरायमओ व्व विसेसविहिंकीलाहिं अहिरमइ ॥७३७२॥  
 एसो को वि जुवाणो केयइपत्तमि कुंकुमरसेण ।  
 लिहिऊण चाडुगाहं समप्पए निययदइयाए ॥७३७३॥

एसो उण मयणुम्मायपरवसो विविहलोयमज्जे वि ।  
 छोदूण गोट्टिमज्जे चुंबइ दइयं विगयलज्जो ॥७३७४॥  
 कुसुमरयदूसियच्छिं दइयाए पणामियं वियट्ठेण ।  
 तस्सावणयमिसेणं सुचिरं चुंबिज्जइ पिएण ॥७३७५॥  
 इह देव! को वि तरुणो बहुतरुणीरायपरवसप्पाणो ।  
 अवमन्निज्जइ नियपिययमाए कीलाविणोएसु ॥७३७६॥  
 इह देव! मिहुणयाइं पुरओ गायंति तुज्झ पुत्तस्स ।  
 ते उण विवहाणुपत्तबहलपुलयाइं सच्चरियं ॥७३७७॥  
 पेच्छ पुरओ नरेसर! सुण्हा तुह खयरिसहियणसमेया ।  
 लीलंदोलयकीलं चंदसिरी एत्थ अणुहवइ ॥७३७८॥  
 सहिकरयलपेल्लणवसनहंतरुच्छलियदोलयारूढा ।  
 विक्खिरइ चंदजोण्हं व सरलचवलाए दिट्ठीए ॥७३७९॥  
 दूरुच्छालणरहसुच्छलंतरणज्झणिरहारमंजीरं ।  
 झणझणिरकिंकिणीमुहलमेहलंदोलणं सहइ ॥७३८०॥  
 अंदोलिरचंदसिरीसुंदेरनिहित्तखेयरच्छीणि ।  
 अंदोलंति व्व समं सेवारसपरव्वसाइं व ॥७३८१॥  
 देव! नियच्छसु पुरओ मुणालदंडेण ताडिया देवी ।  
 भत्तारनामनिसुणणकयाणुरायाहिं खयरीहिं ॥७३८२॥  
 जंपइ देवी 'मा माउयाओ! ताडेह तिहुयणपसिद्धं ।  
 मह भत्तुणोऽभिहाणं पुच्छंती किं न लज्जेह ? ॥७३८३॥  
 किं कहिओ जाणिज्जइ सूरु निम्महियवेरितिमिरोहो ? ।  
 भण तारयाण मज्जे चंदो साहिज्जए केण ?' ॥७३८४॥

मणहरसललियभासानिवेससरसं च दोलयारूढा ।  
 गायंती चंदसिरी हिययं भण कस्स न हरेइ ? ॥७३८५॥  
 उड्डं पविखप्पमाणा गयणग्गविलग्गललियचरणग्गा ।  
 पाएहिं ताडिऊणं निब्भच्छइ तियसनारीओ ॥७३८६॥  
 उत्तरिया चंदसिरी लीलादोलाओ देव! चलिया य ।  
 वीराहिरायपासं जलकेलीकरणकज्जेण ॥७३८७॥  
 ता एत्थ देव! कीलागिरिंमि अच्चुच्चसिहररमणीए ।  
 ठाऊण नियच्छामो जलकेलिं वीरसेणस्स' ॥७३८८॥  
 'एवं' ति पभणिऊणं जाव नियच्छंति ताव पेच्छंति ।  
 तेलोक्कुसिरीमुहदप्पणं व लीलासरं एगं ॥७३८९॥  
 नवनीलुप्पलघणकमलसंडसंछन्नसलिलसंघायं ।  
 फंसेण जत्थ उदयं मुणिज्जए मुद्धलोएहिं ॥७३९०॥  
 सुंदरअरविंदुब्भवअमंदमयरंदपिंजरजलोहं ।  
 पविलीणकणयरसपूरियं व वीराणुहावेण ॥७३९१॥  
 'तडनियडनिबिडतरुसंडमंडलीसिहरदिन्नगुरुझंपो ।  
 झल्लज्जलंतजलकयकल्लोलं झिल्लइ नरिंदो ॥७३९२॥  
 सिरिवीरनरेसरदिन्नझंपसमकालनिवडमाणेहिं ।  
 खयरिंद-नरिंदेहिं पूरिज्जइ सरवरं सहसा ॥७३९३॥  
 दूरुच्छलंतघणसलिलदीहधाराहिं गयणलग्गाहिं ।  
 उड्ढविमाणट्टियखेयरे व्व सिंचेइ नरनाहो ॥७३९४॥  
 गहिरं अलब्धमज्झं सरोवरं देव! तह वि संखुहियं ।  
 तरुणीसमागमे अहव कस्स नो जायए खोहो ? ॥७३९५॥

घणघुसिणविलेवणतरुणि-ण्हाणसंजायसोणसलिलोहे ।  
 दीसइ सरंमि लोओ राय! महाजलहिबुड्ढो व्व ॥७३९६॥  
 अइगहिरमहानाहीद्रहेसु गंडूसियं व सरसलिलं ।  
 ओहट्टइ पविभत्तं तरुणीकयसंपुडेसुं व ॥७३९७॥  
 विलयाओ नियंबथलथणहरगरुयाओ लाहवं एंति ।  
 अहवा गोरवहाणी न कस्स किर होइ जलमज्झे ? ॥७३९८॥  
 पल्लवियं पिव करपल्लवेहिं अह पुफि(प्फि)यं व नयणेहिं ।  
 तरुणीथणमंडलेहिं सचक्कवायं व्व सरसलिलं ॥७३९९॥  
 बुड्ढु त्ति कवडधाहावियंमि आलिंगिया सदइएण ।  
 पियफंसमउलियच्छी संमोहइ पिययमं का वि ॥७४००॥  
 दइयक्खित्तवारिल्ला नलिणीपत्तेण पिहिउमसमत्था ।  
 अंतरइ थणहरं का वि गहिरजलबुड्ढुकं ठब्बा ॥७४०१॥  
 नियमेव वेणिदंडं दट्ठूण तरंगभंगुरं सलिले ।  
 का वि पियं परिरंभइ सभया जलसप्पबुद्धीए ॥७४०२॥  
 अन्नोन्नमुहनिवेसियमुणालदंडेण नरवर! पियंति ।  
 मिहुणाइं पेच्छ पप्फारवयणगंडूसियं सलिलं ॥७४०३॥  
 पियपेसियनिट्ठुएवारिधारतेरच्छियच्छिविच्छोहा ।  
 दीहसरभल्लिकरंणिं कामस्स व वहइ इह का वि ॥७४०४॥  
 अल्लियइ भमरवंद्रं मुहकमलमिमीए कमलकलणाए ।  
 वारंतीए अहरो दट्ठो अन्नाए भमरेण ॥७४०५॥  
 थूलथणोवरिपक्खित्तदेहभारा नरिंद! एसा वि ।  
 तरइ उरसंठिएहिं कलसजुएहिं व सरमज्झे ॥७४०६॥

कोऊहलबुड्डेणं एसा विनडिज्जए पिययमेण ।  
 आणंदिज्जइ तकखणमप्पाणं दंसयंतेण ॥७४०७॥  
 रायंधेण नियच्छइ कमलं घेत्तूण केण वि नरेण ।  
 ओयारणयं कीरइ नियदइयावयणकमलस्स ॥७४०८॥  
 एसा हम्मइ दइएण देव! करकयमुणालदंडेण ।  
 निब्बुड्डिऊण अंतो वंचंती पिययमपहारं ॥७४०९॥  
 एत्थंतरंमि राया पल्लवयं भणइ 'वच्च रे ! तुरियं ।  
 हक्कारसु मह पुत्तं परिसंतं विविहकीलाहिं' ॥७४१०॥  
 'एवं' ति षभणिऊणं रायाएसं तहेव सो कुणइ ।  
 वीरो वि तुरियतुरियं उत्तरइ सराओ संभंतो ॥७४११॥  
 उत्तरिऊण य कयविविहलडहसिगारमणहरो वीरो ।  
 पाएसु पडइ रायस्स सयलखयरिंदपरियरिओ ॥७४१२॥  
 तो भणइ सूरराया 'तुह सीयलजलकयं सरीरंमि ।  
 मा होउ पुत्त ! जडुं आहूओ तेण कज्जेण' ॥७४१३॥  
 एत्थंतरंमि राया परियण-नरनाह-खयरपरियरिओ ।  
 आरुहइ जयकरिंदं सूरुो सह वीरसेणेण ॥७४१४॥  
 अइगरुयरिद्धिवित्थरआणंदियसयललोयरमणीयं ।  
 पविसइ चंपं राया सलहिज्जंतो पुरजणोहिं ॥७४१५॥  
 इय सूरसेणराया विणीयनियपुत्तवड्डियाणंदो ।  
 तियसाहिवं पि मन्नइ दुत्थियमिव निययसोक्खेण ॥७४१६॥  
 एवं अवरोप्परपरमपीइपरिवड्डमाणसोक्खाण ।  
 वच्चंति ताण दिवसा देवाण व देवलोयंमि ॥७४१७॥

अह अन्नदिणे रयणीए चरिमजामंमि सूरनरनाहो ।  
 सेज्जाए सुहनिसन्नो पेच्छइ सुविणंतरं सहसा ॥७४१८॥  
 उब्भडपवणपहल्लिरकल्लोलसहस्ससंकडिल्लंमि ।  
 जलहिंमि निबुडुंतं अप्पाणं नियइ भयविवसं ॥७४१९॥  
 आरुहइ खणं भंगुरतरंगसिहरेसु लच्छऊसासो ।  
 पेच्छइ पक्खिखप्पंतं पुणो वि पायालतलमूले ॥७४२०॥  
 तत्थ वि करि-मयर-रउद्धसत्तवित्तासिओ खणद्धेण ।  
 पावेइ महादुक्खं पज्जाउलमाणसो अहियं ॥७४२१॥  
 पुणरवि गरुयावत्ते भमेइ चक्कब्भमेण दुक्खत्तो ।  
 नियभज्जं पुत्तं चिय उवालभंतो य विलवेइ ॥७४२२॥  
 तो महया कट्ठेणं परिभममाणं समुद्धमज्झंमि ।  
 पेच्छइ पवहणमेगं लग्गो य समाउलो तत्थ ॥७४२३॥  
 तं आरुहिओ दिट्ठो निज्जामयवयणमुक्कभयसंको ।  
 तेणेव पवहणेणं हरिसपुरं नाम संपत्तो ॥७४२४॥  
 तस्स पुरस्स पहावाओ तत्थ जाओ महंतसंतोसो ।  
 सुविणयमेवं दट्ठुं सहस च्विय जग्गिओ राया ॥७४२५॥  
 जा जोएइ पबुद्धो ता न जलं जलि(ल)निही न यावत्ता ।  
 न कलत्तं न य पुत्तो न य परियणो नेय ते गाहा ॥७४२६॥  
 न य तं पि जाणवत्तं न कन्नधारा न तं पि हरिसपुरं ।  
 अप्पाणं च्विय एक्कं पेच्छइ सेज्जासुहनिसन्नं ॥७४२७॥  
 अह चिंतइ नरनाहो 'किं पच्चक्खं ? मइब्भमो वा वि ? ।  
 सुविणो व्व इंदजालं ? अहवा तत्तंतरं एयं ?' ॥७४२८॥

अवधारिऊण सम्मं विहावियं 'सुविणओ मए दिट्ठो ।  
 एवं न कयाइ मए पुव्विं सुविणंतंरं दिट्ठं ॥७४२९॥  
 ता को इमस्स होही भावत्थो सुमिणयस्स दिट्ठस्स ? ।  
 अहवा परिभाविस्सं समयं सिरिवीरसेणेण' ॥७४३०॥  
 उट्ठइ सयणाओ तओ राया कयसयलगोसकरणीओ ।  
 साहइ सुयस्स सव्वं षणामकरणत्थमायस्स ॥७४३१॥  
 तो मुणियसयलगंथ[त्थ]वित्थरो भणइ वीरेसेणो वि ।  
 'देव! पसत्थो सुमिणो परिणामसुहावहो तुम्ह ॥७४३२॥  
 पयडंतो जहवट्ठियसंसारअसारयं गुरु व्व इमो ।  
 कस्स न कुणेइ सुविणो पडिबोहं भव्वलोयस्स ? ॥७४३३॥  
 एसो अणाइनिहणो संसारो चेव सायरो होइ ।  
 चउरासिजोगिलक्खा कल्लोला एत्थ विण्णेया ॥७४३४॥  
 नियकम्मपवणसंपाडिएसु गुरुविसमजोगिलक्खेसु ।  
 कल्लोलेसु य जीवो अन्नोन्नसुं परिब्भमइ ॥७४३५॥  
 दट्ठूण लहरिसिहरग्गसन्निहं मणुयरज्जअब्भुदयं ।  
 मन्नइ मुहुत्तसोक्खं तत्तो पडणं तु नो मुणइ ॥७४३६॥  
 खणलवसोक्खनिमित्तं जीवो पावाइं ताइं आयरइ ।  
 खिप्पइ जेहिं रसंतो विरसे घोरंधनरएसु ॥७४३७॥  
 करि-मयरसन्निहा हुंति तत्थ नरनाह! नरयपाला जे ।  
 तेहिं अहिदुयदेहो विसहइ गरुयाइं दुक्खाइं ॥७४३८॥  
 करवत्तुकुत्तण-कुंभिपाय-असिपत्त-जंतपीडाइं ।  
 जा जायणाओ नरए आवत्ता ते विणिवि(दि)ट्ठा ॥७४३९॥

अइगरुयजायणासयसमहियसंजायदुक्खपब्भारो ।  
 सुहडो वि सुधीरो वि हु अक्कंदइ दुहभरक्कंतो ॥७४४०॥  
 जाण निमित्तं पुत्विं पावाइं कयाइं निद्धबंधूण ।  
 ते च्चेय उवालंभइ अवहिविन्नायपुव्वभवो ॥७४४१॥  
 'हा पुत्त! पुत्त! दुक्खियसत्तपरित्ताणकरणतल्लिच्छ! ।  
 किं किं उवेक्खसे वीरसेण! तडसंठियं(ओ) एण्ह ? ॥७४४२॥  
 सिंगारवइ! तडत्था संजाया संपयं गयसिणेहा ।  
 आवइवडियस्स ममं साहेज्जं किं न नो कुणसि ? ॥७४४३॥  
 एए वि मउडबद्धा सामंता विविहसुहडसंघट्टा ।  
 मं रक्खिउमसमत्था पेच्छ उवेक्खंति तीरत्था ॥७४४४॥  
 एयं पि चाउरंगं आवइसमयंमि जइ न उवयरिही ।  
 इमिणा निरत्थएणं बलेण ता किं करिस्सामि ?' ॥७४४५॥  
 एवं च विलवमाणस्स तस्स न य कोइ करइ परित्ताणं ।  
 न य कस्स वि सा सत्ती जो तं नरयाओ उद्धरइ ॥७४४६॥  
 तिरियाइयासु आहिंडिऊण नाणाविहासु जोणीसु ।  
 कह कह वि तुडिवसेणं पावइ मणुयत्तणं जीवो ॥७४४७॥  
 संपत्तमाणुसत्तो अदूरभविओ खओवसमजोगा ।  
 भवियव्वयावसेणं दरविहडियमोहघणपडलो ॥७४४८॥  
 सो पुन्नपरिणईए अणेयभवसयसहस्सदुल्लंभो ।  
 अधरीकयकप्पदुमो अचिंतचिंतामणिसरिच्छो ॥७४४९॥  
 हत्थालंबो व भवावडंमि विवडंतयाण जो होइ ।  
 मोहंधयारमहणो रवि व्व परमत्थओब्भासी ॥७४५०॥



जो आगरो व्व पसमामयस्स करुणाए परमबंधु व्व ।  
 उप्पत्तिठाणमणहं अच्चुज्जलवरविवेयस्स ॥७४५१॥  
 जो गरुयमंदरुद्दामविसमदुक्खोहदलणकुलिसो व्व ।  
 संजीवणोसहं पिव विसयविसोवहुयजियाण ॥७४५२॥  
 पज्जलियकसाउब्भडदवानलोण्हवणवारिवाहो व्व ।  
 गुरुकम्मसेलवज्जो उदयगिरी केवलरविस्स ॥७४५३॥  
 अपवग्गमंदिरारोहणंमि निस्सेणिय व्व जो होइ ।  
 एवंगुणसंजुत्तो जिणधम्मो पवहणं भणिओ ॥७४५४॥  
 निज्जामओ उ जो पुण सो होइ गुरु तदत्थकरणपरो ।  
 जम्हा जिणंदधम्मो लब्भइ सुगुरुप्पसाएण ॥७४५५॥  
 तो कहइ गुरु निज्जामओ व्व जिणधम्मपवहणगुणोहं ।  
 जिणधम्मपवहणत्था पावंति अणुत्तरं ठाणं ॥७४५६॥  
 जं हरिसपुरं पत्तं तं निव्वाणं न एत्थ संदेहो ।  
 तत्थ गएहिं य हरिसो पाविज्जइ अणोवमो राय ! ॥७४५७॥  
 तत्थ न जरा न मच्चू न वाहिणो नेय सव्वदुक्खाइं ।  
 एएण कारणेणं संतोसो ताय! तुह जाओ ॥७४५८॥  
 ता देव! तुम्ह सुमिणाणुमाणओ तक्किओ मए होही ।  
 गुरुनिज्जामयजोगा सुधम्मवांहित्थजोगो य' ॥७४५९॥  
 आलिंकिऊण पुत्तं हरिसवसुव्वृद्धवहलपुलयंगो ।  
 तो भणइ सूरसेणो 'सच्चो वक्खाणिओ सुविणो ॥७४६०॥  
 एओ च्चिय सुविणत्थो एवं होही न अन्नहा एत्थ ।  
 एण्हि तुह वयणेणं पुत्त ! पलाणं भयं मज्झ ॥७४६१॥

इहरा सुमिणंतरभयपवुहसंताणजणियवित्थारो ।  
 निब्भरभयप्पकंपो अउरुव्वो को वि मह आसि ॥७४६२॥  
 ता पुत्त! विसमसंसारसायरो विसमदुहसयावत्तो ।  
 इह चेव भवे जाओ पयडो मह तुह विओएण ॥७४६३॥  
 परमत्थभावणाए न किं पि सुहमत्थि एत्थ संसारे ।  
 दुक्खं चिय नीसेसं सकम्मपरिणामसंजणियं ॥७४६४॥  
 बंधुसुहं विसयसुहं धणसुहमाईणि विसयसोक्खाणि ।  
 दुक्खनिमित्तत्तणओ दुहाइं परमत्थओ होंति ॥७४६५॥  
 जे बंधुसंगजणियं सोक्खं मन्नंति केइ मइमूढा ।  
 दुक्खत्तणेण तं चिय तव्विरहहयाण परिणमइ ॥७४६६॥  
 परिणामदुहसरूवं विसयसुहं जे सुहं ति मन्नंति ।  
 पामावाही वि न ताण दुक्खभावेण परिणमइ ॥७४६७॥  
 मूलं अणत्थतरुणो अत्थो चिय होइ सव्वसत्ताण ।  
 मूढाण तह वि अत्थे अउरुव्वो को वि पडिबंधो ॥७४६८॥  
 जं पेरंते गुरुदुक्खकारणं तं न होइ इह सोक्खं ।  
 दुक्खं चिय तं अन्नह कारणकज्जोवयाराओ ॥७४६९॥  
 जह कसविसुद्धरेहं दाह-छेदेहिं विहडियं हेमं ।  
 विबुहेहिं परिचइज्जइ दुक्खनिमित्तं तहा सोक्खं ॥७४७०॥  
 जह मुहमहुरं परिणामदारुणं दुज्जणं जणो चयइ ।  
 तह परिणइजणियदुहं पमुहसुहं परिहरेयव्वं ॥७४७१॥  
 कयअप्पसंकिलेसं बहुजणसंजणियसंकिलेसं च ।  
 पेरंतकिलेसफलं जइ तंपि सुहं दुहं किं नु ? ॥७४७२॥

तो वीरसेण! लोओ जाण निमित्तं किलेसइ सुहाण ।  
 तेसु असारेसु मणो फुरइ न मह दुहनिमित्तेसु ॥७४७३॥  
 अन्नो बुज्झाविज्जइ संसारसरुववत्थ(त्थु)कहणेण ।  
 सत्वं चिय पच्चक्खं अणुअहवओ(अणुहवओ) मज्झ उण जायं ॥७४७४॥  
 तेलोक्के वि दुलंभं लद्धूण सुयं तुमं असामन्नं ।  
 संजायपरमहरिसो मन्नामि कयत्थमप्पाणं ॥७४७५॥  
 सुकलत्तो य सुपुत्तो सुरज्जसंपत्तिसुत्थिओ अहयं ।  
 नियचित्तपमोएणं दुहियं मन्नामि सक्कं पि ॥७४७६॥  
 तं एकूपए सत्वं पुत्तो रज्जं च विसयसंभोया ।  
 छाहाखेडुसरीसं खणेण दिट्ठं चिय पणट्ठं ॥७४७७॥  
 जइ न तुमं मह होंतो ता कह तुह विरहजं भवे दुक्खं ? ।  
 तम्हा दुक्खेक्कफलो जीवाणं बंधुसंजोगो ॥७४७८॥  
 एएण कमेणं चिय विसय-धणाईणि मुणसु नरनाह! ।  
 घडियाइं विहडणेणं जणंति बहुदुक्खपब्भारं ॥७४७९॥  
 ता जह तुमए भणियं तह चेव इमं न एत्थ संदेहो ।  
 इह संसारसमुदे दुक्खं च्विय न उण सुहमत्थि ॥७४८०॥  
 धम्मो अत्थो कामो मोक्खो चत्तारि होंति पुरिसत्था ।  
 सव्वुत्तमो इमेसिं मज्झे जो मोक्खपुरिसत्थो ॥७४८१॥  
 आइमतिओवउत्ता पुरिसा नणु संभवति सव्वत्थ ।  
 मोक्खत्थमुज्जमंता दुलहा ते एत्थ भुयणंमि ॥७४८२॥  
 मोक्खो हि नाम एसो कहिओ सव्वेहिं तित्थनाहेहिं ।  
 जत्थऽच्छइ धुयकम्मो सासयसुहसंगओ जीवो ॥७४८३॥

कम्माणुभावजणियं दुक्खं संभवइ सव्वसत्ताण ।  
 तक्कारणपरिहीणे सुहमेव निरंतरं मोक्खे ॥७४८४॥  
 पावइ कम्मोहिं जओ वाबाहाओ निरंतरं जीवो ।  
 अव्वाबाहसुहं च्चिय मोक्खे उण कम्मनासेण ॥७४८५॥  
 गेवेज्ज-णुत्तरेसुं अंतो सोक्खस्स होइ कम्मवसा ।  
 मोक्खे उण गयकम्मो अणंतसोक्खं लहइ जीवो ॥७४८६॥  
 दुल्लुच्छु-खंड-महु-सक्काराण अहियाहिओ जहा साओ ।  
 तह सव्वसुहाहितो अइरित्तं होइ सिवसोक्खं ॥७४८७॥  
 इय अजरममरमक्खयमणंतमच्चंतसुहमणाबाहं ।  
 मोक्खसुहं नायव्वं जिणपवयणभणियमग्गेण ॥७४८८॥  
 तो विहियगिहत्थोच्चियकरणीओ संपयं अणुचरामि ।  
 तुम्हाणुमईए अहं पव्वज्जं मोक्खसुहहेऊ' ॥७४८९॥  
 तो भणइ वीरसेणो 'एवमिणं देव! जह तए सिद्धं ।  
 अकलंक-निम्मलेहिं वि एवं चिय सिवसुहं कहियं ॥७४९०॥  
 ता इह परमत्थवियारणाए सोक्खं न किं पि संसारे ।  
 दुक्खे वि सोक्खबुद्धी जीवाण अहो महामोहो ! ॥७४९१॥  
 सव्वाण वि उचियमिणं नरिंद! तुम्हारिसाण उ विसेसा ।  
 ता मा कुणसु विलंबं तुह सिद्धउ वंछियं कज्जं ॥७४९२॥  
 जो देव! जलहिबुद्धं देववसा पत्तपवहणं पुरिसं ।  
 उच्चल्लिऊण धेल्लइ पुणो समुद्धंमि सो सत्तू ॥७४९३॥  
 तह भवसमुद्धपडियं पव्वज्जापवहणुज्जमंतं जो ।  
 विणिवारइ सो पुरिसो परमत्थरिउ त्ति विन्नेओ ॥७४९४॥

जह पजलंतगिहाओ वि णीहरंतं नरं नरो को वि ।  
 वारंतो सव्वेहि वि विसेससत्तु त्ति नायव्वो ॥७४९५॥  
 तह नाणादुहहुयवहपजलंतं भवगिहं परिचयंतं ।  
 दिक्खत्त(त्थ)मुज्जमंतं जो वारइ वइरिओ सो वि ॥७४९६॥  
 जह को वि रणे पुरिसो पराजिणंतो महंतमरिसेन्नं ।  
 तं बंधिऊण अप्पइ सत्तूणं सो महासत्तू ॥७४९७॥  
 तह रागाइरिउबलं पराहवंतो अउव्वविरिएण ।  
 जो कुणइ बंधिउं तं तव्वसगं सो महासत्तू ॥७४९८॥  
 जह को वि गोत्तिछूढो कहमवि नीहरइ तीए उव्विग्गो ।  
 'मा नीहर इह चेड्डसु' पभणंतो वेरिओ होइ ॥७४९९॥  
 तह संसारो गोत्ती नियलाइं कलत्त-पुत्तमाईणि ।  
 ताइं परिच्च(च)यमाणो अरिं विणा को निवारेइ ? ॥७५००॥  
 ता देव! अविग्घंतो अहासुहं मा करेह पडिबंधं ।  
 उत्तमपुरिसायरियं पडिवज्जसु उत्तमं दिक्खं' ॥७५०१॥  
 तो अणुकूलपभासिरकुमारवयणं नरेसरो सोउं ।  
 आणंदपुलइयंगो वयणमिणं भणिउमाढत्तो ॥७५०२॥  
 'परमत्थकयवियारं सच्चमिणं वीरसेण! तुह वयणं ।  
 जिणवयणभावियाणं पायं एवंविहालावा' ॥७५०३॥  
 तो भणइ वीरसेणो 'आलावो च्चिय न एस नरनाह ! ।  
 तुज्झाएसा अहमवि दिक्खागहणं पइ जइस्से ॥७५०४॥  
 जं एत्तियं पि कालं विलंबिओ चोइओ वि गुरुणाऽहं ।  
 तं तुज्झ ताय! दीवंतराओ आणयणकज्जेण' ॥७५०५॥

तो भणइ सूरसेणो सिणेहभरगलियनयणबाहोहो ।  
 पडिरुद्धकंठाग्गयगिराए पीईए पियपुत्तं ॥७५०६॥  
 'मा भणसु पुत्त! एवं दिक्खागहणंमि तुज्झ को कालो ? ।  
 कालोच्चियपारद्धं कज्जं सफलत्तणमुवेइ ॥७५०७॥  
 तुममज्ज वि निज्जियसुरकुमाररमणीयरूव-सोहग्गो ।  
 पत्थिज्जसि मयणवियारिणीहिं सुरसुंदरीहिं पि ॥७५०८॥  
 अज्ज वि तुह तारुन्नं अमिलाणं सरयकालकमलं व ।  
 सिसिरसिरीए व छिप्पइ जराए थोयं पि न नरिंद! ॥७५०९॥  
 अन्नं च एस पावो जोवणवणकाणणंमि अक्खलिओ ।  
 मणसीहो गरुयाण वि भंजइ सुहडत्तमाहप्पं ॥७५१०॥  
 एसो इंदियनिवहो अथिरो पयईए चवलपवणो व्व ।  
 कयगरुयपयत्तेहिं वि तीरइ न निरुंभिउं वीर ! ॥७५११॥  
 सुहडं पि सुवीरं पि सुजाइकुलसंभवं पि सगुणं पि ।  
 विनडेइ एस मयणो तिहुयणजयगव्विओ पुरिसं ॥७५१२॥  
 अन्नं च तुमंमि इमा पुहई नवपणइणि व्व अणुरत्ता ।  
 फुडिऊण किन्न हिययं मरिही तुमए वि मुच्चंती ॥७५१३॥  
 भुयणपईवंमि तए निन्नासियसयलवेरितिमिरंमि ।  
 पविसंतंमि नरेसर ! भुयणे अंधया(धा)रयं होही ॥७५१४॥  
 एयाओ लालियाओ पयाओ पइपालियाओ तुह विरहे ।  
 पेच्छामि तं न पुरिसं जं दट्ठुं निव्वविस्संति' ॥७५१५॥  
 इयमाइ बहुप्पयारं जंपंतो सूरनरवई भणिओ ।  
 कयपुव्ववयणपरिहारसुंदरं वीरसेणेण ॥७५१६॥

'जं देव ! तए भणियं दिक्खाकालो न एस इयमाई ।  
 तत्थ जहक्कममुचियं मह विन्नत्तिं निसामेहि ॥७५१७॥  
 जइ नो दिक्खाकालो एसो ता राय! किं नु सो होही ? ।  
 जत्थ जरजज्जरंगो होहं विगलिंदिओ दीणो ? ॥७५१८॥  
 इह न विसहंति दोन्नि वि कालाकालं नरिंद ! कइया वि ।  
 जयसामन्नो मच्चू भवदुक्खहरा य पव्वज्जा ॥७५१९॥  
 पडिवालिज्जइ कालो वि राय! जइ मच्चुनिच्छओ होइ ।  
 तंमि अविणिच्छिए को करेज्ज धम्मे खणविलंबं ? ॥७५२०॥  
 रूवे वि कोऽणुबंधो सणकुमारोवमाए नरनाह ! ।  
 वेसकरस्स व वेसो खणिगो खलु रूवसंजोगो ॥७५२१॥  
 जं तारुन्नं भणियं तं चिय दिक्खाए कारणं पढमं ।  
 थेरत्ते तव-संजमअणुट्ठा(ठा)णं कह णु नित्थरइ ? ॥७५२२॥  
 मणसीहं पि खलिस्सं असमंजससेवणापरं राय! ।  
 तप्पडिवक्खमहाबलजिणपवयणसरहसरणेण ॥७५२३॥  
 जं अविवेयक्कृतं तं खु मणं उप्पहे नरं नेइ ।  
 तं चिय विवेयसहियं पसंतयाकारणं होइ ॥७५२४॥  
 अविवेयपवणसंखोहियंमि चित्तंमि जलनिहिजले व्व ।  
 होंति वियारतरंगा तस्साभावे उवसमंति ॥७५२५॥  
 चित्तायत्ताइं नरिंद! हुंति तह इंदियाइं सव्वाइं ।  
 चित्ते वसीकए कह न ताइं जायंति वसगाइं ॥७५२६॥  
 जह जोइणो चलं पि हु पवणं घणकुंभएण रुंभंति ।  
 परमप्पयंमि नसिउं डहंति चिरसंचियं कम्मं ॥७५२७॥

तह देव! इंदियाइं वि संजमजोगोवगरणभावेण ।  
 दुव्विसयनियत्ताइं कम्मक्खयकारणं होंति ॥७५२८॥  
 बुद्धिमया उवउत्तं विरुद्धमवि वत्थु होइ अविरुद्धं ।  
 मारणरूवं पि विसं मंतहयं होइ अमयं व्व ॥७५२९॥  
 कह देव! सो वि सुहडो वीरो वा विमलजाइ-कुलकलिओ ।  
 एणण अणंगेण विनडिज्जए जो हयासेण ॥७५३०॥  
 बहिरंगसत्तुसंगरलद्धजया ते न हुंति इह सुहडा ।  
 जे अंतरंगरिउरणजयवंता ते परं वीरा ॥७५३१॥  
 दुक्करतवहुयवहपज्जलंतजालासहस्सदुप्पेच्छे ।  
 मज्झ सरीरे मयणो विलिज्जिही ताय! मयणं व्व ॥७५३२॥  
 जइ मत्तमयणमयगलविद्वारणपच्चलो भविस्सामि ।  
 ता वीरो हं इहरा वीर त्ति निरत्थयं नामं ॥७५३३॥  
 दीहाउयंमि नरवर! अच्छंते अमरसेणकुमरंमि ।  
 कह पुहईं निन्नाहा होही सुपयंडभुयदंडे ॥७५३४॥  
 पविसंतंमि वि भुयणे न होइ अंधारयं मए नाह ! ।  
 दीवो व्व पर्ईवाओ पयट्टिए अमरसेणंमि ॥७५३५॥  
 अहिसित्ते तंमि नराहिवंमि अरिदुसहगुरुपयावंमि ।  
 ओल्हाइस्संति पयाओ ताय! लद्धं पइं कुमरं ॥७५३६॥  
 इय देव! तुज्झ परमत्थबुद्धिविन्नायसव्वभावस्स ।  
 कह नीहरंति परिणामनिट्ठुरा वयणविन्नासा ? ॥७५३७॥  
 किर देव! संपयं चिय अक्खाओ तुह हियाहियविसेसो ।  
 सो सव्वो वीसरिओ ? अहह महाकरुणया तुम्ह ! ॥७५३८॥



कह कह वि देवजोएण ताय! जोगो तए समं जाओ ।  
 कह संपइ पुण इच्छसि विओइउं नियपयजुयाओ ? ॥७५३९॥  
 तह कह वि करिस्सं ताय! संपयं जेण मोक्खवासंमि ।  
 अविउत्ता चिरकालं भुजामो सासयं सोक्खं ॥७५४०॥  
 इय एवं पिय-पुत्ता परोप्परं जाव तत्थ जंपंति ।  
 अकलंक-निम्मत्ता वि य समागया तत्थ गयणेण ॥७५४१॥  
 दिप्पंतविमलकेवलकिरणकलावुल्लसंतपरिवेसा ।  
 भवअंक-अंकार व्व दो वि खलयंमि सोहंति(?) ॥७५४२॥  
 हेड्ढागयनिम्मलचरणजुयलनहमणिमऊहसोहिल्ला ।  
 एंति व्व वीरपयलीणभत्तिगुणकरिसिया चंपं ॥७५४३॥  
 पुर-पिट्ठ-उभयपासेसु सुरासुरुग्घुड्ढजयजयासद्दा ।  
 सुरधरियधवलछत्ता सब्भूयथुईहिं थुव्वंता ॥७५४४॥  
 समुहावडियसुरासुरविमुक्कघणकुसुमवासकयपूया ।  
 पखुडंतकुसुमनिवहा ते जंगमकप्पतरुणो व्व ॥७५४५॥  
 दट्ठूण तहाविहसुरसमिद्धिसंभारमणहरे साहू ।  
 वीरो कहइ नरिंदस्स 'ताय! एए गुरू मज्झ' ॥७५४६॥  
 रहसब्भुट्टियनरनाहसूर-वीरेहिं दोहिं तत्थेव ।  
 सत्तट्ठपए गंतुं केवलिणो दो वि पणिवइया ॥७५४७॥  
 तो कारियजिणमंदिरअट्ठहियमाइपूयसक्कारा ।  
 नियरज्जपरिट्ठियअमरसेणपरिवट्ठियाणंदा ॥७५४८॥  
 आपुच्छियपुर-पौरा संमाणियराय-मंति-सामंता ।  
 मणवंछियसमहियदाणच्छिन्नजियलोयदारिद्दा ॥७५४९॥

सेहरयासोयजुया सविचित्तजसा सबंधुयत्ता य ।  
 बहुविहविरत्तखेयर-खयरी-नर-नारिसंजुत्ता ॥७५५०॥  
 कयमज्जणोवयारा हरियंदणकयविलेवणा सव्वे ।  
 दिव्वाहरणसमेया निवसियदेवंगवत्था य ॥७५५१॥  
 सिबियाए समारूढा अफा(प्फा)लियगहिरतूरसंधाया ।  
 अन्नसिबियासु चडिया विचित्तजस-सेहरासोया ॥७५५२॥  
 सुर-नर-विज्जाहर-खेयरिंदउग्घुह्जयजयासद्दा ।  
 अइसघणलोयसंमद्दभरियनीसेसरायपहा ॥७५५३॥  
 खयरिंद-नरिंदेहिं सिबियारयणे 'जय' ति भणिरेहिं ।  
 उक्खित्ते हेलाए पयट्टिए रायमग्गेण ॥७५५४॥  
 बालाण बहुपलावे संसारअसायर(सार)यं च मज्झाण ।  
 निसुणंता विबुहाणं च जंति नाणापसंसाओ ॥७५५५॥  
 रायपहे वच्चंते दट्ठूणं तत्थ पौरनारीओ ।  
 बहुविहविसूरियव्वेहिं कयपलावाओ विलवंति ॥७५५६॥  
 अवरोप्परं पजंपंति जायरणरणयसोयपसराओ ।  
 नयणंसुपूरखालियकवोलतलपत्तलेहाओ ॥७५५७॥  
 'ससि-सूरविरहियं पिव हा हा! उप्पाडियच्छिजुयलं व ।  
 अंधं व अणाहं पिव एएहिं विणा जयं होही ॥७५५८॥  
 को दट्ठव्वो नयणेहिं संपयं रूवरिद्धिजियसक्को ? ।  
 कस्स अच्चभु(ब्भु)याइं सोयव्वाइं च चरियाइं ? ॥७५५९॥  
 दूरे सहिओ! अच्छंतु ताव अन्नाइं देवियव्वाइं ।  
 कह दुक्करत्तवचरणं एस जुया संपयं काही ? ॥७५६०॥

चंदसिरिसुकयग्गहजोग्गो कह कसिणकुंतलकलावो ।  
 असमंजसलुंचणदुक्खभाइ(य)णो संपयं होही ? ॥७५६१॥  
 तंबोलदलारुणिया दसणा नवकुंदकलियसंकासा ।  
 कह णु धरिस्संति सहीओ! संपयं ओल्लिपब्भारं ? ॥७५६२॥  
 बहलहरियंदणुल्लसियगंधवासियदियंतरालंमि ।  
 कह एण्ह दडुव्वा तणुंमि वीरस्स मलपिंडा ? ॥७५६३॥  
 महरिहसेज्जासुहसंगलालिओ पयइकोमलसरीरो ।  
 सक्कुरिल-कढिणखोणीयलंमि सयणं कह करेही ? ॥७५६४॥  
 जो निवसंतो देवंगपवरवत्थाइं भुयणदुलहाइं ।  
 मलसडियचीवराइं एण्ह कह एस परिहेही ? ॥७५६५॥  
 भुयणं पि ह्यबुभुक्खं काउं भुजंतओ सयं जो उ ।  
 सो भुक्खासुसियंगो धराधरिं कह णु हिंडेही ॥७५६६॥  
 हा हा ! हयाओ अम्हे किमेत्तियं जीवियाओ सहि! कालं ।  
 जं एयावत्थगयं नरनाहं पेच्छइस्सामो ? ॥७५६७॥  
 अहवा सहि ! विन्नायं संसारअसारयं मए एण्ह ।  
 जइ सारो संसारो ता कह एएण परिचत्तो ? ॥७५६८॥  
 को सहि! परोक्खसुहकारणंमि परिचयइ नवर पच्चक्खं ।  
 जाव न संसारगयं वेगुन्नं किं पि विन्नायं ? ॥७५६९॥  
 सहि! पेच्छ महासत्तो उद्वा(दा)रहियओ अदीणमणसो य ।  
 वीरो धूलिं व सिरिं मलसंगभएण जो चयइ ॥७५७०॥  
 अम्हारिसाओ पियसहि! खप्परखंडे वि जायलोहाओ ।  
 'झंपणयमिमं होहि' त्ति तं पि चइउं न सक्कामो ॥७५७१॥

एएण जो चइज्जइ तिहुयणसारेण पुरिसरयणेण ।  
 मणचिंतियसंपज्जंतसयलसोक्खेण वीरेण ॥७५७२॥  
 सो सहि! अवस्सविरसो संसारो होइ विरसअवसाणो ।  
 अम्हारिसाण वि मणे उप्पायइ परमनिव्वेयं ॥७५७३॥  
 इय संसारासारयभावणजणजणियसुद्धपरिणामो ।  
 सलहिज्जंतो परमत्थपंडिएहिं च पुरिसेहिं ॥७५७४॥  
 अन्नाण वि पुत्त-कलत्त-विसय-धण-धन्नमाइमूढाण ।  
 नियचिद्धिण्ण तेण वि विहडावंतो महामोहं ॥७५७५॥  
 भुयणे निदरिसणं पिव मग्गपयट्ठावओ व्व लोयाण ।  
 पत्तो उज्जाणवणं वीरो सह जणाणि-जणाएहिं ॥७५७६॥  
 नियनियसिवियाओ तओ सव्वे वि पवड्डमाणसुहभावा ।  
 अणुकूलसउणपसरियमणहरिसा तत्थ उत्तिन्ना ॥७५७७॥  
 वच्चंति परमहरिसुल्लसंतरोमंचकंचुइज्जंता ।  
 अकलंक-निम्मलाणं पासंमि पक्खित्तकुसुमोहा ॥७५७८॥  
 कयतिपयाहिणकिरिया धरणीविलुलंतकुत्तलकलावा ।  
 पणमंति गुरुं भत्तीए तयणु पथुणंति य जहत्थं ॥७५७९॥  
 'जय अच्चुज्जलबहुविहमणाग्घगुणरयणरोहणगिरिंद ! ।  
 जय भवसमुद्धनिवडंतदिन्नसद्धम्मबोहित्थ ! ॥७५८०॥  
 जय निबिडमहामोहंधयारभुवणेक्कनिम्मलपईव ! ।  
 जय विसमकसायानलपलित्तजणसिसिरजलवाह ! ॥७५८१॥  
 जय दुद्धंतचलिंदियतुरंगसंजमणसुदिद्धघणरज्जु ! ।  
 जय मत्तमयणमयगलगलथल्लणकेसरिकिसोर ! ॥७५८२॥

जय संसारमहाडविभमंतजणकहियमोक्खसुहपंथ ! ।  
 जय परमत्थुब्भासणकेवलवरणाणसंपन्न ! ॥७५८३॥  
 जय नियदंसण-जलहरपक्खालियसयलपावमलपंक ! ।  
 जय सम्मदंसण-नाण-चरणकयमोक्खवरमग्ग ! ॥७५८४॥  
 जय तिहुयणबंधव! जय मुणिंद! जय सांमि जयहि परमप्प ! ।  
 अब्भुद्धर अम्हे देव! विमलचारित्तदाणेण ॥७५८५॥  
 तुह वयणामयसवणुल्लसंतनिम्मलविवेयतेयस्स ।  
 संसारो संजाओ उव्वेवयरो महच्चत्थं ॥७५८६॥  
 नाणाविहसप्पसहस्ससंकुलं मंदिरं व अम्हेहिं ।  
 जह नाह! परिचइज्जइ अवायबहुलो भवो तह य ॥७५८७॥  
 तो परमेसर! परमं काऊण पसायमम्ह कुणसु दयं ।  
 जइ अत्थि जोग्गया णे ता दिक्खं देसु भवमहणं' ॥७५८८॥  
 इय वीरसेणवयणं सोउं अकलंककेवली भणइ ।  
 'को अन्नो दिक्खाए जोग्गो नरनाह! तुम्ह विणा ? ॥७५८९॥  
 दुहरूवो संसारो कहियव्वो तुम्ह जो पबोहत्थं ।  
 सो मुणिओ तुम्हेहिं अओ परं किं पि जंपेमो ॥७५९०॥  
 तप्पडिघायनिमित्तं पव्वज्जा समुच्चिय त्ति भणिहामो ।  
 तत्थ पयट्ठो सि सयं उवएसो निरवयासो मे ॥७५९१॥  
 उवएससहस्सेहिं वि के वि न बुज्झंति कसिणघणकम्मा ।  
 अन्ने निमित्तमासज्ज किं पि बुज्झंति तुम्ह व्व ॥७५९२॥  
 ता तुम्ह जहत्थाइं सूरुो वीरो त्ति दोन्नि नामाइं ।  
 एण्हिं जायाइं भवारिनिग्गहे उज्जमंताण ॥७५९३॥

इय तिहुयणे वि सयले तुम्हे च्विय राय! पुत्त(न्)संपन्ना ।  
 तुम्हे च्विय लद्धं माणुसस्स जम्मस्स फलमतुलं ॥७५९४॥  
 ता मा कुणह विलंबं अहासुहं होउ कज्जसंसिद्धी' ।  
 इय भणिए सुहगुरुणा सव्वे वि अब्भुद्धिया समयं ॥७५९५॥  
 सुहपरिणामविसुज्झंतहिययनिद्धकम्मसंधाया ।  
 सुरगिरिगुरुदिक्खाभरहरिसोद्धियपीणखंधंसा ॥७५९६॥  
 आसन्नमहातवलच्छिसंगमुल्लसियपुलयपब्भारा ।  
 तव्वेलुग्गयपहरिसविसेसपफु(फ्फु)ल्लुमुहकमला ॥७५९७॥  
 उत्तारंत्ति सहेलं हारंगय-कडय-कुंडलाईयं ।  
 पंचंगेसु य संसारपासबंधं वराहरणं ॥७५९८॥  
 कयपंचमुट्टिलोया जहाविहं आगमाणुसारेण ।  
 पव्वाविया कमेणं गुरुणा अकलंककेवलिणा ॥७५९९॥  
 तह सेहरयासोया विचित्तजसनरवई समंती य ।  
 मित्तो य बंधुयत्तो रायाणो मंति-सामंता ॥७६००॥  
 सव्वेसिं मिलियाणं हुंति सहस्सा दसद्धसीसाण ।  
 इय परिवारसमेया पव्वइया सूर-वीरमुणी ॥७६०१॥  
 देवी सिंगारवई विजयवई तह य चंदसिरी देवी ।  
 सेहरयासोयाणं देवीओ सव्वपरिवारा ॥७६०२॥  
 दुक्काओ वयनिमित्तं गुरुणा पव्वावियाओ सव्वाओ ।  
 चंदसिरी पुण भणिया 'वच्छे! मा कुणसु मणक्खे(खे)यं ॥७६०३॥  
 एण्हिं न होसि जोगा(ग्गा) वयस्स संजायगब्भभावेण ।  
 कालंतरेण होही पव्वज्जाजोग्गया तुज्झ' ॥७६०४॥

तो गुरुनिवारणुप्पन्नगरुयदुक्खोहहुयवहपुलद्धा ।  
 अथक्कनिव्वडणविवस व्व महीयत्ते पडिया ॥७६०५॥  
 मुच्छावसअसमंजसलुलंतसव्वंगनीसहसरीरा ।  
 अवलोइया सकरुणं वीरेण न नेहभावेण ॥७६०६॥  
 तो चंदणरससीयत्तजलहल्लिरपल्लवग्गपवणेण ।  
 आसासिओवविद्धा भणिया अकलंकदेवेण ॥७६०७॥  
 'जइ विन्नायजिणागमपरमत्थुप्पन्नसुहविवेयाए ।  
 तुज्झ वि एवं वट्टइ न अन्नारीसु ता दोसो ॥७६०८॥  
 सविवेइणो वि जइ निव्विवेइसरिसं करंतणुट्ठाणं ।  
 ता ताण कह विसेसो नज्जइ सामन्नभावेण ?' ॥७६०९॥  
 तो चंदसिरी जंपइ 'भयवं! अन्नो न अत्थि मह सोओ ।  
 पव्वइओ मह दइओ कह होहं संपइ इयाणिं ? ॥७६१०॥  
 किंतु तुब्भेहिं(हि) कहियं पव्वज्जंती अहं सह इमेण ।  
 पच्छिमभवंतरेसुं एत्थ भवे ता कह विउत्ता ? ॥७६११॥  
 एयं चिय मह दुक्खं अन्नं तु न किं पि देव! संभवइ ।  
 अहवा न मंदपुत्राण मत्थए ठंति गुरुहत्था' ॥७६१२॥  
 तो भणइ गुरु 'मा किं पि कुणसु खेयं मणंमि चंदसिरी(रि)।  
 होही तुज्झ विलंबो पबोहहेऊ बहुजणाण ॥७६१३॥  
 अज्ज वि न तुज्झ चारित्तमोहकम्मखओवसमजोगो ।  
 संभवइ तेण संपइ कालविलंबो समुप्पण्णो ॥७६१४॥  
 इह चेव भवे सुंदरि! पव्वज्जं पालिऊण अकलंकं ।  
 वीरेण समं लहिहसि निव्व्याणं नत्थि संदेहो' ॥७६१५॥

तो गुरुवयणायणववगयनीसेसदुक्खपब्भारा ।  
 पणमइ कमेण अकलंक-सूर-वीराइसाहूण ॥७६१६॥  
 तो अमरसेणराया विणयावणएण उत्तमंगेण ।  
 वंदइ पियामहं पियरमाइसाहूण संघायं ॥७६१७॥  
 संबोहिऊण जणणिं समयं घेत्तूण पविसइ पुरीए ।  
 पियरपयट्ठियमग्गेण कुणइ रज्जं गुरुपयावो ॥७६१८॥  
 एत्तो य सूर-वीरा मुणिचंदा सयलसाहुपरियरिया ।  
 अब्भसियसाहुकिरिया अहीयनीसेससुत्तत्था ॥७६१९॥  
 अंतोहुत्तवियंभियअहियाहियभवसहावनिव्वेया ।  
 पवयणभणियकमेणं चरंति घोरं तवच्चरणं ॥७६२०॥  
 छट्ठम-दसम-दुवालसेहिं मास-द्धमासखवणेहिं ।  
 परिसोसियंगलट्ठी चम्मट्ठी-ण्हारुमेत्ततणू ॥७६२१॥  
 एगविहसंजमरया दुविहपरिचत्तबंधणा सम्मं ।  
 निच्छिन्नतिविहदंडा निग्गहियचउक्कुसाया य ॥७६२२॥  
 पंचमहव्वयदुद्धरभारधरा पंचसमियसंजुत्ता ।  
 रक्खियच्छविह(छव्विह)जीवा सत्तभयट्ठाणप(पा)मुक्का ॥७६२३॥  
 निहयट्ठमयट्ठाणा विसुद्धनवबंभगुत्तिसंजुत्ता ।  
 दसविहधम्मसमेया इयमाइअणंतगुणजुत्ता ॥७६२४॥  
 किं बहुणा ? अट्ठारससीलंगसहस्सभारधुरधवला ।  
 सव्वत्थ अपडिबद्धा समतण-मणि-कंचणसहावा ॥७६२५॥  
 गिम्हंमि दिणद्धे उद्धजाणुणो झलजलंतसव्वंगा ।  
 अणिमिसनयणनियच्छियसूरा आयावणं लेत्ति ॥७६२६॥



रविवंकनालनिग्गयलूयानलजलियदेहअंगारा ।  
 नियजीवकंचणाओ कम्मकिट्टं विसोहंति ॥७६२७॥  
 अइदूसहंसूरमयूहतावपगलंतसेयसलिलोहा ।  
 अंतोसुहझाणानलविलीणनीणंतपाव व्व ॥७६२८॥  
 आसारथूलधारानिवायपविरेल्लियावणितलंमि ।  
 वासारत्ते कंदरदरीसु चिड्ढति संल्लीणा ॥७६२९॥  
 कयचउमासचउव्विहपच्चक्खाणा चरंति तवचरणं ।  
 संजमभंगभएणं ठाणाओ पयं पि न चलंति ॥७६३०॥  
 सिसिरसमयंमि हिमकणसंचलियपयंडमारुयप्पहया ।  
 हिमपिंडपंडुरंगा सहंति सीयं महावीरा ॥७६३१॥  
 हिमवायंतमहानिलपकंपियंगा फुरंतअहरदला ।  
 दुडुडुकम्मनिट्टवणजायरोस व्व कंपति ॥७६३२॥  
 कत्थ वि मसाणभूमिसु कयकक्कुसरक्खसट्टहासासु ।  
 अब्भहियवीरहियया काउस्सग्गेण चिड्ढति ॥७६३३॥  
 जे सुसियमंस-वस-रुहिरभाव-चम्मट्टि-णहारुमेत्ततणू ।  
 नियवग्गसंकिएहिं वेयालभडेहिं दीसंति ॥७६३४॥  
 कत्थ वि रायपहेसु कयनिच्चलसव्वराइपडिमाण ।  
 थंभठ्ठमेण वसहा अंगाइं घसंति अंगेसु ॥७६३५॥  
 इय नाणाविहदुक्करतवचरणरयाण सूर-वीराण ।  
 समइक्कुंता बहुया दियसा अइसत्तवंताण ॥७६३६॥  
 तो अकलंको जोगं(ग्गं) नाउं सिरिवीरसेणमुणिचंदं ।  
 दससाहस्सियसंघस्स अहिवइं ठवइ आयरियं ॥७६३७॥

आयरियठावणे(ण)-समयेव(सममेव?) उप्पन्नओहिवरनाणो ।  
 दुक्करतवप्पहावाओ(उ) गयणगामी य संजाओ ॥७६३८॥  
 इय वीरसेणसूरी विहरइ वसुहायलं भुयणसूरो ।  
 अवणंतो लोयाणं दुरंतगुरुमोहतिमिरोहं ॥७६३९॥  
 राया वि अमरसेणो सेणासंमददलियमहिवीढो ।  
 सम्मं पसाहियासेसविसमसामंतनरनाहो ॥७६४०॥  
 उगयगरुयपयावो पत्तमहारायनामधेयो य ।  
 पालइ वसुहं नय-विक्रमेहिं अक्कंतमहिवीढो ॥७६४१॥  
 देवी वि य चंदसिरी पइदियहपवड्ढमाणगुरुगब्भा ।  
 दइयं अविम्हरंती घरवासं मुणइ गोत्तिं व ॥७६४२॥  
 दुसहपियविरहहुयवहपुलडुसव्वंगजायदाहाए ।  
 सो नत्थि उवाओ तीए को वि जह जायए सोक्खं ॥७६४३॥  
 संधुक्कइ व(व्व) सिसिरानिलेण जलइ व्व चंदणाईहिं ।  
 उवसमहेऊहि वि अहियमेव विरहानलो तीए ॥७६४४॥  
 सुविवेइणो वि मन्ने दुक्खं आवडइ किं पि तं गरुयं ।  
 छाइज्जइ सो वि हु जेण मेहपडलेण सूरो व्व ॥७६४५॥  
 जइ छाइओ वि तह वि हु उवयारी आवयाए सुविवेओ ।  
 घणसंछन्नो वि रवी न देइ निसि-तिमिरअववा(या)सं ॥७६४६॥  
 इय सा बहुदुक्खा वि हु गुरुवयणविसंसजायपच्चासा ।  
 संधीरइ अप्पाणं जिणवयणविभावणगुणेण ॥७६४७॥  
 अह अन्नदिणे देवी पवड्ढमाणाइरेगसंतावा ।  
 निसि महरिहसेज्जाए दंतवलभीए ओल्लरइ ॥७६४८॥

दासीजणो य चिड्डइ को वि नुवन्नो य को वि उवविट्ठो ।  
 अन्नो य चरण-करयलसंबाहणकम्मअक्खणिओ ॥७६४९॥  
 अवरो वि गरुयघणकसिणकेसपब्भारविवरणक्खणिओ ।  
 अन्नो उण सीयलतालियंटकयसजलघणपवणो ॥७६५०॥  
 अन्नो वि को वि चिरवीरसेणसच्चरियकहणतल्लिच्छे ।  
 अहिणंदिज्जइ देवीए दइयभत्तीए सम्पणयं ॥७६५१॥  
 एत्थंतरंमि भणियं विलासलच्छीए 'देवि! किं चोज्जं ? ।  
 तुह अज्ज वि देवोवरि न होइ अणुरायवोच्छिती ? ॥७६५२॥  
 जं जइय च्विय हुंतं वोलीणं देवि! तं तय च्वेय ।  
 किं अप्पा खेइज्जइ अज्ज वि वोलीणसुहकज्जे ? ॥७६५३॥  
 तो(ते?) संपइ गुरुट्ठा(ठा)णे पुज्जा तुह देवि! वंदणिज्जा य ।  
 कह पुज्ज-वंदणिज्जेसु कीरणे तेसु अणुराओ ? ॥७६५४॥  
 गिहिभूमिमइक्कंता पत्तो(त्ता) जइभूमियं भुयणपुज्जं ।  
 नियभूमियाविरुद्धो अणुराओ पावमावहइ ॥७६५५॥  
 तो चंदसिरी जंपइ 'सहि! एवं किं तु हयमणं मज्झ ।  
 धावइ सणेहट्ठा(ठा)णं कीडियवंद्रं पि खलियं पि ॥७६५६॥  
 एक्कभवंतरजाओ वि होइ दुत्थक्कओ सहि! सिणेहो ।  
 किं पुण सत्तइभवंतरेसु बुट्ठंगओ जोगो ?' ॥७६५७॥  
 इयमाइएहिं ताओ सैरालावेहिं जाव चिड्ढंति ।  
 ता झत्ति महासप्पो पडिओ गयणाओ कसिणंगो ॥७६५८॥  
 चंदसिरिकसिणकम्मोहिं निम्मिओ पयइदूसहविवागो ।  
 मरणस्स व पज्जाओ अकालडंडो व्व जो पडिओ ॥७६५९॥

अगुन्नयफारफणाकडप्पसंप्पा(पा)डिओब्भडवियासो ।  
 जमराएण व हत्था पसारिओ देविगहणत्थं ॥७६६०॥  
 पसरंतीए व निसिरक्खसीए कसिणंधयारघोराए ।  
 देवीए भक्खणट्ठं जीहादंडो व नीहरिओ ॥७६६१॥  
 पुरओ भविस्सदूसहगुरुतरदुक्खेहिं कडुविवाएहिं ।  
 हत्थालंबो व्व कओ उक्खिवणत्थं च देवीए ॥७६६२॥  
 बहुदुहसयगिलियाए देक्खावेक्खीए जायतणहेण ।  
 गिलणत्थं गयणेण व जीह व्व पसारिया दूरं ॥७६६३॥  
 पुरओ उज्जोयंतो फुरंतफणरयणकिरिणदीवेहिं ।  
 रयणीतमपिहियं पिव देविं अबलोयइ भुयंगो ॥७६६४॥  
 पुरओ करालमुहनिग्गएण जीहाजुएण कहइ व्व ।  
 मरणं वा हरणं वा दो चेव गई तुहं अज्ज ॥७६६५॥  
 इय गरुयभीसणायारकालकायं सरीसिवं दट्ठुं ।  
 भयविवसवेविरंगो परिवारो तक्खणे नट्ठो ॥७६६६॥  
 तो गरुयदिसागयदीहरकरसरिसकायविकरालं ।  
 दट्ठुं देवी भुयंगं अह सुंयरइ जिणनमोक्कारं ॥७६६७॥  
 पंचनमोक्कारपहावपहयनीसेसभीसणाडोवो ।  
 तक्खणमेत्तेणं चिय सो भुयगो निफु(प्फु)रो जाओ ॥७६६८॥  
 एत्थंतरंमि सहसा विज्जाबलपबलजणियघणपवणो ।  
 अंदोलंतो चंपापुरीए पासायसंघायं ॥७६६९॥  
 उच्छालियधरणीरयघणपडलनिरुद्धनहधरावलओ ।  
 अंतरियनयणपसरो वेयवसुप्पाडियदुम्मे(मे)हो ॥७६७०॥

इय गयणधरावलयं जंपंतो पंसुणा तहिं पत्तो ।  
 नामेण चंडकेऊ लहुभाया पवणकेउस्स ॥७६७१॥  
 सो पवणकेउवहकाल एव सेले विसालसिंगंमि ।  
 उग्घोसिउण वैरं उप्पइओ वीरपच्चक्खं ॥७६७२॥  
 पालंते वीरनराहिवंमि पुहइअभग्गमाहप्पे ।  
 सगिहाओ न नीहरिओ एत्तियकालं भउब्भंतो ॥७६७३॥  
 संपइ पुण नाऊणं गिहीयदिक्खं नराहिवं पावो ।  
 चिरवेरमणुसरंतो निराकुलो आगओ तत्थ ॥७६७४॥  
 आगंतूण य तेण अद्दी(दि)स्समाणेण बहलधूलीए ।  
 अह परिवारसमक्खं अवहरिया चंदसिरिदेवी ॥७६७५॥  
 तक्कुरयलफंसेणं कोमलतूलीनिवेसवाएण ।  
 नायं अवहरिया हं गयणे केणाऽवि खयरेण ॥७६७६॥  
 तो चिंतइ चंदसिरी खयरेणं तेण अवहरिज्जंती ।  
 'किं कारणमेएणं हरिया हं पावकम्मेण ? ॥७६७७॥  
 अहवा थोवं एयं विवरोक्खे तस्स भुयणवीरस्स ।  
 अज्ज वि बहु दड्ढ्वं दुक्खं बहुदुक्खजोग्गाए ॥७६७८॥  
 ता को एसो पावो ? हरिऊणं किं व एस मह काही ? ।  
 अहवा किं नायव्वं ? राग-दो(दो)सुक्कडो को वि ॥७६७९॥  
 रागंधो वा अणुरायपरवसो अवहरेइ परनारिं ।  
 वेराणुबंधचित्तो बीओ उण जलियकोवग्गी ॥७६८०॥  
 अन्नं न अत्थि अवहरणकारणं एत्थ सयलभुयणे वि ।  
 राग-दोसा च्चिय हुंति एत्थ मूलं अणत्थाण ॥७६८१॥

अवहरउ किं व काही ? मह सामन्नाण निच्छयमणाए ।  
 नियसीलरक्खणं वा मरणं वा जीए इद्वाइं ॥७६८२॥  
 सोओ वि कहं कीरइ जुयइसहावत्तणेण जो सुलहो ।  
 नियकम्मउवणयाइं सोएण न जंति दुक्खाइं ॥७६८३॥  
 ता जं जं मह होही दुक्खं संपाडियं सकम्मेहिं ।  
 तं तं चिय सहियव्वं मणखेयं अकयमाणीए' ॥७६८४॥  
 इय एवं चिंतंती चंदसिरी चंडकेउणा तेण ।  
 अवहरिऊणं नीया सिहरोवरि मलयसेलस्स ॥७६८५॥  
 ठविऊण तत्थ खयरो जा जोयइ रूवसंपयं तीए ।  
 विम्हयपसारियच्छे सहसा ठगिओ व्व ता जाओ ॥७६८६॥  
 'अहह महच्छरियमिणं तिहुअणअब्भहियरूवगारविया ।  
 जस्सेसा पियभज्जा सफलं खलु जीवियं तस्स ॥७६८७॥  
 एसा उन्नयभूधणुविमुक्कतिख(क्ख)ग्गमयणवाणेहिं ।  
 ससुरासुर-मणुयाइं निज्जिणइ जयाइं न हु भंती ॥७६८८॥  
 सइ संपुन्नस्स अलंछणस्स एयाए दोसरहि[अ]स्स ।  
 ओयारणयं कीरइ इयरसली मुहमयंकस्स ॥७६८९॥  
 एयाए अइविसालं अच्चुन्नयगुरुपओहरक्कंतं ।  
 विज्जाहरामराणं गम्मं गयणं व वत्थयलं ॥७६९०॥  
 बलिणा अक्कंतो इव विवरोक्खे वीरसेणरायस्स ।  
 झीणो इमीए मज्झो अहिययरं मज्झदेसो व्व ॥७६९१॥  
 परिवियडनियंबत्थलपरिड्विओ ऊरुजुयलखंभद्धे ।  
 मयणो मत्तगओ इव निरंतरं वसइ एयाए ॥७६९२॥

इय नियनियदेहोच्चियविभायसुविभत्तरूवसोहाए ।  
 जं जं चिय पुलइज्जइ तं तं चिय जणइ अणुरायं ॥७६९३॥  
 पयइए(ईइ) सीलकलिया विसेसओ सावयत्तभावेण ।  
 परपुरिससंगविमुहा कह एसा मज्झ संघडिही ॥७६९४॥  
 पुत्विं असोयराएण रूव-विन्नाण-गुणमहग्घेण ।  
 अवहरिया तह वि न से अणुरत्ता सा कहं मज्झ ?' ॥७६९५॥  
 इय एवमाइबहुविहवियप्प-संकप्पसंकुलो चंडो ।  
 जावच्छइ चंदसिरी ता तं इय भणिउमाढत्तो(त्ता) ॥७६९६॥  
 'किं अवहरिया खेयर! अणुरत्तेणं अहव कुद्धेण ? ।  
 जइ रत्तेणं हरिया ता विफलो तुज्झ पारंभो ॥७६९७॥  
 अहवा परिकुविएणं ता मारसु किमिह किर विलंबेण ?' ।  
 इय पभणित्तिं देविं पुण पभणइ चंडकेऊ वि ॥७६९८॥  
 'हरिया सि मए सुंदरि! बंधववेराणुमग्गलग्गेण ।  
 तुह दंसणेण संपइ वेरं पि पणासियं देवि ! ॥७६९९॥  
 तं चिय रूवं भन्नइ मारणववसायजायबुद्धीण ।  
 कुद्धाण वेरियाण वि जं दिट्ठं कुणइ अणुरायं ॥७७००॥  
 जाणामि तुज्झ सीलं गुणा वि तुह तिहुयणं पि रज्जंति ।  
 अम्हं गुणाणुरत्ताण किं पि जं कुणसि तं कुणसु' ॥७७०१॥  
 भणियं चंदसिरीए 'अलियं चिय च(ल)वसि जायमइमोहो ।  
 दोसाणुराइणं पि हु जं अप्पं भणसि गुणरत्तं ॥७७०२॥  
 अणुराओ परनारिसु दोसो च्विय सो जयंमि सुपसिद्धो ।  
 दोसाणुराइणो तुज्झ खेयर! जुत्ता नणु उवेक्खा ॥७७०३॥

सच्चं चिय रागंधो उचियाणुचियं न जाणसे मूढ ! ।  
 कह रायहंसदइयं धिद्धो वि हु वंछए रिद्धो ? ॥७७०४॥  
 जायइ दुहेक्कहेऊ अणुराओ हरिणयस्स नियमेण ।  
 सीहकलत्ते खेयर! मणोरहाणं पि हु अगम्मे ॥७७०५॥  
 खज्जोओ व्व न लज्जसि अहिलसमाणो रविस्स पियभज्जं ।  
 डज्झिहसि फुडं खेयर! नियफुरणबलेण परिहीणो ॥७७०६॥  
 कायस्स व तुह जाया सत्ती जै(जइ) कहवि गयणगमणंमि ।  
 ता एत्तिएण मन्नसि अप्पाणं वत्थुबुद्धीए ! ॥७७०७॥  
 अहवा को तुह दोसो ? गोत्तं चिय तुम्ह पावकम्मयरं ।  
 चंडालकुलं मोत्तुं नन्नो गोमंसमहिलसइ ॥७७०८॥  
 पच्चक्खदिद्धपरनारिरत्तनियभाउविरसपरिणामो ।  
 तह वि न अज्ज वि सिक्खसि अहह महामोहमूढो सि ! ॥७७०९॥  
 वस-मंस-रुहिर-पूयंत-मुत्त-बहुकलिलअसुइरसभरियं ।  
 परनारिमिसेण नरा वेयरणिनइं व गाहंति ॥७७१०॥  
 बिंबाहरकुसुमहं समुच्चरोमंचकंटयाउलियं ।  
 आलिंगंति हयासा सिंबलिरुक्खं व परनारिं ॥७७११॥  
 दिद्धेहि वि तेहि नरेहि नवर अल्लियइ पावपब्भारो ।  
 जाण मणंमि वि जायइ परनारिपसेवणावंछा ॥७७१२॥  
 ते सुणया न मणुस्सा जे जुयइसु अकयअप्प-परभावा ।  
 जम्हा न ताण परनारि-माउ-भइणीकयविवेओ ॥७७१३॥  
 रायविरुद्धं जणनिंदियं च नरएक्कपडणहेउं च ।  
 कह जाणंता वि नरा मूढा सेवंति परनारिं ॥७७१४॥



अणुरत्त त्ति कंहं सा सेविज्जइ निब्भराणुरत्तेहिं ।  
 जा इह परलोएसुं कारणमिह होइ दुक्खाण ॥७७१५॥  
 परनारिं सेवंतं को मं मुणिहि त्ति धरसु मा हियए ।  
 अप्पाण च्चिय होही अकम्मनिरयस्स तुह सत्तू ॥७७१६॥  
 खणलवसुहस्स कज्जे बहुसागरदुत्ता(त्त)राइ दुक्खाइं ।  
 मा अज्जिण बहु छेयं निल्लाहं कुणइ को कज्जं ? ॥७७१७॥  
 इयएवमाइ भणियं चंदसिरिं खेयरो पुणो भणइ ।  
 हियउल्लसंतअइभीमरोसरज्जंतनयणजुओ ॥७७१८॥  
 'जइ तुह न अम्ह उवरिं अणुराओ ता कयाइ मा होउ ।  
 अस्सोयव्वाइं कंहं भाससि अइदुइवयणाइं ? ॥७७१९॥  
 ता दुव्वयणपहासणफलमेयं उवणयंतु तुहमेण्हि ।  
 चइऊण अणुणयमहं हढेण तुममज्ज भुजिस्सं' ॥७७२०॥  
 तो चंदसिरी तव्वयणसवणचारित्तभंगभयभीया ।  
 मलयसिहराओ घेल्लइ अप्पाणं छिन्नटंकमि ॥७७२१॥  
 इह सीलजीवियाणं सीलं चिय वल्लहं कुलवहूण ।  
 लब्भइ पुणो वि जीयं सीलं पुण खंडियं कत्तो ? ॥७७२२॥  
 सीलं भुयणदुलंभं रक्खंतीए पवुइपुलयाए ।  
 देवीए जीवियं तिणतुलाए तुलियं तहिं समए ॥७७२३॥  
 एत्थंतरे पडंती चंदसिरी तक्खणे गिरियडाओ ।  
 मलयाहिवेण दिट्ठा जक्खेणं मलयमेहेण ॥७७२४॥  
 साहम्मिवच्छलेणं चंदसिरीसत्तहरियहियएण ।  
 जक्खेण अकयबाहं पडिच्छिया कोमलकरेहिं ॥७७२५॥

पेच्छइ सहावेमणहररुवनिवेसुल्लसंतसोहग्गं ।  
 सो जक्खो चंदसिरिं तरलच्छो तियसनारिं व्व ॥७७२६॥  
 दट्ठूण मणे चिंतइ 'पसत्थबहुलक्खणंकियसरीरा ।  
 एयाए आगियइ(गिई)ए एसा अच्चुत्तमा नारी ॥७७२७॥  
 आपंडुरगंडत्थलखामकवोलत्तणेण कहइ व्व ।  
 आवन्नसत्तभावं पयईए मणोहरच्छायं ॥७७२८॥  
 अच्चुज्जलकंतिकलावधवलियासेसवोमवित्थारा ।  
 कोमुइनिसि व्व एसा सरयब्भंतरियससिबिंबा' ॥७७२९॥  
 इय चिंतिऊण जक्खो मलयद्दिगहीरकंदरदरीए ।  
 विवरदुवारेणं तो पविसइ सह तीए नियभवनं ॥७७३०॥  
 नेऊण तत्थ मणहरमणिमयपल्लंककोमलु(ल)त्थुरणे ।  
 मोत्तुं देविं जंपइ जक्खो दूरासणनिविट्ठो ॥७७३१॥  
 'मा भाहि मलयसिहराओ निवडमाणी मए तुमं धरिया ।  
 मलयमेहाहिहाणेण एत्थ वत्थव्वजक्खेण ॥७७३२॥  
 कस्स न जायइ हिययं सपक्खवायं गुणीसु सगुणाण ।  
 इय आणि(णी)या इहइं तुमं मए निययभवनंमि ॥७७३३॥  
 ता तुह इमं(एयं?) गेहं अहं पिया तुज्झ अच्छ वीसत्था ।  
 सन्निहिओ तुह वट्ठइ पसूइसमओ वि पसयच्छि! ॥७७३४॥  
 पच्छ नीसल्लाए जं जह समयोचियं तयं काहं' ।  
 इय भणिया चंदसिरी सत्थमणा भणिउमाढत्ता ॥७७३५॥  
 'तुह गेहे अच्छंतीए मज्झ न हु अत्थि कोइ मणखेओ ।  
 जीए गुणपक्खवाई जणओ सि तुमं समीवत्थो ॥७७३६॥

आवइवडियाए महं अपरित्ताणाए तह आ(अ)णाहाए ।  
 मोत्तूण तुमं पुन्नोदओ व्व को कुणइ कारुन्नं ? ॥७७३७॥  
 जइ न तुमं गेण्हंतो ता हं गिरिवियडकूवतडपडिया ।  
 होऊण मंसपिंडो जोग्गा हुंती सी(सि)यालाण' ॥७७३८॥  
 तो भणइ जक्खराया 'न पुत्त! एएण आगिइगुणेण ।  
 एएहिं लक्खणेहिं य दुक्खं पेच्छंति नारीओ ॥७७३९॥  
 अह कह व पुव्वकम्माणुभावसंपाडियं दुहं होइ ।  
 तह वि न तं होइ थिरं विहडइ तस्साणुहावेणं' ॥७७४०॥  
 इय चंदसिरी जक्खाणुहावसंपज्जमाणमणतोसा ।  
 सव्वत्तो अवलोयइ तं भवणं जक्खरायस्स ॥७७४१॥  
 नीसेसकणय-मणि-रयणनिम्मियं विविहभूसियातुंगं ।  
 उत्तुंगसिहरसंठियधयमालासहसरमणीयं ॥७७४२॥  
 उव्वत्तणेण पिहुलत्तणेण संगहियगयणवित्थारं ।  
 मणि-रयणकउज्जोयं सजोइसं भुयणवलयं व्व ॥७७४३॥  
 पयइविसालं तुंगं अणेयमणि-रयण-भूसणुज्जोयं ।  
 पुन्नज्जणेहिं ठाणं हिययं पिव मलयसेलस्स ॥७७४४॥  
 बहुखन्नवाइभीओ भवणमिसेणं व रयणमणिसिहरो ।  
 रोहणगिरि व्व सरणं पडिवन्नो मलयसेलस्स ॥७७४५॥  
 विविहमणिरयणबंधं जं कंचणघडियपेढवित्थारं ।  
 सीहासणं व सोहइ तलडियं सेलरायस्स ॥७७४६॥  
 फालिहभित्तिसु संकंतनीलमणिश्चभदसंणुत्तसिओ ।  
 रक्खसभएण दइयं आलिगइ जत्थ जुयइजणो ॥७७४७॥

दट्ठूण मिहुणयाइं नियपडिबिंबाइं व[फ]लिहभित्तीसु ।  
 जणसंमइभएण व सुरयसुहं नाणुसेवंति ॥७७४८॥  
 समुहट्टियाण अन्नोन्नभित्तिसंकंतादिट्ठरूवाण ।  
 सुव्वइ परनर-नारीभमेण कलहो मिहुणयाण ॥७७४९॥  
 कत्थ वि घणविट्ठुमसोणकिरिणवित्थारभरियदिसिचक्कं ।  
 संज्झासमयजिणच्चयणसंमोहं जणइ जक्खाण ॥७७५०॥  
 कसणिंदनील-मरगयमऊहमंसलियएक्कुपेरंतं ।  
 निबिडंधयाररयणीवामोहं कुणइ जक्खाण ॥७७५१॥  
 बहुकक्केयण-घणपुस्सरायकिरिणोहरंजियदियंतं ।  
 वहइ पओसे वि पहायसमयसंकं सुरवहूण ॥७७५२॥  
 इय तं मणोभिरामं भवणं सिरिमलयमेहजक्खस्स ।  
 पेच्छंती चंदसिरी सच्चविया जक्खविलयाहिं ॥७७५३॥  
 अच्चभु(ब्भु)यचंदसिरीसरीरसोहग्गदंसणरसेण ।  
 अवरोप्परेण तासिं संजाया बहुविहवियप्पा ॥७७५४॥  
 'देवि व्व सावभट्ठा किं वा दणुसुंदरी(रि) व्व इह पत्ता ।  
 विज्जाहरि व्व एसा आणीया जक्खराएण ॥७७५५॥  
 का होज्ज? कस्स एसा? किं वा इह केण वा वि कज्जेण ।  
 संपत्ता? अच्चब्भुयनियरूवुप्पाइयाणंदा ॥७७५६॥  
 अवलोइयं तिलोए रूवं नियरूवसन्निहमिमीए ।  
 न य दिट्ठं पुण इहइं समागया कोउहल्लेण ॥७७५७॥  
 नियरूवगच्चियाणं अहवा सुर-असुर-जक्खविलयाण ।  
 विहडावंती गव्वं एसा परियडइ भुयणंमि' ॥७७५८॥  
 इय चंदसिरीवररूवदंसणुप्पन्नविम्हयरसाण ।  
 एमाइया वियप्पा संजाया जक्खविलयाण ॥७७५९॥

तो भणइ जक्खराया नियपरिवारं विसुद्धनेहेण ।  
विणओनमंतसिरधरियपाणिसंघडियकरकोसा(सं?) ॥७७६०॥  
‘देवि व्व सामिणी वा जणणि व्व गुरु व्व भुयणपुज्ज व्व ।  
परमप्पयं व एसा दडुव्वा निव्वियप्पेहिं ॥७७६१॥  
एसा हि सयलपुहईसरस्स सिरिवीरसेणरायस्स ।  
हियएक्कपिया भज्जा महासई विमलसीलह्हा ॥७७६२॥  
आणीया केण वि खेयरेण चिरवेरमणुसरंतेण ।  
मलयसिहरंमि ठविउं हडेण भोत्तुं समाडत्ता ॥७७६३॥  
तो नियनिम्मलकुल-सील-कित्ति-परलोय-धम्मरक्खट्ठं ।  
मलयसिहराओ अप्पा पवाहिओ निव्विसंकाए ॥७७६४॥  
तो कम्मधम्मजोगा इमीए सुहपुन्नकरिसियेण मए ।  
कोमलकरंजलीए पडिच्छिया इह य आणीया ॥७७६५॥  
ता धन्ना कयपुन्ना पवित्तदेहा य चित्तचरिया य ।  
जत्थेसा वसइ सई तं पि पवित्तं भवे ठाणं ॥७७६६॥  
जो हु अखंडियसीलो जिणधम्मनिलीणमाणसो होई ।  
अच्छउ ता इयरजणो देवा वि हु तस्स पणमंति ॥७७६७॥  
सीलं चिय चारित्तं सीलं च तवो गुणा य सीलं च ।  
सीलपरिवज्जियाणं न तवो न गुणा न चारित्तं ॥७७६८॥  
अविरयमणाण जम्हा देवाण वि दुल्लहं भवे सीलं ।  
कह तं परिवालंतो न वंदणीओ सुराणं पि ॥७७६९॥  
सुलहाइं रयण-मणिमयविविहाभरणाइं एत्थ भुयणंमि ।  
एयं चिय जयदुलहं सीलाहरणं परं एक्कुं ॥७७७०॥

ववगयसीलाहरणा आहरणसहस्सभूसियंगी वि ।  
 गावि व्व असुइगिद्धा न सोहए लोयमज्झंमि ॥७७७१॥  
 इय तुम्ह देवया इव वंदा पुज्जा य सव्वया एसा ।  
 जम्हा गुणबहुमाणो होइ निमित्तं गुरुगुणाण' ॥७७७२॥  
 इयमाइ जंपिऊणं चंदसिरिं परियणस्स अप्पेउं ।  
 भुंजइ जक्खो भोए बहुजक्खणिविंदपरियरिओ ॥७७७३॥  
 देवी चंदसिरी वि य अजत्तसंपज्जमाणसयलत्था ।  
 चिद्धइ परमसुहेणं निए व गेहे विगयसोया ॥७७७४॥  
 जह जह वद्धइ गब्भो तह तह गब्भाणुभावरमणीया ।  
 आणंदनिम्मियं पिव मन्नइ सयलं पि तेलोयं ॥७७७५॥  
 चंदसिरिगब्भमाहप्पसंभवा मलयमेहभवणंमि ।  
 संजाया सुहभावा निमित्तसउणा य सुपसत्था ॥७७७६॥  
 अनिमित्तो च्विय वद्धइ आणंदो जक्ख-जक्खणिजणस्स ।  
 रिउणो वि हु पडिवन्ना भिच्चत्तणं (भिच्चत्तं) मलयमेहस्स ॥७७७७॥  
 जं किंचि य मणेण चिंतई असज्झमवि तं पि सिज्झए कज्जं ।  
 जाओ य अयंड च्विय पुरंदरस्साऽवि सुपयंडो ॥७७७८॥  
 इय एवमाइ बहुविहसुहाणुहावत्तणेण रमणीया ।  
 संजाया सुहभावा चंदसिरीगब्भभावेण ॥७७७९॥  
 तो भणइ जक्खराया 'तुह पुत्त ! पसत्थगब्भमाहप्पा ।  
 एसो मह अब्भुदओ पुत्विं न कया वि जो जाओ ॥७७८०॥  
 ता किं पि तुज्झ उयरे सुहाणुमाणेण पुत्त ! तक्केमि ।  
 अच्चब्भुयप्पहावं संभूयं किं पि गुरुसत्तं ॥७७८१॥

नीसेसभुयणपिंडियएक्कट्टियतेयगब्भभावेण ।  
 तुह तेओ सो देहो जो अम्हं नयणदुद्धरिसो ॥७७८२॥  
 तेलोक्कसमग्गलगब्भरूवअणुहावओ व अउरुच्चो ।  
 तुह को वि सरूवाए वि रूवाइसओ समुप्पन्नो ॥७७८३॥  
 जं वोत्तुं पि न तीरई न चिंतिउं जाइ जं च हिययंमि ।  
 तमणज्झवसेयं चिय माहप्पं तुज्झ अंगेसु' ॥७७८४॥  
 इय चंदसिरी मलयाहिवेण अहिणंदिया बहुप्प(प)यारं ।  
 धारइ गव्भं संसारसारभूया पहिद्धमणा ॥७७८५॥  
 तो नियकालकमेणं संपत्ते अणहदसममासंमि ।  
 सुपसत्थलग्ग-तिहि-वार-जांय-नक्खत्त-दियहंमि ॥७७८६॥  
 देवी तमुत्तरोत्तरवुट्ठिकरिं ससिकलं व सिया(य)वीया ।  
 भुयणेक्कवंदणीयं धूयारयणं पसूया सा ॥७७८७॥  
 तक्खणमेत्तेणं चिय किंकरकरताडणानिरावेक्खं ।  
 वज्जंति दुंदुहीओ पडंति तह कुसुमवुंठीओ ॥७७८८॥  
 वित्थरइ सव्वओ च्चिय वरवीणा-वेणुमीसिओ गयणे ।  
 अल्लक्खकिंनरीयणपयट्ठिओ महुरगेयरवो ॥७७८९॥  
 पसरंति मंथरं मासलाओ(?) सुरसुंदरीण सव्वत्तो ।  
 जयजयसद्दज्झुणीओ मंगलपाढावलीओ य ॥७७९०॥  
 तो सहसा उच्छलिआं जक्खिणिलोयस्स भरियभुवणंतो ।  
 आणंदकलयलो सूइयाहरं रायपत्तीए ॥७७९१॥  
 वद्धाविओ सहरिसं परियणलोएण जक्खराया वि ।  
 कारावइ परितुट्ठो वद्धावणयं मणभिरामं ॥७७९२॥

वज्जंतमहुरमद्वल-मउंदपडिसद्वबहिरियदियंतं ।  
 पडुपडहताडणुब्भडपडिरवसंघडियघणघोसं ॥७७९३॥  
 नाणाविहगहिराउज्जमणहरुल्लसियसद्वगंभीरं ।  
 नच्चंतविविहजक्खिणिजणवडिद्वयपरमपरितोसं ॥७७९४॥  
 नच्चिरनारीसंमद्वखुडियभूसणकलावमणि-रयणं ।  
 अप्पायंतं घणरयणबुद्धिसंकं सुरवराण ॥७७९५॥  
 करणंगहारवसउच्छलंतसियहारकिरणवित्थारं ।  
 नीहारहारधवलं धूयाकित्ति व्व विक्खरइ ॥७७९६॥  
 कुंकुमरसपूरियकणयसिंगअन्नोन्नसिंचणमिसेण ।  
 रंजंति व विलयाओ भुवणं धूयाणुराएण ॥७७९७॥  
 धरियवरिल्लंचलएक्ककरयलुक्खेवलडहविणिवेसं ।  
 नच्चंति सुंदरीओ उच्चलियजयपडाय व्व ॥७७९८॥  
 झणझणिरकर-चरणनेउर-रसणा-मणिकिंकिणीकलरवेणं ।  
 उगिगन्नताललयसुंदरं व न हरेइ कस्स मणं ? ॥७७९९॥  
 वियडथणत्थलसंघट्टुवरहारमोत्तियसमूहं ।  
 धूयाभविस्ससियजसतरुवरबीयं व वावंति ॥७८००॥  
 इय सयलजक्ख-जक्खिणिजणजणियाणंदनिब्भरं तत्थ ।  
 विविहं वद्धावणयं सपहरिसं मलयमेहेण ॥७८०१॥  
 कीरंतविविहरक्खं दारनिहिप्पंतपुन्नकुंभजुयं ।  
 मुच्चंतलोहरक्खं गहीरसुच्चंतघडसदं ॥७८०२॥  
 गिज्जंतमंगलसयं पासविमुच्चंतओसहीवलयं ।  
 अन्नोन्नकज्जवावडसूइणिसयसंकडंपवेसं ॥७८०३॥



वज्झंतविहकंडयरक्खासयनिहयदुडुजणपसरं ।  
 बहुजंतलिहियकिरिया वावडमणमंतवाइगणं ॥७८०४॥  
 कीरंति संतियमं(म्मं) समीवजप्पंतपरमजिणमंतं ।  
 पूईज्जमाणसिरिवीरसेणकुलदेवयानिवहं ॥७८०५॥  
 बिउण-चउगुणपरिवेड्डिमुक्कघणजक्खअंगरक्खभडं ।  
 दूरनिवारियजणवयसूईहरनिग्गमपवेसं ॥७८०६॥  
 नियडोवविट्ठनिमित्तिलोयगिज्जंतलग्गगुणनिवहं ।  
 एवंविहं पविट्ठो सूईहरयं मलयमेहो ॥७८०७॥  
 उवविसइ मणिमयासंदियाए वियसंतदीहरच्छिउडो ।  
 अवलोयइ धूयं जायगरुयमणविम्हओ जक्खो ॥७८०८॥  
 दुद्धरिससरीरुत्त्वभवपहाभिभूओरुकिरिणमणिदीवा ।  
 परतेयमसहमाणि व्व समहियं तेयमुव्वहइ ॥७८०९॥  
 स(सु)कुमारपाणिपल्लवपसत्थरेहाहि सुव्वलिहयत्थं ।  
 नियसुकयहुंडियं पिव करेहिं जक्खस्स दरिसेइ ॥७८१०॥  
 चिरमवि जं दीसंतं व्हइ अहिरूवदंसणे तण्हं ।  
 तं व्हइ सुरभवाओ अणुमयमिव अणुवमं रूवं ॥७८११॥  
 इय चंदसिरीधूया दिट्ठा जक्खेण विम्हयरसहं ।  
 नयणंजलीहि वे सुहं लायन्नं घोट्टयंतेण ॥७८१२॥  
 आपायसिरग्गाओ पसत्थवरलक्खणंक्रियसरीरं ।  
 दट्ठूण रायधूयं अह जक्खो भणिउमाढत्तो ॥७८१३॥  
 'चंदसिरि ! तुज्झ एसा चिरसुचरियपरिणई व्व अवयरिया ।  
 धूयामिसेण इहइं पच्चक्खा नत्थि संदेहो ॥७८१४॥

एयंगलदखणेहिं नियनाणवलेण पुत्त ! जाणामि ।  
 एसा तिहुयणकल्लाणभायणं बालिया होही ॥७८१५॥  
 सारं संसारस्स व भूसणमिव पुन्नभुवणवल्लयस्स ।  
 तिलयं व तिलोयस्स वि जायं तुह कन्नयारयणं ॥७८१६॥  
 तुम्हारिसाण अहवा भवियव्वं एरिसेहिं रयणेहिं ।  
 रोहणतडिं, विणा इयरमहिहरेसुं न रयणाइं ॥७८१७॥  
 कारणसरिसं कज्जं निप्फज्जइ सयलजीवलोयंमि ।  
 न हि सहयारदुमाओ लिवफलं होइ कइया वि ॥७८१८॥  
 जो एयं परिणेही सोऽवस्सं चउसमुद्वसुहाए ।  
 भूवालमौलिलालियकमवीढो भुंजिही रज्जं ॥७८१९॥  
 इय भणिऊणं जक्खो रक्खं काऊण माउ-धूयाण ।  
 भुंजंतो वरभोए चिड्डइ सह जक्खविलयाहिं ॥७८२०॥  
 तो अइगयंमि मासे गरुयमहिट्ठीए वड्डियाणंदो ।  
 कयसमुचियकायव्वो नामद्ववणं परिड्डवइ ॥७८२१॥  
 एयाहिंतो भुयणे वि नत्थि सुंदेरसंजुया का वि ।  
 ठावइ जक्खो सिरिभुयणसुंदरी नाम धूयाए ॥७८२२॥  
 एवं सा पइदियहं परिवड्डइ जक्खरायभवणंमि ।  
 कप्पलय व्व सकोउयसुरनारीलालियसरीरा ॥७८२३॥  
 अन्नन्नाहि करग्गे घेप्पंती जद्विखणीहिं सा वाला ।  
 संचरइ नलिणिकमलेसु सरहसं रायहंसि व्व ॥७८२४॥  
 सा रायसीहधूया जह वड्डइ मलयकंदरदरीए ।  
 तह दुड्डुकम्माणं तमगम्मं कारणं जायं ॥७८२५॥

एवं मा मुणह मणे नारीण वि कह णु हुंति अणुहावा ।  
 वड्ढंती चंदकला निसि तिमिरं किं न नासेइ ? ॥७८२६॥  
 नासंति दूरओ च्चिय दुडुभुयंगा भएण अडवीए ।  
 जत्थच्छइ तणुया वि हु भुयंगदमणी गुरुपहावा ॥७८२७॥  
 कीलइ विलाससरसीसु जक्ख-जक्खणिजणेहिं परियरिया ।  
 भवणुज्जाणेसु तहा कीलासरियासु रम्मासु ॥७८२८॥  
 कीलानईसु कोमलपुलिणत्थंगेसु वालुयकएहिं ।  
 कीलइ जिणभवणेहिं विसुद्धपरिणामसंपन्ना ॥७८२९॥  
 नियभवणे वि तह च्चिय घरुल्लुइंतो पइड्डइ जिणिंदं ।  
 पूयइ विहीए उज्जलनेवत्था विविहपूयाहिं ॥७८३०॥  
 मंडइ धिउल्लियाओ नाणामणि-रयणमंडियंगीओ ।  
 पाडइ पाएसु सयं ताओ वि जिणिंदचंदाण ॥७८३१॥  
 तो पुच्छइ चंदसिरी 'पुत्त ! किमेयाहिं तुह धिउल्लीहिं ?' ।  
 पुण देई उत्तरं सा 'मा अंब ! इमं पयंपेसु ॥७८३२॥  
 साहम्मिणीओ जेणं तेणं मह वल्लहाओ एयाओ ।  
 पणमंति जेण पेच्छसु पराए भत्तीए जिणनाहं ॥७८३३॥  
 साहम्मियाणुराओ कमेण किर मोक्खकारणं भणिओ ।  
 इय अम्ब ! मए निसुयं तायसमीवे कहिज्जंतं' ॥७८३४॥  
 इय निरुवएसनियमइपरियप्पियधम्मज्जाणसुद्धमणा ।  
 कीलाहिं वि सा विथरइ गरुयाण वि धम्मववसायं ॥७८३५॥  
 एवं च भोलिमारहियजरढमईजायकिंचिउम्मेसं ।  
 पत्ता कुमारभावं विन्नाण-कलागहणजोगं ॥७८३६॥

तो सा अमाणुसोच्चि(चि)यसुहुमयरमई पडिच्छयविसेसं ।  
 जं किं वि भुयणमज्जे विन्नेयं तीए तं नायं ॥७८३७॥  
 विज्जा-विन्नाणगयं दिट्ठं च सुयं पि किं पि जं तीए ।  
 उवएसनिरावेक्खं पि झत्ति तं तीए संकमइ ॥७८३८॥  
 दंसणमेत्तेण वि दिणयरस्स वियसंति किं न कमलाइं ? ।  
 विसिदरिसणमेत्तं चिय विमलमईणं उवज्झाया ॥७८३९॥  
 इय सा तियसासुर-जक्खलोयआणंदकारयं बाला ।  
 संपत्ता तारुन्नं विलोहणीयं तिलोयस्स ॥७८४०॥  
 वणरई व्व वसंतं सरयं व सरोइणी समहिगम्म ।  
 नियसमयं लल्लिउज्जललायन्नं जोव्वणं पत्ता ॥७८४१॥  
 संमोहणं व भुवणत्तयस्स विदेसणं व धम्मस्स ।  
 वसियरणं व सुरासुर-विज्जाहर-नरसमूहाण ॥७८४२॥  
 उच्चाडणं मुणीण वि हियएसु विवेयसुद्धभावाण ।  
 थंभणमिव भुवणस्स वि तिस्सा तारुन्नयं जायं ॥७८४३॥  
 परपुरिसो व्व न सम्माइ तीए वच्छत्थले विसाले वि ।  
 थणपब्भारो तब्भारभुग्गसरलंगलट्ठीए ॥७८४४॥  
 अइवियडनियंबाण वि सुरंगणाणं पि कंचिदामाईं ।  
 तिस्सा अपमाणनियंबमंडले नो पहुप्पंति ॥७८४५॥  
 कप्पूरपंसुणा इव सव्वत्तो ससहरस्स जोण्हस्स ।  
 अमयच्छंडं व पसरंति तीए सरलच्छिविच्छोहा ॥७८४६॥  
 मयणघडिय व्व सरसा विथाररइय व्व पडिहयप्पयई ।  
 विलसंति तीए अंगे अउरुव्वा के वि य विलासा ॥७८४७॥

अह अन्नदिणे दट्ठुं चंदसिरी पत्तजोव्वणं धूयं ।  
 विन्नवइ मलयमेहं धम्माणुद्वाणबुद्धीए ॥७८४८॥  
 'इह ताय ! भवसमुद्दे दुलहं मणुयत्तणं लहेऊण ।  
 अप्पहियं कायव्वं सव्वारंभेण बुद्धिमया ॥७८४९॥  
 तं च न धम्मविहीणं जायइ परमत्थओ इह जयंमि ।  
 सव्वावत्थासु गयं धम्मो च्चिय जीवमुद्धरइ ॥७८५०॥  
 दुहियस्स बंधवो इव दारिद्वहयस्स वरनिहाणं व ।  
 वेज्जो व्व वाहियस्स ओसुहियस्स य परमसुहहेऊ ॥७८५१॥  
 किं बहुणा ताय ! पयंपिण्ण ? तं किं न जं इहं धम्मो ।  
 परिणमइ उत्तरोत्तरकल्लाणपरंपराभावं ? ॥७८५२॥  
 जह उच्छुरसो पढमं कक्कबरूवो पुणो गुडो होई ।  
 सो च्चिय जायइ खंडं तम्हा पुण सक्करत्तं च ॥७८५३॥  
 एवं जिणधम्मो वि य अणंतकल्लाणकारणं होइ ।  
 नर-खयरासुर-सुरसुहकमेण मोक्खं पसाहेई ॥७८५४॥  
 तो तुमए अणुनाया सिवसोक्खफलंमि परमधम्मंमि ।  
 संसारदुहविग्गा(दुहुव्विग्गा) अणन्नहियया पयट्ठामि ॥७८५५॥  
 दोहित्तिया तहेसा अज्जं कल्लं व चिंतणीया ते ।  
 एत्तोच्चियस्स कस्स वि दायव्वा रायपुत्तस्स' ॥७८५६॥  
 इय एवं पभणंती भणिया सा भुवणसुंदरीए(इ) इमं ।  
 'किच्चं चिय तुह एयं अंब ! विलंपं(बं) विणा कज्जं ॥७८५७॥  
 तुह किं न चरणनहमणिमयूहमालाओ इह सवत्तीहिं ।  
 सेसाओ व्व सिरेहिं पणामसमएसु धरियाओ ? ॥७८५८॥

तुह किं न वेरिविलयाहिं देवि ! एकृग्गक्खि(खि)त्तनयणेहिं ।  
 पसरंतदिट्ठिमग्गाणुसारओ अग्गओ भमियं ॥७८५९॥  
 पइं किं न चलंतीए चलियाइं चराचराइं भुयणाइं ।  
 नियठाणसंठियाए ताइं चिय तुज्झ लीयंति ॥७८६०॥  
 इय तेत्तियस्स विहवस्स देवि ! सव्वं हुयं कहासेसं ।  
 एण्हि चिट्ठसि एगा विवरगया उंदुरि व्व तुमं ॥७८६१॥  
 मा कुणसु मज्झ वामोहकारणं का अहं ? तुमं का वा ? ।  
 नडपेच्छणयसमाणो संसारो किं तुह अउव्वो ? ॥७८६२॥  
 तुह सव्वे वि अवाया वोलीणा जोव्वणेण सह देवि ! ।  
 सव्वभयविप्पमुक्का एण्हि आयरसु अप्पहियं' ॥७८६३॥  
 इय जंपंती(तिं) धूयं सिरिंमि परिचुंबिऊण सा भणइ ।  
 'परिणामहियं पुत्तय ! धूयत्तं पयडियं तुमए ॥७८६४॥  
 कस्सेरिसो विवेओ ? वयणाइं य कस्स इय पगब्भाइं ।  
 कज्जेसु निच्छओ वि य तुमं विणा नत्थि अन्नस्स ॥७८६५॥  
 ता सव्वहा वि जाया निच्चिंता पुत्ति ! तुज्झ विसयंमि ।  
 इह-परलोयसुहाणं होहिसि जोग्गा इय मईए ॥७८६६॥  
 तुह पुत्त ! धम्मियत्तं तइय च्विय तुज्झ बालकीलाहिं ।  
 जं कहियं तं संपइ पयडं च्विय अज्ज संजायं' ॥७८६७॥  
 तो भणइ जक्खराया चंदसिरिं हिययगब्भियसिणेहो ।  
 'उचियत्थं सेवंतिं कह पुत्त ! तुमं निवारेमि ? ॥७८६८॥  
 मह भुयणसुंदरीए हिययनिहित्ताइं बहुप्पयाराइं ।  
 आलंबणाइं भग्गाइं पुत्त ! परमत्थभणिरीए ॥७८६९॥

ता पुत्त ! मज्झ वयणं नाणाविणिच्छइयभाविकल्लाणं ।  
 परिभाविऊण हियए अणुचिद्धसु निव्वियप्पमणा ॥७८७०॥  
 इह नाइदूरदेसे तवोवणं अत्थि तावसमुणीणं ।  
 तत्थत्थि बब्भुनामो मह मित्तो कुलवई पुत्त ! ॥७८७१॥  
 तस्सासमंमि चिद्धसु निययाणुट्ठाणपालणानिरया ।  
 तावसवेसा बहुविहतवसोसियकम्मसंघाया ॥७८७२॥  
 इह संठियाए एही रायरिसी वीरसेणसूरी वि ।  
 होहिंति सुंदराइं अब्बाइं वि एत्थ कज्जाइं ॥७८७३॥  
 एत्थ समीवठियाणं अन्नोन्नं दंसणाइं जायंति ।  
 एसा वि तुज्झ धूया दइयं पाविही जयदुलहं ॥७८७४॥  
 तत्थेव अहं काहं भवणं मणि-रयण-फलिहनिम्मवियं ।  
 उज्जाणपरिक्खत्तं चंदप्पहपरमदेवस्स ॥७८७५॥  
 तत्थच्छसु जिणपूयण-वंदण-संथुणणकम्मनिरयाओ ।  
 नीसेसकम्मनिद्धवणकारणत्थं जयंतीओ' ॥७८७६॥  
 तो चंदसिरी सिरिवीरसेणसूरिस्स दंसणासाए ।  
 तं जक्खरायवयणं अकयवियप्पाणुमत्तेइ ॥७८७७॥  
 तो सा पसत्थदियहे आपुच्छियं जक्ख-जक्खणीलयं ।  
 नीहरिया भवणाओ धूयाए समं च जक्खेण ॥७८७८॥  
 पत्ता तवोवणं सा पेच्छइ पुरओ जिणिंदवरभुयणं ।  
 उज्जाणवणं रम्मं वाविं पि विसद्धवणकमलं ॥७८७९॥  
 तो परमभत्तिभरनिब्भरेहिं सब्बेहिं पूइओ देवो ।  
 अभिवंदिओ य विहिणा जहत्थथोत्तेहिं थुणिओ य ॥७८८०॥

पत्ताइं तावसासमभसमं दिट्ठो [य] कुलवई तत्थ ।  
 जक्खेण सायरं सा समप्पिया बभुनामस्स ॥७८८१॥  
 कुलवइणा तेणाऽवि य पडिवन्ना पभणिया य 'अच्छेसु ।'  
 नियधम्मकम्मनिरया मज्झ समीवत्थउडवंमि' ॥७८८२॥  
 एवं सा चंदसिरी तस-थावरजीवघायणे विरया ।  
 अणवज्जायरणपरा ज्ञाणज्झयणेहिं संपन्ना ॥७८८३॥  
 गंतूण वंदइ जिणं तिकालसंझासु परमभत्तीए ।  
 सिरिवीरसेणसूरिस्स दंसणं निच्चमहिलसइ ॥७८८४॥  
 जं ताण तावसाणं ण्हाणनिमित्तं कढिज्जेण सलिलं ।  
 तं पियइ फासुयं पायखालणं तेण य करेइ ॥७८८५॥  
 अप्पनिमित्तं तावसजणेहिं नीवारनिम्मियाहारो ।  
 परिपायफासुयाइं कयलफलाईणि भक्खेज्जा ॥७८८६॥  
 अकओ अकारिओ अणणुमोइओ सब्बदोसंपरिसुद्धो ।  
 सो आहारो तिस्सा सरीरठिइसाहणो होइ ॥७८८७॥  
 एवं सा पइदियहं नियतणुनिरवेक्खचित्ततवचरणा ।  
 सुविसुद्धज्झवसाया परिसाइइ कम्मपडलाई ॥७८८८॥  
 सा भुयणसुंदरी वि य तिकालसंझासु जक्खभवणाओ ।  
 आगतुं पइदियहं पूयइ चंदण्हं देवं ॥७८८९॥  
 संपूइऊण देवं पुणो वि सा जाइ जक्खभवणंमि ।  
 एवं अच्छंताणं माया-धूयाण जंति दिणा ॥७८९०॥  
 जक्खो वि मलयमेहो अणुखववरं गवेसमाणो य ।  
 सिरिभुयणसुंदरीए परियइइ धरायलं सब्बं ॥७८९१॥



तो तेण एत्तिएहिं दिणेहिं दिहो तुमं महासत्त ! ।  
 अवहरिओ तेणेव य आणीओ एत्थ रत्तमि ॥७८९२॥  
 तो जा किर चंदसिरी ससिप्पहं वंदिरुण गोसंमि ।  
 धूया अद्धवहेणं गच्छइ गिरिकंदरसमीवं ॥७८९३॥  
 ता मलयनिगुंजाओ नीहरमाणीओ दो वि गहियाओ ।  
 वणवारणेण सुंदर ! अओ परं तुम्ह पच्चक्खं ॥७८९४॥  
 सा एसा चंदसिरी जा भज्जा वीरसेणरायस्स ।  
 एसा तीए धूया करिणो जा रक्खिया तुमए ॥७८९५॥  
 एसो य अहं सुंदर ! बब्भू नामेण कुलवई एत्थ ।  
 सिरिचंदसिरीसंसग्गजायजिणधम्मअणुराओ ॥७८९६॥  
 एयं परमपवित्तं कल्लाणकरं च दुरियनिम्महणं ।  
 सिरिवीरसेणचरियं कहियं तुह मंगलावासं ॥७८९७॥  
 परिभाविऊण एयं जं उचियं होइ तं सयं कुणसु ।'  
 इय भणिऊणं जाओ तुण्हक्को कुलवई सहसा ॥छ॥ ॥७८९८॥  
 सिरिविजयसीहविरइयगाहामयभुयणसुंदरिकाहाए ।  
 सिरिवीरसेणचरियं समत्तमिह पावनिम्महणं ॥छ॥ ॥७८९९॥  
 इय सोऊणं अणुवममसरिसमच्चब्भुयं मणभिरामं ।  
 वीराहिवस्स चरियं कुमरो आणंदपुलयंगो ॥७९००॥  
 अच्चब्भुयवीरचरित्तसवणसंजायविम्हउक्कुरिसो ।  
 धुणिऊण सिरं सहसा जंपइ हरिविक्कुमकुमारो ॥७९०१॥  
 'अज्ज कयत्थो जाओ मणुस्सगणणं व अज्ज संपत्तो ।  
 जं पावखालणजलं निसुयमिणं वीरसच्चरियं ॥७९०२॥

जस्स सुयं पि हु चरियं निहणइ चिरसंचियाइं पावाइं ।  
सो दिट्ठो किं काही वीस्मुणी तं न जाणामि ॥७९०३॥  
इह भुयणे गरुयगुणा तं चिय गुणपयरिसं पयासंति ।  
जंमि अणज्झवसाओ मणंमि ताणं पि संभवइ ॥७९०४॥  
जाण गुणावगमे खलु न संति गुणिणो त्ति वासणा होइ ।  
ते च्वेय जए जोग्गा गुणिन्न(त्त?)सदस्स न हु अन्ने ॥७९०५॥  
अंतरियपरगुणा वि हु नियविसउव्वूढगुणगणुक्कुरिसा ।  
न लहंति तह वि गुणिणो पिसुणत्तं सुद्धचरिएहिं ॥७९०६॥  
भुयणेक्कगुणित्तेणं दारिदे जेहिं ठावियं भुयणं ।  
ते च्वेव नवर गुणिणो भुयणस्स विहूसणं होति ॥७९०७॥  
दूरंतरपसरियनियगुणेहिं भुवणं पि जेहिं पडिबद्धं ।  
कह तं अप्पायत्तं करंतु अन्नेसु गुणिणो वि' ॥७९०८॥  
इय सब्भूयसमुज्जलअसरिसगुणभावणाहिं विम्हइओ ।  
सिरिवीरसेणसूरिं पसंसए सहरिसं कुमरो ॥७९०९॥  
पुण पभणइ चंदसिरीं(रिं) 'अज्ज पवित्तो म्हि अंब ! संजाओ ।  
तुअ(ह) दंसणेण सिरिवीरसेणसच्चरियसवणेण ॥७९१०॥  
दडुव्वदंसणं च्विय सोयव्वायन्नं च इह दो वि ।  
अपवित्तं पि हु पुरिसं पवित्तयंति नियमेण फुडं' ॥७९११॥  
इय वारंवारं च्विय परिवत्तियवीरसेणगुणनिवहो ।  
खणलद्धनिदसोक्खो नेइ निसं तग्गुणकहाहिं ॥७९१२॥  
अह जक्खकिंकराहयपाहाउयगाहिरतूरसद्वेण ।  
चंदप्पहंमि जयजयकलयत्तसद्वेण पडिबुद्धो ॥७९१३॥

सुव्वइ तवोवणे वेयपाढनिरयाण बडुयवंद्राणं ।  
 बहुविहसद्विमीसो तारो गुरुबम्हनिग्घोसो ॥७९१४॥  
 इह तावससंगेणं पेच्छ्ह तरुणो वि चत्तनिइ व्व ।  
 दीसंति पढंता इव पबुद्धघणपक्खिविरुएहिं ॥७९१५॥  
 उडवंतपंजरगया जत्थ सुया तावसाण अवणोति ।  
 सरिसक्खरजायपयब्भमाण पाढंमि संदेहं ॥७९१६॥  
 वित्थरइ होमसालासु जत्थ सुव्वंततिलतडक्कारो ।  
 सुइसुहनिवडियहविगंधगब्भिणो धूमसंघाओ ॥७९१७॥  
 खित्तमुणिरत्तचंदणरसग्घवारिच्छडाहिं सोणं व ।  
 संजाया पुव्वदिसा रत्तुप्पलकंतिकलिय व्व ॥७९१८॥  
 रविहुत्तनिवेसियसूरभत्तलोयाणुरत्तचित्तेहिं ।  
 समकालं व गएहिं रेहइ रत्त व्व पुव्वदिसा ॥७९१९॥  
 उय पुव्वदिसिवहूए उंदयैरिधराहरिंदसंगेण ।  
 तक्कालपसूयंतं बालं पिव सहइ रविबिंबं ॥७९२०॥  
 बहुतिमिरगब्भछूढं अरुणकरुक्केरगलियकलिलाओ ।  
 बंभंडाओ व भुयणं नीहरियं भाणुबिंबाओ ॥७९२१॥  
 एवंविहंमि गोसे सुमरियजिणचरणपंकओ कुमरो ।  
 तदंसणुसुयाणेयतावसाइन्नउडवंतो ॥७९२२॥  
 कयसयलगोसकिच्चो कुलवइपमुहेहिं दिन्नआसीसो ।  
 तेहिं च्विय संजुत्तो जिणभवणं जाइ नरनाहो ॥७९२३॥  
 पढमं जिणवंदण-पूयणाइं काऊण परमभत्तीए ।  
 उवविसइ पुव्वकप्पियवरासणे मत्तवारणए ॥७९२४॥

१. उदयगिरि ॥

तो विविहजकखविलया समूहदुल्लंभमंडवपवेसं ।  
 णहवणारंभसमुत्थयहल्लुप्फलजकखपरिवारं ॥७९२५॥  
 सिरिबद्धकुसुममाला चंदणचच्चिक्रिया कमलपिहिया ।  
 गंधुदयपुन्नकलसा जिणस्स पुरओ ठविज्जंति ॥७९२६॥  
 दूरदियंतरपसरियपरिमलआहूयभमरवंद्राहिं ।  
 सुसुयंधकुसुममालाहिं पूरिया पडलया एंति ॥७९२७॥  
 अइबहलजकखकदम-हरिचंदणभरियकणयकच्चोला ।  
 आणिज्जंति जिणेसरविलेवणत्थं सुरगणेहिं ॥७९२८॥  
 मंडवगब्भहरंतरठाणद्वाणेसु परिनिहिताओ ।  
 दीसंति सुरहिधूवुग्गमाओ इह धूवहडियाओ ॥७९२९॥  
 अप्फालिज्जइ पडुपडह-झल्लूरी-करड-ट्टरि(?)सणाहो ।  
 गंभीरभेरि-दुंदुहि-घण-घंटा-टिविलिनिग्घोसो ॥७९३०॥  
 कलकणिरकाहलारवअसंखसंखुल्लसंतताररवो ।  
 कंसाल-मुरव-मदल-मउंद-बहुतूरसंमदो ॥७९३१॥  
 पारंभिज्जइ पुरओ जिणस्स सविलासलासमणहरणं ।  
 करचलणकणिरकंकणझणझणारावरमणीयं ॥७९३२॥  
 थरहरियनियंबत्थल-रणंतकंचीकलावकलसदं ।  
 चलचलणनेउरझुणिमिलंतलय-तालगंभीरं ॥७९३३॥  
 पेच्छणयं पेच्छयजणजणियमहाणंदवद्धिउल्लासं ।  
 नच्चिरवारविलासिणिललिओब्भडनट्टमणहरणं ॥७९३४॥  
 करकलियचडुलचमरा पासेसु परिट्टिया जिणिंदस्स ।  
 सिरिभुयणसुंदरी अइमहिद्धिबहुजक्खणिसमेया ॥७९३५॥

अह ण्हाओ सुइभूओ निम्मलदेवंगवत्थपरिहाणो ।  
 सो मलयमेहजक्खो वत्थंचलपिहियमुहकमलो ॥७९३६॥  
 बहुजक्खसयसमेओ अहिमंतियकलसकलियकरकमलो ।  
 खलहलरवेण ण्हावइ ससिप्पहं परमभत्तीए ॥७९३७॥  
 कलसट्ठसएहिं तओ ण्हविऊण विलेवणं तओ कुणइ ।  
 भूसइ विभूसणेहिं पुण पूयइ पुफ(प्फ)मालाहिं ॥७९३८॥  
 तो कालायरु-कप्पूरसुरहिधूयं च सो समुक्खिवइ ।  
 आरत्तियाइ सव्वं कायव्वं कुणइ देवस्स ॥७९३९॥  
 तो, निव्वत्तियवित्थरपूयाकम्मो य वंदणापुव्वं ।  
 संथुणइ मलयमेहो पसन्नललिएहिं थोत्तेहिं ॥७९४०॥  
 कयकिच्चो होऊणं संभासइ सायरेहिं वयणेहिं ।  
 कुमरं तस्स समीवे उवविट्ठो भणिउमाढत्तो ॥७९४१॥  
 'तुह सागयं नरेसर ! जेण अबाहेण सयलभुयणंमि ।  
 जायइ कुसलं तुह तंमि कुमर ! कुसलं सरीरंमि ? ॥७९४२॥  
 तुह परिणामसुहत्थं हरियस्सेगागिणो मए एत्थ ।  
 उव्वहइ न ते हिययं मालिन्नं अम्ह विसयंमि ? ॥७९४३॥  
 पीडइ न तुज्झ हिययं गरुयपहावेण रक्खियस्सेह ।  
 दूरविसंठुलसेन्नस्स संभवा का वि अवसेरी ?' ॥७९४४॥  
 इय एवमाइ भणिरं जक्खं कुमरो पसन्नमुहकमलो ।  
 पडिभणइ पगंभगिरो सुसिलिट्ठं वयणविन्नासं ॥७९४५॥  
 'जिणनाहदंसणेणं उत्तमपुरिसस्स चरियसवणेण ।  
 सुस्सावयसंगेण य हवंति कुसलाइं सव्वत्थ ॥७९४६॥

पुव्वुत्तकारणेहिं चिररूढपणइसयलमालिन्नं ।  
 कह मज्झ मणं वहिही मालिन्नं तुम्ह विसयंमि ? ॥७९४७॥  
 रक्खंति इहरहा वि हु रज्जं कोसं बलं सरीरं च ।  
 तुम्ह पहावा, सेन्ने कह अम्हं होउ अवसेरी ? ॥७९४८॥  
 पडिकूलमाणसकयं सोक्खं दोक्खं व होइ माणीण ।  
 अणुकूलिमाए विहियं दुहं पि सोक्खं व परिणमइ ॥७९४९॥  
 हिययविसुद्धि च्चिय सज्जणाण संतं पि चित्तमालिन्नं ।  
 ओसारइ मलिणजले मलं निहित्तं व कतकफलं ॥७९५०॥  
 परिणामसुहं कज्जं पमुहदुहं ओसहं व बालाण ।  
 उप्पायइ मणदुक्खं न उणो परमत्थदंसीण' ॥७९५१॥  
 तो भणइ जक्खराया 'हरिविक्कम ! अवितहं तए भणियं ।  
 एयारिसो विवेओ कह होही इयरपुरिसाण ? ॥७९५२॥  
 पभणामि किंपि निसुणसु एगमणो रायपुत्त ! मह वयणं ।  
 परिभाविऊण पच्छ जहोचियं अणुचरेज्जासु ॥७९५३॥  
 एसा असेसनरवइसिरिमौडनिघिट्ठचरणवीढस्स ।  
 एक्कंगपसाहियचउसमुद्धवसुहेक्कनाहस्स ॥७९५४॥  
 पसरंतपयावानलपुलइरिउकाणणस्स वीरस्स ।  
 सिरिचंदसिरीसुहगब्भसंभवा कन्नया जाया ॥७९५५॥  
 नीसेसभुयणसुंदरविजियतियसंगणा कहं अहवा ।  
 वन्निज्जइ तुह पुरओ जा जाया नवर पच्चक्खा ॥७९५६॥  
 हरिविक्कम ! एयाए नामं सिरिभुवणसुंदरी एसा ।  
 धूया देहो हिययं अहवा मह जीवियव्वं वा ॥७९५७॥

जह उप्पन्ना जह वड्डिया य जह गाहिया कलानिवहा ।  
 तह सव्वं तुह कहियं कुलवय(इ)णा अज्ज रयणीए ॥७९५८॥  
 जह जह वड्डइ एसा तह तह झिज्जंति तिन्नि वत्थूणि ।  
 एयाए मज्झदेसो मज्झ मणं सुरजुयाणा य ॥७९५९॥  
 धूया हि नाम जायइ जणयस्स अदोसजो महादंडो ।  
 परिपुन्नधणाणं पि हु धूया अत्थित्तमावहइ ॥७९६०॥  
 सुसमत्थो वि हु विसहइ दुव्वयणसयाइं धूयदाणत्थी ।  
 गरुओ वि लहं पि वरं धूयत्थे ठवइ गरुयत्ते ॥७९६१॥  
 सगुणा वि सुजाई विय विविहाहरिया वि विविहविन्नाणा ।  
 धूया परस्स होही माला इव मालकारस्स ॥७९६२॥  
 बहुविहवपूरिया वि हु अणेयकम्मयर-दाससंजुत्ता ।  
 नाव व्व कुमर ! धूया सुचिरेण वि परउलं जाइ ॥७९६३॥  
 निययं पयपुन्ना वि हु खंधपवुद्धा वि अइसुपत्ता वि ।  
 सहयारस्स व साहा फलकाले होइ परकीया ॥७९६४॥  
 इय केत्तियं व भन्नउ जस्स सुया तस्स सव्वदुक्खाइं ।  
 जेण न दिट्ठं दुक्खं सो धूयं जणइ कुड्डेण ॥७९६५॥  
 तो एयत्थं नरवर ! पुणो पुणो महियलं निरवसेसं ।  
 भमियं रायकुमारा निरिक्खिया बहुविहा तत्थ ॥७९६६॥  
 आगंतूण इमीए कहेमि सव्वाण ताण कुल-विहवे ।  
 चित्ते पडिलिहिऊणं रूवाइयं तस्स दंसेमि ॥७९६७॥  
 एद(इ)हमेत्ते वि जए नाणाविहकुमरकोडिकलियंमि ।  
 सो कोइ नत्थि जो किर इमीए आणंदए हिययं ॥७९६८॥

ता हमओज्झपुरीए परिभ(ब्भ)मंतो समागओ वीर ! ।  
 सक्कावयारमुसहं वंदणबुद्धीए जा जामि ॥७९६९॥  
 ता तत्थ तुमं दिट्ठो देवकुमारो त्ति जायसंकेण ।  
 पच्छा नयणनिमेसाइएहिं उवलक्खिओ कह वि ॥७९७०॥  
 जिणदंसण-वंदण-थुणणदेवउववूहणं च उवविसणं ।  
 हारपयाणं च तथा अणंततेयप्पसायं च ॥७९७१॥  
 दिट्ठं सव्वं विक्रमपरिक्खणत्थं तओ मए विहिओ ।  
 खंडकवालछलेणं संगामो तुज्झ जो पयडो ॥७९७२॥  
 तं तत्थ मए तइया रक्खसरूवं विउव्वियं राय ! ।  
 दिट्ठेण जेण नूणं छलिज्जाए इह कयंतो वि ॥७९७३॥  
 तुह निट्ठुरपाणिपहारताडणाविहडियंगसंधिस्स ।  
 कह कह वि सरीरे मह जायं सुदिट्ठणं वीर ! ॥७९७४॥  
 सो तुह हरिविक्रम ! गुरुपरक्कमो जेण समरमज्झंमि ।  
 सुरदप्पभंजणो वि हु अहमेव तुहाउहं जाओ ॥७९७५॥  
 तुमए चलणग्गेणं धरिऊण भमाडिओ तथा अहयं ।  
 जह अज्ज वि मह भुयणं कुमर ! भमंतं व पडिहाइ ॥७९७६॥  
 इय तं तुज्झ सरूवं सव्वं पि जहट्ठियं मए एत्थ ।  
 सिरिभुयणसुंदरीए कहियं अणुरायसंजणयं ॥७९७७॥  
 कह तुह सरिसं रूवं लिहिऊं(उं) नरनाह ! तीरइ पडंमि ।  
 जं अब्भासवसेणं विहिणा वि हु कह वि निम्मवियं ? ॥७९७८॥  
 जं तिहुयणे अउव्वं कह तं एकंसदिट्ठमवि तुज्झ ।  
 सक्केमि मणे धरिउं ? धरियं वा कह णु विलिहेमि ? ॥७९७९॥



तह वि नियसत्तिसरिसं संलिहियं आगारमेत्तमिह रूवं ।  
 चित्तपडे धूयाए समप्पियं विम्हयमणाए ॥७९८०॥  
 तो तुहरूवनिरूवणविम्हयवियसंतनयणतामरसा ।  
 परियत्तिय व्व बाला वियारमइय व्व संजाया ॥७९८१॥  
 हियए कव्वे चित्ते मणोरहे गुणिकहासु सुविणे वि ।  
 ज्ञाणे आलावे च्विय सव्वत्थ तुमं मयच्छीए ॥७९८२॥  
 तुज्झाणुरायरत्तं निरंतरं भुयणसुंदरीए सया ।  
 कुमरपडिबिंबएहिं व छिपिज्जइ तिहुयणं सयलं ॥७९८३॥  
 हरिविक्कमरूवोहामिएण बहुमच्छरेण व सरेहिं ।  
 तुह अणुरत्त त्ति समं पहरिज्जइ पंचबाणेहिं ॥७९८४॥  
 पसरंति तीए कंठे उक्कंठावसविमुक्कहुंकारा ।  
 उद्धीवियमयणरसा समंधरं पंचमुग्गारा ॥७९८५॥  
 हिययवियप्पियपिययमपसंगपसरंतपहरिसुक्करिसा ।  
 झिज्जइ विमुक्कसासा पुरओ दइयं अपेच्छंती ॥७९८६॥  
 नियदइयविउत्ताए चक्काईये समं सदुक्खाए ।  
 परिक्खवइ अंसुभरियं नियदिट्ठं नेहभावेण ॥७९८७॥  
 अहिणंदइ अविउत्तं सारसजुयलं व निदइ तहप्पं ।  
 नियदइयविउत्ताहिं देवीहिं सइ(हि)त्तणं कुणइ ॥७९८८॥  
 लिहिऊण तुमं चित्ते सव्वंगावयवसुंदरसरूवं ।  
 अप्पाणं पि तओ तह पणमंतं लिहइ पाएसु ॥७९८९॥  
 ओवाइ-संसइ(ओवाइयाइं?) सूयइ देवाणं दाणवाण विविहाइं ।  
 तुह कुमर ! दुलहदंसणपच्चासाविनडिया संती ॥७९९०॥

१. ओवाइ माइं सूयइ. ला.॥

जह जह अहिलसियं पि हु न होइ तुह दंसणं ससिमुहीए ।  
 तह तह अहिययरं चिय विरहदुहं वड्डइ मणंपि(मि) ॥७९९१॥  
 तुह दुसहविरहहुयवहपुलुड्देह व्व जह य मच्छुलिया ।  
 नलिणीदलसत्थरणं तंल्लुवेल्लीओ विरएइ ॥७९९२॥  
 तह तुहदंसणअइदुत्थियाए दुक्खं इमीए संजायं ।  
 जह मुणियजिणमयाए वि मरणंमि मणोरहा जाया ॥७९९३॥  
 तो तं मरणावत्थं धूयं दट्ठण तुम्ह अणुरत्तं ।  
 तहुक्खदुक्खियाए भणिओ हं निययदइयाए ॥७९९४॥  
 'किं नाह ! भुयणसुंदरिमुवेक्खसे मरणगोयरे पडियं ।  
 जं नियडपरियणेणं मह गरुई आवया कहिया ॥७९९५॥  
 जद्विहाओ दिट्ठं रूवं हरिविक्कुमस्स पडिलिहियं ।  
 तद्वियहाओ तिस्सा अल्लीणा दुक्खडंडोली ॥७९९६॥  
 सुहओ वि दुहं दइओ कयाहिलासो अलाहओ जणइ ।  
 अइसीयलं पि सलिलं तिसियाण जहा अलब्भंतं ॥७९९७॥  
 ता सव्वहा पयट्टसु धूयादुक्खोवसामकज्जंमि ।  
 मा कह वि देवजोगा पिययम ! अच्चाहियं होही' ॥७९९८॥  
 तो हं कुमार ! तव्वयणजायउव्वेववेविरसरीरो ।  
 किंकायव्वविमूढो चिंताजलहिंमि पडिओ व्व ॥७९९९॥  
 'ता किं करेमि ? को वा एत्थ उवाओ उ होज्ज ? दुग्गेज्जं ।  
 कज्जं मह आवडियं जं न मुयंतस्स लितस्स ॥८०००॥  
 एसा एत्थ अरन्ने अमाणुसे दूरववहिए मलए ।  
 हरिविक्कुमो वि दूरे अउज्जनयरीए परिवसइ ॥८००१॥

सो वि न इमीए नामं न य थामं नेय जाइ-कुल-रूवं ।  
 न गुणा न य मरणंतं अणुरायं एरिसं मुणइ ॥८००२॥  
 इह संबज्झइ मिहुणं सुहेण अन्नोन्नजायअणुरायं ।  
 लोहं पि उभयतत्तं संघडइ पुणो न विवरीयं ॥८००३॥  
 ते दूरे वि अदूरे परोप्परं जाण नेहसंबंधो ।  
 नियडड्डिया वि इयरे जोयणलक्खे वि नज्जंति ॥८००४॥  
 कह तं हरेमि कुमरं तेत्तियदूराओ दिट्ठसामत्थं ?  
 मा कह वि हरिज्जंतो सव्वं पि हु संसए ठविही' ॥८००५॥  
 इयमाइ चिंतयंतो हरिविक्कम ! जाव एत्थ चिट्ठामि ।  
 ता तुह मलयागमणं परिकहियं पणिहिपुरिसेहिं ॥८००६॥  
 तो हं तुज्झागमणं नाउं इह तावसासमं पत्तो ।  
 चंदसिरि-कुलवईणं कहियं धूयाए ववहरणं ॥८००७॥  
 कहियं तुज्झागमणं तेहि तओ पभणिओ अहं एवं ।  
 'आणेषु इह कुमारं जक्खेसर ! केण वि नएण' ॥८००८॥  
 एत्थंतरंमि अहयं तुज्झ भउब्भंतमाणसो पत्तो ।  
 तुह कडयं रयणीए हरिओ सि तुमं मए सुत्तो ॥८००९॥  
 कोमलपल्लवसयणे मुक्को सि मए कुमार ! पासुत्तो ।  
 इह आसमस्स नियडे अहयं पुण तुह भया नट्ठो ॥८०१०॥  
 जइ कह वि विगयनिट्ठो पेच्छइ मं गुरुपरक्कमो एसो ।  
 ता मज्झ नत्थि मोक्खो इय चिंतेणं पलाणो हं ॥८०११॥  
 संपत्तो नियभवणं पुण कहियं भुयणसुंदरीए मए ।  
 मलयागमणं हरणं एत्थागमणं च हे(हि)ट्ठाए ॥८०१२॥

सा विरहानलदग्धा तुज्झागमणुल्लसंतरोमंचा ।  
 गिम्हहया वसुहा इव अंकुरिया मेहउदएण ॥८०१३॥  
 मुसियतणुनालदंडा बाढं कुम्माणवयणतामरसा ।  
 संजीविया कुमारी नल(लि)णि व्व जलोहसंगेण ॥८०१४॥  
 सोउं तुज्झागमणं सा हरिसमयं व मन्नए भुयणं ।  
 जणणीए समाहूया जिणभवनं आगया बाला ॥८०१५॥  
 ता कुमर ! इमा सुपओहरा य बहुरयणसमिद्धा य ।  
 वसुहा व्व कामधेणु व्व कप्पलइय व्व तुह दिन्ना' ॥८०१६॥  
 जक्खभणियावसाणे कुमरो हिययंतपसरियाणंदो ।  
 पयइवीरत्तणेणं निगोयए रायचिंधाई ॥८०१७॥  
 रत्ताण विरत्ताण य एगं रूवं सहावगरुयाण ।  
 को जाणइ जलनिहिणो थाहं अइनिउणबुद्धी वि ॥८०१८॥  
 चिंतइ मणंमि कुमरो 'जं कज्जं दुग्गहं व मह आसि ।  
 तं देवगुरुपसाया सिद्धं पिव मज्झ पडिहाइ ॥८०१९॥  
 न फुरइ मणोरहो वि हु त्तियसिंदाणं पि जीए लाहंमि ।  
 सा भुयणसुंदरी मह पेच्छ अजत्तेण संपन्ना ॥८०२०॥  
 अत्थि अवस्सं मह पुव्वजम्मसमुवज्जिओ सुहविवागो ।  
 तेणेसा संघडिया न घडइ जा सुरवराणं पि ॥८०२१॥  
 दीवंतरे वि देसंतरे वि रत्ते वि अहव वसिमे या(वा?) ।  
 संघडइ दुग्घडं पि हु अणुकूलविही न संदेहो ॥८०२२॥  
 किं तु तायस्स पुरओ मंतिस्स वि जंपियं मए जमिह ।  
 तं जुयइरयणलाहेण पडइ कालंतरे कज्जं ॥८०२३॥

जेयव्वो सो सत्तु अलंघदुग्गे महाबलो नाम ।  
 जो तस्स सुरस्स बलेण मज्झ सेनाइं परिभवइ ॥८०२४॥  
 ता किं करेमि संपइ ? कज्जाइं उवड्डियाइं मह दो वि ।  
 दो वि गरुयाइं दोन्नि वि कायव्वमईए गहियाइं ॥८०२५॥  
 जइ ता संपइ एयं कन्नं परिणेमि तिहुयणदुलंभं ।  
 ता विसयलंपडत्तणवोसकओ होइ मह अजसो ॥८०२६॥  
 अन्नं च तायआणाभंगसमुत्थो य होइ मह दोसो ।  
 रिउविजए असमत्थो त्ति होइ भुयणे अकित्ती वि ॥८०२७॥  
 ता जइ सच्चं एसा पणामिया मज्झ पुव्वसुकएहिं ।  
 ता निच्छियं ममेसा सुचिरेण वि किं वियप्पेण ? ॥८०२८॥  
 ता तायसमाइहे संपइ कज्जे समुज्जमिस्सामि ।  
 सिद्धंमि तंमि पच्छा जहोचियं चिंतइस्सामि ॥८०२९॥  
 इयमाइ चिंतिऊणं भणिओ हरिविक्रमेण सो जक्खो ।  
 'मह हिययकज्जजुत्ताण तुम्ह सव्वं पि ववहरणं ॥८०३०॥  
 गरुयाण परपओयणनिरयाण न आयरो सकज्जेसु ।  
 चंदो धवलइ भुयणं न कलंकं अत्तणो फुसइ ॥८०३१॥  
 किं तु मह जक्ख ! हिययं वड्डइ अन्नत्थ निब्भरासत्तं ।  
 अणुकूलियं पि बहुसो न पयट्टइ तुम्ह कज्जंमि ॥८०३२॥  
 तो भणइ जक्खराया 'मा एवं भणसु निट्ठुरं वयणं ।  
 निहयासा एएणं निसुएणं मरइ मह धूया' ॥८०३३॥  
 कुमरेण तओ भणियं 'विसज्ज एयं परिग्गहं ताव ।  
 एगंते तुह सव्वं हिययगयं जेण साहेमि ॥८०३४॥

तो तक्खणेण सव्वो परिग्गहो निग्गओ जिणहराओ ।  
मलयमेहस्स भवणं पत्तो विद्वाणमुहसोहो ॥८०३५॥  
पढमागयाए सव्वो उवविट्ठो भुयणसुंदरिसमीवे ।  
उम्मुक्कदीहसासो अभणंतो कहइ मणखेयं ॥८०३६॥  
तो तं तहासरूवं दट्ठूणं भुयणसुंदरी भणइ ।  
‘किं कारणेण सव्वे तुब्भे उव्वहह संतावं ?’ ॥८०३७॥  
तो परियणेण भणिया हरिविक्कमवयणगोवणपरेण ।  
पइं सामिणीए ‘अहं दूरं जाहिंति संतावा ॥८०३८॥  
न य किं पि भुयणसुंदरि ! तुह तायपसायसुत्थियाणम्ह ।  
होही मणंमि दुक्खं तदुब्भवो जेण संतावो’ ॥८०३९॥  
चेट्ठाविरुद्धवयणं संथुइरूवं च ताण सा सोउं ।  
सासंकमणा उट्ठइ पच्चइयसहीहिं परियरिया ॥८०४०॥  
गंतूण वासभवणं अंतोसंकंतसंकुसल्लं व ।  
परमत्थमजाणंती पुच्छइ सुसिणिद्धसहिवगं ॥८०४१॥  
‘मा पडउ इमा दुहसायरंमि’ इय भाविऊण सव्वाहिं ।  
अलिउत्तरदाणेणं ताहिं समासासिया कुमरी ॥८०४२॥  
तो सा कूडुत्तरसवणसमहिउप्पन्नमन्नपब्भारा ।  
परमत्थजाणणत्थं चिंतइ नाणाविहोवाए ॥८०४३॥  
चइऊण वासभवणं अन्नत्तो जाइ पुच्छए अन्नं ।  
पुणमन्नमुदासीणं अपरिचियं तयणु पुच्छेइ ॥८०४४॥  
तो अमुणियवुत्तंतो एगो साहेइ तीए जक्खसुरो ।  
हरिविक्कमेण जं जह भणियं चिरकुमरवुत्तंतं ॥८०४५॥

तो तीए निच्छयत्थं पुणो वि अन्नो सुरो इमं पुट्ठो ।  
 सो भणइ 'किं पयंपसि ? अन्नत्थ पसत्तचित्तो सो' ॥८०४६॥  
 तो जायनिच्छयाए 'हा ! किमिमं वज्जवडणदुव्विसहं ?' ।  
 मुच्छनिमीलियच्छी निच्चेट्ठा पडइ धरणीए ॥८०४७॥  
 'दुक्खोहमोत्थरंतं खणं खलेमि त्ति सामिणीए अहं' ।  
 सुहडो व्व पुरो थक्कइ मणब्भवो निहयचेयन्नो ॥८०४८॥  
 नीसहनिवडियदेहा असमंजसलुलियकुंतलकलावा ।  
 अजहडियआहरणा सव्वंगावयवविच्चेट्ठा ॥८०४९॥  
 कंठमि कुसुममाला कवरीबंधाउ कह वि आलग्गा ।  
 गाढीकयमयरद्धयपासेण कय व्व निचे(च्चे)ट्ठा ॥८०५०॥  
 हिययनिहित्तेक्ककरा दुसहपियविरहफुडणभयभीया ।  
 धरइ व्व चंपिऊणं नियहिययं कोमलकरेण ॥८०५१॥  
 विलुलंतकेसपासंतसिरनिहित्तग्गललियकरकमला ।  
 हढकेसकड्डिराओ जमाओ छोडेइ अप्पं व ॥८०५२॥  
 चंदविउत्ता सुतमा मिलाणमुहकमलकुवलयदलच्छी ।  
 कस्स न भयं पयासइ निस व्व सा खुद्दसंगकयं ? ॥८०५३॥  
 इय तं तहासरूवं दट्ठुं मुच्छनिमीलियच्छिउडं ।  
 कयहाहारवसद्धो आओ सव्वो सहीवग्गो ॥८०५४॥  
 का वि हरिचंदणेणं सिंचइ झणज्झणिरकंकणकरग्गा ।  
 नयणंसुबिंदुदंतुरउक्खेवेणं च विंजेइ ॥८०५५॥  
 अन्ना वि गुरुपयोहरल्हसियं संठवइ पवरदेवंगं ।  
 उच्चल्लिऊण कुमरिं उच्छंगे ठवइ अन्ना वि ॥८०५६॥

इह का वि भूमिलुलियं केसकलावं दिढं निबंधेइ ।  
 विहडंतभूसणाइं जहंगठाणे ठवइ अत्रा ॥८०५७॥  
 संबाहइ का वि सिरिं अत्रा हिययं च का वि बाहुलयं ।  
 अत्रा उण चरणतलं सही सहत्थेहिं संभंता ॥८०५८॥  
 अत्रा वि पुणो सीयलजलपूरियकणयकलसमुक्खिवइ ।  
 सहस त्ति तेण सिंचइ सव्वंगं चेयणनिमित्तं ॥८०५९॥  
 तो कह वि महाकट्टेण विविहसिसिरोवयारकिरियाहिं ।  
 संपत्तचेयणा सा सहीहिं पुणं भणिउमाढत्ता ॥८०६०॥  
 'किं भुयणसुंदरि ! तुहं बाहइ ? साहेसु अम्ह भीयाण ।  
 एयं नियसहिवग्गं आसाससु वयणदाणेण' ॥८०६१॥  
 तो लद्धचेयणा सा ईसीसुमि(म्मि)ल्ललोयणविलासा ।  
 उच्छाइया खणेणं हरिविक्कमविरहदुक्खेहिं ॥८०६२॥  
 नियकरयलेण ताडइ निडालवट्टं विमुक्कनीसासा ।  
 दैयं(वं) पि उवालंभइ पुण विलवइ सकरुणं बाला ॥८०६३॥  
 'हा हा ! हयास ! रे देव्व ! कह णु अइविरसमेरिसं विहियं ?  
 छोदूण निहिं हत्थे पुणो वि उदालिया मज्झ ? ॥८०६४॥  
 हरिविक्कम! अच्छरियं जे पायं दुज्जणाण वि न हुंति ।  
 ते कह तुह सुयणस्स वि विणिग्गया निट्ठुरालावा ? ॥८०६५॥  
 जाणे विहि ! तुह फुसिओ असरिससंजोयसंभवो अजसो ।  
 नवर पियविहडणेणं संपइ अहिओ व्व सो जाओ ॥८०६६॥  
 जइ नाम अहमणिद्धा ता किं पिय ! रक्खिआ गइंदाओ ? ।  
 न मुयाए जओ हुंतं तुम्ह अवत्राकयं दुक्खं ॥८०६७॥



जइ वि अणिद्धा आयरसु तह वि, को चयइ वीर ! अणुरत्तं ?  
तुह सत्तामेत्तेण वि मन्नामि कयत्थमप्पाणं ॥८०६८॥  
अंतेउरंमि बहुए एक्का अह दोन्नि हुंति इद्धाओ ।  
को किर न मुणइ एयं विचेद्धियं नरवरिंदाण ? ॥८०६९॥  
आणंदनिमित्तं चिय जाओ नरनाह ! सयलभुयणस्स ।  
मह पुण अणुरत्ताए वि कह दुक्खभरं समप्पेसि ?' ॥८०७०॥  
इय भुयणसुंदरी करुणसदरुइरी पवद्धियपलावा ।  
रोयावइ नीसेसं परिवारं मलयमेहस्स ॥८०७१॥  
एत्थंतरंमि सहसा जिणिंदभवणाओ जक्खपियभज्जा ।  
बहुविहसहीसमेया बहुदुक्खा आगया तत्थ ॥८०७२॥  
तो भुयणसुंदरिं पेच्छिऊण कयबहुपलावरोयंती(तिं) ।  
जक्खपिया वि सदुक्खा समागया तीए पासंमि ॥८०७३॥  
'किं पुत्त ! मुहा विलवसि? न केवलं सो गओ पिओ तुज्झ ।  
जणओ वि तुह न जाणे तेण समं कत्थ वि पयट्ठो ॥८०७४॥  
सो पुत्त ! नियपरक्कमतिणसमपरितुलियतियससामत्थो ।  
आसंकइ मह हिययं नो जाणे एत्थ किं होही ? ॥८०७५॥  
जं तस्स परिक्खट्ठं पुरा अउज्झाए जुज्झिओ जक्खो ।  
तं अज्ज वि मह पुरओ सरिउं उत्तसइ हिययंमि' ॥८०७६॥  
तो तव्वयणं सोउं बहुदुहपब्भारमसहमाणि व्व ।  
पडिया महीए कुमरी पुणो वि मुच्छाए संछन्ना ॥८०७७॥  
पुण विहियचेयणा सा सीयलकिरियाहिं जक्खलोएण ।  
आमुक्कदीहधारा(हा) रोयइ कुररि व्व बहुदुक्खा ॥८०७८॥

हा ताय ! भुवणवच्छल ! भुवणुवयारेकुकरणतलि(लि)च्छ ! ।  
 परदुक्खपरमदुत्थिय ! कत्थ गओ परियणं मोत्तुं ? ॥८०७९॥  
 कह मज्झ कारणेणं ताय ! अधन्नाए पुन्नहीणाए ।  
 संसयतुलाए ठावसि अप्पाणं भुयणकप्पतरु ! ? ॥८०८०॥  
 इह हुंति विलिज्जंति य किमिसरिसा ताय! मारिसा जीवा ।  
 तेलुकुकुद्धरणखमा दुलहा उण तुम्ह सारिच्छा ॥८०८१॥  
 को मं तुह विवरोक्खे दूराओ पसारियाहिं बाहाहिं ।  
 सीसंमि चुंबिऊणं ठविही उच्छंगभायंमि ? ॥८०८२॥  
 को मज्झ पियं काही ? को वा लैहुं व पालिही मज्झ ? ।  
 को मह दुक्खे दुहिओ तुमं विणा ताय ! मह होही ?' ॥८०८३॥  
 इयएवमाइबहुविहपलावसयदुत्थियाए कुमरीए ।  
 दुक्खमओ इव जाओ जियलोओ उभयदुक्खेहिं ॥८०८४॥  
 अह जणपरंपराए सोउं धूयाए तारिसमवत्थं ।  
 करुणापवन्नहियया चंदसिरी आगया तत्थ ॥८०८५॥  
 तो कयअब्भुद्धाणा विहियासणमाइसयलउवयारा ।  
 सा भुवणसुंदरीए पणया पुण भणिउमाढत्ता ॥८०८६॥  
 'मा पुत्त ! कुणसु खेयं तायत्थे किं पि जेण ते देवा ।  
 नाऽकालमरणजणियं पराहवं पुत्त ! पावंति ॥८०८७॥  
 जाणे अणुमाणो च्विय(णा चिय) कुमरो वि न तंमि कुणइ सत्तुत्तं।  
 जम्हा न कोइ विहिओ अवयारो तस्स ताएण ॥८०८८॥  
 किं तु तुह दाणपुब्बं उवयरियं चेव तंमि ताएण ।  
 उवयारिंमि रिउत्तं न पयासइ सज्जणो लोओ ॥८०८९॥

ता कारणेण केणइ कुमरेण समं गओ पिया होही ।  
 मा किं पि तायविसए अणिद्वसकं करेज्जासु ॥८०९०॥  
 दइ[य]त्थे वि न सुंदरि ! अरिहसि सोयं विसेसओ काउं ।  
 सुह-दुहरूवो दइओ विसमीसियअमयपिंडो व्व ॥८०९१॥  
 गुणवंतो अणुरत्तो अविउत्तो अमयसन्निहो दइओ ।  
 विवरीओ उण सो च्विय होइ पिओ कालकूडं व ॥८०९२॥  
 विसयोवहोगहेऊ पियसंगो ते वि पुत्त ! विसया वि ।  
 पयईए दुक्खरूवा तेसु सुहं वासणाजणियं ॥८०९३॥  
 विसया विसं व विरसा विसया परिणामदारुणा हौंति ।  
 को नाम पुत्त ! दिट्ठो विसयासत्तो तए सुहिओ ? ॥८०९४॥  
 जइ एए अविउद्धा परिणामसुहा य तत्तसुहरूवा ।  
 ता किं तुह जणएणं संता वि इमे परिच्चत्ता ? ॥८०९५॥  
 इह संसारे सुंदरि ! सम(म्म)न्नाणेण भावसु मणंमि ।  
 सब्बं पि दुहं दीसइ न किं पि परमत्थओ सोक्खं ॥८०९६॥  
 जइ सो तुमं न इच्छइ ता किं तुह पुत्त ! तयणुबंधेण ? ।  
 महुरेण वि किं कीरइ असंपडंतेण अमएण ? ॥८०९७॥  
 अणुरज्जसु साहीणे अणुरत्ते पुत्त ! वित्तहीणे वि ।  
 इंदे वि पराहीणे विरत्तचित्तंमि मा रज्ज ॥८०९८॥  
 ता पुत्त ! अनेहाओ हिययं हरिविक्कुमाओ वालेसु ।  
 अन्नं तहाविहं किं पि तुज्झ ताओ वरं वरिही' ॥८०९९॥  
 तो चंदसिरीवयणं सुत्तिक्खकरवत्तच्छे(छे)यदुव्विसहं ।  
 सोऊण रायधूया सदुक्खमिव भणिउमाढत्ता ॥८१००॥

'जणणी सविवेया वि हु परमत्थवियारचउरबुद्धी वि ।  
 मह हिययरया तह वि हु इमं भणंती अणिद्धा सि ॥८१०१॥  
 अंधस्स य बाणस्स य सज्जणचित्तस्स कुलवहुमणस्स ।  
 एक्क च्चिय होइ गई जत्थ मणो नवर आसत्तं ॥८१०२॥  
 मह हरिविक्कमबीओ पवणो जलणो व्व अंगमहिलसइ ।  
 अंब ! पुरिसंतरे उण जावज्जीवं मह निवित्ती ॥८१०३॥  
 चित्ताहिलासपुव्वो होइ विवाहो कुलप्पसूयाण ।  
 जं तु(?पुण?) पाणिगहाई तं जणजाणावणनिमित्तं ॥८१०४॥  
 सो य मह अंब ! जाओ अहिलासो अजियविक्कमसुयंमि ।  
 अन्नत्थ कीरमाणो सो च्चिय पावप्फलो होइ ॥८१०५॥  
 पुन्न-पावाण हेऊ सुहासुहो अंब ! चित्तपरिणामो ।  
 सो च्चिय एत्थ पमाणं न तव्विहीणं अणुद्धानं ॥८१०६॥  
 तो चंदसिरी जंपइ 'अइविसमं पुत्त ! कज्जमावडियं ।  
 तुह एरिसो अणुबंधो(ऽणुबंधो) तस्स य अन्नारिसं हिययं ॥८१०७॥  
 तुह पुत्त ! कहेमि फुडं दोन्नि गईओ विवेयवंताण ।  
 इहलोयसुहा लच्छी परलोयसुह व्व पव्वज्जा' ॥८१०८॥  
 तो भणइ रायधूया 'सच्चमिणं अंब ! जंपियं तुमए ।  
 परिभाविऊण पुरओ जं होही तं करिस्सामि ॥८१०९॥  
 ता एहि तत्थ जामो मज्झण्हजिणच्चवणाइयं सव्वं ।  
 निव्वत्तिऊण तत्थ य तुह पासे अच्छइस्सामि' ॥८११०॥  
 इय जणणी-धूयाओ चंदप्पहजिणहरं पहत्ताओ ।  
 निव्वत्तियं च सयलं मज्झण्हविसेसकरणीयं ॥८१११॥

पत्ताओ तावसासममुडवंतठियाओ जाव चिडुंति ।  
 ता कुलवई वि पत्तो ताण समीवं च सो भणइ ॥८११२॥  
 'मा पुत्त ! भुयणसुंदरि ! हरिविक्कमकडुयवयणसवणेण ।  
 किं पि मणे संतप्पसु संसारो एरिसो जम्हा' ॥८११३॥  
 संबोहिऊण एवं तावसथेरे य रक्खणे मोत्तुं ।  
 निययावासंमि गओ सासंको तावसाहिवई ॥८११४॥  
 एवं सा तत्थऽच्चइ तावसथेरेहिं रक्खिया बाला ।  
 चित्तविणोयनिमित्तं तेण(तेहि?) समं भमइ रत्नमि ॥८११५॥  
 तह हरिविक्कमदूसहविरहानलकवलिया दुहं पत्ता ।  
 जह तीए निरासाए मरणमि मणोरहा जाया ॥८११६॥  
 अह अन्नदिणे गोसे चंदप्पहपूयमाइ काऊण ।  
 जिणभवणसमीवत्थं उज्जाणवणं अह पविट्ठा ॥८११७॥  
 भणिया तावसमुणियो 'जाव अहं जक्खमंदिरं गंतुं ।  
 आगच्छामि तुरंती ता तुब्भे एत्थ चिट्ठेह' ॥८११८॥  
 इय भणिरुणं बाला उज्जाणवणमि जाइ दुक्खत्ता ।  
 चित्तइ 'किमेरिसेणं दुक्खोहघणेण जीएण ? ॥८११९॥  
 संपइ पुण जीयंती दोहग्गदुहं व विरहदुक्खं च ।  
 आजम्मावहि एयं सक्केमि न विसहिउं घोरं ॥८१२०॥  
 अंबाए जं भणियं 'दो चेव गईओ किर विवेईण ।  
 इहलोयसुहा लच्छी परलोयसुहा य पव्वज्जा' ॥८१२१॥  
 ता न मह पुव्वपक्खो कुमारअवहीरियाए पावाए ।  
 पव्वज्जा वि हु विसमा सिरसेलुक्खिवणसारिच्छा ॥८१२२॥

ता परमत्थसरूवं अंबावयणं न मज्झ एगं पि ।  
 संपन्नं पावाए किलिद्धकम्मोदयवसेण ॥८१२३॥  
 जइ वि निसिद्धो समए अप्पवहो तह वि दुहसउवि(व्वि)ग्गा ।  
 केण वि नएण एत्थं अरन्नमज्झे मरिस्सामि ॥८१२४॥  
 दोहग्गादूसियाणं दुल्लहजणजायनिबिडनेहाण ।  
 खंडियअहिमाणणं मरणं चिय,ओसहं ताण' ॥८१२५॥  
 इय भुयणसुंदरी कुमरविरहपम्हुसियनिम्मलविवेया ।  
 उज्जाणाओ तुरियं नीहरिया मरणबुद्धीए ॥८१२६॥  
 चिंतइ 'तत्थ गमिस्सं जत्थ करिंदाओ रक्खिया तेण ।  
 पायं तंमि पएसे सो होई(ही) वारणाहिवई ॥८१२७॥  
 तस्स पुरो अप्पाणं खिविऊणं सरिय जिणनमोक्कारं ।  
 एयं दुक्खावासं परिचइस्सामि नियदेहं' ॥८१२८॥  
 इय नीलुप्पलनयणा कमलमुही गुरूपओहरक्कुंता ।  
 पसरंतसुरहिसासा भमइ व्व वणं सरयलच्छी ॥८१२९॥  
 तत्थागया भमंती अदिद्धवणवारणा विचिंतेइ ।  
 'बहुपावाए न दरिसइ अप्पाणं सो वि मह हत्थी ॥८१३०॥  
 हा हा ! अहं अधन्ना जं जं इच्छेमि दुल्लहं तं तं ।  
 सुलहं पि जओ मरणं तं पि य मह दुल्लहं जायं' ॥८१३१॥  
 इय मरणज्झवसाय(या) ताव गया जाव जोयणा दोत्रि ।  
 पेच्छइ अगाहसलिलं अह पुरओ जलनिहिं बाला ॥८१३२॥  
 जो फेणपडलपंडुरसमुच्चकल्लोलदीहबहुवलओ ।  
 कयफालिहबहुसालो रक्खइ रयणाइं भीओ व्व ॥८१३३॥

अंतोगहीरनिघो(ग्घो)ससद्दपरिपूरियंवरदियंतो ।  
 दूराओ व्व निसेहइ मरणा(ण)कज्जाओ रायसुयं ॥८१३४॥  
 मलयतडप्फालणगुरुरवेण भणइ व्व पयइग्गंभीरा ।  
 सुरमहणं संतावं अवहं व सव्वं पि विसहंति ॥८१३५॥  
 सिसुमार-मच्छ-करि-मयर-तिमिसमूहेहिं भीमरूवं च ।  
 जो पयइइ अप्पाणं अवायबहुलं व बालाए ॥८१३६॥  
 इय एवंचिय(विह?)रूवं पुरओ दट्ठूण सायरं घोरं ।  
 पियरं व बंधवं पिव अहिणंदइ मरणवुद्धीए ॥८१३७॥  
 'अहममयसंभवे सिरिघरंमि पुरिसोत्तिमेक्कसयणंमि ।  
 बहुरयणरायहाणिंमि नियतणुं इह पवाहेमि' ॥८१३८॥  
 इय मरणज्झवसाया जा चिंतइ ताव लोहमंजूसं ।  
 जओ(उ)रसनिरुद्धसंबिं समुद्धीरंमि सा नियइ ॥८१३९॥  
 दट्ठूण मणे चिंतइ 'किं एसा एत्थ लोहमंजूसा ? ।  
 एयाए मज्झभाए किं होही ? कोउयं मज्झ' ॥८१४०॥  
 गंतूण नियडभाए जा जोयइ ताव तीए मज्झंमि ।  
 निसुणइ अईवसण्हं रुइयरवं बालनारीए ॥८१४१॥  
 तं रोयंती(तिं) सोउं बाला हिययंमि जायकारुन्ना ।  
 पुच्छइ गुरुसद्देणं 'का सि तुमं ? कह इमाऽवत्था ?' ॥८१४२॥  
 तो भणइ मज्झनारी 'सव्वं तुह वित्थरेण साहिस्सं ।  
 मोयावसु एयाओ ताव ममं वज्जकोट्टाओ' ॥८१४३॥  
 अवणेइ जउरसं सा अवलोयइ संधिसण्हविवरेहिं ।  
 पेच्छइ लावन्नपहादिप्पंतिं तत्थ वरनारिं ॥८१४४॥

तो मज्झट्टियनारीकहियउवाएण लोहमंजूसा ।  
 उग्घाडइ अह नारी नीहरिया तीए मज्झाओ ॥८१४५॥  
 सा लोहनिम्मियाओ नीणइ बंदीकय व्व किविणाण ।  
 केणाऽवि अणुवहुत्ता सिरि व्व मंजूसमज्झाओ ॥८१४६॥  
 स(सु)कुमारपाणिपाया सव्वंगावयवसुंदरसरीरा ।  
 पढमवयत्था दिट्ठा वरनारी वीरधूयाए ॥८१४७॥  
 तो भुवणसुंदरीए रूवं दट्ठूण सा वि वरनारी ।  
 विम्हइयमाणसा पुण परिभावइ निययचित्तंमि ॥८१४८॥  
 'किं एसा सुरनारी कीलत्थं एत्थ आगया होही ? ।  
 इह उण न मच्चलोए संभविही एरिसं रूवं ॥८१४९॥  
 जे सामन्ना विहिणो घडणा वि य ताण होइ सामन्ना ।  
 एसो उण अउरुव्वो जेणेसा निम्मिया नारी ॥८१५०॥  
 पेच्छह निस्सीमाइं रूवाइं गुणा य होंति संसारे ।  
 सो अविवेई नूणं जो एत्थ वि गव्वमुव्वहइ' ॥८१५१॥  
 इय चिंतंती भणिया सा नारी भुयणसुंदरीए वि ।  
 'जइ न तुह चित्तपीडा ता साहसु निययवुत्तंतं' ॥८१५२॥  
 तो सा जंपइ नारी 'जइ ते कोऊहलं ता कहेमि ।  
 इह तामलित्तिनयरी अत्थि पसिद्धा जलहितीरे ॥८१५३॥  
 हेमरहो नामेणं राया तत्थऽत्थि पयडमाहप्पो ।  
 गुणसुंदरि त्ति नामं तस्स पिया भारिया अत्थि ॥८१५४॥  
 ताण अहं उप्पन्ना धूया नणु धूंयरि व्व तमरूवा ।  
 अंतरियजीवलोया गुरुसोयतमंधयारेण ॥८१५५॥



पत्ता जोव्वणभावं जुवाणजणमणहरं वसंतं व ।  
 सयलजुयाणमणाणं उप्पाइयमयणसिंगारं ॥८१५६॥  
 देसंतराओ विविहा कयाहिलासा य एंति बहुवरया ।  
 पभणेइ मज्झ जणओ 'धूयाए सयंवरं काहं' ॥८१५७॥  
 अह अन्नदिणे अहयं कीलत्थं जाव जामि उज्जाणे ।  
 बहुविहसहीसमेया कीलामि विचित्तकीलाहिं ॥८१५८॥  
 सव्वाओ भणियाओ मए सहीओ 'इमं असोयतरुं ।  
 वेगेण छिवह निबिडं वत्थंचलवद्धनयणाओ' ॥८१५९॥  
 सव्वाहिं वि पडिवन्नं बद्धाइं मए सहीण अच्छीणि ।  
 हिंडंति भमंतीओ उज्जाणे बद्धनयणाओ ॥८१६०॥  
 एगागिणी तओ हं संजाया ताहिं विरहिया जाव ।  
 ताव मए सच्चविओ विज्जाहरदारओ एगो ॥८१६१॥  
 अवलोइऊण सो मं मयणपरायत्तमाणसो जाओ ।  
 सहसा अकयक्खेवं हरिया हं तेण खयरेण ॥८१६२॥  
 हरिऊण एत्थ मलए आणीया कंदरंतरदरीए ।  
 मोत्तूण य भणिया हं 'इच्छसु मं तुज्झ अणुरत्तं ॥८१६३॥  
 विज्जाहरो म्हि सुंदरि ! बहुविज्जा-सिद्धि-लद्धिसंपन्नो ।  
 नामेण चित्तवेगो तुह दंसणजायमणखोहो' ॥८१६४॥  
 तो हं भयसंभंता न जाव पडिउत्तरं पयच्छामि ।  
 ता पुण अणुणयसारं भणिया हं तेण खयरेण ॥८१६५॥  
 नाणाविहअणुणयवयणलक्खपयडियनियाणुरायस्स ।  
 कह कह वि मए सुंदरि ! न तस्स पडिउत्तरं दिन्नं ॥८१६६॥

तो तस्स पंचरत्तं अणुणयवयणेहिं पत्थमाणस्स ।  
 मज्झ अवन्नाए कओ पज्जलिओ तस्स कोहग्गी ॥८१६७॥  
 सो उण अणिच्छभाणी(णिं) कन्नं परिणेइ नेय परनारिं ।  
 भुंजइ सम्मदि(दि)ट्ठी सुसावओ देसविरओ य ॥८१६८॥  
 तो हं बहुप्पयारं तहा तहा तेण भेसिया एत्थ ।  
 मुच्छमिसेण जह जह भएण जीयं पलाइ व्व ॥८१६९॥  
 तो भीसणभयदंसणविहुरा वि हु जाव तन्न इच्छामि ।  
 ता तेण एत्थ छूढा आयसमंजूसमज्झंमि ॥८१७०॥  
 खित्ता समुद्धमज्झे पुणो वि उत्तारिया य पुट्ठा य ।  
 'अज्ज वि न किं पि नट्टं इच्छ ममं कन्नए ! दइयं' ॥८१७१॥  
 इह संपइ आणीया समुद्धमज्झाओ एत्थ तीरंमि ।  
 मं पुच्छिऊण एण्हि कत्थ गओ तं न जाणेमि ॥८१७२॥  
 एसो मह वुत्तंतो कहिओ संखेवओ मए तुम्ह ।  
 तुब्भे उण पुच्छंती काऽसि तुमं देवि!? लज्जामि ॥८१७३॥  
 जाणामि एत्तियं पुण न होसि इह मच्चलोयवत्थव्वा ।  
 अच्चब्भुयरूवेणं सुरि व्व असुरि व्व संभवसि' ॥८१७४॥  
 तो भुयणसुंदरीए मणंमि परिभाविंयं जहा 'एसा ।  
 मुद्धसहावा न मुणइ सुराण मणुयाण वि विसेसं ॥८१७५॥  
 ता किं मह कहिएणं परमत्थेणेह सुलहविग्घेण ।  
 एयाए च्चिय वयणं मन्नमि तह त्ति दुद्धीए' ॥८१७६॥  
 तो भुयणसुंदरीए सा भणिया 'अवितहं तए नायं ।  
 इह सहि ! मलयाहिवई जक्खो मह सामिओ जणओ ॥८१७७॥

ता ओसरसु तुरंती पुण सो विज्जाहरो तुमं नेही ।  
 अहयं मंजूसाए तुह ववएसेण अच्छिस्सं ॥८१७८॥  
 किं तु अलक्खं काउं मंजूसं संविघोलिय जउं च ।  
 इह नाऽइदूरदेसे तवोवणं जासु वेगेण' ॥८१७९॥  
 इय भणिऊणं बाला हरिविक्कमवयणजायअहिमाणा ।  
 तणतुलियजीयदेहा पविसइ मंजूसमज्झंमि ॥८१८०॥  
 पुण भुयणसुंदरीए सा भणिया 'कुणसु मा भयं मज्झ ।  
 मंजूसगया वि अहं न मरामि सुराणुभावेण ॥८१८१॥  
 ता नीसकं झंपसु मंजूसं देसु संधिठाणेसु ।  
 निबिडदवग्गिविलीणं जउरसमइतुरियहत्थेण' ॥८१८२॥  
 तो सा मुद्धसहावा अमुणियतत्ता तहेव तं कुणइ ।  
 विज्जाहरभयभीया तवोवणं जाइ तरलच्छी ॥८१८३॥  
 एत्थंतरंमि सहसा विज्जाहरदारओ तहिं आओ ।  
 कयकक्कसघोररवो आढत्तो पभणितं एवं ॥८१८४॥  
 'किं पावे ! निल्लज्जे ! निद(इ)क्खिन्नं अजायउवरोहे ।  
 इच्छिहसि ममं नो वा भत्तारं ? कहसु वेगेण ॥८१८५॥  
 नणु एसो पज्जंतो केत्तियदियहाइं तुज्झ रेसंमि ।  
 अच्छिस्सं वामूढो अनेहनेहाणुबंधेण ? ॥८१८६॥  
 खिविऊण तुमं घोरे तिमि-मयरसहरस्ससंकुलसमुद्धे ।  
 जाइसं(स्सं) वेयहे मरणंतो एस तुह समओ' ॥८१८७॥  
 तो वीरसेणघूया तं सोउं खयरकक्कसं वयणं ।  
 कयमरणनिच्छयमणा रोमंचं वहइ अंगंमि ॥८१८८॥

'मह पुत्रपहावेणं कुमारअवमन्नियाए अणुकूलो ।  
 सव्वो च्चिय संजाओ मरणविही जइ विही सरलो' ॥८१८९॥  
 तो असुयउत्तरुप्पन्नगरुयअमरिसविसेसरत्तच्छे ।  
 उच्चल्लइ मंजूसं उप्पयइ नहंतरालंमि ॥८१९०॥  
 रयणायरस्स गब्भे अथाहगंभीरघोरसलिलंमि ।  
 अच्छोडिऊण घेल्लइ मंजूसं खेयरो कुद्धो ॥८१९१॥  
 तो गुरुवेयविमुक्का नीसहनिब्भारवसनिमज्जंती ।  
 मंजूसा दूररसायलंमि पडिया समुद्धंमि ॥८१९२॥  
 विज्जाहरो वि तम्हा समागओ सयलपव्वयवणंमि ।  
 खणमेत्तमच्छिऊणं पुणो वि रयणायरं एइ ॥८१९३॥  
 संपेसियनियविज्जो समुद्धमज्झाओ जाव मंजूसं ।  
 किर कहेउं इच्छइ संजायविसुद्धपरिणामो ॥८१९४॥  
 ता सयले वि समुद्धे विज्जाबलगाहिए वि नो दिट्ठा ।  
 मंजूसा खयरेणं न जाणिया कत्थ वि गय त्ति ॥८१९५॥  
 तो तं अपेच्छमाणो मंजूसं सो मणंमि चिंतेइ ।  
 'कह नारीवहजणियं पावमहं नित्थरिस्सामि ? ॥८१९६॥  
 हा ! पावमोहिएणं विसयासाविनडिएण किर एयं ।  
 वीहाविऊण य पुणो परिणयणत्थे पयट्ठिस्सं ॥८१९७॥  
 पक्खित्ता वि हु बहुसो मंजूसा कड्डिया मए बहुसो ।  
 एण्ह तु कह न दीसइ निउणं पि निरुविया एत्थ ?' ॥८१९८॥  
 इय सोइऊण बहुसो बहुपच्छायावजायमणखेओ ।  
 पुणरवि गवेसिऊणं अपेच्छमाणो गओ मलयं ॥८१९९॥

एवं च ताव एयं; इओ य हरिविक्रमो असेसपि ।  
 जुत्ताजुत्तं साहइ अरिविजय-विवाहकज्जेण ॥८२००॥  
 'एयं चित्ते काउं तुम्ह पुरो जंपिउं(यं) मए जक्ख ! ।  
 जं किर अन्नासत्तं हिययं नो जाय(इ) अन्नत्थ' ॥८२०१॥  
 तो भणइ मलयमेहो 'हरिविक्रम ! समुचिओ तुह विवेओ ।  
 गरुयं पि अन्नकज्जं छाइज्जइ जणयकज्जेण ॥८२०२॥  
 दुप्पडियाराइं कुमार ! हुंति चत्तारि नवर एयाइं ।  
 जणणी जणओ सामी एएसि गुरू अपडियारो ॥८२०३॥  
 ता एयं च्चिय पढमं कज्जं निव्वत्तिऊण रिउविसयं ।  
 पच्छा पाणिग्गहणं करेज्ज सह मज्झ धूयाए ॥८२०४॥  
 एत्थेव तुमं चे(चि)इसु अहमेव महाबलं रिउं तुज्झ ।  
 आणेमि बंधिऊणं चडफ(प्फ)इंतं तुह समीवे' ॥८२०५॥  
 हरिविक्रमेण भणियं 'अत्थि इमं किं तु तस्स अइगरुयं ।  
 देवस्स कस्स वि बलं तेण अजेओ खु सो जाओ' ॥८२०६॥  
 तो भणइ जक्खराया 'सच्चमिणं अत्थि सुरबलं तस्स ।  
 सो उण वंतरदेवो दुनिग्गहो मारिसाणं पि ॥८२०७॥  
 हरिविक्रम ! किं तु तुहाणुहावसंजायगरुयसामत्थो ।  
 देवं पि निज्जिणिस्सं का गणणा तस्स वेरिस्स ?' ॥८२०८॥  
 हरिविक्रमेण भणियं 'को न मुणइ जक्ख! तुज्झ सामत्थं ? ।  
 किं तु अहमेव सक्को ससुरस्स महाबलस्साऽवि' ॥८२०९॥  
 तो भणइ जक्खराया 'मा उवरोहं करेसु मह विसए ।  
 ता दो वि हु वच्चामो अलंघदुग्गं हरिकुमार !' ॥८२१०॥

'एवं होउ' ति तओ गरुयनिबंधेण मन्नए कुमरो ।  
 जक्खो सह उप्पइओ कुमरेणं तुब्भ(च्छ)परिवारो ॥८२११॥  
 हरिविक्रमेण भणियं 'वच्चामो ताव वंतरसुरस्स ।  
 पासे तं अणुकूलं काउं जामो अलंघउरं' ॥८२१२॥  
 तो भणइ जक्खराया 'नेवं नरनाह ! रायनीईए ।  
 जेणेव सह विरोहो सो च्चिय साहिज्जए पढमं ॥८२१३॥  
 तं साहंतस्स पुरो जो काही राय ! तुज्झ पडिबंधं ।  
 पच्छ तेण समाणं जं होही तं करिस्सामि' ॥८२१४॥  
 'एवं' ति षभणिऊणं विउरुव्वियवरविमाणमारूढो ।  
 हरिविक्रमो सखग्गो किरीडमणिकुंडलाहरणो ॥८२१५॥  
 वच्छत्थलघोलिरहारभूसिओ सूरभासुरपयावो ।  
 उभयंसजक्खचालियसियचामरभूसियदियंतो ॥८२१६॥  
 तो अत्थमिए सूरे समइक्कंतमि रयणिपढमद्धे ।  
 सुत्तमि सयललोए मूर्ईहूए व्व भुयणंमि ॥८२१७॥  
 जोइज्जंतो कुमरो अयंडसंजायदिवससंकाए ।  
 सिरिवैरिसिंहसेणालोएहिं सुदूसहालोओ ॥८२१८॥  
 विउरुव्वियजक्खपयंडतेयपयडीकयं नियं सेत्रं ।  
 कुमरो अवलोयंतो अलंघनयरंमि संपतो(त्तो) ॥८२१९॥  
 तो नियतेयपयासियपासायसहस्ससोहियं नयरं ।  
 दिव्वविमाणारूढो पेच्छइ हरिविक्रमकुमारो ॥८२२०॥  
 दूराओ च्चिय सिरिवैरिसीहसेत्रेण वेढियउवंतं ।  
 पडिसिद्धिधण-धण-धन्न-जवस-जल-निग्गम-पवेसं ॥८२२१॥

उत्तुंगमहद्वालयसिहरगगनिबद्धतोरणपडायं ।  
 जगंतजामइल्लयसहस्सकोलाहलदुलंघं ॥८२२२॥  
 अंतोगरुयनिवेसियजंतनिखिप्पंतओ(उ)वलसंघायं ।  
 मुक्कगितेल्लजालाजलंतगयणंगणाभोयं ॥८२२३॥  
 अणवरयभमिरभामरिनरहक्कासावहाणकयसुहडं ।  
 ठाणट्टाणुकुरुडियबहुपहरणपुंजसंकिन्नं ॥८२२४॥  
 परसेन्नभयसमुब्भडअंतोकयसावहाणचउरंगं ।  
 खंडीपडणभएणं पउणीकयदारुसिप्पिगणं ॥८२२५॥  
 परसेन्नप्पडणत्थं खाणिनिहिप्पंतगुविलजलियगिं ।  
 इयमाइ कयपयत्तं नियइ कुमारो अलंघपुरं ॥८२२६॥  
 तो सहसा संपत्तो नवभूमियकणयतुंगपासायं ।  
 अट्टावयं व सेलं महाबलस्सालयं कुमारो ॥८२२७॥  
 ठाणट्टाणपरिडियठाणंतरवंठकलयलगहीरं ।  
 सइ सावहाणसेवयसहस्सपरिवेडियउवंतं ॥८२२८॥  
 परिवियडगुडियबहुकरडिघडाघडियचउदिसावेढं ।  
 पक्खरियतुरयसाहणसहस्सपरिवेडियदियंतं ॥८२२९॥  
 सारहिसंचारियसंदणोहसंघट्टरुद्धवित्थारं ।  
 पसरंतफारफारक्कुकुंत-धाणुकुपरिखित्तं ॥८२३०॥  
 इय तं पि कयपयत्तं कयजक्खपयत्तमणिविमाणत्थो ।  
 पेच्छइ कुमारो भवणं अणंतजणरुद्धपहदारं ॥८२३१॥  
 तो भणइ जक्खराया 'जहत्थनामं कुमार ! दुग्गमिणं ।  
 वेरीहिं न लंघिज्जइ वरिससहस्सोवउत्तेहिं ॥८२३२॥

दुविहं दुग्गं साहावियं च आहारियं च निदि(दि)हुं ।  
 पयइविसमस्स विजओ आहरियमिमस्स वेसम्मं ॥८२३३॥  
 जं पज्जत्तवसायं पउरिंधण-जवस-सलिलसंधायं ।  
 अप्पंमि परस्स तहा दुलहत्तं पुव्ववत्थूण ॥८२३४॥  
 बहुवन्नरससमिद्धं पवेसअपसारवीरपुरिसहुं ।  
 एए किर दुग्गगुणा ते सव्वे एत्थ दीसंति ॥८२३५॥  
 इयमाइगुणविहीणं जं दुग्गं तं खु बंदिसालं व ।  
 दुग्गविहीणो राया पावइ अइपरिभवं गरुयं ॥८२३६॥  
 दुग्गविहीणो राया जलनिहिबोहित्थसद्धपक्खि व्व ।  
 आवइकाले वच्चउ निरासओ कस्स किर सरणं ? ॥८२३७॥  
 ता राय ! इमं दुग्गं एयं जेतुं महाबलं सत्तुं ।  
 कीरइ नियसत्ताए एरिसदुग्गं जओ नत्थि ॥८२३८॥  
 'एवं' ति पभणिऊणं भणइ कुमारो 'किमज्ज वि विलम्बो ? ।  
 जामो वेरिसमीवे करेमि अज्जेव निज्जोडं' ॥८२३९॥  
 तो तक्खणेण जक्खो पुरओ गंतुं महाबलं भणइ ।  
 'किं सोवसि निच्चित्तो ? उट्ठसु नरनाह ! वेणेण ॥८२४०॥  
 निरणुच्छाहो राया पावइ सयलाइं राय ! वसणाइं ।  
 तम्हा उच्छाहो च्चिय पढमगुणो होइ सामिस्स ॥८२४१॥  
 चयइ न विक्रमभावं वेरिसु तह अमरिसं सया वहइ ।  
 तुरियत्तं मइपसरो उच्छाहगुणा इमे हुंति ॥८२४२॥  
 तुह गुरुपरक्कमे वेरियंमि हरिविक्रमंमि इह पत्ते ।  
 वाहि व्व दीहदीहा उवेक्खिया होहिही निदा ॥८२४३॥



ता राय ! अहं दूओ तुज्झ समीवंमि पेसिओ तेण ।  
 हरिविक्रमेण एयं संदिद्धं सुणसु एगमणो ॥८२४४॥  
 'चयसु सुहडत्तगव्वं मन्नसु मह तायसंतियं सेवं ।  
 अच्छसु जहासुहेणं भुजंतो राय ! रायसिरिं ॥८२४५॥  
 अहवा न तायसेवं मन्नसि ता होसु समु(म्मु)हो समरे ।  
 कहिया दोन्नि वि पक्खा जं रुच्चइ तं समायरसु' ॥८२४६॥  
 इय जक्खरायभणिए निद्वारुणघुम्मिरच्छिसयवत्तो ।  
 आमोडियंगुवंगो उड्डइ सयणाओ नरनाहो ॥८२४७॥  
 पभणइ महाबलो 'को तुमं सि ? हरिविक्रमो वि को एत्थ ? ।  
 ताओ वि तस्स को वा ? सो सेवं जस्स कारवई ? ॥८२४८॥  
 सेव च्चिय का भन्नइ ? सा दूय ! कहं च कीरइ नरेण ? ।  
 आजम्मो(म्मा)वहि तिस्सा सरूवमवि अम्ह अउरुव्वं ॥८२४९॥  
 जइ सो च्चिय तुह कुमरो पढमं सेवासरूवमुवइसइ ।  
 ता हं तेण कमेणं सेवाभासं करिस्सामि' ॥८२५०॥  
 तो भणइ जक्खराया 'को सि तुमं ? - मं भणेसि तं जुत्तं ।  
 हरिविक्रमो त्ति को वा ? तमणुचियं जंपियं तुमए ॥८२५१॥  
 संकोडियंगुवंगो छूढो गव्भे व जेण दुग्गंमि ।  
 कह तं अलंघसत्तिं कम्मविवायं व नो मुणसि ? ॥८२५२॥  
 अहवा को तुह दोसो ? अनायपरमत्थवत्थुरूवस्स ।  
 अन्नाणकयं एयं सव्वं च्चिय तुज्झ ववहरणं ॥८२५३॥  
 नियबुद्धिकप्पियं खलु जो गव्वं वहइ अप्पविसयंमि ।  
 सो पावइ उवहासं अप्पाणं संसए ठवइ ॥८२५४॥

ता किं बहुणा ? नरवर ! सो च्विय हरिविक्रमो पयडसत्ती ।  
 नियतायं दंसिस्सइ सेवा किर जस्स कायव्वा ॥८२५५॥  
 सेवारूवं सो च्विय पयडेही तुज्झ केण वि नएण ।  
 अज्जेव न उण दूरे किं राय! अईव उच्छुक्को ॥८२५६॥  
 कह तं चवइ विसिद्धो निव्वहइ न जो पुरो भणंतस्स ? ।  
 अजहत्थवाइणो पुण पुरिसा पावंति हलुयत्तं ॥८२५७॥  
 दड्ढव्वो सि महाबल ! केत्तियदियहेहिं रायरायस्स ।  
 पुरओ तदेक्कचित्तो सेवंजलिवावडकरग्गो' ॥८२५८॥  
 तो जक्खवयणपसरियअमरिसवसफुरफुरंतअहरोद्धो ।  
 कयपरिभवमंतक्खरजाओ व्व समुद्धिओ सहसा ॥८२५९॥  
 दिढबद्धकेसजूडो नियत्थ(च्छ)वत्थो निबद्धछुरिओ य ।  
 करकलियनिसियखग्गो वच्छत्थललुलियहारलओ ॥८२६०॥  
 संनद्धपरियरायारभासुरो जा महाबलो होइ ।  
 ता तत्थ दुराधरिसो पत्तो हरिविक्रमकुमारो ॥८२६१॥  
 हरिविक्रमभासुरतेयपुंजपज्जालिओ व्व सामंगो ।  
 जाओ महाबलो तक्खणेण अइनिप्फुरपयावो ॥८२६२॥  
 चिंतइ महाबलो 'कयपयत्तसुररक्खियंमि दुड्ढमई ।  
 वारसजोयणभाए कीडियमेत्तं पि नो विसइ ॥८२६३॥  
 भूमितले गयणयले विज्जाहर-सुर-नराण वि अलंघं ।  
 एयं अलंघदुग्गं लोहग्गलसुरंपहावेण ॥८२६४॥  
 हरिविक्रमो वि एसो सामन्नमणुस्सजाइओ एत्थ ।  
 कह णु पविद्धो होही मह सेन्ननिरंतरे दुग्गे ? ॥८२६५॥

लोहगगलदेवेणं अहवा मह साहियं पुरा चेव ।  
 अहमेक्कस्स असक्को जं किर हरिविक्कमस्स परं ॥८२६६॥  
 इय चिंतंतो सहसा पलयघणघोसघोरसद्देण ।  
 हरिविक्कमकुमरेण सकोवमिव हक्किओ वेरी ॥८२६७॥  
 'रे रे ! नाम महाबल ! पयडसु एण्हि नियं बलं समरे ।  
 आयडसु करवालं जइ अत्थि मणे अवट्टंभो' ॥८२६८॥  
 तो हरिविक्कमहक्कासंखुद्धमणस्स तस्स नरवडणो ।  
 विहलंघलस्स सहसा गलियं हत्थाओ करवालं ॥८२६९॥  
 ईसीसि विहसिऊणं भणियं कुमरेण 'तुह बलं दिट्टं ।  
 मा भाहि तुज्झ अभयं पहरामि न गलियखग्गस्स ॥८२७०॥  
 पेच्छामि कोउएणं सो वि क्किं वाणमंतरो तुज्झ ? ।  
 मन्ने जह तुज्झ बलं तस्स वि एयारिसं होही' ॥८२७१॥  
 भणियं महाबलेणं 'जहत्थनामो तुमं चिय जयमि ।  
 जस्स हरिणा समाणो जयपयडो विक्कमो अत्थि ॥८२७२॥  
 नामाई मारिसाणं अन्नत्थ जहा तहा पयट्टंतु ।  
 तुह विसए वि नरेसर ! न लहंति जहत्थयं निययं ॥८२७३॥  
 अन्नत्थ रिउंमि पराजओ वि मह होइ दूसणं देव ! ।  
 तुह विसएणं सो च्चिय संजाओ भूसणं मज्झ ॥८२७४॥  
 सकयत्थं चिय मन्ने अप्पाणं देव ! एत्तिएणेव ।  
 दुज्जेओ अन्नेसिं तुमए विजिओ सयं जमहं ॥८२७५॥  
 ता एसो हं भिच्चो एयं दुग्गं परिग्गहो एसो ।  
 कोसो विसय-कलत्ताइं च सव्वं पि गेण्हेसु ॥८२७६॥

लोहग्गलदेवेण वि पढमं चिय देव! अम्ह अक्खायं ।  
‘हरिविक्रमंमि पत्ते मह मग्गं मा पलोएज्ज’ ॥८२७७॥  
‘साहु साहु’ त्ति भणित्तं सप्पणयं भणइ जक्खराया वि ।  
‘एस च्चिय पहुभत्ती सव्वंगसमप्पणं जमिह ॥८२७८॥  
कस्सेरिसो विवेओ एयविहो कज्जनिच्छओ जस्स ।  
जह तुज्झ कुमरविसए संजाओ एगचित्तस्स ?’ ॥८२७९॥  
एत्थंतरंमि सूरुो नियदंसणनिहि(ह)यवैरितिमिरोहो ।  
हरिविक्रमो व्व उइओ महिहरसिरठवियनियपाओ ॥८२८०॥  
संकोथदुहत्ताओ दूरयरनिगूढकोससाराओ ।  
हरिउग्गमे पयाओ वियसंतिह पउमिणीओ व्व ॥८२८१॥  
तो नीहरिओ बाहिं उदंतवलहीए संठिओ कुमरो ।  
जक्खकयदेहरक्खो तप्परियणधरियसियछत्तो ॥८२८२॥  
चडुलमहाबलकरकलियचमरसाहिप्पमाणरिउविजओ ।  
सव्वंगरयणभूसणसोणपहापुंजपरिकलिओ ॥८२८३॥  
तो हरिविक्रमससहरदंसणक्खु(खु)ब्भंतदूरवित्थारं ।  
जलनिहिजलं व सहसा संचलइ महाबलबलोहं ॥८२८४॥  
तो उट्ठीकयकरयलनिसिद्धसामंतचित्तसंखोहो ।  
वारइ महाबलो नियबलाइं पुण भणइ गुरुसदं ॥८२८५॥  
‘भो! भो! निसुणह सव्वे सामंता! मंडलीयरायाणो! ।  
सो एस अतुलसत्ती अच्चु(च्च)ब्भुयविक्रमपयावो ॥८२८६॥  
हरिविक्रमो त्ति नामं जो पुत्तो अजियविक्रमपहुस्स ।  
जस्स भएण पलाणो देवो लोहग्गलो दूरं ॥८२८७॥

तो मन्नह पढुमेयं चयह विरोहं अतुल्लसामत्थं ।  
 पणमह लच्छिनिवासं हरिविक्रमदेवपयकमलं' ॥८२८८॥  
 इय एवं ते भणिया सव्वे वि मणंमि कयचमक्कारा ।  
 पणमंति पलोयंता पयावमसमं कुमारस्स ॥८२८९॥  
 एत्थंतरंमि नयरे घोसिज्जइ वियडरायमग्गेसु ।  
 रत्था-चउक्क-चच्चर-सिंगाडय-तियपयपहेसु ॥८२९०॥  
 'हरिविक्रमस्स आणा जो कुणइ भयं व दुत्थ(?)संकं व ।  
 निच्चं पमुइयचित्ता अच्छह परमेण सोक्खेण ॥८२९१॥  
 कुणह पुरहट्टसोहं परिहह पंगुरह विलसह जहिच्छं ।  
 उग्घाडइ(ह) सव्वाइं पओलिदाराइं वेगेण ॥८२९२॥  
 हरिविक्रमआगमणे नियनियगेहेसु उच्छवं कुणह ।  
 नच्चह वद्धावणयं आणंदं कुणह पाहिद्धा' ॥८२९३॥  
 हरिविक्रमो वि तुरियं सेणाहिववैरिसीहमाणेइ ।  
 संथइ नयरपहाणा आवज्जइ लोयहिययाइं ॥८२९४॥  
 आणावइ नियसेन्नं जं पुत्विं मलयसेलनियडंमि ।  
 आवासियं जओ किर अवहरिओ मलयमेहेण ॥८२९५॥  
 नियसेन्नस्स नरिंदं महाबलं अप्पिऊण सकलत्तं ।  
 सपरिग्गहं सकोसं सहत्थि-रह-तुरय-पाइक्कं ॥८२९६॥  
 पडुवइ अजियविक्रमरायस्स समीवमुचियकयरक्खो ।  
 भणइ य तं सप्पणयं राया नीइं अणुसरंतो ॥८२९७॥  
 'वच्चसु अकयवियप्पो तायसमीवं महाबलनरिंदं ! ।  
 मह उण न अत्थि सत्ती गहण-पयाणे पीवसस्स' ॥८२९८॥

इय जाव अलंघउरे अच्छइ हरिविक्रमो सदेसे व्व ।  
 रज्जसिरिं भुंजंतो वीरसुयाविरहखीणंगो ॥८२९९॥  
 ता सहसा जक्खपरिग्गहंमि एगो समागओ जक्खो ।  
 सो भुयणसुंदरीए साहइ सयलं षि वुत्तंतं ॥८३००॥  
 तं सोऊण कुमारो 'हा! ह' त्ति तिसूलघायभिन्नो व्व ।  
 जक्खस्स विरसवयणं अह मोहं जाइ निच्चेट्ठो ॥८३०१॥  
 तो जक्खरायविरइयसीयलकिरियाहिं लद्धवेयन्नो ।  
 पाययनरो व्व विलवइ अजहत्थलुलंततणुकेसो ॥८३०२॥  
 'हा देवि! भुयणसुंदरि! सकीयसुंदेरि(र)विजियतेलोक्रे! ।  
 कह निक्खिस्स मह कारणेण अप्पा तए वहिओ ? ॥८३०३॥  
 तुमए भुयणमसेसं विभूसियं जुयइरणभूयाए ।  
 तं चिय तए विहीणं न सोहए छिन्नसीसं व्व ॥८३०४॥  
 कह देवि! मह निमित्तं तुह मरणसमुब्भवं महापावं ।  
 वरिससहस्सकएहिं वि घोरतवेहिं वि मह समिही ? ॥८३०५॥  
 हा! भुयणसुंदरि! तए तहा कओऽहं जहा तिलोए वि ।  
 अद(द)डुव्वो जाओ अगेज्झनामो य न हु भंती ॥८३०६॥  
 जं पुत्विं मह भुयणं हुंतं गुणसवणदिन्ननियकन्नं ।  
 तं मह नामे निसुए निबिडयरं झंपिही कन्ने ॥८३०७॥  
 विस्सासघाइणो जे गुरुपइ(डि)णीया य जे कयग्घा य ।  
 नारी-बालवहा वि य हुंति असोयव्वनामा ते ॥८३०८॥  
 तं अन्नभवे पावं मए कयं जस्स फलमिमं जायं ।  
 एण उ जं होही पुरओ तमहं न जाणामि ॥८३०९॥

तुह विरहजलणदड्ढो वीयं तुहमरणपावमलकसिणो ।  
 अपवित्तो हं जाओ मसाणजाओ व्व अंगारो' ॥८३१०॥  
 इयएवमाइबहुविहपलावसयदुत्थियं मलयमेहो ।  
 संधीरइ रायसुयं निच्छयसारेहिं वयणेहिं ॥८३११॥  
 'किं हरिविक्रम! विक्रमधणो वि एवंविहाइं पलवेसि ? ।  
 जुयईणं चिय सोहइ नरिद! एवं अणुड्डाणं ॥८३१२॥  
 पयईए कोमलाइं कुमार! हिययाइं साहसधणाण ।  
 ताइं चियावयाए कुलिसकढोराइं जायंति ॥८३१३॥  
 जाणामि ओहिनाणेण कुमर! सिरिभुयणसुंदरी देवी ।  
 अच्छइ जीवंत च्विय अविणट्टसरीर-चारित्ता ॥८३१४॥  
 ता अच्छ तुमं इहइं अहयं पुण सयलभुयणवलयंमि ।  
 धूयं गवेसिऊणं अवस्स तुमए घडिस्सामि' ॥८३१५॥  
 इय भणिऊणं जक्खो कुमरं आपुच्छिऊण गयणेण ।  
 नीहरिओ वेगेणं पवणो व्व अदीसमाणगई ॥८३१६॥  
 हरिविक्रमो वि दूसहदइयाविरहग्गिदाहसंतत्तो ।  
 तत्तकडिल्ले व गओ तल्लुवेल्लीओ विरएइ ॥८३१७॥  
 अह अन्नदिणे गुरुत्तरदइयादुहदाहदज्झमाणतणू ।  
 सेणाहिवेण भणिओ सम्पणयं वैरसीहेण ॥८३१८॥  
 'तुह देव! सयलसत्थत्थवित्थरुप्पन्नपरमनाणस्स ।  
 अम्हारिसोवएसा न किं पि कज्जं पसाहंति ॥८३१९॥  
 तह वि न अरिहसि काउं खेयं नरनाह! निप्फलारंभं ।  
 तुम्हारिसाण एयं दूरविरुद्धं जओ कम्मं ॥८३२०॥

सोएण जणे हासो खिज्जइ देहो गलंति बुद्धीओ ।  
 संजायइ दीणत्तं पत्थुयकज्जस्स तह नासो ॥८३२१॥  
 कह ते कुणंति सोयं नामेण वि जाण कंषइ जयं पि? ।  
 आणसु सविक्रमेणं हहेण देविं अरिसिरिं व ॥८३२२॥  
 जे करवालतुलाए नियजीयं तोलिऊण अप्पंति ।  
 वेरीण वीरचरिया ते च्चिय सायं(हं)ति नियअत्थं ॥८३२३॥  
 किं देव! इमं न मुणसि तए सदुक्खे जयं पि बहुदुक्खं ? ।  
 तुह देहे च्चिय निवसइ जम्हा भुयणं निरवसेसं ॥८३२४॥  
 तो देव ! चयसु सोयं पहीणजणसेवियं च अफलं च ।  
 कुणसु अवट्ठंभं चिय पसाहियासेसकज्जत्थं ॥८३२५॥  
 इय सेणाहिववयणं सोउं हरिविक्रमो पयइवीरो ।  
 पच्चागयचेयन्नो परमत्थविभावओ जाओ ॥८३२६॥  
 'अहह! पियावइयरवज्जवडणखणमेत्तजायपीडस्स ।  
 मह सच्चो पमु(म्हु)द्धो उच्चियाणुच्चियत्तवावारो ॥८३२७॥  
 जइ मारिसा वि एवं परोवएसारिहा भविस्संति ।  
 ता हंत! निराधारा संजाया धीरिमा भुयणे ॥८३२८॥  
 ता जुत्तं च्चिय भणिओ सेणावइणा अहं सयत्थं च ।  
 नियबलपरकुमेणं दइयत्थे हं पयट्ठिस्सं ॥८३२९॥  
 जक्खेण वि मह कहियं जं जीवइ भुयणसुंदरी देवी ।  
 ता सच्चहा तयत्थं पुरिसायारं पयासेमि' ॥८३३०॥  
 इय चिंतिऊण कुमरो सेणानाहं पयंपई हिद्धो ।  
 'को अन्नो मज्झ हिओ तुमं विणा एत्थ भुयणंमि ? ॥८३३१॥



तुह वयणपवणपडिपेल्लिओ व्व दूरं रओ व्व ओसरिओ ।  
 खेओ मह मणरयणे सहावविमलंमि नरनाह ! ॥८३३२॥  
 एत्थंतरंमि मित्तो हरिविक्कमकज्जकरणबुद्धीए ।  
 देवीगवेसणत्थं पच्छिमजलहिंमि पविसेइ ॥८३३३॥  
 वीरधूएक्करत्तं नाउं हरिविक्कमं व वरुणदिसा ।  
 संज्ञामिसेण मन्ने ईसारायं व्व उव्वहइ ॥८३३४॥  
 सिरिभुयणसुंदरीगुरुदुहे व अंतरियसयलजियलोए ।  
 मज्जइ तिमिरे भुयणं संछन्नासेसउज्जोयं ॥८३३५॥  
 उवसंतसव्वचेट्ठं गुरुनिदंतरियलोयचेयन्नं ।  
 वीरसुयादुक्खेण व मुच्छामूढं व भुयणयलं ॥८३३६॥  
 एवंविहंमि समए कयगुरु-जिणपायवंदणो कुमरो ।  
 अत्थाणे उवविट्ठो सामंतसहस्ससंकिन्नो ॥८३३७॥  
 तत्थऽच्छिऊण य खणं उचियावसरे विसज्जियत्थाणो ।  
 वच्चइ सेज्जाभवणं परिमियपरिवारपरियरिओ ॥८३३८॥  
 तंमि गओ परिवारं विसज्जए कयपसायसंमाणं ।  
 तो सेज्जाए उवन्नो क्रोमलतूलीसणाहाए ॥८३३९॥  
 अह सो विचित्तसेज्जाहरंमि चिंतेइ बहुविहोवाए ।  
 'केणेह उवाएणं मह दइयादंसणं होही ? ॥८३४०॥  
 अहवा जाव न अप्पा परिखिप्पइ संसयंमि मरणंते ।  
 ताव न वंछियकज्जं साहसहियया पसाहंति ॥८३४१॥  
 साहस-सत्तिधणाणं दो चेव गईओ होंति धीराणं ।  
 तिणतुलियसजीयाणं मरणं व सकज्जकरणं व ॥८३४२॥

उववासिओ म्हि अज्ज य अज्ज य किण्हड्ढमी वि संजाया ।  
 ता बाहिं गंतूणं हढेण साहेमि कं पि सुरं ॥८३४३॥  
 इय चिंतिऊण उड्डइ कयपरियरबंधभासुरसरीरो ।  
 करकलियखग्गरयणो नियंबदिढबद्धुरिओ य ॥८३४४॥  
 कयहारबंधभसुत्तो पलंबपडपाउयंगपच्छन्नो ।  
 नीहरिओ भवणाओ अलक्खिओ जामइल्लेहिं ॥८३४५॥  
 अहिलंधियपायारो दूरं परिहरियखाइयावलओ ।  
 करणपरिहत्थदेहो पडिओ बाहिंमि दुग्गस्स ॥८३४६॥  
 तो वियडपयभरक्खेवदलिय-थरहरियमहियलाभोओ ।  
 पत्तो मसाणभूमिं सहसा तिणतुलियतेलोक्को ॥८३४७॥  
 उप्पत्तिं व भयाणं सूणागारं जमस्स व दुरंतं ।  
 आगारं मरणस्स व लीलावासो व्व भूयाणं ॥८३४८॥  
 पजलंतचियाहितो दरदड्ढं कड्ढिऊण मडयोहं ।  
 भक्खंति जत्थ भूया निबद्धघणमंडलीबद्धा ॥८३४९॥  
 दीसंति जत्थ विविहा विपणिपहा वीरमंस-वसपउरा ।  
 वेयाल-भूयरक्खसकौलाहलपयडपब्भारा ॥८३५०॥  
 पजलंतबहुचियासयजालाकवलिज्जमाणगयणयलं ।  
 जं होइ पलयकालानलस्स उप्पत्तिवीयं व ॥८३५१॥  
 जालामुहीओ जत्थ य समंसपामुक्कजलणजालाओ ।  
 चिरकवलियसपलचिया हव्ववहं उव्वमंति व्व ॥८३५२॥  
 जं घोरधूयघुक्काररावबहिरियनहंतराभोयं ।  
 छलियं व निब्भयजम्मं(मं?) आमेलइ दीहहुंकारं ॥८३५३॥

बहु साइणिजुयइजणं रक्खस-वेयाल-भूय-नरनिविडं ।  
 सव्वं(विं)दियअमणोत्रं जमस्स जं रायहाणि व्व ॥८३५४॥  
 एवंविहे मसाणे गरुयं तत्थऽत्थि भैरवाययणं ।  
 तंमि कावालियाणं अत्थि महंतो मढो एगो ॥८३५५॥  
 तत्थऽत्थि खुद्धविज्जासिद्धिसमुब्भूयअसमसामत्थो ।  
 जल-त्थ(थ)लअक्खलियगई वोमविहारी महारोद्धो ॥८३५६॥  
 नामेण सूलपाणी तस्स य सीसोऽत्थि तस्स अत्थहिओ ।  
 बहुसिज्झ(द्ध)विज्जमंतो कवालधयधारओ भीमो ॥८३५७॥  
 नरहड्डखंडवहुविहभूसणविणिवेसभासुरसरीरो ।  
 खट्टंग-डमरुहत्थो सव्वंगं भूइपंडुरिओ ॥८३५८॥  
 नामेण चंडरोद्धो चंडो रोद्धो जहत्थनामो सो ।  
 ते तत्थ दो वि भीमा मढंमि निवसंति गुरु-सीसा ॥८३५९॥  
 अह हरिविक्कमकुमरो तंमि मसाणे सहावभीमंमि ।  
 परियडइ अखुद्धमणो पेच्छंतो वैयरे विविहे ॥८३६०॥  
 वेयालेहिं निरुद्धं कत्थ वि विलवंतमंतिसंघायं ।  
 ते हक्किऊण वीरो मेल्लावइ तं सकारुन्नो ॥८३६१॥  
 कयवरमंडलपूए बहुविज्जासाहणुज्जए पुरिसे ।  
 दट्ठण नीसहाए सहायभावं कुणइ ताण ॥८३६२॥  
 अन्नत्थ भूय-रक्खस-पिसाय-वेयाल-साइणीनिवहं ।  
 आमुकुघोरहक्को दुन्नयकज्जाउ वारेइ ॥८३६३॥  
 'किं देह रक्खसाणं अप्पाणं छिंदिडं किलीवाण ?' ।  
 इय वारिऊण वीरे(रो?) मणोरहे ताण पूरेइ ॥८३६४॥

इयएवमाइवइयरनिरंतरं पिउवणं नियच्छंतो ।

पत्तो कमेण कुमरो अइभीमं भइरवाययणं ॥८३६५॥

जा जाइ तत्थ निहुयं ता पेच्छइ सुलपाणिमुवविट्ठं ।

कयजोगपट्टपज्जं कबंधज्झा(झा)णासनासीनं ॥८३६६॥

सन्निहिठवियतिसूलं परिचारयपुरिससंजुयं भीमं ।

तं दट्ठण कुमरो थंभंतरिओ ठिओ नियइ ॥८३६७॥

जा तं एकुग्गमणो कुमरो किर नियइ ताव पजलंतं ।

पुरओ तस्स अयंडे तिसूलमह कंपियमच्छि(छि)क्कं ॥८३६८॥

तो भणइ सुलपाणी सन्निहियनरं 'नियच्छ रे पुत्त ! ।

पजलंतं कंपंतं मज्झ तिसूलं महाइसयं' ॥८३६९॥

भणइ नरो 'किं एयं कंपइ पज्जलइ ? कहसु मह भयवं !' ।

सो भणइ 'को वि चिइइ सलक्खणो इत्थ वरपुरिसो ॥८३७०॥

गेण्हसु तस्स कवालं जेणं तुह हुंति सव्वसिद्धीओ ।

एयं मज्झ निवेयइ तिसूलमेवं पकंपंतं ॥८३७१॥

एमेव भमइ भुयणं कवालकज्जंमि चंडरोद्धो सो ।

ठाण्ठिएहि वि लब्भइ निडालवट्ठंमि जं लि[हियं] ॥८३७२॥

परिचारएण भणियं 'न को वि इह तव्विहो नरो अत्थि' ।

सो भणइ 'किं विकंथसि(विकत्थसि?) न अन्नहा भासियं मज्झ' ॥८३७३॥

एत्थंतरंमि सहसा नहाओ डमडमियडमरुयकरग्गो ।

दिढवद्धजडाजूडो कयभूइविलेवणसरीरो ॥८३७४॥

खंद्धियखट्ठंगो हठे(ढे)ण धरिउं सिरग्ग-केसेसु ।

वरतरुणिमुव्वहंतो ओयरिओ गुरुसमीवंमि ॥८३७५॥

तो भणइ गुरु 'किं चंडरुद! लद्धं तहाविहिं(हं) किं पि ? ।  
 बहुलक्खणसंपन्नं नरं व नारिं भमंतेण ?' ॥८३७६॥  
 सो भणइ 'सुट्ठु लद्धं संभवइ न जं तिलोयमज्झे वि ।  
 दिव्वं कन्नारयणं नियरूवविणिज्जियतिलोयं' ॥८३७७॥  
 अह चिंतेइ कुमारो 'अच्छरियमिमस्स वरतिसूलस्स ।  
 जं दट्ठुण सलक्खणपुरिसं पज्जलइ कंपेइ ॥८३७८॥  
 का एसा वरनारी होही घणकसिणकेसपब्भारा ? ।  
 निबिडे तमंधयारे पच्चभिजाणामि कह एयं ?' ॥८३७९॥  
 तो भणइ सूलपाणी 'नियच्छ रे चंडरुद! इह पुरिसं ।  
 सव्वंगलक्खणधरं निवेइयं मह तिसूलेण' ॥८३८०॥  
 तो भणइ चंडरुदो 'भयवं! नेयारिसो भवे मंतो ।  
 जं चिय अप्पायत्तं तं चिय पढमं वसे कुणह ॥८३८१॥  
 सिद्धप्पाए कज्जे कालविलंबो करेइ विग्घायं ।  
 तम्हा सिद्धं मोत्तुं असिद्धकज्जं न कायव्वं' ॥८३८२॥  
 तो भणइ गुरु 'एवं, मारसु वेगेण कन्नयं एयं ।  
 मा को वि पुण इमीए काही परिपंथगो विग्घं' ॥८३८३॥  
 तो केसे घेत्तूणं भैरवभवणंमि नेइ तं नारिं ।  
 करुणरवं विलवंतिं भएण कंपंतसव्वंगिं ॥८३८४॥  
 दक्खत्तणेण कुमरो पढमं पविसेइ भैरवं भवणं ।  
 थंभंतरिओ चिद्धइ निग्घिणचेट्ठं पलोयंतो ॥८३८५॥  
 तो तं स(सु)कुमारंगिं सललियलायन्नरूवविन्नासं ।  
 केसेसु कट्ठिऊणं दड त्ति सो खिवइ धरणीए ॥८३८६॥

पच्छकयबाहुवसा भग्गुन्नइपिहुलजायथणवट्टं ।  
 तं बंधइ वरनारिं नरकेसमयाए रज्जूए ॥८३८७॥  
 दिट्ठ(ढ)यररज्जुनिबंधणपीडावसरोइरिं अलक्खंगो ।  
 दट्ठं नारिं कुमरो छिन्नइ छुरियाए तब्बंधे ॥८३८८॥  
 अह पुरिसवसापज्जलियदीवसंजायमंडवुज्जोओ ।  
 निव्वत्तइ नीसेसं भैरवपूयाविहिं पढमं ॥८३८९॥  
 तो निव्वत्तियपूओ समागओ कन्नयासमीवमि ।  
 ण्हावइ कन्नं तह रत्तचंदणेणं पि लिपेइ ॥८३९०॥  
 रत्तकणवीरमालं बंधइ सीसंमि तीए बालाए ।  
 उग्गाहइ अच्चुगं गुग्गुलधूवं च कावाली ॥८३९१॥  
 तो कड्डइ विकरालं हड्डच्छरुभीसणं(?) निसियकत्तिं ।  
 पुण भणइ चंडरुद्धो 'बद्धा सि मए कहां छुट्ठा ?' ॥८३९२॥  
 अह सो अदिन्नपडिउत्तरं च बालं भणेइ अइकुद्धो ।  
 'सुमरसु तमिड्डदेवं सरणं वा जासु कस्साऽवि' ॥८३९३॥  
 सा भणइ 'मए सरिओ चंदण्हजिणवरो परमदेवो ।  
 पंचनमोक्कारं पिव मरणंते तं पि सुमरामि ॥८३९४॥  
 सो चेव मज्झ सरणं भवे भवे जिणवरो य नवकारो ।  
 बीओ भुयणसरन्नो सरणं हरिविक्कमकुमारो' ॥८३९५॥  
 तं तिस्सा सुहवयणं सोउं कावालिओ गुणद्देसी ।  
 रोसफुरियाअ(ऽ)हरोट्ठो अह बालं भणिउमाढत्तो ॥८३९६॥  
 'आ वैधम्मिणि! पावे! चंदण्हसुमरणेण एण्ह पि ।  
 नवकारमंतआकर(रि)सियं व तुह आगयं मरणं ॥८३९७॥

हरिविक्रमो वि लोहग्गलस्स जो वेरिओ तयं सरणं ।  
 जं षडिवन्ना तेणेव तुज्झ मरणं समावडियं ॥८३९८॥  
 जइ पुण भयवंतं भैरवं च लोहग्गलं च सुमरेसि ।  
 ता तुज्झ तेहिं विहियं अज्ज हुन्तं परित्ताणं ॥८३९९॥  
 अज्ज वि न किं पि नट्टं भैरवदेवं सरेसु परमप्पं ।  
 लोहग्गलं च जेणं तुह रक्खा होइ मरणंमि' ॥८४००॥  
 तो भणइ कन्नया सा 'कावालिय! किं व पलवसि अज्जुत्तं ? ।  
 मरणंते वि [य] पत्ते न अन्नदेवो मणे मज्झ ॥८४०१॥  
 मरणं वा जीवं वा नियकम्मवसेण होइ पाणीण ।  
 देवो न किं(कं) पि मारइ न मरंतं अहव रक्खेइ ॥८४०२॥  
 ता सव्वहा पसंतो पसंतसंसारसयलवावारो ।  
 सो च्चिय ससिप्पहजिणो भवे भवे होउ मह सरणं ॥८४०३॥  
 निहणइ सव्वभयाइं अवमच्चुं हणइ समइ विग्घायं ।  
 सुमरिज्जंतो हियए नवक्का(का)रो नत्थि संदेहो ॥८४०४॥  
 जं सोऊण कुमारं तणं व लोहग्गलाइणो हुंति ।  
 सो मह न परं इहइं सरणं अत्रेसु वि भवेसु' ॥८४०५॥  
 इय कुमरो सोऊणं जिण-नवकारेसु निच्छि(च्छ)यं तिस्सा ।  
 अब्भहियजायपक्खो मेरुसमं मुणइ तं कन्नं ॥८४०६॥  
 'करुणाइणं नारि ति जीए किर रक्खणे पयट्ठो मिह ।  
 नियजीयसंसए वि हु संपइ तं कह न रक्खिस्सं ? ॥८४०७॥  
 मं सरणं षडिवन्ना एत्थ उ किं कारणं हवे ? जम्हा ।  
 परियाणेमि न एयं तुच्छप्पईवप्पहे भवणे ॥८४०८॥

अहवा एसा होही मह सेन्ने रायदारिया का वि ।

तेण ममं पडिवज्जइ सरणं नियपक्खवाएण' ॥८४०९॥

एत्थंतरंमि हियए सल्लं व खुडुक्किया कुमारस्स ।

'सिरिभुयणसुंदरी होज्ज किं नु इह आगया देवी ? ॥८४१०॥

अहवा कह मह होही एवंविहविमलपुन्नसंपत्ती ? ।

सा इह होही अहयं रक्खिस्सं निययजीयं व' ॥८४११॥

इय जा चिंतइ कुमरो ता सो पयईए निग्घिणो पावो ।

दडोडुभिउडिभीमो विमुक्कगुरुघोरहुंकारो ॥८४१२॥

केसेसु कड्डिऊणं जाव निवेसेइ कत्तियं कंठे ।

ता हक्किओ कवाली कुमरेण गहीरसदेण ॥८४१३॥

'हा पाव ! पावचेट्टिय ! अविसिट्ठ-विसिट्ठजणअद्द(द)डुच्च ! ।

किं तुमए पारद्धं चंडालाणं पि जमकिच्चं ? ॥८४१४॥

कह न गओ सयखंडं ? अहव विलीणो सि किन्न एत्थेव ? ।

उत्तमजुयइवहज्झवसायपहावेण एण्ह पि ? ॥८४१५॥

एए वि किं न सडिया तुह हत्था पयइकक्कसा कूर ! ।

जम(मि)मीए केसपासे हढकड्डणकज्जवावरिया ? ॥८४१६॥

गोरिं स(सु)कुमारंगिं गुरुमहिहररायसंभवं देविं ।

हा पाव ! पच्चइं पिव जयपुज्जं कह णु मारेसि ?' ॥८४१७॥

एत्थंतरंमि सहसा कुमरं अवलोइऊण सा बाला ।

संजीविय व्व सरणं पडिवन्ना भणिउमाढत्ता ॥८४१८॥

'हा निक्कारणवच्छल ! रक्ख ममं रक्ख मरणभयभीयं ।

कावालियाओ निग्घिणकम्मरयाओ जम्मा(मा)ओ व्व ॥८४१९॥



जिण-पंचनमोक्कारप्पहावआकर(रि)सिओ व्व सुहरासी ।  
 समुवड्ढिओ सि सुंदर! पच्चक्खो पुरिसरूवेण' ॥८४२०॥  
 हरिविक्खमेण भणियं 'साहमि(म्मि)णि! सव्वहा न भेतव्वं ।  
 दूरं गयाइं एण्हि भयाइं तुह जिणपहावेण ॥८४२१॥  
 सच्चं तुमए भणियं जिण-नवक्का(का)ररप्पहावओ अहयं ।  
 आकिट्ठो इव पत्तो तुह पयडो पुन्नरासि व्व' ॥८४२२॥  
 तो भणइ चंडरुद्धो मुहकुहरविमुक्कजलणघणजालो ।  
 'को एस पावकम्मो महंतराए पयट्ठेइ ? ॥८४२३॥  
 रे रे पुरिसाहम! सप्पगिलियसालूरियं व मोएउं ।  
 मंडूओ इव आओ मह समुहं कुद्धहिययस्स' ॥८४२४॥  
 हरिविक्खमेण भणियं 'रे रे पासंडि! चंड! चंडाल! ।  
 अपवित्तं पिव मन्ने अप्पं तुह दंसणेणाऽवि ॥८४२५॥  
 कह न तुह पाव! हिययं तड त्ति फुट्ठं मणे धरंतस्स ।  
 भुयणेक्कसारनारीवहसंकप्पं परमघोरं ?' ॥८४२६॥  
 अह कावालिय-कुमराणं तच्चिहं सोउमसरिसालावं ।  
 सहस त्ति सूलपाणी तिसूलहत्थो त्तिहिं पत्तो ॥८४२७॥  
 जस्स तिसूलं सोहइ जलंतसूलगगतिविहजालाहिं ।  
 मंताकिट्ठेहिं व जं अहिट्ठेयं तिविहजलणेहिं ॥८४२८॥  
 मुहमुक्कतेउलेसो चउदिसिपसरंतदीहजालोली ।  
 पलयानलं किरंतो हरो व्व संहारसमयंमि ॥८४२९॥  
 तो तं तहासरूवं बाला दट्ठुं भएण कंपंती ।  
 'परितायह परितायह' इय भणिरी कुमरमल्लियइ ॥८४३०॥

नियपिद्वे घेत्तेउं कुमरो तं बालियं पयइवीरो ।  
 धरिउं जडासु पाडइ पच्छा बाहूहिं बंधेइ ॥८४३१॥  
 तह चेव चंडरुद्धो बद्धो अह ताण दोहिं(ण्ह) वि सरोसं ।  
 लिंगी होइ अवज्झो त्ति नासियं झत्ति छिंदेइ ॥८४३२॥  
 पसरंततिसूलानलजालाउज्जोइयंमि भवणंमि ।  
 कुमर-कुमरीण जायं अन्नोन्नं पच्चभिन्नाणं ॥८४३३॥  
 हरिविक्रमो त्ति बाला कुमरो वि य भुयणसुंदरि त्ति इमा ।  
 अन्नोन्ननिच्छएणं हरिसेणंगे न मायंति ॥८४३४॥  
 जो आसि भयवसेणं पुरा पकंपो नरिंदधूयाए ।  
 सो कुमरदंसणेणं तहट्टिओ वासणाभिन्नो ॥८४३५॥  
 दूरसंभवदंसणवसपसरियविग्घयाइं जुगवं पि ।  
 अहिणंदंति सहरिसं नियनियपुत्राइं अन्नोन्नं ॥८४३६॥  
 लाभो अलंघपुरस्स वि जोऽणिद्वो आसि तीए मरणेण ।  
 देवीए दंसणेणं तं चिय कुमरो पसंसेइ ॥८४३७॥  
 किं बहुणा ? ताण अन्नोन्नदंसणुप्पन्नहरिसाण ।  
 तं किं पि सुहं जायं जस्सऽत्थि न तिहुयणे उवमा ॥८४३८॥  
 अन्नोन्नविरहियाणं दुहनिम्माओ व्व जो भवो आसि ।  
 सो चेव संजुयाणं सुहनिम्माओ व्व संजाओ ॥८४३९॥  
 अह भणइ रायपुत्तो 'देवि! कहां पाविया सि एएण ?' ।  
 सविलक्खा य सलज्जा अहोमुही भणइ रायसुया ॥८४४०॥  
 'जाणामि एत्तियं चिय जमहं मंजूससंठिया हुंती ।  
 एएण तओ कहमवि कट्ठीया एत्थ आणीया' ॥८४४१॥

हरिविक्रमेण भणियं 'दूरमविन्नायमहसरूवाए ।

अप्पा न केवलं चिय भुयणं पि[य] संसए छुं ॥८४४२॥

जं हियए वि न सम्मा(मा)इ जं च अवरोप्परेण कयपीडं ।

कह तं थणवडुं पिव कज्जं हियए तए धरियं ? ॥८४४३॥

बहुसत्थपंडियाए पयइवियद्धाए चउरचित्ताए ।

सविवेयाए न तए मह हिययं जाणियं देवि! ॥८४४४॥

तो भणइ रायधूया 'पुव्वुत्तगुणे नरिंद! नारीण ।

पियपिम्ममोहियाणं खणेण सव्वे वि नासंति ॥८४४५॥

अमयमया अब्भत्था विमला गुरुदुक्खपडणजज्जरिया ।

कैरओवल व्व सुगुणा निविडा वि न किं विलिज्जंति ? ॥८४४६॥

किं तु मह कोऊ(उ)हल्लं साहह किं एत्थ आगया तुब्भे ? ।

अमणुन्ने बीभच्छे सुलहअवाए मसाणंमि ?' ॥८४४७॥

कुमरेण नियवियप्पियपयडणसंजायगरुयलज्जेण ।

भणियं 'एमेव इहागओ म्हि लीलाविहारेण' ॥८४४८॥

एत्थंतरे नहाओ 'जयइ कुमारो' त्ति परियणसमेओ ।

दंतो विविहासीसाओ आगओ मलयमेहो वि ॥८४४९॥

'जयहि नियवंसभूसण! जय जय नियसत्तितुलियतेलोक्कु! ।

जय हरिविक्रमनरनाह! नंद आचंदसूरं जा' ॥८४५०॥

इय सो दिन्नासीसो समागओ कुमर-कुमरिपासंमि ।

पुच्छियकुसलोदंता साणंदा एंति नियद्धा(ठा)णं ॥८४५१॥

तो भणइ जक्खराया 'कुमार! उववासपीडियसरीरो ।

संजायजागरो वि य खणमेत्तं ठासु सेज्जाए' ॥८४५२॥

१. करकोपला इव - खंता ॥

'एवं' ति पभणिऊणं कोमलतूलीसणाहमत्थुरणं ।  
 अल्लियइ खणं कुमरो निदाभरमउलियच्छिजुओ ॥८४५३॥  
 तो भुयणसुंदरीए पुड्डो जक्खो 'कहेसु मह ताय! ।  
 को अज्ज पव्वदियहो जेण उ(णु)ववासी हुओ कुमरो ? ॥८४५४॥  
 किं वा अमणुत्तुब्भेवबहुलबहुविहअवायपेयवणे ।  
 कुमरो गओ ? असेसं साहसु, मह कोउयं गरुयं' ॥८४५५॥  
 जक्खो भणइ 'तए च्चिय उववासा किं कया दुवेऽपव्वे ? ।  
 केण व पओयणेणं जलहिंमि पवाहिओ अप्पा ?' ॥८४५६॥  
 बाला भणइ 'अवन्नं सोऊण इमस्स जायखेयाए ।  
 सव्वं पि मए विहियं पुव्वुत्तं नेहमूढाए' ॥८४५७॥  
 जक्खो भणइ 'इमो वि हु निरवेक्खाए तए परिच्चत्तो ।  
 तुह नेहमोहियप्पा उववासी मरणमहिलसइ' ॥८४५८॥  
 बाला जंपइ 'किं मह जहाणुबंधो इमंमि, किमिमस्स ।  
 मह विसए वि तह च्चिय अणुराओ ताय! संभविही ?' ॥८४५९॥  
 तो कहइ जक्खराया नीसेसं पुव्ववइयरं तीए ।  
 जह दुग्गगहणपुव्वं विवाहकज्जं करिस्सामि ॥८४६०॥  
 जह एत्थ दोवि पत्ता अम्हे जह निज्जिओ य पडिवक्खो ।  
 जह तुहवइयरसवणेण मुच्छिओ विलविओ एसो ॥८४६१॥  
 इयमाइ वित्थरेणं कहियं जक्खेण रायधूयाए ।  
 तं सोऊण पहिद्धा पुलं(ल)यंगी चिंतइ कुमारी ॥८४६२॥  
 'धन्नं अहव अवन्नं अप्पं मन्नामि दोहिं हेऊहिं ।  
 कुमराणुकूलिमाए कुमरदुहुप्पायणेणं व ॥८४६३॥

तं नत्थि जं न लब्भइ भुयणदुलब्भं पि केण वि नएण ।  
 अणुकूलत्तमिमस्स ओ(उ) मन्ने देवाण वि दुलंभं ॥८४६४॥  
 सव्वेसिं पुत्राणं ताइं च्विय हुंति गरुयपुत्राइं ।  
 जेहिं हरिविक्कममणं ममंमि एक्कग्गयं नीयं ॥८४६५॥  
 लब्भइ सुकुलुप्पत्ती रूवं गुणपयरिसो विभूर्इओ ।  
 वल्लहजणाणुराओ अप्पंमि सुदुल्लहो होइ' ॥८४६६॥  
 इय जाव कुमरविसए सा चितइ भुयणसुंदरी विविहं ।  
 ताव पहाया रयणी अह पढियं मागहनरेहिं ॥८४६७॥  
 'नद्धा नरिंद ! रयणी मोहियभुयणा पसंतवावारा ।  
 मुच्छ व्व कालपरिणइ जणचेयन्ना पहाभिहाया(हया) ॥८४६८॥  
 मोत्तुं गिरिकंदरगुरुगुहासु लीणं नरिंद! तमपडलं ।  
 सूरपयावाभिहयं तुह रिउवंद्रं पिव पणइं ॥८४६९॥  
 तुह सूरस्स व अंतरियसयलतेयंसिमंडलस्सेह ।  
 उयए अरिरिक्खगणो विहडइ खज्जोयनिवहो व्व ॥८४७०॥  
 पढमुग्गमंतरेहामित्तं नवमित्तमंडलं सहइ ।  
 तव्वेलरविसमागयपुव्ववहूए नहपयं व्व ॥८४७१॥  
 अद्धुग्गयं विरायइ रविबिंबं देव! अरुणसच्छायं ।  
 कयजावयनवरायं संज्झवहूए व अहरदलं ॥८४७२॥  
 तुह देव! सूरबिंबं करकिरणसहस्सदीवपजलंतं ।  
 उत्तारइ संज्झवहू आरत्तियकणयथालं व' ॥८४७३॥  
 इय मंद-महुर-मंगलमागहजणविहियकलयलरवेण ।  
 सहस त्ति संपबुद्धो पल्लंकें मुयइ नरनाहो ॥८४७४॥

कयसयलगोसकिच्चो पढमागयवैरिसीहपणिवइओ ।  
 सामंतसयदुलंघे अत्थाणे तयणु उवविसइ ॥८४७५॥ .  
 दट्ठूण वैरसीहो रूवं सिरिवीरसेणधूयाए ।  
 हुयचित्तचमक्कारो सविम्हओ धुणइ नियसीसं ॥८४७६॥  
 चिंतइ 'न मच्चलोए पायं एवंविहाइं रूवाइं ।  
 सुरलोयपयावइणा मन्ने निम्माविया एसा' ॥८४७७॥  
 तो भणइ वैरसीहो 'तुह विक्कमकप्पसाहिणो देव ! ।  
 विफ्फु(प्फु)रियं जं देवी कप्पियमेत्तव्व आणीया' ॥८४७८॥  
 तो कहइ जक्खराओ नीसेसं कुमररयणीवुत्तंतं ।  
 देवीलाहवसाणं सेणावइपमुहलोयाण ॥८४७९॥  
 तो हरिसवसुग्गय-पुलयदेहाण सव्वलोयाण ।  
 आणंदमओ जाओ सो दियहो कुमरिलाहेण ॥८४८०॥  
 कारावियं च नयरे वद्धावणयं महापमोएण ।  
 दिन्नं च महादाणं पूयाउ जिणिंदचंदाण ॥८४८१॥  
 आणंदनिब्भरे तम्मि वासरे अइगयंमि विन्नत्तं ।  
 जक्खेण 'जामि अहयं पुरओ धूयं गहेऊण ॥८४८२॥  
 तुमए वि तत्थ तुरियं आगंतव्वं कुमार! जेणम्हे ।  
 धूयापाणिग्गहणं करेमि(म) सव्वाए रिद्धीए' ॥८४८३॥  
 एवं ति कुमरभणिए जक्खो सह वीरसेणधूयाए ।  
 पत्तो निययावासं आणंदियजक्खसंघाओ ॥८४८४॥  
 एत्थंतरे पविट्ठो पडिहारनिवेइओ पवणनामो ।  
 कयकुमरपयपणामो लेहं अप्पेइ कुमरस्स ॥८४८५॥

१. अत्र गाथात्रिके किञ्चित्पाठः त्रुटित इवाभाति ॥

ठविऊण सिरि(रे) हिद्धो वायइ हरिविक्रमो सयं लेहं ।  
 'सत्थि अउज्झपुरीओ रायाऽजियविक्रमो कुसली ॥८४८६॥  
 दुग्गामि अलंघउरे सेणावइवैरसीहपरियरियं ।  
 हरिविक्रमजुयरायं दिन्नासीसो समाइसइ ॥८४८७॥  
 एत्थेव मलयसेले धूया सिरिवीरसेणरायस्स ।  
 केणाऽवि उवाएणं परिणेयव्वा तए तुरियं ॥८४८८॥  
 तं परिणिऊण कन्नं दुग्गे मोत्तूण वैरसीहं च ।  
 तुमए सकलत्तेणं एत्थागमणं करेयव्वं' ॥८४८९॥  
 अणुकूलं लेहत्थं कुमरो परिभाविऊण साणंदो ।  
 विवाहगमणकज्जे उ देइ लोयाण आएसं ॥८४९०॥  
 संचलिओ नयराओ पसत्थदियहे अ(ऽ)णुकूलमण-सउणो ।  
 बहुसेन्नसंपरियुडो पत्तो मलयासमं कुमरो ॥८४९१॥  
 समविचडभूमिभाए आवासइ रुद्धवसुहवित्थारो ।  
 आणंदिओ सहरिसं कुलवइणा तावसेहिं च ॥८४९२॥  
 एवं च ताव एयं इओ य चंपाए वीरसेणसुओ ।  
 सिरिअमरसेणराया चंदसिरीगब्भसंभूओ ॥८४९३॥  
 सो निसि जणणिं हरियं नाउं संजायसोयसंतावो ।  
 चंदसिरिपेसिएणं आसासिओ मलयमेहेण ॥८४९४॥  
 संजायसत्थचित्तो नियभय(इ)णिं भुयणसुंदरिं दट्ठुं ।  
 अच्छइ उच्छुकुमणो चिंतंतो बहुविहोवाए ॥८४९५॥  
 अह अन्नदिणे नियजणणि-भइणिदंसणपवह्निउक्कंठो ।  
 संचलइ अमरसेणो नियसेणारुद्धमहिवीढो ॥८४९६॥

अणवरयपयाणेहिं पत्तो मलयासमं अमरसेणो ।  
 आवासिओ व्व(य) पेच्छइ नियजणणिं तह य नियभइणिं ॥८४९७॥  
 कयजणणिपयणामो पयडियपेम्मुल्लसंतमनु(त्रु)भरो ।  
 जक्खराएण भणिओ 'मा सोयं कुणसु नरत्ताह ! ॥८४९८॥  
 सोइज्जंति कहां ते जेहिं असामन्नपुन्नपब्भारा ।  
 देवा वि जाण मन्ने नरिंद! दासत्तणं जंति ॥८४९९॥  
 ता राय! पत्थुयं च्चिय चिंतसु भइणीविवाहसंबंधं ।  
 जइ तुह पडिहाइ मणे करेमि ता साहुसंजोयं ॥८५००॥  
 सिरिअज्जियविक्रमसुओ कुमरो हरिविक्रमो त्ति जयपयडो ।  
 तस्स तुह लहुयभइणी दिज्जउ तुम्हाण(णु)वत्तीए' ॥८५०१॥  
 तो भणइ अमरसेणो 'किमेत्थ किर ताय! पुच्छियव्वेण ? ।  
 जं तुम्ह मणे रोयइ तं मह नणु सम(म्म)यं चव' ॥८५०२॥  
 एत्थंतरंमि जक्खो पारंभइ परमहरिसर(रे?)सेण ।  
 सिरिभुयणसुंदरीए अणुवमवीवाहसामग्गि ॥८५०३॥  
 दोगाउयप्पमाणं भूमिं काऊण समतलं जक्खो ।  
 बंधइ रयणसिलाहिं कक्केयण-नीलमाईहिं ॥८५०४॥  
 तो मणिनिबद्धसुंदरपेढोवरि विरइओ महारम्मो ।  
 वीवाहमंडवो विविहरयण-मणि-दारुनिवहेहिं ॥८५०५॥  
 बहुकणयसिहररम्मो नाणामणि-रयणभित्तिचिंचइओ ।  
 गरुयत्तरुद्धवसुहो मेरु व्व सुराण कयतोसो ॥८५०६॥  
 चउदारंतनिवेसियमणितोरणबद्धधयवडसणाहो ।  
 देवंगवत्थविरइयवियाणसंछाइओ रम्मो ॥८५०७॥



झल्लंतचडुलचमरो थंभंतरबद्धमोत्तिओलो(उल्लोओ?) ।  
 उत्तुंगवेइयातलसिंहासणसोहिओ रम्मो ॥८५०८॥  
 पसरंतजक्खविलयाविलासपारद्धमंगलायारो ।  
 सुव्वंतवेणु-वीणाविमीसकलगीयझंकारो ॥८५०९॥  
 बहुतरमिलंतसुर-नरअंतोसंचाररुद्धवित्थारो ।  
 बहुकज्जवावडुज्जयहल्लुप्फलजक्खपरिवारो ॥८५१०॥  
 इय अमरसेणगुरुतरभवणदुवारंमि जक्खराएण ।  
 रमणीयत्तणसंजणियविग्गहओ मंडवो विहिओ ॥८५११॥  
 तो अमरसेण-हरिविक्कमाण कडएसु जायआणंदो ।  
 सविसेसुज्जलभूसणनेवत्थो होइ परिवारो ॥८५१२॥  
 एत्थंतरंमि जक्खो अवहिनाणेण मुणियसुहल्लगो ।  
 पुण भणइ अमरसेणं 'नरिंद! नियडीहुयं लग्गं' ॥८५१३॥  
 तो भणइ अमरसेणो 'तुरियं पेसह वरस्स पासंमि ।  
 कं पि पहाणं पुरिसं परिणयणावाहणनिमित्तं' ॥८५१४॥  
 तो बंधुयत्तपुत्तो जयदंतो नाम पेसिओ सो वि ।  
 गंतूणं भणइ पणओ 'कुमार! तुरियं पयट्टेह' ॥८५१५॥  
 एत्थंतरे कुमारो निव्वत्तियणहवणयाइवावारो ।  
 उज्जलनिवसियवत्थो हरियंदणकयसमालहणो ॥८५१६॥  
 सिरिमउड-कन्नकुंडल-वच्छत्थलहार-कंकणाईहिं ।  
 आहरणसमूहेहिं विहूसियंगो पयइरुइरो ॥८५१७॥  
 कयवुड्ढाजणबहुविहकोउयमंगल्लनियकुलायारो ।  
 गायंतविहिनारीगेयरवापूरियदियंतो ॥८५१८॥

वज्जंततूरंगंभीरसद्वपामुक्कपडिरवमिसेण ।  
 हरिसेण मलयसेलो जयजयरावं व वियरेइ ॥८५१९॥  
 नाणाविहचारणगण-बंदिसमुग्घुडुजयजयासद्वो ।  
 जयवारणमारूढो समागओ मंडवदुवारं ॥८५२०॥  
 तत्थ च्चिय कओवारणसहस्सनारीहिं वेढिओ कुमरो ।  
 कयकणयमुसलभिउडीताडणकम्मो विसइ अंतो ॥८५२१॥  
 आगच्छंतं दट्ठं अब्भुडुइ अमरसेणनरनाहो ।  
 दूरपसारियबाहू आलिंणइ सायरं कुमरं ॥८५२२॥  
 नियए च्चिय उववेसइ राया सीहासणे पणयसारं ।  
 पुच्छियकुसलोदंतो जयदन्तो भणिउमाढत्तो ॥८५२३॥  
 'हरिविक्कम ! एक्केण वि तुमए नणु भूसिया दुवे वंसा ।  
 नरमाणिकुसमेणं नियवंसो वीरवंसो य ॥८५२४॥  
 नियदंसणमेत्तेण वि पयासियाणंतगुणगणग्घविओ ।  
 कोत्थुहमणि व्व जाओ एण्हिं पुरिसोत्तिममणंमि ॥८५२५॥  
 अहवा थोवं एयं एण्हिं अमरेसरेण वोढव्वो ।  
 उज्जोइयभुयणयलो ससि व्व नियउत्तिमंगेण' ॥८५२६॥  
 इय भणिरे जयदन्ते असेसजोइसियजायसंवाओ ।  
 जक्खो भणइ सहरिसं 'आसन्नं देव! सुमुहुत्तं' ॥८५२७॥  
 नरवइणाऽणुन्नाओ पविसइ अब्भितरं हरिकुम(मा)रो ।  
 तरुणीहिं नयणकुवलयमालाहिं च्चियसरीरो ॥८५२८॥  
 अह कोउयघरदारे निवारियासेसपरियणपवेसो ।  
 कयसमुचियआयारो विसइ हरिसुद्धरोमंचो ॥८५२९॥

अह पियसहिपरिवारा अविहवनियसयण-जुयइजणजुत्ता ।  
 पेरंतपहरणुब्भडबहुसुहडसहस्सकयरक्खा ॥८५३०॥  
 अरुणपडनिविडविरइयअवगुंठीपिहियसव्वतणुसोहा ।  
 हरिविक्कुमस्स निब्भरअणुराएणं व संछन्ना ॥८५३१॥  
 सुपसत्थवराहरणा सुपसत्थनियच्छ-वत्थरुइरंगी ।  
 बहुविहपसत्थमंगलकोउयसयसमहियपहावा ॥८५३२॥  
 हिययनिहित्तकुमारा भूसणमणिकिरिणरंजियदियंता ।  
 अंतट्टियससिबिंबा कोमुइसंझ व्व रमणीया ॥८५३३॥  
 कह लज्जाविवसाए अनिमीलियलोयणं पलोयंतं ।  
 इय हिययवियप्पेहिं पागब्भं अब्भसंति व्व ॥८५३४॥  
 इय भुयणसुंदरी सा दिट्ठा कुमरेण हरिसविवसेण ।  
 अब्भहियदिन्नकंचणविहडावियमुहससिवडेण ॥८५३५॥  
 तो विहियविवाहोच्चि(चि)यवेसो जायंमि लग्गपत्थावे ।  
 गिण्हए(इ) व्हूए पाणिं कुमरो नियपाणिकमलेण ॥८५३६॥  
 पफा(प्फा)रपिहुलदीहरनयणाण फलाइं तेहिं दोहिं पि ।  
 पत्ताइं सुरुवन्नोन्नदंसणुप्पन्नतोसाण ॥८५३७॥  
 तो भुयणसुंदरीए हत्थं हत्थेण गिण्हउं कुमरो ।  
 चउरंतकयनिवेसं आरोहइ वेइयाभूमिं ॥८५३८॥  
 जा सलिलसेयउग्गयजवंकुरुच्छन्नगुरुसरावेहिं ।  
 झंपियपंचमुहेहिं कलसेहिं विहूसिओवंता ॥८५३९॥  
 अह सुहुयहुयासणकयपक्खिणं मंडलाइं य भमंति ।  
 तो अमरसेणराया कन्नादाणं पयच्छेइ ॥८५४०॥

मयमत्तमयगलाणं अट्टसहस्से हयाण दहलक्खे ।  
पन्नासं च सहस्से देइ नरिंदो रहवराण ॥८५४१॥  
तह कामरूयदेसं कसमीरं तह वरिंदुविसयं च ।  
देइ तहा रयणाणं दसद्धवन्नाण रासीओ ॥८५४२॥  
आहरणाणं थूहा पुंजा देवंगवत्थनिवहाण ।  
कणयगुरुक्कुरुडा वि य भइणीए अमरसेणो वि ॥८५४३॥  
तयणंतरं च हरिविक्कुमस्स तप्परियणस्स य करेइ ।  
नियचित्त-वित्तसरिसं उचियविहिं वीरसेणसुओ ॥८५४४॥  
एवं कयकायव्वो निव्वत्तियसयलउच्छवायारो ।  
मन्नइ सकयत्थं चिय अप्पाणं भइणिदाणेण ॥८५४५॥  
इय विहियदसाहियण्हाण-दाण-सम्माण-भोयणायारा ।  
जा चिद्धंति पहिद्धा विणोयसयसुत्थिया तत्थ ॥८५४६॥  
ता सहस च्चिय गयणे उच्छलिओ गहिरदुंदुहीसद्धो ।  
तं सोउं उत्ताणियवयणा उद्धं पलोयंति ॥८५४७॥  
अह खणमेत्तेणं चिय गयणं बहुदेव-दाणवगणेहिं ।  
संछन्नमसेसं चिय जयजयसद्धं भणंतेहिं ॥८५४८॥  
सुव्वइ सवणिंदियसुंदरत्तअवहरियकडयजणमणसो ।  
बहुकिन्नरगणविहिओ गयणे वरगेयज्झ(झं)[का]रो ॥८५४९॥  
सब्भूयगुण(णु)क्कित्तणविहावणुप्पन्नहरिसरोमंचो ।  
सुव्वंति संथुणंता परमत्थथुईहिं सुरनिवहा ॥८५५०॥  
इय कोऊहलतरलियमणनयणा दिद्धदेवसंघाया ।  
'किं किं' ति कयवियप्पा नरवइणो जाव अच्छंति ॥८५५१॥

ता सहसच्चिय दिट्ठो पहिड्ठमुणिनिवहसिरनमिज्जंतो ।  
 एक्कग्गखित्तलोयण-मण-सुरगणज्ञायमाणो य ॥८५५२॥  
 सिरधरियधवलछत्तो सुरचालियउभयपाससियचमरो ।  
 सुर-असुरसमुग्घोसियजयजयरवबहिरियदियंतो ॥८५५३॥  
 समुहट्ठियसुरगणपारियायपमुक्कुकुसुमवरवुट्ठी ।  
 संपविभज्जइ सेस त्ति जस्स सीसेसु देवेहिं ॥८५५४॥  
 दीसंति जस्स उज्जलचरणनहालीओ सुरसिरग्गोसु ।  
 वुज्झंति दुव्वहा इव जस्स गुणा सुरवरसिरेहिं ॥८५५५॥  
 सव्वत्तो सुर-किन्नरपणामसिरबद्धअंजलीबंधो ।  
 भयसेवागयकैरवसंडो इव सहइ दिवसयो ॥८५५६॥  
 पुच्छंतसुरवरेसुं सरलवलंतद्धतारयं दिट्ठिं ।  
 करुणाय(इ) पेसिऊणं भिंदंतो ताण संदेहं ॥८५५७॥  
 परिहरियउच्चगमणो नियडत्तणविहियनिच्छयमणेहिं ।  
 जोइज्जंतो सेणालोएहिं संभंतमच्छीहिं ॥८५५८॥  
 बहुसुरवरपरियरिओ नाणामणि-रयणमणिविमाणोहो ।  
 सग्गो व्व ओयरंतो अधन्नजणदुल्लहो पत्तो ॥८५५९॥  
 सिरिवीरसेणसूरी अणंतगुणमुणिवरिंदपरियरिओ ।  
 ओयरिओ गयणाओ विसुद्धवसुहातले वीरो ॥८५६०॥  
 देवेहिं तओ तुरियं समतलवसुहायलं करेऊण ।  
 गंधुदण्णं च तओ सिंचंति करंति कुसुमोहं ॥८५६१॥  
 उत्तत्तकंचणमयं कमलं विरयंति परमभत्तीए ।  
 लंबंतथूलमोत्तियमहायवत्तं च धारंति ॥८५६२॥

दोपासेसु समुज्जलससहरकरपंडुरं च चमरजुयं ।  
 घेत्तूण ठंति देवा परमेसरवीरसेणस्स ॥८५६३॥  
 तो काऊण पणांमं तित्थस्स अणंतगुणसमिद्धस्स ।  
 उवविसइ कमलगब्भे रायरिसी सुरनमिज्जंतो ॥८५६४॥  
 सिरिसूर-विचित्तजसा-असोय-सेहरय-बंधुयत्ता य ।  
 इयमाइमुणिवरिंदा उवविद्धा वीरपासंमि ॥८५६५॥  
 इय विहियसुरविभूइं जणयं दट्ठूण अमरसेणो वि ।  
 भइणीपइणो साहइ 'हरिविक्कम ! एस मह ताओ ॥८५६६॥  
 एसो पियामहो मे एसो मायामहो य मह होइ ।  
 एसो य बंधुयत्तो एए उण सेहरासोया ॥८५६७॥  
 उप्पन्नं एएसिं पायं जाणामि केवलं नाणं ।  
 छउमत्थाणं न जम्हा देवा एवं ववहरंति' ॥८५६८॥  
 हरिविक्कमेण भणियं 'नरिंद ! धन्ना म्हि जेण गुणपयडो ।  
 दिद्धो मए महप्पा महामुणी वीरवरनाहो ॥८५६९॥  
 ते धन्ना जाण मणे वि होंति एवंविहा महामुणिणो ।  
 संपडइ जाण किर दंसणं पि किं ताण इह भणिमो ॥८५७०॥  
 इय भणिउं संभंता हरिसवसुल्लसियबहलरोमंचा ।  
 काउं पुरओ देवि चंदसिरिं चारुचारित्तं ॥८५७१॥  
 सिरिअमरसेणाराया कुमरो हरिविक्कमो य वच्चंति ।  
 चरणपयारेणं चिय दूरीकयरायफरडमरी ॥८५७२॥  
 गंतूण तत्थ पुरओ सुद्धज्झवसायझडियकम्मंसा ।  
 कयकेवलिपयपूया नीसहभूखित्तपंचंगा ॥८५७३॥

पणमंति वीरसेणं सूरनरिंदाइणो य मुणिचंदे ।  
 नमिऊण विसुद्धाए धराए हिद्धा ओ(उ)वविसंति ॥८५७४॥  
 एत्थंतरंमि जक्खो बहुजक्खणि-जक्खपरियणसमेओ ।  
 सविसेसुज्जलनेवत्थभुवणसुंदरीए समं आओ ॥८५७५॥  
 काऊण भत्तिसारं केवलिमहिमं च वीरकेवलिणो ।  
 कयभत्तिपयपणामो उवविट्ठो सुद्धवसुहाए ॥८५७६॥  
 अह भुयणसुंदरी वि य पिउब्भ(भ)त्तिभरुल्लसंतरोमंचा ।  
 रूवालोयणविम्हियसुर-असुरगणेहिं दीसंती ॥८५७७॥  
 काऊण पिउ-पियामह-मायामहबहुविभूइपयपूयं ।  
 पणमइ वसुहायललुलियकेसपासा य संथुणइ ॥८५७८॥  
 'जय सयलतिलोयएक्कल्लवीर! पणमामि तुम्ह पयकमलं ।  
 वीर त्ति नियं नामं जेण जहत्थत्तयं नीयं ॥८५७९॥  
 मन्नामि कयत्थं चिय अप्पाणं तुम्ह दंसणे नाह! ।  
 एण्हिं तदुत्तरोत्तरगुणा वि मह संभविस्संति ॥८५८०॥  
 संछाइयजियलोओ घणो व्व अंतरियगुरुबहुपयासो ।  
 सो देव! तए मोहो पयंडपवणेण व निसिद्धो ॥८५८१॥  
 हरि-हर-विरिंचिणो वि हु जेहिं समत्थेहिं विनडिया नाह! ।  
 ते राग-दोसमल्ला सुदुज्जया निज्जिया तुमए ॥८५८२॥  
 देव ! कसाया विरसा कूरज्जवसायरक्खसावासा ।  
 अक्खतरुणो व्व तुमए निच्छिन्ना परसुरुवेण ॥८५८३॥  
 अइविसमजोव्वणवणे अवायबहुलंमि इंदियकुरंगा ।  
 संतोसवागुराए तुमए चिय नाह! संजमिया ॥८५८४॥

पंचिंदियपंचमुहो विविहज्जवसायकेसरकरालो ।  
 मणसीहो सरहेण व तुमए निद्वारिओ दुड्ढो ॥८५८५॥  
 इच्छदिद्वचावकरो पंचुब्भडविसयविसमसरपसरो ।  
 मयणमओ इव मयणो तुममि जलणो व्व पविलीणो ॥८५८६॥  
 किं बहुणा ? संसारे जे किर संसारकारणं दोसा ।  
 ते जुगवं चिय तुमए निउणेण मुणिंद! निद्वविया ॥८५८७॥  
 गरुएहिं वल्लहेहिं तुमए आरोविएहिं अइदूरं ।  
 तव्विवरीया दोसा गुणेहिं निहया तुह मुणिंद! ॥८५८८॥  
 इय हिययब्भंतरपसरंतमाण-बहुमाण-भत्तिराएण ।  
 सब्भूयगुणुक्कित्तणथुईहिं थुणिओ महावीरो ॥८५८९॥  
 तो सा जहत्थमुणिगुणसवणसमुल्लसियहरिसवडलेहिं ।  
 अहिणंदिया सुरेहिं पलोइया वियसियच्छे(च्छी)हिं ॥८५९०॥  
 तयणु पियामह-मायामहाइसव्वाण मुणिवरिंदाण ।  
 पणमइ उवविसइ तओ चंदसिरीसन्निहाणंमि ॥८५९१॥  
 एत्थंतरंमि वीरो करड्डियामलयसन्निहं सयलं ।  
 तैलोयं पेच्छंतो अह एयं भणिउमाढत्तो ॥८५९२॥  
 'जीवो अणाइनिहणो अणाइभववासदिद्वबहुदुक्खो ।  
 तह वि न इमस्स जायइ निव्वेओ दुक्खहेऊसु ॥८५९३॥  
 जीवस्स दुक्खहेऊ कम्मं कम्मस्स हेउणो एए ।  
 मिच्छत्तमविरई तह पमाय-जोगा कसाया य ॥८५९४॥  
 जह य सधूमे गेहे संकमइ कमेण कलुससब्भावं ।  
 धुंयसपडलं जीवे मिच्छत्ताईहिं तह कम्मं ॥८५९५॥



तेल्लभं(ब्भं)गियदेहे संचरइ नरमि जह य मलपडलं ।  
 मिच्छताइनिरुद्धे जीवंमि तहेव घणकम्मं ॥८५९६॥  
 मिच्छतमसग्गाहो अवत्थुवत्थुत्तकप्पणारूवो ।  
 जेण अदेवं देवं मन्नइ धम्मं पि हु अधम्मं ॥८५९७॥  
 मिच्छतमोहमूढो जीवो असमंजसाइं आयरइ ।  
 अज्जिणइ जेहिं कम्मं चउगइभवकारणं घोरं ॥८५९८॥  
 जो होइ अविरयप्पा विरइं न करेइ कम्मि वि पयत्थे ।  
 सो अविरईए जणियं बंधइ कम्मं दुहनिमित्तं ॥८५९९॥  
 इह पंचहा पमाओ बंधइ कम्मं सुचिक्कणं सो वि ।  
 मज्जं विसय-कसाया निदा विगहा य इय भणिओ ॥८६००॥  
 कोहो माणो माया लोभो चत्तारि हुंति य कसाया ।  
 अज्जिणइ जेहिं कम्मं कसायकलुसीकओ जीवो ॥८६०१॥  
 जोगो य होइ तिविहो मण-वइ-कायाण दुडुरुवाण ।  
 जो वावारो सो वि हु बंधइ घणचिक्कणं कम्मं ॥८६०२॥  
 इय मिच्छत्तप्पमुहं कहियं कम्माण कारणं दुट्टं ।  
 तेहिं निवत्तियं जं तं कम्मं अड्डहा होइ ॥८६०३॥  
 नाणावरणं पढमं बीयं पुण दंसणस्स आवरणं ।  
 तइयं च वेयणीयं होइ चउत्थं च मोहणीयं ॥८६०४॥  
 पंचममाउयकम्मं छट्टं नामं च सत्तमं गौत्तं ।  
 सव्वन्नुणोवइट्टं तहऽड्डमं अंतराइं(यं) च ॥८६०५॥  
 एयाणं कम्माणं जिणेहिं दुविहा ट्ठि(ठि)ई समक्खाया ।  
 उक्कोसिया जहन्ना तहविहपरिणामभेण ॥८६०६॥

आइल्लाणं तिण्हं चरिमस्स य तीस कोडकोडीओ ।  
 अयराण मोहणिज्जस्स सत्तरिं(री) होंति विन्नेया ॥८६०७॥  
 नामस्स य गोत्तस्स य वीसं उक्कोसिया द्वि(ठि)ई भणिया ।  
 तेत्तीससागराइं परमा आउस्स बोधव्वा ॥८६०८॥  
 वेयणियस्स जहन्ना बारस नामस्स अट्ट ओ(उ) मुहुत्ता ।  
 सेसाण जहन्नद्वि(ठि)ई भिन्नमुहुत्तं विणिदि(दि)ट्ठा ॥८६०९॥  
 पढमं नाणावरणं पंचवियप्पं जिणेहिं पन्नत्तं ।  
 मइ सुअ-ओही-मण-केवलाण आवरणभेएण ॥८६१०॥  
 दंसणवरणं बीयं नवभेयं तत्थ निद्वपणगं च ।  
 चउदंसणआवरणं नवभेयं जिणवरुद्धिं ॥८६११॥  
 तइयं च वेयणीयं सायमसायं दुहा विणिद्धिं ।  
 अट्ठावीसइभेयं मोहणियं पुण चउत्थं [च] ॥८६१२॥  
 नारय-तिरिय-नरामरभेएणं आउयं चउप्पयारं ।  
 बाएतालविभेयं नामं गोत्तं च दो(दु)विभेयं ॥८६१३॥  
 पंचविहमंतरायं कम्मं संखेवओ समक्खायं ।  
 भेओवभेयभिन्नं कम्मपगडिंमि दट्ठव्वं ॥८६१४॥  
 एयं अट्टपयारं कम्मं जीवस्स पयइसुहियस्स ।  
 जणइ दुहाइं नरामर-नारयतिरिओवओगाइं ॥८६१५॥  
 कम्मं दुक्खसरूवं दुक्खाणुहवं च दुक्खहेउं च ।  
 कम्मायत्तो जीवो न सोक्खलेसं च पाउणइ ॥८६१६॥  
 जह आरोग्गो देहो वाहीहिं अहिद्विओ दुहं लहइ ।  
 तह कम्मवाहिघत्थो जीवो वि भवे दुहं लहइ ॥८६१७॥

जायंति अपत्थाओ वाहीउ जहा अपत्थनिरयस्स ।  
 संभवइ कम्मवुद्धी तह पावापत्थनिरयस्स ॥८६१८॥  
 अङ्गरुओ कम्मरिऊ कयावयारो य नियसरीरत्थो ।  
 एस उवेक्खिज्जंतो वाहिव्व विणासए अप्पं ॥८६१९॥  
 मा कुणह गयनिमीलं कम्मविघायंमि किं न उज्जमह ? ।  
 लद्ध्ण मणुयजम्मं मा हारह अलियमोहहया ॥८६२०॥  
 अच्छंतविज्जासियमइणो परमत्थदुक्खरूवेसु ।  
 संसारसुहलवेसुं मा कुणह खणं पि पडिबंधं ॥८६२१॥  
 किं सुमिणदिट्ठपरमत्थसुन्नवत्थुसु करेह पडिबंधं ? ।  
 सव्वं पि खणियमेयं विहडिस्सइ पेच्छमाणाण ॥८६२२॥  
 संतंमि जिणुद्धिद्वे कम्मक्खयकारणे उवायंमि ।  
 अप्पायत्तंमि न किं तद्धिद्वभया समुज्जमह ? ॥८६२३॥  
 जह रोगी को वि नरो अइदूसहरोगवेयणादुहिओ ।  
 तहुहनिव्विन्नमणो रोगहरं वेज्जमन्निसइ ॥८६२४॥  
 तो पडिवज्जइ किरियं सुवेज्जभणियं च वज्जइ अपत्थं ।  
 तुच्छन्नपत्थभोई ईसीसुपसंतवाहिदुहो ॥८६२५॥  
 ववगयरोगातंको संपत्तारोग(ग्ग)सोग्ग(क्ख)संतुट्ठो ।  
 बहु मन्नइ सुवेज्जं अहिणंदइ वेज्जकिरियं च ॥८६२६॥  
 तह कम्मवाहिगहिओ जम्मणमरणाइं(इ) दिट्ठतदुक्खो ।  
 ततो निव्विन्नमणो परमगुरुं तयणु अन्निसइ ॥८६२७॥  
 लद्धंमि गुरुंमि तओ तव्वयणविसेसकयअणुट्ठाणो ।  
 पडिवज्जइ पव(व्व)ज्जं पमायपरिवज्जणाविसुद्धं ॥८६२८॥

नाणाविहतवनिरओ सुविसुद्धासारभिक्खभोई य ।  
सव्वत्थ अपडिबद्धो सयणाइयमुक्कवामोहो ॥८६२९॥  
एमाइ गुरुवइडुं अणुडुमाणो विसुद्धमुणिकिरियं ।  
मुच्चइ नीसंदिद्धं चिरसंचियकम्मवाहीहिं ॥८६३०॥  
पलहूहुयकम्मंसो नियत्तमाणिट्टविरहमाइदुहो ।  
लद्धुं चरणारोग्गं परिवट्ठियसुद्धपरिणामो ॥८६३१॥  
तल्लाभनिव्वुईए कम्मदयवसेण संपडंतेसु ।  
न खुहइ परीसहेसुं तत्तविऊ नोवसग्गोसु ॥८६३२॥  
एवं च कुसलसिद्धी थिरासइत्तेण धम्मउवओगो ।  
पावइ तेउल्लेसं अणुहवओ मन्नइ गुरुं पि ॥८६३३॥  
ता भो! भणामि सव्वे! दुलहो खलु होइ सुगुरुसंजोगो ।  
जम्हा न गुरुहिं विणा कम्मवाहीओ खिज्जंति' ॥८६३४॥  
तो भणइ बंधुयत्तो 'सोयारजणोवयारबुद्धीए ।  
अवितहमाइडुमिणं भयवं! संतोवयारपरं ॥८६३५॥  
गुरुलाहविरहियाणं धम्मारंभा सुदुल्लहा होंति ।  
तयणो(णु)ट्टाणेण विणा न कम्मवाहीओ नासंति ॥८६३६॥  
परमारोग्गं पि न ताव होइ जा संति कम्मवाहीओ ।  
तम्हा कल्लाणपरंपराए हेऊ गुरु हूँति ॥८६३७॥  
किं तु मह कहह भयवं ! गुरुवयणाराहओ असढचित्तो ।  
जो पालइ पव्वज्जं सुविसुद्धं किं फलं तस्स ?' ॥८६३८॥  
पुण भणइ केवली 'बंधुयत्त ! साहेमि सुणसु एगमणो ।  
निम्मलपव्वज्जापालणफलं जं जिणुद्धिं ॥८६३९॥

एवं सो पव्वइओ सुविसुद्धन्ना(ना)णघरणसंजुत्तो ।  
 अइयारभउब्भंतो विसुद्धपव्वज्जगुणजुत्तो ॥८६४०॥  
 अज्जिणइ कम्मं न य सो संसारावत्तकारणं तत्तो ।  
 जम्म-जरा-मरणाणं कुणइ खयं जीवविरिएण ॥८६४१॥  
 दड्ढमि जहा बीए परोहइ अंकुरो पुण न जम्हा ।  
 तह कम्मबीयदाहे न जम्म-मरणंकुरा हुंति ॥८६४२॥  
 तो खीणासुहबंधो जीवो पाउणइ नियसरूवं पि ।  
 किरियारहिओ सुद्धो निययसहावड्ढिओ होइ ॥८६४३॥  
 तो सो अणंतवरणाणदंसणो तह अणंतविरिओ य ।  
 एसो च्विय पुव्वोत्तो निययसहावो इमस्स भवे ॥८६४४॥  
 तो सद्द-रूव-रस-गंध-फासहीणो अणंतगुणनिलओ ।  
 पयईए उड्ढगामी पावइ अइरेण सिद्धिगइ' ॥८६४५॥  
 इय एवं परिकहिए केवलिणा परमधम्मसब्भावे ।  
 आणंदजायपुलया चंदसिरी भणिउमाढत्ता ॥८६४६॥  
 'जइ अत्थि मज्झ भयवं! पव्वज्जाजोग्गया तया देह ।  
 पुव्व(व्वु)त्तं पव्वज्जं संपडियं मह जओ सव्वं' ॥८६४७॥  
 तो केवलिणा भणियं 'इहरा वि विसुद्धचरणनिरयाए ।  
 तुह चेव धम्मसीले! पव्वज्जाजोग्गया अत्थि' ॥८६४८॥  
 एत्थंतरंमि सव्वे कुलवइपमुहा सबाल-वुड्ढा य ।  
 सकलत्ता सावच्चा सपरियणा तावसा बहवे ॥८६४९॥  
 बहुकंद-मूल-फल-पुफ(प्फ)-पत्तहत्था विणीयवेसधरा ।  
 वियडजडाजूडवहा कयभूइविलेवणसरीरा ॥८६५०॥

मोत्तूण पायमूले 'सत्थि' भणिरूण कंद-फलमाई ।  
 संभासिया य गुरुणा उचियद्वाणेसु उवविद्धा ॥८६५१॥  
 तो भणइ वीरसेणो 'भो ! भो ! निरवज्जचरणनिरयाण ।  
 कप्पंति न साहूणं सावज्जफलाइं एयाइं ॥८६५२॥  
 जे च्चेय धम्महेऊ तुम्हाणं आगमंमि परिकहिया ।  
 ते च्चेय जिणिंदसमए पावनिमित्तं समुवइद्धा' ॥८६५३॥  
 तो कुलवइणा भणियं 'कहमेयं अम्ह धम्महेऊ जे ।  
 ते जिणधम्मे भणिया पावनिमित्तं ? मह कह(हे)ह' ॥८६५४॥  
 तो केवलिणा भणियं 'सम्मं निसुणेह तुम्ह साहेमि ।  
 सम्मन्नाणसमेयं साहइ धम्मं अणुद्वाणं ॥८६५५॥  
 जं पुण नाणविहीणं तमरन्नभमंतअंधनरसरिसं ।  
 पेरंताणत्थफलं अफलकिलेसावहं नवरं ॥८६५६॥  
 नज्जइ नाणबलेणं जीवाजीवाइत्तपरमत्थं ।  
 जं जीवरक्खणपरं तमणुद्वाणं फलं देइ ॥८६५७॥  
 छव्विहजीवनिकाया जाव न नाया जिणागमबलेण ।  
 ता कह ताणं रक्खं जीवाणं कुणइ अन्नाणी ? ॥८६५८॥  
 एसा पुढ्वी जीवो तं तुब्भे खणह सोयबुद्धीए ।  
 कह एग्गिदियजीवे होइ वहंतस्स किर धम्मो ? ॥८६५९॥  
 सलिलं च होइ जीवो तेण तिकालं च कुणह ण्हाणं पि ।  
 संझाअग्घुक्खिवणं सुरच्चणं धम्मबुद्धीए ॥८६६०॥  
 अग्गी वि होइ जीवो तत्थ तिसंझासु हुणह सचि(च्चि)त्ते ।  
 तिल-जव-वीहियमाई परमत्थविवेयपरिहीणा ॥८६६१॥

वाऊ वि होइ जीवो संघट्टह तं पि धम्मबुद्धीए ।  
 काऊण वीणएणं पवणं संधुक्कह हुयासं ॥८६६२॥  
 एए वि वणप्फइणो जीवा तरु-कंद-मूल-फलमाई ।  
 भक्खह अकयवियप्पा तुब्भे वि निरीहबुद्धीए ॥८६६३॥  
 वहह जडापब्भारं बहुलिक्खा-जूयलक्खआवासं ।  
 ताणुच्छेयणहेऊ चिंतह नाणाविहोवाए ॥८६६४॥  
 एएण कारणेणं भणियं जं तुम्ह किर अणुट्ठाणं ।  
 धम्मनिमित्तं तं चिय जिणागमे पावसंजणणं' ॥८६६५॥  
 तो केवलिणो वयणं सव्वे सोउं भणंति एवमिणं ।  
 अन्नाणचिद्धियं खलु सव्वमिणं अम्ह अ(ऽ)णुट्ठाणं ॥८६६६॥  
 अंधाणुमगगलग्गो अंधो जह भमइ उप्पहपयट्ठो ।  
 तह मुणिवरिंद ! अम्हे अन्नाणगुरुवएसेण ॥८६६७॥  
 जह पुव्वदेसगामी जाइ दिसामोहपुरिसवयणेण ।  
 दक्खिणदिसंमि जंतो न पावए इच्छियं द्वा(ठा)णं ॥८६६८॥  
 अज्ज वि न किं पि नट्टं उद्धरह भवन्नवंमि निवडंतं ।  
 अन्नाणमोहिए मुणिवरिंद! नियधम्मदाणेण' ॥८६६९॥  
 तो भणइ वीरसेणो 'अन्नाणहया पयट्टकुग्गाहा ।  
 मन्नंति अधम्मं पि हु मूढमई धम्मबुद्धीए ॥८६७०॥  
 जह केइ धाउवाई अत्थनिमित्तं मुहा किलिस्संति ।  
 निप्फलकिरियानिरया साहंति न किं पि परमत्थं ॥८६७१॥  
 तह धम्मगाहगा वि य साहंति न किं पि एत्थ परमत्थं ।  
 अफलकिरियाणुलग्गा एमेव मुहा किलिस्संति ॥८६७२॥

अन्नं वाहिसरूवं अन्नं चिय ओसहं निजुज्जंति ।  
 न कुणइ वाहिछेयं तह य कुधम्महि कम्मखयं ॥८६७३॥  
 ता तुम्ह अणुग्गहट्टं परमोवायं च मोक्खसोक्खस्स ।  
 साहेमि परमधम्मं असेसकम्मक्खयसमत्थं ॥८६७४॥  
 तो कहइ समणधम्मं खंताईयं सवित्थरं वीरो ।  
 तं सोऊणं सब्बे संविग्गा तावसा जाया ॥८६७५॥  
 तो चंदसिरीसहिया कुलवइपमुहा विसुद्धपरिणामा ।  
 सकलत्ता सावच्चा सब्बे दिक्खं पव्व(व)ज्जंति ॥८६७६॥  
 अन्ने वि तत्थ बहवे हरिविक्कम-अमरसेणकडयंमि ।  
 पडिबुद्धा मुणिपासे पव्वज्जं अह पव्व(व)ज्जंति ॥८६७७॥  
 अउरुव्वदिक्खियाणं तावसमाईण पालणनिमित्तं ।  
 आयरियपए ठावइ बंधुयत्तं महावीरो ॥८६७८॥  
 तो अमरसेण-हरिविक्कमेहिं नमिऊण पत्थिओ भयवं ।  
 'नियदंसणेण पुणरवि अम्ह पसायं करेज्जासु' ॥८६७९॥  
 इय भणिओ च्चिय भयवं देवासुर-खयर-किन्नरसमेओ ।  
 उप्पइओ गयणेणं न याणिओ कत्थइ गओ त्ति ॥८६८०॥  
 आपुच्छिऊण जक्खं अत्थपयाणेण पूरिया दो वि ।  
 रायाणो अणुन्नाया ससेन्नसहिया य संचलिया ॥८६८१॥  
 तो भुयणसुंदरि च्चिय(री वि य) चिरपरिचियसहियणं च पुच्छेइ ।  
 संभासइ जक्खजणं पुणो पुणो सहियणं भणइ ॥८६८२॥  
 'मा वीसरह सहीओ! दूरीहूयाओ संपयं मज्झ ।  
 घणनेहनिब्भरमणा पुणो पुणो भरइ अच्छीणि ॥८६८३॥



चंदप्पहं च पणमइ धरणिनिहित्तमंग-कर-जाणू ।  
 वाविं च खणं पेच्छइ उज्जाणवणं पलोएइ ॥८६८४॥  
 सुन्नं च तावसासममवलोयइ बाहभरियंनयणजुया ।  
 चंदसिरिसुन्नउडवं दट्ठुं धाहं च मेल्लेइ ॥८६८५॥  
 अहं नमइ जक्खरायं चरणनिहित्तमंग-करजुयला ।  
 सिंचंती नयणविणिग्गएहिं बाहंबुबिंदूहिं ॥८६८६॥  
 तो भणइ जक्खराओ 'मा खेयं कुणसु पुत्त! चित्तंमि ।  
 दिन्ना सि वरे जोगे(ग्गे) असोयणीया जहा होसि ॥८६८७॥  
 पुणरवि तुह अणवरयं पडिजागरणं अहं करिस्सामि ।  
 तुमए चिंतियमेत्तो अहयं नणु आगमिस्सामि ॥८६८८॥  
 एयं जक्खाण सयं तुज्झ सयासंमि पुत्त! अच्छेही ।  
 जं किं पि तुज्झ कज्जं संपाडिस्सति तं एए' ॥८६८९॥  
 इय एवं भणिया वि हु महया कट्ठेण जक्खपडिभणिया ।  
 आरूढा जंपाणं चलिया बहुपरियणसमेया ॥८६९०॥  
 बहुविहगामागरपुरनिरंतरं जणसहस्ससंकिन्नं ।  
 सोरज्जरंजियजणं वचं(च्चं)ति महीं(हिं) पलोयंता ॥८६९१॥  
 अणवरयपयाणयसयविलंधियासेसदेस-पुर-विसया ।  
 पत्ता नासिक्कपुरं हरिविक्कम-अमरसेणा ते ॥८६९२॥  
 सिरिअमरसेणरायस्स तह य सिरिभुयणसुंदरीए वि ।  
 माउलओ चंदजसो जत्थऽच्छइ चंदसिरिभाया ॥८६९३॥  
 तत्थ अणुभुंजिऊणं पडिवत्तिं रायचंदजसविहियं ।  
 कइवयदिणेहिं य तओ अओज्झनयरीए संपत्ता ॥८६९४॥

पुरओ पेसियपुरिसेण साहिए अमरसेण—कुमराण ।  
 आगमणे नरनाहो महोच्छवं कुणइ नयरीए ॥८६९५॥  
 सोहिज्जंति पुरीए रायपहा तिय-चउक्क-रत्थाओ ।  
 लिंपिज्जंति जणेहिं कुंकुमपंकोवलेवेण ॥८६९६॥  
 रूढंतमहुरघडपंकेरुहविहियपुफ(प्फ)घणपयरा ।  
 गायंति बहुमुहेहिं व रायपहा कुमरआगमणे ॥८६९७॥  
 घरघरनिबद्धतोरणपहल्लिरुव्वेल्लपल्लुवाइत्रं ।  
 पल्लवियं पिव दीसइ गयणयलं उच्छवरसेण ॥८६९८॥  
 मारुयधुव्वंतधयासहस्ससिहरग्गभवणरमणीया ।  
 कुमरागमणपहिद्धा चेलुक्खेवं व कुणइ पुरी ॥८६९९॥  
 उज्जलनेवत्थधरो नाणाभूसणविभूसियसरीरो ।  
 जायसुपव्वाणंदो संजाओ पौरपरिवारो ॥८७००॥  
 कारावियपुरिसोहो रायाऽजियविक्रमो पुरजणो य ।  
 नियरिद्धिसमुदएणं नीहरइ नरिंदपच्चोणिं ॥८७०१॥  
 नियबलभरेण राया भरंतधरणीयलेण संजुत्तो ।  
 पत्तो रायसमीवं कयसमुचियसव्वपडिवत्ती ॥८७०२॥  
 पावेसइ नयरीए बहुविहपेच्छणयसयसमिद्धाए ।  
 सिरिअमरसेणरायं वहू-वरं अजियनरनाहो ॥८७०३॥  
 तो भुयणसुंदरीरूवदंसणुप्पन्नमणचमक्कारो ।  
 लोओ तक्कीलियलोयणेण व्व नऽन्नं पलोएइ ॥८७०४॥  
 अन्नोन्नं च पयंपइ 'तस्स नमो इह तिलोयगरु[य]स्स ।  
 विहिणो जेणेसा किर विणिम्मिया लडहरूववई ॥८७०५॥

१. सुपर्वाणो देवाः, पक्षे उत्सवः खंता.टि. ॥

एयाए जम्मेणं पंच कयत्थाइं एत्थ जायाइं ।  
 संसार-पयावइ-पेच्छयच्छि-पिउ-ससुरगोत्ताइं ॥८७०६॥  
 सुरलालियाए अहवा सुरसंसग्गोवजायबुद्धीए ।  
 उचियमिमं एयाए रूवं लावन्न-सोहगं ॥८७०७॥  
 जक्खंगणापसाहणसमहियसंपत्तरूवसोहाए ।  
 निययंगभूसणाइं वि एयाए विहूसियाइं व ॥८७०८॥  
 उभयंसपासपरिसंठियाहिं सुरसुंदरीहिं जा नियरा(?) ।  
 करकणिरकंकणेहिं विंजिज्जइ सेयचमरेहिं ॥८७०९॥  
 पेच्छह जक्खविओवि(उव्वि)यमहंतमणि-रयणवरविमाणत्था ।  
 गयणयत्ते वच्चंती कस्स न मणविम्हयं जणइ ? ॥८७१०॥  
 जा मणिविमाणभित्तिसु संकंतं पेच्छऊण नियरूवं ।  
 उप्पन्नचमक्कारा पुण पुण अवलोयइ सयण्हा ॥८७११॥  
 उत्तारंति नियच्छह जणचक्खुनिवायजायसंकाओ ।  
 सुरसुंदरीओ लोणं पुणरुत्तं हरिणनयणाए ॥८७१२॥  
 एयं च किन्नरिगणं वरवीणावेणुकलियकरकमलं ।  
 अहिणंदइ परितुद्धा अच्चब्भुयवायपूरेण ॥८७१३॥  
 एसो इमीए भाया पुत्तो सिरिवीरसेणरायस्स ।  
 नामेण अमरसेणो अमरो इव रूवसोहाए ॥८७१४॥  
 किं जंपिएण बहुणा ? जित्तं हरिविक्रमेण तेलोक्कं ।  
 सिरिभुयणसुंदरीए पिययमसद्वं वहंतेण' ॥८७१५॥  
 इयएवमाइबहुजणआलावुल्लसियकलयलं राया ।  
 निसुणंतो मणपहरिसपुलयंगो विसयि(इ) रायउलं ॥८७१६॥

कयसमुच्चि(चि)यकायव्वो महरिहसीहासणंमि उवविसइ ।  
 नियसरिसवरासणसंठिएण सह अमरसेणेण ॥८७१७॥  
 तो अमरसेणराया उववेसइ अप्पसन्निहं कुमरं ।  
 तो अजियविक्रमेणं भणिओ एवं अमरसेणो ॥८७१८॥  
 'एत्थागमणे तुह अमरसेण ! तह मज्झ वड्ढिओ हरिसो ।  
 जह लोए सुविभत्तो वि तह वि अंगे न संमाइ ॥८७१९॥  
 मन्नामि कयत्थं चिय नियपुत्तं जेण तिहुयणदुलंभो ।  
 सयलजणसलाहणीओ तुमए समं जाओ संजोओ ॥८७२०॥  
 सव्वं पि हु पाविज्जइ नरिंद ! नियभागधेयजोएण ।  
 सज्जणसंजोगो पुण कहिं पि कइया वि संपडइ' ॥८७२१॥  
 इय भणइ जाव राया ताव वहु नियपरियणसमेया ।  
 ससुरपणामनिमित्तं समागया तत्थ अत्थाणे ॥८७२२॥  
 पसरंतदेहभूसणमऊहजालेण करिसियाइं व ।  
 मीणकुलाइं व जणलोयण(णा)इं देविं चिय सरंति ॥८७२३॥  
 उभयंसपाससंठियचमरधारिणिधुव्वमाणसियचमरा ।  
 मुहविजियससहरेण व भयपेसियनिययजोण्ह व्व ॥८७२४॥  
 अंतोनिगूढसुसुयंधकुसुमघणकसिणकेसपब्भारा ।  
 बहुभमरवंद्रसंछन्नकुसुमथवय व्व कप्पलया ॥८७२५॥  
 सोहइ सिरंमि जिस्सा कुसुमाभरणं विचित्तमणिरयणं ।  
 चउरयणायरसिरमुक्कविविहमणिरयणवरिसं व ॥८७२६॥  
 मणिकन्नपूरपसरियकिरणारुणवयणमंडलं वहइ ।  
 कयकुंकुमपंकविलेवण व्व लोएहिं सच्चविया ॥८७२७॥

घोलंतकन्नकुंडलकवोलपडिविंबभासुरा देवी ।  
 जंबुद्वीव्व(व)स्स सिरि व्व विमलदोसूर-ससिजुयला ॥८७२८॥  
 आमलयधूलमोत्तियमहल्लभारंसुथूलधणवट्ठा ।  
 पट्टंसुयपिहियपओहर व्व जा ससुरलज्जाए ॥८७२९॥  
 उज्जोइयभुवणयला संचरणरणंतकंचिमणिदामा ।  
 हरिविक्कमस्स कित्ति व्व सद्धरुवा परिक्कमइ ॥८७३०॥  
 पयपंकयरायमरालमहुरसंजायनेउरारावा ।  
 गंग व्व जयपवित्ता रयणायरपिययमाभिमुही ॥८७३१॥  
 पणमिज्जंती पुरओ अब्भुट्टियगरुयरायवंद्रेहिं ।  
 लज्जा-पसायरसमीसत्तन्निहित्तच्छिसयवत्ता ॥८७३२॥  
 पडिहारघोरहक्काससंकसंखुद्धभूमिपालेहिं ।  
 दिन्नपरिवियडमग्गा पुणरुत्तनिहित्तपियनयणा ॥८७३३॥  
 'जय देवि ! कुण पसायं दिट्ठीण इओ नियच्छ नियभिच्चे' ।  
 दूरोवविट्ठराएहिं सायरं इय नमिज्जंती ॥८७३४॥  
 'देवि ! पुरो अवहारसु सुसावहाणा ठवेसु पयकमलं' ।  
 इय कयकलयलसदा सन्निहियपरिग्गहजणेण ॥८७३५॥  
 आणंदजलमएहिं नीलुप्पलपत्तलद्धसोहेहिं ।  
 अग्घं व देइ रायं व्हूए नियनयणवत्तेहिं ॥८७३६॥  
 नीसहविमुक्कसव्वंगरणिरमणिभूसणारवकरालं ।  
 नमिओ ससंभमं नववहूए अज्जि(जि)यविक्कमो राया ॥८७३७॥

१. पदपङ्कजयो राजमरालवत् सज्जातो नुपूरारावो यस्याः, गङ्गापक्षे पयसि राजहंसास्तेषां सज्जातो नुपूरारावो यस्याम्, खंता. ॥

'होसु अविहवा वच्छे ! मह कुलपासायधारणधरिति !' ।  
 इय ससुरकयासीसा कमलसिरीसन्निहिं जाइ ॥८७३८॥  
 तत्थ नियसासुयाए कयप्पणामाऽहिणंदिया तीए ।  
 वच्चइ नियपासायं कुमारपासायसन्निहियं ॥८७३९॥  
 कयखंड-खज्जबहुभक्खभोज्जतित्तंमि सयलजियलोए ।  
 दिज्जंतकणयभूसणनेवत्थजहिच्छज्जणदाने ॥८७४०॥  
 पूइज्जमाणपुज्जे सम्माणिज्जंतरायसामंते ।  
 कयनियकुलकायव्वे चित्तंमि महोत्सवे रम्मे ॥८७४१॥  
 तो अमरसेणराया कहमवि मोयाविऊण रायाओ ।  
 संपूइओ ससेत्रो चंपानयरिं च संपत्तो ॥८७४२॥  
 हरिविक्कमो वि कुमरो अन्नोन्नघणाणुरायरमणीयं ।  
 अदिद्धिविओयदुहं परोप्परं विप्पियविहीणं ॥८७४३॥  
 ईसा-विसायरहियं कसायहीणं परूढवीसंभं ।  
 अवरोप्परगुणकित्तणसमहियवद्धंतघणरायं ॥८७४४॥  
 भुयणेक्कपेच्छणीयं विसिद्धजणसम्मयं मणभिरामं ।  
 सह भुयणसुंदरीए विसयसुहं सेवइ पहिद्धो ॥८७४५॥  
 एवं पइदियहपहिद्धमाणगरुयाणुरायरत्ताण ।  
 अमयघडिय व्व सरसा वच्चंति दिणा सुहं ताण ॥८७४६॥  
 अह अजियविक्कमो वि य रज्जधुराधरणपच्चलं कुमरं ।  
 नाउं पसत्थदियहे अहिसिंचइ निययरज्जंमि ॥८७४७॥  
 अहिगयसंसारअसारयत्तसंजायगुरुतरविराओ ।  
 सव्वपयत्थनियत्तियवामोहो निहयममक्का(का)रो ॥८७४८॥

हुयनिरुवलेवचित्तो सुविणयसंजोयसन्निहं सव्वं ।  
 खणदिट्ठनट्ठरूवं मन्नंतो नियविवेएण ॥८७४९॥  
 सुविसुद्धमणज्झवसायपयरिसुप्पन्नचरणपरिणामो ।  
 मोक्खेक्कबद्धलक्खो रयणायरसूरिपासंमि ॥८७५०॥  
 पवयणभणियकमेणं हरिविक्कमविहियसव्वकायव्वो ।  
 पणइणि-महोयहिजुओ पव्वइओ बहुजणसमेओ ॥८७५१॥  
 अब्भसियसाहुकिरिओ अहिगयनीसेससुत्तसारत्थो ।  
 कम्मपरिसाडणपरो विहरइ सह महियलं गुरुणा ॥८७५२॥  
 हरिविक्कमो वि राया रिउडूसहपसरिउब्भडपयावो ।  
 सयलंमि महीवलए एगच्छत्तं कुणइ रज्जं ॥८७५३॥  
 पणमंतमहारायाहिरायमणिमौडमसिणपयवीढो ।  
 पालइ वसुहं नय-विक्कमेहिं हरिविक्कमो राया ॥८७५४॥  
 अह भुयणसुंदरीए अंतेउरजायपट्टबंधाए ।  
 सुपसत्थलक्खणधरो उप्पन्नो मणहरो पुत्तो ॥८७५५॥  
 सुरविक्कमो त्ति नामं वोलीणऽव्वत्तबालसब्भावो ।  
 पत्तो कुमारभावं विन्नाण-कलागहणजोग्गं ॥८७५६॥  
 अल्लीणसयलविन्नाण-गुण-कला-रूव-लडह-लावन्नो ।  
 थोवदियहेहिं कुमरो संपत्तो जोव्वणं रम्मं ॥८७५७॥  
 माया-पिउपयभत्तो गुणप्पिओ पयइविणयसंजुत्तो ।  
 चाई कलासु कुसलो परक्कमी सोवरोहो य ॥८७५८॥  
 किं बहुणा ? जलहिंमि व रयणाणं तारयाण व नहंमि ।  
 लब्भइ जहा न अंतो गुणाण कुमरे तहा तंमि ॥८७५९॥

अह सो पसत्थदियहे जोगो त्ति वियाणिऊण राएण ।  
 सुरविक्रमोऽहिसित्तो जुयरज्जपयंमि गरुयंमि ॥८७६०॥  
 अह अन्नदिणे राया उवरिमतलमणिगवक्खउवविट्ठो ।  
 सह भुयणसुंदरीए जा अच्छइ वरविणोएहिं ॥८७६१॥  
 ता भुयणसुंदरीए उवसंतकसाय-विसयपसराए ।  
 वीसंभ-पणयगब्भं नरनाहो भणिउमाढत्तो ॥८७६२॥  
 'इह संसारे खणिगे लद्धं मणुयत्तणं किर नरेण ।  
 तह कायत्वं विउसा जह परलोए सुहं होइ ॥८७६३॥  
 इहलोयं विय अहमा इह-परलोयं च मज्झिमा केइ ।  
 परलोयमेव वंछंति राय! जे उत्तमा पुरिसा ॥८७६४॥  
 इह अहम-मज्झिमुत्तमपुरिसाणं देव! उत्तमा दुलहा ।  
 दह-पंच मज्झिमनरा अहमेहिं निरंतरं भुयणं ॥८७६५॥  
 चइऊण पढमपक्खे जइ लब्भइ उत्तमत्तमिह कह वि ।  
 ता भणह किं न लद्धं करिकन्नचलंमि जियलोए ? ॥८७६६॥  
 संसारसरूवमिणं नरिंद! परमत्थवज्जियं सयलं ।  
 तत्थ वि जो पडिबंधो सो परिणामे दुहनिमित्तं ॥८७६७॥  
 एसो अज्झवसाओ निरंतरं राय ! मह मणे फुरइ ।  
 देवस्स पुणो चित्तं सम्ममवगंतुमिच्छामि' ॥८७६८॥  
 ईसि(सी)सि विहसिऊणं भणियं हरिविक्रमेण ससिणेहं ।  
 'किं उज्जए! न नायं मह हिययं एत्तियदिणेहिं ? ॥८७६९॥  
 संति कलत्ताणि बहूणि जाणि परलोयविगघकारीणि ।  
 परलोयसाहयं पुण तुह सरिसं होइ पुत्तेहिं ॥८७७०॥



ता तुह भएण सुंदरि! न किं पि जंपेमि तुज्झ विसयंमि ।  
 तुह मुणियमणो संपइ तदत्थमहमुज्जमिस्सामि' ॥८७७१॥  
 इय जा ताणन्नोन्नं आलावा हुंति भवविरत्ताण ।  
 ता सहस च्चियं गयणे उल्लसिओ दुंदुहीसद्धो ॥८७७२॥  
 अह सुर-किन्नर-चारण-विज्जाहरथुव्वमाणपयकमलो ।  
 गयणंमि वीरसेणो तेहिं पहिद्धेहिं सच्चविओ ॥८७७३॥  
 दट्ठूण वीरसेणं हरिसवसुल्लसियबहलपुलयाइं ।  
 अब्भुद्धिऊण दोन्नि वि षणमंति नहद्धियं वीरं ॥८७७४॥  
 तो ताण पुरजणाण वि उद्धमुहच्छीण पेच्छमाणाण ।  
 सक्कावयारनियडे उज्जाणे संठिओ वीरो ॥८७७५॥  
 तो पौरजण-परिग्गह-अंतेउर-भुयणसुंदरिसमेओ ।  
 राया नियबलसहिओ वंदणवडियाए संचलिओ ॥८७७६॥  
 पत्तो उज्जाणवणं उत्तिन्नो करिवराओ विणयपरो ।  
 परिचत्तरायविंधो संपत्तो गुरुसमीवंमि ॥८७७७॥  
 तो भुयणसुंदरी नरवई य लोओ य परमभत्तीए ।  
 षणमंति पायकमलं वीरस्स असेसदुहदलणं ॥८७७८॥  
 तो सूरसेणमाइ-मुणिनिवहं षणमिऊण सव्वाइं ।  
 सुद्धवसुहायले उवविसंति नरनाहमाईणि ॥८७७९॥  
 अह परिवारसमेओ अलंकरंतो य गयणवित्थारं ।  
 सिरिमलयमेहजक्खो संपत्तो वीरपासंमि ॥८७८०॥  
 तो षणमिऊण वीरं असेसमुणिसंघसेवियं जक्खो ।  
 संभासिऊण रायं देविं च तहिं च उवविद्धो ॥८७८१॥

तो कहइ वीरसेणो केवलनाणोवलद्धपरमत्थो ।  
 गंभीर-धीरसद्देण सव्वपरिसाए धम्मकहं ॥८७८२॥  
 'भो ! भो ! निसुणह भव्वा ! सोउं भावेह सुद्धबुद्धीए ।  
 आयरह उवाएयं अणुवाएयं परिच्चयह ॥८७८३॥  
 धम्मस्स मूलहेऊ पयडियसंसारसयलसब्भावं ।  
 सम्मं नाणं तं च्चिय आयरणीयं पयत्तेण ॥८७८४॥  
 सम्मन्नाणविहीणो संसारासारयं न लब्भेइ ।  
 अमुणियभवनिग्गुन्नो न विरव्व(ज्ज)इ भवपवंचाओ ॥८७८५॥  
 संसारविरत्ताणं जम्हा जायति धम्मपारंभा ।  
 अविरत्ता संसारं परमत्थमईए गेण्हंति ॥८७८६॥  
 सम्मना(न्ना)णसमेओ दूरं निम्महियमोहमाहप्पो ।  
 सव्वमणिच्चमसारं मन्नइ संसारवित्थारं ॥८७८७॥  
 इय संसारे जं जं नराण वामोहकारणं होइ ।  
 तं तं सव्वमणिच्चं नायव्वं बुद्धिमंतेहिं ॥८७८८॥  
 हरिविक्कम ! तुह एयं रज्जं सत्तंगसंभवमुयारं ।  
 सामि अमच्चो रट्टं दुग्गं कोसो बलं मित्तो ॥८७८९॥  
 एयस्स पवहणस्स व अपुन्नपवणाहयस्स रज्जस्स ।  
 विहडंतस्स न सक्खा कीरइ देवासुरेहिं पि ॥८७९०॥  
 एत्थ फुडो दिट्ठंतो मज्झ पिया सूरनरवई तस्स ।  
 पुन्नक्खए न जाया रक्खा रज्जस्स केहिं पि ॥८७९१॥  
 इह नत्थि भूमिवलए परक्कमी सूरसेणपडितुल्लो ।  
 तेणाऽवि न विहडंतं नियरज्जं रक्खियं समरे ॥८७९२॥

न बिहफइमइसरिसो मंती संभवइ एत्थ भुयणमि ।  
 तस्स वि न बुद्धिविहवो विफु(प्फु)रिओ रज्जभंसंमि ॥८७९३॥  
 रइं अइपुइं पि हु रक्खियमवि सव्वुचदवभयाओ ।  
 पुन्नक्खये नियं पि हु परकीयं तक्खणे होइ ॥८७९४॥  
 दुग्गाइं सुदुग्गाइं वि गम्माइं हवंति वैरिलोयस्स ।  
 कोसो खलो व्व जाओ वैरिवसे पुन्नच्छि(छि)द्वम्मि ॥८७९५॥  
 सो करि-तुरय-महारह-पक्कलपाइक्कबलसमुग्घाओ ।  
 चित्तलिहिओ व्व न फुरइ नरस्स खीणेषु पुत्रेषु ॥८७९६॥  
 जे आसि पुरा मित्ता अप्पवसा वेरियाण ते घडिया ।  
 नियआउहनिवहाइं व पहरंति दिढं नियस्सेव ॥८७९७॥  
 इय नरवरिंद ! तइया सूरस्स सुरिंदसंथुयबलस्स ।  
 रज्जं छाहाखेइं व विहडियं पेच्छमाणस्स ॥८७९८॥  
 जं चिय सूरक्कंतं रज्जं कालंतरेण तं चेव ।  
 नरसीहेणक्कंतं नहं व ससिणा सुविच्छिन्नं ॥८७९९॥  
 नरसीहस्स वि अरिरायमउलिमणिमसिणपायवीढस्स ।  
 एक्कपए च्चिय नइं सुमिणयदिइं व तं रज्जं ॥८८००॥  
 इय भाविऊण हियए हरिविक्कम ! मा करेसु अणुबंधं ।  
 रज्जे पुत्त-कलत्ते विहवे तह विसयसोक्खे य' ॥८८०१॥  
 तो राय-रायपत्तीए परियणेणं च पौरलोएण ।  
 भणियं 'भयवं! एवं इच्छामो तुम्ह अणुसट्ठिं' ॥८८०२॥  
 अह भुयणसुंदरीए लद्धावसराए पुच्छिओ वीरो ।  
 'भयवं ! मह संदेहं अवणेह जहत्थकहणेण ॥८८०३॥

किं एस मलयमेहो जक्खो नियरिद्धीविहि(ह)वसंपन्नो ।  
 अम्ह मणुस्साणं पि य जणओ व्व पयासइ सिणेहं ? ॥८८०४॥  
 किं पयइकरुणयाए ? अहवा वि मुणिंद! पुव्वभवजणिओ ।  
 अत्थि एयस्स नेहो ? मह साहसु कोउयं गरुयं ॥८८०५॥  
 तो भणइ वीरसेणो 'वच्छे! इह अत्थि कारणं गरुयं ।  
 तं तुह संखेवेणं कहेमि निसुणेसु एगमणा ॥८८०६॥  
 इय(ह) अत्थि भरहवासे कोसलविसयंमि सयलगुणकलिया ।  
 विजया नामेण पुरी रिद्धिसमिद्धा बहुजणां य ॥८८०७॥  
 तत्थासि उसहदत्तो त्ति नाम वणिओ अणंतधणविहवो ।  
 तस्सासि कुलकलत्तं अणंतलच्छि त्ति पियभज्जा ॥८८०८॥  
 जिणवयणभावियाणं ताण कमेणं सुओ समुप्पन्नो ।  
 नामेण धम्मदत्तो पवित्तगुणभूसियसरीरो ॥८८०९॥  
 सो बालभावओ च्चिय कम्मखओवसमभावजोगेण ।  
 आसन्नभक्कयाए विसएसु परंमुहो जाओ ॥८८१०॥  
 संपत्तजोव्वणो वि हु अणुवमरूवो वि असमविहवो वि ।  
 नीसेसतरुणनारीअहिलसणीओ वि अच्चत्थं ॥८८११॥  
 उवसमसुहसंपत्तो निग्गहियक्कसाय-इंदियप्पसरो ।  
 संसारसुहविरत्तो सयणेसु य अपडिबद्धो य ॥८८१२॥  
 आपुच्छियमाउ-पिओ पासे सिरिसीलसेहरगुरुस्स ।  
 पव्वइओ जिणपवयणभणियविहाणेण धम्ममुणी ॥८८१३॥  
 अब्भसियसाहुकिरिओ नाणाविहतवविसेससुसियंगो ।  
 एकल्लविहारित्तं पडिवन्नो गुरुअणुन्नाए ॥८८१४॥

गामंमि एगरायं नयरंमि य पंचरायमहिवसइ ।  
 एवं सो विहरंतो पत्तो अडविं महाभीमं ॥८८१५॥  
 बहुकूरसत्तसंघायघोररन्नंमि तत्थ सो साहू ।  
 एकम्मि गिरिनिगुंजे अप्पडिबद्धो ठिओ पडिमं ॥८८१६॥  
 तस्सोवसमपहावेण मुक्कवेरा वराह-हरि-हरिणा ।  
 करि-वग्घ-गंड-गवया सेवंति मुणिदपयकमलं ॥८८१७॥  
 निसुणंति धम्मवयणं भद्दयभावंमि वट्टमाणा ते ।  
 रूसंति न अन्नोन्नं चयंति सावज्जमाहारं ॥८८१८॥  
 अह गिरियडंमि विसमे अदूरववहाणभूमिभायंमि ।  
 जमनयरी नामेणं पल्ली तत्थऽत्थि जयपयडा ॥८८१९॥  
 तत्थाऽऽसि वग्घराओ त्ति नाम पल्लीवई महारोदो ।  
 बहुसीह-वग्घ-वारणमारणनिरओ महापावो ॥८८२०॥  
 अह सो अन्नम्मि दिणे अच्छइ नियमंदिरम्मि उवविट्ठो ।  
 ता सहसा पल्लीए उच्छलिओ कलयलो गरुओ ॥८८२१॥  
 'किं किं ?' ति तेण पुट्ठे साहइ लोओ 'नरिंद! अइरोदो ।  
 सीहो अदिट्ठपुव्वो ओइन्नो पल्लिबाहिंमि' ॥८८२२॥  
 तो भणइ वग्घराओ 'रे ! दावह मज्झ कत्थ सो सीहो ?' ।  
 इय भणिऊणं सधणुं(णु) ससरो य सकत्तिओ चलिओ ॥८८२३॥  
 जा जाइ पल्लिबाहिं ता पेच्छइ घोरदंसणं सीहं ।  
 आवलियदीहनंगूलभासुरं भुयणभयजणयं ॥८८२४॥  
 हिमसेलसिहर-ससहरकरपंडुरगुरुसरीरसंठाणो ।  
 पासाओ य(व्व) वियरइ सव्वाहियसत्तविरियस्स ॥८८२५॥

सोहइ कडारकेसरसडाकडप्पो इमस्स देहंमि ।  
 करिसमरलंपडस्स व अंगे खित्तो व्व सत्राहो ॥८८२६॥  
 जस्सऽग्गकुडिलकढिणा नहरा दीसंति सभयसक्केण ।  
 एरावणरक्खडुं वज्जसलाय व्व से दिन्ना ॥८८२७॥  
 दादुब्भडमुहकुहरो किं इमिणा मह महो परिग्गहिओ ।  
 इय कवलिओ मयंको दीसई दाढामिसेण मुहे ॥८८२८॥  
 इय तं घोरसरूवं सीहं दट्ठूण वग्घराएण ।  
 आरोविऊण धणुयं तंमि पुणो संधिया भल्ली ॥८८२९॥  
 आयङ्किऊण मुक्का जा भल्ली ताव उड्ढिओ सीहो ।  
 पच्छिमपाएहिं तओ सणियं ओसरिउमाढत्तो ॥८८३०॥  
 तो धम्मदत्तमुणिणा दिट्ठा ते दो वि तव्विहसरूवा ।  
 उप्पन्नदओ भयवं काउस(स्स)ग्गं च संवरइ ॥८८३१॥  
 पयपयनिहित्तदिट्ठी आगच्छइ ताण सन्निहाणंमि ।  
 दोहिं(ण्हं) पि अंतराले ठऊणं अह इमं भणइ ॥८८३२॥  
 'भो वग्घराय ! मयराय ! दो वि निसुणेह मज्झ वयणाइं ।  
 मुक्कमणरोसभावा सम्मं परिणामसुहयाइं ॥८८३३॥  
 किं वग्घराय ! हरिणा अवरद्धं तुज्झ जेण मारेसि ? ।  
 उवयारो च्चिय सोहइ अनिमित्तो न उण अवयारो ॥८८३४॥  
 अवयारंमि पवित्ती सुकरा सव्वस्स न उण उवयारे ।  
 जं च्चेव दुक्करं स(सु)वुरिसेहिं तं अब्भसेयव्वं' ॥८८३५॥  
 तो भणइ वग्घराओ 'भयवं ! एसो सहावनिक्कुरुणो ।  
 सव्वसत्तोवघाई एत्थ वि कह तुम्ह अणुकंपा ?' ॥८८३६॥

तो भणइ मुणी 'सच्चं उवेक्खणीओ हु निग्गुणो अ(5)वस्सं ।  
 सगुणं च उवेक्खंतो अणंतसंसारिओ होइ ॥८८३७॥  
 चउवीसजोयणाडविपुच्चावर-दक्खिणुत्तरकमेण ।  
 सच्चो वि सावयगणो सगुण च्चिय मज्झ संगेण ॥८८३८॥  
 एण कारणेणं भणामि काऊण भरवसमिमस्स ।  
 मा मारसु मयरायं अकारणं पल्लिवरनाह! ॥८८३९॥  
 जइ पल्लिनाह! सीहो होइ न सदओ तुहोवरिं ता किं ।  
 कमवडिओ कह छुट्टसि इमस्स पयईए धीरस्स ? ॥८८४०॥  
 तुह वग्घराय! दिढभल्लिघायभीओ त्ति एस ओसरिओ ।  
 मा एवं कुणसु मणे किं तु दयापरवसो ल्हसिओ ॥८८४१॥  
 सीहम्मि तुमं डुक्को कोहग्गिपरव्वसो वहनिमित्तं ।  
 एसो उ हणंतमि वि तुमंमि कारुन्नमुव्वहइ ॥८८४२॥  
 कोहो हि नाम नरवर ! निरं(रिं)धणो एस होइ हव्ववहो ।  
 अग्गह-भूय-पिसायं कोह च्चिय परवसत्तमिणं ॥८८४३॥  
 अंधत्तणं एस सलोयणं पि कोहो तमं ससूरपि ।  
 कोहो चेव य क्रंपो सीयज्जरवज्जिओ होइ ॥८८४४॥  
 कोहो चेव पलावो अकारणो नरयसत्थवाहो य ।  
 तं किं न जं न कोहो अवयारपरंपराहेऊ ? ॥८८४५॥  
 गुणरयणभूसणाइं कोहो चोरो व्व तक्खण च्चेव ।  
 निलू(ल्लू)डिऊण पुरिसं विडंबए लोयमज्झमि ॥८८४६॥  
 भंडो व्व होइ कोहो संगं जो कुणइ तेण सो वि तहा ।  
 परिचत्तलज्जवसणो असब्भवयणाइं भासेइ ॥८८४७॥

मयि(इ)रारसो व्व कोहो संजणइ खणेण मणविवज्जासं ।  
अणुसिक्खंतं पि जओ गुरुं पि पियरं पि दूसेइ ॥८८४८॥  
कोहो मयरहरो इव कूरज्झवसायगाहदुल्लंघो ।  
जे उण पविसंति इमं निब्बोलं ते निमज्जंति ॥८८४९॥  
बहुवरिसपरूढं पि हु नेहं खणमेत्तसंभवो कोहो ।  
विसलेसो इव दूसेइ कूयजलं तक्खण च्चेय ॥८८५०॥  
मन्नंति मूढमइणो कुब्धेण मए परं पि अवयरियं ।  
एयं न मुणंति जहा सहियव्वं सयगुणं पुरओ ॥८८५१॥  
जं जह पुरओ कीरइ सुहासुहं तस्स तं च्चेय ।  
अप्पमि दप्पणे इव तक्खणमेत्तेण संकमइ ॥८८५२॥  
पच्चक्खेण परिक्खह परलोयं तक्खणेण जं होइ ।  
दुव्वयणे दुव्वयणं घाए घायं सुहं च सुहे ॥८८५३॥  
तो पल्लिनाह! कोहं परिणामदुहावहं परिच्चयसु ।  
सीहमि न चेव परं कुण मेत्तिं सव्वसत्तेसु ॥८८५४॥  
आबालभावओ च्चिय पल्लीसर! विसतरु व्व उप्पन्नो ।  
जयसंहारनिमित्तं अनायपरलोयपंथाणो ॥८८५५॥  
लद्धं पि अलद्धं च्चिय मणुयत्तं तुज्झ धम्म-गुणहीणं ।  
अज्जिणसि पावकिरियाहिं बहुतरं पावपब्भारं ॥८८५६॥  
पाणिवह-मंसभक्खण-मइरापाणं च चोरियमसच्चं ।  
परनारीपरिभोगो कुलव्वयं तुज्झ किर एयं ॥८८५७॥  
एयाइं पुण अवस्सं नेहिंति दुरुत्तरं महानरयं ।  
जम्हा विसमुवभुत्तं नियसामत्थं पयासेही ॥८८५८॥



अज्ज वि न किं पि नट्टं संभालसु सव्वहा वि अप्पाणं ।  
 चइऊण पावकम्मं परलोयसुहं कुणसु धम्मं ॥८८५९॥  
 पल्लिवइ! वरं सीहो तिरिओ वि हु पावकम्मविरयप्पा ।  
 मणुसो सविवेई वि हु नेय तुमं जो महापावो' ॥८८६०॥  
 तो जंपइ पल्लिवई 'एवं एयं न अन्नहा भयवं ! ।  
 वरमेसो गुणसीहो मा हं जो कोल्हुयसरिच्छो ॥८८६१॥  
 किं वयणमेत्तकेहिं किरियासुन्नेहिं इह पलावेहिं ? ।  
 जइ जोग्गो हं मुणिवर! ता धम्मं देसु परिसुद्धं' ॥८८६२॥  
 एवं सो भणिऊणं धणुयं भल्लीओ भंज्ज(ज)इ विरत्तो ।  
 उवसंतमणो मुणिणा पबोहिओ धम्मकहणेण ॥८८६३॥  
 कयपंचमुट्टिलोओ विरओ सुहुमयरपावट्ठा(ठा)णाण ।  
 पडिगाहइ पव्वज्जं निरवज्जायरणतल्लिच्छो ॥८८६४॥  
 तो धम्मदत्तसाहू लोएहिं पसंसिओ जहा 'एसो ।  
 तिरिए वि कूरकम्मे भिल्ले वि पबोहए भयवं' ॥८८६५॥  
 अह धम्मदत्तसाहुं भिल्लमुणी नो खणं परिच्चयइ ।  
 संजायगरुयनेहो तदे(दे)क्कचित्तो समं भमइ ॥८८६६॥  
 भयवं पि धम्मदत्तो सीहोवरिजायपरमपेम्मभरो ।  
 सीहो वि धम्मदत्ते अच्चंतं नेहसंब्बधो(बद्धो) ॥८८६७॥  
 सीहो कालकमेणं पइदियहविसुज्झमाणमणभावो ।  
 विहियाणसणो सम्मं ज्ञायंतो जिणनमोक्कारं ॥८८६८॥  
 मरिउं सणंकुमारे उववन्नो सत्तसागराऊसो ।  
 देवो दिप्पंततणू महिड्ढिओ सुप्पहविमाणे ॥८८६९॥

साहू वि विहरमाणो विजयानयरीए आगओ तत्थ ।  
 बहिरुज्जाणंमि ठिओ भिल्लमुणिंदेण परियरिओ ॥८८७०॥  
 तो उसहदत्तसेट्ठी लोओ सव्वो वि नयरिवत्थव्वो ।  
 मुणिधम्मदत्तपासे गुणाणुराएण संपत्तो ॥८८७१॥  
 अणुसासिया य सव्वे सुद्धजिणधम्मदेसणापुव्वं ।  
 समयं लद्धूण तओ भणियमिणं उसहदत्तेण ॥८८७२॥  
 'भयवं ! परंपराए निसुयं अम्हेहिं जह अरन्नंमि ।  
 कूरो वि सावयगणो पडिबुद्धो तुम्ह संगेण' ॥८८७३॥  
 तो भणइ धम्मदत्तो 'एवमिणं जह तए सुयं पुव्विं ।  
 एसो च्चिय पल्लिवई पच्चक्खो मुणिवरो जाओ ॥८८७४॥  
 एसो ताव मणुस्सो पल्लिवई मुणइ भासियं सुमइ(ई) ।  
 विमलमण-वयण-करणा तिरिया वि पबोहिया बहुया ॥८८७५॥  
 सा मह पबोहसत्ती जा पयडा भिल्लमुणिवरस्साऽवि ।  
 अहवा एयं पुच्छह लज्जामि सयं कहंतो हं' ॥८८७६॥  
 इय वत्तसरलयाए अप्पपसंसापराय(पराइ) वाणीए ।  
 मायापच्चयमसुहं कम्मं बद्धं मुणिंदेण ॥८८७७॥  
 तो उसहदत्तमाई सव्वे वि गया सकीयट्ठा(ठा)णेषु ।  
 तं वयणमगरहंतो मुणी वि अन्नत्थ विहरियओ ॥८८७८॥  
 नियआऊ(उ)यक्खएणं संलेहणपुव्वयं कयाणसणो ।  
 कयपायवोवगमणो पंचत्तं उवगओ साहू ॥८८७९॥  
 मरिऊणं उववन्नो तथे(त्थे)व सणंकुमारकप्पंमि ।  
 भिल्लमुणी वि य समणो मरिउं तत्थेव उववन्नो ॥८८८०॥

तो अवहिनाणजाणियपुव्वभवुप्पन्नपरमनेहभरा ।  
 चइऊणं उववन्ना एत्थेव य भारहे वासे ॥८८८१॥  
 तो भुयणसुंदरि ! तुमं मायापच्चइयकम्मदोसेण ।  
 सिरिरायगिहे नयरे वेसाकुच्छीए उप्पन्ना ॥८८८२॥  
 अणंगसिरीनामाए महिंदपालस्स वारविलयाए ।  
 जायाऽऽसि तुमं धूया नामेणं मयणमंजूसा ॥८८८३॥  
 जो उण महिंदपालो सो जीवो आसि सीहदेवस्स ।  
 जो उण सुमई मंती सो भिल्लमुणिस्स किर जीवो ॥८८८४॥  
 अह पुव्वभवंतरगुरुसिणेहभावेण सुमइवरमंती ।  
 अणुरत्तो तुह उवरिं मयणमंजूसजम्ममि ॥८८८५॥  
 चंदसिरीजीवो उण महिंदलच्छि त्ति आसि तंमि भवे ।  
 तस्स तुमं संपत्ता सहित्तणं जीवियब्भहियं ॥८८८६॥  
 पुण तंमि भवे सुंदरि ! महिंदलच्छीए संगसंबुद्धा ।  
 पालियजिणिंदधम्मा मरिऊण गयाऽऽसि सुरलोयं ॥८८८७॥  
 राया महिंदपालो सुमई वि य इंददत्तनिच्छूढा ।  
 संसारविरत्तमणा पेरंते मुणिवरा जाया ॥८८८८॥  
 मरिऊणं बंभलोए उववन्नाइं च तत्थ समकालं ।  
 सुमई महिंदपालो तुमं च जा मयणमंजूसा ॥८८८९॥  
 तत्तो कोसंबीए अणंतसेणस्स देवदत्ताए ।  
 दोन्नि वि जाया पुत्ता तुमं च भइणी समुप्पन्ना ॥८८९०॥  
 वर-भरह-बालचंदा कमेण नामाइं तुम्ह जायाइं ।  
 जिणधम्मपहावेणं गयाइं दो लंतयं कप्पं ॥८८९१॥

एसो वि य वरजीवो बंभलोयं गओ य तत्तो वि ।  
 उज्जेणीए वणिओ सुसावओ अह समुप्पन्नो ॥८८९२॥  
 तो सोहम्मो देवो तत्तो राया तओ वि मलयंमि ।  
 मलयमेहो त्ति जक्खो उप्पन्नो संपयं एसो ॥८८९३॥  
 लंतयकप्पाओ तओ सुरसोक्खं भुजिऊण पढमयरं ।  
 भरहो विं य चविऊणं जाओ हरिविक्कमो राया ॥८८९४॥  
 कय(इ)वयदिणेहिं पच्छ तुमं पि इह भुयणसुंदरी जाया ।  
 एएण कारणेणं जक्खस्स तुहोवरि सिणेहो ॥८८९५॥  
 हरि-धम्मदत्त-भिल्ला प्प(प)रोप्परं जायगुरुतरसिणेहा ।  
 पुण सुरलोए तिन्नि वि ठिया सुहं परमनेहेण ॥८८९६॥  
 वेसा-महिंद-सुमईभवंमि पुण तुम्ह वड्ढिओ नेहो ।  
 पुण सुरलोए वि तहा पुण वर-भरह-भइणिभवे ॥८८९७॥  
 इयमाइभवनिरंतरपवड्ढियं भुयणसुंदरि ! सिणेहं ।  
 अणुवत्तंतो जक्खो तेणेसो कुणइ तुह नेहं ॥८८९८॥  
 नेहो हि न्नाम वच्छे! कारणमेसो अणत्थ-सत्थाण ।  
 तं किमिह जं न दुक्खं सिणेहमूढा न पावन्ति ॥८८९९॥  
 तो देवीए भणियं 'भयवं! कह एत्तियस्स वि ममेयं ।  
 अतुच्छदुक्कुडस्स वि विवागविरसं फलं जायं ?' ॥८९००॥  
 तो भणइ वीरसेणो 'वच्छे ! अइदुक्करा हु पव्वज्जा ।  
 इह तुच्छं पि हु खलियं वज्जेयव्वं पयत्तेण' ॥८९०१॥  
 तो पुव्वभवायन्नणसमहियसंजायभवविराएहिं ।  
 दिट्ठो पजलंतो इव संसारो दोहिं वि जणेहिं ॥८९०२॥

'हा ! विरसो संसारो जणओ होऊण होइ भत्तारो ।  
 धूया. वि होइ भज्जा पुरिसो इत्थी दुकम्मेहिं' ॥८९०३॥  
 तो संसारसमुब्भवगरुयभउब्भंतखुहियहिययाइं ।  
 अह विन्नवंति वीरं पव्वज्जाकारणे दो वि ॥८९०४॥  
 'भयवं ! कुणसु पसायं काऊण दयं भवन्नवगयाइं ।  
 दिक्खादाणपयाणेण देव ! अम्हे समुद्धरसु' ॥८९०५॥  
 तो भणइ वीरसेणो 'अहासुहं मा करेह पडिबंधं ।  
 संसारविरत्ताणं किच्चमिणं सव्वसत्ताणं' ॥८९०६॥  
 तो पणमिऊण वीरं राया तप्पणइणी य पुरलोओ ।  
 पविसइ पुरिं पसंतो संसारसुहेसु निव्विन्नो ॥८९०७॥  
 तो सुपसत्थे दियहे कुमारसुरविक्रमं सरज्जंमि ।  
 अहिसिंचइ नरनाहो पर्यंडभुयदंडसामत्थं ॥८९०८॥  
 संमाणियसामंतो सुनिरुवियसयलपरियणं पुरओ ।  
 आपुच्छियपौरजणो निव्वत्तियरायकायव्वो ॥८९०९॥  
 सक्कावयारमाइसु चेइयभवणेषु सव्वरिद्धीए ।  
 अट्टाहियामहोत्सवमसमं कारावइ नरिंदो ॥८९१०॥  
 नीसेसं पि हु भुयणं अदरिदं कुणइ अत्थदाणेण ।  
 तह तेण तया दिन्नं जह से गिण्हंतया नत्थि ॥८९११॥  
 तो सुपसत्थे दियहे सुइभूओ कयविलेवणो राया ।  
 सह भुयणसुंदरीए आहरणविहूसियसरीरो ॥८९१२॥  
 देवंगवत्थनिवसण-कयमालइकुसुमसेहरो रुइरो ।  
 जयवारणमारूढो धुव्वंतो सयललोएहिं ॥८९१३॥

अह भुयणसुंदरी वि य आरूढा कणयघडियजंपाणं ।  
 सह जक्खपरियणेणं वज्जिरगंभीरतूरेहिं ॥८९१४॥  
 आपुच्छंताइं जणं संभालंताइं पउरवग्गं च ।  
 सुविसुद्धमाणसाइं उज्जाणवणं पहुत्ताइं ॥८९१५॥  
 सक्कावयारजिणहरपइड्डियं वंदिरुण पढमजिणं ।  
 जंति गुरुसन्निहाणं काउं तिपयाहिणं दो वि ॥८९१६॥  
 उत्तारंति सहरिसं निययसरीराओ भूसणाडोवं ।  
 तो पंचमुट्टिलोयं कुणंति सयमेव हिट्ठाइं ॥८९१७॥  
 तो केवलिणा सम्मं पवयणविहिणा विसुद्धचित्ताइं ।  
 पव्वावियाइं मुणिलिंगदाणपुव्वं अणुक्कमसो ॥८९१८॥  
 अत्रे वि तेहिं सहिया सामंता मंडलीयरायाणो ।  
 मंती पौरजणा वि य पव्वइया भवविरत्तमणा ॥८९१९॥  
 चंदसिरीगणिणीए समप्पिया भुयणसुंदरी अज्जा ।  
 हरिविक्कममाइ(ई)या मुणिणो नियसन्निहिं धरिया ॥८९२०॥  
 तो वीरसेणसूरी अउज्जनयरीओ जाइ चंपपुरिं ।  
 वसुपुज्जसन्निहाणे उज्जाणे ठाइ एगंमि ॥८९२१॥  
 तत्थ वि य अमरसेणं पडिबोहइ भवसरूवकहणेण ।  
 अह सो वि देवसेणं नियपुत्तं ठवइ रज्जंमि ॥८९२२॥  
 सयलंतेउरसहिओ सामंताईहिं परिगओ राया ।  
 बहुपौरजणसमेओ पव्वइओ वीरपासंमि ॥८९२३॥  
 अब्भसियसाहुकिरिया अहिगयनीसेससुत्तसारत्था ।  
 कयघोरतवच्चरणा हरिविक्कम-अमरसेणमुणी ॥८९२४॥

जोगो(ग) त्ति जाणिऊणं आधारयपयंमि ठाविया दो वि ।  
नियनियसंघसमेया विहरंति महीयलं धन्ना ॥८९२५॥  
एक्कारसंगसुत्तत्थधारिणी भुयणसुंदरी गणिणी ।  
साहुणिसंघे जाया पवि(व)त्तिणी गुणगणग्घविया ॥८९२६॥  
एत्तो य वीरसेणो पडिबोहंतो महीयलं सयलं ।  
पत्तो सेत्तुज्ज(त्तुंज)गिरिं सिद्धालयभूसियं रम्मं ॥८९२७॥  
तत्थ वि असेससुर-सिद्ध-जक्ख-विज्जाहरिंदकयसेवो ।  
मण-वयण-कायविरओ विसुद्धसेलेसिकरणेण ॥८९२८॥  
निहयभवोवग्गाहगकम्मो नीसेसबंधणविमुक्को ।  
सिवमचलमक्खयसुहं मोक्खं पत्तो निराबाहं ॥८९२९॥  
अह सूर-विचित्तजसो(सा) असोय-सेहरय-बंधुयत्ता य ।  
उप्पन्नविमलनाणा सेत्तुज्जे(त्तुंजे) निव्वुइं पत्ता ॥८९३०॥  
तो वीर-सूरविरहे देवासुर-जक्ख-किन्नर-नराण ।  
जायं व निरालोयं भुयणं सोयंधयारेण ॥८९३१॥  
‘हा निम्मलनाणपईव! वीर! हा मोहतिमिरनिम्महण! ।  
हा हा जएक्कबंधव! तए विणा तिहुयणं सुन्नं ॥८९३२॥  
न परं परक्कमेणं तुमए भुयणाहिवत्तणं पत्तं ।  
अणुवमसाहुगुणेहिं वि जाओ मुणिचक्कवट्टी वि’ ॥८९३३॥  
इयमाइ सोइऊणं पुणो पुणो तग्गुणा अणुसरंता ।  
सुर-असुर-खइ(य)रमाई सव्वे वि गया सभवणाइं ॥८९३४॥  
हरिविक्कमसूरी वि हु भव्वंभोरुहपबोहसूरो व्व ।  
तिहुयणनासियदोसो पयासियासेसभवभावो ॥८९३५॥

विहरंतो धरणियलं अहाविहारेण एइ चंपाए ।  
 सिरिअमरसूरिणा सह ठवंति सपएसु आयरियं ॥८९३६॥  
 नामेण धम्मघोसं अमरस्स पयंमि मंजुघोसं च ।  
 निडुवियअडुकम्मा अंतगडा केवली जाया ॥८९३७॥  
 दोसु वि गएसु मोक्खं हरिविक्रम-अमरसेणसूरीसु ।  
 सिरिभुयणसुंदरीए केवलनाणं समुप्पन्नं ॥८९३८॥  
 विहरंती धरणी(णि)यलं निच्छिंदंती जणस्स संदेहं ।  
 मोहं च निम्महंती भुवणुवयारं च जणयंती ॥८९३९॥  
 पत्ता तमेव सेलं मलयगिरिं गरुयकंदरगहीरं ।  
 तं चेव तावसासमसमीवचंदप्पहजिणिंदं ॥८९४०॥  
 चंदसिरी विजयवई सिंगारवईयमाइअज्जाहिं ।  
 उप्पन्नकेवलाहिं सह द्विया फासुयपएसे ॥८९४१॥  
 सिरिमलयमेहजक्खेण पूइया परमरिद्धिविहवेण ।  
 ठावइ पवत्तिणिपए सीलवइं नाम वरअज्जं ॥८९४२॥  
 तो केवलिपरियायं पालेउं भुयणविहियउवयारं ।  
 विरयमण-वयण-काया विसुद्धसेलेसिकरणेण ॥८९४३॥  
 खवियभवोवग्गाहगकम्मंसा सव्वबंधणविमुक्का ।  
 सिवमलय(मयल)मक्खयसुहं मोक्खं पत्ता निराबाहं ॥८९४४॥

एत्थ समप्पइ सिरिभुयणसुंदरी नाम वरकहा एसा ।  
 फुड-वियड-सलिल(ललि)यक्खर-गाहाहिं विणिम्मिया रम्मा ॥८९४५॥

[प्रशस्तिः]

इह आसि जयपसिद्धो निम्मलनाइल्लुकुलसमुब्भूओ ।  
 तव-सील-संजमरओ समुइसूरि त्ति आयरिओ ॥१॥



नियहत्थदिक्खिण्णं सीसेणं तस्स अणुवमगुणस्स ।  
 सिरिविजयसीहनामेण सुरिणा विरइया एसा ॥४॥ ॥२॥  
 लक्खण-छंदविहीणं भट्टालंकारमागमविरुद्धं ।  
 जं किं पि एत्थ रइयं सोहंतु विसारया तमिह ॥४॥४॥ ॥३॥  
 इह आसि मोढवंसे डाऊयसेट्ठि त्ति सावओ गुणवं ।  
 तस्साऽऽसि नेढनामा पियभज्जा सीलगुणकलिया ॥४॥  
 पुन्नोदओ व्व ताणं पसंसणीओ सुओ समुप्पन्नो ।  
 गोवाइच्चो नामं सव्वगुणात्तं कियसरीरो ॥५॥  
 जस्स पसंतं रु(रू)वं वेसो वि अणुब्भडो महुरवाणी ।  
 परउवयारे बुद्धी सुपत्तदाणे महावसणं ॥६॥  
 भत्ती जिणिंदचरणे अविचलसम(म्म)त्तभावियं चित्तं ।  
 विसएसु अलोलुत्तं विणिग्गहो राय-दोसेसु ॥७॥  
 इयमाइविविहगुणगणसंखं को मुणइ तस्स धन्नस्स ।  
 खीरोव(द)हिंमि उज्जलकल्लोलाणं च परिमाणं ॥८॥  
 अह तस्स आसि पुत्विं माउपिया पासिलो त्ति सुपसिद्धो ।  
 ————— सोमेसरनयरवत्थच्चो ॥९॥  
 तस्स नियकम्मपरिणइवसेण साहीणनियकलत्तस्स ।  
 तह विं न जाओ पुत्तो संताणं जो समुद्धरइ ॥१०॥  
 तो तेण अपुत्तेणं दोहित्तियजायपक्खवाएणं ।  
 पुत्तत्तणेण गहिओ गोवाइच्चो बहुगुणहो ॥११॥  
 मायामहेण तेणं सोमेसरसंठियं सुहाधवलं ।  
 गोवाइच्चस्स तओ दिन्नं धवलहरमुत्तुंगं ॥१२॥

गोवाइच्चेण वि मुणियविरससंसारखणिगभावेण ।  
 सिरिउज्जयंततित्थे समप्पियं नेमिनाहस्स ॥१३॥  
 भणिओ य तेण संघो गोवाइच्चेण पंजलिउडेण ।  
 मुणिसंघनिवासत्थं एस मढो अप्पिओ तुम्ह ॥१४॥  
 अह तंमि सुहाधवले तिभूमिए परमरम्मयानिलए ।  
 गोवाइच्चविदिन्ने संघमढे विरइया एसा ॥१५॥  
 तस्स उवट्ठंभेणं वत्थासण-सयण-पत्तमाईहिं ।  
 निच्चित्तमाणसेणं रइया सिरिविजयसीहेण ॥१६॥  
 निष्फाई(इ)यया एसा लिहाविया तेण पोत्थयसएसु ।  
 गुणपक्खवायमणसा पयासिया सयलभुयणंमि ॥छ॥ ॥१७॥  
 अणवच्छिन्नो पसरइ जा जिणधम्मो विदेहभूमिसु ।  
 ता भुवणसुंदरिकहा वित्थरउ जयंमि अक्खलिया ॥छ॥ ॥१८॥  
 श्रीमद्गूर्जरवंशप्रभवः सम्भवदनेकगुणविभवः ।  
 साधुहरिचन्द्रसूनुः पुण्यश्रीकुक्षिसम्भूतः ॥१९॥  
 दुःस्थार्थिसन्तापहरः प्रसिद्धः स्वच्छशयश्चारुगुणान्वितश्च ।  
 मृत्कोपमानो वसुमान् सुवृत्तः समस्ति साधुर्नयपालनामा ॥२०॥  
 ॥युग्मम्॥  
 तस्याऽस्ति जाया रयणाभिधाना दानादिसद्धर्मरता प्रधाना ।  
 पुत्रास्त्वमी प्रौढविवेकवर्या ख्यातास्त्रयो निर्मितसङ्कार्याः ॥२१॥  
 आद्यो वदान्यः कृतिलोकमान्यः प्राज्ञः सुधन्योऽजनि कीर्त्तिसिंहः ।  
 दानोद्यतोऽन्यस्त्विह देवसिंहः साल्हाभिधः साधुवरस्तृतीयः ॥२२॥  
 साधुर्नयपालपत्नी रयणादेवी विवेकधर्मज्ञा ।  
 पुस्तकमेनं श्रीभुवनसुंदरीसत्कथासत्कं ॥२३॥

आत्मश्रेयोर्थमथ व्याख्यापयितुं जनोपकाराय ।

जगृहे मूल्येन मुदा बाण-रस-शिखीन्दुमित्तवर्षे ॥२४॥

पुष्पदन्ताविमौ यावद्वर्तेते गगनाङ्गणे ।

बुधैर्व्याख्यायमानोऽयं तावन्नन्दतु पुस्तकः ॥२५॥

॥ समाप्तः ॥

॥ भुवनसुन्दरीपुस्तकं सा.नयपालभार्यारयणादेव्याः ॥

## शुद्धिपत्रम् ॥

पत्र	गाथा	अशुद्धिः	शुद्धिः
२	१५	साहिउ	साहिउ(ओ)
२	१९	सल्लं च	सल्लं व
४	३१	०प्पयार्णं०	०प्पयाणं०
४	३६	जत्थ	जत्थं
४	४०	कमलां०	कमला०
४	टि.	२ प्रदोषः	अत्र प्रमादतः स्थापितेयं टिप्पणी ।
५	४७	पउसो	पउ(ओ)सो
५	टि.		१. प्रदोषः ॥
६	५४	पुलिणरंभाहिं	पुलिण-रंभाहिं
६	७०	हरिविक्कुमस्य	हरिविक्कुमस्स
८	७८	अहसा	सहसा
९	९२	हरि०	“हरि०
१०	९९	अन्नायवराहकखडयं०	अन्नायधराहरखडयं०
१०	१०४	कायव्वा	कायव्वा”
१०	१०६	०ऊणं	०ऊणं
११	१०८	एत्थंतरम्मि	एत्थंतरम्मि
११	११६	गम्मंतं०	गम्मंतं०
१४	१४२	पि व	पिव
१५	१५८	०कुमारमकयं०	०कुमारो व्व कयं० एवं स्यात् ॥
१६	१६७	०सिरजाणुं०	०सिर-जाणुं०
१७	१७७	भो भो	“भो भो
१७	१७८	उवओगं	उवओगं”
१७	१८१	हरि०	“हरि०

पत्र	गाथा	अशुद्धिः	शुद्धिः
१७	१८१	पुज्जो	पुज्जो”
१९	१९३	०वसती सहंगवेकखेव०	०वसनीसहंगवकखेव०
१९	१९५	०भववारिचिनिपतित०	०भववारिधिनिपतित०
२५	२६२	रणज्जुइं (?)	रणज्जुइं
२६	२७७	०संकेत०	०संकंत०
२७	२८१	सत्तं का	सत्तं वा
३२	३४०	डुकुह	डुकुह
३३	३५०	हियप०	हियप०
३४	३६४	०मालईदाम०	०मालईदाम०
३४	३६७	खणभरहरहस्स०	खण-भरह-रहस्स०
३४	३६७	०कहाओ०	०कहाओ(उ)०
३५	३६९	०विसोहणो	०विसोहणो(णे?)
३८	टि.	तत्र च]	तत्र च
३९	४२१	पुरं विसं	पुरं(परं ?) विसं (विसय?)
४०	४२९	०णक्खिन्नणे	०णक्खिन्न(खि)न्नेण
४३	४५५	एवंविहरपरि०	एवंविहपरि०
४४	४७५	देवत्ति	देवन्ति
४४	४७६	०लहम्मि	०लेहम्मि
४७	५०१	देव	देव !
४८	५१०	जाणासणदुविहसंसया	जाणा-सण-दुविह-संसया
५१	५४३	०माण गुण०	०माणगुण०
५१	५४६	०सनिविट्ठ०	०स(सु)निविट्ठ०
५५	५९६	दीहरघोर महो०	दीहरघोरमहो०
५७	६१५	निरवइणा	नरवइणा
६४	६८८	संतोसमुव्वहइ(?)	संतो(ता)समुव्वहइ
६७	७२१	पविसर	पविसइ

पत्र	गाथा	अशुद्धिः	शुद्धिः
६७	७२१	कयपंचगप(प्प)णामा	कयपंचंगपणामा
७०	७४९	०पट्टिया खेत०	०पट्टियाखेत०
७०	७५६	गोसेयणाई०	गोसेयणाई(इ)०
७१	७६२	तेणा वि	तेणावि
७२	७७१	लुहुडुक्खुडाहु (?)	लुहुडुक्खुडा
७४	८००	सित्तं त०	सित्तंत०
७४	८००	०वेहीओ	०विहीओ
७४	८०२	निव्वुडुण०	निवुडुण०
७४	८०२	०कुसुद्ध०	०कुसद्ध०
७५	८०३	पक्खित्तकुसुम०	पक्खित्तसुम०
७५	८१३	जाइज्जइ	जाइज्जए
७६	८१७	नरवइ	नरवइ !
७९	८५३	वणस्सइ०	वणस्सई०
८०	८५८	मलिणो	मलीणो
८२	८९०	जण-	जिण-
८५	९१४	वा(या?)ण(?)	वा(या)ण(जाण)
८५	९२२	तुज्झविहियसेवाए	तुज्झ विहियसेवाए
८६	९३१	दक्ख०	दुक्ख०
८७	९४५	अविसंता	अविस्संता
८८	९५४	उट्ठाहो वि०	उट्ठाहोवि०
८८	९५५	चक्खु०	चक्खु०
९०	९३९	विहियउचिय०	विहिय उचिय०
९०	९७५	०विसेसमुल्ल०	०विसेससमुल्ल०
९२	९९७	संपत्तसुरिंद०	संपत्तसुरासुरिंद०
९३	१००३	(द्विय) गुण०	(द्विय)-गुण०
९४	१०१४	थिर सुस्सरविसेस०	थिरसुस्सरसरविसेस०

पत्र	गाथा	अशुद्धिः	शुद्धिः
१०१	१०९१	बार (?धीर?) तूररवो	बारतूररवो
१०३	१११४	०कोट्टेण(?)	०कोट्टेण
१०३	११२०	विहूसयं	विहूसियं
१०६	११५३	एयइ थणवढा (?)	एयथणवढा (?)
१०८	११७२	विरहरुयवह०	विरहहुयवह०
१११	१२०३	मज्झन्नत्थ	मज्झ नन्नत्थ
११२	१२१५	पच्छावसरे	एत्थावसरे
११३	१२२७	ममा वि	ममावि
१२६	१३७५	मन्नो	मन्ने
१२९	१४०९	बंधुदत्त०	बंधुदत्त०
१३१	१४३०	मन्नाओ	मन्नाओ(मो?)
१३३	१४४७	पयावसहमाणोव्व	पयावमसहमाणोव्व
१३४	१४६२	सोहम्मपुरा०	सोहम्मसुरा०
१४१	१५३७	०पयडत्थहत्थ०	०पयडत्थ[म]हत्थ०
१४२	१५४४	परिहरियरज्ज०	परिहरिय रज्ज०
१४२	१५५०	०माणंदकारच्चं	०माणंदकारयं
१४३	१५५८	कम्मघम्म०	कम्मधम्म०
१४४	१५६९	रणमेरिं	रणभेरिं
१४५	१५८६	सेन्नसंरवा	सेन्नसंखा
१४७	१६०५	संधेई	संधेई
१४९	१६२०	छएहिं	छहिं
१५०	१६४१	भणिरु णं	भणिरुणं
१५०	१६४१	विज्ज०	विज्जु०
१५१	१६४७	दाऊ ण	दाऊण
१५१	१६४८	भमाडिरु णं	भमाडिरुणं
१५१	१६५२	उद्दालिरु णं	उद्दालिरुणं

पत्र	गाथा	अशुद्धिः	शुद्धिः
१५२	१६५९	भणिकु णं	भणिकुणं
१५३	१६६९	पडिपेल्लिकु ण	पडिपेल्लिकुण
१५४	१६८३	अवहरिकु ण	अवहरिकुण
१५४	१६८४	चित्तिकु ण	चित्तिकुण
१६१	१७६२	सायखयणहिं	सायखयणेहिं
१६२	१७७३	०जणया	०जणया य ।
१६९	१८४५	पुण	पुणो
१६९	१८४७	विसूरई	विसूरइ
१७१	१८६१	करेयव्व	करेयव्वा
१७१	१८६८	सत्तरस०	सत्तरस०
१७२	१८७४	आकिचिन्नं	आकिचन्नं
१७९	पं.२०	१९८	१९५८
१८३	१९९८	गुरुसीहसद्दवित्तथ०	गुरुसीहसद्दवित्तथ०
१८४	२००७	एत्थतरम्मि	एत्थंतरम्मि
१८६	२०२८	सूरुगमउदइ०	सूरुगमउदयइ०
१८६	२०३१	ससय्यं तरंडं	ससय्यतरंडं
२०१	२१९८	पणमत्थं	पणामत्थं
२०३	२२२१	धूया अद्दंसण०	धूयाअद्दंसण०
२०४	२२३२	नियधूयं	नियं धूयं
२०५	२२३७	सम्मं	समं
२०९	२२७९	जणणि	जणणि०
२१५	२३४८	निहित्तयणाहिं	निहित्तनयणाहिं
२१८	२३८२	०जणपाण	०जणयाण
२२०	२४१०	बाहिरज्जाणे	बाहिरुज्जाणे
२४०	२६२८	वीर ! नयरे	वीरनयरे
२५२	२७५५	(नरवर !?)	(नवर ?)



पत्र	गाथा	अशुद्धिः	शुद्धिः
२५८	२८२५	०कुमर०	०कुमार०
२५९	२८३७	चङ्गु ण	चङ्गुण
२६३	२८७८	पसत्त०	पसत्थ०
२६४	२८८५	(य)	[य]
२६४	२८९१	समाराहाण०	समाराहण०
२६५	२८९६	असेससत्ताणचेट्टियं	असेससत्ताण चेट्टियं
२७६	३०१९	अप्पाणं (?)	अप्पाणं
२७७	३०३०	सामत्थो	सामत्थं
२७७	३०३०	संभविही(?)	संभविही
२७९	३०५४	पट्टुओ	पिट्टुओ
२८२	३०८७	फलहनिम्मयं	फलहनिम्मियं
२८४	३११५	वीरसेणो नामो	वीरसेणनामो
२९६	३२४०	एत्थंतरंभि	एत्थंतरंमि
२९८	३२६९	परोप्परमच्छेरेण	परोप्परमच्छरेण
३०३	३३२०	हरस०	हरिस०
३०४	३३२५	बालत्तणं मि	बालत्तणंमि
३०८	३३६९	निययावल्लय०	निययावल्लयं०
३०९	३३८१	(व)	[व]
३२६	३५६७	गब्भवणाओ	गब्भभवणाओ
३२७	३५८१	नत्थिन	नत्थि न
३३१	३६२६		सुद्धिकरणत्थं
३३७	३६८७	अद्धिद०	अद्धिदु०
३४०	३७२६	नीवाडेइ	निवाडेइ
३४१	३७३०	विणिच्छियं	विणिच्छयं
३५४	३८७८	हियत्तमइ	हियत्तमई
३६५	—	४९९९	३९९९

पत्र	गाथा	अशुद्धिः	शुद्धिः
३६९	४०४५	जह	जइ
३७२	४०७२	खुदुक्कइ	खुडुक्कइ
३७२	४०७७	य (?)	य
३८१	४१७१	भुयसिहर ल्हसिय०	भुयसिहरल्हसिय०
३९०	४२७१	जहन्नाणा	जहन्नाण(?)
३९२	४२९६	?	(?)
४०२	४४०५	वुढि(डूढ)	वुढि(डिढं)
४०५	४४३७	पाहाऊय०	पाहाउय०
४१२	४५१६	तत्था हं	तत्थाहं
४१३	४५२५	०सहस्स निहओ	सहस्सनिहओ
४१४	४५३६	तहाय	तहा य
४२१	४६१५	परिग्गहंअपरिमाणं	परिग्गहं अपरिणामं
४२९	४६९८	वद्धावयणं	वद्धावणयं
४४७	४८१५	एव माइ	एवमाइ
४४७	४९०४	पहिड्डि०	पहिड्डु०
४५३	४९६८	सुंदरुज्जाणो	सुंदरुज्जाणे
४६२	५०६८	०भुयणप्फार०	०भुयणफार०
४७२	५१७०	भुणिवरेण	मुणिवरेण
४७८	५२४३	त्तिदुक्खदड्डु०	त्ति दुक्खदड्डु०
४८१	५२७६	०भमडंत(?)	०भमडंत०
४८३	५२९३	सुटतु	सुटतु
४८४	५३०८	दटतुं	दटतुं
४८४	५३०९	(य)	[य]
४८४	५३१०	भणित	भणिए
४८४	५३११	बिहिरिय०	बहिरिय०
४९६	५४४१	(ड)	(उ)

पत्र	गाथा	अशुद्धिः	शुद्धिः
४९८	५४५७	नउण	न उण
५०२	५५०३	०पिया(?)	०पिया
५०४	५५३०	मज्झं	मज्झ
५०४	टिप्पणी	१.२. एत०	१.२. [ ] एत०
५०४	टिप्पणी	३. एत०	३.[ ] एत०
५३५	५८७१	वावरयंति	वावारयंति
५५८	६११५	०सुत्ते व्व	०सुत्तं व्व
५६२	६१६३	उवएसं न०	उवएसं [ते] न०
५६४	६१८९	गोयर	गोयरे
५६८	६२३१	०लुद्दोसं	०लुद्दो(दे)सं
५७१	६२६५	०सद्दसदोह०	०सद्दसंदोह०
५७४	६२९७	भणिय 'मिस्सा	भणिय'मिस्सा
५७६	६३२२		वारविलयाण
५८६	६४२४	पुच्चावरक्खि०	पुच्चावरदक्खि०
५८७	६४४३	इड्ढसेसमु०	इड्ढंसे समु०
५९०	६४७४	०सजुत्तो	०संजुत्तो
५९८	६५५५	०पडिमे	०पडिमं
६००	६५८६	अविलोयइ	अवल्लोयइ
६०५	६६३०	पुरिहरि०	परिहरि०
६१५	६७५०	किं कि ति	किं किं ति
६१७	६७६२	दासत्तं ति०	दासत्तं [पुण?]ति०
६२४	६८४७	सकरुणयं	करुणयं
६३२	६९२८	जं बाल०	जं बाल०
६४१	७०२६		वच्चंति
६४१	७०३१		वेरग०
६४६	७०८६	सुपसत्थ०	सुप्पसत्थ०

पत्र	गाथा	अशुद्धिः	शुद्धिः
६४८	७१०६	तहा	तह
६५६	७१९६	वीयं	बीयं
६५६	७२००	बुज्झसे	बुज्झसे
६६९	७२३७	बहु०	बहु०
६६९	७२३९	बहुभमरमत्तबालाण	बहुभमरमत्तबालाण
६६९	७२४०	०पवणुव(ब्ब)०	०पवणुवे(ब्बे)०
६७८	७४३२	वीरसेण०	वीरसेण०
६८०	७४५९	०बोहित्थ०	बोहित्थ०
७००	७६७५	तेण	तेणं
७०४	७७१८	भणियं	भणियं(रिं?)
७१३	७८२४	बाला	बाला
७१६	७८५६	एत्तोच्चियस्स	एयोच्चियस्स
७२८	७९८३	ठिप्पिज्जइ	ठिप्पिज्जइ
७४२	८१३५	अवहं	अवहं(वहं?)
७७१	८४६३	अवन्नं	अधन्नं
७७४	८४९०	विवाह०	वीवाह०
७७५	८४९८	कयजणणिपयणामो	कयजणणिपयपणामो
७७८	८५४०	०कयपक्खिणं	०कयपयक्खिणं
७८१	८५७१	देवि	देविं
८०७	८८५१	परं पि	परम्मि
८१४	८९२५	आयासय०	आयरिय०

पृ. २१२ पर भूलसुधार

तो दूरमुद्धिऊणं आरुढो तस्स खंधदेसम्मि ।  
 हंतूण मम्मदेसे वसीकओ तक्खण च्चेय ॥२३२२॥  
 आणानिदेसवती संजाओ वारणो कुमारस्स ।  
 तो तज्जिओ तुरंतो सरमज्जे गंतुमारद्धो ॥२३२३॥

पृ. २१३ पर भूलसुधार

अणुसंधियकरणवसा पयथामपहावपेल्लिओ दूरं ।  
 पत्तो अकिलेसेणं करिराओ पच्छिमं तीरं ॥२३२६॥  
 तो उद्धिऊण कुमरो वियडगई पंगणाओ नीसंको ।  
 पत्तो दुवारदेसं सतोरणं देवभवणस्स ॥२३२७॥



